

**YUS PAPI**

**Shuarjai Yus**

**YAMARAM CHICHAM**

**Najanamu**



**YUS PAPI**  
**Shuarjai Yus**  
**YAMARAM CHICHAM**  
**Najanamu**

El Nuevo Testamento en el idioma  
Shuar del Ecuador

Primera edición  
© 1983, Sociedad Bíblica Internacional

Segunda edición  
© 2012, Wycliffe

[www.ScriptureEarth.org](http://www.ScriptureEarth.org)



Este obra está bajo una licencia Creative Commons  
<http://creativecommons.org/licenses/by-nc-nd/3.0>

# ÍNDICE

## De los libros del nuevo testamento con las abreviaturas de sus títulos

Matau . . . . .	Mat. . . . .	1
Márkus . . . . .	Mar. . . . .	64
Rúkas . . . . .	Ruk. . . . .	104
Juaṇ . . . . .	Jṇ . . . . .	173
Túramurṇ . . . . .	Túr . . . . .	220
Rúmanam . . . . .	Rum . . . . .	285
Emka Kurintiunam . . . . .	1 Kur . . . . .	310
Atak Kurintiunam . . . . .	2 Kur . . . . .	335
Karaseanam . . . . .	Kar . . . . .	352
Ipisiunam . . . . .	Ipi. . . . .	363
Jiriusnum . . . . .	Jir . . . . .	372
Kurusenam . . . . .	Kurs . . . . .	379
Emka Tisarúnikianam . . . . .	1 Tis . . . . .	386
Atak Tisarúnikianam . . . . .	2 Tis . . . . .	393
Emka Timiutéun . . . . .	1 Tim . . . . .	397
atak Timiutéun . . . . .	2 Tim . . . . .	404
Titium . . . . .	Tit. . . . .	410
Jirimiúṇcan . . . . .	Jirm . . . . .	414
Israernum . . . . .	Isr . . . . .	416
Sántiak aarma . . . . .	San . . . . .	435
Pítiur emka aarma . . . . .	1 Pit . . . . .	442
Pítiur atak aarma . . . . .	2 Pit . . . . .	451
Juaṇ emka aarma . . . . .	1 Jṇ. . . . .	456
Juaṇ atak aarma . . . . .	2 Jṇ. . . . .	463
Juaṇ nuyá aarma . . . . .	3 Jṇ. . . . .	465
Jútas aarma . . . . .	Jut. . . . .	467
Apukarípsis . . . . .	Apu . . . . .	470
Mapas. . . . .		498



# Yúsan Shiir Chichamen

## MATEU

### aarmia nu

---

Jesukrístu weat̄ri

(Ruk. 3.23-38)

**1** <sup>1</sup>Jesukrístu weat̄ri ju áiniawai. Tura ashí nan̄kaamas ti uunt weat̄ Tawitcha Apraámsha áiniawai. <sup>2</sup>Apraáma uchirí Isak. Tura Isaka uchirí Jakup. Jakupa uchirísha Jutá ni yachij̄j̄i. <sup>3</sup>Tura Jutá uchirín Páresan tura Sarancha Tamar jurermiayi. Páresa uchirísha Esum, nuna uchirísha Aram. <sup>4</sup>Nuna uchirísha Aminiatáp. Nuna uchirísha Nasun. Nuna uchirísha Sarmun. <sup>5</sup>Sarmun̄ka uchiríncha Púusan Raap jurermiayi. Puusa uchirín Uwitian Ruut jurermiayi. Uwitia uchirísha Isaí. <sup>6</sup>Nuna uchirísha uunt akupin Tawit. Uunt akupin Tawitia uchiríncha Sarumúnkan Patsepa jurermiayi. Patsepasha emka Uríasa nuweeyayi.

<sup>7</sup>Sarumúnka uchirí Rupuam. Nuna uchirísha Apías. Nuna uchirísha Asa. <sup>8</sup>Asa uchirísha Jusapát. Nuna uchirísha Juram. Nuna uchirí Usías. <sup>9</sup>Usíasa uchirí Jutam. Nuna uchirí Akas. Nuna uchirí Esekías. <sup>10</sup>Esekíasa uchirí Manasés. Nuna uchirí Amun. Nuna uchirí Jusías. <sup>11</sup>Jusíasa uchirí Jekunías ni yachi armia nuj̄ai. Nūj̄ Papirúnianmaȳa shuar Israer shuaran mesetj̄ai nupetkar Papirúnia nun̄kanam achirar júkiarmiayi.

<sup>12</sup>Nu ukunman̄ka Jekuníasa uchirí Saratiár akiiniamiayi. Tura nuna uchirí Surupapír. <sup>13</sup>Surupapíra uchirí Awiut. Nuna uchirí Iriakím. Nuna uchirí Asur. <sup>14</sup>Asura uchirí Satuk. Nuna uchirí Akim. Nuna uchirí Eriut. <sup>15</sup>Eriuta uchirí Ereasár. Nuna uchirí Matan. Nuna uchirí Jakup. <sup>16</sup>Jakupa uchirí Jusé Marí áishriya nu. Marisha Jesusan jurermiayi. Nu Jesuska shuáran uwemtikiartin asa Kristu tu anaikiamuiti.

<sup>17</sup>Tuma asamtai Apraámnumīa Tawitnium Jesusa weat̄ri katurse (14) áiniawai. Tawitniumīasha Papirúnianam jukimiunma nūj̄sha katurse

weat ániawai. Papirúnianam jukimiunmayasha Krístunam ataksha katurse ániawai.

### Jesukrístu akiiniamu

(Ruk. 2.1-7)

<sup>18</sup>Jesukrístu akiiniamu júnis ámiayi. Ni nukurí Marí Jusejai anajmanairuyayi. Tura tsaníatsain Yusa Wakaní ajaprumtikiamiayi.

<sup>19</sup>Ajaprukmetaisha Jusé Marin iniatsaatsuk nin ajapatniun enentáimpramiayi. Tura ti péñker asa aya iniaisatniun wakerimiayi aents nékainiatsain. <sup>20</sup>Nuna tu enentámia pujái, mesekranam Yusa suntari tari chicharuk tímiayi “Juséa, ame weatrum Tawitchakait. Tuma asam Marijiaí nuatnaikiatin ashamkaip. Uchin jurertatna nuka Yusa Wakaníniuiti.

<sup>21</sup>Uchin áishmankan takustatui tura nuna naari JESUS anaikiattame. Ashí ni shuarín ni tunaariya uwemtikkiartin asa Jesus anaikiatniuiti” tímiayi.

<sup>22</sup>Yus ni etserniurijiaí yaunchu timia nu uminkiatu tusa nu túrunamiayi. Juna áamtikramiayi:

<sup>23</sup>“Nuwa natsa ajapruktatui tura uchin takustatui. Nuna náarisha Emanuér anainiaktatui.” Tu áarmaiti.

Emanuérsha nu chichamnum “Yus iijiaí pujuwiti” tawai.

<sup>24</sup>Jusesha mesekranmaya shintiar Yusa suntari timia núnisan Marin nuatkamiayi. <sup>25</sup>Tura uchin júreatsain tsaninchamiayi. Tura jurermatai uchin Jesus anaikiamiayi.

### Ti neka apach Jesusan eakarmiania nu

**2** <sup>1</sup>Jutía nunkanam Pirin pépru ana nui Jesus akiiniamiayi. Nuisha nú nunka akupniuri Irutisauyayi. Akiiniamtai ti neka apach nantu tátainmaaniya Jerusaréñ péprunam táarmiayi. <sup>2</sup>Taar inintruiniak “¿Israer shuara úunt akupniuri tui akiinaiat? tiarmiayi. Nantu tátainmaani pujaati ni yaari wáinkiamji. Tura tikishmatratatui tusar winiaji” tiarmiayi.

<sup>3</sup>Irutis nuna antuk nusháa enentáimpramiayi. Tuma asamtai ashí Jerusaréñnumia shuarsha antukar nusháa enentáimprarmiayi.

<sup>4</sup>Irutis nuikia ashí Israer-patri uuntrincha tura yaunchu akupkamun jintinniuncha untsukarmiayi. Tura Kristu akiiniatniurin inintrusmiayi.

<sup>5</sup>Tutai chichainiak “Jutía nunkanam Pirin pépru ana nui akiiniatniuiti, tiarmiayi. Yaunchu Yúsnan etserin tu áaruiti:

<sup>6</sup>“Jutía nunkanam, Pirin pépru, ishitiápchich ana nuyá nekas uunt akupin winittiwai. Nii ashí Israer shuaran, Wíi shuar áarmatai, péñker wáinkiatatawai,” tawai Yus.” Tu tiarmiayi.

<sup>7</sup>Nuna tuíniakui Irutis ti neka apachin úusan, urutía yaa emka wáinkiamarum tusa aniasarmiayi. <sup>8</sup>Nuyá Pirinnum akupeak “Nui werum uchi péñker inintrusum wáinkiatarum. Tura wáinkiarum ujatkatatum. Wisha werin tikishmátuutaj” tímiayi.

9-10 Tutai ti neka apach wearmiayi. Tura yaa, yajaya wáinkiarmania nu, tuke eem wémiayi. Tura yaan wáinkiar ti wararsarmiayi. Tura nú yaa uchi pujumia nuĭ ejeniarmiayi. <sup>11</sup>Jeá wayawar uchina ni nukurĭ Marijĭai wáinkiararmiayi. Tura uchin tikishmatrarmiayi. Nuyá ni kajuntrĭyan kurincha, mirá kuṅkuinniasha, chíkich kuṅkuinniasha súsararmiayi. <sup>12</sup>Nuyá mesekranam Yus “Irutisaini weerap” tutai chíkich jintianam wakеткиarmiayi.

### Ejiptunam pisaamu

<sup>13</sup>Ti neka apach waketrantai Yusa suntariĭ mesekranam Jusen ujakmiayi. “Nantakim uchi ni nukurĭjĭai Ejiptu nuṅkanam jukim nuĭ pujustá. Irutis uchin máataj tusa eaktatui. Tura ukunam ankant ajasmatai ujaktajme” tímiayi.

<sup>14</sup>Tutai Jusé kurat shintiar nú káshik uchina nukurĭjĭai Ejiptunam jukimiayi. <sup>15</sup>Irutis jáatsain nuĭ pujusarmiayi. Ejiptunam pujusmatai Yus yaunchu timia nu uminkiamiayi. Iis, Yúsnan etserin aak tímiayi:

“Ejiptunmayan winia Uchirun untsukmajai.”

Tu áarmiayi.

### Irutis uchin máawarat tusa akupkamu

<sup>16</sup>Irutissha ti neka apach nin ananka yajá waketran nekáa ti kajekmiayi. Ti kajek ashí áishmanchin Pirinnumsha tura yantamach pujuarmia nunasha maawaarat tusa akupkamiayi. Ti neka apach ujakmia nuna enentáimias ashí jimiara uwin takakun tura nú uchichin máawarat tusa akupkamiayi. <sup>17</sup>Nuka Yusnan etserin Jeremías aarmia nu uminkiamiayi. Juna áarmiayi:

<sup>18</sup>“Ramá nuṅkanam ti útainiak uur ajainiawai. Raker ti uutu asa atsankrachminiai ni uchirĭ jákarmatai.” Tu áarmiayi.

<sup>19</sup>Tura Irutis jakamtai Yusa suntariĭ mesekranam Jusen ujakmiayi. <sup>20</sup>“Uchin máataj tiarmia nuka jákarai. Yamaikia ataksha uchi ni nukurĭjĭai jukim Israer nuṅkanam wakеткиia” tímiayi. <sup>21</sup>Tutai Jusé nantaki uchina nukurĭjĭai jukin Ejiptunmaya Israer nuṅkanam wakеткиimiayi. <sup>22</sup>Túrasha Irutisa uchirĭ Arkiráu Jutía nuṅkanam uunt akupin ajasun nekáa nuĭ wétinian aránkamiayi. Mesekranmasha ujakma asa nuĭ pujutsuk Kariréa nuṅkanam wémiayi. <sup>23</sup>Nuĭ jeá Nasaré péprunam pujusmiayi. “Nasarénumia átatui” Yusnan etserin yaunchu tu etserkamu nujai uminkiamiayi.

### Imiakratin Juan atsamunam etserkamiania nu

(Mar. 1.1-8; Ruk. 3.1-9, 15-17; Juan 1.19-28)

**3** <sup>1</sup>Nuyá imiakratin Juan Jutía nuṅkanam aents atsamunam etserki támiayi. <sup>2</sup>“Enentáim yapajátarum. Tsawant ishichik ajasai Yus juĭ akupin ajastin.” Tu etserkamiayi.

<sup>3</sup>Nú Juankan yaunchu Yúsnan etserin Isayas juna áarmiayi:

“Shuar atsamunam aents untsumui. Untsumuk “Atumí enentáj Uunta jinti iwiarturtarum tura naka awajsatarum” tawai.” Tu áarmiayi.

<sup>4</sup>Nu Juansha kamiyu ure najantramun entsauyayi. Emenmamkeshanuapeyayi. Tura yutai-títikriátsnasha chinijjai yúuyayi. <sup>5</sup>Tura Jerusarén péprunmaya shuarsha tura ashí Jutfa nunkanmaya shuarsha Jurtanen entsanam matsamiarmia nú shuarsha mash Juankan tariarmiai ni chichamen anturkatai tusar. <sup>6</sup>Tura ni tunaarin paant etserkarmatai Juan Jurtanen entsanam imiainiarmiai.

<sup>7</sup>Juansha Pariséuncha Satuséuncha imiatti tusa wininian wániak tímiayi “Napia áaniutirmincha, ¿ya atumniasha ti asutniátniummaya uwempratniuncha ujatmakmarum? tímiayi. Asutiátin tsawant ishichik ajasai. <sup>8</sup>Tuma asamtai enentáim yapajjamuítkuinkuia péñker wekaamurmijjai paant iniakmatarum. <sup>9</sup>Atumsha “Iikia Apraám weeatji” tu enentáimtumasairap. Nujjai uwemprashtatume. Yus wakerakka ju kayan Apraáman tiranki najankainti, tímiayi. <sup>10</sup>Numi ajaktinia áintsanen kampuwarin jacha atuttsamuiti. Tura numi péñker nereatsna nuka tsupikia jinium apeamu ártatui. <sup>11</sup>Wikia aya entsajin imiajrumé atumi enentáj yapajjawakrumin. Antsu winia ukuruj winiana nuka péñker awajtamsataj tusa imiantinia áanis tura já áanis Yusa Wakanin enketramprattarme. Wijijai nankaamantu asamtai wikia tsuntsumpruan ni sapatrinkisha atitrachminiaitjai. <sup>12</sup>Aruusa nerejjai túruinia áintsan átatui. Awajtiutairin achikiuiti tura nujjai saepen awajtitiawai. Tura neren péñker ikiustatui, antsu saepenka jinium apeattawai. Nu jisha tuke kajinchaiti.” Tu tímiayi Juanen.

### Juan Jesusan imiaimiu amia nu

(Mar. 1.9-11; Ruk. 3.21-22)

<sup>13</sup>Nuyá Jesus Kariréa nunkanmaya winis Jurtanen entsanam támiayi Juan imiatti tusa. <sup>14</sup>Juansha emka nakitiak Jesusan tímiayi “Ame winia imiatminiaitme. Túrutamniaiatmesha ¿urukamtai winia tarutnium?” tímiayi.

<sup>15</sup>Tura Jesus tímiayi “Ántsan asati yamaikia. Núnisrik ashí Yus akupkamu umirkatniuitji.” Tutai Juan iniaisamiayi. <sup>16</sup>Tura Jesus imiani entsaya jíinkímtai nayaimpi uranmiayi. Tura Yusa Wakani yámpitsa áintsan Jesusan tarimiayi. Niisha wáinkíamiai. <sup>17</sup>Túramtai nayaimpinmaya Yus chichaak “Juka winia Uchiruiti. Ti aneamuiti. Ti shiir enentáimtajai” tímiayi.

### Uunt iwianch Jesusan anankataj tímiania nu

(Mar. 1.12-13; Ruk. 4.1-13)

**4** <sup>1</sup>Nu túrunamtai Yusa Wakani Jesusan iwianchjjai nekapmamtiksatts aents atsamunam jukimiayi. <sup>2</sup>Nui kuarenta (40)



tsawant, káshisha tsawajsha yurumtsuk pujak tsukarmiayi. <sup>3</sup>Nuj uunt iwianch Jesusan nekapsataj tusa tarí tímiayi “Nekas Yusa Uchirínkiumka ju kaya apatuk najanata.”

<sup>4</sup>Tutai Jesus tímiayi “Yus-Papinium áarmaiti:

“Aents aya apatkujain iwiaaku pujuschamniaiti. Antsu Yus táman enentáimtuiniak nekas iwiaaku pujusartatui” tawai” tímiayi.

<sup>5</sup>Tutai uunt iwianch Jerusarén péprunam jukí Yusa Uunt Jee cháikin iwiaak <sup>6</sup>tímiayi “Nekas Yusa Uchirínkiumka juya akaikim iniaata. Kame Yus-Papinium áarmaiti:

“Yus ni suntarin akatar akúptúrmaktatui. Nawemin kayanam ajiintsumnin wenkurmaktatui” tawai” tímiayi.

<sup>7</sup>Tutai Jesus tímiayi “Núnisan Yus-Papinium áarmaiti:

“Ame Úntrum Yus “Nekapsataj” tiip” tawai” tímiayi.

<sup>8</sup>Ataksha uunt iwianch naint yakí wájakmanum iwiaakmiayi tura nuyá ashí nunkanmaya péprun shiira nuna iniaktusmiayi. <sup>9</sup>Tura tímiayi “Winia tikishmatrurakminkia juna mash amastatjai.”

<sup>10</sup>Tutai Jesus tímiayi “Werumta, uunt iwianchi. Yus-Papinium aarma awai:

“Ame Úntrum Yúsak tikishmatrata tura Niñki shiir awajsata” tawai” tímiayi.

<sup>11</sup>Tutai uunt iwianch Jesusan ikuak wémiayi. Túramtai Yusa suntari tariar atsumamurin súarmiayi.

### **Jesus Kariréa nunkanam etserkamiania nu**

*(Mar. 1.14-15; Ruk. 4.14-15)*

<sup>12</sup>Juan sepunam enketui taman antuk Jesus Kariréa nunkanam wémiayi. <sup>13</sup>Tura Nasarét péprunam pujutsuk Kapernáum péprunam we pujusmiayi. Kapernáumsha Kariréa antumianka kánmatkarin pujumiayi. Ti yaunchusha Jakupu uchirí Sapurúnsha tura Niptarísha nu nunkanak nuj pujustaitsar achikiaruyayi. <sup>14</sup>Jesus nuna túramtai yaunchu Yúsna etserin Isayas aarmia nu uminkiamiayi. Juna áarmiayi:

<sup>15</sup>“Sapurúnsha Niptarísha nayaantsanam tjiuch Jurtan entsa amainini nunkan achikiarmiayi. Nuka Kariréaiti Israer-shuarcha matsatania nuj.

<sup>16</sup>Nu aents kiritniunam pujuiniayatan ti tsáapnian wáinkiarumiayi. Jákatniunam pujuiniaí tsáapin tsáapnirmiayi.” Tu áarmaiti.

<sup>17</sup>Nuyá Jesus étseruk tímiayi “Tunaarum enentáimturum enentáim yapajátarum. Ju nunkanam Yus akupkatin tsawant ishichik ajasai.”

### **Jesus kuaru aents namakan achinian ni unuinamuri ajasarat tusa achikmiania nu**

*(Mar. 1.16-20; Ruk. 5.1-11)*

<sup>18</sup>Jesus Kariréa antumianka kánmatkarin wesa jimiará áentsun nuámtak yáchinnun wáinkiamiai. Chikichik Antresauyayi, chikichcha

Semunkayayi. Nu Semun núnisan Pitru náartiniuyayi. Namakan achin ásar namakan nekajai nankíak yujaarmiayi. <sup>19</sup>Nuna Jesus wáinkiar tiarmiayi “Nemartustarum. Túrakrumin shuarsha Yusna arti tusan yamáí namak achíarmena núnisan shuaran-eau awajsatjar<sup>me</sup>.” <sup>20</sup>Tutai ni nekarin ikiukiar Nin nemariarmiayi.

<sup>21</sup>Nuyá ishichik wésan ataksha nuámtak yachinnium wáinkiámiayi. Jakupu Juanjajai mai Sepetéu uchirí ármiai. Niisha kanunam enkemsar ni nekarin ni aparíjiaí iwiarainiak pujuriarmiayi. Tura Jesus “Nemartusta” tutai <sup>22</sup>nu chichamaik kanuncha tura aparíncha ikiukiar Jesusan nemariarmiayi.

### Jesus untsurí shuaran jintintiamiania nu

(Ruk. 6.17-19)

<sup>23</sup>Ashí Kariréa nunkanam Jesus Israer-shuar iruntainiam etserki wémiayi. Yus ju nunkanam akupkatin chichaman etserkamiayi. Tura untsurí sunkurjai jáinian ashí tsuármiai. <sup>24</sup>Ashí Siria nunkanam Jesus tsuákratman nekaawar ashí nánkamas sunkurjai wáitin armia nuna Jesusan tsuarti tusa itiararmiayi. Ashí jaancha, najaimiancha, yajauch wakanrukuncha, wáuruncha, tampemaruncha Jesus tsuármiai. <sup>25</sup>Tura untsurí shuar Jesusan nemariarmiayi. Kariréa nunkanmayasha, Tekapurisnumiasha, Jerusarén péprunmayasha, Jutfá nunkanmayasha, Jurtan entsa amainiyasha Jesusan nemariarmiayi.

### Náinnium Jesus etserkamu

**5** <sup>1</sup>Jesus untsurí shuar káunkarun wáiniak náinnium waka nuí pujusmiayi. Tura ni unuiniamurísha taar pujusarmiayi. <sup>2</sup>Nuyá Jesus júnis unuiniamiayi.

### Warastin ainia nu

(Ruk. 6.20-23)

<sup>3</sup>“Ame wakanim atsumamu nekamarum kakaram ajasrum warastarum. Tuma asarum Yus akupeemunam pachiinniutirume. <sup>4</sup>Kúntuts pujarum nu warastarum. Yus atsan<sup>t</sup>amprattarme. <sup>5</sup>Péejchach enentáimtumarmena nu warastarum. Yus ashí nunkan amastatirume. <sup>6</sup>Eeser wekasataj tusa aya kitiamarum nu warastarum. Yus imiktamprattarme. <sup>7</sup>Waitnenkratniutiram warastarum. Yus waitnentramp<sup>r</sup>attarme. <sup>8</sup>Pénker enentáimniutiram warastarum. Yus wáinkiáttarme. <sup>9</sup>Chicham iwiarin árum nu warastarum. Yusa uchirí turamartatui. <sup>10</sup>Pénker túrakrumin yajauch awajtamainiakui warastarum. Yus akupeemunam pachiinniutirume. <sup>11</sup>Wíi shuar asakrumin katsekramainiakui<sup>sha</sup>, itit awajtamainiakui<sup>sha</sup>, tura ashí tsanumprutmainiakui<sup>sha</sup> warastarum. <sup>12</sup>Núnisan yaunchu Yúsnan etserin armia nunasha túrawarmiayi.

Túramtai shiir enentáimkiuram warastarum. Nayaimpiniam ti pé<sup>n</sup>ker akinkiattarme' tímiayi.

**Ju nun<sup>n</sup>kanam átum tsáapninia áintsarum tura weeya áintsarum árume**  
(Mar. 9.50; Ruk. 14.34-35)

<sup>13</sup>‘Átumka ju nun<sup>n</sup>kanam wee ana áintsan<sup>n</sup>ketrume. Tura wéeaitiat jeakchaitkiun<sup>n</sup>ka míchuiti. ¿Nusha itiur yuámniak ati? Antsu á<sup>n</sup>traiti. Tuma asamtai aa najatai tepet tusar ajapashtinkiait' tímiayi.

<sup>14</sup>‘Átumka ju nun<sup>n</sup>kanam shiripkia áintsan<sup>n</sup>ketrume. Náinniumka pepru ú<sup>n</sup>mkachminiaiti. <sup>15</sup>Núnisan<sup>n</sup> shiripik ekeemakam kajun<sup>n</sup>num en<sup>n</sup>keatsme. Antsu yakí sukúatsmek ashí je<sup>n</sup>nam ana nu paant atí tusam. <sup>16</sup>Núnisan<sup>n</sup> atumsha Yusj<sup>n</sup>ai pé<sup>n</sup>ker túramu paant atí. Tura ashí aents nuna iisar niisha Yus Apan shiir awajsartatui' tímiayi.

**Yaunchu akupkamun pachis Jesus unuiniamiania nu**

<sup>17</sup>‘Muisais akupkamuncha tura yaunchu Yúsnan etserin etserkarmia nuna á<sup>n</sup>tar awajsattawai” turutiirap. Antsu nuna Wikia umiktaj tusan táwitjai. <sup>18</sup>Nekasan tájarme. Ashí túrunatniua nu amúats<sup>n</sup>ai<sup>n</sup> nu akupkamu ishichkisha yapajniáshtatui. Nayaimpisha tura nun<sup>n</sup>kasha tuke amúats<sup>n</sup>ai<sup>n</sup> nu akupkamusha amuukashtatui. <sup>19</sup>Nu asamtai shuar chikichik akupkamun, yúpichuch ana nunaksha, umirchakka tura chíkich shuaran umirkashtinian unuiniakka Yus nekas akupin paant ajastatna nu<sup>i</sup> nú shuar uunt á<sup>n</sup>hattawai. Antsu ashí shuar akupkamun umíana nu tura chíkich shuaran umirkatniun unuiniana nusha Yus nekas akupin paant ajastatna nu<sup>i</sup>, nu shuarka uunt á<sup>n</sup>tatui. <sup>20</sup>Tuma asamtai Yus akupeamunam pachiinkiaitaj tákumka Pariséuj<sup>n</sup>ai nan<sup>n</sup>kaamas tura akupkamu jintinniu<sup>n</sup>j<sup>n</sup>ai nan<sup>n</sup>kaamas eseera wekasatniuitrume' tímiayi.

**Kajeamun pachis Jesus unuiniamiania nu**

(Ruk. 12.57-59)

<sup>21</sup>‘Yaunchu tiniu armia nu á<sup>n</sup>tichukaitrum: “Man<sup>n</sup>kartuawairap. Man<sup>n</sup>kartana nuka asutniát<sup>n</sup>niuiti” tiniu á<sup>n</sup>rmiaiyi. <sup>22</sup>Tura Wisha tájarme: Shuar ni yach<sup>n</sup>in aya kajerakka nusha asutniát<sup>n</sup>niuiti. Ni yach<sup>n</sup>in kátseka nuka akupniunam junaktiniaiti. Tura ni yach<sup>n</sup>in “netsé” tákun<sup>n</sup>ka jinium akupnakminiaiti.’

<sup>23</sup>‘Tuma asamtai Yus susataj tusam wakerakum tura ame yatsum á<sup>n</sup>min itit enentáimturman enentáimpramka, <sup>24</sup>suamu nu<sup>i</sup> ikiuakum emka ame yatsum werim niij<sup>n</sup>ai<sup>n</sup> iwiarata. Turam waketkim Yus suam nu susata.’

<sup>25</sup>‘Shuar ú<sup>n</sup>ntnum júramkuin<sup>n</sup>ka jintian<sup>n</sup> wesam niij<sup>n</sup>ai<sup>n</sup> iwiarata ú<sup>n</sup>ntnum ejetams<sup>n</sup>ai<sup>n</sup>. Túrachakminkia ú<sup>n</sup>ntnum surutmaktatui tura niisha suntarnum surutmaktatui tura sepunam en<sup>n</sup>ketmattawai. <sup>26</sup>Tura nekas tajai, nu<sup>i</sup> en<sup>n</sup>kemamka ashí rearchisha akikmachkumka jí<sup>n</sup>inkishtatme' tímiayi.

**Tsanirmatniun pachis Jesus unuiniamiania nu**

<sup>27</sup>‘Yaunchu tiniu armia nu ántichukaitrum: “Tsanirmawaip.” <sup>28</sup>Tura Wisha tájarme: Shuar nuwãñ tsanirmataj tu iiska nuĩkia ni enentáñ tsanirmayi.’

<sup>29</sup>‘Tuma asamtai ame jiimi tunaanum yajauch awajtamkuĩñkia ukuĩñkiam yajá ajapata. Ashí ame ayashim jinium esaatsãñ aya chikichik ayashmi muchitmarĩ emesratin pẽnkeraiti. <sup>30</sup>Ame ewejmesha untsuurmetiat tunaanum ajunmakuĩñkia tsupikiam yajá ajapata. Ashí ame ayashim jinium esaatsãñ aya chikichik ayashmi muchitmarĩ emesratin pẽnkeraiti.’

**Nuwã ajapatniun pachis Jesus unuiniamiania nu**

*(Mat. 19.9; Mar. 10.11-12; Ruk. 16.18)*

<sup>31</sup>‘Núnisanñ yaunchu tiniu ármiaiyi: “Shuar ni nuarĩñ ajapatniun wakera nuka papĩ najana susati.” <sup>32</sup>Tura Wisha tájarme: Shuar ni nuarĩñ tsanirmachun ájapeakka nuwãñ tsanirmamtikiaiiti. Tura ajapamujaĩ nuatnaiyakka nuka tsanirmaiti.’

**Jesus aya nekasa nu titinian unuiniamiania nu**

<sup>33</sup>‘Núnisanñ yaunchu tiniu ármiaiyi: “Yusa naarĩ pachisan turattajai” tákumka nekas takamtsuk umiktiniaitme.” <sup>34-37</sup>Tura Wisha tájarme: Áyatik “Ee” tákumka tura “Atsá” tákumka wáitruitsuk nuke titiá. Támena nu nekas umiktaj takum ame nú arant pachistiniaitkiumka nuka yajauchiiti, iwianchnumiãiti. Ti nekas tajai tusam nayaim pachischatniuitme. Nuka Uunt Yus pujutainti. Nunƀkasha pachischatniuiti Yusa tarimtaiĩ asamtai. Jerusaren pẽprusha pachischatniuiti Uunt Akupin pujutai nuĩ asamtai. Múukmesha pachischatniuitme. Chikichik intiashkesha pújusha mukusasha awajsachminiaitme. Áyatik nekasa nu páchitsuk titiá.’

**Iikkiatniun pachis Jesus unuiniamiania nu**

*(Ruk. 6.29-30)*

<sup>38</sup>‘Yaunchu tiniu armia nu ántichukaitrum: “Shuar máanikiar jii apujtukka niisha apujtuktiniaiti. Tura naj akarkasha ni najsha akarkatniuiti.” <sup>39</sup>Tura Wisha tájarme: Yajauch shuar taritraitrap. Antsu ame yapimin ijiutmamtai áatú yapimsha tsanƀkatkata. <sup>40</sup>Tura pushirmin jurutramkitiaj tákuisha sakurmesha susata. <sup>41</sup>Tura káarkancha chikichik kirumitruk jurutkitia túramkui ámeká jimiará kirumitru ejeeta. <sup>42</sup>Seatmana nu susata. Ikiatmakuisha páchitsuk ikiasta.’

**Nemasrĩ aneetniun Jesus unuiniamiania nu**

*(Ruk. 6.27-28, 32-36)*

<sup>43</sup>‘Núnisanñ tiniu armia nu ántichukaitrum: “Ame shuarum aneeta tura nemasrumka kajerkata.” <sup>44</sup>Tura Wisha tájarme: Nemasrum

aneetarum. Yajauch chichartamna nusha shiir awajsata. Nakitramana nusha nawamkata. Tura katsekramainiana nu tura yajauch awajtamainiana nusha Yus áujtusarta. <sup>45</sup>Atumsha nu túrakrum atumí Aparí nayaimpiniam pujana nu túrana áitkiasrumek túrarme. Iista, Yus yajauch shuarnumsha péñker shuarnumsha tsáapin awajmatkiatsuk. Núnisan yumincha yajauch shuar pujuiniamunmasha péñker shuar pujuiniamunmasha yútumtiktsuk. <sup>46</sup>Aya atumin anenmainia nuke aneakmesha ¿yaki akirmakat? Yajauch shuarsha nuna túrin áiniawai. <sup>47</sup>Aya ame yatsumek shiir chichaakmeka ¿warí péñkerak túram? Yus-shuarchasha nuna túrin áiniawai. <sup>48</sup>Nu asamtai atumí Aparí Yus nayaimpiniam pujana nujai métek ti péñker átiniaitrumé.'

### **Péñker túratniun Jesus unuiniamiania nu**

**6** <sup>1</sup>'Ashí íimiainiain aya shuar iirsarti tusarum Yusna nu takasairap. Tu takaakrumniñkia Yus Apa nayaimpiniam pujana nu penké akirmakchattarme. <sup>2</sup>Nu asamtai shuar atsuma nu yaiyakmeka ashí shuar ujakairap. Anankartin ainia nuka iruntainmasha tura pepru jintí wekasasha ashí íimiainiain shiir túrajai tusar nuna túrin áiniawai. Junasha "péñker túrawai" tu enentáimturarti tiniu ásar Yus akíatsain aya tu enentáimturmajaiñ akinkiaruítí, nekas tajai. <sup>3</sup>Antsu átumka atsumainia nu yaiyakmeka penké úukam túrata. Chikichkisha nu yáinman nekaashti. <sup>4</sup>Úukam túrakminkia ame Apa Yus uukman wainia nu, nuna akirmaktatui.'

### **Yus áujsatniun Jesus unuiniamiania nu**

*(Ruk. 11.2-4)*

<sup>5</sup>'Atumsha Yus áujeakrumsha ántar chichamtin ainia núnis áujsairap. Nu shuarka iruntainmasha tura pepru jintísha shuar iirsarti tusa wajakiarap. Yúsan áujin áiniawai. Nekasan tájarme, Yus akíatsain aya nu iismajain akinkiaruítí. <sup>6</sup>Tura ame Yus áujeakmeka ame kuárturmin wayam waiti epenim nuj amek ame Apa Yus áujsata. Nuna ame Apa Yus uuka túramu waitma asa akirmaktatui.'

<sup>7</sup>'Yus áujeakmesha ántaram esaram áujsaip. Yúsan nékainiatsna nuka "Esaram áujeakuinkia Yus anturtuktatui" tu enentáimainiawai. <sup>8</sup>Niijai métek ajasairap. Átumka seatsrumniñ Yus Apa átum atsumamun nékawai. <sup>9</sup>Nu asamtai Yus áujkuram júnis títiniaitrumé:

'Aparu Yus, nayaimpiniam pujamna nu, ii Aparínme. Ame náarmincha shuar ántar pachischarti. <sup>10</sup>Ashí áentsnum ame akupkatin tsawantrum wari jeati. Ame wakeramuram nayaimpiniam umikma ana núnisanñ ju núnkanmasha uminkiatí. <sup>11</sup>Aparu, ii yurumkarí ashí tsawant amasta. <sup>12</sup>Tura winia nemasrun tsankurajna núnismek, Aparu, winia tunaaru tumashrisha tsankurturta. <sup>13</sup>Tunáa

wakeruktin tsan̄katrukaip. Antsu ashí tunaanumiā uwentikurta. Tuke ashí aents akupkamniaitme. Núnisam Amesha tuke ti kakarmaitme. Tura ti shíuraitme. Tuma asakmin seajme. Nuke atí.’

<sup>14</sup>‘Amesha chíkich shuar yajauch awajtamka nu tsan̄kureakminkia Yús Apa nayaimpiniam pujana nu amincha tsan̄kurtamprattawai. <sup>15</sup>Tura chíkich tsan̄kureachkumnin̄kia Yús Apasha ame tunaarmincha tsan̄kurtamprashtatui.’

### **Ijiarmatniun pachis Jesus unuiniamiania nu**

<sup>16</sup>‘Ijiarmarum Yús ájukrimesha wake mesekrum susuntraip. Anan̄kartin shuar chíkich shuar “ijiarmaiti” tu enentáimtursarti tusa tuma ániawai. Nekasan tájame, Yúska akíatsaïn̄ aya nujaī akikma ániawai. <sup>17</sup>Antsu ámeká ijiarmamsha péñker temashmaram péñker jaupmitia. <sup>18</sup>Shuar ijiarmaiti tu enentáimturmasaraïn̄. Aya Yús Apak nekaattawai. Tura asa akirmaktatui.’

### **Kuítian pachis Jesus unuiniamiania nu**

*(Ruk. 12.33-34)*

<sup>19-20</sup>‘Ju nun̄kanmayā kuit ikiaun̄katniujaī nan̄kaamas nayaimpiniam kuit ikiaun̄kata. Juin̄kia kayaā yúchakait tura mash meseatsuk. Tura kasasha wayá kasamtsuk. Antsu nayaimpinman̄ka kayaāasha yuatsui tura mash meseatsui tura kasasha wayá kasamtsui. <sup>21</sup>Kuítrum ana nui enentáimtustatme. Tuma asam nayaimpiniam ikiaun̄kata.’

### **Ayashí tsáapnintrí**

*(Ruk. 11.34-36)*

<sup>22</sup>‘Ame jímiijaī tsáapin amiin̄ wayamniaiti. Tuma asamtai ame jiīmi péñkeraitkiuin̄kia amiin̄ tsáapin wayá tuke tsáapniiti. <sup>23</sup>Antsu ame jiīmi yajauchitkiuin̄kia tsáapin amiin̄ wayachmin̄ asamtai tuke kiritin átatui. Núnisan̄ yajauchia nu wakerakmeká péñkera nu ame enentáimiin̄ wayachmin̄ asamtai tuke kirit ajastatui. Nu kiritcha imiá yajauchiti.’

### **Yussha kuitsha máimtek enentáimtuschaniaiti**

*(Ruk. 16.13)*

<sup>24</sup>‘Shuar jimiará úuntrin̄ umirkatniun̄ tujintiawai. Chikichan wakerak chikichnaka nakitrattawai. Chikichan umiruk chikichnaka umirkashtatui. Núnisan̄ átumka Yussha kuitcha máimtek enentáimtustin̄ tujinkiattarme.’

### **Yús ni uchirín péñker wáinkiaiti**

*(Ruk. 12.22-31)*

<sup>25</sup>‘Tuma asamtai tájarme: Wariniak yuataj wariniak umartaj tura wariniak entsartaj tusarum nuke enentáimsairap. Yús iwiaaku átinian

amasu asa yurumkancha amaschamniakait. Tura ju ayashniasha najana asa entsataincha amaschamniakait. <sup>26</sup>Chin\_kisha enentáimpratarum. Yakí nanamainiak yurumkan arakmainiatsui. Tura juuk yurumkan ikuiniatsui. Tuma aiñ Yus Apa nayaimpiniam pujana nú Yusak áyureatsuk. Atumsha chin\_kia nú nan\_kaamaschakaitrum. <sup>27</sup>Nu arantcha ti enentáimkiumsha ¿nujai tsakartatmek?

<sup>28</sup>‘Nuikia ¿urukamtai entsartincha timiá enentáimprum? Iistá, kukujsha takachuitiat tura najanchaitiat <sup>29</sup>ti shíirmach áiniawai. Yaunchu uunt akupin Sarumún ti shiir iwiarmamniuitiat kukujia tímianchayayi. <sup>30</sup>Iis, nupa yamá tsakaawai tura kashin aents tsupikiar jinium epeenawai. Tuma aiñ Yus ti shiir áentseatsuk. Nuna tura asa atumniasha nú péñker waitmakchattawak. ¿Urukamtai Yus nekas enentáimtatsrum? <sup>31-32</sup>Ju nun\_kanam ana nu pachikiairap. Chíkich shuar, Yúsan nékainiatsna nu, wariñ yuataj<sup>i</sup> wariñ umartataj<sup>i</sup> wariñ entsartataj<sup>i</sup> nuna ti pachiiniawai. Tura atumsha tu enentáimsarum weerap. Ame Apa nayaimpiniam pujana nu ame atsumamurmin nékawai. <sup>33</sup>Tuma asamtai Yusjai shiir wekasatin tura Yus akupkamu ana nu umiktin emka enentáimsatarum. Túrakrumni\_kia atsumamurmin Yus suramsattawai. <sup>34</sup>Kashin átatna nujai itirchat enentáimsairap. Kashinkia nusháa itiurchatrij\_jai tsawarchattawak. Yamái tsawanta jujai máakchakait.’

### Chíkich sumamtikiawairap

(Ruk. 6.37-38, 41-42)

**7** <sup>1</sup>‘Chikicha tunaari ti enentáimtusairap. Núnisan Yus atumí tunaari iirtamsashtatui. <sup>2</sup>Chíkich wárik sumamtikiatin enentáimkiumni\_kia Yus núnisan sumamtikramattawai. Tura ame chikicha túramuri nekapmarmena nú nekapkajain amincha nekapmarmattawai. <sup>3</sup>Tuma asamtai ¿itiurtsuk atumi jiiñ numi enketna auk ítskesha atumi yachí jiiñ tsuat enketusha iyarum? <sup>4</sup>Ame jii\_miiñ numi tuke enketajsha ¿itiurtsuk ame yatsumi jiiya tsuátan jurustajme tame? <sup>5</sup>Ántar shuará, ame yáintaj tákumka emka ame jii\_miiñ numi enketna nu jusata. Nuyá paant iistatme yatsumi jiiñ tsuat enketna nu jurustin.’

<sup>6</sup>‘Ti shiira nuka yawá súsashtiniaiti. Nuna nakitrar amincha esatnichartimpiash. Kuítrumsha kuchi súsashtiniaiti. Aya najatrachartatuak.’

### Yus seakmin suramsattawai

(Ruk. 11.9-13; 6.31)

<sup>7</sup>‘Yus seakrumin suramsattawai. Eakrumka wainkiattarme. “Winiajai” tákurmin awaintiamattarme. <sup>8</sup>Seana núnaka suániawai. Eana nuka wáiniui. “Winiajai” tuinia núnaka awániawai.’

<sup>9</sup>‘Ame uchiram apatkun seatmakui ¿kayaash súsaintiam? <sup>10</sup>Tura namakan seatmakui ¿napíash súsaintiam? <sup>11</sup>Nuikia átum

yajauchitirmesha atumi uchirí péñker ana nu tuke súchakaitrum. Nuna nan̄kaamas nuikia seakrumniñkia atumi Aparí nayaimpiniam pujana nu péñker ana nuna suramsashtatuak.’

<sup>12</sup>‘Júnaka Muisaissha Yúsnan etserniusha akupenawai: “Chíkich ámin túrutatí tusa wakerakmeke amesha núnismek túratá.” Tu akupenawai.’

### Wañkaram jintiasha tura yupikiach jintiasha

(Ruk. 13.24)

<sup>13-14</sup>‘Wañkaram jintia awai. Wayatniusha yúpichuchiiti. Nujsha untsurí wáiniawai. Tura nusha men̄kakatniunam jeawai. Túrasha chíkich jintia awai. Nusha yupikiach asa itiurchataiti. Wayatniurísha yupikchiiti. Nuj ishichik wáiniawai. Tura nusha iwiaaku pujustinnium jeawai. Tuma asamtai tuke iwiaaku pujustaj tákurmeka yupipitin jintia achiktarum.’

### Nerejai numi nekaatainti

(Ruk. 6.43-44)

<sup>15</sup>‘Aneartarum. Wáitruiniak “Wi Yúsnan étserjai” tuinia nu írunui. Pátatek murikiua áinis yúpichuch áiniawai tura ni enentáin nekas úunt-yawá áinis áiniawai. Pátatek shiir chichainiawai tura ni enentáin yajauch piakuiti. <sup>16</sup>Atumsha túramujai nin nekaatniuitrume. Naranmayá shuiya júukchamniaiti. ¿Tsachiksha kushin̄kiapen nerektatuak? <sup>17</sup>Núnisan péñker numia nu tuke péñkeran nereatsuk. Tura yajauch numia nu yajauchin nereatsuk. <sup>18</sup>Péñker numi yajauchin nereatsui. Núnisan yajauch numi péñkeran nereatsui. <sup>19</sup>Yajauch numi ajakar tsupírar jinium apeashtinkiait. <sup>20</sup>Tuma asamtai wáitrin ainia nuka túramujai nekanattawai.’

### Ashikia Yus akupeana nuñ jeachartatui

(Ruk. 13.25-27)

<sup>21</sup>‘Aya winia Apar nayaimpiniam pujana nuna wakeramurin̄ umirin ainia nuke Yus akupeamunam pachiinkiertatui. Chíkichka “Uuntá, Uuntá” turutainiyat nayaimpiniam jeachartatui. <sup>22</sup>Amuukatin tsawant jeamtai untsurí turutiartatui “Uuntá, Uuntá, ame náaram pachisar ashí nun̄kanam etserkachmakají. Ame náarmesha pachisar yajauch wakancha jiīki akupkamji. Tura ame náaram pachisar aentsti tujintiamu túramji” turutiartatui. <sup>23</sup>Nuj chichainiakui “Werumtarum. Pen̄ke nékachuitjiarme. Aya yajauchitrume” títiatjai.’

### Péñker ukurma tura yajauch ukurma

(Ruk. 6.47-49; Mar. 1.22)

<sup>24</sup>‘Shuar winia chichamprun antuk umirkañka nu shuar ti péñker enentáimniuiti. Niisha ju shuarjai méteketete. Jeá jeamuk



kayanam ukurmai. <sup>25</sup>Tura yumi ti yutuk entsa nujanḱruamai tura nase ti kakaram umpuimiai. Túmaiḱ pukukachmai ni ukurmari kayanam ukuamu asamtai. <sup>26</sup>Tura shuar winia chichamprun antuk umirtukchaḱa ju shuara núnisaḱ enentáimchaiti. Jeḱ jeamuk náikminiam ukurmai. <sup>27</sup>Tura yumi yutuk entsa nujanḱruamai tura nase ti kakaram umpuimiai. Túmakui jeḱ mash saanaki iniaamai” tímiayi Jesus.

<sup>28</sup>Jesus nuna tinia amukmatai ashí shuar ti enentáimprarmiai. <sup>29</sup>“Yusa kakarmariḱiai unuitiamtsujik. Israer-shuara jintinniurḱnia núnis unuiniainiatsui” tiarmiayi.

### Jesus tunamarun tsuarmiania nu

(Mar. 1.40-45; Ruk. 5.12-16)

**8** <sup>1</sup>Jesus muraya támatai untsurḱ shuar Nin nemariarmiayi. <sup>2</sup>Nuḱ shuar tunamaru Jesusan jearin tikishmatramiai. Tura tímiayi “Uuntá, wakerakmeḱa tsuáramniaitme.”

<sup>3</sup>Tutai Jesus uwejeḱiai antiḱ “Wakerajai. Péḱker ajasta” tímiayi. Tutai tunamaru ni tunamarmari péḱker ajasmiai. <sup>4</sup>Tura Jesus tímiayi “Pai, peḱké etserkaip. Áyatik Israer-patrḱ iniakmamsam Muisais timia nu susata ashí shuar nekaawarti tusam.”

### Jesus suntara uchirḱin tsuarmiania nu

(Ruk. 7.1-10)

<sup>5</sup>Jesus Kapernáum péprunam wayamḱtai apachi suntara kapitiánḱri Nin tarimiayi. <sup>6</sup>“Uuntá, tímiayi. Winia uchir tampemaru jeḱa tepes ti wait ajáa tepawai” tímiayi.

<sup>7</sup>Jesussha “Ayu, winin tsuartajai” tímiayi.

<sup>8</sup>Tutai kapitián tímiayi “Uuntá, Ame ti nanḱaa<sup>ḱ</sup>maku asam winia jearuḱ wayachminiaitme. Áyatik “Péḱker ajástí” tákumin winia uchir péḱker ajatrustatui. <sup>9</sup>Iista, winiasha akuptuiniatsuk tura wisha suntaran akupenatsjak. Juḱna “Wetá” takui wéawai. Tura chikichnasha “Winitíá” tutai winiawai. Tura takartinian “Ju túratá” tutai umíawai.”

<sup>10</sup>Kapitián nuna tutai Jesus ti enentáimiuk Nin nemarainian tímiayi “Nekasan tájarme, Israer-shuar Yúsán tímiatrus enentáimtin atsawai. <sup>11</sup>Maa, yajaya untsurḱ shuar Yus akupeana nuḱ jearwar Apraámjḱisha Isakḱjaḱisha Jakupḱjaḱisha iruntrar yurumáwartatui. <sup>12</sup>Tura Israer-shuar Yúsnum jeamnia ániayat aḱ kiritniunam ajapnawartatui. Nuḱ ti úutin tura ti wáitsatin átatui.”

<sup>13</sup>Nuyá Jesus kapitiánin chicharuk “Jeḱemiḱin waketkitia. Nekas enentáimtusu asakmin uchiram péḱker ajatramsattawai” tímiayi. Túramtai ni uchirḱ nu chichamtaik péḱker ajatsamiayi.

**Jesus Pitru tsatsarín tsuármiania nu**

*(Mar. 1.29-31; Ruk. 4.38-39)*

<sup>14</sup>Jesus Pitru jeen we Pitru tsatsarín tsuemujai jaa tepan wáinkiamiyai.  
<sup>15</sup>Tura ni uwején antinmatai tsuemun michatramiayi. Tura nuwa nantakin ashí ajamsarmiayi.

**Jesus untsurí jáinian tsuármiania nu**

*(Mar. 1.32-34; Ruk. 4.40-41)*

<sup>16</sup>Kashi ajasmatai yajauch wakantrukarun Jesusan itiararmiayi. Tura nu yajauch wakanin chikichík chichamjai chicharas jiki akupiarmiayi. Ashí jáiniancha tsuármiai. <sup>17</sup>Yúsnan etserin Isayas “Ti pimpirmaríncha ii sunkuríncha jurutramkimiayi” yaunchu timia nu uminkiatí tusa nu túrunamiayi.

**Jesus nemarsatin**

*(Ruk. 9.57-62)*

<sup>18</sup>Shuar untsurí Jesusan káutkarmatai “Entsa amain katíntai” tímiayi.

<sup>19</sup>Nui Israer-shuara jintinniurí Jesusan tarí tímiayi “Uuntá, Ámin páchitsuk nemarsatniun wakerajme.”

<sup>20</sup>Tutai Jesus tímiayi “Kujanchmasha ni waarín takaktsuk. Chínkisha pasunken takaktsuk. Tura Wi Yúsnumiáitiatan tepestiniur atsawai.”

<sup>21</sup>Nin nemarniusha tímiayi “Uunta, emka winia aparun iwiarsan ikiuuttajai.”

<sup>22</sup>Tura Jesus “Nemartusta, tímiayi. Wakannium jaka ainia nu jakan iwiarsarti” tímiayi.

**Nasesha entsasha Jesusan umirkarmiania nu**

*(Mar. 4.35-41; Ruk. 8.22-25)*

<sup>23</sup>Nuyá Jesus ni unuiniamurijiai uunt kanunam enkemámiayi. <sup>24</sup>Nui nase ti kakaram umpuimtai antumian ti tamparintin ajasmiai. Tura entsa kanunam yaráná piákmiayi. Tuma ain Jesus kanunam kanar tepemiayi. <sup>25</sup>Nuyá ni unuiniamurí kurashim Jesusan ishintiarar tiarmiayi “Uuntá, wayaji. Kakaram ajachkumniñkia jakattaji.”

<sup>26</sup>Jesus tímiayi “¿Urukamtai timiá ashamarum, Yus enentáimtutkesha?” Nuyá wajaki nasencha entsan cha chicharkamiayi. Tutai mash miaaku ajasmiai. <sup>27</sup>Nuna íisar ni unuiniamurí ti enentáimsarmiayi. Tura tiarmiayi “Júsha ¿warí áentsuit? Nasesha entsasha Nin umirainiatsuk” tiarmiayi.

**Jatara nunkanam Jesus yajauch**

**wakantrukun tsuármiania nu**

*(Mar. 5.1-20; Ruk. 8.26-39)*

<sup>28</sup>Nuyá Jesus entsá amaini katin Jatara nunkanam jeamiayi. Nui jimiará shuar yajauch wakantruuku tuke iwiartainium pujú Jesusan

tariarmiayi. Mai yajauch wakantruku ásar ti kajen áirmiayi. Tuma asamtai shuar nu jintianam nan̄kaamachu áirmiayi. <sup>29</sup>Niisha Jesusan wáinkiar kakantar tiarmiayi “¿Warí pujuram iijiāi, Jesúsá, Yusa Uchiríá. Tsawant jeatsāin in amukratkataj tusamek taum?” tiarmiayi. <sup>30</sup>Nūi arant kuchi untsurí shushun̄mak yujaarmiayi. <sup>31</sup>Yajauch wakancha Jesusan seainiak “Jiiki akupkartakmeka kuchíniam wayat̄in tsan̄katkartukta” tiarmiayi.

<sup>32</sup>Tutai Jesus “Pai, wetarum’ tímiayi. Yajauch wakancha shuara enentáiya jíinkiar kuchiniam en̄kemáwarmiayi. Túramtai kuchi wáurkiar arau utsanamiayi. Nuyá entsá inian̄kar jakerarmiayi.

<sup>33</sup>Kuchí wáinniusha nuna ashamkar péprunam tseke wéarmiayi. Nūi jeawar ashí túrunamun etserkarmiayi. Yajauch wakantrukun péñker ajasmancha etserkarmiayi. <sup>34</sup>Nuyá ashí nú peprunmayá shuar Jesusan in̄kiuntai tusar ashinkiararmiayi. Tura in̄kiun̄kar ni nun̄keyá waketkiti tusar seawarmiayi.

### Jesus emearun tsuármiania nu

(Mar. 2.1-12; Ruk. 5.17-26)

**9** <sup>1</sup>Nuyá Jesus kanunam en̄kemar antumian̄ amaini katin̄miayi. Tura nūi ni péprur̄in Kapernáumnum jeamiayi. <sup>2</sup>Nūi jeamtai shuar emearu jaan patak yanakin ejeetiarmiayi. “Tsuártatui” nekas tu enentáimtuinia ásarmatai Jesus jaan tímiayi “Uchirú, kakaram ajasta. Ashí ame tunaarum tsan̄kuramuiti.”

<sup>3</sup>Takuí Israer-shuara jintinniur̄i yajauch enentáimprar “Juka Yúsan ti yajauch chicharui” tiarmiayi.

<sup>4</sup>Tu enentáimainian Jesus nekáa tiarmiayi “¿Urukamtai imiá yajauch enentáimprum. <sup>5</sup>Tua imiá yúpichuchit. Shuara tunaar̄in tsan̄kuratin yúpichuchikiaiit. Tura emearun “Nantakim wekasata” títin yúpichuchikiaiit? <sup>6</sup>Wi Aents Ajasua núchakaitiaj. Jū nun̄kanam Wi tunaan asakátratniuitjai. Wátsek, nu nekaatarum tusan jūna iniakmastatjai.” Nuna tinia emearun “Wajaktia, tepetairam jukim jeem̄iin wetá” tímiayi. <sup>7</sup>Tutai emearu tsuámar nantaki ni jeen wémiayi. <sup>8</sup>Tura nuna ashí aents wáinkiar Yus kakarman shuáran susa asamtai ashamkar Yúsan shiir enentáimtusarmiayi.

### Jesus nemartusat tusa Mateun achíawai

(Mar. 2.13-17; Ruk. 5.27-32)

<sup>9</sup>Nuyá Jesus wémiayi. Nūi wesa Mateun kuit júutainium pujan wáiniak “Nemartusta” tímiayi. Tutai Mateu nuna ikiuak Jesusan nemarmiayi.

<sup>10</sup>Nú ukunmasha Mateu jeen yurumuk pujāi yajauch armia nu Israer-shuar untsur̄i káunkar Jesusa unuiniamur̄ijiāi irunar yurumiarmiayi. <sup>11</sup>Pariséusha nuna físar Jesusa unuiniamur̄in aniasarmiayi “¿Urukamtia atumí Uuntrī kuitia achin̄jāisha tunaarinniujāisha irunar yuruma?”

<sup>12</sup>Tura Jesus nuna antuk tímiayi “Pénker ainia nuka tsuákratniun atsumainiatsui. Antsu jainia nu tsuákratniun atsumainiawai. <sup>13</sup>Werum ju aarma unuimiutarum:

“Murik maam Winia surusum nujai “máakete” tátsujai. Antsu waitnenkartutain wakerajai,” Yus-Papiniun tu áarmaiti. Wikia “pénkeraitjai” tuńnian untsuktaj tusan táchaitjai. Antsu tunáa shuar ni enentáin yapajíáwarat tusan táwitjai” tímiayi.

**Ijiarmatniun Jesusan aniasarmiania nu**

*(Mar. 2.18-22; Ruk. 5.33-39)*

<sup>14</sup>Nuyá imiakratin Juanka unuiniamuri Jesusan tariar aniasarmiayi. “¿Urukantai iikia tura Pariséusha ijiarmaj’ tura ame unuiniamurmeka ijiarmainiatsu?” tiarmiayi.

<sup>15</sup>Jesus ayak tímiayi “Nuatma nampernum ipiaamu ainia nu ¿ajakra uutu wayamniakait? Yamái-nuatu pujakuí útchamin ániawai. Núnisan Wi pujakuí ijiarmashtin ániawai. Tura tsawant jeattawai nuatua áintsan Wi junaktatjai. Antsu nuíkia ijiarmawartatui’ tímiayi.

<sup>16</sup>Mamuru pushí jaanakmatai yamaram tarach anujtukchatniuiti. Túramka nijiam yamaram tarach sumpeak mamushan chiníkiá nuna nankaamas jaaktatui. <sup>17</sup>Nijiamanch yamáí nawar nuap najanamun arutnum yaraachminiaiti. Túramka karíak nuap najanamun ijiakratniuiti, nijiamchisha ukaratniuiti, tura nuap najanamusha yajauch ajastiniaiti. Antsu yamaram nijiamanch yamaram nuap najanamunam yaraatniuiti. Nu túramka nijiamchisha nuap najanamusha mai pénker ártatui.”

**Jesus Jairu nawantríncha tura chíkich nuwáncha tsuármiania nu**

*(Mar. 5.21-43; Ruk. 8.40-56)*

<sup>18</sup>Jesus nuna tají Israer-shuara uuntri Jesusan tarí tikishmatar tímiayi “Winia nawantur jarutkayi, tura Ame winim ewejmijíai antinrukakminkia ataksha nantaktiatui.” <sup>19</sup>Tutai Jesus ni unuiniamurijíai wajakiar nijíai wearmiayi.

<sup>20</sup>Tura jintiá weenai nuwá tuse (12) uwitin numpá ájapeak wáitias pujú asa Jesusa ukurini amainian ni pushirin antinmiayi. <sup>21</sup>“Áyatik ni pushirin antinnaka pénker ajastatjai” tu enentaimpramiayi. <sup>22</sup>Nuna nekáa Jesus ayantar nuwán tímiayi “Shiir enentáimprata, nawantru. Yus shiir enentáimtusu asam pénker ajasume.” Nu chichamtaik ni jáamuri pénker ajasmiayi.

<sup>23</sup>Nuyá Jesus uunta jéen jeamiayi. Tura nuí charaatum ajainiancha tura jakan iwiarsatai tusar péeman umpuiniiancha wáiniak <sup>24</sup>tímiayi “Áa jíntratarum. Nuwáchikia jákachai antsu aya kanarai.” Penké jakan nékayat túratta nuna neka asa “aya kanarai” tímiayi. Takui aents Nin wishikrarmiayi. <sup>25</sup>Tura nuna ashí jíir Jesus jeá wayá nuwáchin

uwejnnum achik iniantkimiayi. Túram nantakmiayi. <sup>26</sup>Nu túramu ashí nu nuṅkanam etsernarmiayi.

### Jesus kusurun jímiarán tsuármiania nu

<sup>27</sup>Nuyá Jesus wéakui jimiará shuar jii kusuru untsumki weriarmiayi. “Uuntá, ii Uuntrí Tawit ame weatrum asamtai in waitnenkarturta” tiarmiayi. <sup>28</sup>Jesus jeá wayamtai jii kusuru tariarmiayi.

Tura Jesus aniasar “¿Juna túramniaiti túrutrumek?” tímiayi.

Niisha “Ee, Uunta” tiarmiayi.

<sup>29</sup>Tuúniakui Jesus ni jii antinkiar tímiayi “Átum nekas enentáimtarmena núnisan túrunati.” <sup>30</sup>Nujai jii péñker ajararmiayi. Nuyá Jesus “Etserkairap. Shuar penké nekáwarain” tímiayi. <sup>31</sup>Támaitiat jíinkiar Jesus túramun ashí nu nuṅkanam etserkarmiayi.

### Jesus chichachun péñker awajsamiania nu

<sup>32</sup>Nuyá wenai shuar yajauch wakantruku chichachun Jesusan itiararmiayi. <sup>33</sup>Tura Jesus yajauch wakanin jiki awemamtai nu chichachu chichakmiayi. Ashí nuna ísar ti enentáimprarmiayi. Tura tiarmiayi “Yáunchusha Israer nuṅkanam jujai métek túramu penké atsuwiti.” <sup>34</sup>Antsu Pariséuka yajauch enentáimtuiniak tiarmiayi “Nu shuar iwianchi uuntrí kakarmarjijai yajauch wakanin jiki akupeawai.”

### Jesus shuaran waitnentawai

<sup>35</sup>Jesus ashí péprunam we ni iruntairin wayá “Yus akupeana nu enkemátarum” tu etsermiayi. Tura ashí nánkamas sunkurjai jáiniancha tsuármiai. <sup>36</sup>Shuaran ísar murik wáinchatia núnis pimpikiar tura kúntuts pujuinia asamtai waitnentrarmiayi. <sup>37-38</sup>Nuyá ni unuiniamurin tímiayi “Ju aents Yus-Chicham ujaktinaitji Yus-shuar ajararat tusar. Nu takat ti núkap awai tura takarin ishichik ániawai. Nu takatka júuktinia áintsankete. Júuktin tsawant jeamtai takau táasmatai takamtikin ujaktin átsuk takaun akupkat tusa. Atumsha núnisrumek Yus seatarum ni shuarin akupak áentsun júukarat tusarum.”

### Jesus tuse (12) unuiniamurin achikmiayi tuke nemarsatniun

(Mar. 3.13-19; Ruk. 6.12-16)

**10** <sup>1</sup>Nuyá Jesus tuse (12) unuiniamurin achik Yusa kakarmarin súsararmiayi yajauch wakanin shuara enentáiya jiki akupkatniun. Núnisan ashí sunkurjai jáinian tsuáartinian susamiayi.

<sup>2</sup>Ju ániawai Jesus tuse (12) unuiniamurin achikiarmia nu: Emka Semun núnisan Pitru náartiniuyayi. Nuyá ni yachi Antres. Nuyá nuámtak yáchintin Jakupusha Juansha, Sepetéu uchirí armia nu. <sup>3</sup>Nuyá Jiripi, Parturumí, Tumas, Mateu. Mateusha kuftian achiniuyayi. Arpeu uchirí

Jakupusha. Ripíu núnisan Tateu náartiniuyayi. <sup>4</sup>Ásump<sup>i</sup> Semunsha nuyá Jútas Iskariúti Jesusan ukunam surukmia nu. Nu tuse (12) achikma ármiai.

**Jesus ni unuiniamurin etserkarti tusa akupkarmiania nu**

(Mar. 6.7-13; Ruk. 9.1-6)

<sup>5</sup>Nu tuse (12) unuiniamurin Jesus júnis chicharak akupkarmiai. “Israer-shuarcha matsatmanum weerap. Samaria nunkanam péprunam weerap. <sup>6</sup>Antsu Israer-shuar murikua ánis Yusaiya wákaru ainia nu weritiarum. <sup>7</sup>“Tsawant ishichik ajasai Yus jú nunkanam akupin ajastin” tu etserki wetarum. <sup>8</sup>Tunamarusha chíkich sunkurjai jainia nusha tsuatarum. Jakasha iniantkitiarum. Yajauch wakanha shuara enentáiya jiki awematarum. Nu túratin kuftchajai kakaram susamuitrume, tuma asamtaí atumsha ashí ánrarmek túratarum.’

<sup>9</sup>Kurisha ashí kuitcha jukiirap. <sup>10</sup>Uyuncha jukiirap. Sapatcha tura ushukrustincha jukiirap. Antsu chikichik pushí jukitiarum. Takau asakrumin yurumkan ajampramsartin ániawai.’

<sup>11</sup>‘Péprunam jearmesha péñker shuar wáinkiarum nuí wayarum tuke nuín pujustarum. <sup>12</sup>Nu jeanam wayamsha “Ju jea shiir atí” titiá. <sup>13</sup>Nekas péñker shuaraitkiunka shiir ajasarti. Antsu nu shuar péñker itiarmachkuñka shiir ajascharti. <sup>14</sup>Tura nánkamsañ atumin awaintiamainiachkuñkia anturtamainiachkuñkia nuyá jinkitiarum. Nu shuar yajauch ásarmatai jinkirum atumí naweya nunka japimiarum ikiuktiarum. Ni tunaari aents nekaawarat tusarum túratarum. <sup>15</sup>Nu shuaran nekapsatin tsawant jeamtaí Yus asutiáshtatuak. Sutum péprunmayá shuara nankaamas Kumura péprunmayá shuarnasha nankaamas Yus asutiáttawai nu shuaran’ tímiayi.

**Yajauch awajsatniun ujakmiania nu**

<sup>16</sup>Aneartarum. Wisha murik yawanum akupkatniua áintsanak akupeajrume. Tuma asamtaí shiir nawamkartin áyatrum aneartarum. <sup>17</sup>Yajauch shuarjai aneartarum. Akupniunam juramkiartatui. Israer-shuar iruntainiam asutiamawartatui. <sup>18</sup>Wíi shuar asakrumin uuntnumsha tura nuyá akupniunmasha juramkiartatui. Núnisrum akupniunha tura Israer-shuarchanha winia chichamur ujaktatrume. <sup>19</sup>Tura akupniunam surutmakakrumnisha wariniak títiáj tu enentáimprairap. Nuí uuntjai chichaakrumin Yus títinian jintinramattarme. <sup>20</sup>Nuñkia átum enentáimmiajai chichaschattarme antsu atumí Apari Yusa Wakaní atumin chichamtikramsattarme.’

<sup>21</sup>‘Shuar ni yachincha máawarti tusa suruktatui. Apasha ni uchirín surukartatui. Uchisha ni aparín máawarti tusa surukartatui. <sup>22</sup>Tura Wíi shuar asakrumin mash mujramkartatui. Tura tuke katsuntea nu

uwemprattawai. <sup>23</sup>Chikichik péprunam yajauch awajtamainiakui chíkich péprunam pisartarum. Wi Aents Ajasuitjai. Tuma asan nekasán tájarne, átum Israer-shuar mashi uجاتسrumnín wantinkiattajai.’

<sup>24</sup>‘Unuiniamuka nin uniniana nuna nankaamaschaiti. Takarniusha ni uuntri nankaamaschaiti. <sup>25</sup>Unuiniamuka nin uninia nujai métek ajaska maak. Takarniusha ni úntrijjai métek ajaska maak. Wátsek, Winia atumí úntrin “Iwianchi uuntri” túrutainiakui atumniasha nuna nankaamas yajauch turamtatui.’

### **Yúsak ashamkatniuiti**

*(Ruk. 12.2-9)*

<sup>26</sup>‘Tuma asantai aentska ashamkairap. Ashí uukma nu paant nekanattawai. <sup>27</sup>Ishishmasan kiritniunam ujaajrumna nu, tsawái kakantrarum etserkatarum. <sup>28</sup>Aya ayashin main ainia nu ashamkairap. Wakanin máachmin ániawai. Antsu wakanniasha ayashniasha mai jinium emesramnia asantai Yus ashamkatarum.’

<sup>29</sup>‘Jimiará chiniki penké ishichik kuitjai surukmin ániawai. Túmaitiat Yus tsankateachkuinkia nunká jaka iniainiatsui. <sup>30</sup>Ame intiashmisha mash nekapparmaiti. <sup>31</sup>Nu asantai jákatin ashamkairap. Yusjai átumka ti untsurí chinikijjai nankaamas penkerchakaitrum.’

### **Jesus natsantrashtiniaiti**

*(Ruk. 12.8-9)*

<sup>32</sup>‘Ashí shuar ashí íimiainiaín Winia natsantruiniatsna núnaka Winia Apar yakí nayaimpiniam pujana nuí natsantrashtatjai. <sup>33</sup>Antsu shuar íimiainiaín Winia natsantra núnaka Wisha yakí nayaimpiniam winia Apar pujana nuí natsantrattajai.’

### **Jesusa chichamejai shuar akannartatui**

*(Ruk. 12.51-53; 14.26-27)*

<sup>34</sup>‘Ashí shuar nawamnaikiar shiir pujusarat tusan ju nunkanam táchaitjai. Nuna túrat tusarum enentáimturairap. Antsu wi tamaajai shuar penker ajasarmatai yajauch shuar nin nakitrartatui. <sup>35</sup>Shuar ni aparín nakitrattawai. Nuwasha nukurín nakitrattawai. Najatísha tsatsarín nakitrattawai. <sup>36</sup>Tuma asa shuar ni shuarijjai nemasrintin ártatui.’

<sup>37</sup>‘Shuar ni aparíncha nukuríncha Wijjai nankaamas aneakka Wíi shuar áchamniaiti. Núnisan ni uchiríncha nawantríncha nankaamas aneakka Wíi shuar áchamniaiti. <sup>38</sup>Tura ashí wáitsatniun surimiatsuk ni krúsrin yanaki jukí nemartachkunka Wíi shuar áchamniaiti. <sup>39</sup>Aya jú nunkanam penker pujustaj tana nu ni iwiaakmarín emesrattawai. Tura Winia anentu asa ju nunkanam penker pujustinian páchiatsna nu tuke shiir pujustatui.’

**Akinkiatin**  
(Mar. 9.41)

<sup>40</sup>Atumin itiaarma nuka Winia itiaarui. Tura itiaarea nuka Winia akuptukmia nunasha itiaawai. <sup>41</sup>Yúsnan etserniuncha Yúsnumiã winiã asamtai itiaakka etserin akínkiáttana nujaj métek akínkiáttawai. Pénker shuárnasha péñker asamtai itiaakka péñker shuar akínkiáttana nujaj métek akínkiáttawai niisha. <sup>42</sup>Uchinchá Wíi shuar asamtai entsá michan shikirak súsan̄ka imiá nekas nusha akínkiáttawai.” Tu tímiayi Jesus.

**Imiakratin Juan̄ Jesusaj shuaran akupkamiania nu**  
(Ruk. 7.18-35)

**11** <sup>1</sup>Tura tuse (12) unuiniamurin̄ Jesus tinia akupkar Niisha nú nun̄ka péprunam we Yus-Chichaman jintfak etserkamiayi.

<sup>2</sup>Tura Juan̄ sepunam en̄kemas Kristu túramun antukmiayi. Antuk ni unuiniamurin̄ jímiaran Jesusaj akupkamiayi. <sup>3</sup>Tura Jesusan aniasarmiayi “¿Nekas ame Kristu Yus akupkamu tátinia nukaitiam. Kame chikichak nákastataj?”

<sup>4</sup>Tutai Jesus tímiayi “Waketkirum ashí ántarmena nusha wáintrumna nusha Juan̄ ujaktarum. <sup>5</sup>Kusurusha wáinmainiawai. Shutuapsha wekainiawai. Tunamarusha péñker ajainiawai. Empekarusha ántuiniawai. Jákarusha nantainiawai. Tura kuítrinchánmasha uwempratin̄ chicham ujakmaiti. Nu ujaktarum. <sup>6</sup>Túrasha yawetsuk Winia tuke shiir enentáimturna nú shuar shiir átatui.” Jesus nuna tutai waketkiarmiayi.

<sup>7</sup>Waketkiarmatai shuar káunkarun Jesus Juán̄kan pachis áujmatmiayi. “Shuar atsamunmasha ¿warí werimiarum? Pintiu nase umpúam atúu we juní we ajana nuka ¿íistai tusarumek wémarum? Kame Juan̄kka nú shuarchaiti. <sup>8</sup>Nuikia ¿warí werimiarum. Shuar péñker iwiarmampra íistai tusarmek wémarum? Warí, péñker iwiarmampraka uunta jeen pujuiniatsuk. <sup>9</sup>Nuikia ¿warí werimiarum. Yúsnan etserniuk werimiarum? Maa, túrachmashiuram. Túrasha Juan̄kka yaunchu etserniu nan̄kaamas enentáimtustiniaiti. <sup>10</sup>Yaunchu Yus-Papinium áarmaiti:

“Winia akatramurun amiini emka akupeajai ame jintimin iwiarat tusa.”

Juan̄ nu akatramuiti. <sup>11</sup>Nekasan tájarme, shuar imiakratin Juan̄jaj nan̄kaamas uunt atsuwiti. Tuma ain̄ Yus akupeamunam pachiinia nu shuarnaka, nekasmianchancha, Juan̄jaj nan̄kaamas shiir enentáimtustiniaiti. Tuma asamtai nuj pachiinkiatin enentáimpratarum.’

<sup>12</sup>‘Kakaram shuarka imiakratin Juan̄ támia nú tsawantnumiã Yus akupeamunam ti pachiinkiatniun wakeruiniak kakarmajaj pachiinkiatniun enentáimiainiawai. <sup>13</sup>Juan̄ pujumia nú yaunchu ashí



Yúsnan etserin armia nusha tura Muisais akupkamusha Yus akupin ajastinian etserkarmiayi. <sup>14</sup>Yaunchu Yúsnan etserin “Kristu táatsain Erías tátniaiti” tímiayi. Tura nekaatin wakerakrumka Juan nu Eríasaiti. <sup>15</sup>Antuktin jeakrumka nekaatarum.’

<sup>16</sup>‘Ju áentsnasha ¿warijiai métek nakumkataj? Uchijiai métek ániawai. Ni aijiai iruntrar nakurustaj táyatan túniawai <sup>17</sup>“Námpera áinis nakurustaitsar peem umpuarji túrasha jantsemáthurme. Nuyá iwíarsatniua áinis nakurustaitsar íwiareakur kantamtaí kantamáji túrasha átum úutcharme.” <sup>18</sup>Atumsha núnisaitrume. Kame Juan núkap yurumsuk nijiamchinchá úmutsuk wekaimiayi. Túmakui átumka “Yajauch wakantrukuiti” tímiarme. <sup>19</sup>Nuyá Wisha Aents Ajasu támajai. Tura yurumeakui tura úmakui “Ti yurumin ti nampenaiti. Ashí yajauch shuaran amikrinti” túrutrume. Wátsek, wi túramujai Yus nekas nékamu nekanattawai.”

**Yajauch péprunmaya shuaran chicharkamiania nu**  
(Ruk. 10.13-15)

<sup>20</sup>Nuyá tujintiamun túramiania nú péprunmaya shuaran pachis Jesus chicharkamiayi. Tuma ain nuyá shuar ni enentáin yapajíácharu asamtaí juna chicharkamiayi.

<sup>21</sup>“Wáinkiatá, Kurasín péprunmayatiram, Petsaitia péprunmayatirmesha. Nuí aents tujintiamun ti túraitjai. Tiru péprunmasha Setun péprunmasha nu tujintiamu túramuitkiuinikia yaunchu ni enentáin yapajíáwaraayi. Túrawar kúntuts pujutai pushín entsarar yunkunim ajakiaraayi. <sup>22</sup>Tura Wisha tájarne, nekapsatin tsawant jeamtaí Yus atumin tí asuttiamattarme. Tirunmaya shuaran nankaamas tura Setunnumia shuaran nankaamas asuttiamattarme.’

<sup>23</sup>‘Tura atumsha Kapernáum péprunmayatirmesha, ashí nankaamas nankaamantu ajastin enentáimtumarme. Antsu ashí emestamprartatui. Atumiin aents tujintiamun ti túraitjai. Sutuma péprunam nu tujintiamu túramuitkiuinikia nu pepru yamaisha tuke aayi. <sup>24</sup>Tura Wisha tájarne, nekapsatin tsawant jeamtaí Yus Sutumanmaya shuar nankaamas atumin asuttiamattarme.’

**“Winin ayampratarum” tímiania nu**  
(Ruk. 10.21-22)

<sup>25</sup>Nuyá Jesus tímiayi “Shiir enentáimtajme, Aparu, ashí nayaimpisha nunkasha Úuntrinme. Tuma asam Ame túram nu ti unuimiaru enentáimtumainia nuyá úukuitme antsu uchichia áinis nankaamantu enentáimtumainiatsna nú shuar paant awajtusuitme. <sup>26</sup>Ame, Aparu, núnis wakera asam túraitme.’

<sup>27</sup>‘Winia Apar ashí surusuiti. Wisha ni Uchirí asamtaí Winia nékarui. Tura chíkich Winia nekas nekarainiatsui. Yus Apancha Wiki nékajai.

Tura Wi wakeraj nú shuaran winia Aparun paant awajtajai. Nu shuarsha winia Aparun nékainiawai. <sup>28</sup>Ashí pimpikniutirmesha itiurchat pujarmena nusha Winí winitiarum. Túrakrumniñkia ayamtikrattajrume. <sup>29</sup>Wi kajechu asan tura péejchach enentáimin asantai Winí winirum unuimiartarum. Winia chichamur ántakrum umíakrumniñka atumí wakaní ayamprattawai. <sup>30</sup>Atumin akuptaj nú túratin yúpichuchiiti. Káarkasha Wi súajrumna nu wampuchiiti” tímiayi Jesus.

**Jesusa unuiniamurí ayampratin tsawantaj trikiu neren pakaarmiania nu**  
(*Mar. 2.23-28; Ruk. 6.1-5*)

**12** <sup>1</sup>Nuyá Jesus ayampratin tsawantaj ajanman ajapenin nankaamamiayi. Ni unuiniamurisha tsukarar trikiu neren majusar yukí wekasarmiayi. <sup>2</sup>Pariséu shuarsha nuna wáinkiar Jesusan aniasarmiayi “Iista, ame unuiniamuram ayampratin tsawantaj túratin surimkiamua nuna túruiniawai.”

<sup>3</sup>Tutai Jesus tímiayi “Yaunchu uunt akupin Tawitcha tura nemarniusha tsukamainiak túrawarmia nu ántichukaitrum. <sup>4</sup>Yusa Uunt Jeen wayá Yus iniaktusma tantan yuámiayi. Nu tantasha aya Israer-patrik yúatin asantai Tawitniasha tura ni nemanin ana nunasha suritkiamuyayi. Túmain yúawarmiayi. <sup>5</sup>Muisais akupkamunam aarma nu áujkachukaitrum. Israer-patrikia ayampratin tsawantaj takainiyatan nusha tunaachuiti. <sup>6</sup>Nekas tájarme, yamá Yusa Jeen enentáimtustinia nuna nankaamas Wíniaka Aents Ajasuitjiana nu, nekas enentáimtursatniuutrume. <sup>7</sup>Yus-Papinium tawai:

“Murik maam Winia surusum nujaj “maakete” tátsujai. Antsu waitnenkartutain wakerajai.”

Nu chicham nekas nékaitkiurmeka yamá túrarmena núnisrum tunáa túrachu ántararum súmamtikiachaintrume. <sup>8</sup>Wi Aents Ajasu asan ayampratin tsawantan Úntrintjai.”

**Shuara uwejé jakan Jesus tsuármiania nu**  
(*Mar. 3.1-6; Ruk. 6.6-11*)

<sup>9</sup>Jesus nuyá wé Israer-shuar iruntainiam wayamiayi. <sup>10</sup>Nuj shuar ámiayi ni uwejé jaka. Tura Jesusan ántar nekapsatai tusa wakeruinia ásar aniiniak “¿Ayampratin tsawantaj jaa shuar tsuarminkiait?” tiarmiayi.

<sup>11</sup>Tutai Jesus tímiayi “Atumsha atumí murikrú ayampratin tsawantaj wáanam akaiki iniamtai jusatai tusarum wéchaintrupash. <sup>12</sup>Antsu shuarka murikjaj nankaamaschakait. Tuma asantai ayampratin tsawantajsha péñker ana nu túramniaiti.” <sup>13</sup>Tinia iniais áishmankan uwejé jakan tímiayi “Uwejém takuitia.” Tutai uwejé takuí chíkich uwejéjaj métek péñker ajasmiai. <sup>14</sup>Nuna túramtai Pariséu shuarsha aa jíinkiar Jesus itiurak máawaintiaji<sup>i</sup> tusar chichaman najatiarmiayi.

### Isayas Jesusnan tímia nu uminkiamiayi

<sup>15</sup>Jesus nin máatniun nekaama nuyá jíinkiamiyi tura wéakuí untsurí shuar nemariarmiayi. Untsurí jáiniancha tsuámiayi. <sup>16</sup>Tsuar “etserkairap” tinia akupiarmiayi. <sup>17</sup>Yaunchu Yúsnan etserin Isayas tímia nu uminkiatí tusa túrunamiayi. Niisha juna áarmiayi:

<sup>18</sup>“Júiti Wi achikmaj nu. Niisha Wi tájana nuna umin asamtai ti aneakun Niijai waraajai. Winia Wakantru kakarmarin takamtsuk susattajai. Túramtai winia uwempratin chichamprun ashí Israercha nunkanmasha etserkattawai. <sup>19</sup>Jiakchattawai tura kakaram chichaschattawai. Winia anturtukarat tusa péprunam weak untsukchartatui. <sup>20</sup>Akupin ajatsuk shuar pintiu punua núnis pimpiru ainia nuna kúpitsuk yáintatui. Núnisan shuar ji yama ikiapámu áinis kakarmachu ainia nuna ikiajniatsuk ikiakártatui. Tura ashí nupetak ti péker kakaram akupin ajastatui. <sup>21</sup>Tura Israer-shuarchasha Nin nekas enentámtusartatui.”

### Jesusan “iwianchi uuntri kakarmarijiai túrawai” tiarmiania nu (Mar. 3.19-30; Ruk. 11.14-23; 12.10)

<sup>22</sup>Nuyá Jesusan shuar yajauch wakantrukun ititariarmiayi. Nu shuar jii kusurusha chichachusha ámiayi. Tura Jesus tsuármatai paant ímsamiayi tura chichakmiayi. <sup>23</sup>Nuna wáinkiar shuar shiir enentáimprar tiarmiayi “¿Tawitia uchirí pampanku iniannamu uwemtikkiartin tátinia nuáshit?”

<sup>24</sup>Tura Pariséu shuarsha nuna antukar yajauch enentáimtuiniak tiarmiayi “Juka iwianchi kapitántrin Pirsepún umirniuiti. Tuma asa nuna kakarmarijiai yajauch wakanin jiki akupeawai.”

<sup>25</sup>Jesus tu enentáimainian neka asa tímiayi “Nú nunkanmaya shuar nuamtak kajernaiyakuinkia nú nunka wari meserchattawak. Núnisan nuamtak shuar ní shuarjai mánainiakka amunaikchartatuak. <sup>26</sup>Núnisan íwianch nuamtak jiki akupnainiakka máanaikiar wárik amuukashtatuak. <sup>27</sup>Kame Wi Pirsepú iwianchi kakarmarijiai iwianchin jiki akupeakuinkia atumí uchirísha ¿yana kakarmarijiaín jiki akupena? Ni túramurijiai átum awajirma nekamatarum. <sup>28</sup>Wi Yusa Wakaní kakarmarijiai yajauch wakanin jiki akupea asamtai atumsha Yusa akupeamuri atumiin jeartamarmena nu nekaatniuitrume.”

<sup>29</sup>Iista. Shuar kakaram shuara kuítrin kasarkatin wakerakka emka kakarman jinkíá aya túran ni jeen wayá kasarkamniaiti. Wi iwianchin jikmiajai uunt iwianch nupetkamua nu nekaamniaiti.’

<sup>30</sup>‘Wijiai tsanin pujatsna nuka winia nemasruiti. Núnisan Winia yáintsuna nu aya itiurchat nájateawai.’

<sup>31</sup>‘Tuma asamtai tájarme, Ashí shuar tunáa túruinia nusha yajauch chichainia nusha tsankuratin awai. Antsu Yusa Wakanin yajauch

chicharin ainia nuka tsan̄kurashstiniaiti. <sup>32</sup>Winiasha Aents Ajasuitjiana nuna yajauch chichartuinia nú shuarsha tsan̄kuramniaiti. Tura Yusa Wakan̄in yajauch áujmatainia nuka pen̄ké tsan̄kurachminiaiti. Ju nun̄kanmasha tura ukunmasha tsan̄kurnarchattawai' tímiayi.

**Ni nerejaj̄i numi nekaamniaiti**

*(Ruk. 6.43-45)*

<sup>33</sup>Yutai numi pen̄keran nereawai. Tseas numisha yajauchin nereawai. Ni nerejaj̄i numi nekaamniaiti. Núniskete atumjaj̄i. <sup>34</sup>Tseas wenunniutirmesha, ¿atumsha itiurak imiá yajauchitirmesha pen̄ker chichamsha chichastarum? Shuar ni enentáin enentáimna nuna chichaawiti. <sup>35</sup>Pen̄ker shuar pen̄ker enentáimiu asa shiir chichaawiti. Tura yajauch shuar yajauch enentáimiu asa yajauch chichaawiti. <sup>36</sup>Tura Wisha tájarme, nekapsatin tsawant jeamtai ashí enentáimtsuk chichakma nuna Yúsan paant ujakartatui. <sup>37</sup>Iis, ame chichammijaj̄i nekanattarme. Pen̄ker chichakuitkiumka sumamashtatme. Tura pen̄ker chichakchaitkiumka sumamattame.”

**Nu shuar yajauch ásar iniakmamun seawarmiania nu**

*(Mar. 8.12; Ruk. 11.29-32)*

<sup>38</sup>Pariséu shuarsha Israer-shuara jintinniurisha Jesusan chicharuk “Uuntá, ame Yúsaiyaitjai tusam nayaimpinmaya kakarmajaj̄i iniakmamun túrata, iisha wáinkiatai” tiarmiayi.

<sup>39</sup>Tutai Jesus tímiayi “Shuar yajauch tura Yúsan enentáimtachu ásar nayaimpinmaya iniakmamun seainiawai. Tuma asamtai, áyatik yaunchu Junas túrunamu iniakmastiniaiti. <sup>40</sup>Junas menaintiu kashi menaintiu tsawantcha namaka ampujen en̄kemsamiayi. Núnisnak Wi, Aents Ajasu asan, menaintiu kashi menaintiu tsawantcha nun̄ká jakan tepestatjai. <sup>41</sup>Junás Níniwi péprunmaya shuaran Yus-Chichaman etserkamtai nu shuar ni tunaar̄in enentáimtusar ni enentáin yapajjáwarmiayi. Tura jūi yamá Junasa nan̄kaamas etserin pujawai. Wiitjai nusha, tura anturkachuitrume. Tuma asamtai nekapsatin tsawant jeamtai Níniwinmaya shuar juyá shuaran súmamtikiawartatui.’

<sup>42</sup>Yaunchu nuwá yajaya shuaran úunt akupniuriyayi. Nu nuwá Sarumún ti neka asamtai nin anturkataj tusa tarimiayi. Tura jūi yamá Sarumúnjaj̄i nan̄kaamas anturkamnia pujawai. Nusha Wiitjai. Tuma asamtai nekapsatin tsawant jeamtai nu nuwá juyá shuaran súmamtikiawartatui' tímiayi.

**Yajauch wakan j̄iiki akupkamuiat wáketna nu**

*(Ruk. 11.24-26)*

<sup>43</sup>Shuara enentáiyá yajauch wakan j̄iinkin yumi pen̄ké yútatsna nūi wéawai. Tura nūi pen̄ker pujustinian wáinkiach ataksha waketkitniun

enentáimiui. <sup>44</sup>“Wi jíinkimijaj nuí waketkittijajai” tawai. Tura waketki shuara enentáin pénker iwiaramu tura ankantán wáiniak <sup>45</sup>ni aín siati (7) iwianchin níijijai nankaamas yajauchin itiá shuara enentáin enkemáwartatui. Túrunamtai nu shuar nuiki nuna nankaamas yajauch ajastatui. Núnisan juyá shuar túrunawartatui” tímiayi Jesus.

**Jesusa yachí, Jesusa nukurí**  
(*Mar. 3.31-35; Ruk. 8.19-21*)

<sup>46</sup>Jesus nu shuarjajai tuke chichaak pujajai ni nukurísha ni yachísha tariarmiayi. Tura aa wajasar Níijijai chichastaj tiarmiayi. <sup>47</sup>Túramtai Jesusan ujakar “Ame nukusha yatsumsha aa wajasar chichastaj turamainiawai” tiarmiayi.

<sup>48</sup>Chichaman ujakmia nuna Jesus tímiayi “¿Ya ainia winia nukursha winia yatsursha?” <sup>49</sup>Nuyá ni unuiniamurín iniakmas tímiayi “Ju áiniawai winia nukur tura winia yatsursha. <sup>50</sup>Ashí shuar winia Apar nayaimpiniam pujana nu wakeramun umiiniana nu winia yatsur winia umar winia nukur áiniawai” tímiayi.

**Untsurí métek-taku chichamjajai Jesus unuiniamiania nu**

**(1) Atsaamin atsaampramiayi**  
(*Mar. 4.1-9; Ruk. 8.4-8*)

**13** <sup>1</sup>Nu tsawantajai Jesus ni jeeyá jíinkin antumianka kánmatkarín pujusmiayi. <sup>2</sup>Tura ti untsurí shuar káunkarmatai kanunam enkemar nuí pujusmiayi. Shuarsha antumianka kánmatkarín pujusarmiayi. <sup>3</sup>Túrunawarmatai untsurí métek-taku chichamjajai unuiniamiayi. “Atsaamin atsaamprataj tusa jíinkimijai, tímiayi. <sup>4</sup>Atsaamki wesa arakrí jintia písunmasha iniaarmai. Tura chiniki tariar yuawarmai. <sup>5</sup>Chikichcha kaya írunmanum iniaarmai. Nunka ishichik asamtai wárik tsapainiarmai. <sup>6</sup>Tura nantu etsantramtai pénker kankáprúrcharu asa sukuam káararmai. <sup>7</sup>Chikichcha janí nupanam iniaarmai. Tura janí wárik tsakar nupetak ajakramai. <sup>8</sup>Chikichcha pénker nunkanam iniaarmai. Nusha pénker nerekar chíkich siansha (100) nerekarmai. Tura chikichcha sesenta (60) nerekarmai. Tura chikichcha trainta (30) nerekarmai. <sup>9</sup>Kuishim ákuinkia antuktaram” tímiayi.

**“¿Urukamtai aya métek-taku chichamjajai jintiam?” aniasarmiania nu**  
(*Mar. 4.10-12; Ruk. 8.9-10*)

<sup>10</sup>Nuyá ni unuiniamurín Jesusan taruntar aniiniak “¿Urukamtai aya métek-taku chichamjajai ju shuar unuiniam?” tiarmiayi.

<sup>11</sup>Tutai Jesus tímiayi “Urukuk ju nunkanam Yus akupin ati, nuka yaunchu nekanachmiayi. Tura yamaikia Yus ashí nuna atumin paant

iniakturmawai. Antsu chíkich nuna nekaachmin áiniawai. <sup>12</sup>Kame núkap takakna nu shuar nú nukap patatnaktatui tura ti núkap takustatui. Antsu ishichik takakna nuka ishichik takakuk juruktiniaiti. Núnisan<sub>ñ</sub> Yusna ti nekarum nú núkapka yúpichuch nekaattarme. Tura ishichik nékarum wárik kajinmatkittiar<sub>me</sub>. <sup>13</sup>Tuma asamtai aya métek-taku chicham<sub>jai</sub> unuinia<sub>jai</sub>. Nú shuarka íniayatan<sub>ñ</sub> wáiniáiniatsui. Ántuiniayatan<sub>ñ</sub> ántachua núnis nékainiatsui. Túmainiak Winia nekarainiatsui. <sup>14</sup>Nujai<sub>ñ</sub> yaunchu Yúsna<sub>n</sub> etserin Isayas timia nu uminkiaiti. Juna<sub>ñ</sub> tímiayi:

“Ti ántayatrum anturkashtatrum<sub>e</sub>. Wáiniatrumsha nekaashtatrum<sub>e</sub>.

<sup>15</sup>Ju<sub>ñ</sub> shuara enentái<sub>ñ</sub> kátsuram ásar péñker<sub>a</sub> nuna nakitiainiawai.

Nu asamtai péñker<sub>a</sub> ántuiniatsui, jii<sub>ñ</sub>sha pusá áinis áiniawai.

Túrachkun<sub>ka</sub> paant nekaawarainti, tura nekas antukarainti, tura enentáij<sub>jai</sub> enentáimias Winia tsuarat tusa tarutiarainti.”

<sup>16</sup>Tura átumka paant wainkia asarum péñker<sub>a</sub> anta asarum shíraitrum<sub>e</sub>.

<sup>17</sup>Nekasan tájar<sub>me</sub>, untsurí<sub>ñ</sub> Yúsna<sub>n</sub> etserniusha tura péñker<sub>a</sub> shuarsha átum yamá<sub>ñ</sub> wáintrum nuna wáinkiatniun wakeruiniayatan<sub>ñ</sub> wáinkiacharmia<sub>yí</sub>. Tura átum yamá<sub>ñ</sub> ántarme nuna antuktinian wakeruiniayatan<sub>ñ</sub> antukcharmia<sub>yí</sub>’ tímiayi.

### Jesus atsaampramu chichaman paant jintintiamiania nu

(Mar. 4.13-20; Ruk. 8.11-15)

<sup>18</sup>‘Ayu, antuktarum. Atsaampramu chichaman paant jintintiatjar<sub>me</sub>.

<sup>19</sup>Árak jintia písunam iniaararma nuka shuar Yus-Chichaman ántayatan<sub>ñ</sub> ni enentáin<sub>ñ</sub> ikiuiniatsna núiti. Tura íwianch nu Yus-Chicham ni enentáin<sub>ñ</sub> atsaampramu áinis antukman kajinmatkiawai. <sup>20</sup>Árak kaya írunmanum iniaararma nuka shuar Yus-Chichaman antuk waras umirainia núiti. <sup>21</sup>Tura núkap kan<sub>ka</sub>prurcharu ásar katsuiniatsui. Antsu itiurchatan íñkiuiniak tura Yus-Chichaman wakeruinia ásarmatai chíkich yajauch áujmatam wárik iniaisar ikiuiniawai. <sup>22</sup>Árak jan<sub>kí</sub> nupanam iniaararma nuka shuar Yus-Chichaman antuk emka umirniua núiti. Tura ju<sub>ñ</sub> nun<sub>kanam</sub> írunna nuna tuke páchiniak ni ku<sub>ñ</sub>tríncha ti enentáimtuinia ásarmatai ashí Yus-Chichaman enentáimtamun núpeteawai. Tuma asamtai nu áentsnum Yus-Chicham atsaampramu nereatsui. Yus-Chicham ni enentáin<sub>ñ</sub> takasma atsawai. <sup>23</sup>Tura árak péñker<sub>a</sub> nun<sub>kanam</sub> iniaararma nuka shuar Yus-Chichaman antuk péñker<sub>a</sub> umirainia núiti. Tura péñker<sub>a</sub> nerenawai. Chíkich sia<sub>ñ</sub> (100) nerekarma núnis chikichcha sesenta (60) nerekarma núnis chikichcha trainta (30) nerekarma núnis áiniawai” tímiayi Jesus.

### (2) Yajauch nupa<sub>ñ</sub> tríkiunam atsaamkam<sub>u</sub>

<sup>24</sup>Jesus ataksha ju<sub>ñ</sub> métek-taku chichaman áujmatsamiayi. “Shuar Yus akupeamunam pachiiinkartin júnisaiti. Shuar péñker<sub>a</sub> arakan, tríkiun ni nun<sub>ken</sub> araamai. <sup>25</sup>Tura ashí kanararmatai nemasr<sub>í</sub> kashi taa trikiu

arakmanum yajauch nupañ aratak ikiukmiai. <sup>26</sup>Trikiu tsapakar nereakuí nuyá yajauch nupasha nusháa nereku asa ti paant ajasmai. <sup>27</sup>Nuna íisar takainia nu ni úuntrin werí tiarmai “Uunta, ¿pénker arak araachmakam. Itiura jusha yajauch nupasha tsapakuit?”

<sup>28</sup>“Tutai nérentin timiai “Winia nemasur arakuiti.”

“Takui ni takarniuri tiarmai “¿Yajauch nupañ uwerat tusam wakeramek?””

<sup>29</sup>“Tutai timiai “Atsá, uwerairap. Yajauch nupa uweaj tukamarum trikiu uweniirum. <sup>30</sup>Iniaisatarum. Antsu métek tsakakti. Júuktin tsawant jeamtai winia takartinian emka yajauch nupañ uwer irumar jinkiawarat tusan akupkartatjai. Tura áesawartatui. Tura trikiu neren júukar pénker ikiusarat tusan akupkartatjai” timiai” tímiayi Jesus.

### (3) Mustasa jínkiái

(*Mar. 4.30-32; Ruk. 13.18-19*)

<sup>31</sup>Jesus ataksha métek-taku chichaman áujmatsamiayi. “Shuar Yus akupeamunam pachiinkiertin mustasa jínkiáiya áintsan̄kete. Shuar pénker nun̄ken araamai. <sup>32</sup>Mustasa jínkiáikia imiá uchichiitiat tsapái tsakaakka ashí numichijíaj̄i nan̄kaamas uunt ajawai. Ti uunt asamtai chin̄ki ni kanawen pasun̄mainiawai” tímiayi Jesus.

### (4) Karin en̄ketatin

(*Ruk. 13.20-21*)

<sup>33</sup>Núnisan̄ chíkich métek-taku chichaman áujmatsamiayi. “Shuar Yus akupeamunam pachiinkiertin karinia áintsan̄kete. Nuwá nijiamchiniam karinia en̄kea mashi páchimiawai. Tura nu mash karim̄tikiawai” tímiayi.

### Jesus aya métek-taku chichamjaj̄in̄ jintintiamiania nu

(*Mar. 4.33-34*)

<sup>34-35</sup>Ashí nuna Jesus métek-taku chichamjaj̄i áujmatsamiayi. Yaunchu Yúsnan etserin timia nu uminkiat tusa túramiayi. Etserin juna áarmiayi:

“Métek-taku chichamjaj̄i áujmattiatjai. Yámankam̄taiknumiá nékashtain̄ etserkattajai” tu áarmiayi.

Nu asamtai aya métek-taku chichamjaj̄in̄ áujmatmiayi Jesus.

### Jesus yajauch nupa tríkiunam atsamkamun paant awajsamiania nu

<sup>36</sup>Nuyá shuaran ikiukin Jesus jeá támiayi. Túramtai ni unuiniamuri tariar “Yajauch nupa áujmatmena nu paant awajsata” tiarmiayi.

<sup>37</sup>Tutai Jesus tímiayi “Wi Aents Ajasuitjai. Wi pénker arakan atsaamkajtjai. <sup>38</sup>Ashí nun̄ka aja áintsaiti. Pénker jínkiái Yus-shuaran Yus akupea nuna nakumeawai. Yajauch nupa iwianchna ainia nuna nakumeawai. <sup>39</sup>Tura íwianch ii nemasri asa yajauch nupañ arakuiti.

Tura nunka amúamunam Yusa suntarii arakan júuktinia áintsanu shuaran yaruaktatui. <sup>40</sup>Yajauch nupa irur jinium áesatniua áanis nunka amúamunam túrunattawai. <sup>41-42</sup>Nui Wi Aents Ajasu asan winia suntarun akupkattajai. Tura ashí tunaan túruinia nunasha tura chikichan tunaanum útsuinia nunasha mash irurar jinium apeawartatui. Nuisha ti úutin ti wáitsatniusha átatui. <sup>43</sup>Antsu pénker túruinia nuka ti shiir wincha ajasar ni Apari akupeana nui etsa núnis tsáapnin ajasartatui. Wats, kuishim átsuk. Antukta.’

#### (5) Kuit wáinkiamu

<sup>44</sup>‘Shuar Yus akupeamunam pachiinkiatin kuit nunká uukma áintsankete. Shuar nu kuítian wáiniak nui ataksha uukmai. Tura ti waras waketki nu kuit niiniu atí tusa ashí ni takakman suruk nu nunkan sumakmai.’

#### (6) Kaya shiirmach ti kuitia nu

<sup>45</sup>‘Shuar Yus akupeamunam pachiinkiatin júnisaiti. Shuar kayachin ti shíirman eak wekaana áintsankete. <sup>46</sup>Tura kayan ashí nankaamas kuit jeean wáiniak waketki ashí takakna nuna suruk nu kayan niiniu atí tusa súmawai.’

#### (7) Neka

<sup>47</sup>‘Shuar Yus akupeamunam pachiinkiatin júnisaiti. Shuar nekajai namakan achía áintsankete. Nekan nayaantsanam ajuntak niisháa namakaim achíawai. <sup>48</sup>Tura nekanam nemarmatai kukar jiiki, nui pénker namaknasha chankinnium chumpiniawai. Tura yajauch namaknaka ajapenawai. <sup>49</sup>Núnisanu átatui nunka amúamunam. Yusa suntarii taar Yus-shuaran tura íwianch shuaran akantrattawai. <sup>50</sup>Tura íwianch shuarnaka uunt jinium apeattawai. Nuisha ti úutin ti wáitsatin átatui.” Nuna ashí ni unuiniamurijjai áujmatsamiayi Jesus.

#### Yamá*i* nekaamujajisha tura yaunchu nekaamujajisha Yus-shuaran yáintiniaiti

<sup>51</sup>Jesus nuna tinia amuk “¿Jui mash antukurmek?’ tímiayi.

Tutai ni unuiniamuri “Ee, Uunta, ashí antukji” tiarmiayi.

<sup>52</sup>Tuiniakui Jesus tímiayi “Shuar ashí Yúsnan pénker unuimiaruka aents kuítriniua áintsankete. Ni ikiutairiya yamarmancha yaunchu sumakmancha jusamniaiti. Núnisanu nu shuar yamá*i* nékamujajisha tura yaunchu nékamujajisha Yus-shuaran yáintiniaiti.”

#### Jesus Nasarénum waketkimiania nu (Mar. 6.1-6; Ruk. 4.16-30)

<sup>53</sup>Jesus nu métek-taku chichaman áujmatas amuk nuyá wémiayi.

<sup>54</sup>Tura ni péprurin Nasarénum jeá Israer-shuar iruntainiam wayá



unuiniamiayi. Tura nuyá shuar antukar tí enentaimprarmiayi. Tura “¿Jusha tuĵ imiá unuimiaruit, tiarmiayi. Itiurak aents tujintiamun túramniait? <sup>55</sup>Juka karpintíru uchirinchukait. Nukurísha Marichukait. Tura ni yachísha Jakupu, Jusé, Semuñ, Jútas áiniatsuk. <sup>56</sup>Tura ni umaisha iijiaĵ írutra pujuiniatsuk. ¿Nuikia itiura mash neka?” tiarmiayi. <sup>57</sup>Túrawar Jesusan itiurchat enentáimturarmiayi.

Túramtai Jesus chicharuk “Yúsnan etserniun ashí shuar péñker anturainiawai, antsu aya nuna nunkeyañka ni shuarinñkia nin anturainiatsui” tímiayi. <sup>58</sup>Tura nú shuar Jesusan enentáimtuiniachu asamtai aentsti tujintiamun aya ishichik túramiayi.

**Imiakratin Juan jakamu**  
(*Mar. 6.14-29; Ruk. 9.7-9*)

**14** <sup>1</sup>Kariréa nunkanam Erutis akupniuyayi. Tura Jesus túramuncha antukmiayi. <sup>2</sup>Tura ni írutramurĵn tímiayi “Nuka imiakratin Juan jakamunmayā nantaki túrawai auka. Tuma asa aents tujintiamun túrawai” tímiayi. Kame Erutis Juanñkan maa asa tímiayi.

<sup>3-4</sup>Akupin Erutis ni yachí Jiripi nuwēn Jirutífasan akintrukmatai Juan Erutisan “Ame yatsumi nuwé akintrukchatniuitme” tímiayi. Tutai Erutis Juanñkan achik jirujāĵ jĩnkiá sepunam enkeatarum tusa akupkamiayi. <sup>5</sup>Niisha Juanñkan máataj tukamá aentsun ashamiarmiayi. Ashí aents “Juan Yúsnan etserniuiti” enentáimtuiniakui ashamiayi. <sup>6</sup>Tura akupin Erutis akiiniamu tsawantri jeamtai nú námpertin Jirutífasa nawantri ashí ipiaamu pujuiniamunam jantsemamiayi. Túramtai Erutis shiir enentáimtak <sup>7</sup>“Ame ashí wakeram nu seattia, tímiayi. Nekasan amastatjai, Yussha iirui” tímiayi.

<sup>8</sup>Tutai nu nuwāch emka ni nukurĵ akatramu asa Erutisan chicharuk “Imiakratin Juanñka muuké tsupikiam amamkunam enkeram surústá” tímiayi.

<sup>9</sup>Tutai Erutis wake mesekmiayi. Túrasha “nekas Yus iirui” tiniu asa tura ni amikrisha antukaru asamtai umikmiayi. <sup>10</sup>Ni suntarin sepunmayān Juanñka muuken tsupik itiarti tusa akupkamiayi. <sup>11</sup>Tura amamkunam itiar nuwāchin súsarmiayi. Tura niisha ni nukurĵ susamiayi.

<sup>12</sup>Nuyá Juanñka írutramurĵ tariat ayashĵ jukiar iwíarsarmiayi. Túrawar Jesusan ujauwearmiayi.

**Jesus senku mir (5000) áishmañkan ayuramiania nu**  
(*Mar. 6.30-44; Ruk. 9.10-17; Juan 6.1-14*)

<sup>13</sup>Jesus nuna antuk Niñki ni unuiniamurijiaĵin kanunam enkemar arant aents atsamunam wémiayi. Túrasha nuna aents nekaawar kukarak weriarmiayi Jesusan. <sup>14</sup>Kanunmayā jíiniaj tukamá untsurĵ áentsun wáinkiamiayi. Tura wáiniak waitnentrarmiayi. Tura jáiniancha

tsuárarmiayi. <sup>15</sup>Kíakui ni unuiniamurí Nin tariar tiarmiayi “Kíawai, Uunta. Tura shuar tíjijuch pujaaka atsawai. Jū aents akupkarta. Péprunam wear sumak yuuwearti” tiarmiayi.

<sup>16</sup>Tutai Jesus tímiayi “¿Urukamtaik wearat? Antsu atumek ayuratarum.”

<sup>17</sup>Tutai tiarmiayi “líkia takaktsuji. Aya senku (5) tantachik jimíarchik namakchijiaín takakji.”

<sup>18</sup>Tuíníakui Jesus “Wats, nu itiartitiarum” tímiayi. <sup>19</sup>Tinia aents chírichriniam pujusarti tusa akupkamiayi. Nuyá senku (5) tantancha jímiar namaknasha achik nayaimpiniam ímias Yúsan yumínsamiayi. Tura puur ni unuiniamurín aents ayuratarum tusa súsarmiayi. <sup>20</sup>Ashí yurumáwar jémararmiayi. Tura nuyasha puunaruka tuse (12) chan̄kin tíarmiayi. <sup>21</sup>Nu j yurumáwarmia nusha nuwasha uchisha nekapmatsuk senku mir (5000) aya áishman̄ áirmiayi.

### **Jesus entsá pátatek wekasamiania nu**

*(Mar. 6.45-52; Juan̄ 6.16-21)*

<sup>22</sup>Nuyá Jesus ni unuiniamurín kanunam en̄kemprarum amain émaa ajatarum tusa akupkarmiayi. Niisha áentsun akupkarmiayi.

<sup>23</sup>Akupkarsha naint waka Yúsan áujumiayi. Káshisha nu j Niñki tuke pujumiayi. <sup>24</sup>Tura antumian̄ tí wan̄karam asamtai kanu ajapén ajasmatai nase tukumma entsa tamparukmiayi. <sup>25</sup>Tsawaana a j nii tuke wenaj Jesus entsá pátatek wekas pujuiniamunam jeamiayi. <sup>26</sup>Tura ni unuiniamurí entsá pátatek wekaan wáinkiar ti sapijmiakarmiayi. Tura ashamainiak “wakanchashit” tiarmiayi.

<sup>27</sup>Tuíníakui Jesus tiarmiayi “Kakaram ajastarum. Wiitjai. Ashamprukairap.”

<sup>28</sup>Takui Pítiur chicharuk tímiayi “Uunta, Ámetkumka nu j wekasa jeatin untsurkata.”

<sup>29</sup>Takui Jesus tímiayi “Wats, winitia.”

Tutai Pítiur kanunmaya akaikin Jesus wajana nu j jeataj tusa entsá pátatek wekasamiayi. <sup>30</sup>Tura ti nasen násentun nekáa ashamkamiayi. Ashama asa entsá wayamiayi. Tura “Uuntá, achirkata” tu untsummiayi.

<sup>31</sup>Nu chichamtaik Jesus uwejn̄um achik júak “Maa, Yus imiá ishichik enentáimtuschamek” tímiayi. <sup>32</sup>Tura kanunam en̄kemáwarmatai nasesha men̄kakamiayi.

<sup>33</sup>Túramtai kanunam en̄kemarmia nusha Jesusan tikishmatar chicharuk “Nekas ame Yusa Uchirínme” tiarmiayi.

### **Jesus Jinisarítnumiá shuaran tsuármiania nu**

*(Mar. 6.53-56)*

<sup>34</sup>Tura amain j katiñkiar Jinisarít nun̄kanam jearmiayi. <sup>35</sup>Tura nuyá aents Jesusan nekaawar nu nun̄kanam ashí ujanairarmiayi. Túrawar

jaancha ni pujamunam itiararmiayi. <sup>36</sup>Ni pushirinkisha antintai tusar seawarmiayi.

**Shuáran yajauch awajeana nuna Jesus jintintiamiania nu**  
(*Mar. 7.1-23*)

**15** <sup>1</sup>Nuyá Jerusarén péprunmaya Parísésha yaunchu akupkamu jintinniurisha Jesusan tariar aniasarmiayi <sup>2</sup>“¿Urukantai ame unuiniamuram ii uuntri yaunchu jintintrarmia nuna uminiatsu? Iis, ikijmiatskesha yurumáiniawai” tiarmiayi.

<sup>3</sup>Tuániakui Jesus aniasarmiayi “¿Urukantai atumsha Yus akupkamu umirtsuk aya aents akupkamu umiirum? <sup>4</sup>Iis, Yus tíchamkia:

“Ame apa, nukusha shiir enentáimtustarum.” Tura “Shuarsha ni aparíncha nukuríncha katsekka nu shuar jakati” tíchamkia.

<sup>5-6</sup>Antsu átumka tárume “Shuar ashí niiniu írunka nuna mash “Yúsnaiti” takui nuikia nujaj ni aparíncha nukuríncha yáinçhamniaiti, tárume. Nin yáintinian nakitiak ayatik “Ashí winia áiniana nu Yusna asantai yáinçhamniaitjame” títiniaiti” tárume. Núnisrum tákuram Yus akupkamu iniaisarum aya aents akupkamu umiirume, tímiayi. <sup>7</sup>Antra chichamtiniaitrum. Yúsnan etserin Isayas yaunchu nekas atumin áartampramiayi juna:

<sup>8</sup>“Ju aents ni wenejaj shiir awajtuiniawai, tura ni enentái jeachat pujuiniawai. <sup>9</sup>Tura tukeneasan shiir awajtuiniawai. Aentsu chichamen jintintiainiayat “Yusa chichamente” tuiniawai.” Tu áarmiayi” tímiayi Jesus.

<sup>10</sup>Tinia shuaran untuk tiarmiayi “Ju antukrum péñker nekaatarum. <sup>11</sup>Aents yúana nuka shuáran yajauch awajsashtatui. Antsu wenunmaya jiinia nuka shuáran yajauch awajeawai” tímiayi.

<sup>12</sup>Nuyá ni unuiniamuri Jesusan tariar “Maa, Paríséu ame chichammin antukar ti iturchat enentáimpraraí” tiarmiayi.

<sup>13-14</sup>Tuániakui Jesus tímiayi “Ikiuktiarum. Kusuru áintsan áiniawai. Tura kusuruncha jintintiainiawai. Mai kusuru ásar mai wáñnam akaiki iniaawartatui. Wats, ajanam nupá áintsan ainiawai. Tura ashí winia Apar nayaimpiniam pujana nu araachmaka takamtsuk uwé ajapamu átatui” tímiayi Jesus.

<sup>15</sup>Takui Pítiur Jesusan tímiayi “Nu métek-taku chicham paant awajsata.”

<sup>16</sup>Tutai Jesus tímiayi “¿Atumsha nekaachurmek.

<sup>17</sup>Enentáimprachurmek? Ashí wenunam wayaana nu wakenam wéatsuk. Tura nuyá iniankastiniaiti. <sup>18</sup>Antsu wenunmaya jiinia nu enentáinmaya jiiniu asa áentsun yajauch awajeawai. <sup>19</sup>Enentáinmaya ashí yajauch enentáimsatin jíiniainiawai. Mankartuatniusha, chikicha nuwé kasamkatniusha, tsanirnatniusha, kasamkatniusha, wáitruatniusha,

yajauch áujmatsatniusha <sup>20</sup>ashí nu áiniawai nekaska shuáran yajauch awajeana nu. Tura ikijmiatsuk yurumátniuka shuáran ni enentáin yajauch awajeatsui” tímiayi.

**Nuwá Israer-shuarcha Jesusan enentáimtusmiania nu**  
(*Mar. 7.24-30*)

<sup>21</sup>Jesus nuyá jiinki Tiru péprunmasha Sitiun péprunmasha wémiayi. <sup>22</sup>Tura nu nunkanmaya nuwá Jesusan tarí tímiayi “Uunta, uunt akupin Tawit ame weatrum asamtai winia waitnentrurta. Nawantur yajauch wakantruku asa ti wáitrutawai” tímiayi.

<sup>23</sup>Tura Jesus áikchamiayi. Tura ni unuiniamurí tariat “Awemata, tiarmiayi. Tuke untsunki apapétmaji” tiarmiayi.

<sup>24</sup>Nuyá Jesus tímiayi “Aya Israer-shuarnum menkakarú áinia nuna eaktinian Yus akuptukuiti.”

<sup>25</sup>Túrasha nuwá tikishmatar tímiayi “Uunta, waitnentrurta.”

<sup>26</sup>Tutai Jesus tímiayi “¿Uchí apatkurí jurukir yawá susamniakait?” tímiayi.

<sup>27</sup>Tutai nuwá tímiayi “Nekas, Uunta, tame. Tura yawasha ni aentsrú yurumainiakui nunká iniaarun yufniatsuk.”

<sup>28</sup>Takui Jesus tímiayi “Maku, nekas Winia enentáimtusaitme. Ame wakeram núnisan atí” tímiayi. Tura nu chichamaik ni nawantrí péñker ajasmiai.

**Jesus untsurí jáinian tsuararmiania nu**

<sup>29</sup>Jesus nuyá jiinki Kariréa antumianka káanmatkarin waketkimiayi. Tura naint waka nuí pujusmiayi. <sup>30</sup>Nuí untsurí aents Nin tariat shutuapnasha kusuruncha chichachuncha tsupirkamuncha chíkich jáiniancha itiararmiayi. Túrawar nawenam aeprusarmiayi. Túram tsuararmiayi. <sup>31</sup>Nuna íisar chichachusha chichainiakui, tsupirkamusha péñker ajainiakui, shutuapsha péñker wekainiakui, kusurusha wáinmainiakui, ti shiir enentáimprarmiayi. Yus ni áentsrin Israeran yáinmatai shiir yumiñsarmiayi.

**Jesus kuaru mir (4000) áishmankan ayuramiania nu**  
(*Mar. 8.1-10*)

<sup>32</sup>Nuyá Jesus ni unuiniamurin untsukar tiarmiayi “Ju aentsun waitnentainiajai. Warí, menaintiu tsawant Wijíai yurumsuk yujainiatsuk. Ayurtsuk ni jeen akupkachminiaitjai. Jintiá pimpiki wáitsartatui.”

<sup>33</sup>Ni unuiniamurí tiarmiayi “Túrasha, Uunta, ¿shuar atsaasha tuyan yurumak imiá sumaktají ju aents ayurawartincha?”

<sup>34</sup>Jesus aniasarmiayi “¿Urutma tanta takakrum?”

Tutai niisha “Siatí (7) tanta nuyá ishichik namak takakji” tiarmiayi.

<sup>35</sup>Nuyá aents nunká pujusarti tusa akupkamiayi. <sup>36</sup>Tura siati tantan achik namaknasha achik nuyá Yúsán yumıñsamiayi. Tura puur aents ayuratarum tusa ni unuiniamurın susamiayi. <sup>37</sup>Ashí yurumáwar jémararmiayi. Tura puunaru siati chankın tiármiai. <sup>38</sup>Tura nuı yurumáwaruka nuwasha uchisha nekapsatsuk aya áishmanċak kuaru mir (4000) ármiayi. <sup>39</sup>Nuyá Jesus áentsun akupak kanunam enċemar Maktara nunċanam wémiayi.

**Pariséusha Satuséusha iniakmamurın**  
**Jesusan seawarmiania nu**  
*(Mar. 8.11-13; Ruk. 12.54-56)*

**16** <sup>1</sup>Pariséusha tura Satuséusha Jesusan nekapsatai tusar tariarmiayi. Túrawar “Ame Yúsaiyaitkiumka kakarmarmijjai nayaimpinnmayá iniakmasta, iisha wáinkiatái,” tiarmiayi.

<sup>2</sup>Tutai Jesus tímiayi “Átumka “Kapaċaku péetar kıntiamkui kashin esatrurtatui” tíniuitrume. <sup>3</sup>Túrasha “Te ajas kapaċaku péetar tsawaakui yumi yajauch átatui” tíniuitrume. Tura nekasaiti. Maa, átumka nayaim íisrum ju nunċanam túrunattana nu nékarme. Antsu Yus yamáı ju nunċanam tura nuka nékatsrume. Ántraitrume. <sup>4</sup>Aents yajauch ásar tura Yusan enentáimtachu ásar kakarmajai iniakmamun wakeruiniawai. Túrasha áyatik Junas túrunamia nuke iniakmastiniaiti” tímiayi. Tinia ikiuak wémiayi.

**Pariséusha Satuséusha jintintiainia nu aneartiniaiti**  
*(Mar. 8.14-21)*

<sup>5</sup>Tura entsá amaini katınċiar ni unuiniamurı tantan júkitniun kajinmatkiarmiayi. <sup>6</sup>Nuyá Jesus tímiayi “Wáinkiatarum, Pariséusha Satuséusha wakaprutai takakainia nújajisha aneartarum.”

<sup>7</sup>Tutai ni unuiniamurı tiarmiayi “Ii tanta itiachakrin tátsuk.”

<sup>8</sup>Jesus nuna antuk tímiayi “ĶUrukamtai tanta itiachji tunaiyarum. Yusa kakarmari kajinmatkintrumek. <sup>9</sup>Senku tantajai túramiaj nu kajinmatkintrumek. Senku mir (5000) áishmanċan ayuramtai untsurı chanċin tiármia nu enentáimtsurmek. <sup>10</sup>Tura siati tantajai kuaru mir (4000) áishmanċan ayuramtai nuna ishichik chanċin tiármia nu kajinmatkintrumek. <sup>11</sup>Itiurak imiá nékatsrum? Wi Pariséu wakaprutairisha Satuséu wakaprutairisha aneartarum tákun penċé tantan tátsujai” tímiayi. <sup>12</sup>Nuna Jesus takui ni unuiniamurısha nekaawarmiayi. Penċé tantaa wakaprutairın tíchamiayi antsu Pariséusha Satuséusha unuiniatairın tímiayi.

**Pítiur Jesusan Yus anaikiamun paant ujakmiania nu**  
*(Mar. 8.27-30; Ruk. 9.18-21)*

<sup>13</sup>Tura Sesaria-jiripiunam jeawar Jesus ni unuiniamurın aniasarmiayi “Aents Ajasuitjiana juna Ķyaiti turutainiawa Winia?”

<sup>14</sup>Niisha ayak tiarmiayi “Chíkich, imiakratin Juánkaiti turamainiawai. Chíkichka, Eríasaiti turamainiawai. Chikichcha Jeremíasaiti, chikichcha chíkich aents Yúsnan etserniuiti turamainiawai” tiarmiayi.

<sup>15</sup>Tutai nincha aniiniak “¿Atumsha yaiti túrutrum?” tímiayi.

<sup>16</sup>Semuñ Pítrusha “Ámetme Kristu, Yus Anaikiamu. Nekas iwiaaku Yusa Uchirínme” tímiayi.

<sup>17</sup>Tutai Jesus tímiayi “Shiiraitme Junasa uchirí Semunka. Núnaka aents ujatmakchaiti antsu winia Apar nayaimpiniam pujana nu ujatmakmatai nekaam tame. <sup>18</sup>Tura Wisha tájame, ame Pítruitme, kayach tútaim. Nu kayanam jea jeamtinia áintsan Yus-shuaran ekenin tsakatmartatjai. Túramtai jákatniusha tura Yusa nemasrisha nu jeamman pukukchattawai. <sup>19</sup>Yus akupeamu yawincha amastatjai. Ju nunkanam jinkiatniusha atátniusha amasmaiti. Tuma asamtai ame ju nunkanam suritiam nu nayaimpinmasha suritniaktatui. Tura ju nunkanam tsankateam nu nayaimpinmasha tsankatnaktatui” tímiayi. <sup>20</sup>Nuna tinia Jesus ni unuiniamurín Krístuítaij nu etserkairap tinia akupkarmiayi.

### Jesus Nin máatniun etsertumakmiania nu

(Mar. 8.37--9.1; Ruk. 9.22-27)

<sup>21</sup>Nuyá Jesus juna unuiniatan nankammiayi. “Wi Jerusarénum wétiniatjai. Nuí Israer-shuara úuntrisha, Israer-patri úuntrisha, Israer-shuara jintinniurisha ti wáitkiarsartatui. Nuyá mantuawartatui túrasha menaintiú tsawantai nantaktiatjai.”

<sup>22</sup>Takui Pítiur arantach jukí chicharuk tímiayi “Uunta, nuka penké áchatniuiti. Áminkia túrutmacharminiaiti.”

<sup>23</sup>Jesus ayanmatar Pítrun tímiayi “Werumta, Satanása. Yajauch awajtame. Ámeke Yus wakeramu enentáimtsume. Antsu jú nunkanam enentáimainia áinis enentáimme.”

<sup>24</sup>Nuyá Jesus ashí ni unuiniamurín tímiayi “Shuar Winia nemartustaj tusa wakerakka ni wakeramurín iniais ni krusí yanaki Winia nemartusti. <sup>25</sup>Shuar áyatik péñker pujustaj tákuñka nu shuar uwemtsuk jakattawai. Antsu jákatniuitkuisha péñker pujustinian enentáimtsuna nú shuar nekas iwiaakman wainkiattawai. <sup>26</sup>Wats, shuar ashí jú nunkanam írunka nuna sumakka tura nujai ni wakaní emeseak ¿itiurak péñker pujustin? Shuara wakaní emesramu ¿ashí jú nunkanam írunka nujai iwiamniakait? <sup>27</sup>Wi Aents Ajasu asan, winia Aparu kakarmaríjjai tura ni suntaríjjai tana ashí shuáran ni takasmajai métek akiktatjai. <sup>28</sup>Paant tájarme, shuar juí wajainia ju játsuk Wi akupin ajasmatai wáitkiartatui” tímiayi.

### Jesus nushá iira ajasmiania nu

(Mar. 9.2-13; Ruk. 9.28-36)

**17** <sup>1</sup>Nuyá sais (6) tsawant nankaamasar Pítruncha, Jakupuncha, tura ni yachi Juanasha níniak júkiar Jesus náinnium yakí wakamiayi.

2Nuj Jesus nusháa iira ajattsarmiayi. Ni yapisha etsaya áinis wincha ajasmiai. Ni pushirísha ti puju jítsumir ajasmiai. 3Nujsha Muisaisnasha Eríasnasha Jesusjaj chichainian wáinkiarmai. 4Nuyá Pítur Jesusan tímiayi “Uunta, ti shiir pujaji juí. Wakerakminkia menaint áakmaktai, Áminiu chikichik tura chíkich Muisaisnasha, tura chikichcha Eríasna.” 5Tura Pítur tu auju wajái yuraním ti puju amuamiayi. Tura nu yuranminmaya chichaman antukarmiayi. “Juka winia aneamu Uchiruiti, tímiayi. Nin ti shiir enentáimtajai. Nii péñker anturkatarum” tímiayi. Tu chichasmiai Yus. 6Nuna ni unuiniamurí antukar ti ashamkar pákea ajakiarmiayi. 7Túrunawarmatai Jesus táriar antin “Ashamkairap, nantaktiarum” tiarmiayi. 8Tura pan kainiar íimij tukamá aya Jesusan wáinkiarmai.

9Nuyá náinniumiá akainiak Jesus tiarmiayi “Átum ísurmena nu penké etserkairap. Wi Aents Ajasu asan jakamunmaya nantaatsain etserkairap’ tímiayi.

10Nuyá ni unuiniamurí Jesusan aniiniak “¿Urukamtaí in jintintramin “Kristu táatsain Erías emka tátiniaiti” tuinia?” tiarmiayi.

11Tuíniakui Jesus áikmiayi “Nekas Erías tátiniaiti. Tura nii mash iwiarattawai. 12Kame nekas Erías táwiti tura nin nekaacharmai. Antsu aents wakeriarmia nuna túrawar yajauch awajsarmiayi. Núnisan Winiasha, Aents Ajasu ain, wáitkiarsartatui.” 13Nuna takui ni unuiniamurí imiakratin Juánkan áujmatui, tu enentáimprarmiayi.

### Jesus iwianchin jiki akupkamiania nu

(Mar. 9.14-29; Ruk. 9.37-43)

14Ataksha aents matsatmanum jeawarmatai shuar Jesusan tarí tikishmatramiai. 15Tura tímiayi “Uuntá, winia uchir waitnentrutata. Wainchi tukum ti wáitniuiti. Jiniumsha patamniuiti. Entsasha iniainaiti. 16Ame unuiniamurmíncha itiarjai túrasha tujinkiarai.”

17Takui Jesus ashí tímiayi “Maa, Yus penké enentáimtichuitrume. Imiá úmichuitrume. ¿Wi atumin katsuntu ajatniukaitjarum? Wats, uchi itiaritjarum’ tímiayi. 18Itiarim Jesus yajauch wakanin jiki akupkamiayi uchí ayashíniá. Túramtai nu chichamaik péñker ajasmiai.

19Nuyá urum ni unuiniamurí Jesusjaj níñki pujusar áujmatainiak “¿Urukamtaí yajauch wakan jíktin iikia tujinkiamaj?” tiarmiayi.

20Tuíniakui Jesus tiarmiayi “Yus nekas enentáimtachu asarum tujinkiarume. Túmaitiat nekasaiti mustasa jiníkiá timiá uchichitiat ti uunt tsakaatsuk. Núnisan Yus ishichkisha enentáimtakrumka nu naint ékemkata tutai nu naint túrunattawai. Penké tujinkiashtatrume Yus nekas enentáimtakrumka. 21Kame nu yajauch wakan jiki akupkatniuka ijarmam Yus áujsatniuiti.”

### Ataksha Jesus ni játniun ujakmiania nu

(Mar. 9.30-32; Ruk. 9.43-45)

22Jesus ni unuiniamuríjjaj Kariréa nunkanam wekas juna ujakarmiayi. “Wi Aents Ajasu asan, aentsnum surunkattajai tura mantamnattajai.

23 Túrutawarmatai menaintiú tsawantai nantaktiatjai.” Tura ni unuiniamurí nuna antukar ti kúntuts enentáimprarmiyai.

**Jesus ankantaitiat akiktinia nuna akikmakmiania nu**

24 Jesus ni unuiniamuríjiai Kapernáum péprunam jeawarmiyai. Tura kuítian achin Pítrun tariar aniasarmiyai “¿Atumi uuntrí Israer-patrin akiktinia nuna akínkaiat?”

25 Tutai Pítiur “Ee” tímiyai.

Tura Pítiur jeá wayá chichaatsain Jesus emka tímiyai “Chíkich nunkanmaya akupin ¿yana kuítríjiaín takainia. Ni shuáriniunkek atantainia. Antsu yajaya shuárnan atantainiatsuk. Nekaschak, Semunká?”

26 Tutai Pítiur “Nekas yajaya shuárnan atantainiawai” tímiyai.

Jesus tímiyai “Nuikia ni shuarí ankant ániawai. Iisha núnisrik nu akiktin ankantaitji. 27 Túrasha itiurchat enentáimpraraín tusar akiktai. Ame tsau jukim entsá wetá. Túram emka namak japikim iwiankam nuí kuit wáinkiattame. Nu jukim Wíniasha áminiusha akikmakta.”

**“¿Ya imiá nankaamantuit?” tunaiyarmiania nu**

*(Mar. 9.33-37; Ruk. 9.46-48)*

**18** 1 Nu tsawantai ni unuiniamurí tariar Jesusan aniasarmiyai “Yus akupeemunam pachiniia nu ¿ya imiá nankaamantu áminiait?”

2 Nuna tuániakui Jesus uchin untsuk ajapen awajtusar 3 tímiyai “Tí nekasan tájarme, atumí enentáimtairí yapajiarum uchia áinis ajachkurmeka Yus akupeemunam pachinkichminiaitruma. 4 Nu asamtai ju uchia áinis péejchach enentáimtumana nuka Yus akupeana nuí nekas nankaamantu ajasminiaiti. 5 Nú arantcha Winia anentuk uchin itiaana nú shuar Winiasha itiaareawai’ tímiyai.

**Tsumainti yajauch túrumtikiatin**

*(Mar. 9.42-48; Ruk. 17.1-2)*

6 ‘Shuar ju uchin Winia umirtana nuna tunaanum ajuarmatainkia nuna túratsain niisha kuntujén kayajai jinkiar nayaantsanam ajapen kunanam ajunmaitkiunka maak ainti, tímiyai. 7 Ju nunkanam tunáa iniaatai írunuk tuke itiurchataiti. Antsu shuar chikichan tunaanum ajuarka ti itiurchatan inkuntatui’ tímiyai.

8 ‘Nu asamtai ame uwejem tura nawem tunaanum ajunmatniuitkiunkia tsupikiam ajapata. Kame muntuch pujustin tura ukunam nayaimpiniam wétin péñkeraiti. Antsu kajinkiashtin jinium takamtsuk jeatniuka imiá yajauchiiti. 9 Núnisan ame jiiimi tunaanum ajunmatniuitkiunkia ukuinkiam ajapata. Kame chikichik jiiijai pujusam nayaimpiniam wétin péñkeraiti. Antsu jinium mai jíintiuk wétin imiá yajauchiiti’ tímiyai.



### Murik menkaaka áujmatsamu

(Ruk. 15.3-7)

<sup>10</sup>‘Uchi ainia nu nakitrairap. Yusa suntari nin wáinkiatniua nu winia Aparuj tjjuch pujuniawai. <sup>11</sup>Kame wi Aents Ajasu asan, menkaakarun eaktajtsan táwitjai.’

<sup>12</sup>‘Enentáimpratarum. Shuar sian (100) murikiun takakuiat chikichik menkakamtai untsurí menkakacharun náinnium matsaak<sup>u</sup> menkakan eaushtatuak. <sup>13</sup>Wáinkiasa untsurí menkakacharua nujai nankaamas waraschattawak. <sup>14</sup>Núnisan atumi Aparí nayaimpiniam pujana nu, nu uchi chikichiksha menkakacharti tawai’ tímiayi.

### Yus-shuarti tsankurnairatin

(Ruk. 17.3)

<sup>15</sup>‘Chikich Yus-shuar ámin yajauch túrutmakuin<sup>ñ</sup>kia nii werim áujсата. Tura ámechik werim ame yatsumjai chichasta. Anturtamkuin<sup>ñ</sup>kia ame yátsum yáin<sup>ñ</sup>kiume. <sup>16</sup>Tura anturtamchakuin<sup>ñ</sup>kia nuyá chikichik shuar jimiara shuarsha yukim ataksha weritia. Túram ataksha áujnaisatarum, niisha paant nekaawarat tusam. <sup>17</sup>Túrasha yatsum tuke ántachkuin<sup>ñ</sup>kia Yus-shuar iruntainiam iwiainiakta. Túrasha yatsum tuke ántachkuin<sup>ñ</sup>kia Yus-shuarcha núnisan enentáimtusta nu shuar.’

<sup>18</sup>‘Nekasan tájarme, ju nunkanam suritiam nu nayaimpinmasha suritniaktatui. Tura ju nunkanam tsankateam nu nayaimpinmasha tsankatnaktatui.’

<sup>19</sup>‘Núnisnak tájarme, ju nunkanam pujusrum jimiara Yus-shuairam métek enentáimprarum winia Apar nayaimpiniam pujana nu seakrumn<sup>ñ</sup>kia wakerarmena nuna suramsattarme. <sup>20</sup>Jímiar menaintiusha Yus-shuar Winia enentáimturuk iruntrarmatai Wisha nuí niijiai pujajai” tímiayi Jesus.

<sup>21</sup>Takui Pítiur werí Jesusan aniasmiayi “Uuntá, winia yatsur yajauch awajtakui ¿urutma tsankuratniuitiaj. Siátikik tsankuratniuitiaj?”

<sup>22</sup>Jesus aiyak “Siátik tátsujme, antsu iniannatsuk tsankuratniuitme” tímiayi.

### Takakmau tsankurachun pachis áujmatsamiania nu

<sup>23</sup>Tuma asa Jesus Yus akupeamunam pachiinkiaru tsankurnairartiniaiti tusa ju métek-taku chichaman áujmatuk tímiayi, “Uunt akupin takarin tumashin akirkarat tusa untsukarmai. <sup>24</sup>Yama nan<sup>ñ</sup>kamuk tí nukap tumashmakua nuna untsukmai. Akikmakchamnia ti tumashmakuyi. <sup>25</sup>Tura nu takakmau kuitri atsakui uunt akupin “Yajasma áitkiasrum nuartiuk uchirtiuk ashí waririntiuk surukturum, timiai. Nu kuitjai akirkati” timiai.

<sup>26</sup>Tutai nu takakmau uunt akupniun tikishmatar seak timiai “Uunta, waitneasam nákarsatá. Auka, mash akiktatjame.” <sup>27</sup>Uunt akupin waitnentar mash tsan̄kur an̄kant akupkamai. <sup>28</sup>Tura nú chichamaik nú takakmau jiinki ni āin in̄kiun̄mai. Nú āisha nin ishichik tumashiiyi. Tura tséken̄ki suwen̄am achik chicharuk timiai “Wari akirkata tumashitmena nu.”

<sup>29</sup>Tura ni āi nin tikishmatar timiai “Waitneasam nákarsatá. Auka, mash akiktatjame” timiai. <sup>30</sup>Túrasha nakitramai. Antsu tsan̄kurtsuk sepunam en̄keamai ashí akírkatí tusa. <sup>31</sup>Chíkich takakmau nuna wáinkiar ti kúntuts enentáimtuiniak uunt akupniun ashí etsertukarmai. <sup>32</sup>Nuna antuk uunt akupin untsuk itia timiai “Yajauchiitme. ¿Winia “waitnentrurta” túrutkumin tsan̄kurachmakjam? <sup>33</sup>Amesha núnismek ame āim tsan̄kuratniuitme” timiai. <sup>34</sup>Tinia uunt akupin kajekmai. Tura ashí tumashin akikmatsuk asutniati tusa suntarnum surukmai.” <sup>35</sup>Jesus nuna áujmatas amúak tímiayi “Núnisan̄ winia Apar nayaimpiniam pujana nu atumin túrutmattarme atumi yachí nekas enentáijiāi tsan̄kureachkur minkia.”

**Jesus nuwá ajapatniun áujmatsamiania nu**  
(*Mar. 10.1-12; Ruk. 16.18*)

**19** <sup>1</sup>Jesus nuna tinia ikiuak Kariréa nun̄kanmayá wémiayi. Tura Jurtan̄ entsa amain Jutfa nun̄kanam jeamiayi. <sup>2</sup>Untsurí aents nemariarmiayi tura jáiniancha pēnker awajsamiayi.

<sup>3</sup>Nūi Pariséu Jesusan nekapsataj tusar aniasarmiayi “¿Shuar ni nuwen itiurchat akui ajapamniakait?”

<sup>4</sup>Tutai Jesus tímiayi “¿Átumka Yus-Papí áujtsachukaitrum? Yámankamtaik Yuska shuáran áishman̄kan nuwancha najanamiamiyi tawai. <sup>5</sup>Tuma asamtai áishman̄ ni aparín ni nukurín ikiuki ni nuwejāi tsaniñ chikichik ayashtinia áinis ajasartatui, tu áarmaiti, tímiayi. <sup>6</sup>Tuma asa jímiarcha antsu chikichik ayash áiniawai. Tuma asamtai shuar Yus apatkamia nuna, aents akankashtiniaiti’ tímiayi.

<sup>7</sup>Takui tiarmiayi “Nuikia ¿urukamtai papí áarar nuwá ajapatniun Muisais tsan̄katkamia?”

<sup>8</sup>Tutai Jesus tiarmiayi “Timiá ántichu asakrumin nuwá ajapatniun tsan̄katkamiayi. Túrasha émkaka núnischauyayi. <sup>9</sup>Wi tájarme, shuar ni nuwen chíkichjāi pujuschan ajapeakka tura chikichan nuatkun̄ka tsanirmayi. Chíkich áishman̄sha nuwá ajapamun nuátkan̄ka nusha tsanirmayi” tímiayi.

<sup>10</sup>Takui ni unuiniamurí tiarmiayi “Nuikia áishman̄ ni nuwé penké ikiukchamniaitkiuñkia nuátkachminiaiti.”

<sup>11</sup>Jesus tiarmiayi “Nu chichamnaka mash antukchamin áiniawai. Antsu Yus nuna umiktin susamua nuke antukmin áiniawai. <sup>12</sup>Chíkich

chíkich nuatkachmin áiniawai. Chíkich nuátkachmin akiiniawaru áiniawai. Chikichcha aentsjaj̄ nuátkachmin najanaru áiniawai. Chikichcha nuátainiatsui Yus akupeamu takatan takastinian. Juna antuktinian jeáka antukti.”

**Jesus uchin shiir awajsamiania nu**  
(*Mar. 10.13-16; Ruk. 18.15-17*)

<sup>13</sup>Nuyá Jesusan uchin itiararmiayi. Nin antin̄ Yúsán áujtusarat tusar wakeriarmiayi. Túruiniakui ni unuiniamur̄i chicharkarmiayi. <sup>14</sup>Túruiniakui Jesus tímiayi “Uchi Winí winitin tsan̄katkatarum. Suritkiairap. Kame jū uchía áintsan̄ péejchach ánian nunak Yus akupkamniati.” <sup>15</sup>Tinia uchin miniakas nuyá wémiayi.

**Kuítrintin Jesusjaj̄ chichasmiania nu**  
(*Mar. 10.17-31; Ruk. 18.18-30*)

<sup>16</sup>Shuar natsa Jesusan tarin aniasmiayi “Uuntá, péñkeraitme. Tuma asam turuttia ¿warinia túrakna tuke iwiaaku átataj?” tímiayi.

<sup>17</sup>Tutai Jesus nin enentáimtikrataj tusa tímiayi “¿Urukamtai péñkeraitme túrutam. Shuar péñkerka atsatsuk. Aya Yúskechukait? Wats, tuke iwiaaku pujustaj tákumka akupkamu umírkartá.”

<sup>18</sup>Tutai shuar “¿Tuna nekas umirkatniuitiaj?” tímiayi.

Takui Jesus tímiayi “Mañkartuawaip, tsanirmawaip, kasámkáip, chíkich shuar tsanumpruraip, <sup>19</sup>ame apa nukusha umírkartá, ame shuárum ame ayashim aneamna nútiksamek aneeta.”

<sup>20</sup>Tutai natsa tímiayi “Núnaka úchichik mash umiki tsakaruitjai. Nuyasha ¿warí táatrusa?” tímiayi.

<sup>21</sup>Takui Jesus tímiayi “Nekas péñker átaj tákumka, weme ame kuítrum kuítrincha ainia nu sústartá. Tura nayaimpiniam kuítrintin ajastatme. Nuyá Winia nemártústá” tímiayi Jesus. <sup>22</sup>Tura natsa nuna antuk kúntuts wémiayi ti kuítrintin asa.

<sup>23</sup>Nuyá Jesus ni unuiniamur̄in tiarmiayi “Nekasan tájarme, kuítrintin Yus akupeamunam pachiinkiatin ti itiuurchataiti. <sup>24</sup>Ataksha tájarme, kamiriuka kawái nan̄kaamas uunt asa auja jin̄ wayachminiaiti. Núnisan̄ kuítrintin Yus akupeamunam pachiinkiatin ti itiuurchataiti.”

<sup>25</sup>Ni unuiniamur̄i nuna antukar antúu ajarimiayi. Túrawar aniniainiarmiayi “¿Nuikia yaki uwempramniait?”

<sup>26</sup>Tuíniaakui Jesus ashí íisar tímiayi “Aents uwempratniun nekas tujintiainiawai antsu Yuska ashí tujintiatsui.”

<sup>27</sup>Nuyá Pítiur tímiayi “Uuntá, iikia ashí ikiukchajik Ámin nemarsatai tusar. ¿Wariñ wáinkiatat̄j̄ iisha?”

<sup>28</sup>Jesus tímiayi “Nekasan tájame, ukunmañka jū nun̄ka yamaram ajastatui. Aents Ajasu asan, Wisha nui, uunt akupin ajastatjai tura atumsha

winia nemartusutirmeka Wijiaí métek akupin ajastatrume ashí Israer-shuar akupkatin. <sup>29</sup>Tura shuar ni jeencha, yachincha, umaincha, aparincha, nukurincha, nuarincha, uchirincha, tura nunkencha Winia anentu asa ikiukin wekaakka, nu shuar nii ikiukmia núnisan yamaisha ti untsurí wáinkiatwai tura ukunmasha tuke shiir pujustatui Yusjai. <sup>30</sup>Untsurí yamáí penkerí áiniana nu ukunam ukunmaani pujusartatui, tura yapajíáwar yamáí ukunmaya áiniana nu ukunam emka pujusartatui' tímiayi Jesus.

### Jesus takarniun pachis áujmatsamiania nu

**20** <sup>1</sup>Yus akupeemunam pachiinkiatin júnisaiti. Nunka nérentin ni aramurin júuktaj tusa káshik iniartaj tusa jíinkimiayi. <sup>2</sup>Chikichík tenariu kuit jean tsawant takamtsuk akiktajrume tusa chichas ni aramun júuktinian akupkarmiayi. <sup>3</sup>Nantu takuntaisha ataksha jiinki shuar yujan wáiniak <sup>4</sup>timiai “Atumsha winia arakur júuktin yáintkiatarum. Shiir akiktajrume.” Tutai wearmai. <sup>5</sup>Ataksha tutupin ai nuyá áanókúsha jiinki, núnisan tinia akupkarmái. <sup>6</sup>Ataksha nantu patamsai jíinkimiai. Tura shuaran yujan wáiniak “¿Urukamtai takamtsakesha áani pujarum?” timiai.’

<sup>7</sup>“Warí, iincha iniatmainiatsji” tiarmái.

“Tuíniakui timiai “Atumsha winia nunkarui takautarum. Péñker akiktajrume.”

<sup>8</sup>Kirit ajátekiái takatrin wáinniun timiai “Takatan takasaru untsukam akikiarta. Kíarai nankamawaru emka akikiarta. Túram káshik nankamawarujai amuktá” timiai. <sup>9</sup>Takui nantu patamsa ai nankamawaru wayawarmatai chikichík tenariu kuit jean ashí akikiarmái. <sup>10</sup>Mash umintramtai nuyá emka nankamawaru wayawar “nuna nankaamas achikchatjash” tu enentáimsarmái. Tura chikichík tenariu kuit jean achikiarmái. <sup>11</sup>Achikiar nérenniun itiurchat enentáimturarmái. <sup>12</sup>Tura tiarmái “Tikia ashí tsawant nantujai wáitsachjik. Ju shuarsha nantu patamsa ai nankamawaruka penké ishichik takasaraí. Túrashá iijiai métek akikiarume” tiarmái.

<sup>13</sup>Tutai nérentin chikichkiniak iniakmas timiai “Umpá, penké kasartsujme. Káshik chikichík tenariu kuit jeá chichasar iijiai iwiarachjik, timiai. <sup>14</sup>Pai, ame kuítrum achikume. Nantu patamsai takasuncha amijiai métek akiktinian wakerajai. <sup>15</sup>Warí, winia kuítrujai wi wakeramun túrachminkaitiaj. Antsu wi tsanka asamtai ¿yajauch enentáimturmek?” timiai.’

<sup>16</sup>Núnisaiti Yus-shuarum. Émkaru áinia nu uku ártatui. Tura ukuya áiniana nu, emka ártatui. Untsurí ipiaamu áiniawai tura ishichik achikma áiniawai.” Tu áujmatsamiayi Jesus.

### Jesus ataksha ni jákatniurin etserkamiania nu

(Mar. 10.32-34; Ruk. 18.31-34)

<sup>17</sup>Jesus Jerusarénum jintiá wesa ni unuiniamurin akankin tiarmiayi  
<sup>18</sup>“Iistarum, Jerusarénum wéaji. Nuisha Israer-patri úuntrin tura

ni jintinniurincha Winia surutkartatui. Nuisha, wi Aents Ajasu ain, “mantamnati” túrutuartatui. <sup>19</sup>Tura apachnium surutkartatui. Nui katsekrukar, awattiar krúsnum máawarti tusar túrutawartatui. Túrashajakayatan menaintiú tsawantaj nantaktiatjai” tímiayi.

**Jakupu tura Juanka nukuri Jesusan seamiayi**  
(*Mar. 10.35-45*)

<sup>20</sup>Nuyá Jakupusha Juansha, mai Sepetéu uchiri, nukurijiaj tariat Jesusan tikishmatrarmiayi. Tura nukuri Jesusan waitnentrurat tusa seamiayi. <sup>21</sup>“¿Wari wakeram?” tímiayi Jesus.

Tutai nuwá tímiayi “Ame uunt akupin ajastatmena nui winia uchir chikichik untsuurnumaani chikichcha menaanmaani akupkarti tusam apujserta.”

<sup>22</sup>Takui Jesus tiarmiayi “Atum seatrumna nu nékatsrume. ¿Wi wáitsattajna nujai métek túramniakaitrum? Wi wáitsatniun yapá umartinia áinis umartiniaitjai. Núnisan wáitsatniujaj imiaitniua áintsan imiantiniaitjai. ¿Nú pininnumiá umarminkiaitrum. Núnisan imianminkiaitrum?”

Tutai “Páchitskea” tiarmiayi.

<sup>23</sup>Tuniakui Jesus tímiayi “Ayu. Winia pininkruiya umartatrume. Wi imiantiatjana nujai imiantiatrume. Antsu Wijiaj tsaninka pujustinniaka Wikia íschatniuitjai, antsu winia Apar iwiarturu áinia nuna nui apujsertawai” tímiayi.

<sup>24</sup>Chíkich tias (10) unuiniamuri nuna antukar nu jímiaran kakerkarmiayi. <sup>25</sup>Túmainiakui Jesus untsukar tiarmiayi “Ju nékarme, apachniumka kapitán ajasar ni shuarin nérenniua áinis ti akupenawai. Ni úunrisha waantu enentáimsar “wítjai akupniun” tu enentáimtikiainiawai. <sup>26</sup>Antsu atumjainka núnis áchatniuiti. Nankaamaku ajastaj tákuka chikicha yainri átiniaiti. <sup>27</sup>Ame kapitántrum ajastaj tákuka ashí shuara yainri ajástí. <sup>28</sup>Wisha Aents Ajasuítatan, Winia yáintkiarat tusan táchaitjai antsu shuáran yáintaj tusan táwitjai. Untsuri shuaran tunáa tumashrin akikmatkataj tusan jákatniuitjai. Nuna tarimjai” tímiayi Jesus.

**Jímiar ji kusurun Jesus tsuármiania nu**  
(*Mar. 10.46-52; Ruk. 18.35-43*)

<sup>29</sup>Jirikiú péprunmaya wénakui untsuri aents Nin nemariarmiayi. <sup>30</sup>Nui jintiá yantam jímiar ji kusuru pujuarmiayi. Jesus wéawai taman antukar kakantar untsukarmiayi. “Uuntá, uunt akupin Tawitia Uchirinchukaitiam. Waitnentrurta” tiarmiayi.

<sup>31</sup>Tuniakui “Takamatsatarum” tiarmiayi.

Tútaisha nú nankaamas untsukarmiayi. “Uuntá, Tawitia Uchiriá, waitnentrurta” tiarmiayi.

<sup>32</sup>Tuínia<sup>ku</sup>i Jesus wajas jii kusurun untsukar aniasarmiayi “¿Wari itiu<sup>rt</sup>ukat tusarum wakerutarum?”

<sup>33</sup>“Uuntá, iimtia<sup>i</sup> tusar wakeraji” tiarmiayi. <sup>34</sup>Tuínia<sup>ku</sup>i Jesus nin waitnentrar ni jiin anti<sup>n</sup>kiarmiayi. Nu chichamaik íimiar niisha Jesusan nemariarmiayi.

**Jesus Jerusaré<sup>n</sup>num wayamiania nu**

(*Mar. 11.1-11; Ruk. 19.28-40; Juan 12.12-19*)

**21** <sup>1</sup>Jerusaré<sup>n</sup>num nuntumsar Petpajái péprunam jeawarmiayi. Nusha Uriwiu náinnium ayamchiiyayi. Nu<sup>i</sup> jeawar Jesus ni unuiniamur<sup>i</sup>n jímiar<sup>an</sup> akupeak tímiayi <sup>2</sup>“Tíjjuch péprunam wérum umpuuru umpuuruchijjái jinkiamu wáinkiatarme. Nu atiarum itartitiarum. <sup>3</sup>Tura aents “Urukamtaí áitkiarum” túramkurminkia “Uunt wakerawai, tura wárik awai<sup>n</sup>kittiwai” titiarum” tímiayi.

<sup>4</sup>Tura nusha yaunchu Yúsnan etserin aarmia nu umínkiatí tusa tímiayi. Júnis áarmiayi:

<sup>5</sup>“Ashí Israer-shuarnum ju etserkatarum:

“Tistarum, atumi Akupniur<sup>i</sup>, péejchach ajas umpuuruchiniam ekeemak winitramprume. Péejchach asa káarak áintstai umpuuru uchir<sup>i</sup>n ekeemak winitrámtatrome,” titiarum.” Tu áarmaiti.

<sup>6</sup>Tutai nu jímiar unuiniamur<sup>i</sup> wear Jesus timia núnisan<sup>u</sup> túrawarmiayi. <sup>7</sup>Umpuuruchin nukurtiuk itiar<sup>i</sup>ayi. Tura ni pushir<sup>i</sup>n áitkiaram Jesus entsamkamiayi. <sup>8</sup>Shuar untsur<sup>i</sup> ásar ni wéamunam pushir<sup>i</sup>n áitkiarmiayi. Chikichcha nuká jurukar ni wéamunam áeprurarmiayi. <sup>9</sup>Shuar untsur<sup>i</sup> eem wear<sup>ia</sup> nusha tura uku winiarmia nusha kakantar untsumiarmiayi. “Juna we<sup>at</sup>ri uunt akupin Tawit asamtaí nan<sup>ka</sup>amakuiti. Yusa náari<sup>i</sup>n winiana ju ii Uuntrinti. Shiir atí. Nayaimpinmasha Yus shiir awajsatai.” Tu untsumiarmiayi.

<sup>10</sup>Jesus Jerusaré<sup>n</sup>num wayam<sup>ta</sup>i ashí shuar ti enentáimainiak “¿Jusha yait?” tiarmiayi. <sup>11</sup>Chikichcha “Yúsnan etserin Jesusaiti, tiarmiayi. Nasarét pepru Kariréa nun<sup>kan</sup>mayaiti” tiarmiayi.

**Yusa Uunt Je<sup>e</sup>n suruktinian Jesus surimkiamiania nu**

(*Mar. 11.15-19; Ruk. 19.45-48; Juan 2.13-22*)

<sup>12</sup>Nuyá Jesus Yusa Uunt Je<sup>e</sup>n wayá kuítian súruiniak tura súmainiak pujan akúprámiayi. Kuítian yapajinia misar<sup>i</sup>ncha ayanturmiayi tura yampitsa súruinia kutan<sup>kr</sup>ncha núnisan<sup>u</sup> ayanturmiayi. <sup>13</sup>Nuyá tímiayi “Yus-Papinium áarchamukait,

“Yusa Je<sup>e</sup>nka Yus aujtaí jeaiti.” Antsu átumka kasa matsam<sup>ta</sup>iya nútikiarme” tímiayi.

<sup>14</sup>Nu<sup>i</sup> Yusa Je<sup>e</sup>n jii kusurarusha shutuapsha Jesusan tariarmiayi. Túram<sup>ta</sup>i tsuáarmiayi. <sup>15</sup>Tura Israer-shuar pátrisha tura Israer-shuara

jintinniurisha aents tujintiamun Jesus túrakui ísar kajerkar<sup>u</sup>miayi. Nu arantcha uchi Yusa Jeen “Juna weatri uunt akupin Tawit asamtai nan<sup>u</sup>kaamakuiti” unsumainiakui Jesusan ti kajerkar<sup>u</sup>miayi. 16 Tura tiarmiayi “¿Ju uchi tuinia nu ántamek?”

Tutai Jesus “Ee, ántajai, tímiayi. Átumka Yus-Papí juna tana juka áujsachukaitrum. Júnis tawai,

“Uchisha kuírchisha Yusa náarin imiá shiir awajtusarat tusa Yus tsan<sup>u</sup>katkaiti.” Tu áarmaiti.

17 Nuna tinia ikiuiniak Jerusaré<sup>n</sup>numia jiinki Petania péprunam we nuí kanarmiayi.

### Jesus iikiu numin yuminkramiayi

(Mar. 11.12-14, 20-26)

18 Kashin tsawaar Jerusaré<sup>n</sup>num waketas Jesus tsukaarmiayi. 19 Iikiu numi jintiá yantam wajan wániak akaktajtsa werimiayi. Tura werí aya núminiak wáinkiamiayi. Túra numin tímiayi “Atacka nerechhattame.” Takui nu chichamaik káarmiayi.

20 Nuna wániak ni unuiniamurí ti enentáimprar aniasarmiayi “¿Urukaku imiá wárik jaka?”

21 Tuíniakui Jesus tiarmiayi “Nekasan tájarme, Yus nekas enentáimtakrumka, “nekaspash túrat” táchakrum iikiun túrajna nusha túramniaitrume. Tura nu arantcha nu naint “Ékemtam nayaantsanam inia<sup>n</sup>ta” tutai túrunattawai. 22 Ashí Yus áujeakum seamna nu, Yus nekas enentáimtakum seakme<sup>u</sup>, wáinkiáttame” tímiayi.

### Yusa kakarmarijiaí Jesus takasmiania nu

(Mar. 11.27-33; Ruk. 20.1-8)

23 Yusa Uunt Jeen Jesus wayá unuiniamiayi. Turai Israer-patri uuntri tura Israer-shuara úuntrisha Jesusan tariar aniasarmiayi “¿Yana chichamejai ju túram. Ya ju túratniuncha akuptamkai?” tiarmiayi.

24 Tutai Jesus tiarmiayi “Wisha ania<sup>n</sup>taj tusan wakerajrume. Ju áirkakrumni<sup>n</sup>kia Wisha yana chichamejai túraj nuna ujaktatjarme. 25 Wats, ¿ya imiakratin Juan<sup>u</sup>kan akupkamia. Yusak, aentsuk, ya akupkamia?”

Tutai nuámtak tunainiarmiayi. “Yus akupkiamiayi” tákurni<sup>n</sup>kia “¿urukamtai enentáimtichuitrum?” túramtatji. 26 Kame “shuar akupkai<sup>n</sup>ti” tákurnisha ashí aents mantamattaji. Warí, ashí niisha Juan Yúsnan etserniuyi tuíniatsuk” tiarmiayi. 27 Nuyá Jesusan “Nékatsji” tiarmiayi.

Tutai Jesussha a<sup>n</sup>iniak “Wátsek, Wisha núnisnak akuptukua nuna ujakchattajrume” tímiayi.

**Jimiará uchi tiarmia nuna áujmatsamiania nu**

<sup>28</sup>Jesus unuiniak tiarmiayi “Enentáimpratarum. Shuar uchin jímiaran takakuuyi. Nuna chikichkin chicharuk timiai “Uchirú, arakur júuktin yamáí wetá.”

<sup>29</sup>‘Tutai uchi “Atsá, nakitiajai” timiai. Tayat urum enentáimiar takaumai.’

<sup>30</sup>‘Nuyá aparí chikichnasha werí núnisañ timiai.’

‘Tutai uchi “Apawa, páchitsuk wetajai” timiai, túrasha wéchamai.’

<sup>31</sup>‘¿Túa ni aparí wakeramun umirkama?’ tímiayi Jesus.

Tutai “Emkaa nu” tiarmiayi.

Tuíniakui Jesus tímiayi “Nekasan tájarme, yajauch shuar ainia nu tura tsanirma ainia nusha átumka pachiiintsrumniñ nii emka Yus akupeamunam pachiiinkiertatui. <sup>32</sup>Iis, imiakratin Juan pēñker wekasatniun etserkamiayi, túrasha antukchamarme. Antsu yajauch shuar ainia nu tura tsanirma ainia nu umirkarmiayi. Nusha wáinkiaiatrum atumi tunaarí enentáimturchamarme’ tímiayi.

**Yajauch takaun áujmatsamiania nu**

*(Mar. 12.1-12; Ruk. 20.9-19)*

<sup>33</sup>Ju chíkich áujmatmasha antuktatum. Nunká nérentin uwa ajan ajammai. Tura wenuimiai. Uwa neketaincha najanamai. Kumpin jeancha najanamai. Tura mash pēñker iwiar shuar wáitrukarti tusa apujkimiai. Tura niníia yajá nunkanam wemai. <sup>34</sup>Tura júuktin tsawant jeamtai juuk nakak akúptúrkartí tusa chíkich takarniurí akupkamai. <sup>35</sup>Tura nui pujuinia nu, akupkamun achikiar chikichnaka katsumkar, chikichnasha máawar, chikichnasha kayajají tukurar máawarmai. <sup>36</sup>Túrawarmatai nérentin takarniun nuna naníkaamas akupramai. Ataksha nuí pujuarmia nu núnisañ túrawarmai. <sup>37</sup>Amúamunam ni uchirín akupeak “Winia uchir asamtai umirkachartimpiash” timiai. <sup>38</sup>Túrasha nu takau nérenniun uchirín wáinkiar “Nuna aparí jakamtai juna mashi júkishtatuak, tiarmai. Maatai, túrar ii nérentin ajastai” tiarmai. <sup>39</sup>Tiar achikiar arant júkiar nuí máawarmai.” <sup>40</sup>Tinia Jesus aniasarmiayi “Nunká nérenniurí taa nu takaun ¿itiurkatin?” tímiayi.

<sup>41</sup>Tutai tiarmiayi “Nu shuar ti yajauch ásarmatai waitnentsuk máawartatui. Tura nu ajan chíkich takaun neren akanak nin susamnia nuna apujsattawai” tiarmiayi.

<sup>42</sup>Tuíniakui Jesus tímiayi “Átumka Yus-Papikia ¿penkek áujchaitrum? Júnis áarmaiti:

“Jea jeamin utsankarmia nú kaya ashí kayajají naníkaamas apujsamuiti. Núnaka ii Uuntrí Yus túraití. Iisha íisar ti enentáimtaji.” Tu áarmaiti.



43Tuma asamtai tájarme, Yusna írrunna nu wáinkiatárum tusa suramsamútiat atumíya junas chíkich aents súnastatui. Niisha awantukiartatui. 44Tura shuar nu kayan tukumainia nuka kupintrartatui. Tura nu kaya shuarnum iniarka tsai tsai awajsattawai auka” tímiayi Jesus.

45Israer-patri uuntrísha Paríséusha Jesus áujmatman antukar “in túramji” tusar achiktaj tiarmiayi. 46Tura ashí aents “Jesus Yúsnan étserui” tuinia ásarmatai nin ashamkarmiayi.

### Métek-taku chichamjai nuatnaiyamun Jesus áujmatsamiania nu

**22** 1Jesus ataksha áujmatuk júna tímiayi: 2“Yus akupeamunam pachiinkiertin júnis enentáimpramniati. Uunt akupin ni uchirí nuáteakui nampermamai. 3Túrak ni takarniurín ipiaamautarum tusa akupkarmai. Tura ipiaamusha nakitrarmai. 4Ataksha chíkich takarniuncha ipiaamakrum jú titiarum tusa akupkarmai. “Mash yurumkan iwiarajai, tawai, titiarum, timiai. “Waakasha máatarum tusan akupkarjai, tawai. Ajaermancha máatarum tusan akupkajai, tawai. Ashí nuatnaiyamunam winiarti,” tawai” titiarum” timiai. 5Támaitiat nú ipiaamusha nakitrarmai. Chikichik ni nunken wemai. Chikichcha kuftian suruktinian wemai. 6Chikichcha ipiaakratniun achikiar yajauch awajsarmai, tura chikichnaka máawarmai. 7Túramtai uunt akupin ti kajek, ni suntari mash máatarum túrarum ni jee mash ekeemáktárum tusa akupkarmai. 8Nuyá ataksha ni takarniurín akupkamai. “Nuatnaikiatin jísat mash iwiamamuiti, timiai. Tura nu ipiaamu winichmin armái. 9Tuma asamtai pepru jintí werum ashí shuar nánkamas wáintrum nu ipiaatarum” timiai. 10Takui takarniuri jíinkiar pepru jintin wajainian, yajauch shuarnasha péñker shuarnasha, ashí ipiaawarmai. Túramtai jea piákmai.’

11‘Nuyá uunt akupin ipiaamun ísartaj tusa wayamái. Nui shuaran péñker iwiamamprachun wáinkiamai. 12Tura timiai “Umpá, ¿urukamtai nuatnaiyamunam entsatai pushí entsatsuk wayam?” Tutai nu áishman tákamtak pujusmiayi. 13Nuyá uunt akupin yurumka ajaaman timiai “Achikrum nawenmasha uwejnumsha jinjiarum aa jíikrum kiritniunam ajapatarum. Nuísha ti úutin ti wáitsatin átatuí” timiai. 14Kame untsurí ipiaamu áiniawai antsu ishichik achikma áiniawai.”

### Uunt akupin Sésar akiktinia nu (Mar. 12.13-17; Ruk. 20.20-26)

15Nuyá Paríséu chichaman najatawar uyumtikiatai tusar tiarmiayi. 16Túrawar ni shuaríncha tura akupin Erutisa nemarniurísha Jesusan akuptukarmiayi. Kame akupin Erutis uunt akupin Sésara kuitri wáinin asamtai nu apachniasha akupkarmiayi. Niisha jeariar Jesusan

tiarmiayi “Uuntá, amesha nekas chicham chichaame. Nu nékaji. Chíkich shuar tuinia nu ántutsuk nekasam Yus-Chicham jintíame. Shuar shiir enentáimturarat tusam jintíatsme, tiarmiayi. <sup>17</sup>Tuma asamtai ju nekaatai tusar wakeraji. ¿Uunt akupin Sésar akikminkiait?” tiarmiayi.

<sup>18</sup>Jesus ni yajauch enentáijjai aníam nekáa tiarmiayi “Aya shiir chichamtiniaitrum. ¿Urukamtai uyumatkiarkatin wakerutarum? tímiayi. <sup>19</sup>Wats, Sésar akiktinia nú kuit itiarititarum.” Takui chikichik kuítian itiararmiayi. <sup>20</sup>Nuna iis Jesus aniasarmiayi “¿Juí yana yapimpiait tura yana naari áarmait?”

<sup>21</sup>Tutai “Uunt Sésarna” tiarmiayi.

Tuiniakui Jesus chicharuk tiarmiayi “Nuikia uunt Sésarna nu, Sésar susatarum. Tura Yusna nusha Yus susatarum” tímiayi. <sup>22</sup>Tura nuna antukar ti enentáimprarmiayi. Tura ikiuniak wearmiayi.

**Jesusan jakamunmayá nantaktinian aniasarmiania nu**  
(*Mar. 12.18-27; Ruk. 20.27-40*)

<sup>23</sup>Nu tsawantáik Satuséusha Jesusan tariarmiayi. Satuséuka jakamunmayá nantakchatniuiti tuíniawai. Nuna tiniu ásar juna Jesusjai áujmatsarmiayi. <sup>24</sup>“Uuntá, Muisais juna áartampramijai, “áishman uchin yajutmitsuk jakamtaínkia ni yachi nu nuwan nuatak ni yachin yajútmátrati,” tu áarmiayi, tiarmiayi. <sup>25</sup>Ayu, íi shuarnum siati (7) yáchintin ármiai. Iwiairi nuatak uchin yajutmitsuk jakamiayi. Tura wajen ni yachin ikiurkimiayi. <sup>26</sup>Tura niisha nuatak uchin yajutmitsuk jakamiayi. Tura chikichcha núnisan jakamiayi. Tura chikichcha siati armia nu ashí nuatkar jákarmiayi. <sup>27</sup>Nuyá nuwasha jakamiayi. <sup>28</sup>Jakamunmayá nantakiar ¿yaki nekas ni aishri ati? Ashí nin nuatkacharmakia” tiarmiayi.

<sup>29</sup>Tuíniakui Jesus tímiayi “Yus-Chichamsha nékachkuram tura Yusa kakarmarisha nékachkuram nantaktin atsawai tákuram ti awajiarne. <sup>30</sup>Nekaatarum. Jakamunmayá nantakiaruka nuatkachartatui. Antsu Yusa suntari nayaimpiniam pujuinia núnisar nuartichu pujusartatui. <sup>31</sup>Túrasha jakamunmayá nantakiartatna nu nekaatajtsa wakerakrumka ju enentáimsatarum. Muisais aarma nu áujtsachukaitrum. Júnisan áarmiayi:

<sup>32</sup>“Wiitjai Apráama Yúsrinjai, Isaka Yúsrinjai, Jakupu Yúsrinjai.” Tu áarmiayi.

Watsek, Yuska jaká Yúsrinchuiti. Antsu iwiaaku ana nuna Yúsrinti, tímiayi. Iis, nu shuar imiá yaunchu jákaruítat Yusjai iwiaaku pujuiniak nantakmin áiniawai” tímiayi. <sup>33</sup>Ashí aents nuna antukar nu jintintiam ti enentáimprarmiayi.

**Yus akupkamu imiá enentáimtustinia nu**  
(*Mar. 12.28-34*)

<sup>34</sup>Satuséu Jesusan aiktinian tujinkiarmatai Pariséu nuna antukar iruntrarmiayi. <sup>35</sup>Tura chikichik Pariséu jintintin asa Jesusan

uyumtikiataj tusa aniasmiayi <sup>36</sup>“Uuntá, ¿túa Yus akupkamu imiá nan̄kaamas enentáimtustiniat?”

<sup>37</sup>Tutai Jesus tímiayi “Júiti: “Ame Yúsrum ashí enentáimjai aneeta. Ashí ame wakanmijiaisha tura tuke enentáimtusam aneeta.” Tu áarmaiti, tímiayi. <sup>38</sup>Núiti emka ashí akupkamu nan̄kaamas enentáimtustinia nu. <sup>39</sup>Chikichcha jujai métek-taku awai. Nusha tawai: “Ame írutramuram ame ayashim aneamna nútiksamek aneeta.” <sup>40</sup>Nu jímiar akupkamu umirkam ashí Muisais akupkamia nusha tura ashí Yúsnan etserin unuiniararmia nusha umirkattame” tímiayi.

**Kristu Tawit weeaitiat Yusa Uchirínti**  
(*Mar. 12.35-37; Ruk. 20.41-44*)

<sup>41</sup>Tura Pariséu tuke irunar pujuiniakui <sup>42</sup>Jesusha aniasarmiayi “Kristu tutai ¿ya weeá átiniait. Warí enentáimtarum atumsha?”

Takui “Tawit weeá átiniaiti” tiarmiayi.

<sup>43</sup>Tuñiakui Jesus tiarmiayi “Nuikia ¿urukamtai Tawit, Yusa Wakaní “titia” tutai, Krístun “winia Úuntur” tímia? Iis, Tawit juna tímiayi:

<sup>44</sup>“Uunt Yus winia Úuntrun juna tímiayi: “Akupin pujutainium, winia untsuuruini, pujusam nákersata. Ashí ame nemasrumin nupetkan Ámin umirtamkarti tusan amastatjai” tímiayi Yus.” Tu tímiayi Tawit.

<sup>45</sup>Wasek, Tawit Krístun “winia Úuntur” tajsha ¿itiurak ni pampanmari áti?” tímiayi Jesus. <sup>46</sup>Nuna takui penkesha áikcharmiayi. Túrawar atakka uyumamtkiatai tusar aniascharmiayi Jesusan.

**Jesus Pariséuncha Israer-shuara jintiniuríncha “yajauchitrume”  
timiania nu**

(*Mar. 12.38-40; Ruk. 11.37-54; 20.45-47*)

**23** <sup>1</sup>Jesus ni unuiniamuríncha tura ashí shuárnasha tiarmiayi <sup>2</sup>“Israer-shuara jintinniurísha tura Pariséusha Muisais akupkamun paant ujatmainiawai. <sup>3</sup>Tuma asamtai tuinia nu umirkatarum. Túrasha ni túruinia nu jumamkiirap. Nu shuar shiir chichainiyat nusháa túrin ániawai. <sup>4</sup>Ti itiurchat ana nuna akupeenak ti emeram entsaktinia áintsan áentsun apujtuiniawai. Túrasha chikichik uwejéjajisha ishichkisha takuitniun nakitiainiawai. <sup>5</sup>Aya shuar írsarti tusar ashí túruiniawai. Ashí shuar péñker enentáimturarti tusar Yus-Papin nijiaíncha tura kunturíncha ti wan̄karam awajsar anujak yujainiawai. Tura nu arantcha pushirí sasariarman ashí shuarjai nan̄kaamas esaram awajas wekainiawai. <sup>6</sup>Nampernumsha péñker iwiamunam pujustinian wakeruiniawai. Iruntainmasha nan̄kaamantu ajasa pujustinian wakeruiniawai. <sup>7</sup>Jintía wekainiaksha ashí aents áujuiniak “Jintínkiartiniá” turutiarti tusa wakeruiniawai” tímiayi.

8‘Túrasha átumka ashí shuar “Jintínkiartiniá” turutiarti tusa enentáimsashtiniaitrume. Átumka nuámtak yáchintrume. Átumka chikichik jintinkiaartin ni naarí Kristu takakrume. Nu asamtai “Jintínkiartiniá” túramcharmin ániawai. 9Jú nunkanmasha shuar “Aparú” tiirap. Chikichik nayaimpiniam pujana nu atumí Aparínti. 10Atumi uuntri aya Krístuk asamtai “Uuntru” túramcharmin ániawai. 11Antsu átum írutkamunmaya uunta nuka peejchach átiniaiti. 12Shuar nankaamantu ajastaj tákuinkia Yus nin peejchach awajsattawai. Antsu peejchach ana nuna Yus nin nankaamaku awajsattawai’ tíniyai.

13‘Maa wáinkiatárum jintinniutirmesha, Pariséutirmesha. Ántrarum shiir chichamtiniaitrume. Yus akupeamunam wayatin waiti epenniuitrume. Atumsha wayatsuk chikichcha wayataj tuinia nusha suritniuitrume.’

14‘Maa wáinkiatárum jintinniutirmesha, Pariséutirmesha. Ántrarum shiir chichamtiniaitrume. Wajé jee atankiirum aents enentáimturarajin tusarum ti esaram Yus áujtiniaitrume. Túrin asarum átum ti asutniátniuitrume.’

15‘Maa wáinkiatárum jintinniutirmesha, Pariséutirmesha. Ántrarum shiir chichamtiniaitrume. Nunkanmasha nayaantsanmasha yajá wekainiuitrume chikichik shuar winí nemartusat tusarum. Tura atumi nemari ajasmatai atumjai nankaamas tunáa sumamamnia awajearme.’

16‘Wáinkiatárum átumka. Jintinkiaartiniaiatrum nékachu asarum kusurua ániuitrume. Jú jintíarme: “Shuar nekasán tajai tusa Yusa Jeeen páchiakka nii tana nuna umitsuk ikiukminiaiti. Antsu nekasán tajai tusa Yusa Jeeen kuri ana nuna páchiakka ti nekas umiktiniaiti” tíniuitrume. 17Nétsetrume. Yúsjaínkia ashí kuri ánrachukait. Antsu Yusa Jeeen írunna nuka aya nuin ikiusma asa Yusna ajasuiti. Tuma asamtai kurijjai nankaamas Yusa Jee enentáimustiniaiti. Enentáimcha asarum kusurua áinin wáakuitrume. 18Nu arantcha tíniuitrume: “Shuar nekasán tajai tusa naman-maar-Yus-sútain páchiakka nii tana nuna umitsuk ikiukminiaiti. Antsu Yús-sutainiam naman patasman páchiakka ti nekas umiktiniaiti” tíniuitrume. 19Nétsetrume. Penké naman Yusjai ánrachukait. Aya Yús-sutainiam patasma asa nu naman enentáimtuschatniukait. Enentáimcha asarum kusurua áinin wáakuitrume. 20Enentáimpratarum. Shuar nekasán tajai tusa Yús-sútain páchiakka aya sútainiak páchiatsui antsu sutaicha tura nuj patasmancha máí-metek páchiawai. 21Núnisan shuar Yusa Jeeen páchiakka aya nunak páchiatsui antsu Yus nu jeenam pujú asamtai nunasha páchiawai. 22Núnisan shuar nayaimpin páchiakka Yus pujutainchsetrume. Penké naman Yusjai ánrachukait. Aya Yúa tura Yus nuj pujana nunasha páchiawai.’

23‘Maa wáinkiatarum jintinniutirmesha, Pariséutirmesha. Ántrarum shiir chichamtiniaitrume. Kumintsu nukésa, anisa nukésa, menta

nukēsha tias (10) akantram chikichik akankamu Yus súwitrume. Nuka pēnkeraiti, ikiukchatniuiti. Túramaitiat nekas pēnker túratniua nu túrutsuk ikiuwitrume. Yus nekas enentáimtustincha, waitnentáimturтинcha tura tuke pēnker túratniusha enentáimtsuk ikiuwitrume. <sup>24</sup>Átumka jintinkiertiniaitiatrum nékachu asarum kusuru ániuitrume. Kutanam yajasmach enketu wáinkiumeka júwitrume. Túrayatrum kamiriu wáinkiumeka kawai nankaamas únt ain takamtsuk kújawitrume.'

<sup>25</sup>'Maa wáinkiatrum jintinniutirmesha, Pariséutirmesha. Ántrarum shiir chichamtiniaitrume. Átumka tsapasha pininsha initiaani nijiatsum aya pátatek nijawitrume. Núnisrum pátatek shiir awajmamniuitrume tura enentáimkia kasamkatniusha tura chíkichna wakeruktincha nujai piákuitrume. <sup>26</sup>Kusuru ániuitrume, Pariséutirmeá. Antsu emka initiaani tsapasha pininsha nijaktarum. Túrakrumniñkia pátatesha mai pēnker átatui. Núnisrum atumsha atumi enentáin ana nu shiir awajсарum pátatesha shiir átatrume.'

<sup>27</sup>'Maa wáinkiatrum jintinniutirmesha, Pariséutirmesha. Ántrarum shiir chichamtiniaitrume. Iwiarsamu pújujai yakarar shiir awajsamua ániuitrume. Aani shiir ániawai. Tura initkia jaká ukunchijjai piákuiti. <sup>28</sup>Núnisaitrume atumsha. Chíkich shuar ísmaka ti shiira ániuitrume. Túrasha atumi enentáinkia ashí mujmiai piákuiti.'

<sup>29</sup>'Maa wáinkiatrum jintinniutirmesha, Pariséutirmesha. Ántrarum shiir chichamtiniaitrume. Yaunchu Yúsnan etserin iwiarsamunam átumka shiir enentáimtakrum jea jeamkaitrume. Tura pēnker shuar yaunchu jákarusha shiir enentáimturtaj tusarum ni iwiarsamu shiir awajearme. <sup>30</sup>Túrakrum ju tniuitrume: "Iikia yaunchu ii weatrijjai pujaitkiurkia Yúsnan etserin máatin yáimkiachaaji." <sup>31</sup>Nujai ti paant chichaarme atumsha. "Ii weatri Yúsnan etserniun máawar tunáa túrin ármiayi" tárume. Tura "Yáimkiachaaji" táyatrum, atumsha métek túrin asarum "Niijjai méteketji" tárume. <sup>32</sup>Wats, atumi weatri nankamawarmia nu átum amuktatrume' tímiayi Jesus.

<sup>33</sup>'Napia ániuitrume. Shuar aya yajauch awajniuitrume. Túmatirmesha Yus tunáa shuaran jinium akupkartatna nuya çitiurak uwempratarum? <sup>34</sup>Untsurí shuaran akuptuktatjarme. Yúsnan etserniuncha, ti nekancha, jintinkiertinniasha akuptuktatjarme. Tura atumsha chíkich máattarme, chikichcha krúsnum ajintruarum máattarme, chikichcha iruntai jeanam asutiáttarme, tura chikichcha ashí nunkanam áintrattarme. <sup>35</sup>Nu tura asarum pēnker shuara numpé puarma nujai átum sumamattarme. Yámankamtaik Apir ti pēnker shuáraitiat máamuyayi. Tura ukunam Perekíasa uchirí Sakarías atumi uuntri Yusa Jee ámanum naman-maar-Yús-sutai ajapén aténkamunam máawarmiayi. Wats, Apir máamunmaya Sakarías máamunam ashí pēnker shuar ti untsurí máamujai

sumamattarme. <sup>36</sup>Nekasan tájarme, yamáí pujuinia nú shuar ashí nujáí sumamawartatui' tímiayi Jesus.

**Jerusarénnumiá shuaran Jesus aneak útmiania nu**  
(Ruk. 13.34-35)

<sup>37</sup>Jerusarénnumiá tirméá, Yúsnan etserin máiniaitrumé. Yus akatar akupturmakmasha kayajáí tukuram máiniaitrumé. Túrin árumnin waitnentajrumé. Atash ni uchirín weaana áitkiasnak weartinian wakerimjarme, tura nakitramarme. <sup>38</sup>Iistarum. Ame pépruram ajapamuíti. <sup>39</sup>Tura “Yusa náariin winiana nu, shiir atí” títiatrumna nu tsawant jeatsáin penké wáitkiashtatrumé. Nuna tájarme” tímiayi Jesus.

**Yusa Uunt Jee saanaktinian Jesus ujakmiania nu**  
(Mar. 13.1-2; Ruk. 21.5-6)

**24** <sup>1</sup>Jesus Yusa Uunt Jeeñiá jiinki weáí ni unuiniamurí nin tariar Jeeñ iniaktusar áujmatsarmiayi. <sup>2</sup>Tura Jesus tiarmiayi “Nu mash yamáí wáinrumé. Tura nekasan tájarme ukunmanka mash saanaktiatui. Chikichík kayaksha ekenramurí atsuttawai” tímiayi.

**Amúamu tsawant nekaatin**  
(Mar. 13.3-23; Ruk. 21.7-24; 12.22-24)

<sup>3</sup>Nuyá Uriwiu náinnium wear niñki nui pujusar ni unuiniamurí Jesusan aniasarmiayi “¿Nusha urutaik túrunat! Tura ame tátincha tura nunka amuukatin tsawant jeakuisha warijáin nekaattaj? Nu ujatkata” tiarmiayi.

<sup>4</sup>Tuúniakui Jesus tímiayi “Aneartarum, anañkramawairap. <sup>5</sup>Untsurí shuar winia náarun pachisar “wi Krístuitjai” tiar untsurí shuaran anañkawartatui. <sup>6</sup>Ti untsurí meset chicham antuktatrumé túrasha sapijmiakairap. Núnisan átiniaiti nunka amúatsáin. <sup>7</sup>Apachcha chíkich nunkanmayá apachjai máaniawartatui. Tura ti tsukasha átatui. Sunkursha ti pampartatui. Uusha ti uurkartatui. Nuka untsurí nunkanam ashí túrunawartatui. <sup>8</sup>Nujáí ti wáitsatin aya yama nankamui’ tímiayi.

<sup>9</sup>Nuyá atumniasha yajauch awajsarti tusa surutmakartatui. Tura mantamawartatui. Tura winia naar pachia asakrumin ashí shuar mujramkartatui. <sup>10</sup>Nu tsawantáí untsurí shuar Yúsan iniaisartatui. Túrawar nuamtak mujniainiak surunairartatui. <sup>11</sup>Untsurí shuar wáitruiniak “wi Yúsnan etserniuitjai” tiartatui. Túrawar untsurí shuaran nusháa enentáimtikrartatui. <sup>12</sup>Tura tunáa ti ákui nuamtak anenaichartatui. <sup>13</sup>Tura shuar ashí nuna tuke katsuntra nu uwemprattawai. <sup>14</sup>Ashí aents nekaawarat tusa Yus-Chicham ashí nunkanam etsernaktatui. Túramtai amuukatin tsawant jeattawai” tímiayi.

15 Shuar juna áujea nu enentáimprati. Kame Jesus tímiayi “Yúsnan etserin Taniar muijmiamtik tuke emesratin ana nuna yaunchu aar etserkamiayi. Nuka Yusa Jeen wantinkiamtai 16 ashí shuar Jutía nunkanam írúnna nu, muranam pisararti. 17-18 Ti wárik pisartin asamtai shuar jea yakí pujaksha tura shuar ajanam wekaakusha jeá waketki warirí jukitijá tíchatí. Antsu nuyañ wárik pisarti. 19 Nu tsawantai nuwá ajamtincha tura kuírchin takaku ainia nusha ti wáitsartatui. 20 Ayampratin tsawantaisha tura michá nántutincha nu pisartin tsawant áchati tusarum Yus seatarum. 21 Maa, nu tsawantai ti wáitsatin átatui. Ti yáunchusha núnisan wáitsatin atsuuyayi. Ukunmasha atsuttawai. 22 Nu wáitsatin ti esarmaitkiuinquia chikichkísha uwemprachainti. Tura Yus nu wáitsatniun wárik amumtikiattawai. Shuar Niiniu ajasarat tusa achikma ainia nu uwemprarat tusa wárik amumtikiattawai’ tímiayi.

23 “Tura atumin “Júiti Kristu,” tuñiakuisha tura “Nuí pujawai” tuñiakuisha anturkairap. 24 Untsurí shuar Krístuitjai tusar wantinkiertatui. Untsurísha “Yúsnan etserniuitjai” tiartatui. Tura shuáran anañkataj tusar aents tujintiamun iniakmasartatui. Tura ti kakarman túruiniak Yús-shuarnasha anañkamin áiniakuinquia anañkawarainti. 25 Túrunatsajin nuna emka ujaajrume. 26 Tuma asamtai “Iis, Kristu nuí aents atsamunam pujawai” túramainiakuisha nuí wéerap. “Juí úumak pujawai” tuñiakuisha anturkairap. 27 Núnisan úumkan táchattajai. Peem péetuk ti wárik ashí nunkanam wáinkiachminkiait. Núnisnak wi Aents Ajasuka winiakun paant wantinkiatatui. 28 Wats, jaka tepaana nuí chuan káutkachartatuak’ tímiayi.

### **Kristu tátintri**

*(Mar. 13.24-37; Ruk. 21.25-33; 17.26-30, 34-36)*

29 “Ti wáitsatin nankaamasmatai ti wárik tsawáí nantu kajinkiatatui. Tura kashí nantusha etsantrastatui. Yaasha ashí muchitrattawai. Nayaimpiniam kakaram ainia nusha peantrartatui. 30 Nuíquia Wi Aents Ajasuka, tátiniur paant átatui. Tura ashí nunkanmaya aents Wi winiái wáitkiar asuttiamattaji tusar úutiartatui. Wisha ti kakaram tura Yusa wincharijjai yuranminiam winiái wáitkiartatui. 31 Yusa suntarin kachu kakaram umpuarterum tinia akupkamtai nu suntar ashí nunkanmaya ashí Yús-shuaran, Yus achikma ásarmatai, irurartatui’ tímiayi.

32 “Iikiu numirí nakumea nu nekaatarum. Ni nuken eteakui “esat nantu jeatemayi” tátsurmek. 33 Núnisan ashí ju wáinkiumeka “amuukatin tsawant nekas jeatemayi” títiniaitrume. 34 Nekasan tájarme, yamá aents pujuinia nu amúatsajin ashí túrunattawai. 35 Nunakasha nayaimpisha amuukartatui antsu winia chichamur amuukashtatui’ tímiayi.

36 “Tura nu túrunatin tsawant nekanachminiaiti. Yusa suntarisha nékainiatsui. Wisha Yusa Uchiríntiatnak nékatsjai. Antsu aya winia Aparuk nékawai’ tímiayi.

<sup>37</sup>‘Wi tátiniur jeamtai yaunchu Nuai pujumia nú tsawantin túrunamia núnisan̄ átatuí. <sup>38</sup>Nu tsawantin, tuke amaartsain̄, aya júnis̄an̄ aa asamtai yurumuk umarar pujuarmiayi. Nuatnainiarmiayi. Ni nawantr̄incha nuatmamtiarmiayi. Tura tumá pujuiniāi Nuai uunt kanunam enkemamtai <sup>39</sup>nu aents tuke nékainiatsain̄ ama amarak mash amuukarmiayi. Núnisan̄ átatuí Wi tátin jeamtai. <sup>40</sup>Nu tswantaik jimiará shuar ajanam pujuttawai. Chikichik junaktiatuí tura ch́kíchkia ikiunkittiwai. <sup>41</sup>Núnisan̄ jimiará nuwá shana nekeak pujuttawai. Chikichik junaktiatuí chikichcha ikiunkittiwai’ tímiayi.

<sup>42</sup>‘Nu asamtai atumsha iwiarnarum pujustarum. Nekaachminiaiiti uruk áintsuk taritjiarum. <sup>43-44</sup>Tuma asamtai aneara pujustarum. Wi nekaachmanum tátin júnis̄an̄ enentáimpramniiaiiti. Shuar jú kashi kasa tátinian nekaanka kánutsuk kasa táawaj̄ tusa iwiarnar nákasainti. Núnisrum aneara pujutarum.’

**Pénker takamtikniuncha yajauch takamtikniuncha Jesus  
ájumatsamiania nu  
(Ruk. 12.41-48)**

<sup>45</sup>‘Shuar pénker uminian tura pénker enentáimniun ájumatsattajai. Nuna uuntrī yajá irauweak “Yurumátin jeamtai winia takartin ayuratarum” tíchanpiash. <sup>46</sup>Nu takamtikniuncha ni uuntrī taa takatr̄in tímiatrusan̄ túran tarin̄kia shiir enentáimtusainti. <sup>47</sup>Nekasan tájame, umin asamtai ni uuntrī ashí ni warir̄in wáitrukát tusa takatan susattawai. <sup>48-49</sup>Antsu úuntur wau táchattawai tusa takamtikin ni uuntrī yáintrin̄ yajauch awajeak tura takatsuk aya yurumátiniun tura nampektinian wararkun̄ka nu takamtikin yajauchiiti. <sup>50</sup>Turaj̄ ni uuntrī aya aneachma taa nu takamtikniun, yajauch asamtai, <sup>51</sup>ti kakaram asutiattawai. Yajauch shuar pujuinia nūi akupkattawai. Nūisha ti wáitiak ti úuttiatuí’ tímiayi Jesus.

**Jesus tias (10) nuw̄an ájumatsamiania nu**

**25** <sup>1</sup>‘Yus akupeamunam pachiinkiatin júnis̄ átatuí. Nuatnaikiatin jísat akui tias nuwá natsa kantiran akaawar nuátkattana nu áishman̄kan in̄kiun̄ jeá itiatái tusar wearmai. <sup>2</sup>Sen̄ku nuwá enentáimcha armai. Tura ch́kích sen̄ku nuwá enentáimin armai. <sup>3</sup>Enentáimcha arma nú nuwá aya akaamunak júniak amuukamtai yaraatniun asutin júkicharmai. <sup>4</sup>Antsu ch́kích sen̄ku núwaka akaamuncha júniak tura ataksha amuukamtai yaraatniun asutin júkiarmai. <sup>5</sup>Tura j́inkiar matai nuatkatin áishman̄ wari taachkui kar̄i pujakui kanararmai. <sup>6</sup>Nuyá kashi ajapén̄ shuar untsukum “Pai nuatkatin winiawai. Werirum in̄kiuntarum” timiai. <sup>7</sup>Tu untsumon antukar nantakiar kantiran akaatai tusar pujursarmai. <sup>8</sup>Nuyá sen̄ku nuwá enentáimcha arma nu, ch́kích nuwá



enentáimniun tiarmai “Incha atumi asuitirí ishichik ajamprusaitia. Ii kantirísha kajiniawai.”

9‘Tutai ch́kích senku nuwá tiarmai “Atsá, warí íncha jeartamchattaji. Tura atumnia penké jeashtatui. Nekaska surutainium werum sumaka utumtarum” tiarmai.’

10‘Tura nuyá senku nuwá enentáimcha arma nu, asutian sumak utitiai tusar wéarai ukunam nuatkatín áishman tamai. Túramtai enentáimin nuwá arma nuka nuatnaikiatin námpernam nuatkatniujai wayawarmai. Túramtai wáitin epeniarmai. 11 Tura epeniarai enentáimcha nu táarmai. Tura tiarmai “Úuntá, waiti uratritia.”

12‘Tu unsumainiakui nu uunt kajerak chichak “Cha, zyátsukaitrum? Penké nékatsjarne” tiarmai.” 13 Jesus nuna áujmatas umik tímiayi “Aents Ajasuitjai tura tátin tsawantrusha tura uruk ain tátaj nusha nékatsrume. Tuma asarum tuke iwiarnarum pujustarum’ tímiayi.

### Kuit susamun áujmatsamiania nu

14‘Núnisan Wi tátin júnisaiti. Shuar ch́kích nunkanam wéak<sup>u</sup> ni takarniurín untsukar ni kuítrín akanak súsarmai. 15 Chikichkiniak senku mir (5.000) kuítian susamai. Chikichnasha jimiará mir (2.000) kuítian susamai. Tura chikichnasha chikichik mir (1.000) kuítian susamai. Nii takastin jearma nujai métek súsarmai. Tura ikiuak yajá wemai. 16 Takarín senku mir kuítian achikmia nujai takakmas ataksha senku mir kuítian patakmai. 17 Chikichcha núnisan jimiará míran achikmia nujai takakmas ataksha jimiará míran patakmai. 18 Tura ch́kích shuar ni uuntrí kuítrín chikichik míran achikmia nuna waa taur úukmai.’

19‘Nuyá ukunam nu shuara uuntrí támai. Tura kuítian súkiarma nujai itiurkarmakit tusa untsukarmai. 20 Emka senku mir kuítian achikmia nu tamai. Nuyá ni úuntrín ch́kích senku mir patakman suak timiai “Uuntá, senku mir kuit surusmame. Pai, atak senku míran patasmajai.”

21‘Takui ni uuntrí timiai “Ti penker takakmauwitme. Nekas uminiaitme. Ishichkijiaísha ti penker takakma asakmin ti núkap yamaikia amastatjai. Winí wayam wijjai ti shiir warasta” timiai.’

22‘Nuyá ch́kích shuar jimiará míran achikmia nu tarí timiai “Uuntá, jimiará mir surusmame. Pai, ataksha jimiará míran patasmajai.”

23‘Takui ni uuntrí timiai “Ti penker takakmauwitme. Nekas uminiaitme. Ishichkijiaísha ti penker takakma asakmin ti núkap yamaikia amastatjai. Winí wayam wijjai ti shiir warasta” timiai.’

24‘Nuyá ch́kích shuar chikichik míran achikmia nu tarí timiai “Uuntá, ti kaje asakmin tura araachiatam tura atsaamprachiatam júurtuktarum tiniu asakmin 25 sapijmiakun ame kuítrumniaka nunká táutran úukmajai. Pai, juítí ame surukmiam nu” timiai.’

26‘Takui ni uuntrí timiai “Ámeke yajauchitme. Aya nákiitme. Wi araachiatan tura atsaamprachiatan júurtuktarum tınıuitme túrutsumek.

27 Tu enentáimkiumka çurukamtaí kuit-iruntainiam ikiurtuschamam? Nuikia wi táakun patasan achikiáajai” timiai. 28 Nuna tinia nuí wajainian tiarmai “Ju shuar chikichík mir kuit atankirum tias mir kuítian takaka nu susatarum. 29 Kame núkap takakna nú shuar ataksha patatnastatui tura ampiniartatui. Antsu ishichik takakna nusha ishichik takakuitiat jurunkittiawai. 30 Ju umichu shuarsha aa kiritniunam ajapatarum. Nuí ti wáitíak ti úttiatui” timiai”. Tu áujmatsamiayi Jesus.

### Akantratin átatna nu

31 Jesus áujmatuk tímiayi ‘Aents Ajasuitjiana nu ashí akupin ajasan Yusa suntari énekma winittiajai. Tura Uunt Akupin asan shiir pujutairui pujustatjai. 32 Túramtai ashí nunkanmaya aents Winia irunturartatui. Túrunawarmatai akantrartatjai. Murikiu wáinin kachurtinian tura kachurtichujai akanea nútisanak shuáran akantrattajai. 33 Tura kachurtinniaka, yajauchia nuna, menaaruiñ awaj Sartatjai. 34 Túran nekas Uunt Akupin asan untsuuruiniñ wajainian títiatjai “Atumniaka winia Apar shiir awajtamsaitrume. Wi akupeajna nuí winitiarum. Yus nunkan najanamia tímianaik átum nuí warastinian tsankatramkamiarme. 35 Kame Wi tsukamá wekai ayurtuamiarme. Kitiama wekaisha umartin surusmiarme. Wait ajá wekaisha itiaararum ajamprusmiarme. 36 Pushir atsaisha átumka surusmiarme. Jaa tepaisha íiráimiarme. Sepunam enketaisha tarum íiráimiarme” títiatjai. 37 Tutai untsuuruiniñ wajainia turutiartatui “Uuntá, çurutia tsukamá wekaamnisha ayuramají. Urutiá iisha kitiama wekáa wainkiarsha umartincha amasmají. 38 Tura urutia wait ajá wekaamnisha tura pushiram mamurmataisha iisha amasmají. 39 Urutia iisha jaa tepamin tura sepunam enketchmin wainkiarsha winitir íimíají?” turutiartatui.’

40 “Turutainiakui Wi Uunt Akupin asan tiartatjai “Nekasan tájarme, ashí ju wí shuar péechachisha waitnentramarum nu Winia anentakum túraitrume” tiartatjai’ tímiayi.

41 “Wi Uunt Akupin asan menaaruiñ wajainian tiartatjai “Atumsha yajá wetarum. Yajauchijjai yuminkramuitrume. Yus uunt iwianchi ni suntarijjai tuke kajinkiashtin jinium apeatniua nuí wétatrume atumsha. 42 Átumka Wi tsukamaj ayurtuachmarme. Kitiamaisha umartin suruschamarme. 43 Wait ajá wekaisha ikiatrachmarme. Pushirun imiampraisha entsartin suruschamarme. Jaa tepaisha tura sepunam enketaisha íiraichmarme” tiartatjai.’

44 “Tutai niisha turutiartatui “çurutia, Uuntá, tsukamakmesha, kitiamakmesha, wait ajaknísha, pushiram imiampramsha, jáakmesha, tura sepunam wait ajá pujamnisha íisha winitir yáinchamají?” turutiartatui.’

<sup>45</sup>‘Wi Uunt Akupin asan tiartatjai “Nekasan tájarme, Ashí Wíi shuar, péejchachisha waitnentrachmarum nuí Winiasha túrutachuitrume” tiartatjai. <sup>46</sup>Nu shuarka tuke wáitsatniunam weartatui. Tura Yus achikma ainia nusha tuke iwiaaku Yusjají pujustinnium weartatui” tímiayi Jesus.

### Jesus achiktin chichaman jurusarmiania nu

(Mar. 14.1-2; Ruk. 22.1-2; Juan 11.45-53)

**26** <sup>1</sup>Jesus ashí nuna tinia umik ni unuiniamurín tiarmiayi <sup>2</sup>“Atumsha nékarme, Paskua jisat jeatin jimiarchik tsawant ajasai. Nuí Wi Aents Ajasu asamtai krúsnum máawarti tusar surutkartatui” tímiayi.

<sup>3</sup>Nuyá Israer-patri uuntrísha Israer-shuara jintinniurísha Israer-shuara úuntrísha Kaipiasa jeen áarin iruntrarmiayi. Kaipiassha Israer-patri uuntriyayi. <sup>4</sup>Nuí anan̄katin chichamjají Jesus achikiar maatai tusar chichaman jurusarmiayi. <sup>5</sup>Tura tiarmiayi “Jístatin túrachminiaiti aents téetet ajarajín tusar.”

### Nuwá Jesusan kun̄kuinian ukatramiania nu

(Mar. 14.3-9; Juan 12.1-8)

<sup>6</sup>Jesus Petania péprunam pujus tunamaru Semun̄ka jeen pujumiayi. <sup>7</sup>Nuí pujají nuwá ti kuit jeá kun̄kuinian arapástru tutai kaya najanamunam piakun itiamiayi. Tura Jesus misanam yurumátaj tusa pujan tarí nu kun̄kuinian ukatramiayi. <sup>8</sup>Túramtai ni unuiniamurí nuna físar kajerkar tiarmiayi “¿Urukamtai au kun̄kuin imiá kuítrniasha áantrasha wasurea? <sup>9</sup>Antsu ti kuitjají suruk shuar kuítrincha ainia nuna yáitskesha” tiarmiayi.

<sup>10</sup>Jesus tuinian anturak tiarmiayi “¿Urukamtai ju nuwá yajauch enentáimtarum? Túrutana ju ti péñkeran túrayi. <sup>11</sup>Kuítrincha tuke atumjají pujushtatuak. Antsu Wikia atumjají tuke pujushtatjai. <sup>12</sup>Ju nuwá kun̄kuinjají ukatrurají juka, Wi iwiarnastin asamtai áitkiarayi. <sup>13</sup>Nekasan tájarme, ashí nun̄kanam uwempratin chicham etsernakui tuke ju nuwá pachinias etsernaktatui. Túramtai ni túramurí kajinmankishtatui” tímiayi.

### Jútas Jesusan surukmiania nu

(Mar. 14.10-11; Ruk. 22.3-6)

<sup>14</sup>Nuyá Jesus tuse (12) unuiniamunmayá chikichik ni naarí Jútas Iskariúti Jesusan suruktaj tusa Israer-patri uuntriin wémiayi. <sup>15</sup>Tura jeari tímiayi “Jesusan achikia amakui ¿urutmá akirkaintrum?” Takui trainta (30) kuítian akikiarmiayi. <sup>16</sup>Nu akikiam Jútas itiurak Jesusan súsaraintaj tu enentáimias wekaimiayi.

### Kristu jakamu enentaimtustin námper

(Mar. 14.12-25; Ruk. 22.7-23; Juan 13.21-30; 1 Kur. 11.23-26)

<sup>17</sup>Wakapruachu tantan yurumáinia nú námper yama nan̄kamkui Jesusa unuiniamurí tariar aniasarmiayi “¿Tui paskua námper iwiaarakrin yurumáttam?” tiarmiayi.

<sup>18</sup>Tuínia<sup>ku</sup>i Jesus tímiayi “Péprunam wetarum. Nu<sup>í</sup> chikichík shuara jeen jearum titiarum “Uunta chichaak “Winia tsawantur ishichik ajasai. Tuma asan paskua namperan winia unuiniamurjaj<sup>i</sup> ame jeem<sup>i</sup>in yurumátjaj<sup>i</sup>” tawai” titiarum” tímiayi. <sup>19</sup>Tutai ni unuiniamur<sup>i</sup> wear Jesus timia nuna umikiar paskua nampertin yurumát<sup>ni</sup>un iwiararmiayi.

<sup>20</sup>Tura kashi ajasá<sup>i</sup> Jesus ni tuse (12) unuiniamur<sup>i</sup>jaj<sup>i</sup> misanam yurumuk pujumiayi. <sup>21</sup>Nu<sup>í</sup> yurumá<sup>ni</sup>ia<sup>i</sup> Jesus tiarmiayi “Nekasan tájarme, átum pujarmena juyá chikichik Winia surutkattawai.”

<sup>22</sup>Nuna takui ti kúntuts enentáimprar mai aní awajiar<sup>mi</sup>ayi “Uuntá, ¿wiáshitiaj?”

<sup>23</sup>Mai tu awajenam Jesus tiarmiayi “Wi nú pini<sup>n</sup>numan<sup>n</sup> jimiartukan yuajna ju Winia surutkattawai. <sup>24</sup>Wi Aents Ajasu asan Yus Chicham tana nujaj<sup>i</sup> métek túrunattajai. Tú<sup>r</sup>asha shuar Winia surutkattana nuka ti asutniátin asa akiinmainchu ajakuiti” tímiayi.

<sup>25</sup>Nuyá Jútas suruktaj tana nu Nin tímiayi “Uuntá nuikia ¿wiáshitiaj?” Takui Jesus tímiayi “Ee, nekas ámetme.”

<sup>26</sup>Tura yurumuk puju<sup>ni</sup>ia<sup>i</sup> Jesus yurumkan achik Yúsan yumi<sup>n</sup>samiayi. Tura puur ni unuiniamur<sup>i</sup>n su<sup>ni</sup>ia<sup>k</sup> tímiayi “Ju<sup>í</sup> yuatarum. Ju<sup>í</sup>ka winia ayashruiti.” <sup>27</sup>Nuyá pini<sup>n</sup>kian achik Yúsan yumi<sup>n</sup>samiayi. Tura su<sup>ni</sup>ia<sup>k</sup> tiarmiayi “Ju<sup>í</sup>sha ashí umartarum. <sup>28</sup>Ju<sup>í</sup>ka winia numparuiti. Tura winia numpar puármatai, yamaram chicham nekas uminkiat<sup>ta</sup>wai tawai. Tura puármatai untsur<sup>i</sup> shuara tunaar<sup>i</sup>n tsan<sup>k</sup>urattawai. <sup>29</sup>Tura ataksha átum Yus akupea nu<sup>í</sup> jeatsrum<sup>n</sup>i<sup>n</sup> ju<sup>í</sup> uwa yumir<sup>i</sup>n umarchattajai. Tura tsawant jeam<sup>ta</sup>i atumjaj<sup>i</sup> Yus akupeana nu<sup>í</sup> yamarman umartatjaj<sup>i</sup>” tímiayi Jesus.

**Pítur natsantratniaua nuna Jesus ujakmiayi**  
(*Mar. 14.26-31; Ruk. 22.31-34; Juan 13.36-38*)

<sup>30</sup>Yús-kantan kantamáwar umikiar Uriwiu ná<sup>ni</sup>nium wear<sup>mi</sup>ayi. <sup>31</sup>Nu<sup>í</sup> Jesus tímiayi “Ju<sup>í</sup> kashi átum Winia ashí natsantrurtat<sup>r</sup>ume. Kame Yus-Papinium áarmaiti “Murikiu wá<sup>ni</sup>nium mantuattajai túram murik pisarartatui.” Tu áarmaiti. <sup>32</sup>Tura nantakin Kariréa nun<sup>k</sup>anam Wi émkattajai átum wéatsrumin.”

<sup>33</sup>Takui Pítur tímiayi “Chíkich natsantramainakuisha wikia túrashtatjaj<sup>i</sup>.”

<sup>34</sup>Tutai Jesus tímiayi “Nekasan tájame, ju<sup>í</sup> kashi atash shiniatsaj<sup>i</sup>n menaintiú natsantrurtatme.”

<sup>35</sup>Pítur tímiayi “Maa, Ámijaj<sup>i</sup> métek mántu<sup>ni</sup>ia<sup>k</sup>kuisha pen<sup>k</sup>esha natsantrashtatjame.” Ashí ni unuiniamur<sup>i</sup> nú<sup>n</sup>isan<sup>n</sup> tiarmiayi.

**Jesus Jitsemaní ajanam Yúsan áuj<sup>s</sup>amiania nu**  
(*Mar. 14.32-42; Ruk. 22.39-46*)

<sup>36</sup>Nuyá Jesus ni unuiniamur<sup>i</sup>jaj<sup>i</sup> Jitsemaní náartin ajanam jeá tímiayi “Ju<sup>í</sup> pujusrum ná<sup>k</sup>arsatarum. Aranta a<sup>i</sup> wena Yúsan áuj<sup>s</sup>atjaj<sup>i</sup>.”

<sup>37</sup>Tinia Pítruncha tura mai Sepetéu uchirí jukí wémiayi. Nuisha ti kúntuts enentáimiuk wake mesekmiayi. <sup>38</sup>Nuyá Jesus tímiayi “Ti kúntuts jakamnia enentáimjai. Atumsha juí pujusrum Wijiaí métek iwiáa pujutarum.” <sup>39</sup>Tinia Jesus arantach we nuí tikishmar tsuntsuma Yúsan áujeak tímiayi “Winia Aparú, Wi túrunatniua nu nusháa iwiamniaitkiuinjia ju wáitsatniua nu tsankatrukaip. Tura Wi wakeraj núniska áchatí antsu Ame wakeram núnis atí” áujuk tímiayi.

<sup>40</sup>Nuyá ni menaintiu unuiniamurí pujuiniamunam waketki kanúu pujuinian jeariar Pítrun tímiayi “Átumka chikichik úraksha Wijiaí iwiáa pujutin çtujinkiarnek? <sup>41</sup>Iwiáa pujusrum Yus áujsatarum. Tunáa nupettamkairap. Enentáimin ti wakeriniaitruime túrasha ayashim pimpiruiti.”

<sup>42</sup>Tinia ataksha we Yúsan áujeak tímiayi “Winia Aparú, Wi imiá nekasan wáitsatniuitkiuinjia nuíjia Ame wakeramna nu atí.” Tu áujsamiayi.

<sup>43</sup>Nuyá ataksha taa ni menaintiu unuiniamurí tarimiayi. Tura kari ti nupeteam ataksha kanúu pujuarmiayi. <sup>44</sup>Túmainiakui nin ikiukin ataksha áujmia núnisan Yúsan áujsataj tusa waketkimiayi. <sup>45</sup>Áujas umik ni unuiniamurí pujamunman wémiayi. Tura tiarmiayi “Antsu yamaikia kanarum ayampratarum. Ura jeayi. Wi Aents Ajasu ain, tunaarintin shuarum surunkatin jeayi. <sup>46</sup>Wari nantaktiarum. Wéartai. Súrutna nu winiawai” tímiayi.

#### Jesusan achikiarmiania nu

(*Mar. 14.43-50; Ruk. 22.47-53; Juan 18.2-11*)

<sup>47</sup>Jesus tu chichai Jútas támiayi. Nusha ni unuiniamuríyayi. Nujajsha untsurí shuar puniajajsha tura numijajajsha winiarmiayi. Nu shuaran Israer-patri uuntrijsa Israer-shuara úuntrijsa akupka ármiayi. <sup>48</sup>Jútas, Jesusan sura, tuke Jesusaj jeatsuk nu shuaran tiarmiayi “Wi miniakkan mukunattajna núiti. Nu achiktaram.” <sup>49</sup>Nu asantai Jesusan tarí “Winiajai Uuntá” tinia mukunamiayi.

<sup>50</sup>Takui Jesus tímiayi “Amikrú, çwarí winitiam?” Nuyá achikiar Jesusan júkiarmiayi.

<sup>51</sup>Nu chikichik Jesusa tsaníakmarí ni puniarin ukuiniak shuara kuishin tsupirkamiayi. Nu shuarsha Israer-patri uuntri takarniuriyayi. <sup>52</sup>Túramtai Jesus tímiayi “Puniarum enkeata. Ashí puniajaj máanainia nusha puniajaj mantamnashtatuak. <sup>53</sup>Wi wakeraknaka winia Aparun timiá untsurí suntarin seakui páchitsuk akupturkainti. çNu nékatsmek? <sup>54</sup>Tura nuna túramtainjia Yus-Chichamnum tana nu uminkiaichainti” tímiayi.

<sup>55</sup>Nuna tinia Jesus nu shuaran tiarmiayi “Átum kasá achiktaj tawa nútiksarum puniajajsha numijajajsha tarutniurme. Kame ashí tsawantai

Yusa Jeen atumjaj̄ pujusan Yus-Chichaman etsermiajaj̄. Nūisha achirkachmarme. <sup>56</sup>Antsu yamaikia yaunchu Yúsnan etserin áararmia nu umínkiatí tusarum jútikrarme.” Tu tímiayi Jesus.

Nuyá ni unuiniamurí Jesusan Níniak ikiuiniak pisararmiayi.

**Israer-patri uuntrīin Jesusan júkiarmiania nu**

*(Mar. 14.63-65; Ruk. 22.54-55, 63-71; Juan 18.12-14, 19-24)*

<sup>57</sup>Shuar Jesusan achikiarmia nusha Kaipiasaj̄ júkiarmiayi. Nusha Israer-patri uuntrīiyayi. Nūisha Israer-shuara jintinniurisha Israer-shuara uuntrī armia nusha irunar matsamarmiayi. <sup>58</sup>Tura Pítiur árantak Jesusan nemarkin uuntrī jeen aari jeamiayi. Tura suntarjaj̄ tsanin̄ pujusmiayi Jesusan itiurkartin̄ tusa.

<sup>59</sup>Tura Israer-patri úuntrīsha Israer-shuara úuntrīsha tura ashí naamka uunt armia nusha Jesusan wait-chichamjaj̄ súmamtikiatai tusar áujmatarmiayi. <sup>60</sup>Untsurí shuar ántar tsanumpruiniakuisha máatin chichaman nekaracharmiayi. Nuyá jimiará shuar tsanumpruiniak <sup>61</sup>tiarmiayi “Jū áishman̄ chichaak “Yusa Uunt Jeen yumpuuran ataksha menaintiú tsawantin jeamminiatjaj̄,” tu chichamai” tiarmiayi.

<sup>62</sup>Nuyá Israer-patri uuntrī wajaki Jesusan tímiayi “¿Áimsumek. Turamainia nusha anturmammek?” <sup>63</sup>Túrasha Jesus tuke áimchamiayi. Túmakuí Israer-patri uuntrī chicharuk “Nekas iwiaaku Yusa náarīin tájame nekasa nu táchakminkia Yus írmastatui. ¿Ame Krístukaitiam. Yusa Uchirínkaitiam? Paant etsérkatá” tímiayi.

<sup>64</sup>Tutai Jesus tímiayi “Ee, ame támena núitjaj̄. Tura ataksha atumin tájarme, wi Aents Ajasu asan ti kakaram Yusa untsuurin̄ pujaj̄ wáitkiáttarme. Tura yuran̄miniam winiaisha wáitkiáttarme” tímiayi.

<sup>65</sup>Nuyá Patri uuntrī nuna antuk ti kajek ni pushirí jaak tímiayi “Jū áishman̄ ni chichamejaj̄ Yúsán nekas yajauch chicharniuiti. Nuyásha ¿warí atumaj̄? Atumsha Yúsán yajauch chicharu antukcharumek. <sup>66</sup>¿Waritia enentáimprum?”

Tutai “Sumamayi. Mantamnati” tiarmiayi. <sup>67</sup>Tiar usukiawarmiayi yapiniam. Tura awattiararmiayi.

Chikichcha yapiniam awati wishikiainiak tiarmiayi <sup>68</sup>“Ame Krístuchukaitiam. ¿Ya awattama? Íitsuk nekaata.” Tu chichariarmiayi.

**Pítiur Jesusan natsantramiania nu**

*(Mar. 14.66-72; Ruk. 22.56-62; Juan 18.15-18, 25-27)*

<sup>69</sup>Nu túmain̄ Pítiur aā pujaj̄ nuwá chikichik jeari tímiayi “Amesha jū Kariréanmayá Jesus tutajijaj̄ wekaichamkam.”

<sup>70</sup>Tutai Pítiur ashí ántuiniamunam tímiayi “Nékatsjai. ¿Warittsuk chichaam?”

<sup>71</sup>Nuna tinia jíinkitaj̄ tusa wéaj̄ chíkich shuar wáiniak nūj̄ pujuinian tiarmiayi “Aū áishmansha Nasarénumiá Jesusjaj̄ wekainiuiti.”

<sup>72</sup>Tutai Pítiur ataksha tímiayi “Nekasan tájarme, ju áishmankan penké nékatsjai.”

<sup>73</sup>Árusan nuj pujuarmia nu Pítrun tariar tiarmiayi “Nekas amesha aujai wekaimiame. Warí, chichammijajai páantaiti.”

<sup>74</sup>Tutai Pítiur “nekas Yus írui” taku tímiayi “Nu áishmankan penké nékatsjai.” Nuna taj atash shiniukmiayi. <sup>75</sup>Túramtai Pítiur Jesus nuik tímia nuna enentáimpramiayi. “Atash shiniatsajin menaintiú natsantrurtatme” tímiayi Jesus. Pítiur nuna enentáimiar jiinki we ti útmiayi.

**Piratuí Jesusan júkiarmiania nu**  
(*Mar. 15.1; Ruk. 23.1-2; Juan 18.28-32*)

**27** <sup>1</sup>Kashin tsawarmatai Israer-patri uuntrisha Israer-shuara úuntrisha Jesus maatai tiarmiayi. <sup>2</sup>Tiar Jesusan jinikiawar apachi uuntrin Punsiu Piratuí júkiarmiayi.

**Jútas máamamiania nu**

<sup>3</sup>Jútas Jesusan suruk tura máatai tuńnian antuk enentáimiar trainta kuńtian Israer-patri uuntrincha Israer-shuara úuntrincha awantukiarmiayi. <sup>4</sup>Tura tímiayi “Nu áishman tunaarinnan máatarum tusan surukan wi sumamajai.”

Takui tiarmiayi “Nusha íjijajisha warí urukatin. Nuka amek íischatniukaitiam.” <sup>5</sup>Tinia Jútas nuj Yusa Uunt Jee kuńtian utsan ikiuak nuyá we kajempramiayi. <sup>6</sup>Nuyá Israer-patri uuntri nu kuńtian júukar tiarmiayi “Ju kuit shuar sumakma asamtai Yusa kuńtrijajai irurchamniaiti.” <sup>7</sup>Tura nuamtak áujmatsar “nunka sumaktai” tiar Nuwe Najantai nunkan sumakarmiayi yajaya shuar nuj iwiarsatniun. <sup>8</sup>Shuar sumakma kuitjai sumakma asamtai yamaisha Numpá Nunka tuke tuńniawai. <sup>9-10</sup>Nujaj yaunchu Yúsnan etserin Jeremías timia nu uminkiamiayi:

“Uunt Yus turutmia núnisan túrawarmiayi. Israer-shuar trainta kuńtian seawarmatai nuna akantrar nujaj Nuwe Najantai nunkan sumakarmiayi.” Tu áarmiayi.

**Piratu Jesusan aniasmiania nu**  
(*Mar. 15.2-5; Ruk. 23.3-5; Juan 18.33-38*)

<sup>11</sup>Jesusan apachi úuntriin ejeniarmatai nii aniasmiai “¿Nekasmek Israer-shuara uunt akupniurintiam?”

Tutai Jesus “Ame támena núitjai” tímiayi.

<sup>12</sup>Nuyá Israer-patri úuntrisha Israer-shuara úuntrisha súmamtikia Jesus pachischamiayi. <sup>13</sup>Nuyá Piratu tímiayi “Ashí yajauch chichartamainia nu ¿anturmammek?” <sup>14</sup>Tútaisha Jesus penké áimkiachmiayi. Túmakui akupin ti enentáimiar títinian nekaachmiayi.

**Piratu Jesusan “mantamnati” tímiania nu**  
(*Mar. 15.6-20; Ruk. 23.13-25; Juan 18.39–19.16*)

<sup>15</sup>Jísat tsawantin apachi uuntri Israer-shuar shiir enentáimprarat tusa sepunam enketun shuar wakeramun jiki ankant akupniuyayi. <sup>16</sup>Nu sepunam tunáa shuar Parapás náartin pujumiayi. Ashí shuar nékarmiayi. <sup>17</sup>Tuma asantai Piratu Israer-shuar iruntrarun aniasmiayi “¿Yana ankant akupkat tusarum wakerarum. Parapásnak akupkattaj; Kristu tutai Jesusnak akupkattaj?” tímiayi. <sup>18</sup>Kame Israer-shuar ántar kajerainiak ni itiarman nekaamiayi.

<sup>19</sup>Tura Piratu nuna inintrak pujai ni nuarí chichaman akuptukmiayi. “Ju péñker áishman súmamtikiatniujai pachiinkiaip. Mesekranam nii áitkiatniun nekaan wáitsan tsawarjai” tímiayi.

<sup>20</sup>Túrasha Israer-patri úuntri sha Israer-shuara úuntri sha “Parapás ankant wetí, tura Jesus mantamnati” titiarum tusar shuáran akatrarmiayi. <sup>21</sup>Apachi akupniuri ataksha aniasarmiayi “Ju jimiará áentsun ¿yana ankant akupkat tusarum wakerarum?”

Tutai “Parapás” tiarmiayi.

<sup>22</sup>Tutai aniasarmiayi “Jesusnasha. Yusa Anaikiamuri Kristu tuinia nunasha, ¿itiúrkáttaja?”

Tutai ashí “Krúsnum máatá” tiarmiayi.

<sup>23</sup>Tuíniaikui Piratu tiarmiayi “¿Warí yajauchinia túrait?”

Tutai kakantar untsukum “Krúsnum máatá” tiarmiayi.

<sup>24</sup>Tura Piratu Jesus uwentikrachminiaitkiui antsu ashí shuar charaatum ajainiakui entsa uturtitiarum tusa seamiai. Tura ashí íimiainia in ikijmiak tímiayi “Ju péñker áishman máatniunam wikia pachiintsujai. Antsu atumek íistarum.”

<sup>25</sup>Tutai ashí shuar tiarmiayi “Iik ii shuarijijai ju áishman máatin íistaji.”

<sup>26</sup>Nuyá Piratu Parapásan ankant akupkamiayi. Tura Jesus asutiárum krúsnum máatárum tusa akupkamiayi. <sup>27</sup>Nuyá akupin pujutai jeanam akupniu suntari Jesusan júkiar ashí suntaraim irunturarmiayi. <sup>28</sup>Tura pushiri áitkiar akupin entsatain kapaaku pushin áentsrarmiayi. <sup>29</sup>Múuknúmsha tawaspan janke najanamun etsemtikiarmiayi. Tura karisun akupniu numiria áaniun untsuurin ataksarmiayi. Túrawar wishikiainiak tikishmatrar tiarmiayi “Israer-shuara uunt akupniurinne.” <sup>30</sup>Tiar usukiarmiayi. Tura karisun jurukiar múuknum awatiarmiayi. <sup>31</sup>Tura núkap wishikrar kapaaku pushin áitkiar ni pushirin áentsrarmiayi. Nuyá krúsnum maatai tusar júkiarmiayi.

**Jesusan krúsnum máawarmiania nu**  
(*Mar. 15.21-32; Ruk. 23.26-43; Juan 19.17-27*)

<sup>32</sup>Jesusan júki wésar Serini nunkanmayá shuaran, ni naari Semun, Jesusa krúsrin jurukit tusar achikiarmiayi. <sup>33</sup>Nuyá Kúrkutanam ejeniarmiayi. Kúrkutaka,



shuar chichamjainkia, muuka ukunch tútainti. <sup>34</sup>Nui Jesusan umutai yapájai pachimpra najanamun áartaj tusar súsarmiayi. Tura Jesus apas iis umarchamiayi.

<sup>35</sup>Krúsnum ajintrurar suntar yáki Jesusa pushirín jukit tusar nakurusar awakmakua nuna súsarmiayi. Nújainkia yaunchu Yúsnan etserin áarmia nu uminkiamiayi:

“Winia entsarmarun akantrarmiayi tura nakurusar awakmakua nuna winia pushirun súsarmiayi.” Tu áarmiayi.

<sup>36</sup>Nuyá wáinkiatái tusar pujursarmiayi. <sup>37</sup>Tura urukamtai máamuit ashí aents nekaawarti tusa áarman muuknumaani anujtukarmiayi. *JUITI JESUS, ISRAERA UUNT AKUPNIURI*

Tu áarmauyayi.

<sup>38</sup>Núnisan Nijijai métek jimiará kasa chikichkin untsuurnumani tura chikichnasha menaanmani krúsnum máawarmiayi. <sup>39</sup>Shuar nui nankaamainiak muuke peatar wishikiainiak <sup>40</sup>tiarmiayi “Ame Yusa Uunt Jee sáakim menaintiú tsawantin jeamtatjai tichakaitiam. Nekas Yusa Uchirínkiumka krúsnumiá akaikim uwemprata” tiarmiayi.

<sup>41</sup>Núnisan Israer-patri úuntrisha, Israer-shuara jintinniurisha, Pariséusha, Israer-shuara úuntrisha, Jesusan wishikiainiak nuamtak tiarmiayi <sup>42</sup>“Chikichnaka uwemtikrati tura Nínkikia uwemtsui. Israera Uunt Akupniuríntkiumka krúsnumiá akaikimtai nekas enentáimtustatji. <sup>43</sup>“Yúsán nekas enentáimtiniaitjai” tawai. Wátsek, Yus nekas Nin aneakka uwemtikrati. “Wi Yusa Uchiríntjai” turamchamkaj” tiarmiayi. <sup>44</sup>Kasá shuarsha Nijijai ajintruamu armia nusha Nin wishikrarmiayi.

### Jesusa jakamuri

(*Mar. 15.33-41; Ruk. 23.44-49; Juan 19.28-30*)

<sup>45</sup>Nuyá tutupin ai tee ajasmiai. Túrunayat ataksha aanku tsáapin ajasmiai. <sup>46</sup>Nuni ai Jesus kakantar untsuunkamiayi. “Erí, Erí, rama sapaktani” tímiayi. Nusha shuar chichamjainkia “Yusrú, Yusrú, ¿urukamtai ajapa ikiurkiniam?” tawai. <sup>47</sup>Shuar nui wajarmia nusha nuna enentáimtsuk antukar tiarmiayi “Yaunchu Yúsnan etserniun Eríasan untsuawai.” <sup>48</sup>Tura chikichik tsékenki we uruchin itiamiayi. Tura churuinian ajamper sapapjai jjiú mukunati tusa susamiayi. <sup>49</sup>Tura chikichcha wishikeak tiarmiayi “Iniáísatá, Erías tarí uwemtikratpiash.”

<sup>50</sup>Jesus ataksha kakantar untsamak nuyá jakamiayi. <sup>51</sup>Nu chichamaik Yusa Uunt Jee tarach ajamu yakiiniya achik nunkaani tseu jaanakmiayi. Nunkasha úurkamiayi. Kayasha jakukarmiayi. <sup>52</sup>Núnisan iwiansamusha uraniarmatai untsurí Yus-shuar jákarusha nantakiarmiayi. <sup>53</sup>Nusha emka Jesus nantakmiatai niisha nantakiar iwiansamun ikiukiar Yusa péprurín Jerusarénum wayawarmatai untsurí shuar wáinkiararmiayi.

<sup>54</sup>Nuyá suntar Jesusan wáinkiaromia nusha tura ni kapitiantrisha nunka úurkamtai nuyá chikichcha ashammai ajasmatai ti sapijmiakarmiayi. Tura tiarmiayi “Ju áishman nekas Yusa Uchirínti.”

<sup>55</sup>Nuḡsha nuwá Jesusan nemariarmia nu, arant wajasar, ii wajaarmiayi. Nusha Kariréanmayá pataatukiari Jesusan yainki ejeniarmiayi. <sup>56</sup>Nuḡai Máktaranmayá Marisha, Sepetéu nuwésha, tura chíkich Marisha ármiai. Chíkich Marikia Jakupuncha tura Jusenchá nukuríyayi.

#### Jesus iwiarsamu

(*Mar. 15.42-47; Ruk. 23.50-56; Juan 19.38-42*)

<sup>57</sup>Kiarai shuar ti kuḡrintin Arimatéu péprunmayá ni naari Jusé támiayi. Nusha Jesusan enentáimtinuiyayi. <sup>58</sup>Nii Piratui we Jesusa ayashin seamiayi. Nin súsarat tusa Piratu akupkamiayi. <sup>59</sup>Túram Jusé Jesusa ayashin krusnumiá jusa ti pénker tarachjai penuarmiayi. <sup>60</sup>Tura kaya wáá táurmanum yamaram amia nuḡ iwiarsamiayi. Ni iwiarsatin táumtikramunam Jusé iwiarsamiayi. Iwiaras kaya uuntjai etektuk ikuak wémiayi. <sup>61</sup>Nuḡsha Máktaranmayá Marísha tura chíkich Marísha iwiarsamunam naka ii pujuarmiayi.

#### Jesus iwiarsamun suntar wáinkiarmania nu

<sup>62</sup>Nú kíaraḡin ayampratin tsawantna mash iwiarnakui Israer-patri úuntriḡsha Pariséusha Piratui wearmiayi. <sup>63</sup>Tura tiarmiayi “Uuntá, nu wáitrin áishman iwiaaku pujus “Menaintiú tsawant jakan nantaktiatjai” tñiuyi. <sup>64</sup>Nu asamtai iwiarsamunam menaintiu tsawant suntar wáinkiarat tusa akuptukta. Ni unuiniamuri kashi tariar tura ni ayashin kasamkar “Pai, nantakni” shuáran tiaraḡin. Jujaiḡkia nuna nanḡkaamas shuáran ananḡkawatinti” tiarmiayi.

<sup>65</sup>Tutai Piratu tiarmiayi “Nuḡ suntar takakrume. Werum iwiarsamu urakchamnia pénker wáinkiatárum.” <sup>66</sup>Tutai wear iwiarsamun urankashti tusar etektukma inḡkiunmanum serajai yakarar ni áarmarin anujtukarmiayi. Tura suntarnasha awajtukarmiayi.

#### Jesusa nantakmiari

(*Mar. 16.1-8; Ruk. 24.1-12; Juan 20.1-10*)

**28** <sup>1</sup>Ayampratin tsawant nanḡkaasmatai tumiḡtin yama tsawaana ai Máktaranmayá Marisha chíkich Mariḡjai iwiarsamu iyutai tusar wearmiayi. <sup>2</sup>Tumai Yusa suntari nayaimpinmayá iwiarsamun tari kaya atutkamun urak nuḡ pujusmiayi. Túmakui nunḡka ti úurkamiayi. <sup>3</sup>Yusa suntariḡsha peemia tímiatrus wínchauyayi. Pushirisha ti puju áuyayi. <sup>4</sup>Tura iwiarsamun wáiniarmia nú suntarsha nuna wáinkiar ashamainiak ti kuranḡkarmiayi. Jaká áinis ajasarmiayi.

<sup>5</sup>Nuyá nayaimpinmayá suntar nuwan tímiayi “Ashamkairap. Jesus krúsnum máawarmia nu eátsrumek. <sup>6</sup>Juḡḡkia pujatsui. Nii timia núnisan nantakniuiti. Pai, áepsarma nu ítiarum. <sup>7</sup>Wárik wérum ni unuiniamuri “Jesus jakamunmayá nantakni tura wari Kariréanam wétatui. Nuḡ

werirum wáinkíáttarme” titiarum. Wats, nunak tájai” tímiayi. <sup>8</sup>Tutai nu nuwá iwíarsamunmayá wárik jíinkiar ashamainiyat ti warasar tseke waketkiarmiayi ni unuiniamurín ujaktai tusar. <sup>9</sup>Tumaj Jesus wantintiukarmiayi. Tura “pujarmek” takui Jesusan tariar tikishmatrar nawencha miniakrusar shiir awajsarmiyai. <sup>10</sup>Túram Jesus tiarmiayi “Ashamprukairap. Werum winia yatsur ujatruktarum. Kariréanam weartí. Nuí wear wáitkiartatui. Tu ujaktarum” tímiayi.

### Suntar etserkarmiania nu

<sup>11</sup>Nuwá wéarmatai iwíarsamu wáinin suntarsha péprunam wéar Israer-patri úuntrín ashí túrunamun ujakarmiayi. <sup>12</sup>Niisha nuna antukar Israer-shuara úuntriñjají áujmatsatai tusar wearmiayi. Áujmatsar suntaran ti kuít akikiar <sup>13</sup>tiarmiayi “Atumsha étserkuram “Kashi kanararin ni unuiniamurí taar Jesusa ayáshin kasamkarmai” titiarum. <sup>14</sup>Tura akupin átum kanarman nekamtaisha niñjají ii iwíarattaji atumin yajauch awajtamsajín tusar” tiarmiayi.

<sup>15</sup>Nuyá suntarsha kuítian achikiar tiarmia nuna tímiatrusan titiái tusar wéarmiyai. Tura tuke yamaisha Israer-shuar tu túrunaiti tuíniawai.

### Jesus ni unuiniamurín akatar akupkamiania nu (Mar. 16.14-18; Ruk. 24.36-49; Juan 20.19-23)

<sup>16</sup>Nuyá ni auntse (11) unuiniamurí Kariréanam wéarmiyai. Tura Jesus timia nú nainnium jeawar <sup>17</sup>nuí Jesusan wáinkiar tikishmatrararmiayi. Kame chíkichka Jesusashit tuíniayat Nin wáinkiar tikishmatrararmiayi. <sup>18</sup>Nuyá Jesus tíjiuch tantá tímiayi “Ashí nayaimpinmasha nunñkasha akupkatniun kakarman surusuiti. <sup>19</sup>Tuma asamtai ashí nunñkanam werum ashí shuar jintintiarum Wíi shuar awajsatarum. Túrarum Yus Apa náarñjají, Yus Uchi náarñjají, tura Yus Wakani náarñjají imiaitiarum. <sup>20</sup>Ashí atumin Wi akatramajrum nu nútiksarmek umiktin unuiniantarum. Tura ju nekaatarum: Tuke tsawantají ikiutsuk atumñjají pujuttajai” tímiayi Jesus.

# Yúsan Shiir Chichamen

## MÁRKUS

### aarmia nu

---

#### Imiakratin Juan̄ka etserkamur̄i

(Mat. 3.1-12; Ruk. 3.1-9, 15-17; Juan̄ 1.19-28)

**1** <sup>1</sup>Jūi Jesukristunu shiir chicham nán̄kameawai. Jesukristu Yusa Uchir̄nti. <sup>2</sup>Yuska imiakratin Juan̄kan pachis ni etserniur̄in Isayasan ti yaunchu ni Papir̄in̄ juna áamtikramiayi:

“Tisiana, ame wéamur̄m̄in emka wetí tusan winia akatramurun akupeajai. Niisha ame jintimin iwiarattawai. <sup>3</sup>Niisha aents atsamunam untsumuk juna títiatui: “Uunta jint̄i iwiarturtarum; naka awajsatarum.”

Nuke áarmaiti.

<sup>4</sup>Wats, aents atsamunam imiakratin Juan̄ imiaittsa pujus étseruk, ““tunaarun Yus asakatrurat” tusarum, enentáim yapaj̄iarum imiantiarum” tímiayi. <sup>5</sup>Anturkatai tusar ashí Jut̄ia nun̄kanmaya shuar tura Jerusarén peprunmaya shuarsha Nīin̄ tariarmiayi. Taar, ni tunaar̄in̄ ujakarmatai, Juan̄ Jurtañ̄ entsanam imiainiarmiayi.

<sup>6</sup>Juan̄sha kamiriu ur̄e najantramun entsauyayi. Emenmamkesha nuapeyayi. Tura chinij̄iai yutai-títikriatsnasha yuuyayi. <sup>7</sup>Niisha áentsun ujaak tímiayi “W̄ij̄iāinkia nan̄kaamas ana nu winia ukurūi winittiawai. Niisha nekas ii Uuntri asamtai, wikia tsuntsumpruan ni sapatr̄i jin̄kiamur̄inkisha atitrachminiaitjai.

<sup>8</sup>Wikia entsaj̄ain̄ aya ayashmin imiaajrume, antsu Nīnkia imiantinia áanis Yusa Wakanī atumi enentáin̄ en̄ketramprattarme” tímiayi.

#### Juan̄ Jesusan imiaimiania nu

(Mat. 3.13-17; Ruk. 3.21-22)

<sup>9</sup>Juan̄ áentsun imiak pujurainiāi, Jesuska Nasarét pepru Kariréa nun̄kanam ana nuyá jiinki Juan̄kan tarimiayi. Tura Juan̄ Jurtañ̄

entsanam Jesusan imiainiayi. <sup>10</sup>Nuín, Jesus entsayā jiiniuk, nayaimpin uranniun wáinkiamiayi. Tura Yusa Wakanín yámpitsa núnin najanar Níin taarun wáinkiamiayi. <sup>11</sup>Tura nayaimpinmayā chichaamun juna antukmiayi, “Ámeke winia aneamu Uchiruitme. Ámin shiir enentáimtajme.”

**Uunt iwianch Jesusan anankataj tímiania nu**

*(Mat. 4.1-11; Ruk. 4.1-13)*

<sup>12</sup>Nuyá wárik Yusa Wakaní Jesusan atsamunam jukimiayi. <sup>13</sup>Tura nuí, yajasma yujamunam, kuarenta tsawant pujumiayi. Nuí pujají uunt iwianch Satanás naartin Jesusan nekapsataj tusa pujurmiayi. Túramtai Jesusan wáinkiatái tusa nayaimpinmayā suntar tariarmiayi.

**Kariréa nunkanam ni takatrín Jesus nanakkammiania nu**

*(Mat. 4.12-17; Ruk. 4.14-15)*

<sup>14</sup>Ukunam, Juankan sepunam enkeawarmatai, Jesuska Kariréa nunkanam Yusa akupeamurín pachis shiir chichaman etserki támiayi. <sup>15</sup>“Tsawant jeayi. Shuarnum Yusa akupeamurí jeatemai. Tuma asamtai, yaunchu enentáimsamuram yapajíárum, Uwempratin Chicham umirkatarum” tu etserkamiayi.

**Jesus namakan achinian ni unuiniamurí ajasat tusa kuaru achikmiania nu**

*(Mat. 4.18-22; Ruk. 5.1-11)*

<sup>16</sup>Jesus Kariréa antumianka kánmatkariín wekas, namakan achinian Semunasha ni yachi Antresnasha nekan ajuntuk pujuinian wáinkiamiayi. <sup>17</sup>Wáiniak “Nemartustarum, tímiayi. Namak achiarmena nútiksanak áentsun-əau Yusna arti tusan awajsatjarme” tímiayi. <sup>18</sup>Tura nuyanka ni nekarín ajapa ikiuiniak Jesusan nemarsarmiai.

<sup>19</sup>Nuyasha Jesus ishichik arantach wesa, Sepetéu uchirín Jakupun ni yachín Juánasha kanunam ni nekarín apáa pujuinian wáinkiarmai. <sup>20</sup>Wáiniak, nemartusta tusa untsukarmiayi. Tutai ni aparíncha, ni aparí takarniuríncha kanunam ikiuiniak Jesusan nemarsarmiai.

**Jesus iwianchin áishmannumiá jiki akupkamiania nu**

*(Ruk. 4.31-37)*

<sup>21</sup>Nuyá Kapernáum péprunam jeawarmiayi. Nuí Israer-shuara ayampratin tsawantri jeakuí Jesus Israer-shuar iruntainiam wayá Yus-Chichaman unuiniamiayi. <sup>22</sup>Tura ni jintinniuri jintintiarimia nuna iniankas uunt chichamjai Jesus jintíakuí ni chichamen anturkar ti enentáimprarmiayi. <sup>23</sup>Nuisha nu iruntainiam áishman iwianchruko ámiayi. Niisha untsukum <sup>24</sup>“¿Warí itiurtamkattsamea incha taum,

Nasarénumiá Jesusa? Wikia nékajme. Ámetme Tunaartichu Yúsaiya winiamna nu. In emestamprataj tusam táchamek” tímiayi.

<sup>25</sup>Tutai, Jesus kakantar chicharuk “Takamátsatá. Ni enentáiya jíinkitia, tájame” tímiayi.

<sup>26</sup>Tutai íwianch áishman̄kan ukurak ajakniñkiar untsamak kakaar aa jíinkimiayi. <sup>27</sup>Nuna wáinkiar, ashamkar nuámtak aniniaisarmiayi. “¿Ausha warinkit. Yamaram chicham warí chichamait? Ju Jesuska timiá kakaram asa ímia iwianchin akupeatsuk. Iisiana umirainiatsuk” tiarmiayi. <sup>28</sup>Tura ti wárik nu túrunamu ashí Kariréa nun̄kanam antunkamiayi.

### **Jesus Semunka tsatsariñ tsuármiania nu**

*(Mat. 8.14-15; Ruk. 4.38-39)*

<sup>29</sup>Nuyá Israer-shuara iruntai jeeniá jíinki Jesuska Jakupujai Juanjajisha we, Semun̄ ni yachi Antresjai pujuarimia nui jeawarmiayi. <sup>30</sup>Semunka tsatsariñ tsuer peaknum jaa tepemiayi. Núnaka wárik Jesusan ujakarmiayi. <sup>31</sup>Nuñkia Jesus werí uwejn̄um achik iniantkimiayi. Tura nu chichamaik michatramiayi. Michatar, péñker ajas, Jesusnasha ni nemarniuríncha ayurawarmiayi.

### **Untsurí jaan Jesus péñker awajsarmiania nu**

*(Mat. 8.16-17; Ruk. 4.40-41)*

<sup>32</sup>Nu tsawantai kiarai, ashí jáinian, iwianchrukuncha Jesusan itiararmiayi. <sup>33</sup>Tura ashí nú péprunmaya shuar taar wáitiniam Jesusan káutkarmiayi. <sup>34</sup>Untsurí shuáran chíkich sun̄kuraim jáinian Jesus tsuararmiayi. Tura iwianchruku armia nuna enentáiyān iwianchin jíirkiarmiayi. Jesuska íwianch nékamu asa, winia náarun ántar pachisaraiñ tusa suritkiarmiayi.

### **Kariréa nun̄kanam Jesus Yus-Chichaman etserkamiania nu**

*(Ruk. 4.42-44)*

<sup>35</sup>Nuyá kashin káshik tsawaatsaiñ Jesus nantaki Yúsan áujсатаj tusa jíinki atsamunam wémiayi. <sup>36</sup>Tura Semun̄ ni amikrijjai Jesus wemaanum wéarmiayi. <sup>37</sup>Nin wáinkiar “Ashi shuar Ámin eátmainiawai” tiarmiayi.

<sup>38</sup>Tutai Jesus chichaak “Chíkich péprunmasha arantach wetai. Nui Yusa chichame etserkatai; nuna túrattsan táwitjai” tímiayi.

<sup>39</sup>Nuna ti ashí Kariréa nun̄kanam Israer-shuar iruntai jeanam etseras wekaimiayi; tura núnisan̄ iwianchniasha jíiki akupkini wekaimiayi.

### **Tunamaru shuaran Jesus tsuármiania nu**

*(Mat. 8.1-4; Ruk. 5.12-16)*

<sup>40</sup>Túramtai, ti tunamaru shuar Jesusan seatajtsa tarimiayi. Taa tikishmatar tímiayi “Wakerutakmekka tsuaratin tujintratsme.”

<sup>41</sup>Jesus nin waitnentak uwejejai antinmiayi. Antin “Wakerajme. Pénker ajasta” tímiayi. <sup>42</sup>Nu chichamaik, Jesus chichakmatai, ni sunkuri menkakamiayi. Tura pénker ajasmiai. <sup>43</sup>Túrunamtai Jesus kakantar chicharuk <sup>44</sup>akupeak “Wáinkiatá, nánkamsam etseraip, tímiayi. Antsu weme, Israer-patirmin iniakmamsata. Túram ashí aents ame pénker ajasmarumin nekaawarat tusam, Muisais aar akupkamiania nu umikiam súsatin ana nu susata” tímiayi. <sup>45</sup>Tura etserkaip támaitiat, jiinki ni túrunamurin mash etseramiayi. Tura nuna etserka asamtai, péprunam, aents írunmanum wétinian Jesus nakitramiayi, antsu aa atsamunam pujumiayi. Tura ashí nunkanmaya Jesusan tariarmiayi.

**Jesus emearun pénker awajsamiania nu**  
(*Mat. 9.1-8; Ruk. 5.17-26*)

**2** <sup>1</sup>Kapernáum péprunam Jesus ukunam ataksha wémiayi. Jeamtai, ni jeen pujan nekaawarmiayi. <sup>2</sup>Tuma asamtai shuar wárik ti untsurí káutkarmiayi. Ti untsurí asamtai, jea piakmiayi; wáitinmasha ankantchayayi. Jesuska Yus-Chichaman nu aentsun ujaak pujurmiayi. <sup>3</sup>Nuinkia ni amikrin emearun kuaru shuar tampumpuawar júkiar Jesusan itiararmiayi. <sup>4</sup>Tura jeawar, untsurí shuar írunu ásamtai jea wayatniun tujinkiarimiayi. Tuma ásar, yakinini wakar jea urakar, áankawar, tampunam ni amikrin Jesus pujamunam awaintiuawar itiararmiayi. <sup>5</sup>Tura niisha Jesus nekas tsuártatui tu enentáimmarin Jesus nekáa emearun chicharuk, “Uchirú, ame tunaarumka tsankuramuiti” tímiayi.

<sup>6</sup>Israer-shuara jintinniurisha nuna antúu pujuarmiayi. Tura ni enentáijjai enentáimsar, <sup>7</sup>“¿Jusha urukamtai emearun tu chichara? Yúsan imiá yajauch chicharui. Warí, yaki tunaan asakarminiait; aya Yúsak tunaan asakarchamniakait” tu enentáimsarmiayi.

<sup>8</sup>Jesuska ni enentáimmarin nekarawar “¿Urukamtia átum tu enentáimprum? tímiayi. <sup>9</sup>Emearu, tunaarum tsankuramuiti títinjai, emearu, wajakim tampuram entsakim wekasata títinjai ¿tuá imiá yúpichuchit? <sup>10</sup>Wats wi, Aents Ajasu asan Yusa kakarmarijjai shuara tunaari tsankuramniaitjiana nuna paant iwiaintiuktajrume” tímiayi. Nuna tinia emearun chicharuk <sup>11</sup>“Wajaktia, tájame; túram tampuram jukim jéemiin wetá” tímiayi. <sup>12</sup>Nu chichamaik emearu wajakí, tampurin jukí, ashí íimiainiajn jínkimiai.

Nuna túrunamtai ashí ashamkarmiayi. Tura “jútikiamu penké wáinchaitji” tiar Yusa náarin uunt awajsarmiayi.

**Jesus Riwin utsukmiania nu**  
(*Mat. 9.9-13; Ruk. 5.27-32*)

<sup>13</sup>Nuyá ukunam Jesus antumiannum waketkimiayi. Tura ashí shuar káunkarmatai jintintiawarmiayi. <sup>14</sup>Tura jintintiawar amuk, akupin

akitiai jeanam nan̄kaamak, Arpeu uchirin Riwin pujan wáinkiamiyai. Wáiniak “Nemartusta” tímiyai. Tutai Riwi wajakí Jesusan nemarsamiyai. <sup>15</sup>Chíkich tsawant, Riwisha Jesusan ni jeen itiaamiyai. Tura untsurí kuítian-juu shuarsha, yajauch shuarsha Jesusjái ni unuiniamurijjiaisha ashí nuim misanam pujuarmiai. <sup>16</sup>Tura kuítian-juu shuarsha yajauch shuarsha Jesusjái irunar yurumáinian wáinkiar, Pariséu jintinniurisha Israer-shuara jintinniurisha Jesusa unuiniamurin aniasarmiai. “¿Urukantai ame úntrum Jesus, kuítian-juu shuarjái tura yajauch shuarjaisha yuruma?” tiarmiayi.

<sup>17</sup>Jesus nuna antuk tímiyai “Jaachu shuar tsuákratniun atsumainiatsui. Antsu jaa ana nu tsuákratniun atsumainiawai. Wats, “pénkeraitjai” tuinia nú shuaran untsuktajtsan táchaitjai; antsu “tunaitjai” tuinia nú shuaran Winia ajasat tusan untsuktajtsan táwitjai” tímiyai.

**Yurumtsuk Yus áujsatniun Jesusan aniasarmiania nu**  
(*Mat. 9.14-17; Ruk. 5.33-39*)

<sup>18</sup>Juañka unuiniamurisha Pariséu unuiniamurisha yurumtsuk Yúsan áujiarmiayi. Túmakui chíkich shuar Jesusan tariar chicharainiak, “Juañka unuiniamurisha, Pariséu unuiniamurisha yurumtsuk Yúsan áujainiatsuk; ¿ame unuiniamurmeka urukantai yurumtsuk áujainiatsu?” tiarmiayi.

<sup>19</sup>Tutai Jesus chichaak, “¿Nuatma nampernum ipiaamu ainia nu ijiarmawartiniak ainia? Yama nuatu pujakui ni amikri warainiak ijiarmachartin ainiawai. Núnisan winia unuiniamur, Wi pujakui, warainiak yurumtsuk pujuschartin áiniawai. <sup>20</sup>Tura tsawant jeattawai, Winia jurukiartin. Nuiñkia winia unuiniamur ijiarmawartatui’ tímiyai Jesus.

<sup>21</sup>Tura nuyá juna tímiyai ‘Mamuru pushí jaanakmatai yamaram tarach anujtukchatniuiti. Túramka nijiam yamaram tarach sumpeak mamushan chiníkiá nuna nan̄kaamas jááktatui. <sup>22</sup>Nijiamanch yamáí nawar nuap najanamu arutnum yaraachminiaiti. Túramka wakaprua kariak nuap najanamu ijiakratniuiti. Tura nijiamanch ukarattawai. Nuap najanamu yajauch ajastatui. Antsu yamaram nijiamanch yamaram nuap najanamunam yaraatniuiti” tímiyai.

**Trikiu neren yuawarmiania nu**  
(*Mat. 12.1-8; Ruk. 6.1-5*)

<sup>23</sup>Chíkich ayampratin tsawantai Jesus ajanman ajapén nan̄kaamarmiai. Tura ni unuiniamuri trikiu neren majukiar wearmiayi. <sup>24</sup>Nuna wáinkiar Pariséu Jesusan chicharainiak “¿Warí, urukantai ame unuiniamuram ayampratin tsawant takastin surimkiamu aisha takainia?” tiarmiayi.



25Tutai Jesus tímiayi “Ii uuntri Tawitia túramuri Yús-Papinium áujsachukaitrum. Niisha ni nemarniurisha tsukamainiak, ni yurumkari atsakui, túrawarmia nu áujsachukaitrum. 26Apiatár Yusnan pujurniu uuntri pujai Uunt Tawit Yusa Jeen wayamiayi. Tura Tawitkia, patri nankaamas uunt asa, pátrichuitiat, iniaktusma tantan, aya patri yútainiak, yuamiayi; tura ni nemarniurincha ajamsamiayi. Nu áujsachukaitrum, tímiayi. 27Ayampratin tsawantai túrashtinian umirkashtimpiash tusa Yuska aentsun najanachmiayi. Antsu aents ayamprarat tusa Yus ayampratin tsawantan tesamiayi. 28Wisha, Aents Ajasu asan imia ayampratin tsawantan Nerenniurintjai” tímiayi.

### Uweje jakan Jesus tsuármiania nu

(Mat. 12.9-14; Ruk. 6.6-11)

**3** 1Ataksha chíkich tsawantai Israer-shuar iruntainiam Jesus wayamiayi. Nuí shuar ámiayi, ni uweje jaka. 2Tura tunáan túrayi titiai tusar wakeruiniak “ayampratin tsawantai tsuártimpiash” tusar, Pariséu shuarsha Jesusan ii pujuriarmiayi. 3Nuinkia Jesus uweje jaka shuaran chicharuk “Ajapén wajasta” tímiayi. 4Nuinkia mamikmaun chicharuk “¿Ayampratin tsawantai péñker túratin yajauch túratniujai tuá imiá péñkerait. Shuar uwemtikratin máatniujai tuá imiá péñkerait?” tímiayi.

Nuna takui niisha pachischarmiayi.

5Tura Jesus kajek nin fiyarmiayi; tura ni enentáin kátsuram ásarmatai kúntuts enentáimsamiayi. Tura shuáran chicharuk “Uwejem iniakmasta” tímiayi. Iniakmarmatai ni uweje jaruku ataksha péñker ajatsamiayi. 6Nuyá Pariséu shuar jíinkiar, Jesus maami tusar Erutis shuarjai áujmatsarmiayi.

### Untsurí shuar Jesusan káutkarmiania nu

7Nuyá Jesus ni unuiniamurijjai antumiannum wémiayi. Kariréa nunkanmayá untsurí shuarsha Jesusan nemariarmiayi. 8Untsurí nunkanmayasha káunkarmiayi. Jutía nunkanmayasha, Jerusarén péprunmayasha, Itiumiá nunkanmayasha, Jurtan entsa amainiasha, Tiru tura Setun pepru pujuinia nú nunkanmayasha, untsurí shuar ni túramurin nekaawar, Jesusan káutkarmiayi. 9Untsurí káunkar chanuntawarain tusa Jesus ni unuiniamurin kanuram inianáastarum tusa seamiayi. 10Kame untsurí shuaran Jesus nuik tsuaru asantai, jaa shuar nuí káunkarmiania nu Jesusan antintaj tusar shitianainiakui nuna seamiayi. 11Tura iwianchrukusha Jesusan wáinkiar tikishmatrarmiayi. Untsumainiak “Ame nekas Yusa Uchirínme” tiarmiayi. 12Tura nuna etserkairap tusa Jesuska kakantramiayi.

### Jesus tuse shuaran anaikiarmiania nu

(Mat. 10.1-4; Ruk. 6.12-16)

13Nuyá Jesus náinnium wakamiayi. Tura anaikiatniun wakerimia nú shuaran untzukmiayi. Tura niisha Jesusan weriarmiayi. 14Tura Niijjai

wekasar Yus-Chichaman unuiniartinian tuse shuáran anaikiarmiayi. <sup>15</sup>Tura sunkur tsuártinian, iwianchcha jiki akupkatniun ni kakarmarin súarmiayi nú shuaran. <sup>16</sup>Ju shuáran anaikiamu ármiai: Semun, Jesus chíkich naarin Pítiur apujtusmiania nu; <sup>17</sup>Sepetéu uchirí Jakupu, ni patai Juánsha; ipiamtajai métek kakaram ásar matai nuna mai “Puanérjis” naari susamiayi. Nusha shuar chichamjainkia “ipiamta nuke” tawai. <sup>18</sup>Nuyá Antressha, Jiripi, Parturumí, Mateu, Tumas, Arpeu uchirí Jakupu, Tateu, ásump Semun, <sup>19</sup>Jútas Iskariúti. Jesusan ukunam surukmia nú Jútasauyayi. Anaik amukmatai jeá waketrarmiayi.

**Yusa Wakanin yajauch chicharna nu**  
(*Mat. 12.22-32; Ruk. 11.14-23; 12.10*)

<sup>20</sup>Waketkiarmatai, ti untsurí shuar taarmatai takatri ti akui, yurumátiniun jeacharmiayi. <sup>21</sup>Jesusa shuárisa nuna nekaawar Jesus ti itirchat pujus wáurtsuash tu enentáimsar jukitiai tusar nu jeanam jeiararmiayi.

<sup>22</sup>Nuyá Israer-shuara jintinniuri Jerusarénumia táarmiania nu, Jesusan áujmatainiak “Pirsepú enkea asa iwianchrukuiti. Tuma asa uunt iwianchi kakarmarijiai iwianchin jiki akupeawai” tiarmiayi.

<sup>23</sup>Tutai Jesus winitiarum tusa nin untsukmiayi. Tura enentáimtikrataj tusa juna tímiayi: “¿Iwianch Satanáskesha itiu ajapmamatin?  
<sup>24</sup>Chikichik nú nunkanmaya shuar nuámtak kajernaiyakuinkia, nu nunka wari meserchattawak. <sup>25</sup>Nuámtak shuar ni shuarijiai kajernaiyakuinkia nu shuarsha amunaikchartatuak. <sup>26</sup>Núnisan ¿Satanáskesha ni suntarijiai máaniakka itiuak tuke pujusarat? Amunaikiartatui. <sup>27</sup>Nánkamas shuar kakaram shuara jeen wayá, nérenniun jinkiatsuk ni kuítrin kasarkachminiaiiti. Antsu nérenniun jinkiá ni kuítrin kasarkamniaiiti. <sup>28</sup>Nekas tájar me, shuar tunáa ashí túruiniana nuka tsankuramniaiiti. Winiasha winia Aparnasha yajauch áujmatusha tsankuramniaiiti. <sup>29</sup>Antsu Yusa Wakanin yajauch áujmatna nuka tsankurachminiaiiti; antsu nu shuar niniki tuke sumamattawai.” <sup>30</sup>“Jesuska iwianchrukuiti” tuíniakui Jesus nuní tímiayi.

**Jesusa yachi Jesusa nukurí**  
(*Mat. 12.46-50; Ruk. 5.19-21*)

<sup>31</sup>Nuyá ni yachi ni nukurijiai taar aa wajasar, Jesusan untsukat tusa akupkarmiayi. <sup>32</sup>Shuar Jesusan téntak pujuarmia nu tiarmiayi “Iis, nukusha, yatsumsha aa wajasar untsurmainiawai.”

<sup>33</sup>Tutai Jesus chichaak “Ya ainia winia nukursha yatsursha” tímiayi. <sup>34</sup>Nin téntakar pujuarmia nuna iis “Júiti winia nukurka, yatsurka, tímiayi. <sup>35</sup>Shuar Yusa wakeramurin uminiana nu winia yatsuruiti, winia umaruiti, winia nukuruiti” tímiayi.

**Atsaamin atsaampramiania nu**  
(*Mat. 13.1-9; Ruk. 8.4-8*)

**4** <sup>1</sup>Nuyá jínki antumianka yantamen Jesus ataksha unuiniartinian juarkimiayi. Tura untsurí shuar iruntrarmatai, kanunam enkempramiayi. Shuarsha antumianka káanmatkarin pujuarmiayi. <sup>2</sup>Jesuská métek-taku chichamjai ti jintintiármiai. Jintintiuk juna tímiayi: <sup>3</sup>“Antuktarum. Atsaamin atsaamprataj tusa jíinkimiai. <sup>4</sup>Atsaamkui ni arakrj jintiá iniararmai. Chínki yakiya káutkar yuawarmai. <sup>5</sup>Chikichcha kaya írunmanum iniararmai, nunka ishichik ámanum. Tura nunka ishichik asamtai wárik tsapainiarmai. <sup>6</sup>Tura etsa etsantar sukuám kancape atsa asamtai káararmai. <sup>7</sup>Chikichcha janjí nupanam iniararmai. Jankisha tsapainiar kankar ajakrarmai; túram nerekcharmai. <sup>8</sup>Chikichcha péñker nunkanam iniararmai. Tura tsapainiar nerekarmai, chíkich trainta, chíkich sesenta, chíkich sian nerekarmai. <sup>9</sup>Kuíshim ákuínkia antuktarum” tímiayi.

*(Mat. 13.10-17; Ruk. 8.9-10)*

<sup>10</sup>Untsurí wearmatai, ishichik Nijijai juakarmiania nu, ni tuse unuiniamurijjai aniasarmiayi “¿Ame jintintiamna nusha warimpiai?” tiarmiayi.

<sup>11</sup>Tutai Jesus chichaak “Yuska ni akupeamurin atumin paant nekamtikramattsa wakerutmarme. Antsu chíkich shuarka aya métek-taku chichamjai jintintiáwartatui. <sup>12</sup>Íniyatan wáinkiacharat tusa, antukarsha nekaacharat tusa, umirtsuk ni tunaari tsankurnacharat tusa túrattawai” tímiayi.

*(Mat. 13.18-23; Ruk. 8.11-15)*

<sup>13</sup>Tura tímiayi ‘Wi jintintiajrumna nú métek-taku chicham nekaachurmek. Nu nékachkurmeka jitiurak chíkich métek-taku chichamsha nekaatarum? <sup>14</sup>Atsaamnua nuka Yus-Chichaman étserna nuna nakumui. <sup>15</sup>Jínkiái jintiá iniaarua nuna chíkich shuar ántuiniamun nakumui. Nu shuar chichaman ántuiniawai. Tura antukarmatai Satanás wárik tarí ni enentáin atsaampramun jurawai. <sup>16</sup>Chíkich shuar ántuiniamu kayanam atsaampramua núniskete. Niisha chichaman antukar wárik warainiak umiktasa wakeruiniawai. <sup>17</sup>Tura ni kancape atsakui, aya ishichik katsuiniawai. Tura ukunam, Yus-Chichaman wakeruiniakui shuar kajeram tura chíkich iturchatan wáinkiar Yúsaiya kanainiawai. <sup>18</sup>Chíkich ántuiniamuka janjí nupanam atsaampramua núniskete. Nu shuar Yus-Chichaman ántuiniawai. <sup>19</sup>Ántuiniayat ju nunkanam ana nuna ti páchiniawai. Tuma ásar kuítian tura shiirmachin ti takustinian

wakeruiniawai. Nú wakeramu ni enentáin Yus-Chicham ana nuna kan̄kar emen̄katui. Tuma asamtai nerektinian tujintiiniawai. <sup>20</sup>Tura ch̄kích ántuiniamusha pé̄nker nún̄kanam atsaampramua núniskete. Nú shuarsha Yus-Chichaman antukar umiiniawai. Tura nerenawai, ch̄kích shuar trainta, ch̄kích shuar sesenta ch̄kích shuar siansha nerenawai.’

**Ūkma ana nu paant nekanattawai**  
(Ruk. 8.16-18)

<sup>21</sup>Nuyá Jesus juna tímiayi ‘¿Shuar shiripkin ekeemak itíá pitiaknum en̄keattawak. Peaknum wakenam ikiustatuak? Atsá. Antsu misanam ekentsashtinkiait. <sup>22</sup>Núnisan̄ ashí ūkma ana nu ukunam paant nekanattawai. Tura núnisan̄ yamá ishishmasa chichasmasha ukunam paant nekanattawai. <sup>23</sup>Kuíshim ákuin̄kia antuktarum.’ <sup>24</sup>Tura nuyá tímiayi ‘Ántarmena nu esetrarum enentáimsarum antuktarum. Urutá pé̄nkerak enentáimsatarum, núnisan̄ Yuska ámin nekaatniun suramsattarme, tura nú núkap patatramsattarme. <sup>25</sup>Tuma asamtai shuar núkap takakna nu patatnastatui. Antsu ch̄kích shuar ishichik takakuk jurunkittiwai.’

**Yusa akupeamurí júnisaiti**

<sup>26</sup>Nuyá Jesus chichaak juna tímiayi ‘Yusa akupeamurí júnisaiti. Shuar jin̄kiain atsaampratniua núniskete. <sup>27</sup>Jin̄kiáin atsaamar, untsurí kanar, tsawar, uruksanpi tusa nákwai. Tura itiura tsapainia núnaka nékatsui. <sup>28</sup>Kame jin̄kiái nun̄kanam inít aku nin̄ki tsapaatsuk; emka nukareawai, nuyá tuyureawai tura nujamar katsuāwai. <sup>29</sup>Túruna káakmatai júuktin tsawant jeayi tusar juúniawai.’ (Mat. 13.31-32; Ruk. 13.18-19)

<sup>30</sup>Ataksha Jesus tímiayi ‘¿Yusa akupeamurí warijiāin̄k<sup>1</sup> nakumkataj. Warijiāin̄k<sup>1</sup> métek-takuit? <sup>31</sup>Mustasa jin̄kiaí araamua nujai métek-takuiti. Nu jin̄kiaisha ashí nan̄kaamas ishitiupchichiti. <sup>32</sup>Tura araam tsapáí ashí nan̄kaamas uunt ajawai; tura tsen̄keakmarísha kámpuram asamtai nui mikintranam chin̄kisha shiir ayamainiawai.’

(Mat. 13.34-35)

<sup>33</sup>Núnisan̄ Jesus untsurí métek-taku chichamjai Yus-Chichaman ujaamiayi. Nii nekaatniun jearmia nunak ujaamiayi. <sup>34</sup>Ch̄kích shuaran aya métek-taku chichamjai ujaamiayi; antsu ni unuiniamurijiāi Nin̄ki pujus ashí paant jintintrarmiayi.

**Nasencha, entsan̄cha Jesus imijiánmia nu**  
(Mat. 8.23-27; Ruk. 8.22-25)

<sup>35</sup>Nu tsawantai etsa akaikimtai Jesus ni unuiniamurin̄ chicharainiak “Entsa amain katintai” tímiayi. <sup>36</sup>Tutai kanunam en̄kemprarmiayi.

Chíkich shuarnaka káanmatkanam ikiukiar Jesusan kanunam pujan júkiarmiayi. Chíkich kanunmayasha atampriarmiayi. <sup>37</sup>Tura nasesha ti nasenkatasa nan\_kammiayi; chíchimi kanunam yarána piáktasa ajamiayi. <sup>38</sup>Jesuska kanú senkarin atamprus kanúu tepemiayi. Tura, ni unuiniamurj Jesusan ishintiak chicharuk “Uunta ii wayajnia júka pachitmatsmek” tiarmiayi.

<sup>39</sup>Tutai Jesus nantaki nasen kakantramiayi. Entsanha chicharuk “Takamatsata. Miaku ajasta” tímiayi. Tutai nasesha menkakamiayi, entsasha miaaku ajasmiai. <sup>40</sup>Túrunamtai Jesus ni unuiniamurj chicharainiak “¿Urukamtai ashamarum? Itiura Yus nekas enentáimtatsrum” tímiayi. <sup>41</sup>Tura imiá ashamainiak “¿Maa júsha yait? Nasesha entsasha nin umirainiatsuk” tunaiyarmiayi.

**Jataranmayan iwianchrukun Jesus tsuármiania nu**  
(*Mat. 8.28-34; Ruk. 8.26-39*)

**5** <sup>1</sup>Nuyá antumian amaini Jatara nunkanam jeawarmiayi. <sup>2</sup>Jesus kanunmaya jinkimtai áishman iwianchruku, shuar jakáa iwiartainiumiá wárik taa Jesusan inkiunmiayi. <sup>3</sup>Nu shuar iwiartainium tuke pujuyayi. Tura jirujainkia nin jinkiaatniun tujinkiarimiayi. <sup>4</sup>Jirujai nawenmasha, uwejnusha tuke jinkiau ármiayi. Túramaitiat jinkiaarman tsuriar tepet-tepet awajmiayi. Tura ti kakaram asamtai nin nupetkachminiuyayi. <sup>5</sup>Tuke tsawaiasha káshisha, iwiartainiumsha murasha kayajai ijumak unsumuu wekainiuyayi. <sup>6</sup>Tura yajayan wáiniak Jesusan tseke tarimiayi; tura tikishmatramiayi. <sup>7-8</sup>Túrunamtai Jesus chicharuk “Iwianchiá, ni enentáiya jinkitia, tájame” tímiayi.

Takui íwianch kakantar chichaak “¿Winiasha urukamtai tarutnium, Uunt Nankaamaku Yusa Uchiri Jesúsá? Yus iirmanum wáitkiarsaip, tájame” tímiayi.

<sup>9</sup>Takui Jesus tímiayi “¿Ame náarmesha yait?”

Tutai niisha ayak “Untsurí ásar wikia Untsurí-suntar tu anaikiamuitjai” tímiayi.

<sup>10</sup>Nuna ti amik, nu nunkanmaya akuptukajin tusa Jesusan ti seamiayi. <sup>11</sup>Nuisha nainnium nuntumas untsurí kuchi shushunmak matsamarmiayi. <sup>12</sup>Tuma asamtai, kuchiniam enkemátin tsankatrukta tusar Jesusan seawarmiayi.

<sup>13</sup>Tuiniakui Jesus “ayu” tímiayi. Takui íwianch áishman\_kainia jinkiar kuchiniam enkemáwarmiayi. Kuchisha ti untsurí, jimiará mir (2.000) áchiawash. Ashí mash nánatanam iniaawar antumiannum iniankarmiayi. Nuisha entsá kjaraker jakerarmiayi.

<sup>14</sup>Túrunamtai kuchin wáinin pisarar péprunmasha shuarnumsha nuna etserarmiayi. Tuma asamtai iyutai tusar ashintiukarmiayi.

<sup>15</sup>Túrawar Jesusai jeawarmiayi. Jeawar áishman yaunchu iwianchrukun

yamaikia péñker ajasun pushirín entsar pujan wáinkiar miayi. Wáinkiar ashankarmiayi. <sup>16</sup>Tura waketkiar kuchi túrunamuncha iwianchruku péñker ajasmancha mash etserkarmiayi. <sup>17</sup>Tuma asantai ni nunkeya jiinki wetá tusa seawarmiayi. Jesus kanunam enkemamtai áishman nuik iwianchruku amia nu Jesusan chicharuk <sup>18</sup>“Wi Ámijjaj tuke tsaninkian wekasatjai” tímiayi.

<sup>19</sup>Tura núnaka Jesus suritkiamiayi. “Antsu ame jeemiin, áminiurmiin weme, ashí Uunt Yus túrutma nu tura waitnentrampra nusha ujakarta” tímiayi.

<sup>20</sup>Tutai áishmansha wémiayi. Tura antsu Tekapuris nunkanam Jesus nin péñker awajsamia nuna ashí shuaran ujakmiayi. Nu nunkanmaya shuarka nuna antukar ti enentáimprarmiayi.

### Jimiará jaan Jesus tsuármiania nu

(Mat. 9.18-26; Ruk. 8.40-56)

<sup>21</sup>Ataksha Jesus kanujaj katinmatai, aents untsurí Nin irunturarmiayi. Jesuska antumianka káanmatkarí wajamiayi. <sup>22</sup>Tura Israer-shuar iruntaj jea náampruku, ni naari Jairu, támiayi. Taa, Jesusan wáiniak, piniakum tepersamiayi. <sup>23</sup>Piniakumar ti seak, “Winia nawantur jarutui. Winitia, túram péñker ajasat tusam uwejmijjaj antintrukta. Nuinkia jarutkashtatui” tímiayi.

<sup>24</sup>Tu tímiatai Jesus nijjaj wémiayi. Tura untsurí shuar wena ásar Nin chánuar miayi.

<sup>25</sup>Nuj pachitkia nuwá ti jaa wémiayi. Niisha tuse uwí numpan ajapeak wáitias pujuyayi. <sup>26</sup>Ti untsurí tsuakratin nincha iisu armiayi. Tura iyamsha ti wáitias pujuyayi. Tura ni kuítrincha ashí ajapaitiat tsuámarchauyayi; antsu tsuamsha nu arant ajauyayi. <sup>27</sup>Nu nuwasha, Jesus túramun antuku asa, ni ukuurini amainian ni pushirín antinmiayi. <sup>28</sup>“Wi aya ni pushirín antin naka péñkerapi ajasaintjia” tu enentáimiar túramiayi. <sup>29</sup>Tura Jesusa pushirín antin nú chichamaik numpa ájapman menkakamiayi. Péñker ajasman ayashin nekapramiayi. <sup>30</sup>Tura nuin Jesuska, ni kakarmarjijaj tsuarman nekapmampramiayi. Tura nuna nekáa, ayantar chichaak “¿Yaki winia pushirun antintruka?” tímiayi.

<sup>31</sup>Tutai ni unuiniamurí tiarmiayi, “Untsurí Ámin antinmainiasha ¿urukamtai “yaki winia antintkia” tame?”

<sup>32</sup>Tura Jesus, yaki túruta tusa ashi íimpramiayi. <sup>33</sup>Nuinkia nuwasha, ni ayashin túruna nuna nekáa, ti ashamak kuraimiayi. Tura Jesusan jeari tikishmatramiayi. Tura ni túrunamurín ashí paant ujakmiayi. <sup>34</sup>Takui Jesus nin chicharuk “Nawantru, Winia nekas enentáimtursa asakmin, péñker awajtamsaitme. Shiir wetá, tura tuke péñker pujusta” tímiayi.

<sup>35</sup>Tura Jesus nuna tuke chichas pujaj, iruntaj jea uuntri jeenia tariarmiayi. Tariar chicharainiak “Ame nawantrum jakayi. ¿Urukamtai Unuikiartin tuke itit awajsatam?” tiarmiayi.

<sup>36</sup>Tura Jesuska, nii tiarmia nuna ántayat, núnaka pachitsuk, iruntai jea uuntrin chicharuk “Ashamkaip; áyatik nekas enentáimtursata’ tímiayi.

<sup>37</sup>Tura Nijjiaí wétinian aya Pítruncha, Jakupuncha ni yachi Juanjaí tsan̄katkarmiayi. <sup>38</sup>Iruntai jea uuntri jeen jeawar, áentsun charaatum ajainian, útainian untsukum ajainiancha Jesus wáinkiamiayi. <sup>39</sup>Tura nuwach penké jakan nékayat, wayá nin chicharuk “¿Urukamtaí timiá útrum, tura wa wa ajarum? Nuwach jákachai, antsu kanarai” tímiayi.

<sup>40</sup>Nuna takui wishikrarmiayi. Tura Jesus ashí jjiir akupkarmiayi. Áyatik nuwachí aparín, nukuríncha tura Nijjiaí táaruncha nuwachí tepamurín jukimiayi. <sup>41</sup>Tura wayawar Jesuska nuwachí uwejeñ achik tímiayi “Taritia kumi.” Nusha shuar chichamjainkia “nawantrú nantáktiá” tawai. <sup>42</sup>Nuwach tuse uwí takakuya nu, nú chichamaik nantaki wekasamiayi. Túramtai nuí pujuarmiania nu ti enentáimprarmiayi. <sup>43</sup>Jesuska chichaak “Atumsha penké etserkairap’ tímiayi. Tura “nuwach ayuratarum” tímiayi.

### Jesus Nasarénum pujusma

(Mat. 13.53-58; Ruk. 4.16-30)

**6** <sup>1</sup>Jesus nuyá jiiñki ni nunken waketkimiayi. Ni unuiniamurísha nemariarmiayi. <sup>2</sup>Nuisha ayampratin tsawant jeamtaí Israer-shuar iruntainiam wayá unuiniamiayi. Tura Jesusan anturkarmiania nu ti enentáimsarmiayi. “¿Jusha tuí unuimiaruit. Ni nekaatniuríncha yaki susait. Tura aentsti tujintiajnia nuna Niisha itiurak tura? <sup>3</sup>Jusha karpintírchukait; Marí uchirínchukait. Ni yachísha Jakupusha, Jusesha, Jútassha, Semunsha nékatsjik. Tura ni umaísha juí iijiaí pujuiniatsuk” tiarmiayi. Túrawar Nin nekas enentáimtustinian tujinkiararmiayi.

<sup>4</sup>Túrasha Jesus nin chicharuk “Yúsnan etserniun chíkich nunkanmayaan̄ka shiir anturainiawai. Antsu ní nunkeyan̄ka, ní shuarsha anturainiatsuí” tímiayi.

<sup>5</sup>Tura nuísha, ni nunkenkikia aentsti tujintiamun túratniun tujinkiamiayi. Antsu jaancha aya ishichik ni uwejejaí antin̄ tsuármiayi.

<sup>6</sup>Tura nekas enentáimtacham “¿urukamtaí nusha?” tu enentáimsamiayi.

Nuyasha chíkich péprunam wayá, chíkich péprunam wayá Yus-Chichaman unuúniakní wekaimiayi.

### Yus-Chicham etserkatarum tusa Jesus ni

unuiniamurín akupkarmiania nu

(Mat. 10.5-15; Ruk. 9.1-6)

<sup>7</sup>Tuse unuiniamurín untsuk jímiarchik jímiarchik werum Yus-Chicham etserkatarum tusa akupkarmiayi. Tura iwianchin nupetkarat tusa ni kakarmarin̄ súsarmiayi. <sup>8</sup>Tura chicharuk “Jintiá yurumátniusha jukiirap, uyuntrumíincha kuitcha en̄kearum jukiirap. Antsu aya áanik mashtun̄ jukiirum wetarum. <sup>9</sup>Sapat uwekatarum, tura entsartincha jímiar jukiirap,

tímiayi. <sup>10</sup>Tura jea wayarmena nuin pujustarum; pujá-pujakuarum nuyá chíkich peprunmasha wetarum. <sup>11</sup>Tura nánkamas aents atumin awaintiamainiachkuisha, anturtamainiachkuisha, nuyá jíinkirum, nu shuar yajauch ániawai tusarum, atumí nawę nuńka akakekrum ikiuktiarum. Kame Yus áentsun nekapsattana nú tsawant jeamtai, nu shuarnaka asutiattawai. Sutuma péprunmaya shuarjaj tura Kumura péprunmaya shuarjaj nankaamas nin asutiattawai” tímiayi Jesus.

<sup>12</sup>Nuyá Jesusa unuiniamuri jíinkiar enentái yapajiar Yúsai enentáimtumartinian etserkarmiayi. <sup>13</sup>Tura iwianchruku enentáiya iwianchin jíirki akupkarmiayi, tura asuitijai yakarar untsurí jáinian tsuararmiayi.

**Juanka jakamuri**  
(*Mat. 14.1-12; Ruk. 9.7-9*)

<sup>14</sup>Jesusa náarin tura ni túramurin ashí aents áujmatin ásarmatai, uunt akupin Erutis nuna antukmiayi. Erutiska “Imiakratin Juan jakamunmaya nantakni. Tuma asa ti kakaram takaawai” tímiayi. <sup>15</sup>Tura chíkich shuar “Eríasaiti” tiarmiayi. Chikichcha “Yúsnan etserniuiti, yaunchu etserniuya núkete” tiarmiayi. <sup>16</sup>Erutis nuna antuk “Nekas Juánkaiti. Ni muuken tsupiktinian akupkamiay nu, jakamunmaya nantakniuiti” tímiayi. <sup>17-19</sup>Kame Uunt akupin Erutis, ni yachi Jiripi nuarin nuatkamiayi. Nu nuwá naari Jirutíasaiti. Juansha uunt akupniun Erutisan chicharuk “Yatsumi nuarí akintrukchatniuitme’ tímiayi. Tutai nuwá Jirutías Juánkan ti kajerkamiayi. Tura Juánkan máataj tusa wakerimiayi. Túrasa uunt akupin Erutis nuna surimkamiayi. Antsu Juan achikrum sepunam enkeatarum tusa akupkamiayi. <sup>20</sup>Juansha tuke enentáijjai Yusa jintin wekainiuyayi. Erutis, ni esetar enentáimniun neka asa Juánkan ashamak Jirutías wakeramurin túrawain tusa suritkamiayi. Kame Erutis Juan étserman nékachuitiat antuktinian wakerimiayi.

<sup>21</sup>Jirutías, itiurak máawaj tu pujai, uunt akupin Erutis, ni akiiniamu tsawantri jeamtai, ni suntarincha, Kariréa nuńkanmaya úuntrincha, kuítrintin armia nunasha untsukar, namperan najanamiayi. <sup>22</sup>Nuisha Jirutías nawantri wayá jantsemámtai Erutis tura nijjai nampernum matsamarmia nusha shiir enentáimsarmiayi. Túramtai uunt akupin nuwachin chicharuk “Ame wakeram nu seattia. Wi amastatjai. <sup>23</sup>Nekas tájame, ashí ame seatmena núnaka amastatjai. Wats, seatkumnińkia takakjana nuna jímiapetek nakakan, amastatjai” tímiayi.

<sup>24</sup>Tutai nuwach jíinki ni nukurín Jirutíasan chicharuk “¿Wariniak seattaj?” tímiayi.

Tutai “Imiakratin Juanka muuke seata” tímiayi.

<sup>25</sup>Nu chichamaik nuwach wari wayá Erutisan chicharuk “Yamaikia uunt amamkunam Juanka muuken wakerajai” tímiayi.



<sup>26</sup>Nuna takui uunt akupin ti kuntuts enentáimpramiayi. Tura nii tiniu asa ni amikrĭ matsatainia nu antukaru ásar matai surimkiatniun tujinkiamiayi. <sup>27</sup>Tuma asa uunt akupin Juanĭka muuke itiatu tusa ni suntarĭn wárikmas akupkamiayi. <sup>28</sup>Túramtai suntar wari we, sepunam Juanĭka muuken tsupikmiayi. Tsupik, amamkunam itia, nuwan susamiayi. Túram achik ni nukurĭn susamiayi. <sup>29</sup>Juan maamun antukar ni unuiniamurĭ ni ayashĭn iwarsatai tusar júkiarmiayi.

### **Senku mir áishmanĭkan Jesus ayuramiania nu**

*(Mat. 14.13-21; Ruk. 9.10-17; Juanĭ 6.1-14)*

<sup>30</sup>Tura Jesusa unuiniamurĭ Nii akupkarma nu, ataksha wakетки káunak irunturarmiayi. Ashí nii túrawarmia nuna, unuiniararmia nunasha ujakarmiayi. <sup>31</sup>Tura untsurĭ shuar táiniakui, niisha ankant ajastinniasha yurumátniuncha tujinkiamiayi. Tuma asamtai Jesus chichaak “Tijĭai wemí aents atsuiniamunam; nuĭ ishichik ayamprarmi” tímiayi. <sup>32</sup>Nuyá Jesus ni unuiniamurĭjĭai kanunam enĭkemprar, aents atsuiniamunam jeatai tusar jíinkiamiayi. <sup>33</sup>Túrasha shuar ni wéenan wáinkiamiayi. Tura “Jesusaiti” tiarmiayi. Tuma ásar ashí péprunmayá untsurĭ shuar tseke ashintiukar, ni jeatniunam nákakarmiayi. <sup>34</sup>Jesus kanunmayá jíinki ti untsurĭ aents iruntrar matsatun wáinkiamiayi. Murik pénker wáinchataiya núnisanĭ matsatu ásar matai Jesus nin wáitnentrarmiayi. Tura núkap unuiniararmiayi. <sup>35</sup>Nuyá kíakui ni unuiniamurĭ Jesusan tariar chicharainiak “Atsamunam pujatsjik; tura yamáí kíatsuk. <sup>36</sup>Shuar wari akupkarta. Tijĭuch péprunmasha, shuarnumsha wearti, ni yurumkarĭ sumarmakarat” tiarmiayi.

<sup>37</sup>Tutai Jesus chichaak “Atumek ayuratarum” tímiayi.

Tutai “Iisha ju shuar ayuratai tusar, ¿jimiara sianĭ kuitĭai yurumak sumaktai tusar wétinkiaitĭai?” tiarmiayi.

<sup>38</sup>Tura Jesus ni unuiniamurĭn chicharainiak “Tanta takakrum nu iistarum ¿urutmak aa?” tímiayi.

Tutai nekapmarar chichainiak “Tántaka sénkuchikiiti, tura namaksha jímiarchikiiti” tiarmiayi.

<sup>39</sup>Tutai Jesus tímiayi “Ju shuar chírichriniam pujusarti tusar akupkatarum.”

<sup>40</sup>Anĭkant anĭkant sianĭ siansha, senĭkuenta senĭkuenta iruntrar matsamsarmiayi.

<sup>41</sup>Jesuska senĭku tantancha, jímiar namaknasha jusa, yakí nayaimpinmaani íimias Yúsan yumĩnsamiayi. Tura yurumkan púurmiayi. Puur ni unuiniamurĭn súsarmiayi. Namaknasha puur súsarmiayi, ashí shuáran ajamsarat tusa. <sup>42</sup>Ashí yurumáwar ejemarmatai, <sup>43</sup>puunaruncha, namak ampirmancha achikiar, tuse chanĭkinian áimkiar júkiarmiayi. <sup>44</sup>Nu yurumkan ti untsurĭ yurumáwarmiayi. Aya áishmanĭkak senĭku mir (5.000) ármiai.

### **Jesus entsá pátatek wekasamiania nu**

*(Mat. 14.22-27; Juanĭ 6.16-21)*

<sup>45</sup>Nuyá Jesus ni unuiniamurĭn chicharainiak “Kanunam enĭkemprarum, katiĭnkrum amain émaa ajatarum, Petsaitia péprunam. Wisha ju shuaran

ájusan ikiuktijatjai” tímiayi. <sup>46</sup>Shuáran áujas ikiuki Yusjají chichastaj tusa náinnium wémiayi.

<sup>47</sup>Tura kirit ajasmanum kánuka antumiannum ajapén nanammiai. Jesuska niñki juakmiayi. <sup>48</sup>Jesusa unuiniamurísha wia-wiantainiakua ti pimpikiarmiayi, nase tukumma ásar. Nuna Jesus wáiniak tsawartín ishichik ajasmatai entsá pátatek wekas nin jeariarmiayi. Tura nankaamaktiasa wea núnisan wémiayi. <sup>49</sup>Jesus entsá wekaan ni unuiniamurí wáinkiar, wakanchashit, tu enentáimprarmiayi. Túrawar ti unsumkarmiayi. <sup>50</sup>Ashí wáinkiar ti ashamkarmiayi. Tura Jesus wárik nin chicharuk “Kakaram ajastarum, wíitjai Jesus; ashamprukairap” tímiayi. <sup>51-52</sup>Nuñkia entsayá kanunam waka enkempramiayi. Túramtai nasesha majaantmiayi. Ni unuiniamuríntia enentáí kiritia áintsan ásarmatai Jesus yurumkan núkap awajsamia nuna paant nekaatniun tuke tujinkiarimiayi. Tuma ásar yamáí túrunamu itiurak aankia tusar ti enentáimprar sapijmiakarmiayi.

**Jinisarítiumiá shuáran Jesus tsuármiania nu**  
(*Mat. 14.34-36*)

<sup>53</sup>Nuyanka katíñkiar, Jinisarít núnkanam jeawarmiayi. Jeawar kanun ajuñiarmiayi. <sup>54</sup>Kanunmayá jíintrarmatai, nu nunkanmayá shuar Jesusan nekaawarmiayi. <sup>55</sup>Tura “Jesus pujawai” táman antukar, ashí jéanmayá jaan ni peakrintiuk Jesus pujamunam itiaarmiayi. <sup>56</sup>Tura Jesus wekaak wémia nuísha, péprunmasha, shuar matsatmanumsha, ishichik matsatkamunmasha jaan itiarar jintiá áeprusarmiayi. Túmainiak Jesusan pushirmin antintaj tusar seawarmiayi. Tura ashí antiñkiarmia nuka péñker ajasarmiayi.

**Jesus Pariséun áujmatsarmiania nu**  
(*Mat. 15.1-20*)

**7** <sup>1</sup>Pariséusha, Israer-shuara jintinniurísha Jerusarénnumiá Jesusan tariarmiayi. <sup>2</sup>Tura Jesusa unuiniamurín ikijmiatsuk yurumun wáinkiar “Israer-shuara túrutairín túruiniatsui” tiarmiayi. <sup>3</sup>(Kame Pariséusha, tura ashí Israer-shuarsha, ni uuntri jintintiamurín umikiar ti núkap ikijmiarar yurumin ármiai. <sup>4</sup>Péprunmayá tari “ikijmiatsuk yurumashtiniaiti” tiniu ármiai. Tura ti untsurí ni uuntri túrutairí núnisan ármiai. “Tsapancha, ichinnasha, jiruncha, peaknasha nijiakartiniaiti” tiniu ármiai.) <sup>5</sup>Tuma asamtai Pariséusha, Israer-shuara jintinniurísha Jesusan chicharainiak “¿Urukamtai ame unuiniamuram ii uuntri jintintramniuitaj nuna túruiniatsu. Urukamtai ikijmiatskesha yurumáinia?” tiarmiayi.

<sup>6</sup>Tutai Jesus tímiayi “Ántar chichamtiniaitume. Isayas yaunchu nekas atumin áartampramiayi juna:

Ju aents ni wenejaj Winia “ti péñkeraiti” turutainiawai, tímiayi Yús, tura ni enentáinkia jeachat pujuiniawai. <sup>7</sup>Tura tukeneas Winia shiir awajtuiniawai. Aentsu chichame jintiainiyat, “Yús-Chichamaiti” tuñiawai.”

Tu áarmaiti. <sup>8</sup>Tura átum Yusa chichame iniaisarum, aentsu jintintiamurí umirkarum, ichinnasha, tsapancha nijiaktin, tura chíkich túrutaisha áintsarmek untsurí túrarme. <sup>9</sup>Túrákrum Yús-Chichamka tsukintiaani ikiusurme atumí uuntri chichame umirkatai tusarum. <sup>10</sup>Kame Muisais yaunchu aar juna tíchamka:

Ame apa nukusha shiir enentáimtustarum.

Tura ataksha áarmiayi:

Shuarsha ni aparín, nukuríncha yajauch chichareakka, nu shuar jákatniuiti.

<sup>11-12</sup>Túrásha átumka Paríséutirmeka, antsu ju tárume: “Shuar ni aparín ni nukurín chicharuk “Wi yáinťinian takakjana nu Kurpanaiti” takuínkia, atumsha péñkeraiti, aparíncha nukuríncha yáinťinatí” tarume. (Kurpan tana nuka, Yús susamu, tawai.) <sup>13</sup>Nekaatarum, Paríséutiram. “Í yanchu uuntri chichame tuke umiki wétinaitji” tákurum, Yús-Chicham penké ántar chichama núnin awajearme. Núnisrumek chikichcha untsurí túrarme.” Tu timiayi Jesus.

<sup>14</sup>Nuyá ataksha Jesus ashí shuáran untsukar “Mash anturtuktarum, ashí nekaatarum, tímiayi. <sup>15</sup>Aaya ayashnium wayaana nu, shuáran yajauch awajsachminiaiti; tura antsu ni enentáinia jinia nu, yajauch awajsattawai. <sup>16</sup>Shuar nuna ántakka enentáimprati” tímiayi.

<sup>17</sup>Nuyá áentsun ikuiak, jea wayamtai, ni unuiniamurí aniasarmiayi “¿Nu métek-taku chicham warintua?” tiarmiayi.

<sup>18</sup>Tutai Jesus tímiayi “Atumsha nékatsrumek. Páantchakait; yurumak yúajnia nu, enentáiniam wayachu asa, shuáran yajauch awajsachminiaiti. <sup>19</sup>Antsu wakenam wayá, nankaamas menkaatsuk” tímiayi. Nuna taku, ashí yurumak páchitsuk yuamniaiti, tímiayi. <sup>20</sup>Nuyá tímiayi “Shuara enentáinia jinia nu, yajauch awajsamniaiti. <sup>21</sup>Shuara enentáinia, initia, yajauch enentáimsatniusha, tsanirmatniusha, natsa tsanirmatniusha, shuar máatniusha, <sup>22</sup>kasamkatniusha, chikichna wakeruktincha, péñkercha túratniusha, anankatniusha, natsantain átincha, yajauch enentáimtustincha, tsanumpratniusha, waantu enentáimtumastincha, netse túratniusha, ashí nuka initia wininiatsuk. <sup>23</sup>Ashí nu tunáa ainia nu, shuara enentáinia jiniu asa, shuáran yajauch awajainiawai” tímiayi.

**Serupinísianmayá nuwá Jesusan nekas enentáimtusmiania nu**  
(Mat. 15.21-28)

<sup>24</sup>Tiru pepu, Setún péprusha Serupinísia nunkanam ámiayi. Nuka Israer-shuara nunkencha yayi. Nu nunkanam Jesus wémiayi. Tura

jeá, jeá wayáa pujusmiayi. Tura nui pujamun nu nunkanmaya shuar nekarawarain tusa nakitmiayi; túrasha uumkatniun tujinkiamiayi. <sup>25</sup>Wárik nu nunkanmaya nuwa Jesus pujan nekaamiayi. Nu núwaka nawantri iwianchrukuyayi. Tuma asa Jesusan tarí ni nawen piniakum tepersamiayi. <sup>26</sup>Nu nuwa Israer-shuarcha, Serupinísianmayauyayi. Túmaitiat, nawantru enentáiya iwianchin jiiirturkitia tusa Jesusan seamiayi. <sup>27</sup>Tutai Jesus nuwan chicharuk “Uchi emka ejemartí. Uchi apatkuri atankir yawach súsatin péñkerchaiti” tímiayi.

<sup>28</sup>Tutai nuwa ayak “Nekas, Uunta, tame. Tura yawachisha misanam wakenam pujuinia nu, uchi apatkun yurumuk juyumak kákeamun yúniatsuk” tímiayi.

<sup>29</sup>Tutai Jesus tímiayi “Péñker tame. Tuma asam, shiir wetá; ame nawantrumí enentáiya iwianch jíinkiyi” tímiayi.

<sup>30</sup>Takui niisha wémiayi. Tura ni jeen jeá, ni nawantrin íwianch jíinkimtai péñker ajas peaknum tepan wáinkiamiayi.

#### Jesus empekun tsuármiania nu

<sup>31</sup>Jesus Tirunmaya jiinki Setún péprunam nankaamarkutak, Tekapuris nunkanmaani nankaamaki, Kariréa antumiannum ataksha jemiayi.

<sup>32</sup>Nui chichachu ámiayi, kuishin empeku. Nu shuáran Jesusan itiar, ni uwejejai antinkiat tusar seawarmiayi. <sup>33</sup>Shuar matsatmanumia Jesus nin akanki jukí kuishin tsara uwejejai tsutsukruamiayi. Tura usukia, nu shuara iniaín antintkiamiayi. <sup>34</sup>Tura nayaimpinmaaní fimias súkaska mayati “Epata” tímiayi. Nuka, shuar chichamnumka “chinkiatí” tawai.

<sup>35</sup>Nu chichamaik ni kuishisha chinikiamiayi, iniaisha séermiayi. Tura paant chichasmiayi. <sup>36</sup>Tura Jesus chicharainiak “Penké etserkairap” tímiayi. Jesuska surí-suritiamaitiat, nu nankaamas etseriarmiayi. <sup>37</sup>Tura ti enentáimprarmiayi. Enentáimprar, “Ju Jesus aya péñkeran túrawai. Empekuncha ántumtikniaiti, tura chichachun chichamtikniaiti” tiarmiayi.

#### Kuatro mir shuáran Jesus ayuramiania nu

(Mat. 15.32-39)

**8** <sup>1</sup>Nu tsawantái shuar timiá untsurí iruntrararmiayi. Yurumkari atsakui Jesus ni unuiniamurin untsukar juna tímiayi: <sup>2</sup>“Ju shuáran waitnentajai. Menaintiú tsawant Wijiaí pujuinia ásarmatai ni yurumkari amuukachaik. <sup>3</sup>Tura ni jeen ayurtsuk akupeamka, tsukariin jintiá pimpikiartatui, yajaya káunkaru ásar” tímiayi.

<sup>4</sup>Tutai ni unuiniamuri chichainiak “Túrasha jui atsamunam, ju aents ejemaratat tusar ¿tuyá yurumkak wáinkiattají?” tiarmiayi.

<sup>5</sup>Tutai Jesus nin aniasmiayi “¿Uruamá tanta aa?”

Tutai “siati awai” tiarmiayi.

<sup>6</sup>Nuinkia ashí áentsun “nunká pujstarum” tiarmiayi. Tura tantan achik, Yúsan yumin\_samiayi. Tura puuk, áentsun ajamsatarum tusa ni unuiniamur\_in susamiayi. <sup>7</sup>Tura uchich namaksha ishichik aan achik, Yúsan yumin\_kias, ni unuiniamur\_in chicharuk “Júsha shuar ajamsatarum” tímiayi. <sup>8</sup>Turam ashí yurumáwar ejemarmarmiayi. Ampirma púunaruncha siati chan\_kinnium áimkiarmiayi. <sup>9</sup>Kuatro mir (4.000) shuar yurumáwarmiayi. Yurumáwar amikiarmatai, Jesus nin áujas akupkarmayi. <sup>10</sup>Tura ni unuiniamur\_ijjia\_i kanunam en\_kemprar Tarmanúta nun\_kanam wearmiayi.

**Pariséu Jesusan iniakmasta tiarmiania nu**  
(*Mat. 16.1-4; Ruk. 12.54-56*)

<sup>11</sup>Pariséu Jesusjaj\_í áujmatsatai tusar tariarmiayi. Nekapsatai tusar wakeruiniak Nin chicharuk “Nayaimpinmaya\_ kakaram iniakmasta” tiarmiayi.

<sup>12</sup>Tuñiakui Jesus kúntuts enentáimias, súkaska mayati “¿Urukamtai, yamaiy\_ aentstiram, nayaimpinmaya\_ kakarman iniakmasat tusarum wakerarum? Nuka pen\_ké sunaschattarme, paant tájarme” tímiayi.

<sup>13</sup>Nuyá nin ikiukiar ataksha kanunam en\_kemar amain katin\_miayi.

**Pariséu túramur\_ijjia\_i aneartarum, tímiayi Jesus**  
(*Mat. 16.5-12*)

<sup>14</sup>Tura ni unuiniamur\_i yurumak jukitiai tukamá kajinmatkiarmiayi. Kanunman\_ka aya chikichik tantanak takaku ármiayi. <sup>15</sup>Jesussha ni unuiniamur\_in enentáimtikiuk tímiayi “Wáinkiatarum; Pariséusha Erutissha wakaprutain takakainia nújaj\_isha aneartarum” tímiayi.

<sup>16</sup>Tutai ni unuiniamur\_isha tunaiyarmiayi “Tanta kajinmatkin asakrin nuna túramtsujiash” tiarmiayi.

<sup>17</sup>Tura Jesus nuna nekáa chichaak “¿Urukamtai aya yurumkak enentáimtarum? Tuke nékatsrumek. Pen\_ké enentáimtsurmek. Atumí enentá\_i tuke kiritkiait? tímiayi. <sup>18</sup>Jimi a\_isha itiura wáintsurmea. Ku\_fshim a\_isha itiura ántatsrum. Ashí kajinmatkintrumek. <sup>19</sup>Nekaatarum, nuik, sen\_ku tantan púuran sen\_ku mir áishman\_kan ayurachmakaj. ¿Tura ampirma urutmá chan\_kinnium chumpiamarum?” tímiayi.

Niisha tiarmiayi “Tuse chan\_kinnium chumpiamji.”

<sup>20</sup>Ataksha Jesus tímiayi “Tura siati tantajaj\_í quatre mir shuaran ayuramtai, ¿ampirmasha urutmá chan\_kinnium chumpiamarum?”

Niisha “siati” tiarmiayi.

<sup>21</sup>Tuma asamtai Jesus tímiayi “¿Itiura imiá nékatsrum?”

**Jesus kusurun ímtiksamiania nu**

<sup>22</sup>Nuyá Petsaitia péprunam jeawarmiayi. Jeawarmatai, áishman\_ jji kusurun Jesusan itiararmiayi. Túrawar antinta tusar seawarmiayi.

<sup>23</sup>Tuma asantai Jesus uwejn̄um achik péprunam aani en̄keki jukí j̄īn usukij̄j̄ai kuérmiayi. Tura uwejéj̄ai antin̄ “¿íimmek?” tímiayi.

<sup>24</sup>Tutai kusuru ími tímiayi “Aentsun iij̄aj̄ai, túrasha paantcha. Numi wekainian áaniun iij̄aj̄ai” tímiayi.

<sup>25</sup>Nuyá ataksha Jesus ni uwejéj̄ai kusuru j̄īn antin̄miayi. Tura kusurusha úmamkes iis, péñker ajas, ashí paant íimpramiayi. <sup>26</sup>Jesus chichaak “Jeemīn weakum péprunam wayawaip tura shuar ujakaip” tímiayi.

### **Pítiur Jesusan “Yusa Anaikiamurinme” tímiania nu**

*(Mat. 16.13-20; Ruk. 9.18-21)*

<sup>27</sup>Jesus ni unuiniamurij̄j̄ai uunt pepru Sesaria-jiripiunam jeatsuk, tíj̄iuch uchich péprunam irasarmiayi. Jintiá wésar Jesus ni unuiniamur̄in chicharainiak, “¿Yaiti turutainiawa Winia?” tímiayi.

<sup>28</sup>Tutai niisha áimkiarmiayi “Chíkich chichainiak, imiakratin Juan̄kaiti, turamainiawai. Chíkichcha, Eríasaiti, tura chíkichkia, yaunchu Yúsnan etserin nantakniua núiti, turamainiawai” tiarmiayi.

<sup>29</sup>Tutai Jesus tímiayi “Atumsha, ¿waritrume. Yáitij̄?” tímiayi.

Tutai Pítiur tímiayi “Ámeka Krístuitme; Yúsaiya akupkamuitme.”

<sup>30</sup>Tutai Jesus chichaak “Peñké etserkairap” tímiayi.

### **Jesus ni jákatniur̄in ujakmiania nu**

*(Mat. 16.21-28; Ruk. 9.22-27)*

<sup>31</sup>Unuinia: “Wi Aents Ajasuitjiana j̄u ti wáitsatniuit̄j̄ai. Israer-shuarti ii unun̄r̄isha, Patri únun̄r̄isha, ii jintinniur̄isha Winia nakitrurar mantuawartatui. Túrasha maintiu tsawant nan̄kaamasmatai nantaktin̄iait̄j̄ai” tímiayi. <sup>32</sup>Nunasha paant ujakmiayi.

Tura Pítrusha Jesusan arantach jukí kakantramiayi. “Tu chichasaip” tímiayi.

<sup>33</sup>Tutai Jesus ayantmatar, ni unuiniamur̄in iis, Pítrun kakantar chicharuk “Satanása, werumta. Ámeka Yusna ana nu enentáimtatsme, antsu aya áentsnak enentáimtame” tímiayi. <sup>34</sup>Nuna tuasua amik tura nūj̄ matsamarmia nunasha, ni unuiniamur̄incha utsuk tímiayi, “Shuar Winia nekas nemartustasa wakerakka ni wakeramur̄inkia iniaisati; tura ni krusri yanak̄i nemartustí. <sup>35</sup>Kame shuar j̄u nun̄kanam aya niñki anenmamkun̄ka nu shuar ni iwiaakmar̄in emen̄kaktatui. Antsu Winia anentu asa tura winia chichamprun anea asa, shuar aya péñker pujustinniak enentáimtsuna nu, nekas iwiaakman wáinkiattawai. <sup>36</sup>Nekaata, shuar ashí j̄u nun̄kanam írunna nuna sumaksha túrasha ni wakan̄j̄ jinium wéakuisha, ¿itiurak péñker pujusaint? <sup>37</sup>Shuarka wakan̄in uwemtikrataj̄ tusa wakerak ¿urutmak akikmakaint? <sup>38</sup>Antuktarum. Yamaiya aents Yúsán nakit̄iar ajapawaru yajauch ainia nu íimiainiamunam shuar Winia

natsantrakuinnkia tura winia chichampruncha natsantakuinnkia, wi, Aents Ajasuitjiana ju, winia Aparu kakarmarijiai tura nayaimpinmaya pénker suntarjai atak taakun, nú shuaran natsantrattajai Wisha.’ Tu tímiayi Jesus.

**9** <sup>1</sup>Ataksha Jesus nin chicharuk, ‘Nekas tájarme, shuar játsuk Yus ni kakarmarijiai aentsu enentáin akupkattana nú tsawantan wáinkiaratna nu jui iijiai pujuiniawai” tímiayi.

**Jesus nusháa iira ajasmiania nu**

(Mat. 17.1-13; Ruk. 9.28-36)

<sup>2</sup>Nuyá sais tsawant nankaasmatai, Jesus Pítruncha, Jakupuncha, Juánnnasha uunt náinnium júkiarmiayi. Nuisha Jesus nushá iira ajasmiai. <sup>3</sup>Ni pushirisha ti puju jíitsumir ajattsarmiayi. Nujai métek puju awajsatin ju nunkanam atsawai. <sup>4</sup>Túruna nui Erías, Muisaisjai wantinkiar Jesusjai chichainian wáinkiarmai. <sup>5</sup>Nuyasha Pítiur Jesusan chicharuk “Uuntá, ii jui pujustin ti pénkeraiti. Menaintiú áakmaktai, Áminiu chikichik, Muisaisna chikichik, Eríasnasha chikichik” tímiayi. <sup>6</sup>Jesusa unuiniamuri sapijmainiak, Pítiur wariniak titi nekaachmai. Nékachu asa nuna tímiayi.

<sup>7</sup>Tura yurankim tara mikintiu awajsamiayi. Yuranminmaya chichaak “Júiti winia aneamu Uchir. Nii anturkatarum” tímiayi.

<sup>8</sup>Nuyanka ni unuiniamuri ayantmar iijaj tukamar aya Jesusnak wáinkiarmai. Chíkichkia atsuarmiayi.

<sup>9</sup>Nuyá náinniumia akainiak Jesus nin chicharuk “Wáinkiarumna nu etserkairap. Wi, Aents Ajasuitjiana ju jakamunmaya nantaatsain nu etserkairap” tímiayi.

<sup>10</sup>Tutai ni tímian ímíatrusanu úukarmiayi. Tura “jakamunmaya nantaatsain tana nu, ¿wariniak ta?” nuamtak tunainiarmai. <sup>11</sup>Tura Jesusan aniasarmiayi “¿Urukamtaí Israerti ii jintinniurisha, Erías emka tátiniaiti, tuinia?” tiarmiayi.

<sup>12</sup>Tutai Jesus tímiayi “Nekas Erías ashí iwiarattsa emka tátiniaiti. ¿Tura Aents Ajasunun Yus-Papinium warintua?”

“Ti wáitsattawai; Nin nakitrartatui.” Tu áarmaiti.

<sup>13</sup>Wi tájarme, Erías nekas táwiti. Támatai, shuar ashí ni wakeriarmia nuna nin túrawarmiayi. Yusa Papiriin Eríasa túrunatniuri aarma amia tímiatrusanu túrawarmiayi” tímiayi Jesus.

**Jesus iwianchin jiiki akupkamiania nu**

(Mat. 17.14-21; Ruk. 9.37-43)

<sup>14</sup>Tura ni unuiniamuri matsatmanum atak wáketuk, ti untsuri aents káutkar Israer-shuara jintinniurisha niijiai tunai pujuinian wáinkiamiayi. <sup>15</sup>Tura aencha, Jesusan wáinkiar warainiak, tsékenki weriar, áujsarmiayi. <sup>16</sup>Túrunawarmatai, Jesus chicharainiak, “Warí tunaiyarum?” tímiayi.

<sup>17</sup>Tutai chikichik ayak “Uuntá, winia uchirun Ámin itiarjame. Iwianchruku asa chichachuuti. <sup>18</sup>Túmakui íwianch en̄kentakun̄ paat ajar áepeawai; túram uchisha saun kaput apak nain̄ kátetete awajeawai. Túram kakaakcha ame unuiniamurmin seamjai, jíirtukti tusan, túrasha tujinrutkarai” tímiayi.

<sup>19</sup>Tutai Jesus tímiayi “Yúsan enentáimtichutirmea urutmá tsawantak pujustaj atumjaj. Urutmá katsuntrataj! Uchi itiatarum” tímiayi. <sup>20</sup>Takui uchin Jesusan itiararmiayi. Tura íwianch uchin en̄kemta Jesusan wáiniak uchin ajakramiayi. Uchisha chichiptur nun̄ká iniaan péper-péper ajakin wenunam saun apakmiayi.

<sup>21</sup>Túrunamtai Jesus ni apar̄in̄ aniasmiayi “¿Urutá yaunchu áinkiait?”

Tutai ni apar̄i tímiayi “Úchichik áinkiaiti. <sup>22</sup>Tuma asa tuke jutikiú pujurniuiti; jiniumsha apeawai, entsá maataj tusa ajuaawai. Yaintrukminiaitkiumka waitneasam yaintrukta” tímiayi.

<sup>23</sup>Tutai Jesus chicharuk “¿Urukamtai, yaintrukminiaitkiumka, tame? Nekaata, shuar Winia nekas enentáimturna nu ashí túramniaiti” tímiayi.

<sup>24</sup>Tutai uchi apar̄i kakantar chichaak, “Uuntá, nekas enentáimtajme. Nekas enentáimtustinian táasjana nu yáintkiata” tímiayi.

<sup>25</sup>Tura shuar untsur̄i káunainian Jesus wáiniak kakantuk “Empeku chichachu awajin iwianchi jíinkitia, tájame. Jíinkim ataksha wayawaipia” tímiayi. <sup>26</sup>Tura íwianch jíiniuk untsamak uchin we-werkasa ajakar chichichiptu áepkimiayi. Túram uchi jaka ímianis tepemiayi. Túrunamtai untsur̄i shuar “jakayi” tiarmiayi. <sup>27</sup>Támanak Jesus uwejen achik awajkimiayi, tura uchi nantaki wajakmiayi.

<sup>28</sup>Tura Jesus jeá wayam̄tai, nin̄ki pujusar, ni unuiniamur̄i aniasar “¿Urukamtai iisha jíiktin̄ tujinkiamaj?” tiarmiayi.

<sup>29</sup>Tutai Jesus tímiayi “Ju iwianchkia ijiarmar Yus áujkur jíikminiaiti” tímiayi.

### Jesus ataksha ni jákatniur̄in̄ ujakmiania nu

(Mat. 17.22-23; Ruk. 9.43-45)

<sup>30</sup>Nuyá jíinkiar Kariréa nun̄kanmaani nan̄kaamakarmiayi. Ni unuiniamur̄in̄ unuinia asa nu nan̄kaamamun nekaawar̄ain̄ tusa Jesus nakitmiayi. <sup>31</sup>Unuiniaak juna tímiayi: “Wi Aents Ajasuitiaj juna mantamnati tusar achirkar surutkartatui. Tura máamuitiatnak, iwiansamunmayan̄ menaintiú tsawantaj̄ nantaktiatjai” tímiayi. <sup>32</sup>Tura nu chichaman nekaacharmiayi. Nékainiachiat, anintrustinian arantukarmiayi.

“¿Yaki imiá nan̄kaamantuit?”

(Mat. 18.1-5; Ruk. 9.46-48)

<sup>33</sup>Nuyá Kapernáum péprunam jeawarmiayi. Tura Jesus jeá pujus ni unuiniamur̄in̄ aniniak, “¿Atumsha jintiá winisrum warí áujmatmiarum?”



tímiayi. <sup>34</sup>Tura natsarar pachischarmiayi. Kame jintiá wésar “ijjaj ¿yaki imiá nan<sub>ka</sub>amantu ajasat?” tunainiar<sub>mi</sub>ayi. <sup>35</sup>Ni unuiniamur<sub>i</sub> pachischarmatai, Jesus pujus ashí tuse unuiniamur<sub>i</sub>n irur chichaak “Shuar nekas nan<sub>ka</sub>amantu ajastajtsa wakerakka, peejchachia nuke enentáimtumar shuara yáin<sub>tr</sub>i atí” tímiayi. <sup>36</sup>Tura uchin itiáa miniakas chichaak: <sup>37</sup>“Shuar uchin winia naaru<sub>j</sub> shiir awajeakka Winia shiir awajawai. Tura Winia akuptukua nunasha shiir awajawai” tímiayi.

**“Shuar in nakitramachku<sub>ka</sub> in páchitkiawai”**

*(Ruk. 9.49-50; Mat. 10.42)*

<sup>38</sup>Nuyá Juan<sub>j</sub> Jesusan chicharuk “Uuntá, shuar ame náarmin pachis iwianchin akupea wainkiamji. Tura ijjaj írutkachu asamtai nu túratin suritkiamji” tímiayi.

<sup>39</sup>Tutai Jesus tímiayi “Antsu suritkiairap. Shuar winia náarun pachis tujinkiamun túrakka, nu shuar wari tsanumprutratniun tujinkiatawai. <sup>40</sup>Shuar in nakitramachku<sub>ka</sub>, in páchitkiawai, tímiayi. <sup>41</sup>Winia nemarka asakrumin shuar yumiichinkesha ajampramkuka ántar túratsui; akikma átatui” tímiayi.

*(Mat. 18.6-9; Ruk. 17.1-2)*

<sup>42</sup>Tura shuar ju<sub>j</sub> uchin Winia umirtuinia nuna yajauchin túrumtikiamtáin<sub>ka</sub>, ti asutniatawai. Tuma asamtai uchin yajauchin túrumtiktsain<sub>i</sub>n kuntujen kayajaj<sub>i</sub> jin<sub>ki</sub>ar nayaantsanam ajunmaka maak ainti. <sup>43</sup>Ame uwejmek yajauchin túrumtik<sub>k</sub>ramamniaitkuin<sub>ka</sub> tsupikta. Mai uwejtuk wáitsatniunam jeatniujain<sub>ka</sub> chikichík uwejjaj<sub>i</sub> ju<sub>j</sub> nun<sub>ka</sub>nam pujusar tuke iwiaaku pujustinnium jeatin ti shiiraiti. Warí, wáitsatniunman<sub>ka</sub> ji kajinkiashtin awai, <sup>44</sup>jákaru akarisha jáiniatsui tura jisha tuke kapa<sub>aw</sub>ai. <sup>45</sup>Nawemsha yajauchin túrumtik<sub>k</sub>ramamniaitkuin<sub>ka</sub> nusha tsupikta. Mai nawentuk wáitsatniunam jeatniujain<sub>ka</sub> chikichík nawejaj<sub>i</sub> ju<sub>j</sub> nun<sub>ka</sub>nam pujusar tuke iwiaaku pujustinnium jeatin ti shiiraiti. Wáitsatniunman<sub>ka</sub> ji kajinkiashtin awai, <sup>46</sup>jákaru akarisha jáiniatsui tura jisha tuke kapa<sub>aw</sub>ai. <sup>47</sup>Jimisha yajauchin túrumtik<sub>k</sub>ramamniaitkuin<sub>ka</sub> ukuinkiata. Mai jii<sub>nt</sub>iu<sub>k</sub> wáitsatniunam jeatniujain<sub>ka</sub> chikichík jijjaj<sub>i</sub> ju<sub>j</sub> nun<sub>ka</sub>nam pujusar Yus akupeana nu<sub>j</sub> jeatin ti shiiraiti; <sup>48</sup>wáitsatniunman<sub>ka</sub> jákaru akarisha jáiniatsui tura jisha tuke kapa<sub>aw</sub>ai.

<sup>49</sup>Naman<sub>j</sub> Yus susamu weaktinia áintsan<sub>j</sub> aentstirmesha jijjaj<sub>i</sub> nekapnastatrumesha. <sup>50</sup>Weesha ti pen<sub>ker</sub>aitiat michumarka, ¿itiurak jea-jeat á<sub>tin</sub>k? Wats, wee jeakua áintsarmek atumek shiir enentáimtunaistarum” tímiayi Jesus.

**Nuwa<sub>j</sub> ajapatniun Jesus áujmatsamiania nu**

*(Mat. 19.1-12; Ruk. 16.18)*

**10** <sup>1</sup>Jesus Kapernáumnumia<sub>j</sub> jiin<sub>ki</sub>, Jutía nun<sub>ka</sub>nam nan<sub>ka</sub>amaki, Jur<sub>tan</sub> entsa amain jeamiayi. Nu<sub>j</sub> pujaj<sub>i</sub>, aents ataksha Nin

irunturarmiyai. Iruntrarmatai tuke túrin asa ataksha unuiniamiyai.

<sup>2</sup>Tura Pariséu Jesusan nekapsatai tusar wakeruiniak, Nin chicharainiak “¿Áishman ni nuarí ajapatin tsan̄kamkamukait?” tiarmiayi.

<sup>3</sup>Tutai Jesus tímiayi “¿Muisais wariniak timia?”

<sup>4</sup>Tutai “Papíjjai in ajapatniun tsan̄katramkamijai” tiarmiayi.

<sup>5</sup>Tutai Jesus tímiayi “Atumí enentai kátsuram asamtai nu chichaman atumin tsan̄katramkamiarme. <sup>6</sup>Tura Yus yámankamtaik ashí najanamiya nui, áishmannasha nuwancha najanamiayi. <sup>7</sup>Tuma asamtai áishman ni aparíncha nukuríncha kanaki ikiuki, ni nuaríjjai tsan̄ntiniiaiti. <sup>8</sup>Warí, áishman nuaríjjai jímiaraitiat chikichik ajasartatui. Tuma asamtai yamáí jímiarchaiti, antsu chikichik ajasuiti. <sup>9</sup>Tuma asa, Yus atsankiania nuna, aents akankashtiniiaiti” tímiayi.

<sup>10</sup>Tura urum jeá wayawar, Jesusa unuiniamurí nu chichaman ataksha aniasarmiayi. <sup>11</sup>Tuiniakui Jesus tímiayi “Shuar ni nuarín ajapa ikiuak chikichan nuátkanka, emka nuarín yajauch awajas, ikiuak, tsanirmayi. <sup>12</sup>Nuwasha ni áishrí ajapa ikiuak, chikichjai niiniurtukka, niisha tsanirmayi” tímiayi.

#### **Jesus uchin shiir awajsamiania nu**

*(Mat. 19.13-15; Ruk. 18.15-17)*

<sup>13</sup>Antin̄kiarat tusar uchin Jesusan itiararmiayi. Túruiniakui Jesusa unuiniamurí “itiairap” tiarmiayi.

<sup>14</sup>Tura Jesus nuna wáiniak, kajek juna tímiayi “Uchi Winí winitin tsan̄katrukutarum. Suritkiairap. Iis, shuar ju uchia núnisan̄ peejchach enentáimtainia nu Yusa akupeamurín pachiinkiamniaiti. <sup>15</sup>Nuní asamtai tájarme, uchi umiana núnisan̄ Yusa akupkamurín shuar umíachkun̄ka nuna pachiinkiachminiaiti. <sup>16</sup>Nuyá uchin miniakas, “Yus yáinmakarti” tímiayi.

#### **Kuítrintin Jesusan áujsamiania nu**

*(Mat. 19.16-30; Ruk. 18.18-30)*

<sup>17</sup>Ukunam, Jesus nuyá weai, shuar tseke Nin tarimiayi. Tarí tikishmatar chicharuk “¿Uuntá, Amesha ti péñkeraitme. Tuma asam, turuttia, ¿warinia túrakna tuke iwiaaku átataj?” tímiayi.

<sup>18</sup>Tutai Jesus tímiayi, “¿Urukamtai Winia, péñkeraitme, túrutam? Shuarka chikichkisha péñkerka atsawai. Aya Yúsak péñkeraiti. <sup>19</sup>Yus akupkamu nékatsmek. Ju áiniawai: tsanirmawairap, man̄kartuawairap, kasamkairap, chíkich shuar tsanumprurairap, anan̄kartuawairap, apasha nukusha umirkatarum. Nu áiniawai” tímiayi.

<sup>20</sup>Tutai kuítrintin chichaak “Uunta, núnaka úchichik mash umiki tsakaruitjai” tímiayi.

<sup>21</sup>Tutai Jesus iis waitnenmai tímiayi “Chikichik táasume. Weme ashí áminiu ana nu surukta. Túram nu kuit kuítrincha susarta. Túrakum

nayaimpiniam kuítrum ikiaun\_kattme. Túram winitia, krus yanaktinia áintsamek itiurchatrum aín nemartusta” tímiayi.

<sup>22</sup>Tura kuítrintin nu chichaman antuk, wake mesek, kúntuts enentáimiar wémiayi, ti kuitrintin asa.

<sup>23</sup>Nii wématai, Jesus ashí ni téntakmarín iis, ni unuiniamurín chicharuk, “Kuítrintin ainia nu Yusa akupeamurín pachiinkiatin ti itiurchaiti” tímiayi. <sup>24</sup>Takui ni unuiniamurí nuna antukar niisháa enentáimprarmiyai. Túramtai Jesus tímiayi “Uchiru antuktarum. Shuar kuítriniak enentáimtuinia nuka, Yusa akupeamurín pachiinkiatin penké itiurchataiti. <sup>25</sup>Uunt kamiriu auja jíin wayatin ana nú nankaamas, kuítrintin Yusa akupeamurín pachiinkiatin itiurchataiti” tímiayi.

<sup>26</sup>Nuna antukar nú arant niisháa enentáimprarmiyai. “¿Nuiñkia yaki uwempramniait?” tunaiyarmiyai.

<sup>27</sup>Tura Jesus nin iisar chichainiak “Aents niñki túrachminiaiti, antsu Yus túramniaiti. Yuska ashí túramniaiti” tímiayi.

<sup>28</sup>Nuyá Pítiur Nin chicharuk “Tis, iikia ashí ikiukir némartujuk” tímiayi.

<sup>29</sup>Tutai Jesussha tímiayi, “Nekas tájarme, shuar Winia nemartak Yus-Chichamnasha ipiampartasa wakerak ni jeencha, yachíncha, umaincha, aparíncha, nukuríncha, nuaríncha, uchiríncha, nunkencha uyumatsuk ikiuakka, <sup>30</sup>nu shuar jü nunkanam sian patatnas jeencha, yachíncha, umaincha, nukuríncha, uchiríncha, nunkencha, jü nunkanam wáitiatat sunastatui. Tura ukunam, nunka amuukamtai, nu shuarsha jáchatainiam tuke penker pujustatui. <sup>31</sup>Tura untsurí shuar yamáí penkerí ainia nu, ukunam ukunmaaní pujusartatui, tura íksan untsurí shuar yamáí ukunmayá ainia nu, ukunam eem pujusartatui” tímiayi Jesus.

### **Jesus ni jákatniurí ataksha ujakmiania nu** (*Mat. 20.17-19; Ruk. 18.31-34*)

<sup>32</sup>Nuyá arak Jerusaréñnum wéenak, jintiak wearmiayi. Jesuska émak wémiayi. Ni unuiniamurísha niisháa enentáimprarmiyai. Ashamainiyatan Jesusan nemarsarmiyai. Túmainiaí atak ni nekas unuiniamurín akankiar, ni túrunatniurín ujakmiayi. <sup>33</sup>Ujaak tímiayi “Antuktarum, arak Jerusaréñnum wéaji. Nui Winia, Aents Ajasuitjiana juna, Patri uuntriíncha, jintinniummasha surutkartatui. Niisha apachnium mantamnati tusar surutkartatui. <sup>34</sup>Nusha Winia wishikrurar, katsumprukar, usukruawar mantuawartatui. Túramaitiatnak menaintiú tsawantai nantaktiatjai” tímiayi.

### **Jakupu Juanjai seawarmiania nu** (*Mat. 20.20-28*)

<sup>35</sup>Sepetéu uchirí Jakupusha Juansha Jesusan taruntarmiyai. Taruntar “Uuntá, ii seattajnia nu túrak tusar wakeraji” tiarmiyai.

<sup>36</sup>Tutai Jesus tímiayi “¿Warí itiurtukat tusam wakerutam?”

<sup>37</sup>Tutai “Ame nupetmaktin tsawantrum jeamtai, iisha Ámijjajai pujustaitisar wakeraji, wi untsuurumini, winia yatsursha menaarmini. Nu tsan̄katrukta” tíarmiayi.

<sup>38</sup>Tura Jesus tímiayi “Átum seatrumna nu nékatsrume. Wi umartatjana nu umarminkaitrum. Tura Wi imiantiatjana núnisrum imianminkaitrum” tímiayi.

<sup>39</sup>Niisha tiarmiayi, “Túramniaitji, páchitskea.”

Tuñiakui Jesus tímiayi “Wats, Wi umartatjana nu umartatrume, tura Wi imiantiatjana núnisrumek imiantiatrume. <sup>40</sup>Túrasha winia untsuuruini, menaruinisha átum pujustinian Wikia súsashtiniaitjarne, antsu Yus wakerana nu nuin̄ apujstatawai” tímiayi.

<sup>41</sup>Tura chíkich tias unuiniamur̄i nuna anturkar Jakupuncha, Juánnasha ti kajerarmiayi. <sup>42</sup>Tura Jesus ni unuiniamur̄in irur tímiayi “Ju nékarme; Yus-shuarchanum akupniuitjai tuinia nu, waantu enentáimtumas, ni shuar̄in ti akupeawai; tura uunt ainia nusha ashí shuar ti takamtikiainiawai. <sup>43</sup>Antsu atumjaj̄i núnisan̄ atsutniuiti. Átumka, wi unuiniamutiram, uunt ajastaj tusarum wakerakrumka, ashí yáimin ajastiniaitrum. <sup>44</sup>Shuar atumí penker̄i ajastajtsa wakerakka, takarniua nuke ajas, umirtamkatí. <sup>45</sup>Wisha, Aents Ajasuitjiana ju, shuar takartusarat tusan táchamjai, antsu ashí shuar̄an yáintaj tusan táwitjai. Wisha jarukan shuar̄an uwemtikratajtsan táwitjai” tímiayi.

### Jesus Partimiásan tsuármiania nu

(Mat. 20.29-34; Ruk. 18.35-43)

<sup>46</sup>Jesus ni unuiniamur̄ijjaj̄i, tura chíkich untsur̄i aentsjaj̄i Jirikiú péprunam jeawarmiayi. Nuyá Jirikiúnmayasha jíinkiar weenai, Timiasa uchir̄i Partimiás, kusuru amia nu, jintiá yantam kuítian seamu pujumiayi.

<sup>47</sup>Niisha, Nasarénumiã Jesusaiti táman antuk, untsumuk “Uunt Jesusa, amesha Uunt Akupin Tawit weeachukaitiam, Yus anaikiachmakaitiam. Winiaja waitnentrurta” tímiayi.

<sup>48</sup>Tura untsur̄i nūj matsamarmia nu nin chicharainiak “Takamatsata” tiarmiayi.

Niisha nú nan̄kaamas untsummiayi “Tawit weeá Jesúsá, winia waitnentrurta.”

<sup>49</sup>Nuna antuk Jesus wajatas, chichaak “Untsuktarum” tímiayi.

Takui shuar kusurun untsuuniak “Kakaram ajasta. Wajaktia; untsurmawai” tiarmiayi.

<sup>50</sup>Tuiniakui niisha esekmatair̄in ajapa ikiuak wajaki Jesusan tseke tarimiayi.

<sup>51</sup>Tura Jesus nin chicharuk “¿Winia itiurtukat tusamea wakerutam?” tímiayi.

Tutai kusuru chicharuk “Uunta, ímtiasan wakerajai” tímiayi.

<sup>52</sup>Tutai Jesus chichaak “Shiir wetá. Winia nekas enentáimtura asam penker ajasume” tímiayi. Tura nu chichamaik ímpramiayi. Tura Jesusan nemarki wémiayi.

### Jesus Jerusaréñnum wayámiania nu

(*Mat. 21.1-11; Ruk. 19.28-40; Juan 12.12-19*)

**11** <sup>1</sup>Wésar Jerusaréñnum tura Petpajái péprusha Petania péprusha Uriwiu naint ínkiuasmak ámanum jeawar, Jesus jimiará unuiniamurín ujuikimiayi. <sup>2</sup>Ujuiak tímiayi “Aatuniní pépruchiniam werum nuín umpuuru uchich jínkiamu wáinkiatarme. Nu umpuuruکا tuke entsamprukhamuiti. Nu atiarum utitiarum. <sup>3</sup>Tura “¿Urukamtia áitkiarum?” turamainiakuisa, “ii Uuntrí wakerawai” titiarum” tímiayi. <sup>4</sup>Tutai wearmiayi. Tura umpuurun wáitiniam aani jínkiamun, jintiá yantamnum wajan wáinkiar atiawarmiayi. <sup>5</sup>Nuǐ pujuarmia nu “¿Warí áitkiarum. Urukamtai umpuuru atíarum?” tiarmiayi. <sup>6</sup>Takui, niisha Jesus timia nu ujakam suritkiacharmiayi. <sup>7</sup>Tura umpuurun Jesusan itiarar pushirín umpuurunam awantkarmiayi. Túram Jesus entsamkamiayi. <sup>8</sup>Tura untsurí shuarsha pushirín jintianam ayapar áinkiararmiayi. Chíkichcha jintiá yantamnumiān nukan juuk jintianam áintrarmiayi. <sup>9</sup>Eem wearmia nusha, uku winiarmia nusha warainiak “Jusanna” untsamkarmiayi. “Yusa náarín winiana nu imiá penkeraiti. <sup>10</sup>Ii untrí Tawitia akupeamurí tátatna nu imiá penker atí. Ii Yusrǐ naarǐ shiir ati.” Tu untsamki wearmiayi. <sup>11</sup>Tura Jesus Jerusaréñnum jeamiayi. Jeá, Yusa Uunt Jeen wayamiayi. Tura ashí iiyasua amik, kintiamprajǐ tusa ni tuse unuiniamurǐjǐ tǐjǐuch Petania péprunam wearmiayi.

### Jesus iikiu numin yumínkramiania nu

(*Mat. 21.18-19*)

<sup>12</sup>Kashin tsawar, Petanianmaya jintia wesa, Jesus tsukammiayi. <sup>13</sup>Tura arant wajan iikiu numirín núkenniun wáiniak, nereatsuash tusa iyumiayi. Tura nereshtairín asamtai neren penké wáinkiachmiayi. <sup>14</sup>Nuyá iikiu numin yumínkeak: “Ame nerem penké yunaashti” tímiayi. Ni unuiniamurǐsha nuna táman antukarmiayi.

### Yusa Uunt Jeen suruktinian Jesus suritkiamiania nu

(*Mat. 21.12-17; Ruk. 19.45-48; Juan 2.13-22*)

<sup>15</sup>Nuyá atak Jerusaréñnum jeawarmiayi. Nuǐ Jesus Yusa Uunt Jeen wayá suruktai tusar pujuarmia nuna jǐiki akupkatasa nanǐkammiayi. Kuítian yapajín armia nuna misarín tura yampitsan súrin armia nuna kutanǐkrincha ayanturmiayi. <sup>16</sup>Tura káarak entsaki Yusa Uunt Jeen nanǐkaamaktinian suritkiarmiayi. <sup>17</sup>Nuyá “Yus áusatai tusar ashí shuar

Yusa jeen wayamnia átatui” tú aarchamukait Yusa Papiriin. Antsu átumka Yusa jee kasa matsamtaiya nútikiarme” tímiayi. <sup>18</sup>Aents nui matsamarmia nu Jesusa chichamen antukar ti enentáimprarmiayi. Tuma asamtai Israer-patri úuntri<sup>1</sup>sha, Israer-shuara jintinniur<sup>1</sup>sha, nuna nekaawar, Jesusan ashamainiak mantamnati tusar chichaman jurusarmiayi. <sup>19</sup>Nuyá kiakui Jesus Jerusaré<sup>1</sup>numia jiinkimiayi.

**Ikiu numin káarun wáinkiarmania nu**

*(Mat. 21.20-22)*

<sup>20</sup>Kashin káshik nan<sup>1</sup>kaamainiak iikiu numin kan<sup>1</sup>kaptuk jaka wajan wáinkiar<sup>1</sup>miayi. <sup>21</sup>Tura Pítiur enentáimias Jesusan tímiayi “Uunta, iista, iikiu Ame yumi<sup>1</sup>nkramam nu kan<sup>1</sup>kaptuk káarchaik.”

<sup>22</sup>Tutai Jesus tímiayi “Yus nekas enentáimtustarum. <sup>23</sup>Iis, nekas tátsujrumek, shuar “Yus nekas túratpiash” tútsuk, tura “wi tájana nuna Yus nekas túrattawai” tu enentáimsar, ju nántian “jiinki nayaantsanam iniánti” tákuin<sup>1</sup>kia, páchitsuk inia<sup>1</sup>ntatui, tímiayi. <sup>24</sup>Tuma asamtai tájarme, ashí Yus áujkuram searmena nuna suramsattarme. “Wi seajna nuna yamá takakjai” tu enentáimkiurmeka, wáinkiáttarme. <sup>25</sup>Tura Yus áujkuram pujarmena nu, kajerna<sup>1</sup>yamuram ákuin<sup>1</sup>kia tsan<sup>1</sup>kurnáiratarum. Atumí Aparí nayaimpiniam pujana nu atumí tunaar<sup>1</sup>in tsan<sup>1</sup>kurturti tusarum túratarum. <sup>26</sup>Atumsha tsan<sup>1</sup>kurnáiyachkur<sup>1</sup>minkia, núnisan<sup>1</sup> atumí Aparí nayaimpiniam pujana nu atumí tunaar<sup>1</sup>in tsan<sup>1</sup>kurtámprashtatrumé” tímiayi Jesus.

**Yusa kakarmarijia<sup>1</sup> Jesus takasmiania nu**

*(Mat. 21.23-27; Ruk. 20.1-8)*

<sup>27</sup>Ataksha Jerusaré<sup>1</sup>num wakеткиarmiayi. Jesus Yusa Uunt Jeen wekai, Israer-patri úuntri<sup>1</sup>sha, Israer-shuara jintinniur<sup>1</sup>sha, Israer-shuara iruntai-je<sup>1</sup> úuntri<sup>1</sup>sha Nin káutkarmiayi. <sup>28</sup>Káutkar Jesusan tiarmiayi “¿Yana kakarmarijia<sup>1</sup> ju túram. Ame túramna nuna ya tsan<sup>1</sup>katrama?” tiarmiayi.

<sup>29</sup>Tuiniakui Jesus tímiayi, “Chikichkiniak aniatatjarme. Áirkatarum. Túrakrumni<sup>1</sup>kia Wisha winia takastinian tsan<sup>1</sup>katruk<sup>1</sup>mia nuna ujaktatjarme. <sup>30</sup>Wats, turutiarum, ¿ya Juan imiaitniun tsan<sup>1</sup>katkama? ¿Shuar tsan<sup>1</sup>katkamka? ¿Yus tsan<sup>1</sup>katkamka? Áirkatarum” tímiayi.

<sup>31</sup>Tura niisha enentáimprar “Yus akupkai<sup>1</sup>” tákurninkia, “¿urukam<sup>1</sup>tia umirkachuram?” turamchattajik. <sup>32</sup>Antsu “shuar tsan<sup>1</sup>katkai<sup>1</sup>” tákurkia, ashí shuar ashamaji” tunainiar<sup>1</sup>miayi. Ashí aents Juan nekas Yúsnan etserniuiti, tu enentáimainiakui ashammiarmiayi. <sup>33</sup>Nuyá Jesusan tiarmiayi “Iikia nékatsji.”

Tutai Jesus tímiayi “Wisha núnisnak yana kakarmarijia<sup>1</sup> takaaj nuna ujachhattajrume.”

**Yajauch takau armia nu**  
(*Mat. 21.33-46; Ruk. 20.9-19*)

**12** <sup>1</sup>Jesus ju métek-taku chichaman unuiniamiayi: “Shuar uwa ajan ajam wenuimiai. Nuyá uwa nekeetai najanamai. Tura kumpin jean najanamai. Najana takartusti tusa shuáran ikiuak nin<sup>1</sup>kia jeachat wémai. <sup>2</sup>Neretai tsawant jeamtai, ni takarniur<sup>in</sup> júukman akankat tusa akupkamai. <sup>3</sup>Tura ajanam takau arma nu, nu takarniun achik, katsumkar, áyatik awain<sup>in</sup>kiarmai. <sup>4</sup>Ataksha chíkich takarniun akupkamai, tura nunasha kayajai tukurar, múuknum katsumkar, katsekar awain<sup>in</sup>kiarmai. <sup>5</sup>Tuma ain ataksha chíkichan akupkamai, tura nunasha máawarmai. Ti untsur<sup>in</sup> akupramai. Chikichnasha katsumkarmai, chikichan máawarmai.

<sup>6</sup>Tura nijjai chikichik tuke ámiayi, nuka ni aneamu uchiri. Nu uchinha ukunam akupkamai. Akupeak “Winia uchirnaka shiir awajsartatui” tímiayi. <sup>7</sup>Tura ni uchiri winian wáinkiar, takau shuar nuámtak chichainiak “Júka ajá nérenniu uchir<sup>in</sup>ti. Wátsek, maatai; túramka ájaka iiniu átatui” tiarmai. <sup>8</sup>Túsar achikiar máawarmai. Ayashincha ajanmaya ajapawarmai” tímiayi.

<sup>9</sup>Tura nuyá aniasmiayi, “¿Wats, warí enentáimsarum; ajá nérenniuri itiurkattawa? Jeashtanmayá taa, ajá takainia nú shuaran amuktatui. Ni ajar<sup>in</sup>cha chikichan ikiastatui. <sup>10</sup>Ju, Yus-Papinium aarma ana nu áujsachukaitrum:

Kaya pé<sup>n</sup>kernak, jeammin “yajauchiiti” tusar ajapawarmia nu ashí kayajai nan<sup>ka</sup>amas pé<sup>n</sup>ker apujsamuiti. <sup>11</sup>Nusha Yus túramuiti. Iisha íisar ti enentáimtaji.

Nuke áarmaiti” tímiayi.

<sup>12</sup>Tura nú metek-taku chichamjai nin áujmatma asa achiktai tusar chichaman jurusarmiayi. Túmainiyat shuáran ashamainiak Jesusan ikiuiniak wearmiayi.

**Uunt akupin súsatin tura Yus súsatin**  
(*Mat. 22.15-22; Ruk. 20.20-26*)

<sup>13</sup>Tura wear, imiaamtikiar yaja chichakmatai nújai yajauch títai tusar Pariséu shuarnasha, Erutisa nemar<sup>in</sup> shuarnasha akatar Jesusan akuptukarmiayi. <sup>14</sup>Túram Nin jeariar chicharainiak: “Uuntá, aents nakitiainia<sup>in</sup> tuke nekas chicham páchitsuk chichaame, nu nékaji. Aents pátatek iiyatsme, antsu nekas Yusa jinti unuiniame. ¿Waritia enentáimiam, ii kuitri uunt Sesar súsatin pé<sup>n</sup>kerkait. Susattajik. Suritkiattajik? Nu nekaatai tusar wakeraji” tiarmiayi.

<sup>15</sup>Tura Jesus ni yajauch enentáimmar<sup>in</sup> nekara “¿Urukamtai Winia yajauch titi tusarum wakerutarum? Kuit itiatarum, Wi íistaj” tímiayi.

<sup>16</sup>Tutai kuítian itiariarmiayi.

Jesus nuna iis tímiayi, “¿Juísha yana yapí tura yana naari áarmait?” tímiayi.

Tutai “Uunt Sésarna” tiarmiayi.

<sup>17</sup>Nuyá Jesus tímiayi “Uunt Sésarna ana nu susatarum; túrarum Yúsnaka Yus susatarum” tímiayi. Tura ni áimkiamurin antukar ti enentáimprarmiayi.

### **Aents nantaktinian Satuséu anintrusarmiania nu**

*(Mat. 22.23-33; Ruk. 20.27-40)*

<sup>18</sup>Nuisha Satuséu aents, jakamunmayá nantaktin penké atsawai tiniu armia nu, Jesusan tariarmiayi. Taar Jesusan chicharainiak: <sup>19</sup>“Uuntá, Muisais juna áatrampramiai:

“Áishman ni nuari júreatsain jakamtainkia, yachin yajutmatrattsá, ni yachi nu wajen nuátkatniúiti.”

<sup>20</sup>Wats, siati yachi áarmiayi. Iwairi nuwan nuatak yajutmatsuk jakamiayi. <sup>21</sup>Ni yachi wajen akinkiamiayi. Nusha núnisan yajutmatsuk jakamiayi. Nuna yachisha núnisan tura nuna yachisha núnisan túramiayi. <sup>22</sup>Tura ashí siati patainman, patainman nu nuwan nuátkarmiayi. Yajutmatsuk, yajutmatsuk jíiniawarmiayi. Tura ukunam nuwasha jakamiayi. <sup>23</sup>Nuinkia nantaktin tsawantai, nantakiarmatai, ¿yana nuarin ati? Ashí siati nuátkacharmaka” tiarmiayi.

<sup>24</sup>Tutai Jesus tímiayi ““Jakamunmayá nantaktin atsawai” tátsurmek. Yusa chichame tura Yusa kakarmari nékachu asarum awajiarne, tímiayi. <sup>25</sup>Iimiatarum, aents jakamunmayá nantakiarmatai, nuatnaikiatin atsuttawai, antsu nayaimpinmayá suntara núnisaran pujusartatui. <sup>26</sup>Tura jakamunmayá nantaktiniapitia tusarum nu nekaatin nekas wakerakrumka Muisais aarmia nu enentáimtustarum. Yuska numichinmayá Muisaisan chicharuk “Wikia Apráama Isaaka tura Jakupu Yúsrintjai” Yus tímiayi. <sup>27</sup>Yaunchu jákaru ain, Yus nuna taku, ayashnium jakayat iwiaaku pujuinia nuna Yusrintjai, tawai. Nekas jaka ainia nuna Yusrinchuiti. Nantaktin atsawai tau asarum awajirurme” tímiayi Jesus.

### **Yus akupkamu imiá penker ainia nu**

*(Mat. 22.34-40)*

<sup>28</sup>Jesussha Satuséusha áujmatnainian Israer-shuara jintinniuri taa anturkamiayi. Anturak, Jesus ti penker áimkiui, niisha Jesusan juna aniasmiayi: “¿Yus akupkamu tuá imiá penkerait?” tímiayi.

<sup>29</sup>Tutai Jesus tímiayi “Júiti Yus akupkamu imiá penker: Antukta Israer shuará. Ii Yusrí úuntaiti, tura Niñki nekas Yúsaiti. <sup>30</sup>Tuma asamtai, tuke enentáimjai ti enentáimsam Uunt Yus aneeta. Túram ame iwiaakmarmesha, kakarmarmesha Yus íktusta. Núiti nekas penker



akupkamu, tímiayi. <sup>31</sup>Nuyasha chikichcha awai, “ame ayashim aneamna tímiatrusmek ame írutramurmesha aneeta.” Chíkich nu nan<sup>ka</sup>amas p<sup>en</sup>ker akupkamu atsawai’ tímiayi.

<sup>32</sup>Tutai jintintin tímiayi “Ee, p<sup>en</sup>keraiti, Uunta. Nékasmek tame. Chikichík Yus awai, chíkichkia atsawai. <sup>33</sup>Tura tuke enentáijjiaí ti enentáimsar, ii kakarmarísha Yus íktusar Nin aneakrikia, ii ayashí aneajnia núnik ii írutramurísha aneatniuitji. Nusha ashí Yus sutai ana nujai nan<sup>ka</sup>amas p<sup>en</sup>keraiti’ tímiayi.

<sup>34</sup>Nuna tiniu asamtai Jesus ni p<sup>en</sup>ker áimkian nekáa “Ameja Yus akupeamunam pachiinkiatin ishichik táasume” tímiayi. Tura nuyá chíkich shuar Jesusan aniastinian arantukarmiayi.

### Kristu tutai zyana uchirimpait?

(Mat. 22.41-46; Ruk. 20.41-44)

<sup>35</sup>Jesus Yusa Uunt J<sup>een</sup> unuiniak pujumiayi. Tura chichaak “¿Urukamtai ii jintinniuri “Yus anaikiamu Krístun Tawitia shuari” tuinia?” <sup>36</sup>Tawit, antsu, Yusa Wakaní aarta tutai, Yus-Papinium juna áarmiayi:

Uunt winia Úuntrun tímiayi “Ame nemasrumin nupetkatin amuatsajin winia untsuuruinini pujusta”.

<sup>37</sup>Kame Tawitkia, Krístun áujmatuk, “winia Uuntru” taisha, ¿itiura ní shuarísha átiñk’?” tímiayi Jesus. Tuma asamtai untsurí shuar nui matsamarmia nu ti shiir antukarmiayi.

### “Israer-shuaran jintintin ainia nújai aneartarum” Jesus tímiania nu

(Mat. 23.1-36; Ruk. 11.37-54; 20.45-47)

<sup>38</sup>Jesus unuiniak tímiayi, “Israer-shuara jintinniuri ainia nujai aneartarum. Niisha waantu enentáimtumasar, esaram pushin entsarar wekasatajtsar wakeruiniawai. Péprunmasha shuar shiir áujtusarat tusa wakeruiniawai. <sup>39</sup>Israer-shuar iruntainiam p<sup>en</sup>keri pujutainium pujustinian wakeruiniawai. Nampernumsha p<sup>en</sup>keri pujutainium pujustinniasha wakeruiniawai. <sup>40</sup>Tura wajé j<sup>een</sup>cha atantainiawai. Túrawar aents nekaracharat tusar ti esaram chichamjai Yúsán áujainiawai. Nincha chikichjai nan<sup>ka</sup>amas Yus asutiawartatui” tímiayi.

### Waje kuítrin susamiania nu

(Ruk. 21.1-4)

<sup>41</sup>Jesus Yusa Uunt J<sup>een</sup> kuit enketainiam naka pujus áents kuítrin chumpian wáinkiamiayi. Untsurí kúitrin tin núkap enkeawarmiayi.

<sup>42</sup>Nuyá waje kuítrincha taa jimiará uchich kuítian, reara áantsan, enkeamiayi. <sup>43</sup>Jesuska unuiniamurin untsuk “Nekas tájarme, ju waje kuítrinchaitiat, ashí enkeena nú nan<sup>ka</sup>amas núkap enkeayi. <sup>44</sup>Iis,

kuítrinniusha nii ampirma nuna enkeenawai, tura antsu ju nuwa kuítrinchaitiat, ampirmatsuk ni yurumatniurín takurmakman ashí enkeayi” tímiayi.

**Yusa Uunt Jeen yumpuntratniun Jesus ujakmiania nu**  
(*Mat. 24.1-2; Ruk. 21.5-6*)

**13** <sup>1</sup>Yusa Uunt Jeenia Jesus jiinkimtai, unuiniamuri Nin tímiayi “Iisia, Uunta, kayasha ti shiir ániawai. Jeasha imiá úuntchakait.”

<sup>2</sup>Tutai Jesus tímiayi “Ju imiá uunt jea wáinmek. Kaya ekenramu au ashí mash yumpunrtartatui” tímiayi.

**Amuukatin tsawantin uruku átatna nu**  
(*Mat. 24.3-28; Ruk. 21.7-24; 17.22-24*)

<sup>3</sup>Nuyá Uriwiu náinnium wakar, Yusa Uunt Jee naka pujusar, Pítrusha, Jakupusha, Juansha, Antressha, níñkimias Jesusan aniiniak <sup>4</sup>“Uuntá, tímiam nu, ¿urutíá túrunatta. Nu túrunatin jeakuisha itiura nekaattajia? Paant ujatmakta” tiarmiayi.

<sup>5</sup>Tutai Jesus tímiayi “Aneartarum, anankramawairap. <sup>6</sup>Nekaatarum, untsurí winia naarun pachisar winiartatui. Chíkich chíkich “Wiitjai Kristu” taku, untsurín anankawartatui. <sup>7</sup>Tura meset chicham ántakrumka, yajaya meset chicham ántakrumsha sapijmiakairap. Nekas túrunashtinkiait. Nujajísha amuukatin tsawantka tuke jeatsui, tímiayi. <sup>8</sup>Shuar chíkich shuarjají mesetan najanawartatui; apachcha chíkich apachjají núnisanan mesetan najanawartatui. Untsurí nunkanam úurkattawai. Tsukasha ártatui, charaatum ajamusha núnisan átatui. Tura nujají itiurchatka aya yama nanakamui.’

<sup>9</sup>“Túmaitkui atumsha aneartarum. Akupin iruntainiumsha surutmakartatrume, tura íi shuar iruntainmasha katsumpramkartatrume. Wíi shuar asakrumin, kapitíánnium, akupniunmasha juramkittiarne. Nují gearum, Winia chichastatrume. <sup>10</sup>Nu túruntsajín ashí áentsnum Yus-Chicham etsernaktiniaiti. <sup>11</sup>Atumin surutmaktasar juramainiakuissha, warintiajak tusarum ti enentáimsairap. Chichastin jeamtai, Yusa Wakaní jintinramattarmena nu titiarum. Iis, atumí enentájijají tíchattarme, antsu Yusa Wakaní jintintiam títiatrume. <sup>12</sup>Nu tsawantin shuarsha ni yachín mantamnati tusa suruktatui. Apasha ni uchirín suruktatui. Uchisha aparíncha nukuríncha kajerak, jakati tusa suruktatui. Núnisan untsurí shuar túrawartatui. <sup>13</sup>Nuiñkia Wíi shuar asakrumin ashí nakitramprartatui. Tura shuar yawetsuk katsuntranaka uwemprattawai” tímiayi.

<sup>14</sup>Nuyá Jesus tímiayi “Shuar juna áujeana nu nekaati. Yúsnan etserin, ni naarí Taniar, ti yajauch tuke emesin ana nuna yaunchu aar

etserkamiayi. Nuka pujushtainiam pujan wáinkuirmesha, ashí Jutía nunkanam pujarmena nu, náinnium pisartarum. <sup>15</sup>Jeá yakiini pujana nu akaiki wariri achiktajtsa, jeen wayashti. <sup>16</sup>Ajanam pujana nusha ni pushirin jukitiajtsa waketkishti. <sup>17</sup>Tura ajamtin áiniana nusha, kuírchin umuntsainia nusha, nu tsawantin timiá itiurchatan wáinkiertatui. <sup>18</sup>Tuma asamtai átum pisaarmena nui yumitin achati tusarum Yus seatarum. <sup>19</sup>Nu tsawantinkia ti wáitsatin átatui. Yama nan<sup>u</sup>kamtaik Yus nunkan najanama nu<sup>u</sup>sha, yamaisha ukunmasha timiu wáitsatin pen<sup>u</sup>ké atsuttawai. <sup>20</sup>Tura Uunt Yus wáitsatin tsawantan ishichik awajsattajai tíchaitku<sup>u</sup>nkia, uwempratin pen<sup>u</sup>ké atsuinti. Tura ni shuarin anaikiamia nuna yáintajtsa wakerak, nu tsawantan ishichik awajsattawai. <sup>21</sup>Nu tsawantai “júiti Kristu” túramku<sup>u</sup>nkia anturkairap. <sup>22</sup>Kame “Kístuitjai” ántar tuinia nu, tura “Yúsnan etserniuitjai” ántar tuinia nusha wantinkiertatui. Wantinkiar Yus anaikiamu shuárnasha anan<sup>u</sup>katai tusar wakeruiniak, ni kakarmarin iniakmainiak aentsti tujintiamun túrartatui. <sup>23</sup>Tura átum aneartarum. Aetak, túruntsa<sup>u</sup>in ujakchajrumek’ tímiayi Jesus.

#### Aents Ajasu tutai tátintri

(Mat. 24.29-35, 42-44; Ruk. 21.25-36)

<sup>24</sup>Jesus tuke unuiniak juna tímiayi: ‘Tura nu wáitsatin nan<sup>u</sup>kaasmatai, etsaasha nantusha etsantrashtatui. <sup>25</sup>Yaasha nayaimpinmaya kakekartatui, tura nayaimpiniam kakaram ainia nu muchirtartatui. <sup>26</sup>Nuyasha ashí aents Winia wáitkiartatui. Wi, Aents Ajasuitjiana ju, ti kakaran, ti wincha ajasan, yuranminiam winiái wáitkiartatui. <sup>27</sup>Nui nayaimpinmaya suntarun akupkattajai, Wíi shuaran ashí nun<sup>u</sup>kanmayan irurarat tusan. Arakaaniya, nun<sup>u</sup>kaaniya, ashí nun<sup>u</sup>ka nan<sup>u</sup>katkamunmayan Wíi shuaran irurartatui.’

<sup>28</sup>Iikiu numi nakumea nu nekaatarum. Ni chin<sup>u</sup>kimpri pun<sup>u</sup>kak nuké jeaku<sup>u</sup>, “ju nun<sup>u</sup>kanam esat jeatemai” tátsurmek. <sup>29</sup>Núnisurmek Wi tájarmena nu wáinkuirmeka, ni tátintri jeatemai tu nekaattarme. <sup>30</sup>Nekas tájar<sup>u</sup>me, yamaí aents pujuinia nu kajin amuiniatsa<sup>u</sup>in, ashí Wi tájana nu túrunatniuiti. <sup>31</sup>Nayaimpisha nun<sup>u</sup>kasha amuukatniuiti. Tura winia chichampruka amuukashtiniaiti. <sup>32</sup>Tura tsawantcha nekanachminiaiti. Nayaimpinmaya suntarsha nékainiatsui; Wisha Yusa Uchiríntiatan nékatsjai. Aya winia Aparuk nékawai. <sup>33</sup>Atumsha anearum enentáimprarum Yus aujsa pujustarum, tsawant nékachu asarum.’

<sup>34</sup>Tura Wikia ju shuarjai méteketjai. Ju shuarsha jeachat weak, ni jeen ikiuawai. Ikiuak ni shuarin wáitrukartí tusa apujas ikiuak ashí shuaran takatrin súawai. Tura wáitin wáinniun, “ameja pen<sup>u</sup>ker wáinkiaata” tímiayi. <sup>35</sup>Wikia nu jeá nérenniua núnisnak, urutai tátataj nékachu asarum anearum pujustarum. Kíaraimpiash, tura ajapkeash, atash

shiniukaimpiash, káshikiash tátatjai. <sup>36</sup>Nérentin aya aneachmak taa, kanúu tepai wáitkiaí tusarum aneartarum. <sup>37</sup>Wi atumin tájana nu, ashí shuáran tajai, anearum pujustarum” tímiayi Jesus.

**Jesusan chichaman jurusarmiania nu**  
(*Mat. 26.1-5; Ruk. 22.1-2; Juan 11.45-53*)

**14** <sup>1</sup>Jímiarchikí tsawant ajasmiayi paskua tutai námper jeatin. Paskua námpertincha wakapruachu tantan yuatin námpernasha métek najanin ármiayi. Israer-patri uuntrisha, Israer-shuara jintinniurisha Jesusan anan̄kar achikiar maatai tusar wakeriarmiayi. <sup>2</sup>Túrasha “Jista tsawantin túrachmi, aents charaatum ajarain̄ tusar” tiarmiayi.

**Nuwá kuñkuinian Jesusan ukatramiania nu**  
(*Mat. 26.6-13; Juan 12.1-8*)

<sup>3</sup>Jesussha Petania péprunam tunamaru Semun̄ka jeen misanam pujan, nuwá tarimiayi. Nartu kuñkuinian arapástru tutai kaya najanamunam piakun itiamiayi. Nu kuñkuin ti kuitiati. Mutí chuchuke kupik Jesusa muuken kuñkuinian ukatramiayi. <sup>4</sup>Tura nuí pujuarmia nu, kajerar tunaiarmiayi “¿Urukantai ju kuñkuinian ántar wasurea? <sup>5</sup>Junasha súrakka, menaintiú sian̄ kuñknium surukminiuyi. Nu kuitcha kuñtrinchan súsan̄ka maak” tiarmiayi. Tusa nuwān kajerkarimiayi.

<sup>6</sup>Antsu Jesus chicharainiak “Iniaisatarum. ¿Urukantai au kajerarum? Winia shiir túrutayi, tímiayi. <sup>7</sup>Kuñtrincha atumjaī tuke íruntuk. Wakerakrumka tuke péñker awajsatniuitrume. Antsu Wikia atumjaī tuke pujushtatjai. <sup>8</sup>Ju nuwá ashí nii túramnia núnaka umikiai. Wi jákatin jeatsain̄, iwiarsatin kuñkuinian shiir ukatrurai. <sup>9</sup>Nekas tájarme, ashí nun̄kanam Yus-Chicham etsernaktatna nuí, ju nuwá túramurisha etsernaktatui, nin kajinmatkiarain̄ tusa” tímiayi.

**Jútas Jesusan suruktaj timiania nu**  
(*Mat. 26.14-16; Ruk. 22.3-6*)

<sup>10</sup>Nuyá Jútas Iskariúti, Jesusa unuiniamur̄intiat, Israer-patri uuntrin̄ werimiayi, Jesusan suruktaj tusa. <sup>11</sup>Niisha nuna antukar, warasar “Kuit amastatji” tiarmiayi. Jútassha Jesusan itiurak yúpchuch tsan̄kamkattaj tusa enentáimias wekaimiayi.

**Jesusjaī iruntrar yurumáwarmia nu**  
(*Mat. 26.17-29; Ruk. 22.7-23; Juan 13.21-30; 1 Kur. 11.23-26*)

<sup>12</sup>Wakapruachu tantan yuatin jísat nan̄kama tsawant tsawarmatai, paskua námpertin yúatin murik máatin jeamtai, Jesusa unuiniamur̄i iniasarmiayi “Paskuatin murikiu yúatin iwaratai tusar ¿tuí wétataji. Tui yurumattam?” tiarmiayi.

<sup>13</sup>Tutai Niisha jimiará unuiniamur̄in akatar akupeak “Péprunam wetarum. Nui áishman̄ yumin jukí wéa wáinkiatarme. Nu áishman̄ nemarsatarum. <sup>14</sup>Wayana nui jeá nérenniur̄i títiarum “Uunt túramui, çwisha, unuiniamur̄jái tui yurumáttaj?” <sup>15</sup>Nu nérentin, yakí písunam uunt tesamunam ashí iwiarumun iniakturmastatrume. Nui jísat ii najanatin iwiaratarum” tímiayi. <sup>16</sup>Ni unuiniamur̄i wear, péprunam jeawar, Jesus timia núnisan̄ wáinkiarimiayi. Tuma ásar paskua námperan iwiararmiayi.

<sup>17</sup>Nuyá kíakui Jesus ni tuse unuiniamur̄ijái wayawarmiayi. <sup>18</sup>Niisha misanam pekaamak, yurumániak pujusar, Jesus tímiayi. “Nekas tájarme, chikichík shuar Wijíai yurumna nu, surutkattawai.”

<sup>19</sup>Nujái kúntuts enentáimprarmiayi. Chíkich chíkich Jesusan aniasar “wíashitiaj” tiarmiayi.

<sup>20</sup>Jesus tímiayi “Ju misanam tuse irunar yurumprum nu, chikichik surutkattawai. Wijíai piniñnum yurumkan ayak yuana núiti. <sup>21</sup>Nekas Wi, Aents Ajasuitjiana ju, jákatniunam wéajai, áarturma áintsanak. Tura áishman̄ súrutna nu ti wáitsattawai. Niisha akiinmainchu ajakuiti” tímiayi.

<sup>22</sup>Yurumainiak Jesus Yúsan yuminkias, yurumkan achik, puuk, chicharainiak “Achiktarum, jusha winia ayashruiti” tímiayi.

<sup>23</sup>Piniñnasha achik, Yúsan yuminkias, ni unuiniamur̄in súsarmiayi. Ashí umararmiayi. <sup>24</sup>Umararmatai Jesus tímiayi “Júiti winia numpar, untsur̄in yáintajtsa puártinia nu. Nujái Yamaram Chichaman Yus najanaiti.

<sup>25</sup>Nekas tájarme, uwa yumir̄i ataksha juí umarchattajai. Tura tsawant jeamtai, ukunmasha, Yus akupeana nui yamarman umartatjai” tímiayi.

**Pítur natsantratniua nuna Jesus ujakmiania nu**  
(*Mat. 26.30-35; Ruk. 22.31-34; Juan 13.36-38*)

<sup>26</sup>Yus-kantan kantámawar, jíinkiar, Uriwiu náinnium wearmiayi. <sup>27</sup>Nuinkia Jesus nin tíarmiayi “Ju kashi átum natsantrurtatrume. “Murikui wáinnium máattajai, túramtai murik tsakiñmakartatui” tu aarchamukait. <sup>28</sup>Tura ukunam Wi nantakin atumin Kariréanam émtuktiajrume” tímiayi.

<sup>29</sup>Tutai Pítur chicharuk “Ámin ashí natsantramainiakuisha, wikia natsantrashtatjame” tímiayi.

<sup>30</sup>Tutai Jesus tímiayi “Nekas tájame, ju kashi atash jimiará shiniatsain̄, natsantrurtatme. “Núnaka nékatsjai” menaintiú turuttiatme” tímiayi.

<sup>31</sup>Tutai Pítur kakaram chichaak “Ámijíai métek máantuiniakuisha, núnaka penké tíchattajai” tímiayi. Ashí ni unuiniamur̄i núnisan̄ tiarmiayi.

**Jesus Jitsemaní ajanam Yúsan áujsamiania nu**  
(*Mat. 26.36-46; Ruk. 22.39-46*)

<sup>32</sup>Nuyá Jitsemaní ajanam wearmiayi. Jeawar Jesus ni unuiniamur̄in tímiayi “Juí pujustarum, Yúsan áujsatasa pujái”. <sup>33</sup>Pítrun, Jakupuncha,

Juánnasha jukimiayi. Tura Jesuska ti kuntuts enentáimiar wake mesek nekapsatasa nan̄kammiayi. <sup>34</sup>Tura nin chicharuk “Wi ti kuntuts enentáimjai, tura jakamnia nekapeajai. Jūi iimia pujutarum” tímiayi. <sup>35</sup>Jesussha ishichik arantach we, nun̄ká piniakumar tepes Yúsán aujmiayi. “Jū wáitsatin átatna nu, túrutatniuitkuin̄kia iniaitiusta” tu seamiai. <sup>36</sup>Tuke áujuk tímiayi “Apawá, ashí tujinchaitme. Pinīnnumiã ashí umartinia áantsan̄ ti nekapsatajna nú wáitsatniun, jurutkitia. Antsu Wi wakeraj nucha, ame wakeramuram túrunati.” <sup>37</sup>Tura ni unuiniamur̄in tarin, kanúu tepenan wáinkiamiayi. Pítrun tímiayi “¿Semun̄ka kánamek. Kanutsuk ishichkisha iimia pujustin tujinkiamek? <sup>38</sup>Anearum Yus áuj̄satarum, tunaanum iniaaraj̄j tusarum. Atum̄i wakan̄īn kakarmaitrume, antsu atum̄i ayash̄īn kakarmachuitrume” tímiayi. <sup>39</sup>Ataksha we, nuik Yúsán áuj̄sama núnisan̄ áuj̄samiayi. <sup>40</sup>Ataksha waketruki, ni unuiniamur̄in kanúu tepenan tarimiayi. Kar̄i ti pujá asantai, Jesusan áuj̄satniun tujinkiarimiayi. <sup>41</sup>Jesus ataksha we, tar̄i tímiayi “Kanarum ayampratarum. Máakete. Jeayi. Wi, Aents Ajasuitjiana jū, tunáa shuarnum surukmaitjai. <sup>42</sup>Nantáktiár̄um, wem̄i. Iis, Winia súrutna nu nuntumsai” tímiayi Jesus.

### Jesusan achikiarmiania nu

(Mat. 26.47-56; Ruk. 22.47-53; Juan̄ 18.2-11)

<sup>43</sup>Jesus nuna chicháa pujá unuiniamur̄i Jútas tarimiayi. Nij̄īj̄ai untsur̄i aents puniá takaku, tura numincha takaku káutarmiayi. Israer-patri uuntrī, Israer-shuara jintinniur̄i, tura Israer-shuara úuntrī akupkarma asa káutkarmiayi. <sup>44</sup>Káuntsaj̄in̄ Jútas chicharainiak, “Wi mukunattaj̄ áuj̄kin núiti Jesus. Achiirum, pé̄nker emetarum jukitiarum” tímiayi. <sup>45</sup>Tura Jesusan tar̄i, mukunuk áuj̄as “Uuntá, Uuntá” tímiayi. <sup>46</sup>Túramtai aencha Jesusan achikiar emetawarmiayi. <sup>47</sup>Túruiniakui nūi wajatusha puniarī úkuitsan̄, patri uuntrī takarniur̄in awati ni kuish̄in tsupirkamiayi.

<sup>48</sup>Túram Jesus áentsun tímiayi “Kasakaitaj̄. Puniaj̄ai numij̄īj̄ai, kasá nútiksarmek achirkatai tusarum tarutniurme. <sup>49</sup>Ashí tsawant atum̄j̄ai Yusa Uunt Jeen wayan̄ unuiniakun pujuchmakaj̄. Túmaj̄i nūi achirkachmarme. Tura Yus timia nu uminkiat tusa jū túrunayi.” <sup>50</sup>Nūinkia ni unuiniamur̄i Niniak ikiuiniak pisararmiayi.

### Natsa pisarmiania nu

<sup>51</sup>Tura áishman̄ nátsaach aya tarachin penumas Jesusan atamprimiayi. Tura natsaach suntar achikiam <sup>52</sup>tarachr̄in ajapa ikiuak mis̄u tséken̄kimiayi.

### Patri uuntrīin Jesusan júkiarmiania nu

(Mat. 26.57-68; Ruk. 22.54-55, 63-71; Juan̄ 18.12-14, 19-24)

<sup>53</sup>Patri uuntrīin̄ Jesusan ejeniarmiayi. Nūi Patri uuntrīsha, Israer-shuara jintinniur̄isha, Israer-shuara uuntrīsha irunturarmiayi. <sup>54</sup>Tura

Pítíur íkian nemarki Patri jeen aach jeá, Patri suntarijajai jinia anamuk pujumiayi. <sup>55</sup>Patri uuntri ashí naamka uunt armia nujajai iruntrar maatai tusar wakeruiniak shuar Jesusan tsanumprurat tusar eatkarmiayi. Nu chichamjai mantamnati, tiarmiayi. Túrasha wáinkiacharmiayi. <sup>56</sup>Túrasha untsurí shuar Jesusan tsanumpruiniayatan yapajjá yapajjá chichainia ásar matai wáinkiacharmiayi. <sup>57</sup>Nuyá chíkích wajakiar wáitruiniak juna tiarmiayi <sup>58</sup>“Yusa Uunt Jeen, aents jeamarmia nuna yumpuntiatjai. Túran menaintiú tsawantai, chikichan, aents jeamchamun jeamtatjai” tau antukmaji” tiarmiayi. <sup>59</sup>Tura tuke yapajjáwar tiarmiayi.

<sup>60</sup>Nuisha Patri uuntri ajapén wajakí Jesusan chicharuk “¿Áimsatin penké tujintiamék. Warinia turamainia?” tímiayi.

<sup>61</sup>Tura Jesus takamtak áimtsuk pujumiayi.

Patri uuntri atak chicharuk “¿Ame nekas Yusa Anaikiamurinkaitiam. Ii Yusri Uunt tajinia nuna Uchirinkaitiam?”

<sup>62</sup>Tutai Jesus tímiayi “Ee, núitjai. Winia, Aents Ajasu tutaintiajna nu Kakaram Yusa untsuurini pujaj wáitkiattarme. Tura nayaimpinmaya yuranminiam winiaj wáitkiattarme” tímiayi.

<sup>63</sup>Tutai Patri uuntri kajek, ni pushirin jaak tímiayi “¿Chíkích títincha warí atumají?” <sup>64</sup>Nii tana nujajai Yúsán kátsekeamu antukurme. ¿Warintia enentáimprum?” tímiayi.

Takui “jakamniaiti” ashí tiarmiayi. <sup>65</sup>Chíkích chíkích Jesusan usukiáwarmiayi. Jjin epetkar awatiar “¿Ya áitkiarma? etserkata” tiarmiayi. Patri suntarisha yapiniam awatiarmiayi.

### Pítíur Jesusan natsantramiania nu

(*Mat. 26.69-75; Ruk. 22.56-62; Juan 18.15-18, 25-29*)

<sup>66</sup>Núnaka túruiniaj Pítru nunká, jea aani pujan, nuwa Patri uuntri takarniuriya nu tarimiayi. <sup>67</sup>Niisha Pitrun jinia anamu pujan wáinkiamiayi. Wáiniak, “Amesha Nasarenumia Jesusajai wekaichukaitiam” tímiayi.

<sup>68</sup>Tutai Pítíur chicharuk, “Nékatsjai. Ame táména nuna nékatsjai” tímiayi. Tura aa wáitiainiam jinkimiayi. Tumai atash shiniukmiayi.

<sup>69</sup>Nu núwasha Pitrun ataksha wáiniak, shuáran nuí pujuinian tímiayi “Júiti ni shuari.”

<sup>70</sup>Tura ataksha “atsá” tímiayi.

Ishichik árusan, shuar nuí pujuarmia nu ataksha Pitrun chicharuk “Nekas ni shuarinme. Kariréanmaya shuárchakaitiam. Auya shuara nuní chichaame” tiarmiayi.

<sup>71</sup>Tutai Pítrusha kakantar chichaak, “Ju áishmannaka átum tárumna núnaka nékatsjai. Wáitrukuinkia Yus írsati” tímiayi. <sup>72</sup>Nuyá ataksha atash shiniukmiayi. Pítrusha, Jesus nuik timian enentáimmiayi. Iis, Jesus nuik tíchamka “Atash jimiar shiniatsajin, ame, núnaka nékatsjai, menaintiu turuttiatme” tíchamka. Pítru nuna enentáimias ti úutmiayi.

**Jesusan Piratuí ejeniarmiania nu**

(*Mat. 27.1-2, 11-14; Ruk. 23.1-5; Juan 18.28-38*)

**15** <sup>1</sup>Tura kashin káshik Patri uuntri, Israer-shuara úuntrijjiaí, Israer-shuara jintinniurijjiaí, ashí naamka armia nujají irunturar, chichaman jurusarmiaí. Túrawar Jesusan jinkiamun apach kapitían Piratuiin ejeniarmiayi. <sup>2</sup>Ejeniarmatai Piratu aniasmiayi “¿Amesha Israer-shuara Uuntrinkáitiam?”

Tutai Jesssha “Amek tame” tímiayi.

<sup>3</sup>Nuyá Patri uuntri ti tsanumprurarmiayi. <sup>4</sup>Ataksha Piratu aniasmiayi “¿Áimsatin penké tujintiamek? Ti untsurí etserturmainiatsuk.” <sup>5</sup>Tura Jesus nunasha áikchamiayi. Túmakui Piratu ti enentáimpramiayi.

**Jesusan, mantamnati, tíarmiania nu**

(*Mat. 27.15-31; Ruk. 23.13-25; Juan 18.38–19.16*)

<sup>6-7</sup>Shuar ámiayi, ni naari Parapás. Niisha ni shuarijjiaí meset ámanum, shuaran maa asamtai sepunam enkeamuyayi. Tura námper tsawantai Piratu sepunmayá chikichík shuarnak jjíki akupniuyayi, aents seawarmia nuna. <sup>8</sup>Nuisha untsurí shuar Piratun káutkar tiarmiayi “Ame ju námpertin tuke túramna nu túratá. <sup>9-10</sup>Patri uuntri Jesusan kajeraru ásar surukarmiayi. Piratusha, nuna nekáa chicharainiak “Israer-shuartiram ¿atumí akupniurin jjíki akupkattajak? ¿Nu wakerarmek?” tímiayi.

<sup>11</sup>Tutai Patri uuntri áentsun chichainiak ““Antsu Parapás jjíkim akúpkatá” titiarum” tiarmiayi.

<sup>12</sup>Tutai Parapásan seawarmatai Piratu ataksha chicharainiak “Jesusnasha, átum ii akupniurí tarumna nuna, ¿itiurkattaja?” tímiayi.

<sup>13</sup>Ataksha ni kakantar tiarmiayi “Krúsnum mantamnati.”

<sup>14</sup>Piratusha nin tiarmiayi “¿Warí tunaana túriniait?” tímiayi.

Takui niisha nú nankaamas kakantar tiarmiayi “Krúsnum mantamnati.”

<sup>15</sup>Tuma asamtai, aents shiir enentáimprartí tusa, Piratu tunáa shuaran, Parapásan jjíki akupkamiayi. Tura Jesusnasha katsumkarum krusnum ajintrurtarum tusa suntaran tsankatkamiayi. <sup>16</sup>Tiniu asamtai suntar Jesusan jukiar, kapitíani jeen awayawarmiayi. Nu jea naari Piritiúriuiti. Túrawar untsurí suntaran untsukarmiayi. <sup>17</sup>Ashí káunkar, pushin kapaanniun Jesusan áentsrarmiayi. Tawasap janke najanamun etsenkrumtikiarmiayi. <sup>18</sup>Nuisha Jesusan áujsar “Shíiraitme, Jesúsá, Israer-shuara akupniuriya” wishikiainiak tiarmiayi. <sup>19</sup>Muuknumsha sapapjai awatiarmiayi; nuyá usukiawarmiayi, túrawar ántar tikishmatrarmiayi. <sup>20</sup>Tura Jesusan wishikrar amukar, kapaantin pushin áitkiar, ni pushirin áentsrarmiayi. Túrawar krúsnum ajintrurtai tusar jjíkiarmiayi.



**Jesusa jakamuri**

(*Mat. 27.32-44; Ruk. 23.26-43; Juan 19.17-27*)

<sup>21</sup> Semun Serini núñkanmayá shuárayayi. Arijantruncha, Rupuncha aparíyayi. Semun kan takatnumiá winian suntar emetawarmiayi, Jesusa krusrin yanaki jukiti tusar. <sup>22</sup> Jesusnasha Kúrkuta náinnium júkiarmiayi. Kúrkuta, shuar chichamjainkia, muuka ukunch naint, tutainti.

<sup>23</sup> Jeawarmatai, karía, mira kunkuinjai pachimprar áartaj tusa susarmiayi Jesusan. Túrasha umarchamiayi. <sup>24-25</sup> Nantu yaki jatemsantai krúsnum ayapar ajintrurar ikiusarmiayi. Túrawar suntar yaki jukit tusar nakurutaijai nakurusar Jesusa pushirin yaruakarmiayi. <sup>26</sup> Urukamtai máamuit, ashí aents nuna nekaawarat tusa, ni krusrin ju aarmauyayi: *ISRAER SHUARA AKUPNIURI*

<sup>27</sup> Nu náinnium jimiará kasa shuaran Nijjai máawarmiayi. Chikichik Jesusa untsuuriñi krúsnum, chikichik ni menaariñi krúsnum máawarmiayi. <sup>28</sup> Yus-Papinium aarma ana nujai uminkiauyayi. Nui “tunáa shuarjai nekapmarmauyayi” tu áarmaiti.

<sup>29</sup> Shuar nankaamainiak, muuke pearar, Jesusan katsekainiak tiarmiayi “Iisia, amesha, “Yusa Uunt Jeen yumpuntiatjai, tura menaintiú tsawantai ataksha jeamkattajai” tíchakaitiam, tiarmiayi. <sup>30</sup> Amek krúsnumiá akaikim uwemprata.” <sup>31</sup> Núnisan Patri uuntrisha, Israer-shuara jintinniurisha Jesusan wishikrar chicharnaisarmiayi “Chikichan uwemtikraitiat, Niñki uwempratniun tujintiawai. <sup>32</sup> Yusa anaikiamuri Krístuashit, ii akupniuriniashit, tiarmiayi. Wats, yamá krúsnumiá akáikití, iisha nu ísar Yus-shuar ajastai” wishikiainiak ántar nuna tiarmiayi. Jesusjai krúsnum ajintruamusha Nin wishikiarmiayi.

(*Mat. 27.45-56; Ruk. 23.44-49; Juan 19.28-30*)

<sup>33</sup> Tutupin jeamtai ti kiritin ajasmiai ashí nunkanam. Tura, nantu nunkaach ajasmatai ataksha tsaapnirmiayi. <sup>34</sup> Nuiñ Jesus kakantar untsumuk tímiayi “Iruí, Iruí, rama sapaktani.” Nuka shuar chichamjainkia, “Yusrú, Yusrú, ¿urukamtai ajapa ikiurkiniam?” tawai. <sup>35</sup> Shuar nui pujuarmia nu, nu chichaman nékachu ásar, nuna antukar “Eríasan untsúawai” tíarmiayi. <sup>36</sup> Chikichik shuar churuinian uruchjai ajamper, sapapjai ijiú mukunati tusa susamiayi. Tura tímiayi “Wajastarum, Erías Nin jukitij tusa winishtimpiash. Iistai” tímiayi.

<sup>37</sup> Nuñkia Jesus kakaram untsumak jakamiayi. <sup>38</sup> Túramtai Yusa Uunt Jeen ejamu niñki jaanakmiayi, yakíyá nunká. <sup>39</sup> Suntara kapitántrisha Jesusan ayamtus wajamia nu, Jesus kakaram untsumak jaamun iis tímiayi “Nuka ti nekas Yusa Uchiriyayi.”

<sup>40</sup> Nuwasha arant ii pujuarmiayi. Nu nuwajai Máktara péprunmayá Marí, chíkich Marisha, Sarumáisha pujuarmiayi. Chíkich Marisha uchich

Jakupuncha Jusencha nukuríyayi. <sup>41</sup>Nu núwaka, Kariréa nunkanam Jesus wekaimia nuí, Nin nemarsar yáintaitsar wekasarmiyai. Untsurí chíkich nuwasha Jesusjái Jerusarénum wear, nu nuwajái arant ii pujuarmiayi.

### Jesuan iwiarsarmiania nu

(*Mat. 27.57-61; Ruk. 23.50-56; Juan 19.38-42*)

<sup>42</sup>Kiatemantai, ayampratin tsawant jeatsain, námper iwiaratin tsawant asantai, <sup>43</sup>Arimiatíanmaya Jusé arantutsuk, kakaram ajas, Piratuí jeá Jesusa ayashin seatajtsa utuamiayi. Nu Jusencha ashí irunin ainia nu anturin ármiyai. Niisha Yus ju nunkanam akupin ajasat tusa nákasmiayi. <sup>44</sup>Tura Jesusa ayashin seam, Piratusha “wárik jaka” tímiayi. Tuma asa suntara kapitíántrin untsurak “¿Nekas jakayik?” tímiayi. <sup>45</sup>Tutai kapitíán “Ee” takui, Jesusa ayashin Jusén tsankatkamiayi. <sup>46</sup>Jusesha puju tarachin péñkeran sumarak, Jesusa ayashin itiar áepas penuarmiayi. Tura yamaram kaya táurmanum ikiusmiayi. Ikius wáitiniam kayan áutumiyai. <sup>47</sup>Tura Máktaranmaya Marí, Jusé nukurí Maríjái ni ikiuamun ii wajarmiayi.

### Jesuan nantakmiania nu

(*Mat. 28.1-10; Ruk. 24.1-12; Juan 20.1-10*)

**16** <sup>1</sup>Tura ayampratin tsawant nankaamasmatai, Máktaranmaya Marisha, Jakupu nukurí Marisha, Sarumáisha, kunkuinian Jesusa ayashin kuertai tusar sumakarmiyai. <sup>2</sup>Tura kashin Tumintin, ti káshik, nantu yáma jiniiai, iwiarsamunam jeariarmiayi. <sup>3</sup>Wésar chichainiak “Iwiarsamu wáitiri kayancha ¿yaki akanketramkattaj?” tiarmiayi. <sup>4</sup>Jear uunt kaya akankekman wáinkiarimiayi. <sup>5</sup>Iwiarsamunam wayawar, natsan esaram puju pushin entsar, untsuurnumaani pujan wáinkiar ti ashamkarmiyai. <sup>6</sup>Túmainiakui natsa tímiayi “Ashamkairap. Nasarénumia Jesus krúsnum jakama nu éarme. Iniantkimiuiti. Jui pujatsui. Wátsek, ju ikiusmanum íistarum. <sup>7</sup>Túrarum werum Pítrusha, chíkich unuiniamurísha ju ujaktarum. Kariréanam atumin émkíyi. Turammarumna núnisan túruna wáinkiatarme” tímiayi. <sup>8</sup>Niisha ti ashamainiak purushniarar iwiarsamunmaya tseke wearmiayi. Ti ashamainia ásar, chikichkinkesha ujakcharmiayi.

### Máktaranmaya Marin Jesus wantintiúkiania nu

(*Juan 20.11-18*)

<sup>9</sup>Émkaka Tumintin ti káshik Jesus nantaki, Máktaranmaya Marin wantintiúkmiayi. Nu María enentáiyá siati iwianchin Jesus yaunchu ajapruyayi. <sup>10-11</sup>Marisha Jesusa nemari kúntuts uutu matsatainian werí, “Jesus iwiaakui, imia wi wainkíajai” tímiayi. Támatiat anturkacharmiyai.

**Jesus jimiará shuaran wantintiukmiania nu**  
(Ruk. 24.13-35)

<sup>12</sup>Tura urum jimiaara shuar Jerusarénnumiã tsañin weenan, Jesus nusháa iira ajas tarimiayi. <sup>13</sup>Niisha Jesusan wáinkiar wakеткиar, unuiniamurin ujakarmiayi, tura ni chichamëncha anturkacharmiayi.

**Jesus ni unuiniamurin akupkarmiania nu**  
(Mat. 28.16-20; Ruk. 24.36-49; Juan 20.19-23)

<sup>14</sup>Nuyasha Jesusa auntse unuiniamurin misanam pekaamkar pujuinian Jesus tarimiayi. “¿Atumí enentái urukamtaí kátsuram ainia, urukamtaí Winia nekas enentáimtursachuram?” tímiayi. Ni nantakmiarin wáinkiaru chichamën anturkacharu ásarmataí kakantramiayi. <sup>15</sup>Nuyá chichaak “Ashí nunkanam wetarum. Túrarum ashí shuarum Yusa shiir chichame etserkatarum. <sup>16</sup>Shuar anturak imiani uwemprartatui. Shuar antukcharka, tuke sumamawartatui. <sup>17</sup>Shuar winia náarun pachis, Yúsan nekas enentáimtakka, juna túrawartatui, Yusa kakarmarin iniakmastaj tusa: iwianchin jiki akupkartatui; chíkich chichamjai chichasarukamtaí Winia nekas enentáimturtatui; <sup>18</sup>napincha achiksha, tseasnasha úmaksha, jaa ajaschartatui. Jaa shuaran ni uwejejai antin, nu shuaran pënker awajsartatui.” Tu tímiayi.

**Jesus nayaimpiniam wakamiania nu**  
(Ruk. 24.50-53)

<sup>19</sup>Jesus chichas amukmataí, Yus nayaimpiniam jukimiayi. Túruna Yusa untsuurini pujusmiayi. <sup>20</sup>Ni unuiniamurisha jíinkiar, ashí nunkanam Yus-Chichaman etserkarmiayi. Tura Uunt Yus nin yáinmiayi. Tura etserainiakui, ashí aents ni kakarmarin nekaawarat tusa, aentsti tujintiamun túratniun susamiayi. Nuke atí.

# Yúsan Shiir Chichamen

## RÚKAS

### aarmia nu

---

**1** <sup>1</sup>Nekas iiní Jesus túramia nuna “ímiatrusan áartajai” untsurí aents tiarmiayi. <sup>2</sup>Yámankamtaiknumiãñ ísarmia nú shuar, tura Yus-Chichaman etserkatniun yáinkiarmla nusha in unuitiamprarmia nútiksaran áartinian wakeriarmiayi. <sup>3</sup>Wisha núnisnak esetsaran enentáimsan, yámankamtaiknumiãñ nuna nekaamjai. Tuma asan túrunamia nuna ímiatrusnak amincha áatratajtsan wakerimjiame, winia úuntur Tiupiru. <sup>4</sup>Jintintramawarma nú nankaamas nekaata tusan wakerakun áatjame.

#### Imiakratin Juanka akiiniatniurñ ujakmiania nu

<sup>5</sup>Jutía nunkanam uunt akupin Erutis akupkamia nú tsawantin Israer-shuar Yúsnan pujurin ámiayi, ni naari Sakarías. Niisha Aptías weeauyayi. Ni nuwasha Irisapít Arun weeauyayi. Irisapítia úuntriãsha Israer-shuar Yúsnan pujurin ármiai. <sup>6</sup>Yúsjaisha Sakaríassha Irisapítcha máí-metek pênker ármiai. Yus akupkamia nunasha umirin ármiai. Tuma asamtai pênkesha chíkich nin yajauch chicharkatin atsuarmiayi. <sup>7</sup>Yusjai pênker wekainiyat Irisapít júrechuyayi. Túrasha mai úuntach ármiai.

<sup>8-9</sup>Israer-shuar Yúsnan pujurin chíkich weeanmayã nuyá chíkich weeanam, ankant ankant Yusa jeen takáu ármiai. Chíkich tsawant, Sakarías weeá takastin amia nuí, Sakaríaska kunkuinian ekeemaktaj tusa inít wayatniuyayi. <sup>10</sup>Inít kunkuinian ekeemaj untsurí aents aani matsamsar Yúsan áujtak pujuarmiayi. <sup>11</sup>Sakarías inít pujai kunkuin ekeematainiam untsuurnumaaní aya aneachma nayaimpinmayã suntar wajamiayi. <sup>12</sup>Nuna wajan wáiniak Sakaríaska purushnairmiayi. <sup>13</sup>Túrasha nayaimpinmayã suntar chicharuk tímiayi “Sapijmiakaip Sakarías. Nekaata. Ame seamna nuna Yus anturtamkayi. Tura ame

nuwem Irisapít uchin takustatui. Nii akiiniamtai, “Juan” anaikiata. 14-15 Ame uchiram akiiniattana nuka Yusjaisha nankaamantu átatui. Tuma asamtai akiiniamtai, amesha shiir enentáimsam warastatme. Tura chíkich aents untsurí warasartatui. Ame uchirmesha karía ainia nuna umarchattawai. Tura áetak akiinchanak Yusa Wakaní pimiutkattawai, tímiayi. 16 Tura ni shuarin Israer-shuar áनिया nuna, ii Uuntri Yusjai ataksha nawamtikiartatui. 17 Uunt Yúsaiya akatramu átatui. Yaunchu Yúsnan etserin Erías kakaram etserkamia núnisan niisha etserkattawai. Nujai shuaran ni uchiríjiai nawamtikiartatui. Tura umichu ánia nuna eseer enentáimtikrartatui. Ni Uuntri taakui ni enentái iwiamu arti tusa etserkattawai” tímiayi nayaimpinmaya suntar.

18 Nuna takui Sakarías nayaimpinmaya suntaran tímiayi “¿Nunasha warijain paant nekaataj? Wisha nuarjai má-metek ti úuntchichukaitaj” tímiayi.

19 Tutai nayaimpinmaya suntar tímiayi “Wikia Kapriiraitjai, Yusa suntarintjai. Nii akatturmatai chichastájam tusan tura nu shiir chichaman ujaktájam tusan tarijme, tímiayi. 20 Túrasha wi tájamna nu “nekasaiti” tu enentáimprachume. Tura asam uchiram akiintsain muut ajastatme. Chichastin penké tujinkiattame. Tura wi tajana nu, tsawant jeamtai túrunattawai.”

21 Nuna tumai Yusa jeen aani pujusar, Sakaríasan nákas pujuarmiayi. “¿Urukamtaik init we imiá menkaka?” tu enentáimprarmiayi. 22 Nuyá Sakarías jiinkimtai, áuj Sartaj tukamá tujinkiarmiayi. Sakaríaska, muut ajasu asa, aya úwijmiasan chichamiayi. Túmakui, Sakarías init pujus Yúsai wámiakun nekaawarmiayi.

23 Yusa jeen takastin tsawantri amuukamtai Sakaríaska ni jeen waketikimiayi. 24 Nuyá ukunam ni nuari Irisapít ajaprukmiayi. Tura senku nantutin aya jean pujusmiayi. 25 Jeá pujus, “Aents wishikruiniakui natsantan jurutkitiaj tusa uchi takustinian Yus tsankatrukai” tu enentáimpramiayi Irisapít.

### **Jesusa akiiniatniurin nayaimpinmaya suntar etserkamiania nu**

26 Nu senku nantu nankaasmatai Yus ni suntarin Kapriiran Nasaré péprunam akupkamiayi. Nu pepru Kariréa nunkanam pujawai. 27 Nasarénumia nuwan, naari Marí, iyutí tusa akuptukmiayi. Nu núwaka áishmanjai pujuchuyayi. Niisha Jusejai nuatnaikiatsa anajmanair pujumiayi. Juseka uunt Tawit weeauyayi. 28 Wats, nayaimpinmaya suntar Marí pujamunam wayá tímiayi “Yus penker enentáimturma asamtai, ámin winitjame, Mariya. Yuska ámin nemartamuk ashí nuwa nankaamas penker awajtamui” tímiayi.

29 Tura Marisha nayaimpinmaya suntaran wáiniak, chichaamun nékatsuk “Urukamtaik tu chicháa” tu enentáimpramiayi. 30 Nuyá

nayaimpinmaya suntar chicharuk tímiayi “Mariya, sapijmiakaip. Yus shiir enentáimturmawai. <sup>31</sup>Antukta. Amesha ajapruktatme. Túram Uchi takustatme. Nusha “Jesus” anaikiata. <sup>32-33</sup>Niisha uunt átatui. Nincha “Uunt Nan<sub>ka</sub>amaku Yusa Uchirí” tiartatui. Tura Uunt Yuska yaunchu Tawitian uunt akupniurí awajsamia núnisan<sub>n</sub> ame Uchirmin ame shuárumin Israer tutain Uunt akupin awajsattawai. Ni akupeamurisha Yus susamu asa pen<sub>ké</sub> amuukash<sub>t</sub>iniaiti” tímiayi.

<sup>34</sup>Nayaimpinmaya suntar nuna tutai Marí tímiayi “Nusha winia áishur atsaisha, ¿itiurak túrunataj?”

<sup>35</sup>Tutai nayaimpinmaya suntar Marín tímiayi “Yusa Wakaní tarutramtatui. Tura yuran<sub>m</sub>ia núnisan<sub>n</sub> Uunt Yusa kakarmarí ijirmattawai. Nu tuma asamtai Uchi akiiniattana nu Yúsaiya<sub>n</sub> asamtai, “Yusa Uchirínti” tiartatui, tímiayi. <sup>36</sup>Tura Irisapít ame kaná kaimia nusha núnisan<sub>n</sub> weamtanam ajaprukai. Iis, “júrechuiti” tiarmia nu, yamaikia sais nantu pujawai ajamtin. <sup>37</sup>Yúsja<sub>n</sub>inka itiurchatka pen<sub>ké</sub> atsawai” tímiayi.

<sup>38</sup>Tutai Marí tímiayi “Yus wakeramun túriniaitjai wikia. Ame tame nuna Yus wakerana nuna túrutati, tajai” tímiayi. Nuna tímiatai nayaimpinmaya suntuwaka wémiayi.

### Irisapítian Marí iyumiania nu

<sup>39-40</sup>Nu tsawant Marí wárikmas muranam Jutía nun<sub>ka</sub>nam ni kaná kajin Irisapítian iyutaj tusa wémiayi. Sakaríasai jeá, ni jeen wayá, Irisapítian áuj<sub>s</sub>samiayi.

<sup>41</sup>Marí áujeamun antukmatai Irisapítia ampujén uchirí muchitkiamiayi. Tumai Yusa Wakaní ni enentáin pimiutkiamiayi. <sup>42</sup>Nuinka kakantar chichaak Marin tímiayi “Yus amincha ti shiir awaj<sub>t</sub>tamsaiti. Tura Uchiram akiiniattana nusha Yus shiir awaj<sub>s</sub>samuiti. <sup>43</sup>Kairua, ame winia Uuntru nukurí áminin<sub>n</sub>, Yus winia ti waitnentra asa, áuj<sub>s</sub>sata tusa ámin akuptamkachaik, tímiayi. <sup>44</sup>Warí, wisha ame áuj<sub>t</sub>amna nuna ántakui ampujruí uchi waras muchitrutkayi. <sup>45</sup>Amesha Yus turámiania nu umikiu asam shiir pujame. Yus tímia nu túrunattawai auka” tímiayi.

<sup>46</sup>Nuna tinia iniaisamtai Marí juna tímiayi:

“Wikia tuke enentairjai “Yus timiá úuntaiti” tajai. <sup>47</sup>Tura Uunt Yuska winia Uwemtikruru asamtai ti waraajai. <sup>48-49</sup>Wisha péejchach ain ni wakeramurin umiktajtsan wakerakui winia enentáimturayi. Tuma asamtai ashí aents, “Marincha Yus shiir awaj<sub>s</sub>saiti” tuke turutiartatui. Yuska imiá pen<sub>ker</sub> tura imiá kakaram ana nu winia ti uuntan túrutaiti. Tuma asamtai ashí aents “Marincha Yus shiir awaj<sub>s</sub>saiti” turutiartatui. Núnaka yamá nan<sub>ka</sub>mamunak tuke turutú ajartatui. <sup>50</sup>Tura Nin umirkatniun wakerana nunasha Yus tuke waitnentrartatui. <sup>51</sup>Ti itiurchatan páchitsuk túrait Nii. “Nan<sub>ka</sub>amantuitjai” tu enentáimtumainia nuna nupetkaiti. <sup>52</sup>Ashí

akupin ainia nuna awakkaruiti. Tura íksan péejchach ainia nuna uunt awajsaruiti. <sup>53</sup>Pénker ana nuna kitiama<sup>n</sup>iakui Yus pé<sup>n</sup>keran súsaruiti. Tura antsu “ashí takakjai” tuinia nuna aya jú<sup>n</sup>ik awajsaruiti. <sup>54</sup>Israer-shuar Niiniu áj<sup>n</sup>inia núnaka waitnentratniun kajinmattsuk yáinmákuitji. <sup>55</sup>Yaunchu ii Uuntri Aprá<sup>n</sup>aman tura ní shuarnasha “túrattajai” timia nuna ímiatrusan tuke túraití.” Nuní tímiayi Marí.

<sup>56</sup>Marikia Irisapítjai menaintiú nantu pujus ni je<sup>n</sup>en waketkimiayi.

### Imiakratin Juanka akiiniamurí

<sup>57</sup>Nuyasha ni jurertin tsawantri jeamtaí Irisapítcha uchin áishmankan takusmiayi. <sup>58</sup>Tura ni shuarísha, ní írutramurísha “Irisapítian Yus ti shiir yáinmiayi” tuíniak, nin iyuwearmiayi. Tura má<sup>n</sup>-metek warasarmiai.

<sup>59</sup>Israer-shuar túrutai jú<sup>n</sup>isaiti: uchi akiiniamurí uchu tsawant jeamtaí, shunichirí nuapen tsupiktin awai, sirkunsisiún tutai. Yus nuna tú tiniu asamtaí tuke túrin ármiayi. Wats, Irisapítia uchirí akiiniamuríniá uchu tsawant jeamtaí tsupirkataí tusar ni je<sup>n</sup>en jearmiayi. Nuñkia ní aparí naarí Sakarías anaikiataitsar wakeriarmiayi. <sup>60</sup>Tura ní nukurí tímiayi “Atsá. Antsu ní naarí Juan átataí.”

<sup>61</sup>Tutai tiarmiayi “¿Nusha urukamtia? Amée shuarumsha nu náartincha áwak’ tiarmiayi. <sup>62</sup>Nuñkia uchi aparín “¿Warí anaikiatajtsam wakeram?” tusar aya úwejejain iniasarmiai.

<sup>63</sup>Tutai uchí aparísha “Nakash surusta; áartaj tusan wakerajai” tusa aya úwejejain iniakmamiayi. Takui nakash susam, ní naarí Juánkaiti, tu áarmiayi. Nuna wáinkiar “Ayawá urukakun ta” tu enentáimprarmiayi. <sup>64</sup>Nú chichamaik Sakarías chichatsuk pujamun chichakmiayi. Tura nuñ Yusa náarincha shiir awajsamiayi. <sup>65</sup>Nuñkia ní írutramurísha ashamkarmiayi; tura ashí Jutá nunka murá amia nui nu túrunamun ujakam ashí nekaawarmiayi. <sup>66</sup>Nu túrunamun antukar ti enentáimsarmiayi. Tura “ju uchin Yus nekas pujurtsuk. Tuma asamtaí uunt ajas ¿urukuk ati?” tu enentáimprarmiayi.

### Sakarías Yus jintintiam tímiania nu

<sup>67</sup>Uchí aparí Sakarías, Yusa Wakaní pimiutkam tura Yus jintintiam, juna tímiayi:

<sup>68</sup>“Israer-shuartí ii Yusrí naarí shiir awajsatniuitji. Ii Yúsri<sup>n</sup>sha tarutmaitji. Tura uwemtikrampraitji. <sup>69</sup>Yaunchu ii uuntri Tawit Yusa wakeramuríjiaí uunt akupin áchamkia. Tura ní ukurín ti kakaram Uwemtikkiartinian suramsaitji. <sup>70-72</sup>Yuska ii nemasriya tura in nakitramainiajnia nuyá uwemtikrampratniun enentáimsamia nuna, yaunchu ní etserniurín pé<sup>n</sup>ker armia nuna ujakmiayi. “Winia ti penker chichamprun tájana nuna yapajítsuk

umirkan tuke wáitnentratajrume” yaunchu ii úuntr̄in t́imiania nunasha ni etserniur̄in ujakarmiayi. Yaunchu nu ujakma yamá iisha wainji. <sup>73-75</sup>Nu ujakman Yuska yámankamtaik imiá yaunchu ii untr̄i Aprááman tichamkia. Aprááman ujakmia nu júiti: “Wi wakeraj nútiksaran, Winia umirtukar péñker wekainia nuna ni nemasriya uwemtikrattajai. Sapijmiatsuk winia tuke takartusarat tusan túrattajai” Yus t́imiayi Aprááman. Iisha ni shuar̄i asakrin, nuna taku incha túramaji. <sup>76</sup>Tura amincha, uchiru, “Uunt Yusna etserniuiti” turamartatui. Amesha ni tátintr̄i iwiarataj tusam Uuntai émkim wétatme. <sup>77</sup>Ni shuar̄i, ni tunaari tsankurnar uwemprarat tusam túrattame. <sup>78-79</sup>Yuska ashí shuaran anea asa, incha wáitnentramak ni pujamunmaya ni tsáapnintr̄in suramsaitji. Ni enentáin kiritniunam wekainia nuna, mesertinnium jeatemá ásmatai, ni tsáapnintr̄i jeat<sup>i</sup> tusa túraití. Tura ashí incha ii enentáin imiatkinchanum wekasarmí tusa túraití.” Nuní t́imiayi Sakarías.

<sup>80</sup>Uchisha tsakarmiayi. Tura Yúsan nekaki-nekaki wémiayi. Israer shuarum etserkatin tsawantr̄i jeatsañkia atsamunam pujuyayi.

### Jesusa akiiniamur̄i

(Mat. 1.18-25)

**2** <sup>1</sup>Wats, Juan akiiniamia nú uwitin uunt akupin Akustu ashí nunkanam áentsun nekapmarartí tu chichakmiayi. <sup>2</sup>Nu nekapmartinian yaunchu túrushtain yamá túriarmiayi. Siria nunkanam Seriniu akupin pujáí túrawarmiayi. <sup>3</sup>Ni naari áartaj tusa ashí shuar ni nunkenin wétin ármiai. <sup>4</sup>Tuma asamtai Jusé Nasarét péprunmaya Kariréa nunkanam amia nuyá jiinki Pirin péprunam Jutfa nunkanam amia nuí wémiayi. Juseka Tawit weenam akiinia asa, ni nekas nunkenka Pirinkauyayi. <sup>5</sup>Nu asamtai, ni náarin áartaj tusa Jusé wémiayi Marijiaí. Marisha Jusé núweyayi. Tura tsanincharuyayi. Túmaitiat Marisha Yusa Wakaní kakarmarijiaí ajamtiniuyayi. <sup>6</sup>Tura nuí Pirinnum pujuiniaí Marí takustintr̄i jeamiayi. <sup>7</sup>Nuí iwiar̄in uchin áishmañkan takusmiayi. Tura uchi penutaijiaí penuar, waaka yurumtainiam áepsamiayi. Írar kanutainiam pujustin ankant atsá asamtai túrawarmiayi.

### Murikiun wáinnium nayaimpinmaya suntar Yus akatar akuptukmia nu

<sup>8</sup>Tura Pirinnum t́ijiuch murikiun wáinin kashi murikr̄in wáiniuk pujuarmiayi. <sup>9</sup>Túmainiaí nayaimpinmaya suntar murikiun wáinin matsatainian wantintiukmiayi. Tura Yúsnium tsáapnin ni matsatainiamunam etsantramiayi. Túrunamtai murikiun wáinniuka ti ashamkarmiayi. <sup>10</sup>Túrasha nayaimpinmaya suntar t́imiayi “Ashamprukairap. Ashí áentsnum ti warastin atí tusan ti péñker



chichaman itiarjiarme. <sup>11</sup>Júiti: yamáí tsawantáí uunt Tawitia péprurín Pirinnum yaunchu Yus anaikiamu KRISTU tutai, uwentikramprataj tusa akiintiurmarme. Nu Uchisha ashí áentsun akupniuiti, tímiayi. <sup>12</sup>Tura jujaí nekaattarme: uchi penutaijiaí penuarma waaka yurumtainiam tepá wáinkiatarme. Nu wáinkiarum nekas júiti, tu nekaattarme.”

<sup>13</sup>Nu chichamaik nayaimpinmaya suntar ti untsurí, nayaimpinmaya káunkarmiayi. Túrawar Yusa naarin shiir awajainiak juna tiarmiayi:

<sup>14</sup>“Nayaimpinmasha Yus nankaamantuiti tu enentámtusarti. Tura ju nunkanmasha Yusjai nawamnaikiaru ainia nu imiatkinchanum pujusarti.” Tu tiarmiayi.

<sup>15</sup>Tura Yusa suntari nayaimpiniam waketkiarmatai murikiun wáinin tiarmiayi “Wats, Pirinnum wárik wetái. Nu túrunamu Yus turamajnia nu iyumi” tiarmiayi.

<sup>16</sup>Nuna tiar wárik wearmiayi. Tura Marinha Jusenchá wáinkiarimiayi. Tura uchinchá waaka yurumtainiam tepan wáinkiarimiayi. <sup>17</sup>Wear nuna wáinkiar, nayaimpinmaya suntar uchi túrunamurín timia nuna etserkarmiayi. <sup>18</sup>Tura murikiun wáinin tiarmia nuna antukaruka ti enentámtusarmiayi. <sup>19</sup>Túrasha Marikia ashí túrunamia nuna ni enentájjiaínia enentámtu pujumiayi. <sup>20</sup>Tura murikiun wáinniuka antukarmia nuna enentámtusar, tura ísarmia nunasha enentámtusar “Nayaimpinmaya suntar ujatmakmajnia tímiatrusan túrunayi” tiarmiayi. Tuma ásar Yusa náarin shiir awajsar kantampruawar waketkiarmiayi.

### Uchin Jesusan Yusa Uunt Jeen itiarmania nu

<sup>21</sup>Tura uchi akiiniamu uchu tsawant jeamtai, ni túrutairín túrin ásar, ni shunichirí nuapen tsupirkarmiayi. Túrawar Marí ajapratsain nayaimpinmaya suntar tímia nútiksan “Jesus” anaikiarimiayi. <sup>22</sup>Tura Muisais akiiniatniunam akupkamia núnisan, tsawantri jeamtai, Yusa Uunt Jeen Jerusarénum uchin Yus iiktustai tusar júkiarmiayi. <sup>23</sup>Kame Yus-Papinium ju aarma awai:

“Ashí uchi iwiairi áishman akiinkiuñka Yusna átatui.” <sup>24</sup>Tuma asamtai, Marí Yusa Uunt Jeen wáitsuk pujamu wayatniuri jeamtai, uchin Yus iistí tusa Yusa Uunt Jeen Jerusarénum pujana nuí itiarimiayi. Tura yampitsan jimiaran súsarmiayi. Muisáis akupkamun umiiniak nuna túrawarmiayi.

<sup>25</sup>Nu túmai Semeún naartin áishman Jerusarénum pujumiayi. Semeúnsha Yusa Wakaní pujurma asa péñker áishmankauyayi. Yusan nekas enentámtiniuyayi. Yusa anaikiamurijiaí Israer-shuar ankant ajastin jeati tusa nákauyayi. <sup>26</sup>“Winia anaikiamur KRISTU tutai wáintsuk jákashtatme” uunt Yusa Wakaní tu jintintiamiayi. <sup>27</sup>Nú Semeún Yusa Wakani “wetá” tutai, Yusa Uunt Jeen wémiayi. Tura nú tsawantáí Muisáis tímia núnisan umirkatai tusar Marisha Jusesha uchin Jesusan Yusa Uunt Jeen itiarimiayi. <sup>28</sup>Itiarimatai Semeún uchin jusa miniakas Yusan áujuk juna tímiayi:

<sup>29</sup>“Yamaikia, Uunta, Amiin wi jeatin ankant atí. Turutmiamna nu ímiatrusmek umikiume. <sup>30-31</sup>Ju Uchi ashí aents uwemtikrartá tusam susamna nuna yamáí imia winia jirujai wáinkiajai.

<sup>32</sup>Israer-shuarcha ainia nu tsáapninium wekasarat tusa akuptukmaiti ju Uchi. Tura Israer-shuar Áminiuram ájinia nuna ashí aents shiir enentáimtikrartí tusam ju Uchi akuptukmaitji. Nuna wáinkian shiir enentáimsan jákatniuitjai.”

<sup>33</sup>Tura Semeún Uchiniun tu chicharkui Jusesha Jesusa nukurísha ti enentáimprarmiyai. <sup>34</sup>Semeúnsha chichaak “Yus shiir enentáimturmasartí” nin tímiyai. Nuyasha Marin chicharuk tímiyai “Nekaata. Ju Uchin Israer-shuartisha untsurí nakitrar iniarartatji. Tura chíkich Israer-shuartikia ju Uchin shiir enentáimtusar ti wararsartatji. Tura Uchiram Yusa kakarmarin ti paant iniakmastatui. Tuma ain untsurí Aun yajauch chichariartatui. <sup>35</sup>Nujai shuar ni enentáin warinia enentáimia nu, paant átatui. Maaj, ashí nu túmakui, ijiunua núnismek ame enentáimin ti wáitsattame, Mariya.” Tu chichasmiyai Semeún.

<sup>36</sup>Nuwasha Ana naartin nuí Yusa Uunt Jeen pujumiyai. Niisha Yúsna etserniuyayi. Ni aparísha Panufruyayi tura Aser shuarauyayi nu nuwa. Niisha ti úuntchiyayi. Niisha yama nuatnaikiamujai siati uwi ni áishrijai tsanin pujusarmiyai. <sup>37</sup>Tura wajemamiyai. Tura uchenta kuartu uwi takakuyayi. Tura ninkia Yusa Uunt Jeenia jiintsuk káshisha tsawaisha tuke Yúsna áujniuyayi. Tura yurumtsuk Yúsna áujniuyayi. <sup>38</sup>Semeún tuasua amikmatai Anasha taa, Uchin wáiniak Yúsna yuminsamiyai. Tura Jerusarennum Yus uwemtikrampratai tusa nákarmia nuna áujkunka uchin áujmat wémiyai.

### Nasarénum waketkiarmiania nu

<sup>39</sup>Nuyá Yus tímia nuna ashí túrawar amikiar Kariréa nunkanam, kame nii pujumia nú peprunam Nasarénum Jusesha Marisha Uchisha waketkiarmiyai. <sup>40</sup>Uchi Jesus tsakaki, kakaram ajaki tura nú nankaamas nekaki wémiyai. Tura Yus Nin ti shiir awajsamiyai.

### Jesus Yusa Uunt Jeen túrunamurí

<sup>41</sup>Jusesha, Jesusa nukurísha tuke uwitin paskua námper jeakui Jerusarennum weu ármiyai. <sup>42</sup>Ni túrutairí túruiniak, Jerusarennum weak Jesusan tuse uwí jeamtai júkiarmiyai. <sup>43</sup>Námper amuukamtai ni nukurísha Jusesha nékachmanum Jesuska Jerusarennum juákmiyai. <sup>44</sup>Marisha Jusesha “wíi shuarjai winiawai” tusa, núnaka eatsuk chikichík tsawant wekasarmiyai. Nuyá wáinkiataj tukamá, ni shuarin tura ni nékamunam eakarsha, <sup>45</sup>wáinkiacharmaiyai. Nuinkia Jerusarennum ataksha waketrukiarmiyai, eaktai tusar. <sup>46</sup>Tura menaintiú tsawant eakar Yusa Uunt Jeen Yus akupkamun jintinnian anturak anintrú pujan wáinkarmiyai.

47 Tura nuí ashí Jesusan anturkarmiania nu, niisha ti nékakui tura áimtanash ti péñker áimkiui, ti enentáimturarmiayi. 48 Ni aparísha nukurísha tumáa pujan wáinkiar, ti enentáimprarmiayi. Tura ni nukurí chichaak tímiayi “Uchiru, ¿ausha urukamtai itirchat enentáimtikrurmam? Ame apasha wisha urukayik tusar ti eakjame” tímiayi.

49 Tutai Jesus tímiayi “¿Urukamtai eattrum? Winia Aparnan túratniuitjiana nuka nékatsrumek” tímiayi.

50 Tura timia núnaka penké nekaacharmiayi. 51 Nuyá Jesus niijjái Nasarétnum waketkimiayi. Ninkia tuke umiriarmiayi. Ashí nu túrunamun Marikia tuke enentáimtu pujumiayi. 52 Jesuska tsakaki, tura nekaki wémiayi. Yussha tura aencha Nin shiir enentáimtiarmiayi.

### Imiakratin Juan̄ka etserkamurí

(Mat. 3.1-12; Mar. 1.1-8; Juan̄ 1.19-28)

**3** 1 Tipiriu uunt akupin pujamu kinse uwí jeamtai, Jutía nuñkanam Punseu Piratu akupin pujumiayi. Tura Kariréa nuñkanam Erutis akupin pujumiayi. Itiurea nuñkanmasha Trakuniti nuñkanmasha ni yachi Jiripi akupin pujumiayi. Tura Apirinia nuñkanam Risanias akupin pujumiayi. 2 Tura nu uwitin Anassa Kaipiássa Israer-patri uuntri pujuarmiayi. Nu uwitin Sakaríasa uchirí Juan̄ atsamunam pujan Yúsaiya chichaman antukmiayi. 3 Nuyá Jurtan̄ entsanam supichik matsamarma nuna Juan̄ wekaatusar juna tímiayi “Winia tunaarun Yus tsankurturat tusarum, enentai yapajjárúm imiantiarum.” Tu ujakmiayi. 4 Nu ujakman Isayas yaunchu juna áarmiayi:

Atsamunam wekaana nu untsunmun ántuiniawai. Nii untsunuk juna tawai: Atumí enentái Uunta jinti iwiarturtarum; naka awajsatarum.

5 Jápaaka ainia nusha áimkiamu arti. Naint ainia nusha paka awajsamu arti. Jintia apijiaru ainia nusha naka jiikmia arti. Tura pujutrin ainia nusha métekrak paka awajsamu arti. 6 Túrunamtai ashí nuñkanmaya aents Yúsaiya uwempratin aan nekaawartatui.

7 Untsurí aents imiatit tusar tariarmia nuna Juan̄ chicharainiak tímiayi “Napia áaniutirmincha, ti asutniátin jeatemáttana nuyá uwempratarum tusa ¿ya ujatmakuram? tímiayi. 8 “Iikia Apraám weeitji, tuma asakrin Yus shiir enentáimturmají” tu enentáimtumasairap. Antsu enentáim yapajjáimuitkiuin̄kia péñker wekaamurmijjái paant iniakmatarum. Warí, Yus wakerakka, ju kayan Apraáma shuarin páchitsuk najankainti, tímiayi. 9 Aneartarum. Numi ajaktinian kampuwárin jacha atuttsamuiti. Numi péñker nereatsna nuka ajakar jinium apeamu ártatui” tímiayi.

10 Tutai aentska enentáimprar “¿Nuin̄kia itieurkatjik?” tiarmiayi.

11 Tutai Juan̄ tímiayi “Jimiará pushin takakna nu, takaktsuna nuna chikichan súsatniuiti. Yurumkan takakna nusha takaktsuna nuna ajamsatniuiti” tímiayi.

<sup>12</sup>Uunt akupniu kuítr̄in juu armia nú shuar imiantiaj tusar Juáñkan weriar aniasarmiayi. “Uunta, ¿iisha warí ititurkatjik?” tiarmiayi.

<sup>13</sup>Tutai Juan̄ tímiayi “Kuit uunt akupin tana nu iniañkasrum achikiairap.”

<sup>14</sup>Suntarsha aniasarmiayi “Uunta, ¿iisha warí ititurkatjik?”

Juañsha tímiayi “Ame kakarmarmijiaí chikichna jurukip. Tura nin tsanumpruraip. Tura uunt akupin akirmanana nújain warasta” tímiayi.

<sup>15</sup>“Ju Juan̄ Yusa anaikiamurinchuashit” tu enentáimsar paant nekaataitsar nákararmiayi.

<sup>16</sup>Tumaí Juan̄ tímiayi “Wikia aya ayashmin entsanam imiajrum. Tura wijiaí nankaamas ana nu tátatui. Ni sapatri jin̄kiamurinkisha atitrachminiaitjai. Niisha taa, imiantinia áanis tura jíiya áanis Yusa Wakanin̄ enketramprattarme. <sup>17</sup>Shuar aruasan awajtia núnisan̄, nusha yajauch ana nuna ajapa aya péñkernak júuktatui. Neren ikiustatui tura yajauchinkia ji tuke kajinchatainiam apeattawai” tímiayi.

<sup>18</sup>Juan̄ nu arant shiir chichaman áentsun ti núkap ujakarmiayi.

<sup>19</sup>Tura nuyasha akupin Erutisan chicharkamiayi. Ni yachi Jiripi nuar̄in Jirutíasan kasarak nuatkui tura chíkich yajauchincha túrakui chicharkamiayi. <sup>20</sup>Tura Erutis núnaka ántutsuk chíkich yajauchin túramiayi. Juáñkan achik sepunam enkeamiayi.

### **Jesusa imianmiari**

*(Mat. 3.13-17; Mar. 1.9-11)*

<sup>21</sup>Nu túruntsain̄, Juañsha ashí nú nunkanmaya áentsun imiak pujurainaī Jesussha imianmiayi. Niisha Yúsan áujuk pujaī nayaimpisha uranmiayi. <sup>22</sup>Tura Yusa Wakaní yámpits najanar paant tarurmiayi. Tura Yus nayaimpinmaya chicharuk “Amek winia aneamur Uchiruitme; Ámin ti wararjame” tímiayi.

### **Jesukrístu shuari**

*(Mat. 1.1-17)*

<sup>23</sup>Jesus trainta (30) uwí takaku asa ni takatr̄in nan̄kamamiayi. “Jusé uchir̄inti” tiniu armiayi. Jusésha Iría uchir̄iyayi. <sup>24</sup>Irísha Matata uchir̄iyayi; Matat Riwí uchir̄iyayi; Riwí Mirkía uchir̄iyayi; Mirki Jana uchir̄iyayi. Jana Jusé uchir̄iyayi; <sup>25</sup>Jusé Matatíasa uchir̄iyayi; Matatías Amusa uchir̄iyayi; Amus Najuma uchir̄iyayi; Najum Esrí uchir̄iyayi; Esri Nakaia uchir̄iyayi; <sup>26</sup>Nakai Maata uchir̄iyayi; Maat Matatíasa uchir̄iyayi; Matatías Semái uchir̄iyayi; Semái Jusé uchir̄iyayi; Jusé Jutáa uchir̄iyayi; <sup>27</sup>Jutá Juana uchir̄iyayi; Juana Resa uchir̄iyayi; Resa Surupapira uchir̄iyayi; Surupapir Saratiira uchir̄iyayi; Saratiir Nerí uchir̄iyayi; <sup>28</sup>Neri Mirkí uchir̄iyayi; Mirki Atí uchir̄iyayi; Atí Kusama uchir̄iyayi; Kusam Irmutama uchir̄iyayi; Irmutam Ira uchir̄iyayi; <sup>29</sup>Ir

Jusué uchiríyayi; Jusué Irieséra uchiríyayi; Iriesér Jurema uchiríyayi; Jurem Matata uchiríyayi; <sup>30</sup>Matat Riwi uchiríyayi; Riwi Semeúnka uchiríyayi; Semeún Jutáa uchiríyayi; Jutá Jusé uchiríyayi; Jusé Junan̄ka uchiríyayi; Junan̄ Iriakímia uchiríyayi; <sup>31</sup>Iriakím Mirea uchiríyayi; Mirea Mainián̄ka uchiríyayi; Mainián̄ Matata uchiríyayi; Matata Natan̄ka uchiríyayi; <sup>32</sup>Natan̄ Tawitia uchiríyayi; Tawit Isaí uchiríyayi; Isaí Upitia uchiríyayi; Upit Puusa uchiríyayi; Puus Saramún̄ka uchiríyayi; Saramún̄ Naasun̄ka uchiríyayi; <sup>33</sup>Naasun̄ Aminiatapa uchiríyayi; Aminiatap Arama uchiríyayi; Aram Esruma uchiríyayi; Esrum Paresa uchiríyayi; Páres Jutáa uchiríyayi; <sup>34</sup>Jutá Jakupa uchiríyayi; Jakup Isaka uchiríyayi; Isak Apráama uchiríyayi; Apraám Tarea uchiríyayi; Taré Nakura uchiríyayi; <sup>35</sup>Nakur Seruka uchiríyayi; Seruk Rakaua uchiríyayi; Rakau Pirikia uchiríyayi; Pirik Epera uchiríyayi; Eper Sará uchiríyayi; <sup>36</sup>Sara Kainián̄ka uchiríyayi; Kainián̄ Arpaksata uchiríyayi; Arpaksat Sema uchiríyayi; Sem Nuaia uchiríyayi; Nuai Ramikia uchiríyayi; <sup>37</sup>Ramik Matusarín̄kia uchiríyayi; Matusarín̄ Euka uchiríyayi; Euk Jaritia uchiríyayi; Jarit Maararíira uchiríyayi; Maararír Kainian̄ka uchiríyayi; <sup>38</sup>Kainian̄ Enusa uchiríyayi; Enus Seta uchiríyayi; Set Atan̄ka uchiríyayi; tura Atan̄ Yus najanamuyayi.

### Jesusa nekapsamuri

(Mat. 4.1-11; Mar. 1.12-13)

**4** <sup>1</sup>Jesusa enentáin Yusa Wakaní pimiutkamiayi. Jesussha Jurtan̄ entsanmayá waketkimtai Yusa Wakaní aents atsamunam jukimiayi. <sup>2</sup>Tura nuísha kuarenta tsawant pujusmiayi. Tura íwianch Nin tunaanum ajuarantiajtai tusa pujurmiayi. Nu kuarenta tsawantin Jesus yurumsuk pujá asa ti tsukammiayi. <sup>3</sup>Nuín̄kia íwianch chicharuk “Amesha nekas Yusa Uchiríntkiumka ju kaya apatuk najanata” tímiayi.

<sup>4</sup>Tutai Jesus tímiayi “Yus-Papí tawai:

“Aya apatkujain̄ shuar iwiaaku pujuschamniaiti. Antsu ashí Yus-Chicham tana nujai nekas iwiaaku pujusminiaiti,”

tawai” tímiayi.

<sup>5</sup>Tura nuyá íwianch naint yakí wájakmanum jukí, ashí nun̄ka ainia nuna ju chichamaik iniaktusmiayi. <sup>6-7</sup>Tura chicharuk tímiayi “Ashí ju nun̄ka wáinmena nu wíniaiti. Tura wi wakerajna nú shuaran súsatniuitjai. Tuma asamtai tikishmatrurakminkia ju nun̄kanam ashí akupkatniun susattajme. Tura nuí ni warirí ainia nusha áminiu átatui” tímiayi.

<sup>8</sup>Tutai Jesus tímiayi “Yus-Papí tawai:

“Aya Nin̄ki Yus ame Úntrum tikishmatram enentáimtustiniaitme.”

Tau asamtai, werumta, iwianchi” tímiayi.

<sup>9</sup>Ataksha íwianch Jesusan Jerusarén̄ péprunam jukimiayi. Tura Yusa Uunt Jee yakiini iwiak tímiayi: <sup>10</sup>“Yus-Papí tatsuk:

“Yuska ni suntarín wáinkiatá tusa akupturmaktatui. <sup>11</sup>Kayanam ajintraín tusa wen\_kurmaktatui.”

Tuma asamtai nekas Yusa Uchirínkiumka juyá akaikim iniaata” tímiayi.

<sup>12</sup>Tutai Jesus ámiuk tímiayi “Yus-Papí júnasha tawai:

Yus ame Úntrum nekapsataj tiip.”

<sup>13</sup>Tuma asamtai íwianch pen\_ké tujintiak ishichik tsawant Jesusan iniaisamiayi.

### **Kariréa nun\_kanam Jesus ni takatrín nan\_kamamiania nu**

*(Mat. 4.12-17; Mar. 1.14-15)*

<sup>14</sup>Jesus ni enentáin Yusa Wakaní kakarmari\_pimiutkamu ajas Kariréa nun\_kanam waketkimiayi. Nu nun\_kanam nan\_kaamantu túramurín áujmatiarimiayi. <sup>15</sup>Nu nun\_kanam ashí péprunam Israer-shuar iruntai jeá armia nuí unuiniarmiayi. Tura anturkarmia nuka ni náarín shiir awajsarmiayi.

### **Jesus Nasarénum pujumiania nu**

*(Mat. 13.53-58; Mar. 6.1-6)*

<sup>16</sup>Ni tsakarmariín Nasarénum Jesus wémiayi. Tura Israer-shuar ayampratin tsawantin iruntai jeanam wayamiayi, tuke turin asa. Tura wayá Yus-Papin áusataj tusa wajakmiayi. <sup>17</sup>Nuínkia Yúsnan etserin Isayasa áarmarín súsarmiayi. Nuna urak, nuí juna áarman wáinkiamiayi:

<sup>18</sup>Yusa Wakaní winí pujurtawai. Shuar warainiachun shiir chichaman ujaktinian anaitiukuiti. Kúntuts enentáimiar wake mesek pujuinian tsuártinian akuptukuiti. Tura jii kusuruncha ímtiktinian, tura yajauch awajsamu ainia nuna pénker awajsatniuncha, <sup>19</sup>tura Uunt Yus, shuáran yaintin tsawantri jeán etserkatniuncha akuptukuiti.

<sup>20</sup>Nu áarman ajsua amik papin nukukmiayi. Tura iruntai jeanam yáimin pujan susa iniais Nínkia etserkataj tusa pujusmiayi. Tura ashí shuar pujuarmia nu émamkes ii pujuarmiayi. <sup>21</sup>Jesussha chicharuk tímiayi “Yus-Chicham yamá antukurmena nu yamá tsawantin túrunayi.”

<sup>22</sup>Jesusan ashí pénker áujmatiarimiayi. Tura Jesus ti shiir chichaakui ti enentáimprar “Juka Jusé uchirínchukait” tiarmiayi. <sup>23</sup>Tu enentáimiainiakui, Jesus chicharuk “Atumsha shuar tuke tuinia núnisrumek, “tsuákratniuitkiumka amek tsuámarta,” turuttiatrume. Kapernáum péprunam aentsti túrachmin túramamna núnismek juísha túrata tuserum nu turuttiatrume. <sup>24</sup>Túrasha nekas tájarme, Yúsnan etserniun ni nun\_kenkikia nii tana nuna anturainiatsui. <sup>25</sup>Nuyasha tájarme, Irías pujumia nú tsawantin, menaintiú uwí nan\_kaamas yumi yutukcha asamtai ashí Israer nú\_nkanam ti tsuka amia nuí ti untsurí waje irunmiayi. <sup>26</sup>Tuma ainu nu wajen

yainti tusa Yus Iríasan akuptukchamiayi. Antsu chíkich nun<sub>kan</sub>maya wajen Sarepta péprunam pujumia nuna yainti tusa akuptukmiayi. Sarepta pepru Sitiún péprunam tji<sub>uch</sub> pujawai. <sup>27</sup>Núnisan<sub>u</sub> ii nun<sub>kes</sub>sha Iriséu pujumia nu tsawantin ti untsur<sub>í</sub> tunamaru iruniarmiayi. Tura núnaka tsuárcharmiayi. Antsu chíkich nun<sub>ka</sub>, Sírianmaya Naaman<sub>kan</sub> tsuármiayi” tímiayi Jesus.

<sup>28</sup>Israer-shuarsha iruntai jeen pujuarmia nu, nuna antukar ti kakerkarmiayi. <sup>29</sup>Tura wajatkíar Jesusan jiiki péprunmaya akupkarmiayi. Tura pepru amia nu<sub>j</sub> naint yakí nán<sub>kat</sub>kamunam, nuyá akaki ajuatai tusar júkiarmiayi. <sup>30</sup>Túrasha Jesuska irunar matsatainiamunman empraktak jiinki wémiayi.

### Iwianchrukun Jesus tsuármiania nu

(*Mar. 1.21-28*)

<sup>31</sup>Nuyá Jesus Kariréa nun<sub>kan</sub>am Kapernáum pepru amia nu<sub>j</sub> wémiayi. Tura Israer-shuara ayampratin tsawantri<sub>in</sub> tuke etserki wémiayi.

<sup>32</sup>Yusa kakarmar<sub>in</sub> takaku asa nuj<sub>ai</sub> etserkamiayi. Tuma asamtai “Yusa kakarmari<sub>jia</sub> unuitiamtsujik” tiar ti enentáimprarmiayi.

<sup>33</sup>Chíkich tsawant<sub>ai</sub> áishman<sub>u</sub> iwianchruku Israer-shuar iruntai jeenam pujumia nu untsumuk tímiayi, <sup>34</sup>“Inikiartusta. Iikia Áminkia pachistin nakitiaji. ¿Warí, incha amukratkataj tusam táchamek? Wikia nékajme. Ámeke ti pen<sub>ker</sub> Tunaarincha núitme” tímiayi.

<sup>35</sup>Tutai Jesus iwianchin kakantar chicharuk “Takamatsata. Ju áishman<sub>u</sub> ikiuktia” tímiayi.

Tutai nu chichamaik íwianch áishman<sub>numia</sub> jiinki weak nun<sub>ká</sub> ajuant ikiukmiayi. Túrasha nekas yajauch awajtsuk ikiukmiayi.

<sup>36</sup>Ashí pujuarmiania nu ti enentáimiar mai tunai ajarmiayi. “¿Jusha warí chichamait? Ju áishman<sub>u</sub> Yusa kakarmari<sub>jia</sub> iwianchin jiiki awematsuk” tiarmiayi.

<sup>37</sup>Tura ashí nú nun<sub>kan</sub>am Jesusa túramur<sub>in</sub> áujmatiar<sub>miayi</sub>.

### Semun<sub>u</sub> Pitru tsatsar<sub>in</sub> Jesus tsuármiania nu

(*Mat. 8.14-15; Mar. 1.29-31*)

<sup>38</sup>Jesussha Israer-shuara iruntai jeenia<sub>u</sub> jiinki Semun<sub>ka</sub> jeen wémiayi. Semun<sub>ka</sub> tsatsar<sub>i</sub> tsuer ti jáamiayi. Ti jaakui Jesusan “tsuárturtá” tiarmiayi. <sup>39</sup>Jesussha jaa tepan tsunsumprua tsuemun “michatrata” tímiayi. Tutai nú chichamaik nuw<sub>asha</sub> michatramiayi. Nú chichamaik nantaki nincha ayurawarmiayi.

### Untsur<sub>í</sub> jaan Jesus tsuármiania nu

(*Mat. 8.16-17; Mar. 1.32-34*)

<sup>40</sup>Etsa akaikin a<sub>j</sub> ni shuar<sub>i</sub> nán<sub>kamas</sub> sunkurj<sub>ai</sub> jaar<sub>mia</sub> nuna Jesusan ikiaatkarmiayi. Jesussha jáinian chikichkiniak chikichkiniak uweje<sub>jai</sub>

antĩnkiar tsuárarmiyai. <sup>41</sup>Ti untsurĩ iwianchruku armia nunasha iwianchrĩn jĩĩrkiarmiyai. Jĩĩnkiar íwianchkia untsumainiak “Ámeka Yusa Uchirĩnme” Jesusan tiarmiyai. Tura niisha “Jesuska Yusa anaikiamurĩnti” tu nékainiakui Jesus kakantar chicharak itiatmamtikarmiyai.

**Kariréa nunkanam Jesus etserkamiania nu**  
(*Mar. 1.35-39*)

<sup>42</sup>Kashin káshik tsawaak Jesus péprunmaya jiinki atsamunam Nin̄ki wémiyai. Tura shuarsha eak̄iar ni pujamunam jeariarmiyai. Tura iij̄iaĩ tuke pujusat tusar emetataitsar wakeriarmiyai. <sup>43</sup>Túmain̄ Jesus tímiyai “Yus ii enentáin̄ akupkatajtsa wakera nú shiir chichaman ch̄íkich péprunam matsatania nunasha ujaktiniaitjai. Nu túrata tusa akupkamuitjai” tímiyai. <sup>44</sup>Tuma asamtai Kariréa nunkanam Israer-shuar iruntai j̄enam̄ Jesus tuke etserki wémiyai.

**Namakan ti untsurĩn̄ achikiarmiania nu**  
(*Mat. 4.18-22; Mar. 1.16-20*)

**5** <sup>1</sup>Ch̄íkich tsawantaī Jesus Jinisarít antumian̄ka tutainium káanmatkar̄i pujaī ti untsurĩ shuar, Yusa chichamen̄ antuktaī tusar wakeruiniak̄ Jesusaī káunkarmiyai. Antuktaī tusar wakeruiniak̄ kae ajattsarmiyai. <sup>2</sup>Tura jimiará kanun antumian̄kan káanmatkar̄iin̄ tepan wáinkarmiyai. Ni nérenniur̄inkia j̄ĩnkiar ni nekar̄in̄ nij̄iā pujuinia asamtai kánuka an̄kant̄ ármiyai. <sup>3</sup>Tuma asamtai Jesus Semun̄ka kanur̄in̄ enkempramiyai. Tura Semun̄kan chicharuk “Ishichik ajapén juruktía” tímiyai. Nuīnkia kanunam en̄kemas áentsun káanmatkanam pujuinian unuiniamiyai. <sup>4</sup>Unuiniasua amik Semun̄kan chicharuk “Kanu kunanam jukim neka aī ajunkatarum” tímiyai.

<sup>5</sup>Tutai Semun̄ tímiyai “Túrasha, Uuntá, káshisha tuke aj̄u-junkuar tsawar̄ji. Túrasha pen̄ké achikchaji. Kame áankisha Ame támajaī ajunkatjaī” tímiyai.

<sup>6</sup>Tura ajunkar namakan ti untsur̄in̄ achikiarmiyai. Túram nekasha jaanaki wémiyai. <sup>7</sup>Tuma asamtai ni írutkamur̄in̄ ch̄íkich kanunam pujuinian uwej̄ej̄aī “winitia, yáintkiamniuram” tusar untsukarmiyai. Niisha táarmiyai. Túrawar jimiará kanunam métej awajsarmiyai. Tura kanusha init wayastatuk ajamiyai. <sup>8</sup>Nuna túramtai Semun̄ Pítior̄ Jesusan tikishmatar tímiyai “Uuntá, wikia ti tunaitjai. ¿Wíj̄iāisha itiuurak pujustam?” <sup>9</sup>Semun̄sha ni írutkamur̄ij̄iāi namakan timiá untsur̄in̄ wáinkiar ashamkarmiyai. Tuma asa Semun̄sha nuní tímiyai. <sup>10</sup>Tura Sepetéu uchir̄ī Jakupusha Juansha Semun̄jaī pujuarmia nusha ashamkarmiyai. Tura Jesus Semun̄kan tímiyai “Ashamkaip. Yamaikia namaka-achinia áintsamek aents-eaū ajastatme.” <sup>11</sup>Nuyasha kanur̄in̄ kukar j̄ukiar, ashí takakmar̄in̄cha ikiukiar Jesusan nemarki wearmiyai.



**Tunamaru áishmañkan Jesus tsuármiania nu**  
(*Mat. 8.1-4; Mar. 1.40-45*)

<sup>12</sup>Ukunam Jesus chíkich péprunam pujaj̄ tunamaru áishmañ taa Jesusan wáiniak tikishmatar nun̄ká shushuma pankái Jesusan tímiayi “Uuntá, wakerutakmeka páchitsuk tsuáramniaitme.”

<sup>13</sup>Nuna tutai Jesus antin̄ tímiayi “Wakerajai. Tsuaajme.” Tura nú chichamaik tunamarusha péñker ajasmiayi. <sup>14</sup>Túrasha Jesus chicharuk “Ámeka nu etserkaip, tímiayi. Antsu Israer-shuar Patrij̄ werim ame péñker ajasmanum Muisáis akupkamia núnismek susata. Nujaj̄ ashí shuar ame péñker ajasmarmín nekaawartatui” tímiayi.

<sup>15</sup>Tura Jesusa túramurj̄ ti etsernamiyai. Túmakui untsurj̄ aents anturkataj̄ tusar káutkarmiyai. Tura ni sun̄kurin̄cha tsuámartaj̄ tusar káutiarmiyai. <sup>16</sup>Núnisan̄ Jesuska aents atsuiniamunam we ni Aparin̄ áujmiayi.

**Emearun Jesus tsuármiania nu**  
(*Mat. 9.1-8; Mar. 2.1-12*)

<sup>17</sup>Chíkich tsawantaj̄ Jesus unuiniak pujaj̄ Pariséu aents tura Israer-shuara jintinniurisha Kariréa péprunmayasha, Jutía péprunmayasha tura Jerusaréñnumiasha káunkarmia nu antúu pujuarmiayi. Jaa tsuártinian Yusa kakarmarin̄ takakuyayi Jesus. <sup>18</sup>Nuñkia emearun tampumpua kuaru shuar itiararmiyai. Jesus pujamunam inít awayattsar wakeriarmiyai. <sup>19</sup>Tura shuar ti untsurj̄ piaku asamtai wayamnia atsumiyai. Túmaitkui yakiin̄i wear jean̄ urakar, aents kaē ajas matsatmanum Jesus pujamunam emearun tampunam nená itiararmiyai. <sup>20</sup>Nin̄ itiarmania nu, Jesus Yusa kakarmarin̄ takakui, tú enentáimtamun Jesus nekáa emearun tímiayi “Ame tunaarum tsankuramuitme.”

<sup>21</sup>Nuñkia Israer-shuara jintinniurisha, Pariséusha ni enentáin̄ enentáimsar “¿Jusha yait Yúsa náarin̄ yajauch awajtin̄? Warí, aya Yúsak tunaan tsankurachminkiait” tu enentáimsarmiyai.

<sup>22</sup>Tura Jesus ni enentáimsamurin̄ nekáa tímiayi “¿Urukamtai tú enentáimprarum átum? <sup>23</sup>Nuñkia ¿warí imiá yúpichuchit, tsuártiniak, ni tunaarī tsankuratniuk? <sup>24</sup>Wats, Aents Ajasu tutai Wisha tunaan tsankuratniun̄ Yusa kakarmarin̄ takakjai. Jujaj̄ nekaatarum tusan wats itiuurchat tárugna nuna túrattajai.” Nuyá emearun chicharuk tímiayi “Amesha wajakim, tampuram achikiam ame jeemiin̄ wetá.”

<sup>25</sup>Nú chichamaik emearu niisha íimiainiamunman̄ tampurin̄ achik wajaki ni jeen̄ Yúsan wararki wémiayi. <sup>26</sup>Túmakui ashí shuar ti enentáimprar Yusa náarin̄ shiir awajsarmiyai. Tura ashamainiak “aentsti tujinkiamu yamáí wáinkiaji” tiarmiyai.

**Riwin Jesus untsukmiania nu**  
(*Mat. 9.9-13; Mar. 2.13-17*)

<sup>27</sup>Ukunam Jesus wekas akupniu kuítrín-juu, naarí Riwí, ni chíkich naarí Mateu, akupin akitiai jeanam pujan wáinkiamiyai. Wáiniak “nemartusta” tímiyai. <sup>28</sup>Tutai Riwí wajaki takakmarínkia ikiuak Jesusan nemarsamiyai.

<sup>29</sup>Nuyá ukunam Riwí namperan Jesusan najatamiyai. Tura untsurí akupniu kuítrín-juu tura chíkich shuarsha káunkar misanam pujuarmiiai. <sup>30</sup>Tura Pariséusha Israer-shuara jintinniurísha Jesusan tsanumpruiniak Jesusa unuiniamurín tiarmiiai “¿Maaj, urukamtai atumsha akupniu kuítrín-juu ainia nújajísha tura chíkich yajauch shuarjajísha iruntrarum yurumprum?”

<sup>31</sup>Tutai Jesus áimkiamiyai “Shuar jaachu péñker ainiana nu ¿tsuákratniun atsumainiawak? Antsu jaa ainia nu tsuákratniun atsumainiawai. <sup>32</sup>“Wikia péñkeraitjai” tuinia nuna untsuktajtsan táchaitjai. Antsu yajauch shuar ni enentáin yapajjá Winia ajasat tusan untsuajai” tímiyai.

**Yurumtsuk Yus áujatniun Jesusan aniasarmiania nu**  
(*Mat. 9.14-17; Mar. 2.18-22*)

<sup>33</sup>Nuyá Jesusan aníak tiarmiiai “Juanka unuiniamurísha, Pariséu unuiniamurísha yurumtsuk Yúsan áujainiatsuk. Tura ame unuiniamurmeka ¿urukamtai ijiarma Yúsan áujainiatsu?” tiarmiiai.

<sup>34</sup>Tutai Jesus tímiyai “Nuatma nampernum, ¿ipiaamu ainia nu ijiarmamniakait, yamá-nuatu pujai? <sup>35</sup>Atsá. Wats Wisha ukunam junaktiatjai; nuínkia ijiarmatin átatui” tímiyai.

<sup>36</sup>Tura junasha nujai métek-taku unuiniamiyai: “¿Yamaram pushí tsupikiar nujai arut pushiniam anujtukminkiait? Nu túramka yamaram pushí yajauch ajasaintiui; túrasha shiir anujkam arut pushijjai mai metek yamaram wáinkiachminiaiti. <sup>37</sup>Núnisan nijiamanch yamá nawamu nuap najanam arutnum yaraachminiaiti. Túramka nijiamanch kariak ijiakratniuiti; túmak nijiamchisha nuap najanamusha mai metek menkainiawai. <sup>38</sup>Tuma asamtai nijiamanch yamá nawamu yamaram nuap najanamunam yaraatniuiti. Nu túramka mai metek péñker átiniait. <sup>39</sup>Yaunchu nawamu úmana nuka yamarman nakitrattui. “Yaunchu nawamu imiá péñkeraiti” tiártatui” tímiyai Jesus.

**Ayampratin tsawantaj trikiu neren achikiarmiania nu**  
(*Mat. 12.1-8; Mar. 2.23-28*)

**6** <sup>1</sup>Ayampratin tsawantaj Jesussha unuiniamurijjai araamunam wekasar, unuiniamurísha trikiu neren majurkutak wekainiarmiiai;

tura tishisar neren yuawarmiayi. <sup>2</sup>Nuna túruiniakui Pariséu tiarmiayi “Maaj, atumsha ayampratin tsawantaj takaschatniua nu, ¿urukamta takaarum?”

<sup>3</sup>Takui Jesus ayak tímiayi “Yaunchu uunt akupin Tawitcha tura nemarniusha tsukamainiak túrawarmia nu ántichukaitrum. <sup>4</sup>Tawit Yusa Jeen wayá, Yus iniaktusma tantan yuámiayi; tura nemarniuncha ajamsamiayi. Tura nu tantancha aya Israer-shuara Pátrirí yúatin ármiai. Tuma ain Tawitcha yajauchin túrutsuk achikmiayi, tímiayi. <sup>5</sup>Wisha Aents Ajasuitkiun ayampratin tsawantan Nérenniurintjai” tímiayi Jesus.

### **Shuara uweje jakaan Jesus tsuármiania nu**

*(Mat. 12.9-14; Mar. 3.1-6)*

<sup>6</sup>Chíkich ayampratin tsawantaj Israer-shuar iruntaj jeanam Jesus wayá unuiniartasa nankamamiayi. Nuí shuar uweje untsuuria nu jakaan pujumiayi. <sup>7</sup>Tura Israer-shuara jintinniurisha, Pariséusha Jesusan “yajauch túrayi” titiai tusar wakeruiniak, “ju ayampratin tsawantaj nu shuaran tsuartimpiash” tusar ii pujuarmiayi. <sup>8</sup>Túrasha Jesuska ni enentáimmarin nekariarmiayi. Túmayat uweje jakaan chicharuk “Juí ajapén wajasta” tímiayi. Tutai áishman ajapén wajasmiai. <sup>9</sup>Nuinikia iruniarmiania nuna Jesus tímiayi “Enentáimpratarum. Ayampratin tsawantaj yajauch túratin, péñker túratniujaj ¿tuá péñkerait? ¿Uwemtikratin, máatniujajisha tuá péñkerait?” tímiayi. <sup>10</sup>Nuyá téntakarmia nuna iis áishmankan tímiayi “Uwejem takuitia.” Áishmansha uwejen takuimtai nú chichamaik péñker ajasmiai. <sup>11</sup>Tura chíkichkia ti kajerarmiayi. Túrawar “Jesus warí itiurkamniakit” tusar aniniaisarmiayi.

### **Tuse unuiniamun Jesus anaikiamiania nu**

*(Mat. 10.1-4; Mar. 3.13-19)*

<sup>12</sup>Nuyá Jesus Yúsan áujstataj tusa náinnium wakamiayi. Tura nu kashi Yúsan au-aujkuwa tsawarmiayi. <sup>13</sup>Tsawarmatai unuiniamurin ikiankar tuse anaikiamiai. “Winia akatramuruitrume” tímiayi. <sup>14</sup>Ju ármiai: Emka, Semun chíkich naari Pítiur apujtusmia nu; tura nuyá ni yachí Antres, Jakupusha, Juansha, Jiripisha, Parturumísha, <sup>15</sup>Mateusha, Tumassha, Arpeu uchirí Jakupusha, Ásump Semunsha, <sup>16</sup>Jakupu yachí Jútassha, tura Jútas Iskariúti Jesusan ukunam surukmia nu. Nu tuse achikma ármiai.

### **Untsurí shuaran Jesus yáinκιarmiania nu**

*(Mat. 4.23-25)*

<sup>17</sup>Niijjai Jesus náinniumia pakanam taawarmiayi. Nuí pujusarmiayi. Nuísha untsurí unuiniamurisha, tura Jutía nunkanmaya, tura

Jerusarénumiā tura nayaantsanam ayamach Tiru, tura Setun péprunmayā ti untsurī aents antuktaitсар pjuarmiayi. Jesus tsuarati tusar káunkarmiayi. <sup>18</sup>Iwianchrukusha tsuámarmiayi. <sup>19</sup>Jesus tsuártinian tujinkiachu asamtai ashi shuar antintaj tusar wakeriarmiayi.

### Náinnium Jesus etserkamu

(Mat. 5.1-12)

<sup>20</sup>Ni unuiniamurin Jesus iis juna tímiayi: “‘Yusan atsumajai’ tárúmna nu, Yus akupeamunam páchitkíaitrume; tuma asamtai warasminíaitrume.’

<sup>21</sup>‘Yamáí tsukamarmena nu ukunam ejemartatrume. Tuma asamtai warasminíaitrume. Yamái útrumna nu, ukunmanka wishirtatrume. Tuma asamtai warasminíaitrume.’

<sup>22</sup>‘Atumin nakitrampramatai, ajapramawarmataisha, tura Winia Aents Ajasu tutaiya nú shuar ajasuiti tusar tsanumprutmak katsekkramkarmataisha warasminíaitrume.’

<sup>23</sup>‘Túramtai nayaimpiniam ti shiir ana nu núkap sunastin átatui tu enentáimsarum ti warastarum. Warí, ju shuara uuntri yaunchu Yúsnan etserniun nútiksaran yajauch awajsacharmakia.’

<sup>24</sup>‘Tura kuítrinniutiram atumsha atumí waratairi aya yamaik waintrume. Ukunmanka waraschattarme.’

<sup>25</sup>‘Atsumatsjai, tu enentáimprumna nu, ukunmanka atsumattarme. Nuinkia waraschattarme. Yamái wishíarmena nu, ukunmanka wáitiakrum úttiatrume. Nuinkia waraschattarme.’

<sup>26</sup>‘Ashí aents atumin shiir awajtamkurmin aneartarum. Nujai waraschatniuitrume. Warí nuna uuntri ántar-yusnan etserin armia nuna nútiksaran yaunchu shiir awajsarmiayi.’

### Ii nemasri aneatniun Jesus unuiniamiayi

(Mat. 5.38-48; 7.12)

<sup>27</sup>‘Winia anturtarmena nuna juna tájarme: Ame nemasrum aneata, nakitramainia nusha shiir awajsata; <sup>28</sup>yajauch chichartamainia nusha shiir enentáimtusarta; katsekramainia nusha Yus áujtusarta. <sup>29</sup>Ame yapimin ijiutmamtaí áatú yapirui sha ijiuti tusam iniaktusta; ame pushirmin jurutramkitiaj tuíniakuisha sákurmencha jukiti tusam iniaisata. <sup>30</sup>Seatmana nu susata, tura áminiun jurutramainiakuisha ataksha awanturkitia tiip. <sup>31</sup>Chíkich winia túrutati tusam wakeramna nútiksamek chikichcha túrata.’

<sup>32</sup>‘Iista, aya atumin anenmainia nuke aneakmesha, ¿nusha warí pénkera túrarum? Yajauch shuarsha nuna túrin áiniawai. <sup>33</sup>Tura atumniasha pénker awajtamainia nuke pénker awajkurmesha ¿nusha warí pénkera túrarum? Yajauch shuarsha nuna túrin áiniawai.

<sup>34</sup>Awaṅturkimniaiti tu enentáimtarum nuke íkiakrumsha ḡnusha warí péṅkera túrarum? Yajauch shuar nuamtak yajauch shuarjají awaṅturkimniaiti tu enentáimsar ikianainiawai. <sup>35</sup>Tura atumsha nemasrum aneatniuitrume, tura péṅker túratniuitrume, tura awaṅturkittiwai tu enentáimtsuk ikiastiniaitrume. Túrakrumniṅkia Uunt Yus péṅker akirmaktatrume; tura ni uchiríntjají tu iniakmastatrume. Yuska, “yumiṅsajme” ticha nunasha tura yajauch shuarnasha shiir awajeawai. <sup>36</sup>Ii Aparí waitnentramniua nútiksarmek atumsha waitnentratarum.’

### **Chikicha túramurí ti enentáimtusairap**

*(Mat. 7.1-5)*

<sup>37</sup>‘Chikicha túramurí ti enentáimtusairap. Núnisaṅ Yuska atumí tunaarín iirtamsashtatui. Chikicha tunaarín “nuke asutniatniuiti” tiirap. Núnisaṅ Yus atumin sumamtikramashtatrume. Tsanḡkurnairatarum. Núnisaṅ Yus tsanḡkurtamprattawai. <sup>38</sup>Chikichcha susata. Núnisaṅ Yus atumin suramsattarme. Niisha péṅker nekapma, tura núkap ati tusa teeka awajas tura patas núkap enkea emetsají amastatui. Atum chíkich túrarmena nútiksaj atumniasha túrutmattarme.”

<sup>39</sup>Tura nuyasha juna métek-taku chichaman ujakarmiayi: “Jijí kusurusha ḡitiurak chíkich kusuruncha jukimniait. Mai metek waṅnam iniaashtatuak? <sup>40</sup>Unuiniamua nu unuiniana nuna nanḡkaamas áchatniuiti. Túrasha niisha ti unuimiatar unuiniana nujají métek nekaamniaiti.’

<sup>41</sup>‘ḡItiurtsuk atumi jiiṅ numi enḡketna auk ítskesha atumí yachí jiiṅ tsuat enḡketusha iiyarum? <sup>42</sup>Ame jiiṅmiiṅ numi tuke enḡketaisha ḡitiurtsuk ame yatsumi jiiyá tsuátan jurustajme tame? ¡Ántrairume! Emka ame jiiṅmiiṅ numi enḡketna nu jusata. Nuiṅkia paant wáinkiatame yatsumi jiiṅ tsuat enḡketna nu jurustin.’

### **Nerejají numi nekaatainti**

*(Mat. 7.17-20; 12.34-35)*

<sup>43</sup>‘Péṅker numi yajauchin nereatsui; tura yajauch numi péṅkeran nereatsui. <sup>44</sup>Numisha ni neren nékanui. Tsachikniumiasha kushiṅkiap júukchamniaiti. Tura naranmaya shuinia júukchamniaiti. <sup>45</sup>Núnisaṅ péṅker shuar ni enentáí péṅker asamtai péṅkeran chichaawai; tura yajauch shuar, enentáí yajauch asamtai yajauchin chichaawai. Páantchakait. Enentáin pimiutkamu ana nuyañ ni wenejají chichaawai.’

### **Jimiará jea ukurtin**

*(Mat. 7.24-27)*

<sup>46</sup>‘Wi tájana nu túrachiatrumsha ḡurukamtai Winia, Uunta, túrutrum? <sup>47</sup>Shuar winia chichamprun ántuinia nu jea jeammajají méteketete. Winia

anturtuk umíana nu jujají métekete: <sup>48</sup>Shuar jean jeamuk emka init taur kayanam ukurmai. Tura yumi ti yutuk, entsa nujan<sub>nk</sub>rua tukummaitiat pukukachmai kayanam ukuamu asa. <sup>49</sup>Antsu Winia anturtukiat umiatsna nuka jujají métekete: Shuar jean jeamuk aya naikminiam jeammai. Tura entsa nujan<sub>nk</sub>rua tukumpram nu jeaka pukukamai. Tura mash sáantramai.” Tu unuiniamiayi Jesus.

### Suntara yáin<sub>tr</sub>in Jesus tsuármiania nu

(Mat. 8.5-13)

**7** <sup>1</sup>Jesus áentsun unuiniasua amik Kapernáum péprunam wémiayi. <sup>2</sup>Nují Rúmanmayá suntara kapitíán<sub>tr</sub>i pujumiayi. Nu kapitíán<sub>i</sub> takarniurí, ti aneamurí, jakamnia jaamiayi. <sup>3</sup>Tura Jesusan pachis áujmatainian antuk, ame shuarum Jesusan itiantiti tura winia takarniun tsuárturti tusa Israer-shuara úun<sub>tr</sub>in akupkamiayi. <sup>4</sup>Niisha Jesusan weriar, umirtukat tusa ti seainiak tiarmiayi “Ju kapitíán nekas yáin<sub>tr</sub>in pé<sub>nk</sub>keraiti. <sup>5</sup>Niisha yajayá apachitiat in shiir enentáimturmají. Tura iruntai jean jeamtinniasa ni<sub>nk</sub>i chicharkaiti, tura yayawai.”

<sup>6</sup>Nuyá Jesus niijají wémiayi. Tura ni jeen jeastatuk jatemsantai kapitíáncha ni amik<sub>tr</sub>in akatar ju titiarum tusa Jesusan akuptukarmiayi. Niisha Jesusan chicharuk juna tiarmiayi “Uuntá, ántram wayataj tu enentáimsaip. Ame ti nan<sub>ka</sub>amakaku asam winia jearuí wayachminiaitme. <sup>7</sup>Tuma asakmin imia wiki Ami<sub>in</sub> jeatniun arantukjame. Ayatik “pé<sub>nk</sub>ker ajastí” tákumin winia takarniusha pé<sub>nk</sub>ker ajatrustatui. <sup>8</sup>Wi nékajai. Winia úuntur winia akuptuiniawai. Tura wisha suntaran akupenajai. Nunasha wi “wetá” takui wéawai. Tura chikichnasha “winitíá” tutai winiawai. Tura winia takartinian “ju túratá” tutai umíawai.” Tu tímiayi.

<sup>9</sup>Jesus nuna antuk ti enentáimias ni nemarainian tímiayi “Nekas tájarne Israer-shuar Yúsan tímiatrus enentáimtinian wáinchaitjai.”

<sup>10</sup>Tura kapitianí akatramurí jeá waketkiar, takarniurí pé<sub>nk</sub>ker ajasun wáinkiarumiayi.

### Wajé uchir<sub>in</sub> Jesus iniantkimiiania nu

<sup>11</sup>Nuyá ukunam chíkich pepru Naín tutainium ni unuiniamurijjají tura chíkich untsurí aentsjají Jesus wémiayi. <sup>12</sup>Tura péprunam nuntumas jakaan iwarsatai tusar ju<sub>in</sub>ian wáinkiamiayi. Jakáa nukurí wájeyayi, tura uchirí jakamia núchikiyayi. Tura ti untsurí nu peprunmayá nin nemarsarmiayi. <sup>13</sup>Jesus nu wajen wáiniak tura waitnentar “úutip” tímiayi.

<sup>14</sup>Nuin<sub>nk</sub>ia Jesus jakaa en<sub>nk</sub>erman tarunt anti<sub>nk</sub>miayi; nuna ju<sub>in</sub>iasa wajasarmiayi. Nuin<sub>nk</sub>ia Jesus jakaan chicharuk “Umpa nantaktia, tájame” tímiayi.

<sup>15</sup>Tutai niisha nantaki pujus chichaamiayi. Tura Jesus ni nukur<sub>in</sub> “Jujú uchiram” tímiayi.

<sup>16</sup>Tura matsamiarmia nu, nuna wáinkiar ashamkarmiyai. Tura Yusa náarin shiir awajsarmiyai. Tura chichainiak, “Yúsnan etserniuchukait Niisha. Ataksha Yúsnan etserin uunt ana nu tarutramji” tiarmiayi. Tura “Israer-shuarti Niiniu ájinia nuna yáinmaktai tusa Yus tarutramji” tiarmiayi.

<sup>17</sup>Tura ashí Jutía nunkanmayasha tura ni írutkamu nunka ármia nuyasha Jesus túramia nuna nekaawarmiyai.

**Imiakratin Juan sepunam pujak ni amikrin akatar Jesusan akuptukarmiania nu (Mat. 11.2-19)**

<sup>18</sup>Juan ni írutkamuri ujakam Jesus túramun nekaamiayi. Nekáa ni írutkamurin jímiaran utsukmiayi. <sup>19</sup>Tura Jesusai akupkarmiyai. “Atumsha Jesus aniastarum. ¿Amesha nekas Kristu Yus akupkamu tátinia núkaitiam. Kame chikichak nákastataj*?* titiarum. Nu nekáa ikiuutarum*’* tímiayi.

<sup>20</sup>Tutai niisha Jesusan werí jeariar tiarmiayi “Incha imiakratin Juan akatar akuptamkaji. ¿Amesha nekas tátinia núkaitiam. Chikichak nákastataj*?* Nu nekaatai tusar wakeraji” tiarmiayi.

<sup>21</sup>Wats, nii jeawarmia nui Jesus untsuri jaan tsuártasa pujurmiayi. Iwianchrukuncha iwianchrin jirki akupkatasa pujurmiayi. Tura kusuruncha ímtikmiayi. <sup>22</sup>Tuma asa Jesus akatramun juna tímiayi: “Waketkirum ashí átum antukurmena nusha, wáinkiarumna nusha ujaktarum. Kusurusha wáinmainiawai; shutuap ainia nu péñker wekainiawai; tunamarusha tsuámainiawai; empekusha ántuiniawai; jakaasha atak iwiaaku ajainiawai; tura kuítrinchamsha uwempratin chicham ujakmaiti. Juan nu ujaktarum. <sup>23</sup>Yawetssuk Winia tuke shiir enentáimturna nú shuar shiir átatu*’*” tímiayi Jesus.

<sup>24</sup>Waketkiarmatai Jesus Juánkan pachis áujmatman antuk shuar matsamarmia nui juna tímiayi: “Shuar atsamunmasha ¿warí werimiarum. Pintiu nase umpúam atúu we juni we ajana nu iistai tusarmek wémarum? Juan núnichaiti. <sup>25</sup>Nuikia ¿warí werimiarum. Shuar péñker iwiamampra íistai tusarmek wémarum? Warí, péñker iwiamampraka uunt akupniu jeen pujuiniatsuk. <sup>26</sup>Nuñkia ¿warí werimiarum. Yúsnan etserniuk werimiarum? Maa, nú nankaamas wáinkiarne. <sup>27</sup>Yaunchu Yus-Chichamnum ju áarmaiti:

“Winia akatramurun amiini emka akupeajai ame jintimin iwiarat tusan.”

Juan nu akatramuiti. <sup>28</sup>Nekasan tájarme, Yúsnan etserin imiakratin Juanjai nankaamas uunt atsuwiti. Túmaitiat Yus akupeamunam páchinia nu shuarka nekas imianchaitiat, Juanjai nankaamas átatu*’*” tímiayi.

<sup>29</sup>Peñké shuarsha, kuítian-juusha, Juan imiaimiujai imianiarmia

nu, Jesus timian antukar Yusa náarin shiir awajsarmiyai. <sup>30</sup>Túrasha Pariséusha Israer-shuara jintinniurisha Yus yáintaj támaitiat Juan imiaamujai imiancha ásar nakitrarmiyai. <sup>31</sup>Nuñkia Uunt Jesus tímiyai “Yamaya áentstiram, warijiain métek árum nuna paant títiatjarme. <sup>32</sup>Uchijiain métek árume. Ni aijain iruntrar nakurustaj tukamá tuñiawai “Námpera áinis nakurustaitsar peem umpuarji, túrasha jantsemáchurme. Nuyá iwiarsatniua áinis nakurustaitsar íwiareakur kantamtai kantamáaji, túrasha átum úutcharme.” Tu tuñiawai. <sup>33</sup>Atumsha núnisaitrume. Kame Juan núkap yurumtsuk úmutsuk wekaimiyai. Túmakui átumka “iwianchrुकuiti” tímiarme. <sup>34</sup>Nuyá Wisha Aents Ajasan támajai. Tura yurumá úmakuisha “ti yurumin tura ti nampenaiti; kame ashí yajauch shuaran tura kuítian-juu amikrinti” túrutrume. <sup>35</sup>Wats, nekas neka ainia nu, Yusa nekatairin iniakmainiawai.” Tu tímiyai.

### Pariséu Semuñ náartin Jesusan ni jeen ipiaamiania nu

<sup>36</sup>“Winí yurumáitia” tusa Pariséu Jesusan ipiaamiyai. Tutai Jesus ni jeen werí misanam pujusmiyai. <sup>37</sup>Nuñkia nu péprunmaya yajauch nuwá, Jesus Pariséu jeen yurumáttsa weyi táman antuk, kayá mutinium kunkuin asuiti áimkiamun takukí jearmiyai. <sup>38</sup>Tura úutki Jesusa nawen pujuras neajkijiain nijiarmiyai. Tura intiashijiain japirmiyai; nuyá nawenam mukuta kunkuinian ni nawen ukatramiyai. <sup>39</sup>Pariséu Jesusan ipiaamia nu, nuna wáiniak juna enentáimsamiyai: “Ju nekas Yúsnan etserniuítkiunka, ju yajauch nuwá ántiana nuna nekaawainti. Warí, niisha netse nuwáchukait” tu enentáimsamiyai.

<sup>40</sup>Nuñkia Jesus Pariséun chicharuk tímiyai “Semuñká, ámin titiaj tusan wakerajai.”

Tutai Pariséu chichaak “Turuttiain, Uuntá” tímiyai.

<sup>41</sup>Tutai Jesus tímiyai “Kuítian ikiamniun jimiará áishman tumashmakarmiyai. Chíkich kiniantus (500) tura chíkichka aya senkuentak tumashmakmiyai. <sup>42</sup>Akiktin tsawant jeamtai máí-metek takakcha ármiyai. Tuma asamtai kuítian ikiamin ni tumashrin máí-metek asakátrarmiyai. Wats, turuttiain ¿tú áishmanka ikiamniun nekas aneamia?” tímiyai.

<sup>43</sup>Tutai Semuñ tímiyai “Enta, núkap tumashrin tsankuramia nu.”

<sup>44</sup>Tutai Jesus tímiyai “Nekas tame.” Nuñkia nu nuwán iis Semuñkan tímiyai “Ju nuwá wáintsumek. Ame jeemiin wayamtai winia nawer niartin entsa suruschamame; antsu ju nuwáka nawerun neajkijiain niarturai, tura intiashijiain japirturai. <sup>45</sup>Mukutam áujtuschamame; antsu niñkia nawerun tuke mukutui. <sup>46</sup>Winia muukaruisha asuiti ikiurtuschamame; antsu niñkia nawerui kunkuin asuitin ukatrurai. <sup>47</sup>Nu tuma asamtai tájame, niisha Winia ti anentu asamtai ni tunaari untsurí ana nu tsankuramuiti. Tura tunaar ishichik awai tau tsankuramu ana nuka ishichik anenkratniuiti.” Tu tímiyai Jesus.



<sup>48</sup>Nuĩnkia nuw̃an tímiayi “Ame tunaarum ts̃ankuramuitme.”

<sup>49</sup>Tura ch̃íkich ipiaamu Jesusj̃ai misanam pujuarmiania nu “¿J̃usha ya as̃an tunaancha ts̃ankurea?” nuamtak tunainiarmiayi.

<sup>50</sup>Tura Jesus nuw̃an chicharuk ““Uwemtikiartiniati” tu enentáimturum asam uwempraitme. Shiir wetá” tímiayi.

#### Nuw̃a Jesusan yáĩnkarmiania nu

**8** <sup>1</sup>Nuyá untsurí péprunam Jesus wekaráktak Yus akupeana nuna shiir chichaman etserkini wekaimiayi. Tura ni unuiniamurí tuse ármia nu nemarsarmiayi. <sup>2</sup>Yaunchu untsurí nuw̃a jaa armia nuna tura iwianchruku armia nunasha Jesus tsuárarmiayi. Nu nuw̃asha Nin nemarsarmiayi. Nusha j̃u ármiai: Maktaranmaỹa Marí, siatí íwianch j̃iĩrkimiuỹania nusha <sup>3</sup>tura uunt akupin Erutisa takarniurí Chusa nuw̃é Juancha, tura Susancha; tura ch̃íkich untsurí ni takakmarin súsar Jesusan yáĩnkarmiayi.

#### Atsaamin atsaampramun Jesus unuiniamiania nu

(*Mat. 13.1-9; Mar. 4.1-9*)

<sup>4</sup>Untsurí péprunmaỹa Jesusan iistai tusar j̃iĩnkarmiayi. Tura untsurí káunkarmatai j̃u métek-taku chichaman Jesus unuiniamiayi:

<sup>5</sup>“Atsaamin atsaamprataj tusa j̃iĩnkimiayi. Atsaamki wesa jinkiái jintiá iniaararmiayi. Túrunamtai weenak najakarmiayi. Nuyá ch̃ink̃i tariar yuawarmiayi. <sup>6</sup>Ch̃íkich jinkiái kaya írunmanum iniaararmiayi. Nu jinkiái tsapainiar, wárik nantu sukuam kárarmiayi. <sup>7</sup>Ch̃íkich jinkiái jañkiniam iniaararmiayi. Tura jañkisha jinkiáisha mái-metek tsapainiar, jañki kañkar ajakramiayi. <sup>8</sup>Tura ch̃íkich jinkiáisha péñker nuñkanam iniaararmiayi. Tura tsapainiar, péñker nerekar ch̃íkichkia sĩansha (100) nerekararmiayi.” Tuasua amik kakantar chichaak Jesus tímiayi “Kuishim ákuĩnkia antuktarum.”

(*Mat. 13.10-17; Mar. 4.10-12*)

<sup>9</sup>Nuyá ni unuiniamurí Jesusan aniak tiarmiayi “J̃u métek-taku chicham tamena nu ¿warintkum̃ea tame?”

<sup>10</sup>Tutai Jesus tímiayi “Atumnia Yus ni akuptairin nekaachma ana nuna nekamtikramprume. Tura chikichnaka, wáiniainiayat kusurua núnin ártí tusan, tura ántuiniayat nekaacharat tusan aya métek-taku chichamj̃ai jintintiatj̃ai,” tímiayi.

#### Atsaampramu chichaman Jesus paant jintintiamiania nu

(*Mat. 13.18-23; Mar. 4.13-20*)

<sup>11</sup>“Wats, j̃u nekaatarum, tímiayi. Jinkiáisha Yusa chichamen nakumui. <sup>12</sup>Jintiá iniaaru tana nuka shuar aya ántana nuna nakumui. Yúsan nekas

enentáimtus uwempracharti tusa íwianch wárik taa nu chichaman ni enentáiyān júawai. <sup>13</sup>Kayanam iniaaru tana nuka shuar antuk waras umiana nuna nakumui. Tura nú shuar kan̄kapē atsá asamtai, ishichik tsawantiniñ umikiar itirchatan wáinkiar wárik kanainiawai. <sup>14</sup>Jan̄kiniam iniaaru tana nuka tuke enentáijjāi umíatsna nuna nakumui. Nu shuarsha ántuiniawai, túrasha ni wakeramurijjāi wekainiawai. Ju nun̄kanman̄ ana nuna ti páchiniakui, tura kuítian ti wakeruiniakui, warastinniak enentáimtuiniakui, Yus-Chicham ni enentáin̄ takaatsui. Nujāi kan̄karma ásar nerektinian tujintiainiawai. <sup>15</sup>Tura jinkiái péñker nun̄kanam iniaaru tana nuka shuar antuk umiinia nuna nakumui. Niisha antukarmia nuna péñker enentáimtusar, yawetsuk umirkar ti péñker nerenawai.’

### Ashí iwaiainiakma átatui

(*Mar. 4.21-25*)

<sup>16</sup>¿Shiripkin ekeemak nukuktinkiait? Peaknum waaptak ikiuschatniuiti. Antsu jeñam wáiniana nu paant wáinkiarat tusa yakí ekentsatniuiti. <sup>17</sup>Núnisan̄ ashí nekaachma ana nu paant átatui. Tura úlkma ana nu nekanattawai. Tura iwaiainiakma átatui. <sup>18</sup>Tuma asamtai anearum péñker antuktarum. Shuar takakna nu patatsamnia átatui. Túrasha takaktsuna nu, takakjai tu enentáimtumana nuka jurunkíttiawai.” Tu timiayi.

### Jesusa nukurí, Jesusa yachi

(*Mat. 12.46-50; Mar. 3.31-35*)

<sup>19</sup>Jesus pujamunam nukurí ni yachiśha tariarmiayi. <sup>20</sup>Turamtai Jesusan tiarmiayi “Ame nukusha yatsumsha aā wajasar untsurmainiawai.”

<sup>21</sup>Tutai Jesus tímiayi “Ee, nukuruít, yatsuruít, tura Yus tana nuna antuk umíana nusha winia nukuruít, winia yatsuruít.”

### Nasesha entsasha Jesusan umirkarmiania nu

(*Mat. 8.23-27; Mar. 4.35-41*)

<sup>22</sup>Chíkich tsawantai Jesus ni unuiniamurijjāi kanunam en̄kemprar “Antumian̄ amaini wetai” tímiayi. <sup>23</sup>Entsanam wesar Jesus kanarmiayi. Tura aya aneachma nase ti kakaram násentkui chíchimi tampá tukumar kanun inít awayastatuk awajmiayi. <sup>24</sup>Túram nuñkia Jesusan ishintiainiak “Uuntá, iisha entsá wayaaji” tiarmiayi. Nuñkia Jesus nantaki nasencha entsan̄cha chicharkamiayi. Nú chichamaik nasesha men̄kakamiayi, tura entsasha miaaku ajasmiai. <sup>25</sup>Nuyá ni unuiniamurin̄ chicharuk “¿Urukamtai Winia enentáimtursachuram?” tímiayi.

Tura niisha ashamainiak, ti enentáimprar “¿Ausha warí áishman̄kait? Nasesha entsasha Nii chicharkam umirainiatsuk” tiarmiayi.

**Jatara nun̄kanam Jesus iwianchrukun tsuármiania nu**  
(*Mat. 8.28-34; Mar. 5.1-20*)

<sup>26</sup>Kariréa nun̄ka amaini Jatara nun̄kanam jeawarmiayi. <sup>27</sup>Kanunmaya Jesus jiinkimtai nu péprunmaya áishman̄ Nin taruntamiayi. Nu áishmansha yaunchu iwianchrukuyayi. Misú wekas, jeá pujutsuk aents iwiansamunam pujuyayi. <sup>28-29</sup>Íwianchkia nu aishman̄kan ti kakaram nupet wémiayi. Tura emetatai tusar uwejencha nawencha jirujaj̄ jinkia wearmiayi. Túrasha tujinkiarimiayi. Niisha jiruncha tsurí wémiayi. Tura íwianch aents atsamunam útsuk awemamiayi. Nu aishman̄ Jesusan wáiniak tikishmatar kakantar chicharuk “¿Urukamtai winiisha tarutnium, Uunt Nan̄kaamaku Yusa Uchirí Jesusa? Winia wáitkiarsaip tusan seajme” tímiayi. Íwianch niin̄ pujurun Jesus jiīki akupeam tu tímiayi. <sup>30</sup>Jesus nu áishman̄kan anias “¿yáitiam?” tímiayi.

Tútai nii chichaak “Wikia Untsuríntjai” tímiayi. Untsurí íwianch niin̄ pujurma asa nuna tímiayi. <sup>31</sup>“In uunt wáanam ii jiinkimij nuin̄ akuptukam amutkaip” íwianch seawarmiayi Jesusan. <sup>32</sup>Nū ishichik arantach náinnium untsurí kuchi shushun̄mak yujaarmiayi. Tura íwianch chichainiak, “Antsu kuchiniam wayatin̄ tsankatrukta” tiarmiayi.

Tutai Jesuska “Ayu, wetarum” tímiayi.

<sup>33</sup>Nuna takui íwianch áishman̄numiá j̄iinkiar kuchiniam wayawarmiayi. Túram kuchisha nánatanam akaiki iniaawar entsanam utsanawarmiayi. Túrunawar jakekarmiayi.

<sup>34</sup>Kuchin wáinniusha túrunan wáinkiar, ashamkar, péprunmasha tura arantcha etserkatai tusar tseke wearmiayi. <sup>35</sup>Etserkarmatai, iyutai tusar untsurí shuar wearmiayi. Tura Jesus pujamunam jeawar, íwianch j̄iintiukiarmia nú áishman̄kan péñker ajas pushí entsar Jesusa nawen pujan wáinkiarimiayi. Tura ashamkarmiayi. <sup>36</sup>Iwianchruku áishman̄ tsuárman wáinkiarimia nu yama taan ujakarmiayi. <sup>37</sup>Tura ti ashamainiak Jatara nun̄kanmaya aents ashí Jesusan “Wetá” tiarmiayi. Tutai Jesus kanunam en̄kemar wémiayi. <sup>38</sup>Íwianch j̄iintiukiarmia nú áishman̄ Jesusan, wisha ame wéamunam winitiaj tusa seamiayi. Tutai Jesus nuna suritiak, <sup>39</sup>“Antsu ame jeemiin̄ weme Yus ámin túrutma nu ashí etserkata” tímiayi. Tutai áishman̄ we Jesus nin túramia nuna ashí nu péprunam etserkamiayi.

**Jairu nawantr̄incha tura chíkich nuwancha Jesus tsuármiania nu**  
(*Mat. 9.18-26; Mar. 5.21-43*)

<sup>40</sup>Tura Jesus katiñki Kariréanam tatí tusar nákas pujuarmiayi. Tuma ásar Nii waketki katiñki támatai nu aencha warasar áujsarmiayi. <sup>41</sup>Tumaj̄ Israer-shuara iruntai jeá uuntrī Jairu naartin támiaiyi. Nii taa, Jesusa nawen tikishmatar “Winia jearuj̄ waitneasam winítrítia” tímiayi. <sup>42</sup>Ni

nawantrí chikichik amia nu, tuse uwí takaku, jakatasa pujakuí nuna tímiayi.

Jesus “ayu” tinia weakui ti untsurí aents nemariarmiayi. Tura untsurí shuar kaē ajas weena ásar chanuawarmiayi.

<sup>43</sup>Nuñ nuwā páchitkia wémiayi. Niisha tuse uwí numpa ajapeak wáitias pujuyayi. Tsuákratniua nuísha ni kuítrín ashí ajapaitiat tsuámarchauyayi.

<sup>44</sup>Jesusa úkuriiní winiá weantuk ni pushirí nánkatramurín antinmiayi. Nuna tura nú chichamaik numpé ájapeamuncha péñker ajasmiayi.

<sup>45</sup>Nuñkia Jesus chichaak “¿Ya Winia antintkia?” tímiayi.

Tura “penksha antinčajme” tuíniakui Pítiur ni tsaniakmaríjiaí Jesusan chicharuk “Uuntá, ti untsurí antinmasha, tura ti untsurí chanunmainiasha ¿itiura “ya Winia antintkia” tame?” tíarmiayi.

<sup>46</sup>Tútaisha Jesus tímiayi “Nekas Winia antintkiayi. Winia kakarmarjái tsuárajna nuna nékajai” tímiayi.

<sup>47</sup>Nuyá nu nuwasha, nekarayapi tusa kurañki taa Jesusa nawen tikishmatramiayi. Tura ashí aents ántuiniamunam urukaku antinikia tura itiura wárik péñker ajasmia nuna ujakmiayi.

<sup>48</sup>Nuñkia Jesus nuwan tímiayi “Nawantrú, shiir wetá. Winia nekas enentáimtursa asam péñker ajasume.”

<sup>49</sup>Jesus tuke chichas pujai uunt Jairo jea, ti untsurí antinmasha, turenía taa, Jáirun tímiayi “Ame nawantrum jakayi. Unuikiartin tuke itit awajipia” tímiayi.

<sup>50</sup>Tura Jesus nuna antuk tímiayi “Ashamkaip. Áyatik Winia nekas enentáimtursata. Túrakmin nawantrum péñker ajastatui” tímiayi.

<sup>51</sup>Jeá jeawar Jesussha Níjjiaí untsurí wayatniun surimkiamiayi. Antsu aya Pítrun, Jakupun, Juánnasha tura nuwachi aparín nukuríncha wayatniun tsanekatkamiayi. <sup>52</sup>Ashí úutainiak atakka wáinkiashtatjapi tu úutiarmiayi. Túmainiakui Jesus penké jakaan nékayat tímiayi “Úutirpa. Nuwachkia jákachai, antsu kanarai” tímiayi.

<sup>53</sup>Jakaancha urukaku ta tusar wishikrarmiayi. <sup>54</sup>Nuyá Jesus nuwachi uwején achik, kákantar chicharuk “Nawantru nantaktia” tímiayi.

<sup>55</sup>Túram niisha jakayat atak iwiaaku ajasmiayi. Tura nú chichamaik nantakmiayi; túrunamtai Jesus “ayuratarum” tímiayi. <sup>56</sup>Nuwachi aparí nukurísha ti enentáimprarmiayi. Tura Jesus “Ju túramu penké etserkairap” tímiayi.

**Jesus ni unuiniamurín etserkati tusa akupkarmiania nu**  
(*Mat. 10.5-15; Mar. 6.7-13*)

**9** <sup>1</sup>Ni tuse unuiniamurín ikiaanank ni chichamejái iwianchrukun enentáiyān iwianchin jíirki akupkatniun tura sunkurjái jaa tsuártinniasha ni kakarmarín súsarmiayi. <sup>2</sup>“Yus akupin ajastin ujaktarum, tura jaa tsuártarum” tinia akupkarmiayi Jesus. <sup>3</sup>Nuyá

tímiayi “Wéakrum áyatik wetarum. Ushukrustincha, uyuncha, yurumkasha, kuitcha penké jukiirap. Aya chikichík pushí jukitiarum. <sup>4</sup>Nánkamas jeanam jearum wayarmeka nuin pujustarum. Nuin pujusrumek chíkich péprunam wéakrum jíinkitiarum, tímiayi. <sup>5</sup>Tura atumin awaintiamatniun nakitiana nú péprunmaya jíinkirum nawemiya nunka akakekrum ikiuktiarum. Awaintiamachma paant ati tusarum nu túratarum” tímiayi.

<sup>6</sup>Nuyá jíinkiar ashí péprunam uwempratin chichaman ujakiar wearmiayi; tura ashí péprunam jáiniancha tsuákiar wearmiayi.

### Erutis “Jesusan íistaj” tímiania nu

(Mat. 14.1-12; Mar. 6.14-29)

<sup>7-8</sup>Uunt akupin Erutis Jesus túramun antukmiayi. Nu túramun chíkich shuarka “Juan jakamunmaya nantaki túrawai” tu wearmiayi. Chíkichkia, “yaunchu Yúsnan etserin Erías wantiniak túrawai” tu wearmiayi. Chíkichkia, “chíkich yaunchu etserin nantaki túrawai” tiarmiayi. Tuma asamtai Erutis penké nekaachmiayi. <sup>9</sup>Tura tímiayi “Wiki, Juanka muuke tsupirkatarum, tíchamkaj. Tuma aisha, ¿ju shuar, ni túramurí ashí shuar chichainia nusha yátsukait?” Tu enentáimiuk “íistaj” tímiayi.

### Senku mir áishmankan Jesus ayuramiania nu

(Mat. 14.13-21; Mar. 6.30-44; Juan 6.1-14)

<sup>10</sup>Atak Jesusa akatramurí waketki taar ni túramurin Jesusan ujakarmiayi. Nuinkia aents atsamunam Petsaitia péprunam tíjiuch weak nuí júkiarmiayi. <sup>11</sup>Tura penké shuar nuna nekaawar nemariarmiayi. Túram Jesus nin shiir áuj samiayi. Tura Yusa akuptairí pachis unuiniamiayi. Tura jaa armia nuna tsuáramiayi.

<sup>12</sup>Tura kíakui, tuse unuiniamu Jesusan wériar tiarmiayi “Uuntá, shuar akupkachminiashit. Tíjiuch péprunmasha, shúarnumkesha wear ni yurumátনিurin sumarmakarti, tura kanartintrin wáinkarti. Juí pujajnia juinkia penké atsawai” tiarmiayi.

<sup>13</sup>Tutai Jesus tímiayi “Atumsha ayuratarum.”

Tutai chichainiak “Iisha aya senku tanta tura namaksha jímiarchik takají. Ju shuar ayuratin sumaktai tusar wétiníaitjí” tiarmiayi.

<sup>14</sup>Áishmansha ti untsurí senku mir (5000) jeeá ámiayi. Tura Jesus ni unuiniamurin chicharainak ““senkuenta senkuenta kanaarum ankant ankant pujustarum,” titiarum” tímiayi.

<sup>15</sup>Túrawarmatai ashí pujusarmiayi. <sup>16</sup>Nuyá senku tantan tura jimiará namaknasha Jesus achik, yakiini íimias Yúsan yuminsamiayi. Nuyá ajamsarat tusa ni unuiniamurin súsarmiayi. <sup>17</sup>Ashí yurumáwar ejemararmiayi. Tura ampirman tuse chan kinnium áimkiarmiayi.

**Jesus Yusa anaikiamurinti ujakma amia nu**

*(Mat. 16.13-19; Mar. 8.27-29)*

<sup>18</sup>Jesus ni unuiniamurijjai áentsnumia kanaki pujuarmiayi. Jesus Yúsán aujsua umik ni unuiniamurin tiarmiayi “¿Yáiti turutainia Winia?”

<sup>19</sup>Niisha áimkiarmiayi, “Chíkich “Imiakratin Juánkaiti” turamainiawai; chikichcha “Iríasaiti” tura chíkichkia “yaunchu Yúsán etserin nantakniua núiti” turamainiawai” tiarmiayi.

<sup>20</sup>Tutai “Tura atumsha ¿yáiti túrutrum?” tiarmiayi.

Takui Pítiur chichaak “Ámeke Yusa Anaikiamuri, Kristu tutai, núitme” tímiayi.

<sup>21</sup>Tutai Jesus “Penké etserkairap” tímiayi.

**Ni jákatniurin Jesus ujakmiania nu**

*(Mat. 16.20-28; Mar. 8.30–9.1)*

<sup>22</sup>Nuyá Jesus tímiayi “Wi Aents Ajasuitjiana ju ti waitsatniuitjai. Wíi shuara uuntri, tura ni Pátriri úuntri sha tura ni jintinniurisha nakitrurar maantuáwartatui. Túrasha iwiartusarmatai menaintiu tsawant jeamtai nantaktiatjai.”

<sup>23</sup>Nuyá ashí áentsun chicharuk juna tímiayi “Shuar Winia nekas nemartustajtsa wakerakka ni wakeramurinkia iniaisati. Tuke tsawant ni krusri yanaki nemartusti. <sup>24</sup>Kame shuar ju nunkanam aya péñker pujustaj tákuñka nu shuar uwemtsuk jakattawai. Antsu Winia anentu asa péñker pujustinniak enentáimtsuna nú shuarka nekas iwiaakman wáinkiatawai. <sup>25</sup>Iimiata, shuar ashí ju nunkanam ana nuna súmakui tura jinium wétin ákuisha ¿itiurak péñker pujusat?

<sup>26</sup>Wi Aents Ajasuitjiana ju Winiasha tura winia chichampruncha shuar natsantraitkuinkia, winia wincharujai, winia Aparu wincharijjai tura nayaimpinmaya péñker suntara wincharijjai atak táakun shuar natsantrurmia nuna natsantrattajai Wi. <sup>27</sup>Tura shuar Yusa akuptairin wáintsuk jákachartatna nu juí pujuiniawai. Nuna nekas tájarne” tímiayi.

**Jesus nusháa iira ajasmiania nu**

*(Mat. 17.1-8; Mar. 9.2-8)*

<sup>28</sup>Nuna tuasua amik nuyá chíkich semanatin Yúsán áujstaj tusa Jesus náinnium wakamiayi. Pítiur, Jakupu, Juanjai nemariarmiayi. <sup>29</sup>Jesus auju pujus nusháa iira ajattsarmiayi. Ni pushirisha ti puju jíitsumir ajasmiai. <sup>30</sup>Nuinkia jimiará áishman Nijjai chicháa wajarmiayi. Nuka Muisáis Eríasjai ármiai. <sup>31</sup>Níincha wincha jíitsumir téntakarmiayi. Tura Jesus wáitias Jerusarénum jákatniurin amia nuna áujmatiarmiayi. <sup>32</sup>Pítiur ni tsaniakmarijjai kari ti pujainia in iwíáa pujuarmiayi. Tuma ásar Jesusan tura jimiará áishmanjai jíitsumir ajas wajainian

wáinkiar<sup>miayi</sup>. <sup>33</sup>Tura nu áishman<sup>u</sup> Jesusan ikiuki weenai<sup>u</sup> Pítiur Jesusan chicharuk “Uuntá, iisha ti shiir pujatsjik. Menaintiu áakmaktai, Áminius<sup>ha</sup>, Muisaisnasha, Eríasnasha áakmaktai” tímiayi. Tura Pítrusha enentáimtsuk nuna tímiayi. <sup>34</sup>Nuna chicháa puja<sup>i</sup> yura<sup>u</sup>kim tarí kaput amuawarmiayi. Tura yura<sup>u</sup>kim amuam ti ashamkarmiayi. <sup>35</sup>Nuin<sup>u</sup>kia yura<sup>u</sup>minmaya<sup>u</sup> ju chichaamun antukarmiayi: “Juka winia aneamu Uchiruiti. Nii anturkatarum.” <sup>36</sup>Chichaamun antasua amikiar Jesus nin<sup>u</sup>ki wajan wáinkiar<sup>miayi</sup>. Nuin<sup>u</sup>kia takamtak pujuarmiayi. Tura wáinkiar<sup>mi</sup>a nuna penké etserkacharmiayi.

### **Uchi iwianchr<sup>u</sup>kun Jesus tsuármiania nu**

*(Mat. 17.14-21; Mar. 9.14-29)*

<sup>37</sup>Kashin tsawantai<sup>u</sup>, náinniumia<sup>u</sup> táarmatai, ti untsurí<sup>u</sup> shuar Jesus in<sup>u</sup>kiuntai<sup>u</sup> tusar wear<sup>miayi</sup>. <sup>38</sup>Nu shuarnumia<sup>u</sup> chikichik áishman<sup>u</sup> Jesusan untsuak tímiayi “Uuntá, waitneasam uchir írtústá. Uchirsha júchikiiti. <sup>39</sup>Íwianch achik núpeteam niisha ná<sup>u</sup>nkamas untsumui. Tura chichichiptu ajas wenunmasha saun kaput apaawai. Íwianch nin tuke yajauch awajas an<sup>u</sup>kant awajsatniun nakitiawai. <sup>40</sup>Túmakui ame unuiniamurmin iwianchin júirtukit tusan seamjai. Túrasha tujinkiar<sup>mai</sup>” tímiayi.

<sup>41</sup>Tutai Jesus tímiayi “Yus enentáimtichutirmin, tutupnik wekaichatirmin çurutmá tsawanttsuk atumjai<sup>u</sup> pujustaj. Urutmá katsuntratjatsuk? Uchiram ju<sup>u</sup> itiata” tímiayi.

<sup>42</sup>Tura uchi winia<sup>i</sup> íwianch nun<sup>u</sup>ká ajuant chichichiptu áepsamiayi. Tura Jesus iwianchin kakantar chicharkamiayi. Tura uchin pen<sup>u</sup>ker awajas ni apar<sup>u</sup>n awantuki susamiayi. <sup>43</sup>Tura ashí pujuarmia nu ti enentáimprar “Yuska imiá úuntchakait” tiarmiayi.

### **Jesus ni jákatniur<sup>u</sup>n ataksha ujakmiania nu**

*(Mat. 17.22-23; Mar. 9.30-32)*

Jesus túramun ti enentáimtu pujuinia<sup>i</sup> Jesus ni unuiniamur<sup>u</sup>n tímiayi <sup>44</sup>“Wi tájarmena ju pen<sup>u</sup>ker antuktarum. Winia Aents Ajasu tútáin surutkartatui.”

<sup>45</sup>Tura Nii timia nuna unuiniamur<sup>u</sup>i nekaacharmiayi. Nekaawara<sup>u</sup>n tusa paantcha awajsamuyayi. Tura warin<sup>u</sup>kit tusa anintrustinnias<sup>ha</sup> arantukarmiayi.

**“ÇYaki imiá nan<sup>u</sup>kaamantuit?”**

*(Mat. 18.1-5; Mar. 9.33-37)*

<sup>46</sup>Nuyá ni unuiniamur<sup>u</sup>i, yaki imiá nan<sup>u</sup>kaamaku ati tusa, nuamtak mai tunai ajarmiayi. <sup>47</sup>Tura ni enentáimsamur<sup>u</sup>n Jesus nekaamiayi. Tuma asa uchin achik ni pujamunam itiamiayi. <sup>48</sup>Itiá tímiayi “Winia anentuk ju uchin shiir awajeana nuka Winiasha shiir awajtai. Tura Winia shiir

awajtana nuka Winia akuptana nunasha shiir awajeawai. Kame átum nan̄kaamantuchu tárumna nu ti nekas nan̄kaamantuiti' tímiayi.

(Mar. 9.38-40)

<sup>49</sup>Nuyá Juan̄ tímiayi “Uuntá, shuar ame náarmin pachis iwianchin j̄iki akupea nu wáinkiam̄ji. Tura in páchitkiachu asamtai nuka suritkiam̄ji.”

<sup>50</sup>Tutai Jesus tímiayi “Antsu suritkiarap. Shuar in nakitramachkun̄ka in páchitkiawai.”

### Jesus Jakupun Juánnasha chicharkarmiania nu

<sup>51</sup>Jesus, nayaimpiniam waketkitniuri jeatemamtai, enentáimmia ímiatrusan̄ Jerusarénn̄num we-wémiayi. <sup>52</sup>Wesa, kanartinian wáinkiarat tusa akatar émtikiarmiayi. Tura niisha Samaria péprunam jeawarmiayi. <sup>53</sup>Tura Samarianmaȳa aentska, Jerusarénn̄num wéenan nekaawaru ásar itiaatniun nakitrarmiayi. <sup>54</sup>Jesusa unuiniamurī Jakupusha Juansha nuna nekaawar, Jesusan tiarmiayi “¿Uuntá, Erías yaunchu túramia núnisrik iisha túrat tusam wakeramek. Nayaimpinmaȳa ji tara Samarianmaȳa aentsun amukarti, títiatjik?”

<sup>55</sup>Tutai Jesus nin ísar kakantar chicharuk tímiayi “Atumsha atumi enentá̄i urukukit nuka nekamatsrume. <sup>56</sup>Wi Aents Ajasu áentsun emesratsan táchaitjai. Antsu uwentikratajtsan táwitjai” tímiayi. Nuyá chíkich péprunam wearmiayi.

### Jesus nemarsatin

(Mat. 8.19-22)

<sup>57</sup>Jintiā weenaī, chíkich áishman̄ Jesusan chicharuk “Uuntá, tuí wétatam nūsha nemarsatjame” tímiayi.

<sup>58</sup>Tutai Jesus tímiayi “Kujanchmasha ni wáarin̄ takaktsuk. Chín̄kisha pasun̄ken takaktsuk. Tura Wi Yusa Uchir̄ntiatan tepesan ayampratniur atsawai.”

<sup>59</sup>Chíkich áishman̄kan Jesus “Nemartusta” tímiayi.

Tutai nii chichaak “Antsu, Uuntá, winia apar jakamtai, iwiarsa ikiuakun nemarsatjame. Nu tsan̄kátrúktá” tímiayi.

<sup>60</sup>Tutai Jesus tímiayi “Jakaa ainia nu ni shuarin̄ iwiarsatniunka enentáimtusarti. Tura ámeká weme Yus-shuar átin urukukit nu etserkata” tímiayi.

<sup>61</sup>Nuyá chíkich tímiayi “Uuntá, nemarsataj tusan wakerajme. Túrasha wíi shuaran emka áusjan ikiuweartaj tsan̄kátrúktá” tímiayi.

<sup>62</sup>Tutai Jesus tímiayi “Shuar arayát ukunmaanī apajas iimna nu, Yus akupeana nūi takaschamniaiti.”

### Ni unuiniamurīn setenta armia nuna Jesus etserkatarum tusa akupkarmiania nu

**10** <sup>1</sup>Nuyá ukunam chíkich unuiniamurīn setenta anaikiarmiayi Jesus. Tura jímiar jímiar̄an apatak émkitiarum tusa ashí



péprunam ashí nunkanam ni wétin amia nuĭ akupkamiayi. <sup>2</sup>Akupeak tímiayi “Nekas tájarne, Yus-Chicham étserkum, júuktinia núnisañ, aents Yus-shuar awajsatin ti awai. Tura çyaki júukat, aya ishichik takainiasha? Tuma asamtai ni takarniurĭ akupkat tusarum Nerentin seatarum. <sup>3</sup>Wetarum. Átumka murikua núninaitrume. Uunt yawa yujamua núninnium tsumai ámunam akupeajrume. <sup>4</sup>Yurumkasha, kuitcha, sapatcha júkiirap; shuarjajĭ jintiá áujmamsatai tusarum wajasairap. <sup>5</sup>Jeá wayakrum emka juĭ titiarum: “Juĭ jeanam pujuinia nuna Yus shiir awajsarti.” <sup>6</sup>Nérentin “Ee, nuna wakerajai” tákuĩkia túrunattawai. Tura “Atsá, wakeratsjai” tákuĩkia, “nuĩkia túrunashti” titiarum. <sup>7</sup>Jeá wayattarmena nú jeanmañ pujustarum. Tura ajampramsattarmena nu yuatarum. Warí, takaana nu akinkiashtinkiait. Chíkich jeanam nuĭ werum nuĭ werum ajairap. <sup>8</sup>Awaintiamawartatna nú peprunam jearmeka ajampramsartatna nu yuatarum. <sup>9</sup>Jaa ainia nu tsuártarum. Túrarum “Yus juĭ nunkanam akupin ajastin ishichik ajatemsai” nu peprunmaya shuar titiarum. <sup>10</sup>Íksarmek itiaarmachartatna nú peprunam jearum, jintiá wajasrum juĭ titiarum, <sup>11</sup>“Yusna nakitra asakrumin, atumi pépruriniá nunka ii nawen peema japirar akakekji. Túrasha juĭ paant nekaatarum: Yus juĭ nunkanam akupkatin ishichik ajatemsai.” <sup>12</sup>Yusa nekapsatin tsawantrĭ jeamtai nu peprunmaya shuaran ti asutiáttawai. Yaunchu Sutumanmaya shuaran asutiámia nujajĭ nankaamas asutiáttawai. Núnaka paant tájarne tímiayi.

(Mat. 11.20-24)

<sup>13</sup>Wáinkiatá, Kurasín péprunmayatiram. Wáinkiatá Petsaitia péprunmayatirmesha. Atumí pépruriin aents tujintiamun ti túraitjai. Warí, yaunchu Tiru péprunmasha, Setun péprunmasha nu tujintiamu túramuitkuĩkia yaunchu ni enentáin yapajíawaraayĭ. Túrawar kúntuts pujutai pushin entsarar yunĭkunim ajakiaaraayĭ. <sup>14</sup>Tura atumsha aents tujintiamu túramu wáiniatrum yapajíachu asakrumin Tirunmaya tura Setunnumiá aentsjajĭ nankaamas asutniáttarme. <sup>15</sup>Tura atumsha Kapernáumnumiátirmesha, “ti nankaamantu ajaras nayaimpiniam jeattaji” tu enentáimtsurmek. Maaj, antsu jaka matsamtainium jeattarme, auka” tímiayi.

<sup>16</sup>Tura Jesus ni unuiniamurĭn junasha tímiayi: “Atumin anturtamainiakka Winiasha anturtuiniawai; atumin nakitramainiakka Winiasha nakitruiniawai; tura nú arant, Winia nakitrakka Winia akuptukua nunasha nakitiawai.” Tú áujas Jesus nin akupkarmiayi.

### Setenta unuiniamu wakетки táarmiania nu

<sup>17</sup>Ukunam nu setenta unuiniamu warasar wakетки táarmiayi. Tura chichainiak “Uuntá, ame náarmĭn íwianch jĭiki akupeam umirtamkamjĭ” tiarmiayi.

<sup>18</sup>Tutai Jesus tímiayi “Ee, Wisha nayaimpinmaya peem peetna núnisan, uunt iwianch Satanásan akaiki iniaan wáinkiamjai. <sup>19</sup>Atumniaka winia kakarmarun susamjarme, napi najarmasha titin najarmasha yajauch awajtamšairum tusan; tura ii nemasri kakarmari nupetkatniuncha susamjarme. <sup>20</sup>Túrasha íwianch umirtamkui nu enentáimsam warasairap. Antsu atumí naari nayaimpiniam aarma aa asamtai warastarum” tímiayi Jesus.

**Jesus warasmiayi**  
(*Mat. 11.25-27; 13.16-17*)

<sup>21</sup>Nuin̄kia ni enentáin Yusa Wakan̄i waramtiksam Jesus juna tímiayi: “Aparú, ashí nayaimpij̄jai nun̄ka Úuntrinme; tuma asam ju túrunamu ti unuimiaru enentáimtumainia nuyá úukuitme; antsu uchichia núnis nan̄kaamantuchu enentáimtumainia nú shuar paant awajtusuitme. Ee, Aparú, núnik wakerichmakum. Tuma asamtai shiir enentáimtajme, Aparú” tímiayi.

<sup>22</sup>“Winia Apar ashí surusuiti. Wisha ni Uchirī asamtai Winia nékarui. Tura chíkich Winia nekas nekarainiatsui. Yus Apancha Wiki nékajai. Tura Wi wakeraj nú shuaran winia Aparun paant awajtajai. Nú shuarsha winia Aparun nékainiawai.” Tu tímiayi Jesus.

<sup>23-24</sup>Nuyá ni unuiniamurin̄ iis tímiayi “Wi tájarme, untsurí Yúsnan etserniusha tura uunt akupniusha átum yamá wáin̄trum nuna wáinkiatniun wakeruiniyatañ wáinkiacharm̄iayi. Tura átum yamá ántarme nuna antuktinian wakeruiniyatañ antukcharm̄iayi. Tura Yus achirmaku asakrumin, wáin̄trumna nu ti péñkeraiti” tímiayi.

**Samarianmaya áishman̄ katsumkamun yain̄mia**  
**nuna Jesus unuiniamiania nu**

<sup>25</sup>Nuyá akupkamun jintinkiertin Jesus warintiak chichakat tusa wajatki werimiayi. Werí iniimiayi “Uuntá, wi tuke iwiaaku átaj takun ¿warinia túratniuitiaj?” tímiayi.

<sup>26</sup>Tutai Jesus ayak “¿Yús-Papinium Muisáis áarmanum waritia áarmait. Waritia enentáimiam?” tímiayi.

<sup>27</sup>Akupkamun jintinkiertin ayak tímiayi “Juna tawai: Ti enentáimsam, tuke enentáim̄jai Uunt Yus aneeta. Ame kakarmaram, iwiaakmarmesha Yus íiktusta. Tura ame ayashim aneamna núnismek ame írutramurmesha aneeta. Núchakait” tímiayi.

<sup>28</sup>Tutai Jesus tímiayi “Péñker áimsame. Nu túrakmeka tuke iwiaaku áatme.”

<sup>29</sup>Tutai akupkamun jintinkiertin ni anin̄tramun kíishtumaktajtsa wakerak “Winia írutramursha ¿ya ainia?” tímiayi.

<sup>30</sup>Takui Jesus tímiayi “Jerusarén̄numiã jintia Jirikiú péprunam jeana nú jintianam áishman̄ wean, kasa áishman̄ tariar ni waririn̄, pushirin̄cha

kasarkarmiayi. Tura katsumkar mayáí ashirak ajuantar ikiukiarmiayi. <sup>31</sup>Tura Israer-shuar Patri ukunman winis nu áishmankan wáiniak aya íkian iis ikiukmiayi. <sup>32</sup>Nuyá ukunam Patri yáintriṣha nu jintianam wesa, nu áishmankan wáiniak, áyatik iis ikuak wémiayi. <sup>33</sup>Tura nuyá Samaria nunkanmaya áishmansha nu jintianman wesa, nu áishmankan wáiniak ní shuárinchunak wáitnéntramiayi. <sup>34</sup>Nuyá nu áishmankan weantuk ni numpamnamurin asuitijai tura wíniujai tsuar jaanchjiai penuarmiayi. Tura ni kawairin ekenak jukimiayi. Tura írar kanutainiam jukí ejé nu áishmankan péñker wáinkiamiayi. <sup>35</sup>Tura kashin tsawarmatai Samarianmaya áishman weak jimiará kuítian jusa jeá nérenniurin susamiayi. Susa tímiayi “Ju áishman péñker wáitrukta. Tura wi amaajna ju táasmataisha wi wáketkun akiktajme” tímiayi. <sup>36</sup>Ayu, ámiijaiṣha, nu menaintiu áiniana nu, ¿tuá imiá nekas katsumkamun waitnentramia?” tímiayi Jesus.

<sup>37</sup>Takui akupkamun jintinkiertin chichaak “Entá, katsumkamun wáitnentramia núa” tímiayi.

Tutai Jesus tímiayi “Amesha weme núnismek túrata.”

### Marta ni kajjiai Marí jeen Jesus pujusmiania nu

<sup>38</sup>Nuyá Jesus jintiá wesa chíkich péprunam jeamiayi. Nu péprunmaya nuwá naari Marta ni jeen itiaamiayi. <sup>39</sup>Marta kaj ámiayi ni naari Marí. Marisha unuiniamun anturkataj tusa Jesusa nawen pujursamiayi. <sup>40</sup>Tura Mártaka ni takatrin ti enentámtak Jesusan weantuk tímiayi “Uuntá Jesusá, ¿winia kajr takatan winiak íktursainia nuka enentámtsumek? Winia yáintá turuttia” tímiayi.

<sup>41</sup>Tutai Jesus tímiayi “Maaj Martá, untsurí túratin ana nu ti enentáimsam itit awajtamui. <sup>42</sup>Tura aya chikichik nekas túratniuiti. Marikia nekas péñker ana nuna achikiai. Nusha penké jurunkishtatui” tímiayi.

### Jesus Yus áujsatniun unuiniamiania nu

(Mat. 6.9-15; 7.7-11)

**11** <sup>1</sup>Chíkich tsawantaj Jesus Yúsan áujsatataj tusa atsamunam pujumiayi. Áujtua amikmatai ni unuiniamurí chikichik Nin tímiayi “Uuntá, imiakratin Juan ni unuiniamurin unuiniamia núnismek Yus áujsatin unuiturta.”

<sup>2</sup>Tutai Jesus tímiayi “Yus áujkuram ju titiarum:

Aparu Yus, nayaimpiniam pujamna nu, ii Aparinme. Ame náarmincha shuar ántar pachischarti. Ashí áentsnum ame akupkatin tsawantrum wari jeati. Ame wakeramuram nayaimpiniam umikma ana núnisan ju nunkanmasha uminkiatí.

<sup>3</sup>Aparú, ii yurumkarí ashí tsawant amasta. <sup>4</sup>Tura winia nemasrun

tsaṅkurajna núnismek, Aparú, winia tunaaru tumashrisha tsaṅkurturta. Tunáa wakeruktin tsaṅkatrukaip. Antsu ashí tunaanumiá uwentikurta.”

<sup>5-6</sup>Nuyá Jesus juna tímiayi. “Wats, ju titiái. Kashi ajapén amikrum werishtameash. Tura “Winia amikiur yajaya winia jearuǐ yama tayi. Tura ajamsatniun penké takaktsujai. Tuma asamtai amikru, menaintiu apatuk ajamprustá” tíchatameash. <sup>7</sup>Tura nii init pujusaṅ chichaak “Warí, wáitisha epenmiaiti, tura winia uchirsha wijiaǐ ashí tepeenawai. Itiur nantakniak amastaj. Itit awajtipia” turamchanpiash. <sup>8</sup>Wats, paant tájarne, niisha amikrum asa, nantaki ikiatmastinian nakitiayat, itit awajtin tusa nantaki ashí wakeramna nuna suramsattawai. <sup>9</sup>Tuma asamtai tájarne: Yus seatarum; túrakrumin suramsattarme. Eḅkrukma wáinkiatarme. “Winiajai” tákurmin awáintiamattarme. <sup>10</sup>Seana núnaka suǐniatsuk. Eḅana nuka wáintsuk. “Winiajai” tuinia núnaka awáiniatsuk.’

<sup>11</sup>“Wats, átum uchirtintiram, ame uchiram apatkun seatmakui ḅkayaash súsaintiam? Namakan seatmakui ḅnapfash súsaintiam? <sup>12</sup>Nujintian seatmakuisha ḅtitiṅkiash súsaintiam? <sup>13</sup>Warí, átum imiá yajauchitirmesha atumí uchirǐ penker ana nu tuke súchakaitrum. Atumí Aparǐ nayaimpiniam pujana nu, seakrumniṅkia nú nankaamas ni Wakanin suramsattawai.” Tu unuiniamiayi.

**Jesusan “iwianchi kakarmarijiaǐ túrawai” tiarmiayi**  
(*Mat. 12.22-30; Mar. 3.19-27*)

<sup>14</sup>Shuar iwianchruku asa chichachu ámiayi. Nuna enentáiyen nu iwianchin Jesus jiki akupkamiayi. Íwianch jinkimtai chichachu chichasmiayi. Túramtai shuar nuǐ pujuarmia nu ti enentáimprarmiayi. <sup>15</sup>Tura chíkich tiarmiayi “Juka iwianchi kapitiantri Satanásan, ni chíkich naari Pirsepún umirniuiti. Tuma asa nuna kakarmarijiaǐ iwianchin jiki akupeawai.”

<sup>16</sup>Tura chíkichkia, nekas Yúsnumiá taawashit tusar “Nayaimpinmaya kakaram ana nu iniakmasam aents tujintiamu túrata” Jesusan tiarmiayi.

<sup>17</sup>Tura Jesus tu enentáimiainian neka asa tímiayi “Núu nunkanmayan shuar nuamtak kajernaiyakuṅkia nú nunka wárik meserchattawak; nuamtak shuarsha ni shuarijiaǐ kajernaiyaksha amunaikchartatuak. <sup>18</sup>Wíniaka “Pirsepú iwianchi kakarmarijiaǐ iwianchin jiki akupeawai” túruttsurmek. Tuma asamtai tájarne, uunt iwianch Satanás naartin, ni suntarijiaǐ kajernaiyaksha ḅitiur tuke kakaram áting? <sup>19</sup>Tura Wi Pirsepú kakarmarijiaǐ iwianchin jiki akupeakuṅkia, atumi shuarisha ḅyana kakarmarijiaǐ iwianchin jiki akupena? Niisha “iwianchi kakarmarijiaǐ túrichuitji” tuiniaisha ḅitaura Winiasha, “iwianchi kakarmarijiaǐ túraití” turutminiaitrum? <sup>20</sup>Wikia Yusa kakarmarijiaǐ iwianchin jikin akupeajai. Nu nekaarum Yus atumi enentáin akupin ajasuana nu nékarme.’

<sup>21</sup>‘Kakaram áishman̄ ḱishtumaktajtsa iwiarnar wajas jeen wáinkuii, ni warir̄i init ana nusha tímiatrusan̄ áiniawai. <sup>22</sup>Antsu niij̄j̄aj̄ nan̄kaamas kakaram ana nu winiakka nupetkashtatuak. Tura ḱishtumaktinian iwiar takakman jurawai. Tura kasamkámun ni amikr̄in súawai. Kakaram áishman̄ iwianchin nakumeawai. Tura nuj̄aj̄ nan̄kaamas kakaram áishman̄ Winia nakumprawai. <sup>23</sup>Iista. Winia nemartatsna nu winia nemasruiti. Núnisan̄ Winia yáintsuna nuka aya itiurchat nájateawai.’

**Iwianch j̄iiki akupkamuitiat wáketna nuna ujakmiania nu**  
(*Mat. 12.43-45*)

<sup>24</sup>Nuyá Jesus j̄una tímiayi: ‘Shuara enentáiȳa íwianch j̄iinki ayamprataj tusa yumi pen̄ké yútatsna nūi wéawai. Tura ayampratniun wáincha asa ataksha waketkitniun enentáimui. “Wi j̄iinkimij̄ nūn̄ waketkitj̄aj̄” tawai. <sup>25</sup>Tura waketki pen̄ker iwiamun tura an̄kant aan wáiniui. <sup>26</sup>Nuna wáiniak, ni ain siati iwianchin niij̄j̄aj̄ nan̄kaamas yajaunchin itíá en̄kemáwartatui. Túrunamtai nu shuar nuiki nuna nan̄kaamas yajauch ajastatui.” Tu tímiayi Jesus.

**Nekas warastin**

<sup>27</sup>Shuar iruniarmia nūi Jesus nuna chichaa puj̄aj̄, nuw̄a untsumuk “Ame nukun Yus ti yáin̄kiai. Ni ampuj̄én ame puj̄uschamkam. Ámin amuntstamachmakam” tímiayi.

<sup>28</sup>Tutai Jesus tímiayi “Antsu ni chichamen̄ antukar umirainia nuna, nukurj̄aj̄ nan̄kaamas Yus ti yáin̄kiaru áiniawai, tajai” tímiayi.  
(*Mat. 12.38-42; Mar. 8.12*)

<sup>29</sup>Shuar untsur̄i Niin̄ káunkarmatai Jesus tímiayi “Yamaiȳa shuarka yajauch áiniawai. Yajauch ásar, chichartuiniak “Nekas Yúsnumīaitkiumka aents tuj̄intiamua nu túram Yusa kakarmarī iniakmasta” turutainiawai. Túrasha áyatik yaunchu Junas túrunamuj̄aj̄ iniakmasmia nuj̄aj̄in̄ nekaatin áiniawai. <sup>30</sup>Kame Junas túrunamuj̄aj̄ Níniwi péprunmaȳa shuaran yaunchu Yus ni kakarmarīn̄ iniakmasmia núnisan̄ yamaisha Aents Ajasu tutainjiana nu Wi túrunamuj̄aj̄ Yuska ni kakarmarīn̄ iniakturmastatrume. <sup>31</sup>Yaunchu Sarumún̄ uunt akupin̄ puj̄aj̄ Sepa nún̄kanmaȳa nuw̄a akupin̄ Sarumún̄ka chichamen̄ nekaataj̄ tusa ti jeashtanmaȳa támiayi. Tura yamaikia Sarumun̄j̄aj̄ nan̄kaamas puj̄aj̄ átumka anturtatsrume. Tuma asamtai Wi tájarme, Yus ashí shuaran nekapsattana nu tsawant jeamtai nu nuw̄a, akupniun̄ pen̄ker anturka asamtai, Yus íimianum pen̄ker átatui. Antsu atumsha Winia anturtukcha asakrumin̄ Yus íimianum yajauch átatrume. <sup>32</sup>Tura Yúsnan̄ etserin̄ Junas Níniwi péprunmaȳa shuarum Yus Chichaman̄ etserkamtai nu shuar ni tunaar̄in̄ enentáimtusar enentáin̄ yapaj̄iáwarmiayi. Tura j̄uī yamáí Junasj̄aj̄ nan̄kaamas etserin̄ puj̄aj̄aj̄. ¡Tuma asamtai nekapsatin̄ tsawant jeamtai Níniwinmaȳa shuar yamaiȳa shuar árumna nuna sumamtikramattarme!’

**Ayashi tsáapnintri**  
(*Mat. 5.15; 6.22-23*)

<sup>33</sup>¿Shirikip ekeemakar úuktinkiait? Pitiaknumsha enkeashtiniaiti. Antsu shuar jeá wayana nu paant ímsat tusar yakí ekensatniuiti. <sup>34</sup>Ame jímijiaí wáinkiam nujai wekasatin nekaattame. Tuma asantai ame jímijiaí péñker ana nu wáinkiumka péñker wekasattame; antsu ame jímijiaí yajauch ana nu wáinkiumka, kiritniunam wekasatniua núnisan yajauchiniam wekasattame. <sup>35</sup>Anearta. Enentáimin tsáapin ana nu kiritin ajaschati tusam anearam wekasata. <sup>36</sup>Ame ayashmiin kirit ajatsuk aya tsáapniniaitkiuin̄kia, shirikip paant awajea núnisan ashí paant wáinkiatame” tímiayi.

**Pariséuncha, Israer-shuara jintinniurisha “yajauchiitume” tímiayi Jesus**  
(*Mat. 23.1-36; Mar. 12.38-40; Ruk. 20.45-47*)

<sup>37</sup>Jesus chichasua amikmatai Pariséu shuar, winia jearui yurumáitia tusa untsukmiayi. Tutai Jesus wayá misanam pujusmiayi. <sup>38</sup>Tura Israer-shuar ikijmiartin ana nuna túrutsuk aya pujakui Pariséusha nuna wáiniak “maa ¿urukamtia tura?” tu enentáimsamiayi.

<sup>39</sup>Tura Uunt Jesus tímiayi “Pariséutirmeka atumí yurumtairi aya pátatek niijaaktin ti wakeriniaitume. Atumsha nu yurumtajiiaí méteketume. Pátatek péñker túrarme. Tura atumí enentáinkia kasamkatniusha tura yajauchia nusha piakuiti. <sup>40</sup>¡Enentáimcha! Warí, ashí pátatek wáiniaj<sup>i</sup> nuna Yus najanachmakia; tura inít paantcha ana nunasha Yúsak najanachmakia. <sup>41-42</sup>Aneartarum, Pariséutirmesha. Aya nuka méntasha, anissha tura aya apatkusha Yus súsatin ti enentáimprume. Nukasha tsuriasrum apatkusha tias ana nuyá chikichik achikrum, Yúsnaiti tátsurmek. Tura antsu nu túratin iniaitsuk péñker wekasatniusha, Yus anenmarmena nusha péñker enentáimsatniuitume. Wats inít, enentáimin ana nútiksarmek jusam susarta. Nuiñkia ashí chamir átatui.’

<sup>43</sup>“Tura aneartarum Pariséutirmesha. Yus áujtai jeanam penkeri pujutainium pujustin wakerarme. Tura jintiá aents ímiainiamunam ti shiir áujtusarat tusarum wakerarme.’

<sup>44</sup>“Jintinniutirmesha, Pariséutirmesha máí-metek aneartarum. ¡Antar shiir chichamtinia! Iwiarsamu paantcha núniniaitume. Shuar nu nan̄kaamaksha nájamiat nékatsui. Núnisan̄ shuar atumi chichame antukar yajauchia nuna nekartamtsurme.”

<sup>45</sup>Nuikia Israer-shuara jintinniuri chikichik Jesusan chicharuk tímiayi “Uuntá, nu tákum incha yajauch chichareame.”

<sup>46</sup>Tutai Jesus tímiayi “Atumsha jintinniutiram aneartarum. Atumi akupkamurijiaí káarak ti kijin entsakchamnia súarme. Tura átumka yáintaj tusarum atumí uwejejaisha penké ántiatsrume.’

<sup>47</sup>‘Aneartarum tájarne. Yaunchu atumí uuntri Yúsnan étserniun máawarmia nuna iwiarsamuri átum jeamniuitrume nu etserin ti péñker ásar matai kajinmatkishtin. <sup>48</sup>Nu túrakrum atumí uuntri túrawarmia nu, “yajauchichuiti” tarume. Warí, niisha máawarmiayi, tura atumsha máawarai táyatrums níjjiaí méteketrume. Warí, Yúsnan etserniu iwiarsamuri jeamkuram atumek sumarme.’

<sup>49</sup>‘Atumí túramuri nekáa Yus júna yaunchu tímiayi: “Winia etsertuniun tura winia akatramurnasha níjn akuptukartatjai. Túramtai chikichnaka máawartatui, tura chikichnaka pataatukartatui.” <sup>50</sup>Tuma asantai ashí ni etserniuri maamu ainia nuna, yamaiya áentstirmin Yus sumantikramattarme. Nunka najanamunmaya júki <sup>51</sup>yamáí ímiajai maamu ainia nuna, kame Apir maamunmaya júki yamáí Sakarías maamua tímiajai anitrustatui. Namañ maar Yus sutai ámanum tura Yus-jea ámanum ajapén atenkamunam máawarmia nú Sakaríasan tajai. Nu tuma asantai tájarne, ni etserniuri maantamawarmia nuna yamáí matsatrumna nútirmin aninmasartatui.’

<sup>52</sup>‘Jintinniutiram aneartarum. Waiti asakatniua núnisrumek nekas nekaatin surimiarme. Atumkesha nékatsrume. Tura nekaataj tana nusha suritiarme” tímiayi.

<sup>53-54</sup>Jesus nuna takui Pariséusha, jintinniusha ti kakerkarmiayi. Tura nii tana nujaí “yajauch túrame” titiai tusar wakeruniak untsurí anintriarmiayi.

**12** <sup>1</sup>Nu tumai shuar ti untsurí káunkarmiayi. Ti kaunka ásar nawen mai-najatnai ajarmiayi. Tura Jesus ni unuiniamuri títan juarkimiayi. “Pariséu ántar chichamtin ániawai. Nuka wakaprutaiya núnisaiti. Wakaprutaikia nijiamanch yumirniun yama enkeam páantchaiti. Tura ukunam nekaamniaiti. <sup>2</sup>Núnisañ ashí paantcha ana nu iwiainiakma átatui. Uukma ana nusha nekaamu átatui. <sup>3</sup>Nu tuma asantai, kiritniunam tímiarmena nusha tsawái tsáapin ajasmanum antunkattawai. Tura jea inít pujusrum ishishmasrum tímiarmena nusha áa ti paant etsernaktatui.’

### Yusak ashamkatniuiti

(Mat. 10.28-31)

<sup>4</sup>‘Amikrutiram, aya ayashmin main ainia nu ashamkairap, tájarne. Ayashmin maa nú arantka máashtatui. <sup>5</sup>Tura ya nekas ashamkatniuitrum, nuna paant jintintiattajrume. Ame ayashmi maa, nuyá ámin jinium akuptamkatniun tujintiatsna nu ashamkatarum. Ee, Yus ashamkatarum, tájarne.’

<sup>6</sup>‘Jimará chiniki ishitiúpchich ishichik kuitjai surukchatniukait. Túrasha Yussha nu chinikin penké kajinmatkishtatui. <sup>7</sup>Wats, ashamkairap. Untsurí chinikijiai nankaamas Yuska atumin enentáimturmarne. Warí, ame intiashmin mash Yus nekapmaruiti.’

(Mat. 10.32-33; 12.32; 10.19-20)

<sup>8</sup>‘Ashí shuar ashí ímiainiamunam Winia Aents Ajasu tutain, Winia natsantruiniatsna núnaka, Wisha Yusa suntari ímiainiamunam natsantrashtatjai; <sup>9</sup>antsu shuar ímiainiamunam Winia natsantrana núnaka Wisha Yusa suntari ímiainiamunam natsantrattajai.’

<sup>10</sup>‘Winia, Aents Ajasu tutain, shuar yajauch chichartakuinkia nusha tsankuramniaiti, tura Yusa Wakaníncha yajauch chicharkuinkia nuka penké tsankurachminiaiti.’

<sup>11</sup>‘Wats, Israer-shuar iruntai jeanmasha, tura Israer-shuar kapitíanniumsha, uuntnumsha juramainiakui, aninmainiakuisa warintiajak tusam ti enentáimsáip. <sup>12</sup>Ame áimkiatin jeamtai, Yusa Wakaní ame títiatmena nuna jintinramattawai,” tu timiayi.

### Kuítiak enentáimtuschatnuiitji

<sup>13</sup>Chíkich áishman Jesusan tímiayi “Uuntá, ii aparí ikiurtamkimiaj nuna yatsur winiasha nakak surustí, titia” tímiayi.

<sup>14</sup>Tutai Jesus tímiayi “Áishmanka, atumin nu túratin anaikiamukaitiaj.”

<sup>15</sup>Nuyá tímiayi “Pénker enentáimsatarum. Nii takakna nújajin shuar iwiaaku, áchatnuiiti. Tuma asamtai kufrintin ajastin aya nuke enentáimsaip.”

<sup>16</sup>Nuyá juna métek-taku chichaman unuiniak tímiayi:

“Kufrintin áishman ni ajaríyan arakan ti nukap juukmai. <sup>17</sup>Tura “¿Ti nukap asamtai tuij ikiustaj. Itiurkatjak?” tu enentáimsamiai. <sup>18</sup>Wats, wi nékajai. Winia ikiutái-jearun ashiran nú nankaamas úuntan najanatjai. Tura nuí ashí ikiustajai. <sup>19</sup>Nuinkia untsurí uwitin shiir pujustinian ikiusman takustajai. Tuma asamtai, ayampran, yurumán, umaran shiir pujustajai” timiai.’

<sup>20</sup>‘Tura Yus nin chicharuk timiai “Netse. Yamái kashi jakattame. Nuinkia imiá nukap ikiusumna nusha ¿yana átata?” timiai” tímiayi.

<sup>21</sup>Nuyá Jesus tímiayi “Shuar niñki kufrin ikiauntumna nu, núnisaiti. Túrasha Yusjai íismaka kufrinchaiti.”

### Yus ni uchirín pénker wáinkiaiti

(Mat. 6.25-34)

<sup>22</sup>Nuyá ni unuiniamurin Jesus juna tímiayi: “Warí yuarik pujustají tura warij entsartají tusarum nuke ti enentáimsairap. <sup>23</sup>Yus iwiaaku átinian amasu asa yurumkancha amastatui. Tura ju ayashniasha najana asa entsataincha amastatui. <sup>24</sup>Chinikisha enentáimsatarum. Niisha arakmainiatsui. Juuk yurumkan ikiuiniatsui. Tuma ain Yuska ni yurumátniurin tuke súawai. Atumsha chinikia nú nankaamaschakaitrum. <sup>25</sup>Tura ya shuarak, ti enentáimtana nujají nú naya ajasminiait. <sup>26</sup>Kame



yúpichuch ana nusha túrachminiaiatrumsha, ¿urukamtai chíkich ainia nusha ti enentáimtarum?’

<sup>27</sup>‘Íistá, kukujsha takaachitiat tura nájanchitiat ti shírmach ániawai. Yaunchu akupin Sarumún ti shiir iwiarmamniuitiat kukujia tímianchayayi. <sup>28</sup>Iis, nupa yamá tsakaawai tura kashin aents tsupikiar jinium apeánáwai. Tuma ain Yus ti shiir awajeatsuk. Nuna tura asa atumniasha nú péñker wáitmakchattawak. ¿Urukamtai Yus nekas enentáimtatsrum? <sup>29-30</sup>Ju nunkanam ana nu ti pachirap. Chíkich shuar, Yúsán nékainiatsna nu, warin yuataj<sup>i</sup>, warin umartaj<sup>i</sup> nuna ti pachiniawai. Tura atumsha tu enentáimsairap. Urukataj, tírap. Ame Apa nayaimpiniam pujana nu, ashí atsumarmena nuna nékawai. <sup>31</sup>Antsu emka Yusna nu enentáimtustarum. Túrakrumniñkia atsumamna nuna Yus suramsattawai.’

### **Kuítian pachis Jesus unuiniamiania nu**

*(Mat. 6.19-21)*

<sup>32</sup>‘Winia murikrutiram ashamkairap. Untsuríchuitrume. Túrasha atumí Apari ni akuptairin pachitmaktasa ti wakerutmarme. <sup>33-34</sup>Kuítium tuí aa, nuí tuke enentáimtittiarume. Tume asantai takakrumna nu surukrum atsumainia nu susatarum. Nuka enketai arut ajatsna nuí enkeatnia núniskete. Túrakrum nayaimpinmayá kuit amuatsna nu íkiauwearme. Nuísha kasa nu kuitian kasamkataj tusa wayachminiaiti, tura kayaasha nu kuitian yúatniun tujintiawai.’

### **Aneerar wekasatniuitji**

<sup>35-36</sup>‘Ju enentáimsatarum. Ni uuntri nuatnaikiatin námpernumia taa, “uraitia” takui, takarniuri jinia ekeemakar wárik urattiai tusar nakáa pujuiniawai. Atumsha núnisrumek Wi atumi Uuntri támatái, shiir itiaatai tusarum anearum wekasatarum. <sup>37</sup>Ni uuntri taak iwiáa pujuinian wáinkiarai nuka shiir pujuiniawai. Nu úuntak iwiar, “misanam pujustarum” ni takarniurin títiatui tura yurumkan sústartatui. <sup>38</sup>Kashi ajapén taaksha tura tsawaana ai taaksha ni takarniurin iwiáa pujuinian wáinkiuñka, nu takarin shiir pujuiniawai. <sup>39</sup>Tura jusha nekaatarum. Jeenniua nu, kasa tátinian nékaitkiunka, iwiáa pujusaayi. Kasa wayá kasamkatniun suritkiaayi. <sup>40</sup>Atumsha núnisrumek, anearum pujustarum. Wi Aents Ajasu tutai aya aneachmanum tátatjai” tímiayi.

### **Pénker takarin yajauch takarniujai**

*(Mat. 24.45-51)*

<sup>41</sup>Nuyá Pítiur aniasmiayi “¿Aya ínkik unuiniartaj tusam nu métek-taku chicham támek. Kame ashí nekaawarat tusamek tame?” tímiayi.

<sup>42</sup>Tutai Jesus tímiayi “Atumsha péñker takatan wáinnua núnisketrume. Takatan wáinin ni uuntri takatrin takainia nuna,

yurumátin jeamtai, ayurkamna núiti ni úuntrin shiir umirna nu, tura pé<sub>n</sub>ker enentáimtana nu. <sup>43</sup>Ni uuntri<sub>i</sub> taa, takatrin<sub>i</sub> tímiatrusa<sub>n</sub> túran wáinkuiñkia nu wáinniusha shiir enentáimsamniaiti. <sup>44</sup>Umirin asamtai, ni uuntri<sub>i</sub> ashí ni warir<sub>i</sub>n wáitrukat tusa apuj<sub>s</sub>attawai. Nuna paant tájar<sub>m</sub>e. <sup>45</sup>Tura nu takatan wáinniusha “úuntur wau táchattawai” tu enentáimias, ni uuntri<sub>i</sub> takarniur<sub>i</sub>n yajauch awajeakuñkia tura niñki ti yurumá, ti umar nampeakuñkia, <sup>46</sup>nuiñkia ni uuntri<sub>i</sub> ni nákachmanum aya aneachma taa ti asutiáttawai. Umichu pujuinia nu<sub>i</sub> akupkattawai.’

<sup>47</sup>‘Takar<sub>i</sub>n ni uuntri<sub>i</sub> wakera nuna nékayat, iwiartsuk umitsuk pujakka ti awatramu átatui. <sup>48</sup>Túrasha takarin nékach<sub>u</sub> asa, asutniámnia túrakka, ishichik awatnartatui. Núkap susamu ana núnaka núkap seawartatui. Núkap ataksamu ana núnaka núnisa<sub>n</sub> nañkaamas seawartatui.’

### **Jesusja<sub>i</sub> shuar akannartatui**

*(Mat. 10.34-36)*

<sup>49</sup>‘Jijia<sub>i</sub> nekapsatniua nútiksanak nuñkanam jinia ikiapartaj tusan tamajai. Tura túrunat tusan ti wakerajai. <sup>50</sup>Imiantinia núnisan itiurchat ukatruktatui. Nusha wárik amuukat tusan ti wakerajai. <sup>51</sup>‘Ashí shuar shiir pujusarat tusa táwiti’ tu enentáimturumek. Núchaiti. Antsu shuar tesanairat tusan táwitjai. <sup>52</sup>Yamá<sub>i</sub> jukimiutak chikichík shuarnum senku ainia nu akannakartatui; menaintiu shuar ni shuar<sub>i</sub>n jímiar<sub>a</sub>n nakitrartatui. Jímiarsha ni shuar<sub>i</sub>n menaintiun nakitrartatui. <sup>53</sup>Apasha ni uchir<sub>i</sub>n nakitrattawai. Núnisa<sub>n</sub> uchisha ni apar<sub>i</sub>n nakitrattawai. Nukusha ni nawantr<sub>i</sub>n nakitrattawai, nawantr<sub>i</sub>sha nukur<sub>i</sub>n nakitrattawai. Tsatsar<sub>i</sub>sha ni najat<sub>i</sub>n nakitrattawai; najat<sub>i</sub>sha tsatsar<sub>i</sub>n nakitrattawai.’

*(Mat. 16.1-4; Mar. 8.11-13)*

<sup>54</sup>Jesus áentsun chicharuk junasha tímiayi “Atumsha nantu akaatainmaani k<sub>i</sub>armatai “yutuktatui” tátsurmek. Nusha nekas tárume. <sup>55</sup>Tura anaarania<sub>a</sub> nase násenkamtai “séejik átatui” tárume. Tura nekas tárume. <sup>56</sup>Yurañminmasha nuñkanmasha túruna nu nékarme. Túmaitiatrumsha ju tsawantaj<sub>i</sub> túrunattana nusha çitiura nékatsrum? ¡Maaj, ántrairume!’

### **Nemasrumja<sub>i</sub>sha nawamnaikiata**

*(Mat. 5.25-26)*

<sup>57</sup>‘Túrasha pé<sub>n</sub>ker ana nusha çurukamtai atumek enentáimsarum wáintsuram? <sup>58</sup>Irutramuram úunt<sub>n</sub>um júramkuñkia jintia wésamek “nuamtak iwarartai” titiá. Túrachkumniñkia akupniunam juramkittiame. Tura niisha suntarnum akuptamkattame. Tura niisha sepunam enketmattawai. <sup>59</sup>Tura nekas tajai, nu<sub>i</sub> enkemamka ashí rearchisha akikmachkumka jíinkishtatme” tímiayi.

### Ii enentá̄i yapajíá̄t̄niuit̄ji

**13** <sup>1</sup>Nu tsawantin chícham ujaktai tusar Jesusan tariarmiayi. Kariréa nun̄kanam Israer-shuar ni waakar̄in máawar Yus susatai tusar pujuiniái, Piratu nin maa, nuna numpen waaka numpejái pachimpramun ujakarmiayi. <sup>2</sup>Tura Jesus tímiayi “¿Warí enentá̄imsarum? Kariréanmaya áishman̄ tárumna nu, chíkich Kariréanmaya áishman̄jái nan̄kaamas yajauch ásar túrunawarai ¿tu enentá̄imprumek? <sup>3</sup>Atsá; atumí enentá̄i yapajíáchkurmeka núnisrumek atumsha jakattarme. Nuna paant tájarme, tímiayi. <sup>4</sup>Tura tiasiúchu áishman̄ yakí jēa Seruí kupiniak iniaak neken̄karmiania nu, ¿warí enentá̄imtarum? Chíkich Jerusaré̄numīa shuarjái nan̄kaamas tunáa ásar túrunawarai ¿tu enentá̄imprumek? <sup>5</sup>Atsá, tájarme. Atumí enentá̄i yapajíáchkurmeka núnisrumek atumsha jakattarme.”

### Iikiu numi nereatsna nu

<sup>6</sup>Junasha Jesus métek-taku chichaman tímiauyi. Júiti: Shuar ni ajar̄in íikiu numin araamun takakuyi. Nerekchiash tusa iyumai. Túrasha nere atsumai. <sup>7</sup>Nuñkia ni ajar̄in wáinniun timiai “Antukta, menaintiú uwitin juna nere átai tusan waketrú pujajai; túrasha pen̄ké wáinkiachjai. Ajakta. ¿Urukamtai ánt rash wajastata?” <sup>8</sup>Tutai ajá wáinin timiai “Atsá, uuntá; ju uwitin wajastí. Wajamur̄in takarsatjai tura pen̄ker nun̄kan matsatkatjai. <sup>9</sup>Nujái nerekchampiash. Tura tuke nereachkuñkia nuñkia ajakta” timiai”, tímiayi.

### Nuw̄an punuá kaarun Jesus tsuármiania nu

<sup>10</sup>Ayampratin tsawantái Israer-shuar iruntai jēanam Jesus unuiniak pujumiayi. <sup>11</sup>Nuñsha nuw̄a pujumiayi. Nu nuw̄asha tiasiúchu uwitin tuke jaa pujumiayi. Íwianch nin yajauch awajas apuna tuke ikiaramiayi. Túramu asa pan̄kái nakuenkataj tukamá pen̄ké tujinmiayi. <sup>12</sup>Jesus nuna wáiniak, chicharuk “Nawantrú, ame jaamurmiya ankant ajasume” tímiayi.

<sup>13</sup>Nuna tinia ni uwejejái antin̄miayi. Tura nú chichamaik nuw̄asha pan̄kái nakuenkamiayi. Tura Yusa náarin uunt awajsamiayi. <sup>14</sup>Tura Jesus ayampratin tsawantái tsuaru asamtai, iruntai jēa uuntrī kajek iruntrarmia nuna tímiayi “Sais tsawantin takaschatniukait; ayampratin tsawantái tsuámartaj tusarum táchatniuitrume. Sais tsawant ana nuí tátiniaitrume.”

<sup>15</sup>Tura Jesus tímiayi, “¡Ántar chichamtinia! ¿atumí waakar̄isha atumí umpuurur̄isha yumi aartai tusarum ayampratin tsawantin atíarum júatsrumek? <sup>16</sup>Tura ju nuw̄asha, atumí shuarī Apraám shuarnumīa akiiniaiti. Nii tiasiúchu uwí Satanás yajauch awajsamujái jinkiamuyayi.

Nincha ayampratin tsawant aín yajauch awajsamunmayá atíachminkiait” tímiayi.

<sup>17</sup>Jesus nuna takui ni nemasrisha natsāararmiayi. Tura penké shuar ni penker túramurín wáinkiar warasarmiayi.

### Mustasa jinkiaí

(Mat. 13.31-32; Mar. 4.30-32)

<sup>18</sup>Nuyá Jesus tímiayi “¿Yusa akupeamurí warijiaín métek-takuit?  
<sup>19</sup>Mustasa jinkiaíjiaí métek-takuiti. Mustasa jinkiaíncha shuar ni ajarín araaímiayi. Tsapái, tsakaak, uunt numi ajasmiayi. Ti uunt asamtai chin̄ki ni kanawen pasun̄marmiayi.”

(Mat. 13.33)

<sup>20</sup>Tura junasha tímiayi: “¿Yusa akupeamurí warijiaín métek-takuit?  
<sup>21</sup>Tanta wakaprutaia métek-takuiti. Arinia núkap ana nuí nuwá wakaprutain ishichik en̄keámiayi. Túram ashí wakapruamiayi.” Tu tímiayi.

### Yupikiach waiti

(Mat. 7.13-14, 21-23)

<sup>22</sup>Jesus Jerusarénnun jeattsa weak untsurí peprunam wayá unuiniarkutak wémiayi. <sup>23</sup>Weaí chíkich shuar aniasmiayi “Uuntá, ¿uwemainia nu ishichikiait?”

<sup>24</sup>Tutai Jesus tímiayi “Yupikiach wáitiniam wayataj tusam ti wakeritiarum. Kame untsurí wayataj tusar wakeriartatui, túrasha tujinkiatatui, tájarme. <sup>25</sup>Jeá nérenniurí wáitin epenmiatai, atumsha aa wajarum nu, wáitiniam wajasrum untsúakrum “Uuntá, uratritia” títiatrume. Túrasha “Nékatsjarne. ¿Tuyantskaitrum?” turamtatrume. <sup>26</sup>Nuyá átum títiatrume “Túrasha, uuntá, iisha ámijiaí yurumámji, ámijiaí umarmaji. Tura ii pépruríncha unuiniamame.” <sup>27</sup>Túrasha nii títiatui “Tuyantskaitrum, nékatsjarne, tátsujrumek. Yajauch túrintirmeka winiyanka kanaktiarum.”

<sup>28</sup>Nuyá Apraámsha, Isaksha, Jakupsha tura ashí Yúsnan etserin Yus akupeana nuí wayawaru wáinkiarum tura aa ajapam pujusrum ti úutkuram naim tásarara ajattarme. <sup>29</sup>Tura Yus akupeana nuí, nantu tatainmaaniyasha nantu akaatainmaaniyasha, arakiasha, nunkaaniasha taar, imia Israer-shuarchaitiat yurumátai tusar pujusartatui. Tura atumsha, “Apraám shuáraitjai” táyatrum, wayashtatrume. <sup>30</sup>Nuisha yamáí ukunmaani ainia nusha emka ártatui; tura yamáí emka ainia nusha nuisha ukunmaani ártatui.”

### Jerusarénumaani Jesus wémiayi

(Mat. 23.37-39)

<sup>31</sup>Nu tsawantai Pariséu aents Jesusan tariar tiarmiayi “Erutis mantamattsa wakerutmawai. Tuma asamtai juyanka wetá.”

<sup>32</sup>Tutai Jesus tímiayi “Werum nu kujancham ju titiarum: “Íistá. Yamaisha ishichik tsawant iwianchin jíikin akupkartajai; túran jaancha tsuárartajai. Tura ukunam amuktatjai.” <sup>33</sup>Tura Jerusarénumaaní ishichik tsawant tuke wétiniaitjai. Yúsnan etserin aya Jerusarénuman jákatniuiti.’

<sup>34</sup>‘Jerusarénumiatiram, Yúsnan etserin máiniaitrume; tura Yus akatar akupturmakmania nusha kayajai tukurum máiniaitrume! Tuma ain atash ni shiamprin etektana núnisnak Wisha weaktasan wakerimjiarme, túrasha nakitramarme. <sup>35</sup>Iistarum. Atumniasha Yus ajapramaitrume. Tura “Yusa náariin winiana nu, shiir atí” títiatrumna nú tsawant jeatsain penké wáitkiashtatrum. Nuna tájarme” tímiayi Jesus.

### Áishman eaak-jaan Jesus tsuármiania nu

**14** <sup>1</sup>Ayampratin tsawantai Pariséu uuntri jeen Jesus yurumáttsa wémiayi. Tura chíkich Pariséu wariniak túrat tusar ii pujuarmiayi. <sup>2</sup>Nui áishman eaak-jaa Jesus pujamunam naka pujumiayi. <sup>3</sup>Jintinniuncha Pariséuncha Jesus aniasmiayi “¿Warí tárúm? ¿Ayampratin tsawantai jaa tsuárminkiait. Tsuárchamniakait?” tímiayi.

<sup>4</sup>Tura niisha áimtsuk pujuarmiayi. Nuinkia jaan antiñ tsuármiai. Tura “shiir wetá” tímiayi. <sup>5</sup>Nuyá Pariséun chicharuk, “Atumí umpuurarisha, waakarisha waa táurmanum akaiki iniamtai, ayampratin tsawant ain nu chichamaik júatsrumek” tímiayi.

<sup>6</sup>Takui áimkiatniun penké tujinkiarmiayi.

### Nuátnaikiatin nampernum ipiaamu ármia nu

<sup>7</sup>Ipiaamusha penkeri pujutainium pujustaisar ti wakeruiniakui, Jesus nuna wáiniak juna jintinramiayi:

<sup>8</sup>“Nuátnaikiatin nampernum penkeri pujutainium pujusaip. Nui pujakminkia, chíkich ámijiai nankaamas penkeri táchatpiash.’

<sup>9</sup>Tura ipiatmania nu chichartamuk “Chikich iiktusta” turamchatpiash. Nuinkia chíkich nánkatkamu pujutainium wéakum natsartatme.

<sup>10</sup>Antsu ipiatmakmin, nánkatkamu pujutainium pujustá. Nuinkia ipiatmamnia nu chichartamuk “Amikru, ámeká juí penkeri pujutainium pujustá” turamartatui. Nujai chíkich ipiaamu ainia nu, “nekas penkerinti” turamartatui. <sup>11</sup>Imiata, “penkerintjai” tu enentáimtuma nuka péejchach awajnastatui. Tura ímianchach enentáimtúmana nuka waantu ajastiniaiti.”

<sup>12</sup>Nuyá Nin ipiaamua nuna chicharuk tímiayi “Amesha yurumáití tusam untsuktajtsam wakerakmeká, ame amikrumsha, yatsumsha, ame shuarumsha, írutramuram kufrintin ainia nusha ipiaawaip. Nii ipiaamka, ataksha íksan ámin ipiatmashtatuak. Nujai akikma átatme.

<sup>13</sup>Antsu yurumáití tusam untsuktajtsam wakerakmeká, kufrincha,

wekaicha, shutuapsha, kusurusha ipiaawarta. <sup>14</sup>Niisha akirmaktinian tujintiainiawai. Pénker shuar nantakiartatna nuj akinkiatame. Nu tuma asamtai warastatme” tímiayi.

### Uunt namperan Jesus nekapmá chichasmiania nu

<sup>15</sup>Nu misanam pujuarmia nuya, chikichik Jesus chichaamun antuk, Jesusan tímiayi “Yus akupeamunam pachiiniak, yurumkunka ti shiir ainti.”

<sup>16</sup>Nuna takui Jesus juna jintintiamiayi: “Áishman namperan nájanut, untsurí shuaran taartí tusa akatar akupkamai. <sup>17</sup>Yurumátin jeamtai “Winitiarum, yurumátin jeayi” tu tiarta tusa ni takarniurin akupkamai. <sup>18</sup>Tura winichminiaitji tusar ashí ujakarmai. Chíkich timiai “Nunkan yamá sumarmakjai. Iyutaj tusa wéakun winishtatjai. Tsankurturti” timiai. <sup>19</sup>Tura chíkich chichaak “Wisha tias waakan sumarmakjai. Nekapsatsan wakerajai. Tuma asan winishtatjai. Tsankurturti” timiai. <sup>20</sup>Tura chíkich chichaak “Yamá nuatnaikijai. Tuma asan winishtatjai” timiai. <sup>21</sup>Takarín waketki ni úntrin ashí nuna ujakmai. Nuna antuk niisha kajekmiayi. Tura ni takarniurin timiai “Ju péprunam pénger jintianmasha tura uchich jintiachinmasha weme, kuítríncha tura wekaichasha, shutuapsha, kusurusha itiaarta.” <sup>22</sup>Nuyá ukunam ni takarniurí taa chicharuk “Uuntá, ame turutmiamna nútiksanak túramjai; túrasha tuke ankant awai” timiai.’

<sup>23</sup>Tutai ni uuntri chichaak “Jintianam weme, chíkich jintiachiniam weme, wáinmena nu ashí awayawarta. Winia jearuj piakat tusan wakerajai. <sup>24</sup>Emka ipiaawarmajnia nuka penké chikichkíksha winínkia yurumáchartatui, tajarme’ tímiayi.”

### Kristu nemarsatin yúpichuchichuiti

<sup>25</sup>Untsurí aents Jesusjai irunki wearmiayi. Niisha nuna apajas iis juna tímiayi:

<sup>26</sup>“Shuar ni aparíncha, ni nukuríncha, nuaríncha uchiríncha, yachíncha, umaincha Wijjai nankaamas enentáimtakka, tura shiir pujustinian wakerak Winí winitniun nakitiakka winia unuiniamur ajaschamniaiti. <sup>27</sup>Ni wakeramurin ajakeak ni krusri yanaki nemartatsna nu winia unuiniamur ajaschamniaiti.’

<sup>28</sup>‘Jea yakí jeamtaj tusam wakerakmeka, kuítian urutmak ajapawaintiaj tusam tura urutmajaink<sup>i</sup> amukaintiaj tusam emka enentáimsashtatmek. <sup>29</sup>Túrutsuk aya ukura iniaisam amuktin tujinkiamínkia, nuna wáiniainia nu, wishikiainiak juna tiartatui: <sup>30</sup>“Iiskua. Nu shuar jeamtinian nankamamiayi. Túrasha amuktinian tujinkiamiayi.”

<sup>31</sup>“Tura uunt kapitían chíkich kapitíanjai mesetan najanatin áchatpiash. Emka, niisha pujus, tias mir (10.000) suntarjai painti mir (20.000) suntar

winiana nuna nupetkaintjash tusa enentáimsashtatuak. <sup>32</sup>Tujintiakka, chíkich kapitían jeachat pujaanak, nawamnaikiatai tusa akatar akupkashtatuak. <sup>33</sup>Wats, “Kristu unuiniamurí ajastinjai, wi takakjana juna warí winia itiurtawa” tu enentáimsatniuitrume. Túrachkurmeka winia unuiniamur ajastin tujinkiarne.’

### Wee michumarka yajauchiiti

(Mat. 5.13; Mar. 9.50)

<sup>34</sup>Weeka jeaku péñkeraiti. Tura michumarka çituirak atak péñker ati?  
<sup>35</sup>Wee michumarka araaamatniunmasha yayaatsui. Tura tsuatnum ikiusmasha ántraiti. Aya ajapatniukete. Kuishim ákuinkia antuktarum” tímiayi.

### Jesus murik menkakamu chichaman unuiniamiania nu

(Mat. 18.10-14)

**15** <sup>1</sup>Akupniu kuítrín-juu tura yajauch shuarsha Jesusan anturkatai tusar tarú wearmiayi. <sup>2</sup>Tuma asamtai Pariséusha, Israer-shuara jintinniurísha Jesusan áujmatainiak “Jusha tunáa shuaran itiaawai tura niijiai yurumáiniawai” tiarmiayi.

<sup>3</sup>Nuna tuiniakuí Jesus ju métek-taku chichaman jintintiwarmiayi:

<sup>4</sup>“Shuar sian (100) murikiun takuschampiash. Nu siánumiá chikichik menkakamtai nuwintia nufwinkia ni matsatmariin ikiuak, menkaka nuna ti eakchattawak. Wáintsuk iniaisashtatui. <sup>5</sup>Tura wáiniak yakainium awañkek waras jeen wáketui. <sup>6</sup>Tura jeen jeá ni amikrín, írutramuríncha ikiaanak “Wijiai warastarum. Murikiur menkaka nuna wáinkiajai” tawai. <sup>7</sup>Wats, nuwintia nuiwi péñker shuar akuí nayaimpiniam warastin awai. Tura antsu chikichík yajauch shuar ni enentáin yapajiamtáinkia, nú nankaamas warastin átatui, tájarne’ tímiayi.

### Kuit emenkakman Jesus unuiniamiania nu

<sup>8</sup>Nuyá chíkich enentáimsatai. Nuwá tias kuítian takakna nuna chikichik menkakamtai, wáinkiatá tusa jinia ekeemak, jean japimiak émamkes eakchattawak. <sup>9</sup>Tura wáiniak ni amikrín, írutramuríncha ikiaanak, “Wijiai warastarum. Kuit menkakamia nuna wáinkiajai” tawai. <sup>10</sup>Núnisan yajauch shuar ni enentáin yapajiamtai, Yusa suntari matsatmanum ti warastin awai” tímiayi.

### Uchi ni aparíin waketitniun Jesus unuiniamiania nu

<sup>11</sup>Nuyá Jesus juna unuiniamiayi:

“Áishman jimiará uchin takakuyi. <sup>12</sup>Tura pátatka uchi ni aparín timiai “Apawá, surustiniaitmena nu yamáí surusta.”

“Tutai ni aparí ni kuítrín jímiapetek nakak mai uchin susamai.

<sup>13</sup>Ishichik tsawant nankaamasai pátatka uchi ni warirín irur jukí jeachat

chíkich núnkanam wémai. Nuísha nánkamas yajauchin túrak kuítrín ashí ajapamai. <sup>14</sup>Ni kuitrī ashí amuuka aín nu núnkanam ti tsuka ámai. Niisha núnisan tsukariín waítsamai. <sup>15</sup>Túmak takatan eaktajtsa nu núnkanmaya apachiín werimiai. Nu áishmansha kuchirín waítрукta tusa akupkamai. <sup>16</sup>Uchi ti tsukamak kuchi ukatramun niisha yuátajtsa ti wakerimiai. Túrasha penké súcharmai. <sup>17</sup>Tumáa pujus nuínkia enentáimpramai. “Winia aparuí takau shuar péñkeran ti yurumáiniawai. Tura wikia juí tsukaruí waítiajai. <sup>18</sup>Wats, aparuí waketkitjai. Tura aparun chicharkun “Apawá Yúsjaisha ámijiaisha tunaan túrajai, titiajai. <sup>19</sup>Ame uchiram áchamniaitjai yamaikia. Ame takarniurmea áantsanak átaj tusan wakerajai” titiajai” tu enentáimsamai. <sup>20</sup>Tura wajaki ni aparíin waketkimiai’ tímiayi.

“Tura ni aparísha jeachat winian wáiniak waitnentramai. Aparí tsékenki inkiun miniakak mukunámai. <sup>21</sup>Nuínkia uchirísha timiai “Apawá, Yúsjaisha ámijiaisha tunáan túrajai. Ame uchiram áchamniaitjai.”

<sup>22</sup>Túrasha ni aparínkia ni takarniurín chicharuk “Ti penker pushí itiarum áentsratarum, timiai. Tura uwejnun aweetaisha aweemtikiatarum. Tura sapatcha aweemtikiatarum. <sup>23</sup>Túrarum waaka nueram ana nu maatarum. Námper nájankur shiir enentáimsar yurumámi. <sup>24</sup>Warí, ju winia uchir jakaapitia tu enentáimsamjai. Túrasha iwiaakui. Menkákama nuna wáinkiajai.” Nuínkia ti warasarmai’ tímiayi.

<sup>25</sup>Tumaj iwiáj úchikia takatnum pujumai. Tura wáketuk, jeá nuntumas jantsemáiniak túntuiyamun antukmai. <sup>26</sup>Nuínkia yaintrí matsatun chikichiniak untsuk “¿Warimpait?” timiai.’

<sup>27</sup>Tura nii chichaak “Ame yátsum tayi. Túramtai ame apa waaka nueram maatai tawai, ame yatsum péñker tau asamtai” timiai.’

<sup>28</sup>Tura iwiaj uchi kajek wayatniun nakitramai.’

“Tuma asamtai ni aparí jiiintiuki “wayata” timiai.’

<sup>29</sup>Tura uchisha aparín chicharuk “Wisha ámin umirkun untsurí uwitin ame takatrumin túraitjai. Nu nékame. Túrasha winia amikrujai námper najanatin chipiuksha penké surichuitme. <sup>30</sup>Tura ju ame uchiram nuwajaj yajauchin túrak ame kuítrumin wasurkania nu támatai, waaka nueram máachumek” timiai.’

<sup>31</sup>Takui aparí chicharuk “Uchirú, ámeke wijiaj tuke pujame. Tura wi takakjana nusha ashí áminuiti. <sup>32</sup>Tura ame yatsum jákaiti tu enentáimsamaj nu iwiaakuiti. Menkaka nu yamaikia wáinkiajai. Tuma asamtai námper najanar waraschatniukaitiaj<sup>i</sup>” timiai” tímiayi.

#### Takatan wáinin

**16** <sup>1</sup>Ju métek-taku chichamnasha Jesus ni unuiniamu<sup>7</sup> “Tura nii chichaak “Ame yátsrín unuiniamiayi.



“Kuítrintin áishmaṅka takatrṅ wáinniurṅ ámai. Tura nérenniun ujainiak “Ame wáinniuram ame kuíttrumín nánkamas ajapeawai” tiarmai.’

<sup>2</sup>Nuna antuk ni wáinniurṅ untsuk “¿Warinia jṅsha turamainia? timiai. Yamaikia winia wáinniur áchattame. Tuma asamtai winia kuíttrujai itiurkamea nu iniaktursata” timiai.’

<sup>3</sup>Tutai takatan wáinin enentáimsamai. “Maaj, wisha itiurkatjak, timiai. Nunka táurtinniasha jeatsjai. “Kuit surusta” tínniasha natsamajai.

<sup>4</sup>Winia takatur atsakui yurumkan ajamprusarat tusan túratajna nuna nekajai” tu enentáimsamai. <sup>5</sup>Nuyá nérenniun tumashmaku armia nuna ankant ankant untsukarmai. Emka tamia nuna chicharuk “¿Winia úntururutma tumashmakuitiam?” timiai.’

<sup>6</sup>Niisha áimiuk “Asuitin siaṅ taru tumashiitjai” timiai.’

“Tutai takata wáinin chicharuk “Pai. Papinium tumashrum ana nu júá: wárikmasmek pujusam, nu papí jaakam, chíkich papinium aya senkuentachik aarta” timiai.’

<sup>7</sup>Nuyá chíkich tumashmaku támatai “¿Amesha urutmá tumashiitiam?” timiai.’

“Tutai nii chichaak “Shana siaṅ taru tumashiitjai” timiai.’

“Tutai “Pai. Papinium tumashrum ana nu júiti. Chíkich papinium aya uchentak aarta” timiai.’

<sup>8</sup>Nuyá takata wáinniu uuntri nuna nekáa “Nii yajauch túriniaitiat imiá enentáimniuiti” timiai’ tímiayi.

Nuyá Jesus tímiayi ‘Yus-shuarjai nankaamas Yus-shuarcha aijjai ni túratniuriniak takainiak imiá enentáimkia áiniawai.’

<sup>9</sup>Ju nunkanam anankatin átsuk. Tura kuitsha aya ju nunkanmayankete. Tuma asamtai atumsha kuitrumjai “shuaran yaintaj” tu enentáimsatarum. Kuitjai yaintin amuukamtai atumsha amuicha jeanam ipiaamu átaj tusarum túratarum.”

<sup>10</sup>Shuar ishichik takakna nujai péñker túrakka, núkap takakna nujai sha péñker túrattawai. Tura ishichik takakna nujai péñker túrachkunka, núkap takakna nujai sha péñker túrashtatui. <sup>11</sup>Tuma asamtai ju nunkanmaya anankartin kuitjai péñker túrachkurmeka, tuke átin ana nujai takastincha çitiur takastarumek? <sup>12</sup>Takakme nuna Yus ikiatmasuiti. Nujai péñker túrachkurminkia, atumnia átinia nuna çitiurak suramsat’?

<sup>13</sup>Takarniurṅ jimiara úuntrintin ajastinian tujintiawai. Warí, chikichnaka aneak chikichnaka nakitrashta túrattawai. Turya senkuentachik aarta” timiaituak. Chikichan umiruk chikichnaka umirkashtatui. Yussha kuitcha máí-metek enentáimtuschamniaitrumé” tímiayi Jesus.

<sup>14</sup>Pariséusha kuítian anen armia nu, ashí ni támán antukar Jesusan wishikrarmiayi. <sup>15</sup>Túmakui Jesus nin tímiayi “Atumsha aents ímmianum

pénker awajmamprume. Túrasha atumí enentáincha Yus pénker nékawai. Kame winia “nan̄kaamantuiti” turutit tusa wakera nuna Yuska nakitiawai.’

### Yaunchu etserkamu, yamá etserkamu

16‘Juan étsetsain̄ Muisáis aar akupkamia nunasha tura Yúsnan etserin unuinarmia nunasha antuktin ármiai. Tura yamaisha tímianiai ti shiir chicham awai. Yus akupeana nū urukukit nuka paant etserkamuiti. Tura ashí shuar nū pachiinkiataj tusar ni kakarmarijiāin̄ ti takainiawai.’

17‘Túrasha yaunchu akupkamu ashí chicham uminkiatniuiti. Nu chicham uminkiashtinkia nayaimpisha nun̄kasha amukatniujaī nan̄kaamas itiurchataiti.’

(Mat. 19. 1ya sen̄kuentachik aarta” timiai-12; Mar. 10.1-12)

18‘Áishman̄ nuar̄in̄ ajapa chikichan nuátkun̄ka tsanirmawai. Tura nuwa ajapamu niiniurtakka nusha núnisān̄ tsanirmawai.’

### Kuítrintin áishman̄ Rásarujāi

19‘Áishman̄ kuítrintin ámai. Niisha imiá shiir pushin ti kuit ainia nujāi iwiarmamniuyi. Tura tuke tsawant yurumak ti kuit amia nujāi namperan najannuiyi. 20Tura kuítrincha ámai ni naarī Rásaru. Niisha kuchapruku tunamaruyi. Tuke tsawant kuítrinniu wáitir̄in̄ pujuyi. 21Ti tsukamak kuítrinniu misariniā kakekan yuattsa wakerimiai. Tura yawasha ni kuchapr̄in̄ nukatiarmai. 22Kuítrincha jakamai. Jakamtai jaka shiir pujutainium, Apraám pujumia nū nayaimpinmayā suntar júkiarmai. Kuítrinniusha jakamai. Jakamtai iwiarsarmai. 23Jaka pujutainium wáitias pujus, pan̄kái ímias, Rásarun Apraámjāi pujuinian wáinkiamai. 24Wáiniak untsumuk “Apawá Apraamá wáitnentrurta, timiai. Rásaruka tsara uwejejāi entsan uchupir winia iniairun imichturat akupturkata. Wisha jūi jinium pujusan ti waitiajai” timiai.’

25‘Tutai Apraám timiai “Uchirú enentáimpratá. Ame nun̄ká iwiaaku pujusam ti shiir pujumame. Antsu Rásaruka nū ti yajauch pujumai. Tura niisha yamaikia jūi áyamui tura ámeka wáitiame. 26Tura nú arant nánata ti uunt awai. Tuma asamtai juyá āi wétinian wakeruiniayat tujintiainiawai. Tura āiya jūi tátinian wakeruinia nusha tujintiainiawai.”’

27‘Nūinkia kuítrintin timiai “Nūinkia apawá Apraamá, juna seajme. Winia aparū jeen Rasaru akupturkata. 28Nūisha winia yatsur sen̄ku matsataniawai. Niisha jū wáitsatniunam tácharat tusa ujákartí, tájame” timiai.’

29‘Tutai Apraám timiai “Muisáis áarman tura Yúsnan etserin áarman takakainiawai. Nuna umikiarti.”’

30‘Tutai kuítrintin áimkiamai “Túrasha apawa Apraamá, antsu jakamunmayā nantaki, shuar we ujakam enentáin̄ yapajjáwarainti.”’

<sup>31</sup>“Tura Apraám timiai “Muisáis áarman tura Yúsnan etserin áarman anturainiachkuṅka jaka nantaki we ujakmasha antukchartatui” timiai.” Tu áujmatsamiayi Jesus.

### Yajauch túrumtikiatin ti tsúumainti

(Mat. 18.6-7, 21-22; Mar. 9.42)

**17** <sup>1</sup>Jesus ni unuiniamurṅin jṅna tímiayi, “Aentsun yajauchin túrumtikiattana nu tuke átatui. Tura shuar ni aṅin tunaan wakerumtikna nu aneartí. <sup>2</sup>Jṅu shuar uchich ainia nuna yajauchinium túrumtikna nuna Yus imiá asutiáttawai. Tuma asamtai nuna túratsaṅin uunt kayajai kuntujnum jṅnkiá nayaantsanam ajunkam maak ainti. <sup>3</sup>Túrasha atumek ímiastarum. Ame yatsum ámin tunáa túrutmamtaṅkia chicharkata; tura niisha “tsaṅkurturta” túramkuṅkia tsaṅkurata. <sup>4</sup>Chikichík tsawantinṅin siati túrutmamtai, tura “tsaṅkurturta, atakka túrashtajai,” siati túramkuṅkia, tuke tsaṅkurata.”

### Yus nekas enentáimtakrikia tujinkiashtatji

<sup>5</sup>Jesusa unuiniamurṅi Nin chicharuk “Yus enentáimtajnia nú naṅkaamas enentáimtustin yáinmaktá” tiarmiayi.

<sup>6</sup>Tutai Jesus tímiayi “Mustasa jṅnkiái ti ishitiúpchich ana núnisaṅ ishichkisha Yus enentáimtaitkiurmeka, sikiumuru numi wajana nu, “Wajamurmiyaṅka ukuiniakam nayaantsanam wajasta” tákurmin nú numi umirtamkainti.’

### Yusa takatři takasar “ti penker túraitji” tíchatniuitji

<sup>7</sup>Atumí takarniurṅi arakmasua amik, waakancha iis támatai, ṅnú chichamaik amesha, “Winitíá, yurumáitíá” tíintmek? <sup>8</sup>Atsá. Antsu, “yurumak iwiarturata. Wi yurumátin tura umartincha surusminiam iwiarnarta. Nuyá ame yurumátá.” Nu tíchaintmek. <sup>9</sup>Nii túratin ana nunak túratsuk. Tuma asamtai yumṅinsashtatme. <sup>10</sup>Atumsha núnisrumek Yus túramna nu ashí umikiam “ti penker túraitjai” tíchatniuitme. Antsu “aya ii túratniurṅi ana nuke tura asar iikia ántraitji” títiniaitme.” Tu tímiayi Jesus.

### Tias áishmaṅkan tunamarun Jesus tsuáarmiania nu

<sup>11</sup>Jesus Jerusaréṅnum wesa Kariréa nuṅka ikiuki Samaria nuṅkanam naṅkaamakmiayi. <sup>12</sup>Tura péprunam jeamtai, tias áishmanṅ ripra sunṅkurjai tunamaru armia nu, arant wajasarmiayi. <sup>13</sup>Tura untsumainiak “Uunt Jesúsá, waitnentrurta” tiarmiayi.

<sup>14</sup>Jesus nin wáiniak, “Pátriṅ werirum iniaktumastarum” tímiayi.

Tura wésar péṅker ajasarmiayi. <sup>15</sup>Nuyá chikichik ni tsuamarman nekáa kakantar chichaki Yusa náarṅin uunt awajki waketki Jesusan tarimiayi.

<sup>16</sup>Yumiṣataj tusa Jesusan tikishmatar piniakumar tepesmiayi. Nu áishmaṅka Samaríamayaṁuyayi.

<sup>17</sup>Nuna wáiniak Jesus tímiayi “Tsuámaru tiáschakait. ¿Chíkich nuiwisha tui pujuinia? <sup>18</sup>¿Ju yajaya áishmaṅ nínkik Yusa naari uunt awajsataj tusa waketki tai?” <sup>19</sup>Nuyá áishmaṅkan tímiayi, “Winia nekas enentáimtura asam péñker ajasume. Wajakim shiir weta” tímiayi Jesus.

**¿Yusa akupeamuri urutaik ati?**

*(Mat. 24.23-28, 36-41)*

<sup>20</sup>Pariséu aents Jesusan aníak “¿Yusa akupeamuri urutaik ati?” tiarmiayi.

Tutai Jesus tímiayi, “Yusa akupeamuri paant wáinkiachminiati. “Yamaí nanḱamnyai” tichamniati. <sup>21</sup>“Juí awai, nuísha awai” tichamniati. Warí, Yusa akupeamuriṅkia atumiin pujawai” tímiayi.

<sup>22</sup>Nuyá ni unuiniamuriṅ chicharuk juna tímiayi: “Tsawant jeattawai atumsha Winia Aents Ajasu tutain “aya chikichík tsawantkesha Nii wáinkiarḱia mak” turuttiatrume. Túrasha tujinkiattarme. <sup>23</sup>Aents Ajasu tutai “juí pujawai, nuísha pujawai” tuñiakui weriirap. Tana nu nemariirap. <sup>24</sup>Wi, Aents Ajasuitjiana nu tátinian tsawantur jeamtai paant wáitkiattarme. Peem péetuk ashí nayaimpin tsáapnin awajna núnisaṅ wi taamu paant átatui. <sup>25</sup>Tura nu túrunsaṅ yamai pujuinia nu Winia nakitruiniakui ti wáitsatniuitjai. <sup>26</sup>Winia atak tátiniur jeamtai, yaunchu Nuái pujumia nú tsawantin túrunamia núnisaṅ túrunattawai. <sup>27</sup>Yurumáwarmiayi, umararmiayi, nuatnaikiarmiayi, ni nawantri nuatnakat tusa surukarmiayi. Tumáa pujuiniaṅ Nuái uunt kanunam eṅkemprantai, amarak nu aentsnasha mash amuukarmiayi. <sup>28</sup>Tura Sutuma péprunmasha Rauta írutramuriṣha núnisaraṅ Yusa asutiátniuri enentáimtutsuk pujuarmiayi. Yurumáwarmiayi, umararmiayi, sumakarmiayi, surukarmiayi, ajancha ajarmarmiayi, jeancha jeammarmiayi. <sup>29</sup>Tura Raut Sutuma péprunmayaṁ jiiṅkimtai asupri tutai kaya keek yútana áintsanṅ nayaimpinmayaṁ kakeetuk nu áentsun mash máawarmiayi. <sup>30</sup>Núnisaṅ winia atak tátiniur jeamtai enentáimtsuk pujusartatui.’

<sup>31</sup>‘Nu tsawant jeamtai jea yakiiniṅ pujana nú shuar ni waririṅ achiktaj tusa akaikishti. Jeá wayashti. Tura kampunniunam wekaana nú shuar ni jeen waketkishti. <sup>32</sup>Rauta nuarí túrunamu enentáimpratarum. <sup>33</sup>Aya ju nunḱanmayaṅ enentáimias “iwiaaku átaj” tana nu ni iwiaakmarin emeṅkáktatui. Tura ju nunḱanam ni iwiaakmarin emeṅkana nu nekas iwiaakma ana nuna wáinkiaṭtawai. <sup>34</sup>Paant tájarme. Nú káshitin jimiará áishmaṅ nuu peaknumaṅ kanúu tepeartatui. Chikichik junaktiatui, chíkichkia ikiunkittiatui. <sup>35</sup>Jimiará nuwa máí-metek nekée pujuartatui. Chikichik junaktiatui, chíkichkia ikiunkittiatui. <sup>36</sup>Jimiará áishmaṅ

kampuniunam wekainiartatui. Chikichik junaktiatui, chíkichkia ikiunkittiwai.” Tu tímiayi.

<sup>37</sup>Nuna antukar “Uunta ¿tuj túrunatta?” tiarmiayi.

Tutai ni chichaak “Jaka tepana nuj chuan káutkartatui.”

### Shuar yawetsuk Yúsan tuke áujsatniuiti

**18** <sup>1</sup>Shuar yawetsuk Yúsan tuke áujsatniua nuna unuiniartaj tusa Jesus ju métek-taku chichaman tímiayi:

<sup>2</sup>“Chíkich péprunam shuaran akupin amai. Nú áishman Yúsnasha ashamchayui; shuárnasha péñker enentáimtichuyi. <sup>3</sup>Tura nú péprunam waje amai. Niisha shuáran akupniun chicharuk “Áishman winia yajauch awajtusmania nu írtusta” tusa tuke waketrú pujuyi. <sup>4</sup>Yámankamtaikkia nin anturkatniun nakitmiiai. Tura ukunam enentáimias “Wisha Yúsan ashamachiatnak shuárnasha péñker enentáimtichuiatnak ju waje tana nuna túrattajai. <sup>5</sup>Warí niisha tuke taa itit awajtatsuk. Tuma asamtai nin kakerkaj tusan wárik túrattajai” timiai” tímiayi.

<sup>6</sup>Nuyá uunt Jesus tímiayi “Shuaran akupin yajauchiitiat nuna timiai. <sup>7</sup>Tura Yus ti péñker asa, ni achikmarin tsawaisha, káshisha untsuamka nú nankaamas anturkashtatuak. ¿Yaitsuk menkakatuak? <sup>8</sup>Atsá, wárik yáinkiertatui, tájarme. Tura Wi Aents Ajasuitjiana ju atak támatai, ¿shuaran tuke Winia nekas enentáimturainia nuna wáinkiatjash?” tímiayi Jesus.

### Pariséusha, kuítian-juuncha Yúsan áujsarmia nu

<sup>9</sup>“Péñkeraitjai” tu enentáimtumainiak chikichnaka yajauch enentáimtiarmia nuna Jesus nekapmá chichasmiayi. Juna tímiayi:

<sup>10</sup>“Jimiará áishman Yusa Uunt Jeen Yus áujsatat tusar wearmai. Chíkichkia Pariséuuyi, chíkichkia kuítian-juuyi. <sup>11</sup>Pariséusha wajaki Yúsan áujuk júnis tímiayi: “Yusrú, chíkich áishman kasa, yajauch, tsanirmau ainia nujai métekcha asan yuminsajme. Tura ju kuítian-juu wajana jújaisha métekhaitjai. <sup>12</sup>Warí, Ame akupkamna nuna iniankasan wisha chikichík semanatinin jimiará tsawant ijiarman áujeajai; tura wi achiajna nuna tiásnumia chikichkiniak Yúsnaiti tusan akankan súajai.” Tu tímiayi.’

<sup>13</sup>“Tura kuítian-juusha arant wajas, nayaimpinmaaní pankái ímsatniunkesha natsaamak, tsuntsuma, ni netsepen awatí “Yusá, ti tunaitjai. Waitnétrurtá” timiai.’

<sup>14</sup>“Wats tájarme, nu kuítian-juu shuar Yus ímmianum ni enentái péñker awajnas ni jeen waketkimiai. Tura Pariséuka tamia núnisan waketkimiai. Nekaatarum. Shuar nankaamantu enentáimtumana nuka péejchach awajnastatui. Tura antsu péejchach enentáimtumana nu, nankaamantu awajnastatui” tímiayi Jesus.

**Uchisha Jesusna áminiaiti**  
(*Mat. 19.13-15; Mar. 10.13-16*)

<sup>15</sup>Jesus antin<sup>ñ</sup>kiarat tusar uchin itiararmiayi. Tura Jesusa unuiniamur<sup>ñ</sup>sha nuna wáinkiar suritkiarmiayi. <sup>16</sup>Tura Jesus nin untsukar tímiayi “Uchi Winí winitin tsan<sup>ñ</sup>kamkatarum, surimkiairap. Enentáimsatarum. Uchichia áintsan<sup>ñ</sup> enentáimtumana nú shuárak Yus ni enentáin akupin ajasminiaiti. <sup>17</sup>Uchi ni úuntr<sup>ñ</sup>in umira núnisan<sup>ñ</sup> shuar Yúsan umíachkunka Yus ni enentáin<sup>ñ</sup> akupin ajaschamniaiti.” Tu tímiayi Jesus.

**Kuítrintin áishman Jesusjaj<sup>ñ</sup> áujmatsamiania nu**  
(*Mat. 19.16-30; Mar. 10.17-31*)

<sup>18</sup>Shuara uuntr<sup>ñ</sup>i Jesusan tarí áujsamiaiyi. “Uuntá, amesha péñkeraitme. Tuma asam, turuttia, ¿warinia túrakna tuke iwiaaku átataj?” tímiayi.

<sup>19</sup>Tutai Jesus, “¿Urukamtia Winia, péñkeraitme, túrutam? Aents péñkerka atsawai. Aya Yusak péñkeraiti. <sup>20</sup>Tura Yus akupkamu ana nu péñker nékame. Tsanirmawairap, mankartuawairap, kasamkairap, tsanumprurairap, ame apasha, nukusha shiir enentáimtustarum. Nusha nékame” tímiayi.

<sup>21</sup>Tutai áishman<sup>ñ</sup> tímiayi “Uuntá, úchichik mash umiki tsakaruitjai.”

<sup>22</sup>Jesus nuna antuk “Chikichik taatramsai, tímiayi. Ame takakmena nu ashí surukam kuítrincha ainia nu susarta. Nuñkia nayaimpiniam kuítrum átatui. Túram nemartustaj tusam winitia.”

<sup>23</sup>Tura nuna antuk, nu áishman<sup>ñ</sup> ti kuítrintin asa ti kuntuts enentáimpramiayi. <sup>24</sup>Tura kúntuts enentáimpramtai Jesus nuna nekáa “Kuítrintin ainia nu Yus akupeamunam pachiinkiatin ti iturchataiti, tímiayi. <sup>25</sup>Kamiriuka, uunt ana nu, auja j<sup>ñ</sup>in wayatin iturchataiti. Tura shuar kuítrin<sup>ñ</sup> ti enentáimtana nu Yus akupeamunam pachiinkiatin nú nan<sup>ñ</sup>kaamas iturchataiti.” Tu tímiayi.

<sup>26</sup>Tura nuna antukarmia nu tiarmiayi “¿Nuñkia yaki uwempramniait?”

<sup>27</sup>Tutai Jesus tímiayi “Aents tujintiainia nuna Yuska páchitsuk túramniaiti.”

<sup>28</sup>Nuyá Pítiur Nin chicharuk tímiayi “Uuntá, iikia Ámin nemarsataj tusar ii takakmaaka ikiukji.”

<sup>29-30</sup>Tutai Jesus tímiayi “Shuar Yus akupeana nuna túrataj tusa ni j<sup>ñ</sup>en ikiuakka tura núnisan<sup>ñ</sup> ni aparíncha, nukuríncha, yachínkisha, nuwenkesha, uchirínkisha ikiuakka ju<sup>ñ</sup> nun<sup>ñ</sup>kanmasha núkap wáinkiat<sup>ñ</sup>tawai nu shuar. Tura tuke iwiaaku pujustinniasha wáinkiat<sup>ñ</sup>tawai.”

**Ataksha ni jákatniur<sup>ñ</sup>in Jesus ujakmiania nu**  
(*Mat. 20.17-19; Mar. 10.32-34*)

<sup>31</sup>Jesus ni tuse unuiniamur<sup>ñ</sup>in akanki ikiaan<sup>ñ</sup>ak juna tímiayi:

“Jerusarénum jeatemaji. Juisha Jerusarénum Winia, Aents Ajasu tutain, túrunatniurun Yúsnan etserin yaunchu áatrurarmia nu uminkiattawai. <sup>32</sup>Apachnium surutkartatui. Túrawar wishikrurar, katsekrucar usukruawartatui. <sup>33</sup>Awatiar mantuáwartatui. Túramaitiatnak menaintiú tsawantai nantaktiatjai” tímiayi.

<sup>34</sup>Tura Nii tímiania nuna nekas túrunattawai, tícharmiayi. Wariniak ta tusar nekaacharmiayi.

### Jirikiúnmayá áishmankan Jesus ímtikmiania nu

(Mat. 20.29-34; Mar. 10.46-52)

<sup>35</sup>Jesus Jirikiú péprunam nuntumsai, nuí áishman jii kusuru, kuítian surusarat tusa jintiá pujumiayi. <sup>36</sup>Untsurí aents nankaamainian antuk “¿warinkit?” tímiayi.

<sup>37</sup>Tutai, “Nasarénumia Jesus nankaamawai” tiarmiayi.

<sup>38</sup>Kusurusha nuna antuk untsukum “Jesusá, Uunt Kapitían Tawit weeachukaitiam. Tátiniuya núchakaitiam. Winiaja waitnentrurta” tímiayi.

<sup>39</sup>Eemak wearmiania nu chicharainiak “takamatsata” tiarmiayi.

Tutaisha nú arant untsukum “Tawit weeachukaitiam; winiaja waitnentrurta” tímiayi.

<sup>40</sup>Nuinkia Jesus wajas “itiatarum” tímiayi. Tura nii támatai, <sup>41</sup>“¿Warí itiurtukat tusamea wakerutam?” tímiayi.

Tutai kusuru áimiuk “Uuntá, ímtiasan wakerajai” tímiayi.

<sup>42</sup>Tutai Jesus chichaak “Ímtia. Winia nekas enentáimtura asam péñker ajasume” tímiayi.

<sup>43</sup>Nu chichamaik kusuru ímmiayi. Tura Yusa naari uunt awajki Jesusan nemarmiayi. Tura ashí aents nuna wáinkiarmania nusha Yusa náarin uunt awajsarmiayi.

### Sakíu Jesusjai

**19** <sup>1</sup>Nuyá Jirikiú péprunam wayá nuí wekaikini ajamiayi. <sup>2</sup>Nuí kuítrintin áishman ni naari Sakíu pujumiayi. Nu Sakíu kuítian-juu úuntriayai. <sup>3</sup>Aents ti káunkámtai, Sakíu ti sútarach asa, Jesusan ístaj tukamá tujinkiamiayi. <sup>4</sup>Tuma asa Jesus nuke nankaamaktin asamtai, eemki tsékiniki sikiumuru numi wajamunam wakamiayi iistaj tusa. <sup>5</sup>Jesus nuí nankaamak pañkái ímias chicharuk “Sakíu wárik akáikitiá. Ame jeemiin yamá kanartiniatjai” tímiayi.

<sup>6</sup>Tutai Sakíusha wárik akaiki, shiir enentáimias Jesusan itiaamiayi.

<sup>7</sup>Ashí aents nuna wáinkiar “Maaj, Jesus tunáa áishmanka jeen pujawai” tusa mai tunaim ajarmiayi.

<sup>8</sup>Nuyá Sakíu wajaki Jesusan chicharuk “Ístá Uuntá, wi takakjana juna jímiaPETEK nakakan kuítrincha ainia nuna susartatjai. Tura wáitruan chikichan kasarkaitkiuncha menaintiu patatsan awainkittiajai” tímiayi.

<sup>9</sup>Tutai Jesus tímiayi “Ju áishman Apraáma shuárintiat yamá niisha níniuujai uwempra asa nekas Apraáma shuari ajasuiti. <sup>10</sup>Wisha Aents Ajasu asan menkakaru ainia nuna eakan uwentikrartaj tusan táwitjai.” Tu tímiayi.

### Kuítian nekapmá chichasmiayi

<sup>11</sup>Nu aents Jesusan anturkarmia nu “Jerusarénnum jeawakrin Nii, Yus anaikiamu asa, wárik akupin ajastatui” tu enentáimsarmiaiyi. Tuma asamtai wésar Jerusarénnum nuntumsarai, nuna enentáimsarain tusa Jesus juna métek-takun chichasmiayi:

<sup>12</sup>“Áishman penkeri amai. Nu áishmansha jeachat chíkich núnkanam kapitíán náamkan tátaj tusa wemai. <sup>13</sup>Tura wétsuk ni takarniurin tias armia nuna unsukarmai. Tura ankant ankant kuit kurijiai nankaamas pénger armia nuna suúniak “Ju kuitjai wi táatsain takakmá ajatarum” timiai.’

<sup>14</sup>“Tura ni nunkenia shuarka nakitiarmai. Túmainiak “nu áishman ii kapitíantri ajasain tusar nakitijai” nu titiá tusar áishmankan akatrar akuptukarmai.’

<sup>15</sup>“Tuma ain kapitíán náamak ni nunken waketki tamai. Taa “winia kuítrujai warí túrarum” titiáj tusa ni takarniurin kuitia súsarmia nuna unsukarmai.’

<sup>16</sup>“Ni takarniuri emka chikichik taa “ame kuítrumjai takakmasan tias patasan achikmajai” timiai.’

<sup>17</sup>“Tutai kapitíán chichaak “Pénger túrame. Ishichik susamjamna nújaink<sup>k</sup> wi tímiajna tímiatrusmek túrame. Tuma asakmin tias péprun akupin awajsattajme” timiai.’

<sup>18</sup>“Chíkich taa “Íistá Uuntá, ame kuítrumjai takakmasan senku patasan achikjai” timiai.’

<sup>19</sup>“Nunasha chicharuk “Amincha senku péprun akupin awajsattajme” timiai.’

<sup>20</sup>“Nuyá chíkich taa “Uuntá, ame kuítrumin panijjai ijian ikiusmajai. <sup>21</sup>Amesha kakaram chichau asakmin, ikiuschiatam achin asakmin tura arakmachiatam juu asakmin ashankamjame” timiai.’

<sup>22</sup>“Tutai kapitíán timiai “Maaj, amesha ti yajauchiitme. Ame támena nuke makurmawai. Wi kakaram chichau aisha, ikiuschiatan achin aisha tura araknasha arakmachiatan juu aisha, <sup>23</sup>nuiñkia çurukamtia kuit-ikiutainiam ikiuschamam? Nuiñkia wi atak táakun patasan achikiájna” timiai. <sup>24</sup>Tura nu wajarmia nuna chicharuk “Kuítian takakmari juruktiarum; túrarum tias takakna nú shuar susatarum” timiai.’

<sup>25</sup>“Tura niisha chichainiak “túrasha Uuntá, tias takakja” tiarmai.’

<sup>26</sup>“Tutai kapitíán chichaak “Takakna nujai takaakuñkia patatnastatui tájarne. Tura takakna nujai takaachkuñkia ishichik takakuisha



jurunkittiwai. <sup>27</sup>Tura winia nemasur kapitián ajasain tusar nakitrurarmania nu itiatarum. Tura wisha ímiaisn máatárum” timiai.” Tu tímiayi Jesus.

### **Jerusarénum Jesus wayamiayi**

*(Mat. 21.1-11; Mar. 11.1-11; Juan 12.12-19)*

<sup>28</sup>Nuna tuasua amik Jesus Jerusarénumaaní wémiayi. <sup>29</sup>Petpajái pepru tura Petania péprusha Uriwiu náinnium tíjiuchi; nuí jeastatuk ajatemas ni unuiniamurín jímiarán chicharuk, <sup>30</sup>“Tíjiuch péprunam wetarum. Túrarum nuí umpuuruch ekemtukchamu jiníkiamu waja wáinkiatarme. Nu atíarum itiatarum. <sup>31</sup>Tura “¿urukamtaí atíarum?” turamainiakuisa, “ii untrí wakerawai” títiarum” tímiayi.

<sup>32</sup>Tutai unuiniamurí wear, Jesus timia ímiatrusan wáinkiarimiayi <sup>33</sup>Tura umpuuruchin atíakui nérentin chichainiak “¿Urukamtaí umpuuruchsha atíarum?” tiarmiayi.

<sup>34</sup>Tutai unuiniamusha “Ii untrí wakerawai” tiarmiayi.

<sup>35</sup>Tura umpuuruchin Jesusan itiarimiayi. Túrawar ni pushirín umpuuruchiniam awantkar Jesusan ekenkarmiayi. <sup>36</sup>Tura Jesus wétinnium ni pushirín jintianam ayaparar áintrarmiayi. <sup>37</sup>Tura Uriwiu naint awánkénamunam tíjiuch ajasarmataí untsurí aents Jesusan nemariarmia nu warainiak kakantar unsumainiak aents tujintiamun untsurí túran wáinkiaru ásar Yusa náarín uunt awajsarmiayi. <sup>38</sup>“Yusa náarín winiana ju ii uunt Akupniuiti. Nincha Yus shiir awajsati. Nayaimpiniam pujuinia nu shiir enentáimsar Yusa náarín uunt awajsarti” tiarmiayi.

<sup>39</sup>Tura Paríséu aents nuí páchitra pujuarmia nu Jesusan chicharainiak “Uuntá, nemartamainia nu “takamatsata” tiarta” tiarmiayi.

<sup>40</sup>Tutai Jesus tímiayi “Nuínkia ju takamatsarmataínkia, kayasha unsumkarainti. Nuna paant tájarne” tímiayi. <sup>41</sup>Jerusarénum tíjiuch ajatemas péprun wáiniak útuk júnis tímiayi: <sup>42</sup>“Jerusarénumia shuártiram, ju tsawantinkesha shiir pujustintrum nekaarmeka maak. Túrasha yamaikia nekaatin nankaamasai. <sup>43</sup>Kame ti itiurchat tsawant jeartamtatume. Atumí nemasrín nunkejái aa-tanishan tanishmarar téntatramkattarme. Mesetan najatramattarme, tura áatusha junisha mash árenmaktatume. <sup>44</sup>Túrutma nunká ajunmartatume. Tura atumiin pujuinia nuna máawartatui. Tura ashí emesarmataí ishichkisha kaya irumpramusha penké atsuttawai. Wi Yusa anaikiamurín tarijrumna nu nekaachu asakrumin túrutmattarme.” Tu tímiayi.

### **Yusa Uunt Jeen suruktinian Jesus surimkiamiania nu**

*(Mat. 21.12-17; Mar. 11.15-19; Juan 2.13-22)*

<sup>45</sup>Nuyá Jesus Yusa Uunt Jeen wayá suruktasa pujuarmia nuna sumaktasa pujuarmia nunasha jiki awemarmiayi. <sup>46</sup>Túrak juna tímiayi:

“Yús-Papinium yaunchu aarma awai: “Winia jearka Yus áuj satin jeaiti” tu áarmaiti. Túrasha átumka kasáa matsamtaiya nútikiarme” tímiayi.

<sup>47</sup>Tuke tsawantin Yusa Uunt Jeen Jesus uwempratin chichaman unuiniak pujai Israer-patri úuntri<sup>sha</sup>, Israer-shuara jintinniur<sup>isha</sup>, tura pepru úuntri<sup>sha</sup>, itiur máamniakit tusar ti enentáimsarmiayi. <sup>48</sup>Túrasha ashí aents émamkes anturainiakui máatniun tujinkiar<sup>miayi</sup>.

**Yusa kakarmarijají Jesus takasmiania nu**

*(Mat. 21.23-27; Mar. 11.27-33)*

**20** <sup>1</sup>Yusa Uunt Jeen Jesus uwempratin chichaman unuiniak pujai Israer-patri úuntri<sup>sha</sup>, Israer-shuara jintinniur<sup>isha</sup>, Israer-shuara úuntri<sup>sha</sup> táarmiayi. <sup>2</sup>Taar Jesusan chicharainiak “¿Yana chichamejají ju túram? ¿Ya ju túratniuncha akuptamkai?” tiarmiayi.

<sup>3</sup>Tutai Jesus tímiayi “Wisha ania<sup>stajrum</sup> tusan wakerajrume. <sup>4</sup>¿Ya Juán<sup>nasha</sup> imiakrattia tusa akupkamia? ¿Yusak? ¿Aentsuk? Turuttiarum” tímiayi.

<sup>5</sup>Tútaisha niisha nuamtak warintiajik mai tunai ajarmiayi. ““Yus akupkaiti” tákurninkia, “¿urukamtai enentáimtuscharum?” turamatjí. <sup>6</sup>Túrasha “aents akupkaiti” tákurnisha ashí aents kayajají tukurmar mantamattaji. Warí “Juan Yúsnan etserniuiti” tuíniatsuk” tiarmiayi. <sup>7</sup>Nuinkia Jesusan áiniak “Iisha nékatsji, Juan imiakratinnia<sup>sha</sup> yátsuk akupkamia” tiarmiayi.

<sup>8</sup>Tutai Jesus tímiayi “Wisha núnisnak winia akuptukua nuna tíchattajrume” tímiayi.

**Pénker-takachu armia nu**

*(Mat. 21.33-44; Mar. 12.1-11)*

<sup>9</sup>Nuyá Jesus ju métek-taku chichamjají aentsun jintintiamiayi:

“Áishman ni ajariin uwa araa amuk, shuaran takartusti tusa ikiukmiai. Tura ninkia wau táchataj tusa jeachat wémai. <sup>10</sup>Tura júuktin tsawant jeamtai juukman akanak jurumkit tusa takarniur<sup>in</sup> takau shuari<sup>in</sup> akuptukmai. Tura takarniur<sup>in</sup>cha katsumkar áyatik awainkiar<sup>mai</sup>. <sup>11</sup>Nuyá nérentin chíkich takarniur<sup>in</sup> akupkamai; tura nunasha núnisan katsekkar, awatiar, sútsuk akupkar<sup>mai</sup>. <sup>12</sup>Nuyá ataksha chikichan akupkamai. Tura nunasha takau shuar katsumkar akupkar<sup>mai</sup>.”

<sup>13</sup>“Nuyá ukunam ajá nérenniur<sup>i</sup> “Itiurkatjak, timiai. Winia aneamu uchirun akupkattajai. Nin wáinkiar shiir enentáimtuschartimpiash” timiai.”

<sup>14</sup>“Túrasha takau shuar nuna wáinkiar, nuamtak chichainiak “Juka ajá nérenniur<sup>i</sup> ajastatui. Maatai. Nuikia aja iiniu átatui” tiar<sup>mai</sup>. <sup>15</sup>Nuna tuíniak ajanmaya jiiiki máawar<sup>mai</sup>.”

Nuyá Jesus aniasmiayi “Wats ¿warí enentáimsarum, ajá nérenniur<sup>i</sup> itiurkattawa? <sup>16</sup>Niisha taa, nu takau shuáran máawartatui. Tura núnkanka chikichan susattawai” tímiayi.

Nuna anturkar “Yus núnaka tsan̄kaskashti” tiarmiayi.

<sup>17</sup>Tura Jesus nin émamkes ísar tímiayi “¿Nuikia Yus-Papinium áarma nu warintuia? Ju áarmaiti:

Kayan pên̄kernak jea jeamin “yajauchiiti” tusar ajapawarmia nu ashí kayajaí nan̄kaamas pên̄ker apujsamuiti. <sup>18</sup>Nu kayan tukumainia nuka kupintrattawai. Tura nu kaya shuarnum iniarka nu shuaran tsai tsai awajsattawai. Tu áarmaiti.

**Pariséu achiktai tusar wakeriarmiania nu**  
(*Mat. 21.45-46; 22.15-22; Mar. 12.12-17*)

<sup>19</sup>Israer-patri uuntri tura Israer-shuara jintinniurisha “nu métek-taku chichamjai in túramji” tu nekaawar nuik<sup>i</sup> Jesusan achikar emetatai tusar wakeriarmiayi. Tura untsurí shuar Jesusan wakeruiniakui, ashamainiak túracharmiayi.

<sup>20</sup>Tura Kapitiánnium suruktai tusar wakeruiniak mamikmau shuaran Jesusan akuptukarmiayi. Nu shuar pên̄ker shuara núnisan̄ jeariar, Jesus nékatsuk yajauch chichakat tusar, aniaštaj tusar wearmiayi. Ni chichakmarijjai uuntnum suruktai tusar túrawarmiayi. <sup>21</sup>Tu enentáimsar tíarmiayi “Uuntá, ame tuke nekas chicham chichaame, nu nékaji. Aents pátatek íyatsme, antsu nekas Yusa jinti jintintiamé.

<sup>22</sup>Wats turuttia, ¿Rúmanmaya uunt akupin ii kuitri akiktin pên̄kerkai? ¿Akiktinkiait? ¿Suritkiatniukait? Nu nekaatai tusar wakeraji” tiarmiayi.

<sup>23</sup>Tura Jesuska ni yajauch enentáimsamurín nekáa chicharainiak, <sup>24</sup>“Kuit itiatarum. ¿Yana yapi tura yana naari juí áarmait?” tímiayi.

Tutai nii tiarmiayi “uunt akupniunu.”

<sup>25</sup>Tutai Jesus tímiayi “uunt akupniunu átinia nu uunt akupin susatarum. Tura Yusna átinia nu, Yus susatarum.”

<sup>26</sup>Aents ántamunam ni chichakmarijjai achiktinian penké tujinkiarmiayi. Antsu aya ímprarmiayi tura takamtak pujusarmiayi.

**Satuséusha achiktai tusar wakeriarmiania nu**  
(*Mat. 22.23-33; Mar. 12.18-27*)

<sup>27</sup>Nuyá Satuséu “jakamunmaya penké nantakchamniaiti” tuinia nu, Jesusan aniaštai tusar tariarmiayi. <sup>28</sup>Aniiniak tiarmiayi “Uuntá, Muisáis juna áartampramijai: “Áishman̄ ni nuarí júreatsain̄ jakamtain̄kia ni yachi nu wajen nuátkatí, yachin̄ yajutmatratsa.” Tu áarmaiti, tiarmiayi.

<sup>29</sup>Wats, siati yachi áрмаi, tiarmiayi. Iwiairi nuwan nuatak yajutmatsuk jakamai. <sup>30</sup>Ni yachi wajen akintiak, nuátak, niisha yajutmatsuk jakamai.

<sup>31</sup>Nuna yachisha núnisan̄ nu wajen nuátkamai; tura núnisan̄ ashí siati nuna pataink<sup>i</sup> nuátkarmai. Yajutmatsuk yajutmatsuk kajinkiarmai. <sup>32</sup>Tura ukunam nuwasha jakamai. <sup>33</sup>Nantaktin tsawantai, nantakiarmatai, ¿yana nuarin̄ ati? Ashí siati nuátkacharmaka” tiarmiayi.

<sup>34</sup>Tutai Jesus tímiayi “Ju nun̄kanman̄ nuatnaikiatin awai. <sup>35</sup>Tura nantakiar atak iwiaaku ámin ainia nuka nuatnaikiachartatui. <sup>36</sup>Warí,

jákashtin áiniatsuk. Nayaimpinmayā suntara áintsan̄ ajasartatui. Tura nantakiaru ásar Yusa uchir̄i ajasartatui. <sup>37</sup>Tura jákaru nantakiartin ainia nuna imia Muisáis jintíamiayi. Warí, numichiniam ji wajái keamunan Yus niijjái chichaamun, Yus-Papinium Muisaiska áarmiayi. Nú áarmanum Uunt Yus Apráama, Isaka tura Jakupu Yúsr̄inti, tímiayi. Nú áishman̄ yaunchu jákaru ain̄ “ni Yúsr̄inti” tímiayi. Nuna taku nantaktin awai tu jintíamiayi. <sup>38</sup>Kame jaka men̄kakatniunam pujuinia nuna Yúsr̄inchuiti. Tuma asamtai jakáa Yúsr̄inti tíchamniaiti. Antsu iwiaaku ainia nuna Yúsr̄inti. Ashi Niiniun iwiaarkainiawai” tímiayi.

<sup>39</sup>Nuna antukar Israer-shuara jintinniur̄i “pén̄ker tame, Uuntá” tiarmiayi.

<sup>40</sup>Tura nuyánka aniastinian arantukarmiayi.

### ¿Kristu tutai yana uchir̄impiait?

(Mat. 22.41-46; Mar. 12.35-37)

<sup>41</sup>Nuyá Jesus tímiayi “Yus anaikiamu Kristu tutaisha, ¿itiura “Aya Tawit weeaiti” tárum? <sup>42</sup>Warí, Sarmu papinium Tawit niñki juna tátsuk: “Uunt winia Úuntrun “Akupin pujutainium Winia untsuuruin̄i pujustá, tímiayi. <sup>43</sup>Ame nemasrumin núpeteatsāin̄ nūi pujustá” tímiayi.” Tú áarmaiti.

<sup>44</sup>Kame Tawitkia, Krístun chicharuk, “winia Úuntur” tāisha, ¿itiurak Kristu tutai Tawitia pampanmar̄i átink̄?” Tú tímiayi Jesus.

### Israer-shuaran jintintin ainia nuyá aneartarum

(Mat. 23.1-36; Mar. 12.38-40; Ruk. 11.37-54)

<sup>45</sup>Ashí aents Nin anturkatasa pujuiniāi ni unuiniamur̄in̄ Jesus juna tímiayi:

<sup>46</sup>“Israer-shuaran jintintin ainia nuyá aneartarum. Niisha esaram pushin entsarar wekasataitsar wakeruiniawai. Tura jintiá ti shiir áujtusarat tusar wakeruiniawai; tura iruntai jēanam pen̄ker̄i pujutainium pujustinian wakeruiniawai. Tura nampernumsha uunt pujutainium pujustaj tusa wakeruiniawai. <sup>47</sup>Túrasha wajē jēencha atantainiawai. Túrawar aents nekaracharat tusar ti esaram chichamj̄aj̄i Yúsan áujainiawai. Nincha chíkichj̄aj̄i nan̄kaamas Yus asutiáwartatui.”

### Waje ni kuítr̄in̄ susamia nu

(Mar. 12.41-44)

**21** <sup>1</sup>Yusa Uunt Jēen kuítr̄intin̄ kuit enketainiam kuítian en̄keenan Jesus wáinkiamiayi. <sup>2</sup>Tura wajē kuítr̄in̄cha jimiarā uchich kuítian, rera áaniun, en̄kean wáinkiamiayi. <sup>3</sup>Wáiniak tímiayi “Nekas tájarne, jū wajē kuítr̄inchaitiat, ashí en̄keena nú nan̄kaamas núkap en̄keayi. <sup>4</sup>Warí, chikichcha ampirma nuna en̄keenawai. Tura niisha aya núchiniak takurmakman ampirmatsuk ashí en̄keayi.”

**Yusa Uunt Jeen saanaktinian Jesus ujakmiania nu**  
(*Mat. 24.1-2; Mar. 13.1-2*)

<sup>5</sup>Yusa Uunt Jeen kaya shírmach armia nuna tura chíkich shírmach susamu armia nunasha chíkich shuar áujmatuk pujuarmiayi. Nuyá Jesus tímiayi:

<sup>6</sup>“Átum yamá shiir wáintrumna nu ashí emesnartatui. Kaya ekentramusha mash yumpuntrartatui” tímiayi.

**Amuukatin tsawantin uruku átata nu nekaatin**  
(*Mat. 24.3-28; Mar. 13.3-23*)

<sup>7</sup>Nuyá Jesusan chichariniak “Uuntá, nusha ¿urutaik túrunat? ¿Kame ju túrunatin jeatemamtaisha warijiajn nekaattaj?” tiarmiayi.

<sup>8</sup>Tutai Jesus tímiayi “Aneartarum; anannawairap. Nekaatarum. Winia náarun pachisar, “wi Krístuitjai” tau ti untsurí jíntrartatui. “Nunka amuukatin jeayi” tu etserkartatui. Tufniakui anturkarum nemariirap.

<sup>9</sup>Tura meset chichamsha, kapitían mesetan nájanmasha antukrum sapijmiakairap. Nusha emka túrunatniuiti. Túrasha nú chichamaik amuukatin tsawant jeashtatui.’

<sup>10</sup>Nuyá tuke chicharuk tímiayi ‘Shuar chíkich nunkanmaya shuarjai mesetnum ti nekas maaniawartatui. <sup>11</sup>Ti uqrkattawai; untsurí nunkanam tsukasha, sunkursha ti átatui. Nayaimpinmasha ti ashammai nánkamas túrunattawai. Nujaj Yus ni kakarmarin iniakmastatui.’

<sup>12</sup>“Tura ju túruntsajn atumin pataaturmakar achirmakartatui. Iruntai jeanmasha makurmartai tusar juramkiartatui. Sepunmasha enketmattarme. Tura winia naar páchia asakrumin, akupniunmasha, úuntnumsha juramkiartatui. <sup>13</sup>Nuinikia atumin túrutmakrumin wi túramu etserkatin arutmattarme. <sup>14-15</sup>Tura atumí nemasri nakitramainiak “wáitaiiti” títinian tujinkiarat tusan, winia nekatairjai chichastinian amastatjarme. Tuma asamtai “Jurakuisha warinia tiniak kíishtumaktaj tusan áetak enentáimsashtatjai” titiarum.’

<sup>16</sup>“Tura imia atumí aparisha surutmakartatui. Atumí yachisha, atumí shuarisha amikrumsha núnisaran surutmakartatui. Tura máamunka máawartatui. <sup>17</sup>Tura Winia ajararu asakrumin ashí aents nakitramprartatui. <sup>18</sup>Tura penké ishichkisha yajauch awajtamsachartatui. <sup>19</sup>Katsuntrarmeka iwiaaku átin wáinkiatarme.’

<sup>20</sup>Ju pepru Jerusarenka aa tanishrijin suntar téntakar matsatu wáinkiumeka, emesratin jeá nekaattarme. <sup>21</sup>Nuikia juí Jutía nunkanam pujuinia nu, náinnium pisartin áiniawai; tura juí Jerusarennum pujuinia nusha juyanka jiinki wétin ainiawai. Tura ajanam pujuinia nusha, péprunam waketkishtin áiniawai. <sup>22</sup>Nu tsawantincha Yús asutiámun wáinkiatatui. Yús-Papinium nu túrunatin yaunchu aarma

nu uminkiatwawai nu tsawantin. <sup>23</sup>Nun<sup>u</sup>kanam ti wáitsatin átatui. Tura ju<sup>u</sup> aents ti asutniawartatui. Tuma asamtai nuwá ajamtin ainia nusha, tura uchi kuírchin takakainia nusha imiá itiurchatan wáinkiertatui. <sup>24</sup>Tura juyá aents mesetnum jákartatui. Tura chikichnaka ashí nun<sup>u</sup>kanam misaawar júkiartatui; tura yajaya apach, Yúsnan enentáimtuiniatsna nu, ju<sup>u</sup> Jerusarénnum wayáwar najakartatui. Nu túratniunka Yus tsan<sup>u</sup>katkana nu<sup>u</sup> túrawartatui.’

### Aents Ajasu tutai tátintri

(*Mat. 24.29-35, 42-44; Mar. 13.24-37*)

<sup>25</sup>‘Nui<sup>u</sup>nkia etsanmasha, nantunmasha, yánmasha Yuska ni kakamarin<sup>u</sup> iniakmak nusháa túrattawai. Nun<sup>u</sup>kanmasha ashí aents páchim enentáimprartatui. Tura nayaantsanam chíchimi ti aku tantáa ajakui ti ashamkartatui. <sup>26</sup>Tura túrunatin ana nuna enentáimsar mayáí ashinkiertatui. Warí, nayaimpiniam kakaram ainia nusha peantrartatui. <sup>27</sup>Nuyá Winia, Aents Ajasu tutain, yuran<sup>u</sup>miniam ti shiir ajasan winiaí wáitkiartatui. <sup>28</sup>Nu túrunatin nánkamkui uwempratin jeatemayi tusarum kaka<sup>u</sup>arum shiir enentáimsatarum.’

<sup>29</sup>Tura ju<sup>u</sup> chichamnasha nekapmamiayi. ‘Ikiu numi tura nánkamas numisha enentáimsatarum. <sup>30</sup>Ju<sup>u</sup> nun<sup>u</sup>kanam ni nuké yama pun<sup>u</sup>kmatai “esat jeatemayi” tátsurmek. <sup>31</sup>Núnisa<sup>u</sup> Wi tájana nu wáinkiu<sup>u</sup>rmeka, Wi ju<sup>u</sup> nun<sup>u</sup>kanam akupin ajastin jeatema nu nekaatarum.’

<sup>32</sup>‘Tura aents yamaí pujuinia nu jáatsa<sup>u</sup>in nusha ashí túrunattawai. Núnaka paant tájarme. <sup>33</sup>Nayaimpisha nun<sup>u</sup>kasha amuukartatui. Tura winia chichampruka amuukachminiaiti. <sup>34-35</sup>Nu tsawant aya aneachma jeattawai. Ashí aents ju<sup>u</sup> nun<sup>u</sup>kanam pujuinia nu, nuna enentáimtsuk pujuiniaí jeattawai. Tuma asamtai atumsha anearum wekasatarum. Yajauchiniam emetnarum, aya yurumátniuk, aya umartiniak enentáimtusurum, ju<sup>u</sup> nun<sup>u</sup>kanam ana nu ti wakerakrumni<sup>u</sup>nkia pé<sup>u</sup>nger enentáimsatin tujinkiatarme. Nu atsutí tusarum tura nu tsawant aya áwaktamkáj<sup>u</sup> tusarum pé<sup>u</sup>nger wekasatarum. <sup>36</sup>Anearum wekasatarum. Túrunattana nu<sup>u</sup> katsunrataj tusarum Yus aujsa pujustarum. Túrarum Aents Ajasu tutai ímmianum pé<sup>u</sup>nger átaj tusarum túratarum.’

<sup>37</sup>Tuke tsawant tsawajsha Yusa Uunt Je<sup>u</sup>en Jesus unuiniamiayi. Tura káshikia Uriwiu náinnium we-wémiayi. <sup>38</sup>Tura tuke tsawant Yusa Uunt Je<sup>u</sup>en Jesus chichaamun anturkatai tusar káshik tariarmiayi.

### Jesus achiktin chichaman jurusarmiania nu

(*Mat. 26.1-5, 14-16; Mar. 14.1-2, 10-11; Juan 11.45-53*)

**22** <sup>1</sup>Wakaprutai en<sup>u</sup>ketaachma tanta yuatin námper, paskua tutai, jeatemamiayi. <sup>2</sup>Israer-shuara Pátrirísha Israer-shuara jintinniurísha áentsun ashamainia ásar, itiurak máawaintiaí<sup>u</sup> tusar ti enentáimsarmiai.

<sup>3</sup>Nuĩnkia Iskariúti Jútasan enentáin íwianch wáintiamiayi. Nú Jútaska Jesusa unuiniamuriin páchitkiauyayi. <sup>4</sup>Israer-patri úuntrin tura Yusa Uunt Jee kapitían pujuarmia nuna werimiayi. Tura Jesusan tu surukminiaiti tusa niijjiaí chichasarmiayi. <sup>5</sup>Niisha nuna antukar warasar “kuit amastatji” Jútasan tiarmiayi. <sup>6</sup>Niisha “ayu” tinia, aents nékachmanum suruktaj tu enentáimsamiayi.

### **Kristu jakamu enentáimtustin námper**

*(Mat. 26.17-29; Mar. 14.12-25; Juan 13.21-30; 1 Kur. 11.23-26)*

<sup>7</sup>Wats, wakaprutai enketaachma tanta yúatin námper jeamiayi. Paskua tutainium murikchin máatin ármiai. <sup>8</sup>Tura Jesus Pitruncha, Juánasha akupeak “Paskua tutai námper iwiaratarum” tímiayi.

<sup>9</sup>Tutai niisha chichainiak “¿Tuí iwiarat tusamea wakeram?” tiarmiayi.

<sup>10</sup>Tutai Jesus juna tímiayi “Péprunam wetarum. Jearum áishman yumin takaku wekáa wáinkiatarme. Nú áishman nemarsatarum. Tura jeá wayaakui, <sup>11</sup>nú jeá nérenniuri chichareakrum “Uunt chichartamuk unuiniamurjai paskua yurumátin ¿tuí aa? turamui” titiarum, tímiayi. <sup>12</sup>Tákurmin nu nérentin yakí písunam uunt kuártun ashí iwiamun iniakturmastatrum. Nuí ii yurumátin iwiaratarum” tímiayi.

<sup>13</sup>Tutai niisha wear Jesus tímiania tímiatrusan wáinkiarmai. Tura paskua namperan nuí iwiararmiayi.

<sup>14</sup>Yurumátin jeamtai ni unuiniamurijjiaí Jesus misanam pujusarmiayi. <sup>15</sup>Pujusarmatai, Jesus chichaak “Wisha játsuk atumjai ju paskua najanatniun ti wakerimjai, <sup>16</sup>atakka ju nunkanam atumjai najanashtin asan. Tura antsu Yus akupeana nuí jear atak najanattaji” tímiayi.

<sup>17</sup>Nuyá pininikian achik, Yúsan yuminkias, ni unuiniamurin tímiayi “Ju pinin achikrum sunaisatarum. <sup>18</sup>Atakka ju nunkanam uwa yumirin atumjai umarchattajai, tajarme. Tura antsu Yus akupin ajastin jeamtai atak iijjiaí umartatji” tímiayi.

<sup>19</sup>Nuyasha yurumkan achik, Yúsan yuminkias puuk susarmiayi. Tura chicharainiak “Juka winia ayashruiti. Winia ayashur atum pénger pujustinnium surunkattana núiti. Winia enentáimtursarum yuatarum” tímiayi.

<sup>20</sup>Tura yurumsua amikiarmatai pininikian achik, “Ju pinin winia numparun nakumea asa uwempratin yamaram chicham najanamun nakumeawai. Winia numpar atumnian puartamprattawai” tímiayi.

<sup>21</sup>Túrasha winia surutkattana nu Wijjiaí métek ju misanam pujawai. <sup>22</sup>Kame Wi, Aents Ajasuitjana ju, Yus iwiamua nútiksanak jakattajai. Túrasha Winia surutkana nu nekaatí. Ti asutniattawai” tímiayi. <sup>23</sup>Nuna antukar “Wíashitaj, yákit” tunaim ajarmiayi.

### **Nañkaamantu ana nu**

<sup>24</sup>“¿Iijjiaí yaki imiá nañkaamantu aint?” tunaim ajarmiayi. <sup>25</sup>Tura Jesus tímiayi “Ju nunkanam akupin ainia nu, waantu enentáimtumasar

akupenawai. Tura akupenakui “pénker túrin áiniawai” tuñiawai.

<sup>26</sup>Tura atumjainkia nuka atsutí. Antsu nankaamantu ana nu, uchichia núnik ajastiniaiti; akupeana nusha takarniua núnik ajastiniaiti.

<sup>27</sup>Enentáimsatarum. Misanam pujus yurumna nu, yurumkan ajamana nujai çtuá imiá nekas nankaamantuit? çYurumna nu nekas nankaamantuchukait? Tura Wisha atumin yurumkan ajamna núnisnak pujajai.’

<sup>28</sup>‘Winia itiurchatrun wáinmiaj nuí atumsha Wijiai tuke pujumarme. <sup>29</sup>Tuma asakrumin akupin ajastinian winia Apar surusu asamtai Wisha nútiksanak akupkatniun súajrume. Wi akupkatjana nuí atumsha Wijiai yurumáttarme, tura Wijiai umartatrume, tájarme. <sup>30</sup>Tura akupin pujutainium pujusrum, Israer-shuar tuse írutkamu akupkattarme tajai.” Tu tímiayi.

**Pítiur “atsá nékatsjai” títinian Jesus ujakmiania nu**  
(*Mat. 26.31-35; Mar. 14.27-31; Juan 13.36-38*)

<sup>31</sup>Nuyá Uunt Jesus tímiayi, “Nekaatá, Semunká. Trikiu neré tsatsamátñiua áintsan Satanás atumi enentáin páchim enentáimtikrampratáj tusa seayi.

<sup>32</sup>Tuma ain Yus enentáimtustinian kajinmatkiin tusan Wisha Yúsán seamjai. Tura Yúsnum waketkim ame yatsum ikiakárarta” tímiayi.

<sup>33</sup>Tutai Semun tímiayi “Uuntá, sepunam enketmainiakuisha wisha nemarsatajme. Tura mantamainiakuisha métek jakatjai” tímiayi.

<sup>34</sup>Tutai Jesus tímiayi “Pitrú, nekas tájame, yamaik atash shiniatsain ame menaintiú natsantrurtatme” tímiayi.

**Itiurchat winiawai**

<sup>35</sup>Nuyá Jesus tímiayi “Wisha yurumkajainchu, kuítjainchu, sapatjainchu akupkamjarmena nuí çtáatramsamkarum?”

Niisha “Atsá penké táatramsachmaji” tiarmiayi.

<sup>36</sup>Tutai Nii tímiayi “Antsu yamaikia yurumkan takakkunka takustí, kuítñiasha núnisan; tura puniancha takakchakka ni pushirín suruk punian sumakti. <sup>37</sup>Nekaatarum. Yus-Papinium yaunchu aarma ana nu wi túrunamujai uminkiatstawai. Juíti aarma:

Yajauch shuarnum pachikiarmiayi.

Warí, Yus-Papinium ashí Winia aarma ana nu uminkiatñiuiti.”

<sup>38</sup>Tutai ni unuiniamurí tiarmiayi “Uuntá, juí jimiará puniá awai.”

Tutai Niisha “Asati” tímiayi.

**Jitsemaní ajanam Jesus Yúsán áujsamiania nu**  
(*Mat. 26.36-46; Mar. 14.32-42*)

<sup>39</sup>Nuyá Jesus jíinkimiayi. Tura tuke túrin asa Uriwiu náinnium wémiayi. Ni unuiniamurísha nemariarmiayi.



40 Aḷ jeá nin chicharuk “Itiurchat winiakui iniaraj̄i tusarum Yus áuj̄satarum” tímiayi. 41 Tuasua amik arantach, kaya nankimiam jeana núnik Jesus wémiayi. Tura Yúsán áuj̄sataj̄ tusa tikishmarmiyai. 42 Tikishmar j̄una tímiayi “Apawá, piniñnum yapá umartinia ántsan̄ Wi wáitsattaj̄na nu wakerakmeka jurutkitia. Tura Wi wakeraj̄na nucha antsu Ame wakeramna nu atí, tajai” tímiayi.

43 Nuyá, ikiakártaj̄ tusa Yusa suntarī nayaimpinmayā tarimiyai. 44 Tura Jesus imiá wáitias pujak nú kakaram Yúsán áuj̄samiayi. Tura ni sēarmarīsha numpá ántsan̄ nunká kitiawarmiyai.

45 Yúsán aujsua amik wajaki ni unuiniamur̄in werimiyai. Tura kúntuts enentáimmarīj̄iāi ti pimpiki kanúu tepenan tarimiyai. 46 Nuñkia chicharainiak “¿Urukamtai kanúu teparum? Itiurchat winiakui iniaraj̄i tusarum nantakrum Yus áuj̄satarum’ tímiayi.

#### **Jesusan achikiarmiania nu**

*(Mat. 26.47-56; Mar. 14.43-50; Juan̄ 18.2-11)*

47 Jesus tuke chichaa pujai, untsur̄i shuar táarmiyai. Tura nuní eemka Jesusa unuiniamur̄i Jútas naartin winimiyai. Tura Jesusan mukunataj̄tsa tarunmiayi. 48 Támatai Jesus chicharuk “Jútasá, ¿Aents Ajasu tutai mukunamek surutkattam?” tímiayi.

49 Jesusj̄ai pujuarmia nu, túmamun wáinkiar “¿Uunt puniaj̄aī j̄juartatjik?” tiarmiyai. 50 Tura chikichik Patri uuntrī takarniur̄i kuish̄in untsuur̄in tsupirkamiayi.

51 Tura Jesus tímiayi “Iniaisatarum.” Nuna tinia ni kuish̄in antin̄ tsuármiayi. 52 Nuyá Israer-patri úuntrīn, Yus-jeá úuntrīncha, tura pepru úuntrīncha, Nin achiktaj̄ tusa tariarmia nuna chicharuk “¿Wisha kasakaitiaj̄. Urukamtai puniaj̄āisha numij̄iāisha tarutniuram? 53 Nuik Yusa Uunt Jeen̄ tuke tsawant atumj̄aī pujumaj̄ nuí achirkachmarme. Túrasha átum kiritniumiā kakarmaj̄aī nupetkatin yamáí tsawantin tsan̄katkamuitrume” tímiayi Jesus.

#### **Pítur “Jesunaka nékatsjai” tímiania nu**

*(Mat. 26.57-58, 69-75; Mar. 14.53-54, 66-72; Juan̄ 18.12-18, 25-27)*

54 Nuñkia Jesusan achikiar emetawar Israer-patri uuntrī jeen̄ júkiarmiyai. Tura Pítrusha íkian̄ nemarki wémiayi. 55 Tura aach̄ j̄inia ikiapárarmiyai. Túrawar anamuk pujuarmiyai. Pítrusha nij̄iāī pujusmiayi. 56 Tura nuwá, Patrī takarniur̄i amia nu, Pítur j̄inia anamuk pujan wáiniak “Jú áishmansha Nij̄iāī pujumiayi” tímiayi.

57 Tutai Pítur chichaak “Nuwá, Nin nékatsjai” tímiayi.

58 Tura árusan̄ chíkich̄ nin wáiniak “Amesha Niñ̄in̄ páchitkaiatme” tímiayi.

Tutai Pítur tímiayi “Atsá. Wikia áñkia páchitkiatsjai” tímiayi.

<sup>59</sup>Chikichik ura nan<sub>ka</sub>asmatai chíkich apach chichaak “Nekas ju áishman<sub>sha</sub> Nijia<sub>i</sub> pujumiayi. Warí, niisha Kariréanmayan<sub>ch</sub>akait” tímiayi.

<sup>60</sup>Tutai Pítiur chichaak “Ame támena núnaka nékatsjai” tímiayi. Nú chichamaik Pítiur chicháa pujain<sub>k</sub><sup>i</sup> atash shiniukmiayi. <sup>61</sup>Tura nuin<sub>ka</sub> Uunt Jesus Pítrun apajas ísmiayi. Túra “atah shiniatsain<sub>n</sub> ame menaintiu natsantrurtatme” Uunt Jesus timia nuna enentáimpramiayi. <sup>62</sup>Nuyá Pítiur jiinki ti úutmiayi.

**Jesusan wishikrarmiayi**  
(*Mat. 26.67-68; Mar. 14.65*)

<sup>63</sup>Áishman<sub>n</sub> Jesusan wáiniarmiania nu ti wishikiainiak awattiar<sub>mi</sub>ayi. <sup>64</sup>Jiin epetkar yapiniam awattiar chicharainiak “Nekamata, ya awatama” tiarmiayi. <sup>65</sup>Tura katsekainiak ti untsur<sub>i</sub> chikichnasha nan<sub>ka</sub>mas tiarmiayi.

**Uunt Iruntainiam Jesusan ejeniarmiania nu**  
(*Mat. 26.59-66; Mar. 14.55-64; Juan 18.19-24*)

<sup>66</sup>Tsawarmatai, Israer-shuara úuntr<sub>isha</sub>, Israer-patri úuntr<sub>isha</sub>, Israer-shuara jintinniur<sub>isha</sub> iruntrar ni iruntair<sub>in</sub> ejeniarmiayi. Nu<sub>i</sub> chicharainiak <sup>67</sup>“Paant titiá. ¿Yus anaikiamu Kristu tutaia núkaitiam?” tiarmiayi.

Tutai Jesus tímiayi “Wi “ee” tákuisha, “nekasaiti” tíchattarme. <sup>68</sup>Tura Wi aníamsha áirkashtatrumé, túrasha akuptukchattarme. <sup>69</sup>Tura wárik Wisha Aents Ajasuitjiana nu, ashí nan<sub>ka</sub>amaku ajasan, Yusa untsuur<sub>in</sub>i pujustatjai” tímiayi.

<sup>70</sup>Tutai niisha tiarmiayi “¿Nuin<sub>ka</sub> amesha Yusa Uchir<sub>in</sub>kaitiam?”

Tutai Jesus tímiayi “Ee, Wíitjai, átum Winia túrutrum núnisnak.”

<sup>71</sup>Tutai niisha tiarmiayi “Warí, ¿iisha chíkich ujatkat tusar atsumajik? Imia nin<sub>ki</sub> chichaamu antukchajik” tiarmiayi.

**Piratu<sub>i</sub> Jesusan júkiarmiania nu**  
(*Mat. 27.1-2, 11-14; Mar. 15.1-5; Juan 18.28-38*)

**23** <sup>1</sup>Nuyá ashí Uunt iruntrarmia nu wajatkiar Rúmanmaya<sub>a</sub> akupin Piratu<sub>i</sub> Jesusan júkiarmiayi. <sup>2</sup>Nu<sub>i</sub> jeawar, Piratun chicharainiak “Ju áishman<sub>n</sub> íi shuaran awajimtikiar enentáimtikiania nu nekaamji. Rúmanmaya<sub>a</sub> uunt akupin Sésaran kuit akiktinian suritramaji. Tura nu arant Nin<sub>ki</sub>, akupin Kristu tutaintjai, tawai” tiarmiayi.

<sup>3</sup>Tutai Piratu Jesusan chicharuk “¿Ame Israer-shuara akupniur<sub>in</sub>káitiam?” tímiayi.

Tutai Jesus tímiayi “Ee, núitjai, ame támena núnisnak.”

<sup>4</sup>Nuyá Israer-patri úuntr<sub>in</sub>cha tura aents nu<sub>i</sub> iruntrarmia nunasha Piratu chicharainiak “Ju áishman<sub>n</sub> tunaan túran pen<sub>ké</sub> wáinkichuitjai, tajai” tímiayi.

<sup>5</sup>Túrasha niisha nú kakantar chicharainiak “Antsu nekas ashí Jutía nunñkanmaya aentsun ni unuiniana nujai akajenawai. Kariréa nunñkanmaya nanñkaamas ímiajaisha tayi” tímiayi.

<sup>6</sup>Piratusha nuna antuk “Nu áishman ¿Kariréanmayanñkái?” tímiayi.

<sup>7</sup>“Ee” tuiniakui, Erutisan akuptukarmiayi. Erutiska Kariréanmaya aentsun akupniuyayi. Túmaitiat nu tsawantin Jerusarénum ishichik tsawant pujusmiayi.

<sup>8</sup>Erutiska Jesusan ístaj tusa ti wakerimiayi. Jesusa túramurin áujmatman ti antukmiayi. Tuma asa, “Wi ímiai aents tujintiamun túrashtimpiash” tusa Jesusan wáiniak warasmiayi. <sup>9</sup>Jesusan ti nukap aniasmiayi; túramsha penké áimkiachmiayi. <sup>10</sup>Nuisha Israer-patri úuntrisha, tura Israer-shuara jintinniurisha yajauchiiti tusar charaatum awajarmiayi. <sup>11</sup>Tura Erutissha ni suntaríjiaí Jesusan yajauch enentáimtuiniak Nin wishikiainiak ti penker pushin, akupniu entsatairíya ánniun, áentsrarmiayi. Nuyasha Erutis ataksha Piratufin akupkamiayi. <sup>12</sup>Túram nu tsawant Piratu Erutisjiaí nawamnaikiarmiayi. Kame yáunchuka nemasnaikiau ármiai.

**Jesusan “mantamnati” tiarmiania nu**  
(*Mat. 27.15-26; Mar. 15.6-15; Juan 18.39–19.16*)

<sup>13</sup>Nuyá Israer-patri úuntrin aentsu úuntrijiaí tura penké aentsjiaí Piratu ikiaanak tímiayi <sup>14</sup>“Ju áishman aentsu awajimtikuii tusarum itiartintrume. Túrasha átum ímprumnin anintran yajauch átum tárugna nuna penké nekarachjai. <sup>15</sup>Erutissha núnisan yajauchin nekaachai. Warí, juí awainkichmaka. Nuikia páantchakait jú aishman jakamnia tunaanka túrichuiti” tímiayi.

<sup>16-17</sup>Túraitiat tuke túrutai asamtai, jísat jeakui sepunmaya chikichík áishmanñkan Piratu anñkant akupkatin ámiayi. Tuma asamtai, nii chichaak “juna asutián awematjai” tímiayi.

<sup>18</sup>Tura aencha iruntrar ti unsumainiak “Atsá; júcha. Ju nakitiaji. Antsu Parapás akupkata” tiarmiayi. <sup>19</sup>Nu Parapássha akupniun nakitiak mesetan najana asa tura manñkartin asa sepunam enkeamuyayi.

<sup>20</sup>Piratuka Jesusan akupkattsa wakerak ataksha aentsun áujsarmiayi. <sup>21</sup>Túrasha nú arant unsumainiak “Atsá. Krúsnum mantamnati” tiarmiayi.

<sup>22</sup>Tura ataksha Piratu chicharainiak “¿Urukamtai. Warí tunaan túrait? Jakamnia tunaan túrachias tusan, aniasan penké nekarachjai. Asutián akupkatjai” tímiayi.

<sup>23</sup>Tura niisha kakaram unsumainiak “Jesus mantamnati” tiarmiayi. Kame aencha tura Patri úuntrisha ti unsumaina ásarmatai ni wakeramuri tsanñkatnakarmiayi. <sup>24</sup>Nii wakeriarmia nuna Piratu “túrattajai” tímiayi. <sup>25</sup>Tuma asa Parapásan, mesetan najanin tura

maṅkartin amia nuna akupkamiayi. Tura Jesusnaka ni wakeramun túrawarti tusa íktusarmiayi.

**Jesusan krúsnum ajintrurarmiania nu**  
(*Mat. 27.32-44; Mar. 15.21-32; Juan 19.17-27*)

<sup>26</sup>Jesusan jukitiasa pujuiniaí Serini nuṅkanmaya Semun ni pépruriya Jerusarénum yama jeamiayi. Nin achikiar, Jesusa krusrí ayantkar “ni ukurí wetá” tiarmiayi.

<sup>27</sup>Untsurí aents Jesusan nemariarmiayi. Tura untsurí nuwasha ti kuntuts enentáimiainiak útkiar tura wa-wa ajakiar wearmiayi. <sup>28</sup>Túmainiakui Jesus nin iis, “Jerusarénumiá nuwaṭiram Winia enentáimtursarum úttiirap. Antsu atumniak tura atumí uchirí enentáimtusrum úttiarum. <sup>29</sup>Warí, ti iturchat tsawant jeawartatui. Tuma asamtai “Uchirtichu ainia nu, ajaprukchana nu tura amuntsachu ainia nu, chíkich aentsjái naṅkaamas péṅker pujuiniawai” tiartatui. <sup>30</sup>Nu tsawantai aents chicharainiak “Náint in nekentmak yuturmaartai” tiartatui. <sup>31</sup>Warí, numi sameka áinis yajauch aya náṅkamna aṅsha ju iturchat átsuk. Tura numi kukaru ainkiamtai iturak nú yajauch túrunachat<sup>1</sup>.” Tu timiayi Jesus.

<sup>32</sup>Tura Jesusjái krúsnum maatai tusar jímiar yajauch áishmaṅkan júkiarmiayi. <sup>33</sup>Karawír nain tutainium jeawar Jesusan krúsnum ajintrurarmiayi. Tura Jesusa untsuuriní chikichík yajauch áishmaṅkan tura ni menaarini chíkich yajauch áishmaṅkan núnisan krúsnum ajintrurarmiayi.

<sup>34</sup>Tura Jesus krúsnum ajintraku pujuram, chichaak “Apawá, tsanṅkurarta. Nii áitkiainia nuna nékainiatsui” tímiayi.

Tura suntar pujuarmiania nu, yaki Jesusa pushirí jukit tusar nakurusarmiayi. <sup>35</sup>Péprunmaya aents ii wajatiarmiayi. Tura uunt armia nusha Nin wishikiainiak “Chikichnaka uwemtikniuiti. Wats, yamáí nekas Yusa anaikiamurí Kristu tútainkiunka imia Nínki uwémpratí” tiarmiayi.

<sup>36</sup>Suntarsha Nin wishikrarmiayi. Tariat churuńnian aartai tusar awajiararmiayi. <sup>37</sup>Tura chicharainiak “Amesha nekas Israer-shuara uunt akupniurinkiumka amek uwemprata” tiarmiayi. <sup>38</sup>Tura muuknumaani, Kriaku chichamjai, Rúmanmaya apach chichamjaisha tura Israer chichamjaisha ju árar anujkamu ámiayi: *JÚITI ISRAER-SHUARA UUNT AKUPIN*

<sup>39</sup>Chikichík yajauch áishman nuj ajintruamu amia nu kátsekeak chicharuk “Amesha nekas Yusa anaikiamurintkiumka amek uwemprata tura incha uwemtikramprata” tímiayi. <sup>40</sup>Tura chíkich ni tsaniakmarin kakantar chicharuk “¿Amesha Nijijai métek asutniátasa pujayatam, Yus ashamatsmek? tímiayi. <sup>41</sup>Iikia yajauch asar wáitsatniuitji; ii tunaari akikmakur wáitaijai. Antsu ju áishmanka yajauchin túrichuiti” tímiayi.

<sup>42</sup>Nuyá Jesusan chicharuk “Amesha akupin ajasam winiasha enentáimtursata” tímiayi.

<sup>43</sup>Tutai Jesus chicharuk “Nekas tájame, jakar shiir pujutainium yamáí tsawant Wijiaí pujustatme” tímiayi.

#### Jesusa jakamuri

(*Mat. 27.45-56; Mar. 15.33-41; Juan 19.28-30*)

<sup>44</sup>Tutupin ai ashí nunkanam ti kirit ajasmiayi. Tura menaintiú ura nankaamasu ain, nantu nunkaach ajassha tuke kirit ámiayi. <sup>45</sup>Tsawái nantusha mushatmarmiayi. Tura Jerusarénum Yusa Uunt Jeencha tarach ajamu aa jímiapetek nakaakamiayi. <sup>46</sup>Nuyá Jesus untsumuk “Apawá, winia wakantrun Amiin ikiuajai” tímiayi. Nuna tinia jakamiayi.

<sup>47</sup>Suntara kapitiantri nu túrunamun wániak, Yusa náarin shiir awajeak “Jusha imiá nekas péñker áishmankuyi” tímiayi.

<sup>48</sup>Tura untsurí aents pujuarmia nu, nu túrunamun wáinkiar ti kuntuts enentáimiainiak ni netsepen paat awatiar waketkiarmiayi. <sup>49</sup>Tura Jesusa amikrisha tura nuwá Kariréanmaya Nin nemariarmia nusha íkian wajasar ii wajarmiayi.

#### Jesusan iwiarsarmiania nu

(*Mat. 27.57-61; Mar. 15.42-47; Juan 19.38-42*)

<sup>50</sup>Naka enentáimin péñker áishman ámiayi ni naari Jusé. Arimatéa pepru Jutía núnkanam ana nuyauyayi. Israer-shuara Uunt Iruntairin páchitkiauyayi. <sup>51</sup>Yus ju nunkanam akupin ajasat tusa Jusé nakas pujumiayi. Tuma asa Uunt Iruntainium Jesusan túrawarmia nuna nakitmiayi. <sup>52</sup>Tuma asamtai Piratuí we Jesusa ayashin seamiayi. <sup>53</sup>Piratu “ayu” takui, Jesusa ayashin krúsnumia jusa tarachjai penuar kaya táurmanum iwiarsamiayi. Nu táurmanum chíkich iwiarsachmauyayi. <sup>54</sup>Iwiaratin tsawantai, ayampratin tsawant tsawastatuk ajasmatai túrunamiayi.

<sup>55</sup>Tura nuwá Kariréanmaya jukiniutak Jesusan nemarsarmia nusha iwiarsamunam weriar, Jesusa ayashi itiur ikiusmait nuna iisarmiayi. <sup>56</sup>Iisar ikiuak ni jeen waketkiarmiayi. Tura Jesusa ayashi mejeenin tusar kunkuinian iwiararmiayi. Tura ayampratin tsawantai, Israer-shuar akupkamun umikiar ayamprarmiayi.

#### Jesús nantakmiania nu

(*Mat. 28.1-10; Mar. 16.1-8; Juan 20.1-10*)

**24** <sup>1</sup>Tumintin káshik kunkuinian iwiamun júkiar nu nuwá Jesus iwiarsamunam weriarmiayi. Tura chíkich nuwasha atampriarmiayi. <sup>2</sup>Tura iwiamu kaya atutkamu urani aan wáinkiararmiayi. <sup>3</sup>Tura wayawar uunt Jesusa ayashin wáinkiacharmiayi.

4Wáinkiachu ásar ashamkarmiyai. Tura “itiurkatjik” tiarmiayi. Tumaj̄ jimiará áishmaṅkan pushin wincharpatniun entsaru nin ayaamach wajainian wáinkarmiayi. 5Nuna wáinkiar ti sapijmiainiak tsuntsumawarmiyai. Túmakui nu áishmaṅ chicharainiak “¿Iwiaakusha urukamtaí jakaanumsha earum? tiarmiayi. 6Juí pujatsui. Antsu nantakni. Nékatsrumek. Niisha Kariréanam tuke pujus 7“Wi, Aents Ajasuitjiana nu, yajauch aentsnum surunkattajai. Túran krúsnum mantamnattajai. Tura menaintiú tsawantaj̄ nantaktiatjaj̄” turamchamkarum” tímiayi.

8Nuna takui Jesus timian enentáimprarmiyai. 9Tura iwiansamunmaya waketki taar, Jesusa unuiniamur̄in auntse armia nuna tura chikichnasha ashí nu túrunamun ujakarmiayi. 10Jesusa unuiniamur̄in ujakarmia nu ju ániawai: Maktaranmaya Marí, Juánasha, Jakupu nukurí Marisha, tura chíkich nuwajaj̄. 11Tura Jesusa unuiniamur̄isha nuwá tuñiakusha nekasaiti tu enentáimtsuk “wáuruk tuñiawai” tiarmiayi.

12Túrasha Pítrusha jiinki Jesus iwiansamunam tsékeṅki werimiyai. Jeá, inít iis, aya tárachik tepenan wáinkiamiyai. Tura túrunamia nuna ti enentáimiar ni jeṅen waketkimiyai.

**Emaús wetaj̄ jíntianmaani túrunamia nu**  
(Mar. 16.12-13)

13Nu tsawantaik̄ Jesusa nemarniur̄i jímjar Emaús péprunam wéarmiayi. Emaúska Jerusaréṅnumiá auntse kirumitru jeá pujawai. 14Túrunamia nuna chichaki wearmiayi. 15“Itiurkit” tu aujmatki weenaj̄ imia Jesus taa nuj̄ páchiniak niijjaj̄ wearmiayi. 16Tura wáinkiarit nekaashtin asamtaí yait nekaacharmiyai.

17We-wénakua Jesus chicharainiak “Jintiasha ¿warí áujmatkirum wéarum? ¿Urukamtaí kúntuts enentáimprum?” tímiayi.

18Chikichik, Kreupas náartin chicharuk “Jerusaréṅnum túruna nuna ashí nékainiawai. ¿Ámeke amekék túrunamia nu nékachu páchitkiam?” tímiayi.

19Tutaj̄ Jesus tímiayi “¿Warí urukait?”

Tutaj̄ tiarmiayi “Entá, Nasaréṅnumiá Jesusa túrunamur̄i taji. Niisha Yúsnan etserin asa Yusa kakarmar̄ijjaj̄ chichasmiyai tura nuna kakarmar̄ijjaj̄ takasmiyai. Núnaka ashí aents nékainiawai. 20Tura ii Pátriri uuntri tura ii péprur̄i uuntri “tunáa jakamnia túrayi” tusar “krúsnum mantamnati” tiarmiayi. 21Tura ii Israer-aentstin uwemtikrampratin tu enentáimsam̄ji. Tura ni maamusha menaintiú tsawant nan̄kaamasai. 22-23Túrasha ii nuwá ni iwiansamunam yamaí káshik weriar ni ayashin wáinkiacharm̄ai. Tura “Yusa suntar̄i wáinkiaji tura “Jesus iwiaakuiti” túramji” tiarm̄ai. Nuna tu ujatmakakrin ti enentáimpraji. 24Nuyá íi shuar iwiansamun weriar, nuwá tiarm̄ia tímiatrusan̄ wáinkarmiayi. Tura Jesusnaka wáinkiacharm̄ai.” Tu ujakarm̄ai Jesusan.

25 Nuyá Jesus nin chicharainiak “Enentáimchaitrume. Ashí Yúsnan etserin tiarmia nu wau enentáimtatsrume. 26 ¿Yusa anaikiamurí, Kristu tutai, shiir awajnatasuk ti wáitsashtinkiait?” tímiayi.

27 Tura nuyá Yús-Papinium Muisáis aarmia nuyá jukin ashí Yúsnan etserin ni túrunatniurín áararmia nuna jintintiatasa nan̄kamamiayi.

28 Ayu, nii wearmia nú peprunam jeawarmiayi. Tura Jesuska nuí nan̄kaamaki wétaj tau ajamiayi. 29 Tura niisha chicharainiak “Weep. Iijjaj pujustá. Warí, nantu akaikiyi, kirit ajatemsai” tiarmiayi.

Tutai Jesus niijjaj pujustaj tusa wayamiayi. 30 Tura niijjaj irunar misanam pujus, yurumkan achik, Yúsán yuminkias nincha puuk súsarmiayi. 31 Nu chichamaik, ni jji uranniuá núnikiarmatai Jesusan nekaawarmiayi. Tura Niisha nú chichamaik men̄kakamiayi. 32 Tura nu shuarsha mai tunai ajainiak “Jintia winis Niisha Yús-Papin jintintramuk nekas ii enentáin shiir enentáimtikramprachmakaj” tiarmiayi.

33 Nuyá, Emaúsnumiá wárik jíinkiar Jerusarénum waketkiarmiayi. Nuí Jesusa unuiniamurín auntse armia nuna tura chíkich shuar Jesusan nemariarmia nunasha iruntrar pujuinian wáinkiarimiayi. 34 Auntse armia nusha tiarmiayi “Uunt Jesus nekas nantakni. Semun̄ Nin wáinkiaiti.”

35 Tutai niisha jintiá túrunamun ujakarmiayi. “Jesus yurumkan ajaamakui nuí nekaamji” tiarmiayi.

**Ni unuiniamurín Jesus wantintiukmiania nu**  
(*Mat. 28.16-20; Mar. 16.14-18; Juan 20.19-23*)

36 Nuna áujmatuk pujuiniaí Jesus aya aneachma ajapén wajas “Shiir enentáimsatarum” tímiayi.

37 Nuna antukar, ti sapijmiakar, wakanchashit, enentáimsarmiayi.

38 Tura Jesus chicharainiak “¿Urukamtai sapijmiakrum wakanchashit, tu enentáimsarum? 39 Winia uwejrusha, nawersha írtustarum. Wíkiitjai. Takarsa írsatarum. Warí, wakancha ayashtinkiait, ukunchtinkiait” tímiayi.

40 Nuna tinia ni uwejéncha nawéncha iniaktusarmiayi. 41 Warainiyat sapijmiainia ásar, Niimpiashit tu enentáimtusarmiayi. Tuma asamtai, nin chicharainiak “¿yurumak takakrumek?” tímiayi. 42 Takui, namaknasha, míshkincha súsarmiayi. 43 Tura Jesus nuna achik niisha íimiainiamunman̄ yuamiayi. 44 Tura nin tiarmiayi “Winia túrutawarma nuna, Wi atumjaj nuik pujusan tímiajrume. Nekas uminkiatniuyayi. Iis, wi túrunatniurun Muisáis aarmia nusha, Yúsnan etserin aarmia nusha, tura Sarmu papinium aarma ana nusha ashí uminkiatniuyayi” tímiayi.

45 Nuyá Yús-Papinium aarman jintintiwarmiayi. 46 Jintintiuk juna tímiayi: “Yusa anaikiamurí Kristu tutai jaka menaintiú tsawantaj jakamunmayá nantaktinia nu yáunchuk áarmauyayi. Tura Wi nú Krístuchukaitiaj. 47 Winia náarun pachisar, Jerusarénumiá nan̄kama

ashí nuṅkanam nu chicham etsernaktinia nu áarmauyayi. Shuar ni tunaari tsankurnarat tusar enentáin yapajíatniuiti. Tura tu etserkatniua nusha yaunchu áarmauyayi. <sup>48</sup>Tura wi túrunamu neka asarum etserkatniuitrume, tímiayi. <sup>49</sup>Tura winia Apar, winia Wakantrun susartatjai, turammarumna nuna akuptuktatjarne. Tura nayaimpinmaya táatsain jui Jerusarén péprunam pujústárum. Taa ni kakarmarin suramsattarme.” Tu tímiayi.

**Jesus nayaimpiniam wakamiania nu**  
*(Mar. 16.19-20)*

<sup>50</sup>Nuyá Jesus Jerusarén péprunmaya júkiar Petania péprunam ejeniarmiayi. Tura nuṅ ni uweje takuí, “Yus yáinmakarti” tímiayi. <sup>51</sup>Nuna tu pujus, niya kanakmiayi. Tura nayaimpiniam junakmiayi. <sup>52</sup>Ni unuiniamurisha Nin imiá shiir enentáimtusarmiayi. Tura nuyá ti warasar Jerusarénnum waketkiarmiayi. <sup>53</sup>Tura Yusa Uunt Jeen pujusar Yusa náarin shiir awajú pujuarmiayi. Áukete.



# Yúsan Shiir Chichamen

## JUA

### aarmia nu

---

#### Chícham aents ajasmiania nu

**1** <sup>1</sup>Ashí nan<sub>nk</sub>amamia nú yaunchu Yusa Uchirí tuke pujuyayi. Niisha Yúsan ti paant awajeakui, Chícham t<sub>í</sub>miniaiti. Chichamsha Yusj<sub>ai</sub> pujuyayi. Chichamsha Yúsauyayi. <sup>2</sup>Yáman<sub>nk</sub>amtaik Niisha pujuyayi Yusj<sub>ai</sub>. <sup>3</sup>Ashí najanamu ainia nu Niij<sub>ia</sub> najanamuiti. Nii najanachmaka penké atsawai. <sup>4</sup>Niisha iwiaaku átinia nérenniuti. Nu iwiaaku atincha tsáapninia áinis Yusna ana nuna ashí shuaran paant nekamtikiamniaiti. <sup>5</sup>Nu tsáapnin kiritniunam tsáapniawai. Tura kiritniusha tsáapninian ikiajniaktinian tujinkiaiti.

<sup>6</sup>Áishman<sub>ñ</sub> ámiayi, Yus akupkamu, ni naari Juan. <sup>7</sup>Niisha tsáapnin chichaman etserkatajtsa támiayi. Nuna étseruk ashí umirkarat tusa támiayi. <sup>8</sup>Juan<sub>ñ</sub>sha nu tsáapnincha uyayi. Áyatik akupkamuyayi tsáapnin chichaman etserkat tusa. <sup>9</sup>Nu tsáapninkia nekas tsaapniniaiti. Ju nun<sub>nk</sub>anam taa ashí shuaran enentáin tsáapniartiniaiti.

<sup>10</sup>Chichamsha taramiayi ju nun<sub>nk</sub>anam. Tura nun<sub>nk</sub>kasha ni najanamu ain, nun<sub>nk</sub>kayá aents Nin nekaacharmiayi. <sup>11</sup>Támiayi ni nun<sub>nk</sub>én tura ni shuarsha ni enentáin itiaacharmiayi. <sup>12</sup>Tuma ain chíkich shuar Nin enentáimtuiniak ni enentáin itiaawarua nuna Yusa uchirí ajastinian Yus tsan<sub>nk</sub>atkamiayi. <sup>13</sup>Niisha Yusa uchirí ajaras ataksha númpentin ayashímkiacharmai. Áentsnúmiá akiiniachu áiniawai niisha. Áishman<sub>ñ</sub> wakeramuj<sub>ai</sub>sha akiiniacharmai. Antsu Yúsnumiá akiiniawaru ásar Yusa uchirí áiniawai.

<sup>14</sup>Nú Chichamsha ayashtin ajas iij<sub>ia</sub> núkap tsawant pujumiayi. Yusa anen<sub>kr</sub>tairij<sub>ia</sub> piakuyi. Aya nekasa nunak chichaamiayi. Núnisan<sub>ñ</sub> ni pen<sub>nk</sub>er<sub>in</sub>, aya Yusa Uchirí chikichkia nu takusminia nuna iniakmamiayi.

Nusha iisha paant wáinkiaitji. <sup>15</sup>Juansha Nin neka asa, étserek tímiayi “Júiti wi tímiaj nu: “Winia ukuruiní winittiana nu wíjjiaínkia émkaiti. Maa, wi atsaísha tuke pujuyayi” tiniujai.” Tu etserkamiayi.

<sup>16</sup>Chichamsha ti anenkartin asa ashí péñker ana nuna iniaitsuk súramji. <sup>17</sup>Yusa akupeamurín Muisais yaunchu jintintraiti, antsu aneatniuncha tura ashí nekas ana nunasha Jesukrístu jintintraiti. <sup>18</sup>Chikichkisha Yúsan penké wáinkiachuiti. Tura ni Uchirí chikichkia nu tuke Niijjai tsaníaku asa Yúsan paant awajturmasuitji.

**Imiakratin Juan Jesukrístunun etserkamiania nu**  
(*Mat. 3.11-12; Mar. 1.7-8 Ruk. 3.15-17*)

<sup>19</sup>Jerusaréñnumia Israer-shuar ni Pátririncha Riwi-shuarjai Juankai akupkarmiayi yákit tusar.

<sup>20</sup>Inintruiniakui paant ujakmiayi. “Wikia Krístuchuitjai” tímiayi.

<sup>21</sup>Takui ataksha aniasarmiayi “¿Nuikia yáitiam. Yúsnan etserin yaunchu amia nú Eríaskaitiam?” tiarmiayi.

Juansha “Atsá, núchaitjai” tímiayi.

Nuyá ataksha aniasarmiayi “Nuikia ¿Yúsnan etserin tátinia núkáitiam?” tiarmiayi.

Niisha “Atsá” tímiayi.

<sup>22</sup>Takui “¿Nu arantcha yáitiam. In akuptamkajnia nusha warí títiataj. Warintia enentáimiam?” tiarmiayi.

<sup>23</sup>Juansha tímiayi “Yúsnan etserin Isayas yaunchu timia núitjai. Niisha áarmiayi “Aents atsamu nunkanam shuar untsumui “Ii uuntri jintí naka awajsatarum,” tu untsumui.” Núnaka Isayas áaruiti. Tura wikia untsumna nú shuaraitjai” tímiayi.

<sup>24</sup>Juanjai chichainiakka Pariséu akupkarma áarmiayi.

<sup>25</sup>Niisha tiarmiayi “Nuikia Krístuchuitiatmesha, Eríashaitiatmesha, Yúsnan etserin tátinia núchaitiatmesha ¿urukamtai imiakratam?” tiarmiayi.

<sup>26</sup>Juansha tímiayi “Wikia entsajain imiakratjai. Tura átum írutramunam shuar átum nékatsrumna nu wajaawai. <sup>27</sup>Niisha winia ukuruiní winiyat wíjjiaínkia ti nankaamantuiti. Nii ti péñker asamtai wisha ni sapatrj jinkiamuríncha atitrachminiaitjai” tímiayi.

<sup>28</sup>Nuka Petapara peprunam túrunamiayi. Petaparasha Juan imiakratmia nuí Jurtañ entsa amain amai.

**Jesus Yusa Murikrinti**

<sup>29</sup>Nuyá kashin Juan Jesusan winian wáiniak tímiayi “Iistarum. Núiti Yusa Murikri ashí aentsu tunaarín júana nu. <sup>30</sup>Núiti wi timiaj nu, “Winia ukuruí winiana nu wíjjiaínkia nankaamantuiti. Tura wi atsaísha tuke pujuyayi” tímiajai. <sup>31</sup>Wisha Nin nekaachmajai. Tura ashí Israer-shuar Nin nekaawarat tusan imiakín támajai” tímiayi.

<sup>32</sup>Nuyá tímiayi “Yusa Wakanin yámpitsa núnin nayaimpinmayan táarun wáinkiamjai. Tura ekemsamai. <sup>33</sup>Nu túruntsajin tuke Nin nekaachmajai. Tura Yuska winia imiakrattinian akuptak turutmiai “Chikichik shuarnum Yusa Wakaní tara ekemsa wáinkiam, nujai nekaattame. Yusa Pénker Wakaníjiai imiakratniua núiti” túrutmiayi. Tura nujai Nin nekaamjai. <sup>34</sup>Yamaikia wainkia asan ti paant nékajai tí nekas Yusa Uchirínti” tímiayi Juan.

### Jesusa unuiniamurí emka armia nu

<sup>35</sup>Kashincha ataksha Juan nui wajasmiai ni unuiniamurí jímiarjai. <sup>36</sup>Jesussha nui nankaamakui Juan tímiayi “Iistarum, Yusa Muríkrí áuwiti.”

<sup>37</sup>Juanka unuiniamurí nuna antukar mai Jesusan pataatukarmiai. <sup>38</sup>Jesussha úkumur ímias nu jímiaran wininian wáinkiamiai.

Tura tímiayi “¿Ya earam?”

Niisha “Uuntá, ¿túi pujam?” tiarmiayi.

<sup>39</sup>Jesussha tímiayi “Wats, iitarum.”

Niisha wear ni pujutairin wáinkiarmai. Tura áankú ajasmatai nu tsawantai nui kintiamprarmiai.

<sup>40</sup>Juanka chichamen antukar Jesusan pataatukaruka jímiar ármiai. Chikichik Antresauyayi. Niisha Semun Pitru yachiyayi. <sup>41</sup>Antressha wárik ni yachi Semun kan eaktajtsa wémiayi. Tura wáiniak “Misías wáinkiaji” tímiayi. Misíaska ni chichamen “Kristu” tawai. Krístuka Israer-shuaran yainkiarat tusa Yus anaikiamuiti.

<sup>42</sup>Nuyá Antres ni yachi Semun kan Jesus pujamunam jukimiai. Jesussha wáiniak tímiayi “Ámetme Semun, Junasa uchirí. Túrusha Sépas átatme.” Sépaska Israer-shuar chichamnum kaya tawai. Tura Kriaku chichamnum nuka Pítruiti.

### Jesús Jiripijiai tura Natanaérjai chichasmiania nu

<sup>43</sup>Kashincha Jesús Kariréa nunkanam wétajtsa pujumiayi. Tura Jiripin wáiniak “Nemartusta” tímiayi.

<sup>44</sup>Jiripisha Petsaitia péprunmayayuyayi. Antressha Pítrusha nu péprunmayayuyayi. <sup>45</sup>Nuyá Jiripi Natanaéran eakmiayi.

Tura wáiniak tímiayi “Muisais Yus akupkamu papinium “Anaikiamu tátatui” tu áarchamkia. Yaunchu Yúsnan etserniusha ujakcharmakia. Nu shuar wáinkiaji. Jesusaiti, Jusé uchirí. Nasarét péprunmayaiti.”

<sup>46</sup>Natanaérscha tímiayi “¿Nasarénumia pénger shuar áminkiait?” Jiripisha “Winim ítiá” tímiayi.

<sup>47</sup>Jesussha Natanaéran tjiuch winian wáiniak tímiayi “Ju shuar iistarum. Ti pénger Israer-shuaraiti. Penké anankartichuiti.”

<sup>48</sup>Natanaérscha tímiayi “¿Itiur nékaram?”

Jesussha tímiayi “Jiripi tuke untsurmatsain wáinkíájme ikiu numirín ejamkam wajamin.”

<sup>49</sup>Natanaér nuikia tímiayi, “Uunta, nekas Yusa Uchirínme. Israer-shuar akupniuitme” tímiayi.

<sup>50</sup>Tura Jesus tímiayi “¿Aya wi “Ikiu numirín ajamkam wajamin wáinkíájme” takui Winia enentáimturamek? Antsu nuna nankaamas nekaachmin ana nusha wáinkíáttame” tímiayi. <sup>51</sup>Nuyasha Jesus tímiayi “Wi nekas tájarne, Aents Ajasu asan atumsha nayaim uranmianum Yusa suntari Winin tara waka ajainia wáinkíáttarme.” Tu tímiayi.

### Nuatnaikiatin jísat Kaná péprunam ámiania nu

**2** <sup>1</sup>Menaintiu tsawant nankaasmatai nuatnaikiatin jísat Kaná péprunam ámiayi. Kaná péprusha Kariréa nunkanmauyayi. Jesusa nukurísha nuí pujumiayi. <sup>2</sup>Jesussha ni unuiniamurísha nu nuatnaiyamunam ipiaamu ármiayi.

<sup>3</sup>Umutai amuukamtaí Jesusa nukurí tímiayi “Umutai amuukai. Penké takakainiatsui.”

<sup>4</sup>Tura Jesus tímiayi “Nukuá, ¿urukamtaí Winia túrutam? Iniáitiústá. Winia kakarmar iniakmastin jeaatsui.”

<sup>5</sup>Nuyá umutain wáinmainia nuna ni nukurí tímiayi “Ashí ni tana nu umiktárum.”

<sup>6</sup>Nuí kayajai najanamu yumi-yaraataí sais (6) ámiayi. Nu yaraatainmaya Israer-shuar ni ewejéncha ni nawéncha nijiamau ármiayi Yus shiir enentáimtursatí tusar. Chíkich chíkich yaraatainiam uchenta (80) rítrusha, sian (100) rítrusha yumi wayamniauyayi.

<sup>7</sup>Nuyá Jesus umutain wáinmaun “Ju yaraataí ámpratarum” tímiayi. Takui mete ámprarmiyai. <sup>8</sup>Ámprarmataí Jesus tímiayi “Pai, ishichik shikikrum námper chicharu suutarum.” Tutai nútiksan túrawarmiyai.

<sup>9</sup>Jista chicharusha nu umutai ajasun nekáprámiayi. Yaraatainmaya yumi jusamun nekaachmai niisha tura umutai ajamau jusaru ásar nékarmai. Jista chicharusha nuwátun untsuk <sup>10</sup>tímiayi “Jístanmanka pénger umutain emka suíniatsuk. Tura jémararmatainkia tímianchan suiniatsuk. Túrusha ámeke pénger umutai ikiusam yamáí jíikchamek” tímiayi.

<sup>11</sup>Jesus túramu Kananum Kariréa nunkanam túrunamiayi. Nújainkia Jesus emka ni kakarmarin paant iniaktusmiayi. Nuna íisar ni unuiniamurísha Nin enentáimtusarmiyai.

<sup>12</sup>Nuyá Kapernáum péprunam wémiayi. Ni nukurísha ni yachísha ni unuiniamurísha nemariarmiyai. Nuísha untsurí tsawant pujusarmiyai.

### Yusa Uunt Jeen suruktinian Jesus surimkiamiania nu (Mat. 21.12-13; Mar. 11.15-18; Ruk. 19.45-46)

<sup>13</sup>Israer-shuara namperi, paskua tutai, ishichik ajasmataí Jesus Jerusarénum wémiayi. <sup>14</sup>Nuí jeá Yusa Uunt Jeen súruinian

wáinkíamiayi. Turuncha murikniasha yampitsnasha súrin ármiai. Chikichcha ni misarín pujusar kuítian yapajñiancha wáinkíamiayi.

<sup>15</sup>Nuna wáiniak yarañken chapikmar asutkiartutain najana nujai ashí waakartiuk murikrintiuk aa jíirmiayi. Kuítian yapajniu misaríncha ayantar ni kuítrin nunká utsañkarmiayi. <sup>16</sup>Yampitsan súrinniasha tímiayi “Nuka juyá jíítiarum. Winia Aparu Jeen surutai jea najanawairap” tímiayi.

<sup>17</sup>Nuna ísar ni unuiniamurí yaunchu Yus-Papinium áarman enentáimprarmiayi. Ju áarmaiti:

“Ame Jeem shiir atí tusan ti wakerukuitjai.”

<sup>18</sup>Nuikia Israer-shuara uuntri Jesúsana aniasarmiayi “Juna túramnaitjai tusam ¿warí kakarmak iniakmastatam?”

<sup>19</sup>Jesussha tímiayi “Ju Jea sáñkiakrumin menaintiú tsawantái iniantaittiai Wikia.”

<sup>20</sup>Israer-shuarsha tiarmiayi “Kuarentisáis (46) uwitin juna jeamtinian pujursarmiayi. Amesha menaintiú tsawantái jeamtámeash.” <sup>21</sup>Kame Jesus “Jea” chichayat ni ayashín tímiayi. <sup>22</sup>Tuma asamtai Jesús ukunam jakamunmayá nantakmiatai ni unuiniamurí ni timian enentáimprar ni chichamencha tura yaunchu Yus-Papinium áarmancha “Nekasaiti” tu enentáimtusarmiayi.

### Jesus ashí shuara enentáin nékawai

<sup>23</sup>Paskua námpertin ti untsurí Jerusarénum pujuarmia nu, Jesús aents tujintiamun túramtai, nuna wáinkiar Nin nekas enentáimtusarmiayi.

<sup>24</sup>Tuma ain Jesús ashí neka asa ninkia enentáimtuscharmiai. <sup>25</sup>Niniki ashí shuara enentáin neka asa chíkich ujatkat tusa atsumchamiai.

### Jesus Nikiutémujaí

**3** <sup>1</sup>Shuar ámiayi ni naari Nikiutému. Niisha Pariséu asa nii tuinia áintsañ Yúsnan takauyayi. Niisha Israer-shuara uuntriayi. <sup>2</sup>Niisha kashi Jesúsai irastajtsa wé tímiayi “Uuntá, shuáran unuiniarat tusa Yus akúptámkaiti. Nu paant nékaji. Yúsaiyanchuitkiumka aentsti tujintiamu túramna nu tujinkiaintme’ tímiayi.

<sup>3</sup>Jesussha tímiayi “Tí nekas tájame. Atak yamaram akiiniachuka Yus akupeamunam pachiiinkiashtatui.”

<sup>4</sup>Tutai Nikiutému aniasmiayi “¿Itiurak shuar uunta nu ataksha akiiniat. Ataksha ni nukurí ampujén enkempramniakait atak akiiniatniuna?”

<sup>5</sup>Ataksha Jesús tímiayi “Ti nekas tájame. Shuar entsayasha tura Wakanniumiasha akiiniachuka Yus akupeamunam penké pachiiinkiashtatui. <sup>6</sup>Ayashniumiá akiinia nuka ayashchakait. Núnisan Wakanniumiá akiinia nuka wanchakait. <sup>7</sup>Wi “atak yamaram akiiniatniuiti” takui itiurchat enentáimpraip. <sup>8</sup>Nase enentáimpratá. Nase

nánkamsan umpúawai. Amesha ántame tura tuyan winiá túrasha tuin weti nékatsme. Núniskete ashí Wakanniúmiá akiinia nu.”

<sup>9</sup>Tuma asamtai Nikiutémusha atak anias “¿Jusha itiurak áminiait?” tímiayi.

<sup>10</sup>Jesus áikmiayi “Ame Israer-shuara jintinniuríntiatmesha ¿itiura nékatsmea? <sup>11</sup>Ti nekasán tájame. Nekas nékatur chichaaaji. Ísmajnia nusha ujaaji. Tuma ain ii chichame ántatsrume. <sup>12</sup>Aya ju nunkanmaya túramu ujaam ántachkurmeka ¿itiurak nayaimpinmaya túramusha antuktaram?”

<sup>13</sup>‘Shuar chikichkisha nayaimpiniam waka atsawai. Aya Wiki, nayaimpinmaya taran Aents Ajasu asan, túraitjai. Tura Wikia nayaimpinmayaitjai. <sup>14</sup>Tura Winiasha, Aents Ajasu ain, mantuawartatui. Iis, yaunchu Israer-shuar atsamunam wekainiak napijjai ti jáiniakuí tuke tsuamarti tusa Muisais napin jirú najana yakí numiniam awajaimiayi. Núnisnak Wisha awajnitniuitjai. <sup>15</sup>Nújajinkia ashí Winia enentáimturna nuka jinium wétsuk Yusaj tuke iwiaaku pujustatui.”

#### Yuska ashí shuaran ti aneawai

<sup>16</sup>Yuska ashí shuaran ti anea asa, ni Uchirín chikichik ana nuna shuáran uwemtikrarat tusa tsankatkamiayi. Ashí shuar Nin enentáimtana nu, jinium wécharat tusa, antsu Yúsnum tuke iwiaaku pujusarat tusa ni Uchirín akúpturmakmiayi. <sup>17</sup>Yus áentsun kajerak jinium surukat tusa ni Uchirín akupkachmiayi. Antsu uwemtikrarat tusa akupkamiayi.

<sup>18</sup>Yusa Uchirín enentáimtana nuka jinium penké surunkashtiniaiti. Tura Nin enentáimtatsna nuka, Yusa Uchirín chikichik ana nuna enentáimtachu asa, páchitsuk jinium surukmaiti. <sup>19</sup>Yusa Uchirí tsáapninia áintsan ii tunaari paant awajturmajai. Nu tsáapnisha ju nunkanam táraiti. Shuar tunáa ti tura ásar tsáapninian nakitrar kiritnium wakeriarmai. Nuna tura ásar jinium surunkaruíti. <sup>20</sup>Ashí tunaan túruinia nuka tsáapninian mujjiainiawai. Túrawar yupitiainiawai ni tunáa túramu paant ajasaj tusa. <sup>21</sup>Antsu ashí nekas túratnium umiiniana nuka tsáapninian weantainiawai. Yus ni enentái pujuram tsáapninium takainiawai. Nuka ti paantaiti.

#### Imiakratin Juan ataksha Jesusnan chichasmiania nu

<sup>22</sup>Nuyá Jesussha ni unuiniamurijjajisha Jutía nunkanam wear nuí pujusar imiakratiarmiayi. <sup>23</sup>Juansha Enun nunkanam, Sarim tíjiuchia nuí, imiakratuk pujumiayi entsa nuí núkap aa asamtai. Tura aents táarmatai imiainiarmiayi. <sup>24</sup>Nusha Juánkan sepunam enkenatsain túrunamiayi.

<sup>25</sup>Tura Juánka unuiniamuri Israer-shuarjai jianaiktinian nan kamawarmiayi. “¿Ya imiakratma imiá péñkerait?” tusar áujmatiarmiayi. <sup>26</sup>Juánkai inintrustai

tusar wéarmiayi. “Uunta, ame nuik Jurtaṅ entsa amain pujakum shuar nuṅ pujá “núiti Yusa Murikrī” tíchamkum. Yamaikia imiakratui tura ashí shuar Nin nemarainiawai” tiarmiayi.

<sup>27</sup>Tutai Juanṅ tímiayi “Ashí kakarmaka aya Yúsaiyāṅchakait. <sup>28</sup>Wisha paant tímiyai “Wikia Krístuchuitjai antsu ni jintin iwiarat tusan emka akupkamuitjai.” Nusha antukmarme. <sup>29</sup>Kame shuar nuwan nuatna nuna áishrinti. Nuatnaiyak áishmanṅ nuwejai áujnainiakui, ni amikrīsha nuna antuk ti waraatsuk. Wisha núnisnak aents Jesusaṅ wénaku ti warajai. <sup>30</sup>Niisha tuke nankaamaku uunt ajastiniaiti antsu wikia tuke tímiyancha ajastiniaitjai.” Juanṅ tu chichasmiayi.

### Nayaimpinmayaṅ tara nu

<sup>31</sup>Nayaimpinmayaṅ tara nuka ashí nankaamakuiti. Nunṅkayaṅ nuka, nunṅkayaṅ asa jú nunṅkanmayāṅak áujmatui. Nayaimpinmayaṅ tara nuka ashí nankaamakuiti <sup>32</sup>tura nuṅ antukmancha íismancha áujmatui. Túrasha ni chichameṅ ántuiniatsui. <sup>33</sup>Antsu ni chichameṅ ántana nuka “Yusa chichameṅ imiá nekasaiti” tawai. <sup>34</sup>Yus akupkamuka Yusa chichameṅ étserui. Yuska ni Wakanín ementutsuk susa asamtai tu étserui. <sup>35</sup>Yus Apa ni Uchirín anea asa ashí ana nuna iistí tusa ataksaiti. <sup>36</sup>Shuar Yusa Uchirín enentáimta nuka yamaram iwiaakmanum akiinia asa tuke Yusai shiir pujustiniaiti. Antsu Yusa Uchirín enentáimtatsna nuka nu iwiaakmanum akiiniachuiti antsu Yus tuke nin kajerkaiti.

### Jesus Samaria nunṅkanmayaṅ nuwajaiṅ chichasmiania nu

**4** <sup>1</sup>“Jesus untsurí shuaran ni nemarkin awajeawai; kame Juanjaiṅ nankaamas untsurí imiaawai” taman Pariseu shuar antukarmiayi. <sup>2</sup>Nekaska Jesus imiakratchamiayi, antsu ni unuiniamurí túrawarmiayi. <sup>3</sup>Pariséu nu chichaman antukarman Jesussha nekáa Jutía nunṅkanmayaṅ jiiinki Kariréa nunṅkanam waketkimiayi.

<sup>4</sup>Wáketuk Samaria nunṅkanmaanṅ nankaamaktiniuyayi. <sup>5</sup>Samaria nunṅkanam wéak Sekar péprunam jeamiayi. Nu pepru jeastatuk Jakupa nunṅke ámiayi. Jakupsha nu nunṅkan ni uchirín Jusén tí yaunchu susamiayi. <sup>6</sup>Nuisha yumirmat ámiayi. Jakup taurma asamtai “Jakupa yumirmatṅ” tiarmiayi. Tutupin jeamtai Jesussha pimpiki winis yumirmat ayamach pujusmiayi. <sup>7</sup>Nuṅ pujaiṅ Samarianmayaṅ nuwá yumí shikiktajtsa támiayi. Tura Jesus “Entsa surusta” tímiayi. <sup>8</sup>Jesusa unuiniamurīsha yurumkan péprunam sumaktajtsa wéaru asamtai aya Jesusak pujumiayi.

<sup>9</sup>Samarianmayaṅ nuwá Jesusan tímiayi “¿Itiura Israer-shuaraitatmesha Samarianmayaṅ nuwá aisha entsa seatam?” Kame Israer-shuar Samarianmayaṅ shuarjainkia penké chichachu ásar nuna tímiayi.

<sup>10</sup>Jesussha tímiayi “Yus súamu nékakmeka tura entsa surusta tájam nusha nékakmeka ame antsu seattínme tura Wikia iwiaaku entsan amasantjai.”

<sup>11</sup>Nuwasha tímiayi “Uunta, entsasha ti initiaiti tura shikiktincha takaktsume. ¿Tuyan iwiaaku entsasha surustam? <sup>12</sup>Ii uuntri Jakup ju yumirmatan taur juyanaki niisha ni uchirísha ni waakarísha umararmiayi. Nuyá ikiurtamkimiaji. ¿Amesha Jakupjai nankaamas kakarmakaitiam?”

<sup>13</sup>Jesusha tímiayi “Ashí shuar ju entsan umarka ataksha kitiamtiatui. <sup>14</sup>Antsu Wi súajna nú entsan umarka penké kitiamchattawai. Antsu nu entsa Wi susamuka ni enentáin púkunia áintsan tuke pajamtiatui nujai tuke iwaaku pujustí tusa.

<sup>15</sup>Tutai nuwá tímiayi “Uuntá, winiasha nu entsa surusta. Wisha kitiamcha átaj. Tura ju entsancha shikiktinian táchataj” tímiayi.

<sup>16</sup>Nuyasha Jesus tímiayi “Áishrum untsukam utitia, turam juí tatá.”

<sup>17</sup>Nuwasha “Winia áishur atsawai” tímiayi.

Tutai Jesus tímiayi “Maa, nekas tame. Áishrum atsawai. <sup>18</sup>Kame ame áishrum senku (5) takusuitme. Yamái takakmena nusha ame áishrumchaiti. Nekas tame.”

<sup>19</sup>Nuna antuk nuwasha tímiayi “Uunta, ame Yúsnan etserniuchukaitiam. <sup>20</sup>Ii úntriníakia tuke Samarianam pujuarmia nu jú nainnium Yúsan tikishmatrarmiayi. Antsu átum Israer-shuar árumna nu aya Jerusarénum Yus tikishmátratniuiti tárume.”

<sup>21</sup>Jesus tímiayi “Nuwá, enentáimsata. Tsawant jeattawai átum jú náinniumsha tátsuk tura Jerusarénumsha wétsuk Yus Apa tikishmatratin. <sup>22</sup>Átum tikishmatrum nuka nékatsrume. Iikia tikishmatrajnia nu nékaji. Israer-shuarnumiá Uwemtikkiartin winiakui nékaji. <sup>23</sup>Tsawant winittiana nu yamáí jeayi. Ashí shuar Yus Apan nekas tikishmatainiakka tuke wakanjai tuke enentáijiaisha awajitsuk tikishmatrartatui. Núnisan tikishmatrurat tusa wakerawai Yus Apa. <sup>24</sup>Yuska Wakaniiti tura ashí Nin tikishmatainia nuka tuke wakanjijai tura tuke enentáijiai awajitsuk tikishmatratin ániawai.”

<sup>25</sup>Nuwasha tímiayi “Anaikiamua nu tátiniaiti. Nusha Krístuítui. Niisha taa ashí jintinramattaji.”

<sup>26</sup>Jesus tímiayi “Wiitjai. Ámin chichaaajmena nú Kristuítjai.”

<sup>27</sup>Nuin ni unuiniamurí táarmiayi tura nuwajai chichaa pujan wáinkiar ti enentáimprurarmiayi. Tumaitiat “¿Warí wakerakmea nuwajai chichaaam?” títinian arantukarmiayi. <sup>28</sup>Nuyanka nuwá ni yumirin ikiuki péprunam we ashí áentsun tímiayi <sup>29</sup>“Winiirum ítiarum, shuar ashí wí túramun túruta nu. ¿Juka Krístuittiya?” <sup>30</sup>Tutai péprunmayá jíinkiar Jesus pujamunam wearmiayi.

<sup>31</sup>Jeainiatsajin ni unuiniamurí seak tiarmiayi “Uunta, yurumáta.”

<sup>32</sup>Tura Jesus tímiayi “Wi yúatniunka takakjai átum nékachman.”

<sup>33</sup>Ni unuiniamurísha nuámtak anniasarmiayi “¿Chíkích shuar yurumak itiarím tátsuash?” tiarmiayi.



<sup>34</sup>Tura Jesus tímiayi “Winia akuptukua nuna wakeramurí túrakun tura ni takatrín takaakun Wíjiaíñkia yurumátniua áintsan̄ ikiakáatui. <sup>35</sup>Átumka “Tuke kuaru nantu árak júuktin taasai” tátsurmek. Túrasa Wi tájarne, shuar wininia nu iistarum. Yus-Chicham ni enentáin araamuiti. Tura júuktin tsawant jeayi. <sup>36</sup>Arakan júaka akinkiatniuiti. Júukmataisha nu shuar uwemprar tuke iwiaaku pujusartatui. Núnisan arakan araana nusha júana nusha mai metek warasartatui. <sup>37</sup>Tiniu armia nuka nekasaiti: “Chikichik arawai chíkichcha júawai.” <sup>38</sup>Iis, chíkich arakmamu júuktinian akupkaitjarne. Átum araachiatrumek chíkich takasmanum atumsha pachíintiukuitrume” tímiayi.

<sup>39</sup>Tura núwaka péprunam jeá “Ashí wi túramun ujat kayi” takui untsurí shuar Jesusan ti shiir enentáimtusarmiayi. Niisha Samaríanmaya shuar ármiai. <sup>40</sup>Nu asamtai ashí Jesusaí taar níjiaí pujusát tusa seawarmiayi. Tutai Jesus jimiará tsawant nuí pujusmiayi. <sup>41</sup>Nú shuar untsurí ni chichamen̄ antukar Jesusan ti shiir enentáimturarmiayi. <sup>42</sup>Nuyá nuwan tiarmiayi “Yamaikia aya ame chichammijiaín Jesus enentáimtatsji antsu imia iisha ni chichamen̄ anturkaji. Tura nékaji nekas Krístuiti, ashí shuaran Uwemtikin.”

### Jesus akupniu takarniurí uchirín tsuármiania nu

<sup>43</sup>Jimiará tsawant nan̄kaamasmatai Jesus Samaria nun̄kanmaya jíinki Kariréa nun̄kanam wémiayi. <sup>44</sup>Kariréasha Jesusa nun̄ke asamtai, aínsha Jesus timia áintsan̄ ámiayi: “Yúsnan etserniun ashí shuar péñker anturainiawai antsu nuna nun̄keyan̄ka nin anturainiatsui.” <sup>45</sup>Tuma ain̄ Kariréa nun̄kanam jeamtai auya shuarsha Jerusaréñnum paskua námpernum wearu ásar tura ashí ni túramun nuí wainkia ásar ti shiir awajsarmiayi.

<sup>46</sup>Nuyá Jesus Kaná péprunam atak támiayi. Nu péprunmasha nuik Jesus yumin umutai awajsarmiayi. Jesussha nuí pujai yaja péprunam Kapernáumnum akupniu takarín ámiayi. Ni uchirísha jaa tepemiayi. <sup>47</sup>Niisha Jesus Jutíanmaya Kariréa nun̄kanam taman antuk Jesusaí wémiayi. Tura ni uchirí jákatin tepakui ni jeen we ni uchirín tsuarat tusa Jesusan searmiayi.

<sup>48</sup>Jesussha tímiayi “Aya aents túrachminian túrakui ísrum aya nújain̄ Winia enentáimtarme.”

<sup>49</sup>Tura takarín tímiayi “Uunta, winia uchir jáatsain̄ wari winitia.”

<sup>50</sup>Nuñkia Jesus tímiayi “Jeemiin̄ waketkitia. Yamaikia ame uchiram péñker ajasai.” Tutai nú aishman̄ Jesus táman antuk wémiayi.

<sup>51</sup>Ni jeen jeátemámtai ni takarniurí in̄kiun̄ tiarmiayi “Yamaikia uchiram péñker ajasai.”

<sup>52</sup>Apasha inintrusmiayi nantu urukaim péñker ajasma.

Niisha tiarmiayi “Yau, nantu pukuntamtaí, tsuemun michatramai” tiarmiayi.

Nuna antuk uchí aparísha enentáimsamai. <sup>53</sup>Nantu pukunta ai Jesus “Ame uchiram péñker ajasai” timia nuní ain michatraití. Tuma asamtai niisha ashí ni shuarísha Jesusan nekas enentáimturarmiyai.

<sup>54</sup>Jesus nu túramujai ni kakarmarín jimiará iniakmasmiyai. Nunasha Jutíanmaja jiiñki Kariréa nunkanam jeá túramiyai.

### Petesta amia nuí tampemarun Jesus tsuármiania nu

**5** <sup>1</sup>Nu nankaasmatai, Israer-shuar namperan najanainiakui Jesus ataksha Jerusarénnum waketkimiya. <sup>2</sup>Jerusarén yama wayamunam murik wayatin waiti tíjiuch amia nuí entsa pajamtai jeammauyai. Nu pajamtain Petesta tiarmiyai. Nuna wáitirísha senku (5) ármiyai. <sup>3</sup>Nuí untsurí jáiniak nunkanam tepearmiyai. Kusurusha shutuapsha tampemakusha tepesar entsa miartukat tusa nákasarmiyai. <sup>4</sup>Kame ni tátaj taku Yusa suntari táuyai entsan umuchkiattsá. Nuyanka emka shuar entsá wayá nu ni jáamuriya tsuármarmiyai. <sup>5</sup>Áishman traintiúchu (38) uwi jaa tepá nuí ámiyai.

<sup>6</sup>Jesussha nu shuaran nuí tepan wáinkiaímiyai. Tura untsurí uwitin jaa tepan nekáa aniasmiyai “¿Shiir ajastiniak wakeram?”

<sup>7</sup>Tutai jaasha tímiyai “Uunta, entsa muchitkiui ¿winia yaki enkétát? Kame wi enkemátaj tai chíkich emka enkemáiniawai.”

<sup>8</sup>Nuyá Jesus tímiyai “Nantaktia. Ame peakrum jukim wetá.”

<sup>9</sup>Nu chichamtaik áishman shiir ajasmiyai. Tura ni peakrín jukí wémiyai. Nusha ayampratin tsawantaj túrunamiyai. <sup>10</sup>Tuma asamtai Israer-shuar shiir ajasun tiarmiyai “Yamáí ayampratin tsawantaiti. Peakrum júkishtiniaitme” tiarmiyai.

<sup>11</sup>Áishmansha tímiyai “Winia tsuara nu “Peakrum jukim wetá” turutni” tímiyai.

<sup>12</sup>Nuñkia aniasarmiyai “¿Ya “Peakrum jukim wetá” túramam?” tiarmiyai. <sup>13</sup>Tura áishmansha Nin tsuárun nékachmiyai. Untsurí shuar nuí aa asamtai tura Jesus weu asamtai nin nekaachmiyai.

<sup>14</sup>Atak Jesus Yusa Uunt Jeeñ áishmankan wáiniak tímiyai “Antukta. Yamaikia shiir ajasume. Atak tunáa túrawaip; nu arant ajasáim” tímiyai.

<sup>15</sup>Nuñkia áishman Jesus nin tsuárman nekáa Israer-shuaran ujakmiyai.

<sup>16</sup>Tuma asamtai ayampratin tsawantaj túramtai Israer-shuar Jesusan maatai tusar áintrarmiyai. <sup>17</sup>Tura Jesus tímiyai “Wina Apar tuke yamaisha takawiti. Núnisnak Wisha takaajai.” <sup>18</sup>Tutai Israer-shuar nuna nankaamas maatai tusa wakeriarmiyai. Ayampratin tsawantaj takaakui kajerarmiyai. Tura nu arantcha “Yus winia Aparuiti” takui Yusjai métek enentáimtumawai tusar nu arant kajerarmiyai.

### Yusa Uchirí túramnia nu

<sup>19</sup>Nuyá Jesus tímiyai “Ti nekas tájarne, Yusa Uchiríñkia ni enentáijjain takaatsui. Antsu aya winia Apar takaana nuna ísan métek takaajai.

Ashí winia Apar túramun Wissha ni Uchirí asan métek takaajai. <sup>20</sup>Ni Uchirí asantai winia Apar anentui tura ashí tura nuna iniakturui. Tura nuna nan̄kaamas tujinkiamnian iniaktursattawai Wissha túratniun. Tura nuna túrakui ashamkattarme. <sup>21</sup>Winia Apar jakamunmayan iwiaaku ajasat tusa Ni wakerana nuna inianteatsuk. Núnisnak, ni Uchirí asan, Wi wakeraj nuna iwiaaku awájsámniaitjai. <sup>22</sup>Winia Aparka súmamtiktsui antsu shuar súmamtikiatniun ni Uchirín súsaiti. <sup>23</sup>Tuma asantai ashí shuar Yus Apan shiir awajainia áintsan̄ ni Uchiríncha métek shiir awajsatin ániawai. Yus Apa ni Uchirín akupka asantai, Uchin shiir awajeatsna nuka Yus Apancha shiir awajeatsui' tímiayi.

<sup>24</sup>'Ti nekasaiti. Winia chichamprun ántana nú shuarka Winia Akuptukun enentáimtak ni iwiaakmarin̄ tuke amuukashtinian takakui. Nu shuarsha ayashí iwiaakuitiat jákauyi antsu yamá nekas iwiaakuiti. Tuma asa sumamashtatui. <sup>25</sup>Ti nekasaiti. Tsawant winittiana nu jeayi. Nu tsawant jaka ainia nu Wi unsumman antukar umirkarka iwiaaku ajasartatui. <sup>26</sup>Iis, winia Apar iwiaaku awajsatniun takakui. Tura Winiasha, ni Uchirí asantai, iwiaaku awajsatniun surusuiti. <sup>27</sup>Nu arantcha wi Aents Ajasu asantai, shuaran súmamtikiatniun surusuiti. <sup>28</sup>"Ju chicham itirchataiti" enentáimprairap. Atak tsawantai wi unsumman ashí jákaru ainia nu antukartatui. <sup>29</sup>Tura ashí iwiansamunmayá jínkiartatui. Pénker túrawarusha nantakiar tuke iwiaaku pujusartatui. Antsu tunáa túrawarusha nantakiar jinium surunkartatui' tímiayi.

### "Jesus nekas Yúsaiyáiti" tu áujmatainia nu

<sup>30</sup>'Imia Wíki takaatsjai. Antsu Yus tana núnisnak súmamtikeajai. Wi wakeraj nuna enentáimtsuk antsu winia Apar wakera nuna wakerukan, Nii akupta asantai, awajitsuk súmamtikjai. <sup>31</sup>Aya Wiki "Yúsaiyáitjai" tákunka winia chichamur ántar ainti. <sup>32</sup>Chikichcha awai. Niisha "Yúsaiyáiti" túrutui. Ni chichamesha imiá nekasaiti. <sup>33</sup>Atumsha Juan̄kai wi túramu inintrusmarme tura nii timia nu nekasaiti. <sup>34</sup>Tuma ain̄ aents táman atsumatsjai. Antsu Juan̄ka chichame enentáimkiuram uwempratarum tusan tájarme. <sup>35</sup>Juan̄sha jiya núnis keemai. Atumsha ishichik tsawantin nú tsáapninnium warastin enentáimprarmarme. <sup>36</sup>Tura Winia "Yúsaiyáiti" túrutna nu, Juan̄jai nan̄kaamas pénkeran takakjai. Wi takasma núiti. Winia Apar takastinian surusma nuna takaakun nujai páantaiti Yus Apa akupkamuitjai. <sup>37</sup>Winia Aparsha, akuptuku asa, ayamprutui. Túrasha átumka ni chichamesha antukchaitrume tura wáintiash wáinkiachuitrume. <sup>38</sup>Yus Apa akuptukuiti. Tuma asantai Winia enentáimturhakrum winia Aparu chichamesha atumi enentáin wayachuiti. <sup>39</sup>Átumka Yus-Chicham yaunchu aarma nu iwiaaku átinian wáinkiatatui tusarum ti unuimiaruitrume. Nu chichamsha Wínian

ájumtúi. <sup>40</sup>Tuma ain̄ nekas iwiaaku átaj tusarum Winí tátin nakitiarme” tímiayi.

<sup>41</sup>“Shuar Winia “shíiraiti” túrutainiakuisa nuna páchiatsjai. <sup>42</sup>Maa, Wi nékajrume. Átumka Yus aneatsrume. <sup>43</sup>Winia Apar akuptukmatai táwitjai túrasha nakitrarme. Antsu chíkichka ní enentájjiāin̄ jeartamkūn̄kia nuka átum wakerarme. <sup>44</sup>Átumka nuám̄tak “Shiir enentáim̄tursatí” tu enentáim̄tunaiyarme. Tura Yus enentáim̄turma nuka páchiatsrume. Nújjāin̄kia çitiurak Yus enentáim̄tustam? <sup>45</sup>“Ii tunaar̄in̄ Yusaj̄ etserturmaktatji” turutiirap. “Muisais akupkamun umirkan uwemprattajai” táturmek. Antsu Muisais aarma nujaj̄ atumí tunaar̄i etsernaktatui. <sup>46</sup>Iis, Muisais Winia áatrurmiayi. Atumsha ni timia enentáim̄takrumka Winiasha enentáim̄turaintrume. <sup>47</sup>Tura ni aarma enentáim̄tachkurmeka çitiurak wi tama enentáim̄tustarum?” tímiayi Jesus.

**Jesus senku mir (5.000) áishman̄kan ayurawarmiania nu**  
(*Mat. 14.13-21; Mar. 6.30-44; Ruk. 9.10-17*)

**6** <sup>1</sup>Nu nan̄kaasmatai Jesus Kariréa antumiān̄num amain katīn̄miayi. Nu antumiān̄sha Tipirias antumiān̄ tuiniawai. Jimiará náartiniaiti. <sup>2</sup>Untsurí shuar Jesus ti jáinian timiá wárik tsuan wáinkiaru ásar Nin nemariarmiayi. <sup>3-4</sup>Israer-shuara paskuanamper̄i ishichik ajasmatai Jesussha ni unuiniamur̄ijjāi náinnium waka nūi pujusmiayi. <sup>5</sup>Jesussha untsurí aents wininian wáiniak Jiripin tímiayi “Timiá untsurí shuar ayuratniusha çtuyan̄ yurumak sumaktaj?” tímiayi. <sup>6</sup>Kame Jesuska Nii túrattana nuna neka asa Jiripi warittin̄ tusa tímiayi.

<sup>7</sup>Jiripisha nuyá tímiayi “Timiá nukap kuitjāi tanta sumakmesha ashí ishichik susamsha jeachaintjāi” tímiayi.

<sup>8</sup>Nuyá chíkich unuiniamur̄i Antres, Pitru yachi, tímiayi <sup>9</sup>“Uchi jūi sen̄ku (5) tantan jimiara namakjāi takakui. Ausha timiá untsur̄in̄masha jeatpiash” tímiayi.

<sup>10</sup>Nuyanka ““Ashí pujustarum” titiarum” tímiayi Jesus.

Áishman̄sha nuwasha uchisha irunmiayi. Tura chírichri núkap aa asamtai nūisha sen̄ku mir (5.000) áishman̄ pujusarmiayi. <sup>11</sup>Jesussha nu tantan achik Yúsán yumīn̄kias ni unuiniamur̄in̄ susamiayi. Niisha ashí nūi pujuinian súsar̄miayi. Namaknasha núnisan̄ ashí ni wakeriarmiania nuna súsar̄miayi.

<sup>12</sup>Jémararmataisha Jesus ni unuiniamur̄in̄ tímiayi “Ampirma júukrum chānkinnium chumpiatarum. Wasúr̄nákaj̄in̄.” <sup>13</sup>Niisha sen̄ku (5) tantanmaya ampirman júukar tuse (12) chānkinnium áimkiarmiayi.

<sup>14</sup>Nu shuarsha Jesus túramun ísar tiarmiayi “Jūi nekas Yúsnan etserin tátinia núchakait.” <sup>15</sup>Shuar Jesusan uunt akupin awajsataj tutai Jesus nekáa Nīnki náinnium wémiayi.

**Jesus entsá pátatek nanamas wekasamiania nu**  
(*Mat. 14.22-27; Mar. 6.45-52*)

<sup>16</sup>Kíakui Jesusa unuiniamurí antumiannum wearmiayi. <sup>17</sup>Káshisha Jesus tuke táchamtai uunt kanunam enkemáwar Kapernáum péprunam wéenak jíinkiarimiayi. <sup>18</sup>Tura nase ti umpúakui chíchimi ti wajaimiayi. <sup>19</sup>Ajapén ajasar Jesus entsá pátatek nanamas tíjiuch winian wáinkiar ashamkarmiayi. <sup>20</sup>Tura Jesus “Wiitjai. Ashamprukairap” tímiayi. <sup>21</sup>Nújainkia ti shiir warasar kanunam itiaawarmiayi. Tura nu chichamtaik ni wéamunam jeawarmiayi.

**Shuar Jesusan eak wekainiawai**

<sup>22</sup>Kashincha chíkich shuar amain ayuramunam kanararu nekaawarmai. Jesusa unuiniamurí Jesusjainchu chikichik kanu amia nujaí wéarun nekaawarmai. <sup>23</sup>Nuì chichak matsataí Tipirias péprunmaya chíkich kanu táarmiayi. Yau Jesus Yúsan yuminkias tantan ayuramunam tíjiuch táarmatai <sup>24</sup>nu shuar, Jesussha ni unuiniamurísha nuì atsuiniakui, nu kanunam enkemáwar Kapernáum péprunam Jesusan eáktajtsa wearmiayi.

**Jesus apatkua áintsankete**

<sup>25</sup>Entsa amain Jesusan wáinkiar aniasarmiayi “Uunta, ¿urutía juísha támam?”

<sup>26</sup>Jesussha tímiayi “Ti nekas tájarme. Aents tujintiamu nekáa asarum éatsurme. Antsu tanta yuarum jémaru asarum éatrume. <sup>27</sup>Juyá yurumak amuukatin asamtai ti pachisairap. Antsu amuukashtin yurumak tuke iwiaaku pujustinian amaana nu takarsatniuiti. Nú yurumkanka Wi, Aents Ajasu asan, susattajrume. Yus Apa nuna túratniun surus “Juka shuáran Yáinkiertiniaiti” túrutui” tímiayi.

<sup>28</sup>Tutai inintrusarmiayi “¿Warí túratniuitiaí Yus wakerana nu umiktin?”

<sup>29</sup>Jesussha tímiayi “Yus akupta asa Winia enentáimtursarat tusa wakerawai.”

<sup>30</sup>Tutai aniasarmiayi “¿Aentsti tujintiamuka warí túrattam ii físar Ámin nekas enentáimtustin? Chikichcha túratá. <sup>31</sup>Yaunchu ii uuntri aents atsamunam maná yurumkan nayaimpinmaya susamun yurumáwarmiayi. Yus-Chichamnum núnik áarmaiti: “Nayaimpinmaya yurumkan Yus susamiayi.” Tu áarmaiti” tiarmiayi.

<sup>32</sup>Jesussha tímiayi “Wi tájana nu nekasaiti. Muisais atumí úntrin nayaimpinmaya yurumkan súsachmiayi. Antsu winia Apar yamáí nekas apatkun nayaimpinmaya súramui. <sup>33</sup>Iis, Yusaiya apatkunka, nayaimpinmaya tára nu súramui tura nekas apatuk asa ashí shuaran nekas iwiaakman súawai.”

<sup>34</sup>Tutai “Uunta, nu apatuk tuke amasta” tiarmiayi.

<sup>35</sup>Tura Jesussha tímiayi “Wiitjai nu apatuk nekas iwiaakman súana nu. Winí winiana nú shuar penké tsukamashtatui, tura Winia enentáimturna nusha tuke kitiaarchattawai. <sup>36</sup>Túrasha wi túramu wáinkiuermesha winia chichamur enentáimtatsrume. <sup>37</sup>Ashí shuaran winia Apar tsankatrukarmiania nu, Wíi shuar ajasartatui. Winin winiana núnaka penké nakitrashtatjai. <sup>38</sup>Wi wakeraj nuna túratniun táchaitjai antsu Winia akuptukmia nuna umirkatniun táwitjai. <sup>39</sup>Winia Apar akuptukuiti tura juna wakerawai. Ashí winia tsankatrukman emenkátsuk amuukatin tsawantaj iniantkiarat tusa wakerawai. <sup>40</sup>Yus Apa wakerana nu júiti. Ashí shuar Winia “Yusa Uchirinti” tu enentáimturkuí yamaram iwiaakman tuke takusat tusa wakerawai. Nú shuarnaka amuukatin tsawantaj iniantkittiajai” tímiayi Jesus.

<sup>41</sup>Tura Jesus “Wiitjai, nayaimpinmaya apatuk akupkamu” takui Israer-shuar Jesusan áujmatiarimiayi.

<sup>42</sup>Tura tiarmiayi “Ju Jesuschakait, Jusé uchiríya nu. Iikia ni aparísha nukurísha nékatsjik. ¿Itiurak “Nayaimpinmaya táraitjai” ta?” tiarmiayi.

<sup>43</sup>Jesussha tímiayi “Tu áujmatrukairap. <sup>44</sup>Shuáran winia Apar akúpturkachuitkiuinikia penké weanturkachainti. Tura Winia akupturna nuna amuukatin tsawantaj iniántkíttiajai. <sup>45</sup>Yúsnan etserniu áarmarın tawai “Ashí Yus jintintiamu ártatui”. Núnisan ashí Yusa chichamen antukar unuimiatainiakka Winí táiniawai’ tímiayi.

<sup>46</sup>‘Aya Wiki Yúsaiya tau asan Yusan wáinkiaitjai. Chíkichka penké wáinkiachuiti. <sup>47</sup>Ti nekas tájarme. Winia enentáimturna nú shuarka yamaram iwiaakman amuukashtinian takakui. <sup>48</sup>Wikia iwiaakman súana nú apatkuitjai. <sup>49</sup>Iis, atumí uuntri aents atsamunam maná yurumkan yúawariatcha ashí jákarmiayi. <sup>50</sup>Antsu Wi tájana nú apatkun shuar yúakka jákachartatui. <sup>51</sup>Wikia nayaimpinmaya iwiaaku apatkuitjai. Nu apatkun shuar yuakka tuke iwiaaku átiniaiti. Nu apatkun Wi susattaj nusha winia ayashruiti. Ashí shuar Yusaj iwiaaku pujusarti tusan winia ayashrun susattajai” tímiayi Jesus.

<sup>52</sup>Nuyá nuámtak áujmattsar tiarmiayi “¿Itiurak ni ayashinkesha ayurtamattaj?” tiarmiayi.

<sup>53</sup>Jesussha tímiayi “Ti nekas tájarme, Wi Aents Ajasu asamtai winia ayashur yúatniuitrume. Winia ayashur yúachmeka tura winia numpar umarchamka nekas iwiaaku pujatsrume. <sup>54</sup>Winia ayashrun yúana nuka tura winia numparun úmakka yamaram iwiaakman amuukashtinian takakui. Tura nu shuaran amuukatin tsawantaj iniántkíttiajai. <sup>55</sup>Winia ayashruka nekas yurumkaiti tura winia numparsha nekas umutainti. <sup>56</sup>Winia ayashruncha yúaka tura winia numparnasha úmaka Wijijai tsanin pujawai tura Wisha nu shuarjai tsaninkian pujajai. <sup>57</sup>Yus Apa, Winia akuptukuka, nu iwiaakma nérenniuiti. Tuma asamtai

ni iwiaakmariin iwiaaku pujajai. Núnisan Winia yurakka winia iwiaakmaruj iwiaaku pujustatui. <sup>58</sup>Nayaimpinmaya apatkun tajai. Ju apatuk maná yurumka áintsachuiti. Atumí uuntri maná yurumkan yuawarsha ashí jákarmiayi. Antsu ju apatkun shuar yúakka tuke iwiaaku pujustatui” tímiayi Jesus. <sup>59</sup>Núnaka Jesus Israer-shuar iruntainiam ununiarmiayi.

### Iwiaaku chicham

<sup>60</sup>Nu chichaman antukar Jesusa unuiniamuri chicharainiak “Nii tana nu ti itiurchat asamtai ¿yaki antukminiait?” tiarmiayi.

<sup>61</sup>Jesussha ni áujmatman nekáa tímiayi “Átum “ju chicham itiurchataiti” tárumek. <sup>62</sup>Wátsek, Wi nayaimpiniam pujumiaj nui waketkimtaisha ¿urukawaintrumek? <sup>63</sup>Warí, aya wakanik iwiaakman súwaiti. Ayashkia penké áantraii nekas iwiaaku awajsatniun. Wi tájana nujai imiá nekas wakankia iwiaaku awajsamniaiti” tímiayi Jesus. <sup>64</sup>Tura Jesus Nin enentáimtachun tura Nin suruktatna nunasha yaunchu neka asa ni unuiniamurin tímiayi “Atumincha winia chichamprun enentáimtachu tuke awai. <sup>65</sup>Nu asamtai tímiajrume “Shuáran winia Apar akupturkachmaitkiuinkia penké weanturkachainti” tímiajai” tímiayi Jesus.

<sup>66</sup>Nuyasha ni nemarniuri untsuri armia nu Jesusan ikiukiar atakka Nijiai wekasacharmiayi. <sup>67</sup>Nuyá Jesus ni tuse (12) unuiniamurin chicharainiak “¿Atumsha wétin wakerarmek?” tímiayi.

<sup>68</sup>Semun Pítrusha áikmiayi “Uunta, ¿yáinin wetaj? Ame chichammijiain nekas iwiaaku áminiaiti. <sup>69</sup>Ame Kristu asam nekas iwiaaku Yusa Uchirinme. Nuka enentáimtusar ti paant nékaji” tímiayi.

<sup>70</sup>Jesussha tímiayi “Ashí tuse (12) árumna nu achikiuitjarme nekas Wíi shuar ajastin. Tuma ain atumin chikichik iwianchiiti” tímiayi. <sup>71</sup>Nuna taku Jútas Iskariúin, Semunka uchirin, enentáimtus tímiayi. Jútassha ni unuiniamurintat Jesusan ukunam surukmiayi.

### Jesusa yachisha Nin enentáimtuscharmiai

**7** <sup>1</sup>Nu nankaamasmatai Jesus Kariréa nunkanam wekaimiai. Jutía nunkanam wéchamiaii Israer-shuara uuntri nui máataj tutai.

<sup>2</sup>Tura Israer-shuar aak aakmatai namperii jeatemamtai <sup>3</sup>Jesusa yachi wishikiainiak tiarmiayi “¿Urukamtai juisha pujam? Jutía nunkanam wetá, aisha ame unuiniamuram túram nuna íisarar. <sup>4</sup>Ashí shuar nekaawarat tákumka úukam túrawaip. Ti tujintiamu túriniaitkiumka ashí shuar íimmianum túratá” tiarmiayi. <sup>5</sup>Ni yachisha ishichkisha Nin enentáimtachu ásar tiarmiayi.

<sup>6</sup>Tura Jesus tímiayi “Winia tsawantur nampernum wétin jeatsui. Atumjainkia nánkas tsawant wétin penkeraiti. <sup>7</sup>Ju nunkanmaya aents

atumniaka kajertamatsume. Antsu ni tunaarin etsertin asamtai Wíniaka kajertuiniawai. <sup>8</sup>Átumka nampernum wetarum. Wikia tsawantur jeachkui wéatsjai.” <sup>9</sup>Juna tinia Jesuska Kariréa nunkanam juákmiai.

### Aak aakmatai nampernum Jesus timia nu

<sup>10</sup>Ni yachi wearmatai Jesussha nampernum wémiayi. Tura nekarawarain tusa úumak wémiayi. <sup>11</sup>Israer-shuara úuntrisha námper irunturmanum eakar “Nu aishmansha ¿tuin pujá?” tiarmiayi. <sup>12</sup>Ashí shuarsha Nin áujmatiarmiayi. Chíkich “pénkeraiti” tiarmiayi. Tura chikichcha “Pénkerchaiti. Aya anankartawai” tiarmiayi. <sup>13</sup>Tura Israer-shuara úuntrin ashamainiak uuk áujmatiarmiayi.

<sup>14</sup>Nampersha ajapén ajasmatai Jesus Yusa Uunt Jeen wayá shuáran unuiniamiayi. <sup>15</sup>Israer-shuara úuntrisha nuna ísar ti enentáimsar chichaak “Jusha unuimíatrachiatcha ¿itiurak imiá neka?” tiarmiayi.

<sup>16</sup>Jesussha tímiayi “Wi unuiniajna nu winia chichampruchuiti antsu Winia akuptukua Núnan unuiniajai. <sup>17</sup>Yus wakerana nuna shuar nekas umiktinian wakerakka winia chichamprun nekaattawai. Nekas Yúsnaikiuinka, nuna nekaattawai. Aya wi enentáimmiajain chichaakuisha, nuna nekaattawai. <sup>18</sup>Ni enentáimmiajai chichaana nuka ashí shiir enentáimtursarti tusa chichaawai. Antsu nin akupka nuna shiir awajsarti tusa wakerak, nekas wáitratsuk tawai. <sup>19</sup>Muisais Yusa akupkamurin atumí uuntrin amaschamka. Tuma ain nu umitsuk mantuatin wakerutarme” tímiayi Jesus.

<sup>20</sup>Nu shuarsha tiarmiayi “Wáurtsumek. ¿Ya mantamataj tusa wakera?”

<sup>21</sup>Jesussha tímiayi “Ayampratin tsawantai chikichkí túramtai ti enentáimtsumek. <sup>22</sup>Muisais ashí tsupirnaktinian akupkachmiayi. Antsu ni uuntrinka nuna akupka áiniawai. Tuma ain átumka Muisais akupkamu umiktai tusarum ayampratin tsawantaisha uchi áishmantsúpirnaitrume. <sup>23</sup>Wátsek, Muisais akupkamu uminkiatu tusarum ayampratin tsawantaisha uchi áishmantsúpirkurmekaka ¿urukamtai Wi ayampratin tsawantai áishmanka ayashí takamtsuk tsuármatai kajertarum? <sup>24</sup>Shuar túrana nu ísam wárik súmamtikiawaip. Antsu inintrúsam paant nekaam, nekasa nu enentáimtusta” tímiayi Jesus.

### Jesus Yúsnumia akupkamuiti

<sup>25</sup>Nuyá Jerusarénnumia shuar tiarmiayi “Maatai tuinia núchakait. <sup>26</sup>Tura nui ashí ántamunam étserei tura suntar páchiniatsui. ¿Ii uuntrisha “Nekas Krístuiti” tu enentáimtuiniawash? <sup>27</sup>Antsu nekas Kristu taa tuyan winiá nekanashtatui tura jupujamuka ashí nékaji” tiarmiayi.

<sup>28</sup>Jesus nuna antuk, Yusa Uunt Jeen wajá kakaram chichaak tímiayi “Winia nekararum tuyá winiaj nu nékarme. Kame núnisrum enentáimprume. Tura winia enentáirjai táchaitjai antsu winia Apar



akuptukuiti. Niisha ti nekas akupniusha átumka nékatsrume. <sup>29</sup>Antsu Winia akuptukuitkiui aiya tau asan Wikia nékajai” tímiayi. <sup>30</sup>Nuyá sepunam enkeataj táyat achikcharmiayi ni tsawantri jeachu asamtai. <sup>31</sup>Tura untsurí shuar Nin enentáimtusar “Kristu ta ¿nuna nankaamas aentsti tujintiamun túratpiash?” tiarmiayi.

#### “Eátkáttarme tura wáitkiashtatrumé” tímiayi Jesus

<sup>32</sup>Pariséusha Israer-patri úuntrisha Jesusnan timian antukar suntaran akupkarmiayi Jesusan achikiar sepunam enkeawarat tusar. <sup>33</sup>Nuyá Jessusha tímiayi “Aya ishichik tsawant atumjají pujustataj. Nuyá ataksha Winia akuptuku pujana nuí waketkittiajai. <sup>34</sup>Átumka eátkáttarme tura Wi wéajna nuí wéchamniaitkiuram wáitkiashtatrumé.”

<sup>35</sup>Israer-shuarsha nuamtak aniniaisarmiayi “¿Jusha tuí wéakuin iisha wáinkiashtatají. Israer-shuar apachnium pujuinia nuí we apachin ununiartatuak. <sup>36</sup>Nii timia nu iturkit. “Átumka eátkáttarme tura Wi wéajna nuí wéchamniaitkiuram wáitkiashtatrumé” tana nu iturkit?” tiarmiayi.

#### Yamaram iwiaakman súana nú entsa

<sup>37</sup>Jista amúamunam ti shiir najanawarmia nu tsawantají Jesus wajakí kakaram chichaak tímiayi “Shuar ni enentáin kitiamakka Winin taa umar kitiakén imíkrátí. <sup>38</sup>Winia enentáimturna nuka ni enentáiyá entsa wa áintsan yamaram iwiaakman súana nú entsa jiinkittiwai.”

<sup>39</sup>Nuna taku Jesus “Ashí Yúsan enentáimtusarun Yusa Shiir Wakaní súsatniuiti” tímiayi. Tura núnisan Yus-Papiniumsha áarmaiti. Antsu Jesus tuke nayaimpiniam wéatsain Yusa Wakaní shuar súsachmauyayi.

#### Shuarsha niisháa niisháa enentáimprarmiania nu

<sup>40</sup>Chíkich shuarsha nuna antukar “Ju nekas Yúsnan etserin tátinia núiti” tiarmiayi. <sup>41</sup>Chikichcha “Juka nekas Krístuítí” tiarmiayi. Tura chíkichkia Jesus Kariréanmayaiti tu enentáimiainiak tiarmiayi “Warí, ¿Kariréa nunkanmayá Kristu áminkiait? <sup>42</sup>Yus-Papinium paant tawai “Krístuka yaunchu uunt akupin Tawit weanmayá akiiniatniuiti, tawai. Tura Tawitia pépruriya Pirinnumia átiniaiti” tawai” tiarmiayi. <sup>43</sup>Tuma asamtai shuar niisháa niisháa enentáimprar kanakiarmiayi. <sup>44</sup>Chíkich aiya nuka “sepunam enkeatai” tiarmiayi túrasha túracharmiayi.

#### Israer-shuara uuntri Jesusan enentáimtuscharmiania nu

<sup>45</sup>Suntarsha waketkiarmiayi. Tura Pariséusha Israer-patri uuntrisha “¿Urukamtai itiachuram?” tiarmiayi.

<sup>46</sup>Suntarsha tiarmiayi “Chikichkisha ju áishman chichaa áanis chichaschaiti” tiarmiayi.

<sup>47</sup>Nuyá Pariséu tiarmiayi “Atumsha anannarume. <sup>48</sup>Pariséutisha uuntcha nuna enentáimtuiniawash. <sup>49</sup>Penké shuarka yaunchu akupkamun nékachua nuka yajauchiniam yuminkramu ániawai” tiarmiayi.

<sup>50</sup>Nikiutémusha, kashi Jesusan tarimia nu, Pariséuitiat tímiayi <sup>51</sup>“Ii shuartikia, shuar ni túramun etserkamu ántutsuk súmamtikiachminiaiti” tímiayi.

<sup>52</sup>Nuinikia niisha tiarmiayi “Wats, amesha Kariréanmayanchuashitiam. Yus-Chicham áujsam nekaattame. Kariréanmaya Yúsnan etserin penké táiniatsui” tiarmiayi.

### Nuwá wáinmakman Jesusan itiararmiania nu

<sup>53</sup>Nuyá ashí ni jeen wakеткиarmiayi.

**8** <sup>1</sup>Tura Jesuska Uriwiu náinnium wémiayi. <sup>2</sup>Tura kashin tsawar Yusa Uunt Jeen atak támatai ashí shuar Nin káutkarmiayi. Túrawarmatai Jesus pujus unuiniarmiayi. <sup>3</sup>Nuyá Israer-shuara jintinniurisha Pariséusha nuwan wáinmakman Jesusan itiararmiayi. Tura ashí iruntramunam ajapén awajsarmiayi. <sup>4</sup>Tura Jesusan tiarmiayi “Uunta, ju nuwá tsanirma pujá achinkiyai. <sup>5</sup>Muisais akupkamunmasha nuna túraka “kayajai tukurar máatniuiti” tawai. ¿Amesha warintmea?” tiarmiayi. <sup>6</sup>Aya mamikmar nekapsatai tusar tiarmiayi. Nin sumamtikiatniun wakermiayi.

Nuyá Jesus tsuntsumá ni uwejejai nunká áarmiayi. <sup>7</sup>Tura tuke iníam wajaki tímiayi “Ayu, atumiya tunáa túrichu ákunka kayan achik nin emka tukuti” tímiayi. <sup>8</sup>Tura nuna ti, ataksha tsuntsumá nunká áimiayi.

<sup>9</sup>Tura ni chichamen antukar ni enentáin sumamawar úntnumia júki chikichik chikichik jiinki wéarmiayi.

Ashí wéarmatai Jesus Niniki nuwajai juákmiayi. <sup>10</sup>Jesussha wajaki aya nuwanak wáiniak tímiayi “¿Ámin súmamtikramainia nusha tuiñ pujuinia. Chikichkisha áwak?” tímiayi.

<sup>11</sup>Niisha “Atsá, Uunta. Chikichkisha atsawai” tímiayi.

Nuyá Jesus tímiayi. “Ayu. Wisha súmamtikiatsjame. Yamaikia weme atakka tunáa túrawaip” tímiayi.

### Jesus tsáapnia áintsankete

<sup>12</sup>Ataksha Jesus Yusa Uunt Jeen iruntrarun tímiayi “Ju nunkanam Wi tsáapnia áintsan shuara enentáin tsáapniajai. Ashí Wijiai tsanin wekaana nú shuar ni enentáin kiritniunam wekasashtatui antsu tsáapnin yamaram iwiaakman súana nujai wekasattawai.”

<sup>13</sup>Pariséu nuikia tiarmiayi “Ame péñkerum tau asam támena nu áantrai.”

<sup>14</sup>Jesus tímiayi “Tuyá winiaj tura tui weaj nu nékatsrume, tura Wikia nékajai. Tuma asan winia péñkerun táyatnak tájana nu péñkeraiti. <sup>15</sup>Ju

nun<sub>kan</sub>mayá aents enentáimmiájai enentáimtakrum ti s<sub>um</sub>amtikrume. Tura Wikia chikichkinkesha s<sub>um</sub>amtiktsujai. <sup>16</sup>Tura s<sub>um</sub>amtikkiunka awajitsuk túrajai. Iis, Wiki shuar túramun pen<sub>ker</sub>ashit tusan enentáimtsujai antsu winia Apar Winia akuptukua nusha Wijíai métek shuar túramun nékawai. <sup>17</sup>Atumí akupkamuriin áarmaiti: “Jimiará shuar mai nú chichamnak tákuinkia nu chicham nekasaiti.” <sup>18</sup>Wátsek Wisha winia Aparsha mai métek taji. Winia Aparsha akuptukuiti” tímiayi.

<sup>19</sup>Tutai “¿Ame apasha tuj pujá?” tiarmiayi.

Jesussha tímiayi “Átumka Winiasha winia Aparsha nékatsrume. Winia nékarkurmeka winia Aparsha nekaawaintrume.” <sup>20</sup>Nuna Yusa Uunt Jeen Yusa kuítr<sub>in</sub> suinia nuí tímiayi. Tuma ai<sub>n</sub> sepunam en<sub>keat</sub>niun achikcharmiayi ni tsawantr<sub>i</sub> jeachu asamtai.

### “Wi wéajna nuí wéchaniaitrumé’ tímiayi Jesus

<sup>21</sup>Jesus ataksha tímiayi “Wikia wéajai. Atumsha eátkáttarme tura wi wéamunam wéchaniaitkiuram atumí tunaaríjia<sub>in</sub> jakattarme.”

<sup>22</sup>Israer-shuarsha tiarmiayi “Wi wéamunam wéchaniaitrumé” tutai, nu<sub>in</sub>kia máamatpiash” tiarmiayi.

<sup>23</sup>Nu<sub>in</sub>kia Jesus tímiayi “Átumka nun<sub>kay</sub>aitrume antsu Wikia nayaimpinmayaitjai. Ju<sub>n</sub> nun<sub>kay</sub>aitrume tura Wikia juy<sub>anch</sub>uitjai. <sup>24</sup>Tuma asamtai tájarne “Atumi tunaaríjia<sub>in</sub> jakattarme.” Nekas Wi tájana núitjai. Tura nu enentáimtachkurmeka atumi tunaaríjia<sub>in</sub> jakattarme” tímiayi.

<sup>25</sup>Niisha aniasarmiayi “¿Amesha yáitiam?”

Jesussha tímiayi “Yaunchu tájarne. <sup>26</sup>Nu arantcha atumin s<sub>um</sub>amtikiatjarum tusan ti tíminiaitjai. Winia Apar akuptukua nuka tuke nekasa nuna tawai. Tura aya ni taman antukan ashí shuaran nunak tajai” tímiayi. <sup>27</sup>Tuma ai<sub>n</sub> ni Apar<sub>in</sub> áujmatman pen<sub>ké</sub> nekaacharmiayi. <sup>28</sup>Tuma asamtai tímiayi “Aents Ajasuitjiana ju<sub>n</sub>, numiniam ajintruarum yakí takuriakrumin nújia<sub>in</sub>kia nekarattarme. Wi tájana núitjai tura winia enentáirjia<sub>in</sub> takatsuk aya winia Apar unuitiurmanak tájai. <sup>29</sup>Winia akuptukua nuka tuke Wíjia<sub>in</sub> pujawai. Winia Apar wakeramun tuke shiir túrakui ikiurkichiuiti” tímiayi. <sup>30</sup>Tutai untsur<sub>i</sub> shuar Nin nekas enentáimtusarmiayi.

### Yus-shuarsha tura tunaanum emetamusha

<sup>31</sup>Israer-shuaran Nin shiir enentáimtusarmia nuna Jesus tímiayi “Wi tájarmena nu yawetsuk túrakrumka nekas winia unuiniamur áatrume. <sup>32</sup>Nújia<sub>in</sub>sha timiá nekas ana nu nekaattarme tura nekas an<sub>kan</sub>t ajastatrume” tímiayi.

<sup>33</sup>Niisha tiarmiayi “Iisha Apraám weeitji. Chikicha takarniur átai tusar pen<sub>ké</sub> emetachmaitji. ¿Urukamtai “An<sub>kan</sub>t ajastatrume” tame?” tiarmiayi.

<sup>34</sup>Jesus tímiayi “Timiá nekasaiti, ashí shuar tunaan túruinia nuka nu tunaajai emetamuiti. Tuma asa takarniua núnisan ajasuiti. <sup>35</sup>Takarniusha ajapnamnia asamtai Yus atumin ajapramamniaitrum. Tura Akupniu Uchirínkia ni Aparíjiaj tuke pujawai. <sup>36</sup>Tuma asamtai Akupniu Uchirí ankant awajtamsamtainkia imiá nekas ankant pujostatrum. <sup>37</sup>Átum Apraám weeatrum nekejai. Túmaitatrum winia chichamur ántachu asarum mantuataj tárume. <sup>38</sup>Winia Apar iniaktursamun áujmatjai. Átumka atumí uuntri timia túrarme” tímiayi.

<sup>39</sup>Tutai niisha tiarmiayi “Íkia Israer-shuar asakrin ii úuntrinikia Apraámaiti” tiarmiayi.

Tura Jesus tímiayi “Nekas enentáimin Apraám weeitkiurmeka níya núnis túrawaintrume. <sup>40</sup>Nekas ana nuna Yus iniaktursamtai nuna ujakjarne, tuma aijn mantuataj tarume. Apraámka nuní túrachmiayi. <sup>41</sup>Antsu atumí uuntri túrana áintsarum túrarme” tímiayi.

Tutai niisha tiarmiayi “Warí, tsanirnumiá akiiniachuitji. Ii uuntri Yúskete. Niisha ii Aparínti.”

<sup>42</sup>Tura Jesus tímiayi “Yus nekas atumí Aparíntkiuinikia Winiasha anentíntrume Yúsnumiá tau asamtai. Wisha winia enentáimmarjai juí táchaitjai antsu Yus akuptukuíti. <sup>43</sup>¿Urukamtai Wi tájana nu imiá nékatsrum? Wi tájana nu nakitia asarum winia chichamur ántatsrum. <sup>44</sup>Atumí aparínkia úunt iwianchiiti. Tura niiniu asarum nii wakera nu túrarme. Yámankamtaiksha úunt iwianchkia tuke mankartiniaiti. Nekas ana nunasha nakitiawai tuke wáitrin asa. Wáittraksha níniunak chichaawai. Iis, waitia uuntri asa tuke wáitriniaiti. <sup>45</sup>Tura Wikia nekas takuí átum enentáimtursum. <sup>46</sup>¿Yaki chikichkí tunaajai súmamtikruamniait? Nuikia Wi nekasa nuna tau aijsha ¿urukamtai enentáimtursum? <sup>47</sup>Yús-shuarka Yus timian ántawai tura átum Yúsnachu asarum Wi tájana nu nakitiarme” tímiayi.

### **Apraám akiintsajin Jesus pujumiayi**

<sup>48</sup>Nuikia Israer-shuar tiarmiayi “Maa, ti nekas tátsujik “Ame Samarianmaya shuáraitme. Tuke yajauch ániawai nusha. Nu arantcha iwianchrukuitme amesha” nekas taji” tiarmiayi.

<sup>49</sup>Jesusha tímiayi “Iwianchrukchaitjai. Áyatik winia Aparun shiir enentáimtikiajai. Tura átumka yajauch chichartarme. <sup>50</sup>Wikia “shiir enentáimturarti” tátsujai túrasha Yuska ashí shuar Winia shiir enentáimturat tusa wakerawai. Niisha Yus asa ashí shuar túramun penkerashit tusa nekaattawai. <sup>51</sup>Ti nekasaiti. Wi tájana nuna enentáimta nú shuarka penké jákashtiniaiti” tímiayi.

<sup>52</sup>Nuínkia Israer-shuar tiarmiayi “Pai, yamaikia ti paant íwianch takakme. Apraámsha ashí Yúsnan etserniusha jákaruiti tura Ame “Wi tájana nuna enentáimtaka penké jákashtiniaiti” tátsumek

tiarmiayi. <sup>53</sup>¿Nuñkia ii uuntri Apraám nan̄kaamaskaitiam. Niisha tura Yúsnan etserniusha jákacharuk áinia. Itiurak imiá nan̄kaamantu enentáimtumam?” tiarmiayi.

<sup>54</sup>Jesussha tímiayi “Wiki shiir enentáimtumaknaka pen̄ké áantraiiti. Antsu Winia shiir enentáimturna nu winia Aparuuti. Nusha átumka “winia Yúsruiti” tárumna núiti. <sup>55</sup>Nusha táyatrum Nin nékatsrume. Wikia Nin nékajai. “Nin nékatsjai” tákunka atumjái métek wáitrin áintjai. Tura Nin neka asan Nii tana nuna tuke túriniaitjai. <sup>56</sup>Apraámka, atumí uuntri, imiá yaunchu jákaiat Wi ju nun̄kanam tátinian wararas nákasmiayi. Tura wáitiak ti shiir warartusmiayi” tímiayi.

<sup>57</sup>Nuyá Israer-shuar Jesusan tiarmiayi “Warí, sen̄kuenta (50) uwi takaktsume túmaitiatam Apraáman wáinkiamjai tame.”

<sup>58</sup>Jesussha tímiayi “Ti nekas tájarne, Apraámka pujatsajin Wikia pujajai” tímiayi Jesus.

<sup>59</sup>Nuna takui kayan achikiar “Jesusan tukutai” tiarmiayi. Tura Jesus úumak ni matsatmanum ajapénin weak Yusa Uunt Jeñia jiinki wémiayi.

### Kusuru akiinian Jesus tsuármiania nu

**9** <sup>1</sup>Jesus ni unuiniamurijjai wesa áishman̄kan kusuru akiinian wáinkiamiayi. <sup>2</sup>Ni unuiniamurisha aniasarmiayi “Uunta, jusha ¿urukamtai kusuru akiiniawit. Yana tunaarrijajin kusuru akiiniait. Niiniuajampiash, aparíniuajampiash túrunawit?” tiarmiayi.

<sup>3</sup>Jesus tímiayi “Ni tunaarrijajinchusha ni aparíniuajinchusha túrunaiti. Antsu Yus ni ayashín túratniua nu paant atí tusa túrunaiti.

<sup>4</sup>Tsawajkia takastiniaiti. Yamaikia Winia akuptukua nuna takatrin túratniuitjai. Kashi ajasmatai takastin atsuttawai. <sup>5</sup>Jú nun̄kanam pujakun shuara enentáin tsáapnimtikratniuitjai” tímiayi. <sup>6</sup>Nuna chichas nun̄ká usukmi nun̄kajai pachimiar kusuru jin yakarmiayi.

<sup>7</sup>Nuyá chichaak “Siruí pajamtai entsanam nijiamauta” tímiayi. Siruísha nu chichamnum “akupkamu” tawai. Kusurusha we nijiamar pen̄ker íimiar támiayi.

<sup>8</sup>Nuyá ni írutkamurisha nuik wáinin ármia nusha tiarmiayi “Juka pujus tuke kuítian seamniuya núchakait.” <sup>9</sup>Chíkich “Ee, núkete” tiarmiayi. Chikichcha “Atsá, núchaiti; kame nuash tumainti” tiarmiayi.

Tura nin̄ki “Ee, wiitjai” tímiayi.

<sup>10</sup>Tutai aniiniak “¿Itiurak yamaikia íimiam?” tiarmiayi.

<sup>11</sup>Niisha tímiayi “Áishman̄ Jesusa nu tsakusan jíirun yakartur “Siruí pajamtai entsanam nijiamauta” turutmiai. Takui wena nijiamaran paant iimpramjai” tímiayi.

<sup>12</sup>Tutai “Nu áishmansha tuin̄ pujá” tiarmiayi.

Niisha “Cha, nékatsjai” tímiayi.

**Pariséu kusuru tsuárman inintrusarmiania nu**

<sup>13</sup>Nuyá kusuru tsuárman Pariséunam júkiarmiayi. <sup>14</sup>Kame Jesus kusurun tsuarmia nuĭ ayampratin tsawantauyayi. <sup>15</sup>Tuma asamtai Pariséusha itiurak ímniun tusar aniasarmiayi.

Niisha tímiayi “Jiiruin tsakusan yakaarántai, nijiamaran paant iimjiai.”

<sup>16</sup>Nuyá chíkich Pariséu shuarnumiā nuamtak tunaiyar “Juna tsuáruka Yúsaiyanchuiti. Kame ayampratin tsawantai túraiti” tiarmiayi.

Tura chikichcha “Tunáa shuaraitkiuñkia júnisan túratniun tujinkiaayi” tiarmiayi. Nujai akannaikiarmiayi.

<sup>17</sup>Tsuármancha ataksha aniasarmiayi “Ámin tsuármarua nu ¿warí enentáimtam?” tiarmiayi.

Tutai “Wikia “Yúsnan etserniuiti” tajai” tímiayi.

<sup>18</sup>Tura Israer-shuar nekas kusuruítai yamá ímiui tu enentáimtuscharmiayi Pariseu. Tuma ásar ni aparíncha untsukar <sup>19</sup>inintrusarmiayi “¿Ame uchiram kusuru akiinia tárugna nukait. Itiurak yamaikia iimia?” tiarmiayi.

<sup>20</sup>Ni aparísha tiarmiayi “Ii uchirínkia kusuru akiiniama nu nékaji.

<sup>21</sup>Tura iisha nékatsji itiurak yamaikia iimia. ¿Yátsuk péñker tsuáruit?

Niisha úuntchakait, nii aniastarum. Niñki ujatmakarti” tiarmiayi.

<sup>22</sup>Sapijmiak tiarmiayi. Israer-shuara úntrínkia “Jesus Yus akupkamu asa nekas Krístuítai” tuinia núnaka Israer-shuara iruntainmaya jiki akupnakti tiniu ásarmatai tsuarma aparí ashankarmiayi. <sup>23</sup>Nu asamtai ni aparí “Niisha úuntchakait, nii aniastarum” tiarmiayi.

<sup>24</sup>Nuñkia Israer-shuara uuntri kusuru tsuárman ataksha untsuk tiarmiayi “Yus ímmianum nekasa nu titiá, ju áishmanñka tunaarinniuiti nékaji” tiarmiayi.

<sup>25</sup>Tutai tímiayi “Kame tunaarinchashit. Nékatshajai. Antsu junak nékajai. Yaunchu kusuruítai yamaikia ímjiai.”

<sup>26</sup>Ataksha aniiniak “¿Itiurtámkama. Itiur ímtikrammia?” tiarmiayi.

<sup>27</sup>Niisha tímiayi “Yaunchu tájarme tura anturtatsrume. ¿Urukamtai ataksha titi tusa wakerarum. Niiniu ajastin enentáimprurmek?” tímiayi.

<sup>28</sup>Nuñkia katsekkar “Ámeke ní shuarínme. Tura iikia Muisaisa shuaríntji, tiarmiayi. <sup>29</sup>Yus Muisaisan akupkaiti iikia nékaji antsu nu áishmanñ nékatsji. ¿Tuyantskait?” tiarmiayi.

<sup>30</sup>Áishmanñ tsuarma tímiayi “¿Ausha itiurtsuk áminiait? Winia ímtikrurua nu átumka nékatsrume tuyanñkit. <sup>31</sup>Paant nékaji tunaarinniun Yus anturtsui. Tikishmatar ni wakeramun túruinia nunak anturui. <sup>32</sup>Yáunchusha kusuru akiinian tsuáruka tuke atsuwaiti. <sup>33</sup>Ju áishmanñ Yúsaiyanchuitkiunñka penké túrachaayi” tímiayi.

<sup>34</sup>Nuñkia tiarmiayi “Ámeke tunaarintin akiiniaiatmesha ¿in jintintin átaj tamek?” Nuna tiar jiki awemarmiayi.

### Wakanjín kusurua nu

<sup>35</sup>Kusuru tsuárman jiīki awemarma nuna Jesus nekaamiayi. Tura wáiniak “Yusa Uchiría nu enentáimtamek” tímiayi.

<sup>36</sup>Tsuarma tímiayi “Uunta, turuttia wisha nekaan enentáimtustaj.”

<sup>37</sup>Jesussha tímiayi “Wainme. Wiitjai ámijjai chichaajna nu.”

<sup>38</sup>Tutai, tikishmatar “Uunta, enentáimtajme” Jesusan tímiayi.

<sup>39</sup>Nuyá Jesus tímiayi “Shuara enentáin nekaan, akantratajtsan táwitjai. Ni enentáin kusuru āin iimtikinian tura anānmamuk “Yusnan nekaan paant iimjai” tana nuna ukusturtinian táwitjai” tímiayi.

<sup>40</sup>Tutai Pariséu shuar nūi pujuarmia nu nuna antukar “¿Nuīkia iikia kusurukaitiaj’?” tiarmiayi.

<sup>41</sup>Jesussha tímiayi “Átum kusuruitkiurmeka atumí tunaari wáinchakrum sumamachu áintrume. Tura “paant iimjai” tau asarum sumamaitrume” tímiayi.

### Iikia murikiua áintsar aji

**10** <sup>1</sup>Jesus tímiayi “Wi tájana nu ti nekasaiti. Shuar murikiun takakna nu ni murikr̄in wenuimiunam kashi ikuiawai. Tura murik wenuimiunam pujuiniakui yajauch shuar murikiun kasamkatniun wakerakka wáitiniam waȳachmin asa tanishnum waruk yajá waȳawainti.

<sup>2</sup>Antsu murikiu wáinniuka wáitiniam waȳawai. <sup>3</sup>Waiti wáinniuka nekas murikiun wáinniun wáitin uratui. Muriksha ni wáinniur̄i chichamen nékainiawai. Niisha ashí ni murikr̄in chikichik chikichik náar̄in anaitius untsúawai. Tura tsawāikia ni murikr̄in jiīki ayurtainiam yarumui.

<sup>4</sup>Tura ashí ni murikr̄in jiīr émtuki wéawai. Muriksha ni chichamen ántuiniak untsuam nemarainiawai. <sup>5</sup>Chíkich shuárnaka nékachu ásar nemarainiatsui. Antsu ni chichamen nékainiachu ásar pisainiawai.”

<sup>6</sup>Nu métek-taku chichamnaka Jesus áujmatsamiayi tura shuar antukar nekaacharmiayi.

### Pénker wáinniuka Jesusaiti

<sup>7</sup>Nuyá Jesus tímiayi “Ti nekasan tájarme. Wenuimiu wáitir̄i murik wainia nuka Wiitjai. Shuarsha murikiu áintsar Winí waȳamin áiniawai.

<sup>8</sup>Wi táatsāin ashí táaruka kasa áiniak winia shuarun kasamkatai tusa wakeriarmiayi. Tura winia murikiur Wíi shuar áiniak nu shuaran anturkacharmiayi. <sup>9</sup>Wikia wáititjai. Ashí Winin waȳāka uwemprattawai. Tura murikiua áintsan̄ wenuimiunmayā jiīnki pénker yurumáttawai tura atak wayá ayamprattawai’ tímiayi.

<sup>10</sup>‘Kásaka aya kasamkatniuncha máatniuncha emesratniuncha wakerawai. Antsu Wikia yamaram iwiaakman tuke shiir atsumtsuk takusarti tusan táwitjai. <sup>11</sup>Wikia pénker wáinniuitjai. Pénker wáinniuka

ni murikrin uwemtikrartaj tusa jakattawai. <sup>12</sup>Antsu aya kuitjai takauka ni murikrichu ániakui tura nekas wánniuchu asa péñker wáintsui. Kame uunt yawá winiakui murikiun ikiuki pisaawai. Uunt yawasha murikiun achik tsakinmawai. <sup>13</sup>Nu shuarsha akikiam takáa asa murikiun enentáimtsui. Nu asamtai aya pisaawai' tímiayi.

<sup>14-15</sup>Wikia péñker wánniuitjai. Winia Aparsha nékarui. Wisha Aparun nékajai. Núnisnak murikrun nékajai tura winia murikrusha nékarui. Wisha murikiun uwemtikrartaj tusan jakattajai. <sup>16</sup>Chíkich muriknasha takakjai. Nusha ju wenuimiummayanchu ániawai. Nunasha itiattajai. Nu muriksha Winia umirtukar ashí métek matsamsar chikichík wenuimiummaya ajasartatui tura chikichik wáinin átatui' tímiayi.

<sup>17</sup>Winia murikrun uwemtikrartaj tusan jakattajai turan atak nantaktiatjai. Nu asamtai winia Apar anentui. <sup>18</sup>Wi wakerakun jakattajai. Wi wakerachkuinkia chíkichkia mantuachminiaiti. Jákatniuncha tura nantaktinniasha winia Apar surusuiti" tímiayi Jesus.

<sup>19</sup>Israer-shuarsha nuna antukar niisháa enentáimprar kanakiarmiayi. <sup>20</sup>Untsurí tiarmiayi "¿Urukamtai ántarum wáuruk tausha. Yajauch wakanin takaktsuk?" <sup>21</sup>Tura chikichcha tiarmiayi "¿Yajauch wakantrinniasha núnisan chichasminkiait. Yajauch wakantrinniasha kusurun ímtikramniashit?" tiarmiayi.

### Israer-shuarka Jesusan nakitiarmiania nu

<sup>22</sup>Micha nantutin Israer-shuar Jerusarénnum namperan najanainiawai. Nu nampernumsha Yusa Uunt Jee atak jeamman enentáimtuiniawai.

<sup>23</sup>Jesussha Yusa Uunt Jee áachiniam wekasamiayi Sarumúnka wáitiria nui.

<sup>24</sup>Israer-shuarsha Nin téntakar tiarmiayi "¿Ame nekas Krístukaitiam? Ju chichamaik etserkata. ¿Urukamtia nekas paant tátsum?" tiarmiayi.

<sup>25</sup>Tutai Jesus tímiayi "Yaunchu tiniu ain enentáimturachmarme. Winia Apar akupkamun takaajna nu ti paant awajtawai. <sup>26</sup>Tura átumka winia murikruchu asarum enentáimturtsurme. <sup>27</sup>Wisha winia murikrun untsuam anturtuiniak nemartuiniawai. Wisha wínianak mash nékajai. <sup>28</sup>Tura yamaram iwiaakman tuke jákashtinian súajai. Nu asamtai niisha menkakachartatui antsu Wi wainkia asamtai ¿yaki jurutkit? <sup>29</sup>Winia Apar murikiun surusuiti. Niisha ashí nankaamas kakaram asamtai ¿yaki uwejeyan atankit? <sup>30</sup>Wisha winia Aparjai iisha aya chikichkiitji" tímiayi Jesus.

<sup>31</sup>Tutai Israer-shuarsha atak kayan achikiar tukutaj tiarmiayi.

<sup>32</sup>Jesussha tímiayi "Winia Aparu kakarmarijai ti untsuri péñkera nuna takasuitjai. ¿Tújaimpia mantuattarum?"

<sup>33</sup>Israer-shuarsha Nin tiarmiayi "Péñker túra asakmin máataj tátsuji antsu Yus yajauch chicharkumin túrattajai. Ámeka shuáraitatam Yusa nuke enentáimtumame" tiarmiayi.



<sup>34</sup>Nuyá Jesussha tímiayi “Atumí akupeamuríin Yus timia nu áarmaiti: “Átum yúsaitrume” tawai. <sup>35</sup>Kame Yus-Papinium aarma nu tuke nekaschakait. Tuma asamtai ni chichamen antukarun Yuska “yúsaitrume” takui nuikia ti nekaschakait. <sup>36</sup>Niisha yúsaitkiuinikia nuikia Yus Apa anaikia ju nunkanam akupkamu asan ti nekas Yúschakaitaj. Nújainkia wi “Yusa Uchiríntjai” takui çitiurak “Yusan yajauch chicharui” túrutrum? <sup>37</sup>Winia Apar túramu túrachkuinikia enentáimtursairap. <sup>38</sup>Tura nekas túrakuinikia enentáimtursatarum. Tura Winia nakitrakrumsha nuikia wi túramu enentáimtustarum. Nujainkia winia Apar Winin pujamu ashí nekaattarme. Núnisnak Wisha Niin pujajai. Iisha chikichkiitji.” <sup>39</sup>Tutai ataksha sepunam enkeatai tiarmiayi. Túrasa Jesus uwempramiayi.

<sup>40</sup>Nuyá Jesus Jurtañ entsa amain wé yaunchu Juan imiakrattainium pujusmiayi. <sup>41</sup>Ti untsurí shuar iyuwar tiarmiayi “Nekas Juanka aentsti tujintiamun túrachiat ashí Jesusnan tímia nu nekasaiti” tu tiarmiayi. <sup>42</sup>Nuisha untsurí Jesusan enentáimtusarmiayi.

### Rásaru jakamu

**11** <sup>1</sup>Petania péprunam áishman, ni naari Rásaru, jaa pujumiayi. Nu péprunam Marí ni kajjijai Mártajai pujumiayi. <sup>2</sup>Niisha Rásaru umai ármiayi. Nu Marisha ukunmanka kunkuinian sumak Jesusan kuer ni intiashjijai japirmiayi. <sup>3</sup>Tura Rásaru jaakui ni umai Jesusan chichaman akuptuiniak tiarmiayi “Uunta, ame amikrum jaawai.”

<sup>4</sup>Jesussha nuna antuk tímiayi “Tuke jakataj tusa jaatsui. Antsu Yusa kakarmarisha tura ni Uchirí kakarmarisha jú sunkur tsuarmanum paant atí tusa jaawai.” <sup>5</sup>Jesus Mártancha ni kajincha tura ni umai Rásaruncha nekas aneemiayi. <sup>6</sup>Túmaitiat Rásaru jaawai taman antukiat ni pujamunam jimiará tsawant pujusmiayi. <sup>7</sup>Nuyá ni unuiniamurín “Ataksha Jutía nunkanam wetái” tímiayi.

<sup>8</sup>Tura ni unuiniamurisha tiarmiayi “Uunta, nuiksha Israer-shuar kayajai tukurmar mantamatai tícharmaka. ¿Nuñ ataksha wétai támek?”

<sup>9</sup>Jesussha ju métek-taku chichaman tímiayi “Tsawajkia páantchakait. Tsawaj wekaana nu paant asamtai tukumkashtatui. <sup>10</sup>Tura kashi wekaana nusha kirit asamtai tukumkátawai. Núnisan Wíi tuke pujakun winia takatron takastiniaitjai. Túraknasha iturchatan wáinkiashtatjai.” <sup>11</sup>Nuyásha Jesus atak tímiayi “Ii amikri Rásaru kanarai. Wi ishintiartatjai.”

<sup>12</sup>Tutai ni unuiniamurí tiarmiayi “Uunta, aya kanarka nuinikia péñker ajastatui.” <sup>13</sup>Jesuska Rásaru jakamu nékayat “kanarai” tímiayi. Tura ni unuiniamurí Rásaru kajinmakua áintsan kanarai enentáimprarmiayi.

<sup>14</sup>Jesus nuikia ti paant tímiayi “Rásaru yamaikia jakayi. <sup>15</sup>Tura nuñ pujuscha asan kúntuts pujatsjai. Jean túrattajna nu ísrum ti nekas

enentáimtusattarme. Nuna nekaan shiir enentáimjai. Wátsek, iyutai.”  
 16Nuyá Jimiampramu Tumas chíkich unuiniamurí nui armia nuna “Iisha weri Nijjiaí métek jakatai” tímiayi.

### Iwiaaku átinniasha jaka nantaktinniasha Jesus nérenniuiti

17Nui taa, Rásarun kuaru tsawant ikiusman wáinkiamiayi. 18Petania pépruka Jerusarénnumia maintainiú kirumitru áinis tjiuchiiti. 19Tuma asamtai untsurí Israer-shuar Márta Marísha, ni umai jakamtai uutkui atsankratay tusa weriarmiayi. 20Márta Jesus tjiuch ajasun nekáa inkiuntajtsa wémiayi. Antsu Marikia jeá pujumiayi. 21Tura Marta Jesusan inkiun tímiayi “Uunta, Ame pujakminkia winia umar jákachaayi. 22Tura tuke nékajai ashí Yus seamna nuna súramui.”

23Jesussha tímiayi “Ame umaimisha nantaktiatui.”

24Márta tímiayi “Nekas, ashí amuamunam jákaru nantaktin tsawantai nantaktiatui. Nuna nékajai.”

25Nuyá Jesus tímiayi “Iwiaaku átinia nérentin asan Wikia iniantkartiniaitjai. Winia enentáimturna nuka jakasha nantaktiatui.

26Tura ashí iwiaaku pujana nusha Winia enentáimturaka penke jákashtatui. ¿Nu nekasaiti tu enentáimtamek?”

27Niisha “Ee, Uunta, ame Yusa Uchirínme. Krístuitme, uwentikkiartin jú nunkanam tátinia nu” tímiayi.

### Jesus Rásaru iwiarsamunam taa úutmiania nu

28Márta nuna ti, ni kai Marin untsuk úukan tímiayi “Uunt jui taa untsurmawai.” 29Marisha nuna antuk wárik wajaki Jesusa iyuttsa wémiayi. 30Jesussha péprunam jeatsuk Marta inkiunmanum pujumiayi. 31Marí wari wajaki wématai Israer-shuar nu jeanam atsankratssa pujuiniasha nuna ísar weriarmiayi. Iwiarsamunam úuttiasa wétsuash tusa weriarmiayi. 32Marisha Jesus pujamunam jeá tikishmatar tímiayi “Uunta, Ame pujakminkia winia umar jákachaayi.”

33Jesussha Marina tura nijjiaí útuncha wáiniak wáitnentaimta asa ti kúntuts pujusmiayi. 34Tura “Tui iwiarsamarum” tímiayi.

Niisha “Uunta, iitia” tiarmiayi.

35Jesussha útmiayi. 36Israer-shuarsha “Ti aneatsuk” tiarmiayi. 37Tura chíkich “Kusuru tsuaruchukait. Nii pujakuisha Rásaru jákaampiash” tiarmiayi.

### Rásaru iniantkimiu

38Jesussha ti kúntuts enentáimiar iwiarsamunam weankámiayi. Náinnium asa paka taurma áuyayi. Tura kaya atutkamuyayi. 39Tura Jesus “Kaya jurustarum” tímiayi.

Rásaru umai Marta tímiayi “Uunta, kuaru tsawant jákaiti. Mejeatsuk’ tímiayi.

40 Tura Jesus tímiayi “Yus enentáimtakmeká Yusa kakarmari wáinkíattame tíchamkajam.” 41 Nuikia kayarín uratiarmatai Jesus nayáimpin iis tímiayi “Aparu, Winia anturtakmin yumínsajme. 42 Winiasha tuke anturtame tura ju shuaran péñker enentáimtikrataj tusan tajai. Ame akuptukuitmena nuna nekarmawarti.” 43 Nuna tinia kakaram untsuak “Rásaru jíinkitia” tímiayi. 44 Nujáinkia penuarmartiuk jíinkimiayi. Yapinmasha jaanchjiái ijiamuyayi. Tura Jesus “Atirtarum. Wéti” tímiayi.

### Jesusan achiktin chichaman jurusarmiania nu

(Mat. 26.1-5; Mar. 14.1-2; Ruk. 22.1-2)

45 Untsurí Israer-shuar Marin nemariaru Jesus túramun ísar enentáimtusarmiayi. 46 Tura chíkichkia Paríséunam wear Jesus túramun ujakarmiayi. 47 Nuna antukar Paríséusha Israer-patri úuntriasha ashí naamka uunt armia nujái iruntrar tiarmiayi “¿Warí itiurkamniat? Nu shuarka aentsti tujintiamun ti túratsuk. 48 Aya júnik iniaiyakrinkia ashí shuar Nin enentáimtuschartatuak. Nuyá Rúmanmaya apach taar mesetan najanawartatui tura in amutmakar Yusa Uunt Jeencha emesrartatui.”

49 Nu uwitin Kaipias Israer-patri uuntriayayi. Niisha tímiayi “Átumka nékatsrume. 50 ¿Ashí Israer-shuar mesertin péñkerkait. Antsu aya chikichik shuar jákatin péñkerchakait?” tímiayi. 51 Kaipiaska aya ni enentáimmiájáin tíchamiayi. Antsu nu uwitin Israer-patri uuntri asamtai Yus nuna enentáimtikramiayi. Nújáinkia Israer-shuar Jesus jaruktinian ujakmiayi. 52 Tura aya Israer-shuarnakcha antsu níijííashá ashí nunkanam Yus-shuar ajasarun irurtajtsa jákatniuyi. 53 Tuma asamtai nu tsawantiniñ Israer-shuara uuntri Jesus máatai tusar áujmatsarmiayi.

54 Nu asamtai Jesus paant wantiniak Israer-shuarnum wekaichmiayi. Antsu Jutía nunkanmaya jíinki atsamu nunkanam Eprain pepru tíjiuch wémiayi. Tura nuj pujusmiayi ni unuiniamuríjái.

55 Israer-shuara namperi paskua ishichik jatemsamtai untsurí shuar yajá péprunmaya Jerusarénum káunkarmiayi. Kame paskua jeatsáin Muisais timia núnisan ni ayashísha enentáisha iwiarnarat tusa wakeriarmiayi. 56 Jesusnasha eak yujarmiayi. Tura Yusa Uunt Jeen pujusar nuamtak aniniaisar “¿Warí enentáimiam. Jístanam tatimpiash?” tiarmiayi. 57 Paríséusha Israer-patri uuntriasha akupainiak “Jesus pujá nekaamka ujatkata” tiarmiayi. Jesusan sepunam enkeatai tusar tiarmiayi.

### Marí Jesusan kunkuinian kuérmiania nu

(Mat. 26.6-13; Mar. 14.3-9)

**12** <sup>1</sup>Paskua jísat jeatin sais tsawant ajasmatai Jesus Petania péprunam wémiayi. Jesus jakamunmaya iniantkimia nú Rásaru nuin pujumiayi. <sup>2</sup>Jesus jeamtai ayurawarmiayi. Rásarusha níijíái yurumámiayi.

Mártasha yurumkan iwiasmakmiayi. <sup>3</sup>Tura Marikia kunkuinian ti kuitjaj*̄* ritru ajapén sumak itiamiayi. Tura Jesusa nawen kuer ni intiashijjaj*̄* japirmiayi. Jeasha nu kunkuinjaj*̄* ti shiir kunkunmiayi. <sup>4</sup>Jútas Iskariúti, Semunka uchirí, nū pujumiayi. Niisha Jesusa unuiniamuríntiat ukunam Jesusan surukmiayi máawarat tusa. Niisha tímiayi <sup>5</sup>“¿Urukamtai nu kunkuinian ti kuitjaj*̄* surukchama kuítrinchan súsatniun?” <sup>6</sup>Kame kuítrinchan enentáimtak tíchamiayi. Antsu unuiniamu kuítrín wainkia asa yúpichuch kasamkamniuyayi. Tuma asa nuna tímiayi.

<sup>7</sup>Tura Jesus tímiayi “Iniaisata. Wi iwiarnakui kuératniun sumak ikiirtusuiti. <sup>8</sup>Kuítríncha tuke atumjaj*̄* íruntsuk. Antsu Wikia atumjaj*̄* tuke pujuschattajai” tímiayi.

### Rásaruncha máataj tiarmiania nu

<sup>9</sup>Israer-shuarsha Jesus Petania péprunam pujan antukar Jesus íistaisar weriarmiayi. Rásaruncha Jesus jakamunmaya iniantkimiua nusha iyutai tusar wearmiayi. <sup>10</sup>Túramtai Israer-patri uuntrinka chichaman jurusarmiayi Rásaru maatai tusar. <sup>11</sup>Untsurí Israer-shuar Rásaru iniantkimiun nekaawar Israer-patrin ikiukiar Jesusan enentáimtusarmiayi. Túrawarmatai Rásaruncha máatniun wakerukarmiayi.

### Jesus Jerusarénnum shiir wayamiania nu (Mat. 21.1-11; Mar. 11.1-11; Ruk. 19.28-40)

<sup>12</sup>Paskua namperan pachiintiuktajtsa ti untsurí shuar Jerusarénnum wearmiayi. Kashin tsawar Jesus nú peprunam tátinian nekaawarmiayi. <sup>13</sup>Niisha tintiuki nuké áinis nukan júurar Jesusan inkuntai tusar jíinkiar*mi*ayi. Túrawar untsu mainiak “Shiir tati, tiarmiayi. Yusa kakarmarijaj*̄* winiana nu tí pénkeraiti. Israer-shuara uuntri asa shiir atí” tu untsu miarmiayi. <sup>14</sup>Jesussha umpuurun wáiniak entsamkamai. Núnisan̄ áarmaiti Yus-Chichamnum:

<sup>15</sup>“Seū péprunmaya shuara, ashamkairap. Atumí Akupniuri umpuurunam entsamak winiawai.”

<sup>16</sup>Nu chichamaik Jesusa unuiniamurí nu túrunamun nekaacharmiayi. Tura ukunam Jesus nayaimpiniam shiir waketkimtai enentáimprarmiayi. Ashí Jesusna aarma núnisan̄ túrunamiayi.

<sup>17</sup>Jesus Rásaru iwiansamunmaya iniantkimiun wáinkiarua nú shuar nuna áujmatiar*mi*ayi. <sup>18</sup>Tuma asamtai shuar Jesus nu tujintiamun túramtai nekaawar Jesusan inkuntaj tusar jíinkiar*mi*ayi. <sup>19</sup>Tura Pariséusha nuamtak tiarmiayi “Iis, penké tujinkiaji. Maa iista, ashí shuar Nin nemarainiatsuk.”

### Kriaku apach Jesusjaj*̄* chichastinian wakeriarmiania nu

<sup>20</sup>Paskua nampernum Yus shiir awajsatniun Jerusarénnum weriaruka untsurí nunkanmaya shuar ármiai. Kriaku apachcha ármiai. <sup>21</sup>Niisha

Jiripin weantukarmiayi. Kame nu Jiripi Petsaitia péprunmayayayi. Petsaitia péprusha Kariréa nunkanam awai. Nincha Kriaku apach seainiak “Uunta, Jesusjai chichastaitisar wakeraji” tiarmiayi. <sup>22</sup>Jiripisha Antresan werí ujakmiayi. Nuyá niijai métek tsaninkiar Jesusan weriar ujakarmiayi.

<sup>23</sup>Jesussha tímiayi “Wi Aents Ajasuitjiana ju tsawantur jeayi. Túramtai shiir awájnástatjai. <sup>24</sup>Wi tájana nu ti nekasaiti. Jinkiaia ántsánketjai. Araachmaka ninki pujatsuk. Antsu aramka tsapain jinkiaichiri kaushmariat nerek ti untsuri ajatsuk. Núnisnak Wi jakamtai ti untsuri shuar yamaram iwiaakman takusartatui. <sup>25</sup>Shuarsha jinkiaia nuke aya ju nunkanam pénker pujustinian enentáimkiunka ántar pujak nekas iwiaakmarin emenkaktatui. Tura ju nunkanam pénker pujustinian enentáimsuk jákatniuncha ashamchaa nú shuarka nekas iwiaakman wáiniak tuke iwiaaku átatui. <sup>26</sup>Shuar winia átaj takunka nemartusti. Túranka Wi pujajna nui Wíi shuar tuke átatui. Núnisán Wíi shuar winia takatrun takáa nuna winia Aparsha shiir enentáimtustatui’ tímiayi.

### Jesus ni jákatniun étserei

<sup>27</sup>‘Yamaikia enentáirui ti itiurchat pujajai. ¿Warittiajak. “Aparu, ju túrunatniunmaya uwemtikurrua” titiajash? Antsu ju túrunatniun táwitjai. <sup>28</sup>Aparu, wi túramujai ashí shuar ame náarmin shiir enentáimturarti” tímiayi Jesus.

Tutai nayaimpinmaya chichaman antukarmiayi. “Winia náarun shiir awajsaitjai tura ataksha shiir awajsattajai” tímiayi.

<sup>29</sup>Shuarsha nui pujuinia “ipiamtachuashit” tiarmiayi. Tura chikichcha “Nayaimpinmaya suntar Nin chichasai” tiarmiayi.

<sup>30</sup>Jesussha tímiayi “Wi antuktinian chichaschayi antsu átum nekaatarum tusa chichasai. <sup>31</sup>Yamaikia nunkanam makumatin jeayi. Tura íwianch ju nunkanam akupniua nu nupetnak ajapnattawai. <sup>32</sup>Tura numiniam awajnantai ashí nunkanmayanka shuar enentáimturartatui” tímiayi. <sup>33</sup>Juna taku krúsnum jákatniun ujakmiayi.

<sup>34</sup>Shuarsha awajirar tiarmiayi “Yaunchu Yus akupkamu papiniumia áujсар nékaji. Kristu tutai tuke jáatsuk iwiaaku pujustiniaiti. ¿Itiurak nuikia “Aents Ajasu numiniam awajnitniuiti” tame? Aents Ajasuka Krístuchukait, Yus anaikiamu. Núchaitkiunkia Aents Ajasuka yait?” tiarmiayi.

<sup>35</sup>Nunkia Jesus tímiayi “Wi tsáapninia áintsánketjai. Tsáapnisha atumin aya ishichik tsawantin tsáapniartatui. Tsáapin ana juik wekasatarum kirit ajatsáin. Kame kiritniunam wekaana nusha nékatsui itiuranimpia wea. <sup>36</sup>Tsáapnin wáinkiuram nin enentáimtustarum. Túrakrum winia tsáapnintrui wekasattarme.” Jesussha nuna ti wémiayi uumak pujustaj tusa.

### Untsurí Israer-shuar Jesusan enentáimtuscharmiania nu

<sup>37</sup>Jesus aentsti tujintiamun ti untsurí túramtaisha Nin enentáimtuscharmiayi. <sup>38</sup>Yúsnan etserin Isayas yaunchu aarma uminkiatniuyi:

“Uunta, ¿ya ii ujam antukuit. Yusa kakarmarisha yana iniaktusuit?”  
tu áarmaiti.

<sup>39</sup>Nuna uminiak Jesusan enentáimtuscharmiayi. Tura nu arantcha Isayas áarmiai:

<sup>40</sup>“Yus nin kusuru awajsaiti tura ni enentáincha kátsuram awajsaiti.  
Ni jijijai fimsain tusa tura ni enentájijai nekaawain tusa túrait.  
Kame ni tunaari iisar enentáimtuiniakui Yus nin tsúarainti” tu áarmaiti.

<sup>41</sup>Isayas yaunchu Jesusan nayaimpiniam ti shiir pujan wáiniak nuna tímiayi.

<sup>42</sup>Tuma ain untsurí Israer-shuarsha tura ni uuntrinmayasha Jesusan nekas enentáimtusarmiai. Tura niisha Pariséun ashamainiak paant tícharmiayi. Israer-shuara iruntairiya jiki awetamaj tusa ashammiarmiayi. <sup>43</sup>Yus shiir enentáimtursati tutsuk antsu shuar shiir enentáimtursati tusar túrawarmiayi.

### Shuaran sumamtikiatniun táchaitjai antsu uwemtikratniun táwitjai, timiania nu

<sup>44</sup>Jesus kakantar untsurí tímiayi “Winia enentáimturuk aya Winiak enentáimturtsui antsu winia Aparun Winia akuptukua nunasha enentáimtawai. <sup>45</sup>Winia wáitkiusha Winia Aparnasha wáinui. <sup>46</sup>Wikia tsáapnin asan Winia enentáimturainia nuka kiritniunam wekasain tusan ju nunkanam táwitjai. <sup>47</sup>Shuaran sumamtikiatniun táchaitjai antsu uwemtikratniun táwitjai. Tuma asantai shuar winia chichamprun antuk umíachkunka sumamaiti. Tura Wikia sumamtikiachuitjai. <sup>48</sup>Winia nakitrur chichampruncha enentáimtachuka sumamtikiamuiti. Wi timiaj nuka amuukatin tsawantai nin sumamtikiattawai. <sup>49</sup>Wi enentáimmiyajain chichaatsjai. Winia Apar akattur akuptukuiti. Tura chichastinia nuna surusuiti. <sup>50</sup>Wisha nékajai, ashí winia Apar akupeamuka yamaram iwiaakman tuke amuukashinian súawai. Tuma asantai winia Apar túrutmia núnisnak tajai” tímiayi Jesus.

### Jesus ni unuiniamurí nawen nijiatramiania nu

**13** <sup>1</sup>Paskua jísat jeatin chikichík tsawant ajasmatai Jesusa tsawantrí jeatemayi. Túramtai ju nunkan ikiuki ni Aparín wétiniuyi. Jesussha nuna nekaamiayi. Ashí Níiniun ju nunkanam pujuinian tuke anea asa amúamunmasha yapajitsuk tuke aneemiayi. <sup>2</sup>Nu

tsawantajsha murikiun yúatin ármiai. Tura yurumátin jeatsain, uunt iwianch Semunka uchirí Jútas Iskariúti enentáin Jesusan surukat tusa enentáimtikramiai. <sup>3</sup>Tura Jesus Yusaiya tau asa waketkitniuyi. Tura Yus Apa ashí mash susamiayi akupin atí tusa. Jesussha nuna nekáa <sup>4</sup>chíkich yurumuk pujuiniaj wajakmiayi. Tura pushirin ámiak awankéman emenmamamiayi. <sup>5</sup>Nuyá nijaamatainiam entsan yará ni unuiniamuri nawen nijiatramiai. Tura awankémjaj japirmiayi. <sup>6</sup>Semun Pítrunam jeamtai Pítiur tímiayi “Uunta, ¿Winia nawer nijartaj tamek?”

<sup>7</sup>Jesussha tímiayi “Wi túrajna nu yamáí nékatsme tura ukunam nekaattame.”

<sup>8</sup>Tura Pítiur tímiayi “Penké winia nawer nijarchattame.”

Jesussha tímiayi “Wi nijaachkuinka Wijiaj tsaninka pujuschamniatme.”

<sup>9</sup>Tutai Semun Pítiur tímiayi “Nuinka, Uunta, aya nawerkechu antsu uwejrusha tura muukarsha nijiatrurta.”

<sup>10</sup>Tura Jesus tímiayi “Yamáí mainkia ayashí shiir asamtai aya nawenin nijamártiniaiti. Atumí enentáin ashí péñkeraitrume. Túrasha ashí shuarcha” tímiayi. <sup>11</sup>Kame Jútas Nin suruktiniam nekáa “ashí shuarcha” tímiayi.

<sup>12</sup>Jesussha nijiar umik ni pushirin entsarmiayi. Tura atak pujus tímiayi “¿Atumsha Wi túrajna nu nekaarmek? <sup>13</sup>Wi atumí Uuntri asamtai nekas “Uunta” túrutrume. Nusha péñkeraiti. <sup>14</sup>Tura Jintinniuitiatan tura Úuntaitiatan atumí nawen nijarchajak. Atumsha núnisrumek nuamtak náwem nijiatnairatarum. <sup>15</sup>Atumin nekapruatsan túramjai. Atumsha núnisrumek túratarum. <sup>16</sup>Ti nekasán tajai. Takarniuka ni uuntri nankaamaschaiti. Akupkamusha akupea nuna nankaamaschaiti. <sup>17</sup>Nu nekaarum túrakrumka shiir átatrume.”

<sup>18</sup>Tura tájana nuna ashí tátsujrume. Anaikiaitaj núnaka Wi nékajai. Tura Yus-Chicham uminkiatniuiti, nékajai. Ju aarmaiti:

“Wijiaj yurumna nu winia nemasur ajasai.”

<sup>19</sup>Nuka túmatsain ujaajrume. Nuyá túrunamtai Yusa Uchiríntjai nusha paant nekaattarme. <sup>20</sup>Wi tájana nu nekasaiti. Shuar Wi akupeaj nuna shiir itiaakka Winiasha shiir itiaarui. Tura Winia shiir itiaarna nusha Winia Akuptukuncha itiaawai” tímiayi.

### Jesus Jútas Nin suruktiniam étserui

(Mat. 26.20-25; Mar. 14.17-21; Ruk. 22.21-23)

<sup>21</sup>Nuna ti, Jesus ni enentáin ti itiurchat enentáimpramiayi. Tura paant tímiayi “Nekas tajai, chikichik juí atumjai pujana nu Winia surutkattawai.”

<sup>22</sup>Tutai ni unuiniamuri nuamtak íniaisar “¿Yanak ta?” tiarmiayi.

<sup>23</sup>Chikichík unuiniamuri, Jesus ti aneamu, Nijiaj tsanin yurumuk pujumiayi.

<sup>24</sup>Tuma asamtai Semun Pítiur ni uwejéjaj iniakmas “Aniasta, ¿yanak áujmata?” tímiayi.

<sup>25</sup>Tutai Jesusan áyanmatsan aniasmiayi. “¿Yait, Uunta?” tímiayi.

<sup>26</sup>Jesusha ayak “Tantan túumniun ajun<sub>kan</sub> susattaj núiti” tímiayi. Nújaj<sub>n</sub> tantan túumniun ajun Semun<sub>ka</sub> uchir<sub>n</sub> Jútas Iskariútin susamiayi. <sup>27</sup>Tura wárik Jútas tantan achikmatai íwianch ni enentáin wayamiayi. Nuyá Jesus tímiayi “Túrattamna nu wárik túrata.”

<sup>28</sup>Tura ashí nu<sub>j</sub> yurumainiak pujuarmia nusha wariniak ta tusa nekaacharmiayi. <sup>29</sup>“Kuítrincha kuit súsarta” tátsuash tu enentáimprarmiayi. Tura chikichcha “nampernum yurumátin atsumajnia nu sumakta” tátsuash, tu enentáimprarmiayi. Jútas kuítian wáinin asamtai tu enentáimprarmiayi. <sup>30</sup>Jútas tantan yua kashi ajasmanum jíinkimiayi.

### Yamaram akupkamu

<sup>31</sup>Jútas jíinkimtai Jesus tímiayi “Wi Aents Ajasu asamtai winia kakarmar yamaikia paant átatui. Tura wi túramujaj Yusa kakarmarisha ti paant átatui. <sup>32</sup>Wi Yusa kakarmar<sub>n</sub> paant awajeakui Wisha ni Uchirí asamtai winia kakarmarnasha Yuska wárik paant awajsattawai. <sup>33</sup>Uchichiru, atum<sub>jaj</sub> ti untsurí tsawant pujuschattajai yamaikia. Wi Israer-shuaran tímiaj nútiksanak atumin tájarme. Atumsha Winia eátkáttarme tura wi wéamunam winishtatume. <sup>34</sup>Ju yamaram akupeamun amaajai nuamtak mai anenai ajatarum tusan. Wi atumin aneajrumna núnisrumek atumsha nuamtak mai anenai ajatniuitume. <sup>35</sup>Anenaiyakrumn<sub>n</sub>kia nujaj ashí shuar “Kristu unuiniamurí áiniawai” túramartatui.

### Pítiur Nin natsantratniun Jesus ujakmiania nu (Mat. 26.31-35; Mar. 14.27-31; Ruk. 22.33-34)

<sup>36</sup>Semun Pítiur Jesusan aniasmiayi “Uunta, ¿tua wéam?”

Jesusha tímiayi “Wi wéajna nu<sub>j</sub> yamaikia winichminiaitume. Tura ukunam winittiar<sub>me</sub>.”

<sup>37</sup>Nuyá Pítiur tímiayi “Uunta, ¿urukamtai yamaikia winichminiaitiaj? Ámin yáintajtsan jakataj tajai.”

<sup>38</sup>Jesusha tímiayi “¿Nekasmek táme? Ti nekas tájame, atash shiniatsaj<sub>n</sub> Winia menáintiú natsantrurtatme” tímiayi.

### Jesus Yus-jintiaiti

**14** <sup>1</sup>“Kúntuts pujusairap. Yus enentáimtustarum, Winiasha enentáimtursatarum. <sup>2</sup>Winia Aparu<sub>j</sub> átum pujustin ti an<sub>kan</sub> awai. Tura nuna iwiarataj tusan Aparu<sub>j</sub> wéajai, nekasaiti. Nekaschaitkiu<sub>n</sub>kia ¿itiurak ujaka<sub>aj</sub>rum? <sup>3</sup>Tura iwiaaran amukan ataksha



tátatjai. Tura tana yaruaktatjarne, wi pujamunam atumsha pujusúk tusan. <sup>4</sup>Wi wéaj nu nékarme tura jintiasha nékarme” tímiayi Jesus.

<sup>5</sup>Tumas tímiayi “Uunta, Ame weam nu nékatsji. ¿Jintiasha itiurak nekaattaj?”

<sup>6</sup>Jessussha tímiayi “Wi nekas jíntiaitjai. Wíjiaínchu wekaana nuka winia Aparuí jeatniun penké tujintiawai. Tura Wisha tuke nekas tiniu asan nekas ana nuna shuáran nékamtikajai. Wisha shuáran yamaram iwiaakman tuke amuukashtinian súwitjai. <sup>7</sup>Winia nékarkurmeka winia Aparsha nekaawaintrume. Yamaisha Nii wáinkia asarum nékarme” tímiayi.

<sup>8</sup>Nuínkia Jiripisha tímiayi “Uunta, Apasha wáinkiarca maak.”

<sup>9</sup>Jessussha tímiayi “Jiripi, atumjai ti pujusu aisha ¿tuke nékartsumek? Winia wáitkia nuka Winia Aparnasha wáinkiaiti. ¿Itiurak, nuikia, “Apasha wáinkiarca maak” tame? <sup>10</sup>Winia Aparjai tsanínkian pujakun tura winia Aparsha Wijiaí pujakui tuke chikichkiitji. ¿Nu nékatsrumek? Wi tájarmena nu Winia chichampruchuiti. Yus Apa Winí pujak ni wakeramun takaawai. <sup>11</sup>Nekaatarum. Wisha winia Aparjai tsanínkia pujakur nekas chikichkiitji. “Nu chicham itiurchataiti” enentáimkiurmeka wi túramu nuikia enentáimpratarum. Wi túramujai chikichik ájinia nu páantchakait. <sup>12</sup>Wi tájarmena nu ti nekasaiti. Winia enentáimturna nu Wi túrajna nuna túrattawai. Tura winia Aparuí wéakui nuna nankaamas tujintiamun túrattawai. <sup>13</sup>Ashí Winia enentáimtursarum seatrumna nuna amastatjai. Nújainkia winia Apar shiir awajnastatui. <sup>14</sup>Winia enentáimtursarum seakrumnínkia ashí túrattajai’ tímiayi.

### Jesus Yusa Wakanín akupkattawai

<sup>15</sup>Atumsha anentkurmeka winia chichamur umiktarum. <sup>16</sup>Tura wéakun winia Aparun chikichan akupturmakti tusan seattajai. Niisha atumjai tuke pujak atsantamprartatui. <sup>17</sup>Nusha Yusa Wakanínti. Yus-shuarcha Nin nekaachmin ániawai. Tuma asantai ni enentáin wayachminiaiti. Antsu átumka atumi enentáin pujakui Nii nékarme. Niisha atumí enentáin tuke pujustatui. <sup>18</sup>Mitiaikia áitkiasnak ikiukchattajrume. Atumín atak tátatjai. <sup>19</sup>Ishichik tsawant nankaasmatai chíkich shuar irunna nu wáitkiachartatui. Tura Wi iwiaaku asantai átumka nu iwiaakmajai pujustatrume. Tuma asarum wáitkiattarme. <sup>20</sup>Tura nu tsawantai ju nekaattarme. Wisha winia Aparjai tsanínkia pujakur chikichkiitji. Núnisnak Wisha atumjai tsanínkian pujajai. Tura atumsha Wijiaí tsanínkia pujarme. <sup>21</sup>Shuar Winia anentuka wi akupkamun nekáa umíawai. Nú shuarnaka winia Aparsha aneawai. Wisha nin anejai tura nekarati tusan iniaktustatjai.” Jesus nuna tímiayi.

<sup>22</sup>Chíkich Jútas, Iskariútichu, tímiayi “Uunta, ¿urukamtai ashí shuarnum iniaktutskesha aya in iniaktustatam?”

<sup>23</sup>Jesus tímiayi “Winia anentuka tájana nuna enentáimtawai. Winia Aparsha nu shuaran aneattawai. Tura Wisha winia Aparnum nu shuarjaj̄i tsaniñkia pujustaj̄i. <sup>24</sup>Antsu Winia anentchaka tájana nuna enentáimtatsui. Átum ántarmena nú chichamka wíniachuiti, antsu Yus Apa Winia akuptukua Núnaiti’ tímiayi.

<sup>25</sup>‘Atumjaj̄i tuke pujakun nuna tájarne. <sup>26</sup>Yus Apa ni Shiir Wakanin̄ atumin yáinmak atsantamprarat tusa akupturmaktatrome. Wi seam túrattawai. Nu Wakancha ashí Wi ujakjarmena nuna atak enentáimtikramprar ashí unuitiamprartatui’ tímiayi.

<sup>27</sup>‘Imiatkinchanum pujustarum. Imiatkinchanum pujajna núnisrumek pujustarum tusan amaajai. J̄ú nun̄kanman̄ka warastin̄ wáinkiashtatrome. Antsu itiurchatnum pujayatrumkesha Wij̄ijaj̄i imiatkinchanum pujustatrome. Ashamtsuk pujustarum. Itiurchat enentáimprairap. <sup>28</sup>Nuik timiaj nu antukmarme. Aparūj̄i wena atak atumiñ̄n̄ tátatjai. Winia Aparka Wij̄ijaj̄i nan̄kaamas úntaiti. Tuma asamtai ti nekas anentkurmeka “Aparūj̄i wéajai” takui ashí waras̄ar̄me. <sup>29</sup>Nuka túmats̄aj̄in̄ ujaajrume. Túrunamtai nuyá Winia enentáimtursattarme” tímiayi.

<sup>30</sup>‘J̄ú nun̄kanmayan̄ akupin winiakui atumjaj̄i núkap chichaschattajai yamaikia. Wíniaka nupettukchamniaiti. <sup>31</sup>Tura Wikia winia Aparun aneajai tura Nii akupturkama nuna tuke túrajai. Ashí shuar nuna nekaawarti tusa ashí túrunatniuiti. Wajaktiarum. Juyá wetáí’ tímiayi.

### Numi arakma áintsan̄ketjai

**15** <sup>1</sup>‘Winia iwiaakmarun amaakun numi arakma áintsan̄ketjai. Wikia kampuinjai atumsha kanawentrume. Winia Aparsha arakan wáiniua núnisaiti. <sup>2</sup>Winia kanawernasha nereatsna núnaka tsupik ájapeawai. Tura nereana núnaka púruawai nú nukap nerekat tusa. <sup>3</sup>Wi ujakjarmena nujaj̄i puruarmaitrome. <sup>4</sup>Numí kanawesha kampuin̄ áchitkiachkun̄ka niñki nerechamniaiti. Núnisrumek atumsha Winí áchitkiachkurmeka nerechamniaitrome. Wi atumjaj̄i áchitkiaj̄i núnisrumek atumsha Winí tuke áchitkia atarum’ tímiayi.

<sup>5</sup>‘Wikia kampuinjai atumsha kanawentrume. Kampuñkia kanawen̄ áchitkia núnisnak achiajarme. Tura kanawe ni kampuiniñ̄ áchitkia núnisrum Winí áchitkia atarum. Túrakrumka núkap nerektatrome. Antsu Wij̄ijain̄chuka pen̄ker túratin̄ pen̄ké tujintiarne. <sup>6</sup>Winí áchitkiachuka ajapam kukartatui. Kanawesha kukarmatai shuar irumkar áesawartatui’ tímiayi.

<sup>7</sup>‘Tuke Winí áchitkiaiitkiurmeka tura winia chichamprusha kajinmattsuk emetarmeka átum wakerarmena nu seakrumin̄ amastatjai. <sup>8</sup>Átum núkap nereakrumniñkia ashí shuar “Nekas Jesusa unuiniamur̄inti” túramartatui tura winia Aparnasha shiir awajsartatui. <sup>9</sup>Winia Apar anenna nútiksanak Wisha atumin aneajrume. Winia

aneamur tuke atarum. <sup>10</sup>Winia Aparu akupkamurin umiakun tuke ni aneamurintjai. Núnisrumek winia akupkamur umiakrumka tuke winia aneamur áatrume' tímiayi.

<sup>11</sup>'Wi waraajna áintsarmek warastarum tusan nuna tájarme. Tura ti shiir warastatrume. <sup>12</sup>Wi akupkamu júiti: "Wi aneajrumna nútiksarmek ashí anenaitiarum." <sup>13</sup>Shuar ni amikrin yáintaj tusa jakaka ti anenkartichukait. <sup>14</sup>Wi akupeamu takaakrumka atumsha winia amikruitrume. <sup>15</sup>Takarniuka ni uuntri takaana nuna nékatsui. Tuma asamtai "winia takarniuruitrume" tátsujrume. Antsu ashí winia Apar táman ujaku asan "winia amikruitrume" tájarme. <sup>16</sup>Aya atumí enentáimsamurijjain Wíi shuar ajaschamarme. Antsu akatramur ajastarum tusan atumniaka achikjarme Wi. Winia takatur takastiniaitrume. Túrarum pénker túratniuitrume nerektinia áintsarmek. Tura nu nere amuutsuk tuke áiniaiti. Tuma asamtai winia Apar searmena nuna amastatui. <sup>17</sup>Júnaka akupeajrume: Nuamtak mai anenai ajatarum' tímiayi.

#### Yus-shuarcha Jesusnasha Níiniuncha nakitiainiawai

<sup>18</sup>Ju nunkanmaya shuar Winia emka nakitrurar atumniasha nakitramarme. <sup>19</sup>Atumsha ju nunkanmaya shuaraitkiurminkia niiniua nútiksan anenmaintrume. Antsu Wíi shuar ajastarum tusan ju nunkanmaya achikmajrume. Túramtai nekas ju nunkanmayaanchuitrume yamaikia. Nu asamtai nu shuar nakitramainiawai. <sup>20</sup>"Takarniuka ni uuntri nankaamaschaiti" tíchamkajrum. Shuar Winia yajauch awajtusaru ásar atumniasha yajauch awajtamsartatui. Chikichcha umirtukaru ásar atumniasha umirtamkartatui. <sup>21</sup>Winia Akuptukun nékachu ásar Winia enentáimturkurmin yajauch awajtamsartatui' tímiayi.

<sup>22</sup>'Wi tana Yus-Chichaman nin ujakchamtainkia tunaanum sumamacharayi. Antsu ujakma ásar "Nékachkun túraitjai" tíchamin áiniawai. <sup>23</sup>Winia nakitruinia nuka winia Aparnasha nakitiainiawai. <sup>24</sup>Aents penké túrachman túrachuitkiunkia tunaanum sumamacharainti. Antsu wi túramun wáinkiaru áiniayat Winiasha tura winia Aparnasha nakitiainiawai. <sup>25</sup>Yaunchu Yus akupkamunam áarmaiti:

"Penké ántar nakitrurarmai."

Nu chicham uminkiatu tusa túrunaiti' tímiayi.

<sup>26</sup>'Tura atsantamprattsa yáinmana nuna winia Aparuiya akuptuktatjarme. Niisha tuke nekas tiniu Wakaniiti. Niisha Yusaiya taa atumin nekamtikramprattarme. <sup>27</sup>Atumsha yaunchu Wijiai pujusu asarum nekamtikiattarme' tímiayi.

**16** <sup>1</sup>Átum kanartukairum tusan júnaka tájarme. <sup>2</sup>Israer-shuar iruntainiumia jiiki akuptamkattarme. Nu arantcha mantamainiaksha "Yúsan shiir awajsattsan túrajai" tiártatui. <sup>3</sup>Nu shuar

Winiasha tura winia Aparnasha nékachu ásar túrutmawartatui. <sup>4</sup>Núnaka yamáí tájame. Tura túrunamtai “núnisan átiniaiti” timiaj nu nekaarum itiurchat enentáimprairap’ tímiayi.

### Yusa Wakaní túrana nu

‘Atumjají tuke pujá asan núnaka yaunchu ujakchamajrume. <sup>5</sup>Antsu yamaikia wáketjai winia Akuptukmia nujají pujustaj tusan. Tuma áin wéajna nu inintratsrume. <sup>6</sup>Antsu nuna takuí ti kuntuts enentáimprarme. <sup>7</sup>Tura Wi wématai atumjajínkia nuna nankaamas péñker átatui. Iis, Wi wéaknaka atumin yainmaktinia nuna akupkattajai tura wéachkuínkia táchattawai. Nuka ti nekasaiti. <sup>8</sup>Yusa Wakaní taa ashí jú nunkanmaya aentsun ju maintiun nekamtikiattawai. Ni tunaari aan nekamtikiattawai. Péñker tunaajainchu wekasamniana nunasha nekamtikiattawai. Tura Yus tunaanum súmamtikiamniana nunasha nekamtikiattawai. <sup>9</sup>Winia enentáimturainiachu tunáarintin áiniawai. <sup>10</sup>Winia Aparuí wáketkui wáitkiashtatrume. Tuma asamtai ashí shuar wi péñker tunaajainchu wekaamun nekaawartatui. <sup>11</sup>Tura ju nunkanam akupniunka Yus tunaanum súmamtikia asa shuarnasha súmamtikiamnaiti. Nuna paant nekaawartatui’ tímiayi.

<sup>12</sup>‘Nu arantcha núkap tíntjiarme túrasha átumka nekaachaintrume. <sup>13</sup>Yusa Wakaní ashí nekas tiniu asa ashí nekasa nuna unuitiamprattarme. Ni enentáimmiajají tichattawai antsu winia Aparuí antukma nuna ujatmaktatui. Ukunam átatna nunasha ujatmaktatui. <sup>14</sup>Ashí Wínian ujatmak Winia shiir awajustatui. <sup>15</sup>Ashí winia Apar takakna nusha Wíniaiti. Nu asamtai “ashí Wínian ujatmaktatui” tajai’ tímiayi.

### Kúntuts pujuiniayat ukunam warasartatui

<sup>16</sup>Ishichik pujusrum Winia wáitkiashtatrume. Nuyá ataksha ishichik pujusrum ataksha wáitkiattarme. Wisha winia Aparuí wéajai” tímiayi.

<sup>17</sup>Nuyá ni unuiniamurí nuamtak aniniaisarmiaiyi “¿Jú chichamsha warimpait? “Ishichik pujusrum wáitkiashtatrume tura ataksha ishichik pujusrum wáitkiattarme tura Aparuí wéajai” tátsuk. <sup>18</sup>“Ishichik pujusrum” tana nusha ¿warimpait? Nii tana nu ántatsji” tiarmiaiyi.

<sup>19</sup>Jesusha nin aniaistai táman nekáa tímiayi “Ishichik pujusrum wáitkiashtatrume nuyá ataksha ishichik pujusrum wáitkiattarme” tímiajai. ¿Núchakait átum inintrustin wakerarmena nu? <sup>20</sup>Ti nekas tájarme: Átumka kúntuts pujusrum úttiatrume tura Yus-shuarcha warásártatui. Tuma aink<sup>1</sup> átum kúntuts pujayatrume ukunam warastatrume. <sup>21</sup>Iis, nuwasha jurertin tsawant jeamtai najaimiak wáitiatsuk. Tura uchin jurerka ti waraak wáitsamunka enentáimtsui. <sup>22</sup>Atumsha núnisrumek yamaik kúntuts pujarme. Tura atak íitjiarum tusan winiakui ti shiir atumí enentáin warastatrume. Nu warastinian jurutramkichminia áiniawai.’

<sup>23</sup>Nu tsawantinkia penké ininsashtatrumé. Ti nekas tájarme Winia enentáimtusarum winia Apar searum nuna ashí amastatui. <sup>24</sup>Yamaisha Winia enentáimtusarum winia Apar seachurme. Seakrumniñkia amastatui ti shiir warasaruk tusa' tímiayi.

### Jesus jú nunkanmayan nupetkaiti

<sup>25</sup>Métek-taku chichamjai nakumkan nuna tímiajai. Tura ukunmanka nujai chichatsuk winia Aparnan paant ujkattajarme. <sup>26-27</sup>Nu tsawantai átumka Winia enentáimtusarum winia Apar seattarme. Winia Aparsha atumin anea asantai Wi Nin áujsatín atumashtatrumé. Winia anentu asarum tura winia Aparuíya taman enentáimtakrumin Niisha anenmawai. <sup>28</sup>Winia Aparuíya jíinkin jú nunkanam táwitjai. Yamaikia jú nunkanmaya jíinkin ataksha Aparuí wáketjai" tímiayi.

<sup>29</sup>Nuyá ni unuiniamurí tiarmiayi "Yamaikia métek-taku chichamjainchu chichaame. <sup>30</sup>Mash nékaitme. Shuar Ámin ininmatsajín péñker áimkiatin nékame. Nu nekaar Ame nekas Yúsnumiáitme tu enentáimtaji" tiarmiayi.

<sup>31</sup>Tura Jesus tímiayi "¿Nekasash enentáimtarum? <sup>32</sup>Ti warik átumka ashamkarum niisháa tsakiñmaktatrumé tura Winiak ikiurkittiarne. Antsu winia Apar pujakui Wiki pujatsjai. <sup>33</sup>Winia enentáimturkuram imiatkinchanum pujusarat tusan tájarme. Jú nunkanam ti wáitsattarme. Tura Wi jú nunkanmayan nupetka asantai warastarum" tímiayi Jesus.

### Jesus ni unuiniamurín Yúsan áujtawai

**17** <sup>1</sup>Nuna tí Jesus nayaimpinmaaní íimias tímiayi "Aparu, yamáí jeayi ame Uchiram shiir awajsatin. Núnisan ame Uchirmisha péñker awajtamsattawai. <sup>2</sup>Ashí shuara Akupniurí najataitme. Nujainkia Winia surusumna nú shuaran yamaram iwiaakman tuke amuukashtinian súsaitjai. <sup>3</sup>Aparu, chíkich atsawai. Amek nekas Yúsaitme. Wisha Jesuskrístuitjai Ame akuptukmamna nu. Nu asantai ashí shuar nuna enentáimtak yamaram iwiaakman tuke amuukashtinian takakui.'

<sup>4</sup>Ashí túratniun akuptukmamna nuna amukuitjai. Túran jú nunkanam shiir awajsaitjame. <sup>5</sup>Nuna túramtai, Aparu, ti yaunchu jú nunka atsaisha Ámijiai pujakui shiir awajtusmamna núnismek yamaisha shiir awajtusta.'

<sup>6</sup>Ashí jú nunkanmaya surusmamna nú shuaran Ámin nekamtikiamjai. Áminiu áiniakui surusmame. Niisha ame chichammin umirtámkaruiti.

<sup>7</sup>Ashí Wi takaajna nu Amek surusuitme. Niisha nuna nékainiawai.

<sup>8</sup>Ame chichamem surusmam nuna ujakam niisha umirtámkaruiti. Ame akuptukakmin Amiiníya táwitjai. Nu nekasaiti tu enentáimtuiniawai.'

<sup>9</sup>Nin yainkiarta tusan seajme. Jú nunkanmaya shuaran Ámin enentáimturmainiatsna nuna seattsujai. Antsu Ame surusmam nuna, Áminiu ajasarmatai, yainkiarta tusan seajme. <sup>10</sup>Ashí Winia ainia

nuka Áminiuiti. Tura ashí Áminiu ainia nuka Winia ániawai. Winia pênkerusha ni túramunam paant awajsaiti.’

<sup>11</sup>‘Wikia yamaikia jú nunkanam pujuschattajai. Tura nu shuarka jú pujuartatui. Antsu Ámijiaí pujustajtsan winiakui ashí surusumna nuka, Aparu, ti shiir asam ame kakarmarmijiaí wáinkiaata. Wisha Ámijiaí chikichik ájnia núnisan niisha ashí iruntrar chikichik ajasarti. <sup>12</sup>Juú niijiaí pujakun ame kakarmarmijiaí ti pênker wáinkiamjai. Antsu Yus-Chichamnum aarma uminkiaati tusa aya chikichik menkakaiti. Niisha tuke emesnartinia núiti.’

<sup>13</sup>‘Yamaikia Amiini winiajai. Tura jú tuke pujakun júna tájame. Niisha Wi waraajna núnisar ti shiir warasarat tusan tajai. <sup>14</sup>Wi jú nunkanmayanchuitjai. Niisha núnisan jú nunkanmayanchu ániawai. Tuma asamtai ame chichammin Wi susamtaí jú nunkanmaya shuarka nin nakitiainiawai. <sup>15</sup>Jú nunkanmaya jíiki tusan seatsjame. Antsu íwianch nin nupetkaín tusan seajme. <sup>16</sup>Wi júyanchuitiaj áintsan niisha júyanchu ániawai. <sup>17</sup>Ame chichammin ti nekasa nuna ántuiniakui pênker awajsata. <sup>18</sup>Juyá shuarnum akuptukmam áintsan Wisha nin chíkich shuarnum akupeajai. <sup>19</sup>Aya Áminiunak takastaj tusan enentáimtimjai. Túra asamtaí niisha aya Áminiunak takastinian enentáimpratin ániawai’ áujtak tímiayi.

<sup>20</sup>‘Aya níiniunkeka seatsjame antsu ashí ni chichamen antukar Winia enentáimtusartatna nusha ame yáinkiaata tusan seajme. <sup>21</sup>Ashí niisha chikichikiniak enentáimtusarti tusan seajme. Wisha Amesha, Aparu, chikichik ájnia núnisan niisha Iijiaí iruntrar chikichik ajastai tusar seajme. Wíi shuar chikichik najanata tusan seajme. Nuyá jú nunkanmaya shuar akuptukuitmena nuna nekaawartatui. <sup>22</sup>Ame shiir awajtusamna núnisnak Wisha nin shiir awajsaitjai. Iikia chikichik ájnia núnisan niisha chikichik ajasarti tusan túraitjai. <sup>23</sup>Wi ni enentáin pujakui Amesha Winin pujakmin penké chikichik ajasarti. Túramtai ashí shuar júna nekaawartatui: Ame akuptukuitme, tura Winia anenmena áintsam nu shuarsha aneame. Wíi shuar chikichik ajasmajai ashí shuar nuna nekaawartatui.’

<sup>24</sup>‘Aparu, shuar surusmam nu, Wi pujustajana núi pujusarti tusan seajme. Tura ti shiir awajtusmamna nuna ísarti tusan nuna seajme. Jú núnka najanchamunman tuke anentin asam ti shiir awajtusuitme. <sup>25</sup>Aparu, ti pênker áminiú jú nunkanmaya shuar nekarmainiatsui. Antsu Wi nékajme. Jú shuarsha ame akuptukman nékainiawai. <sup>26</sup>Nú shuaran Ámin nekarmawarti tusan jintintiaitjai. Tura nu arantcha jintintiattajai. Nújainkia Wisha ni enentáin pujurkui Winia anenmena áintsan niisha anenkratin ajasartatui” áujtak tímiayi Jesus.

### Suntar Jesusan achikiarmiania nu

(Mat. 26.47-56; Mar. 14.43-50; Ruk. 22.47-53)

18

<sup>1</sup>Jesusha nuna tinia amuk ni unuiniamurijiaí Setrun entsá katin numi arakmanum wémiayi. <sup>2</sup>Jútassha Nin suruktajtsa pujumia

nuka nu ajan nekaamiayi. Untsurí tsawant Jesus ni unuiniamurijjaj ni untruntramtai Jútas Jesusan nuí wáinkiatniun enentáimpramiayi. <sup>3</sup>Tura untsurí suntarjajsha Jesusan tariarmiayi. Pariséusha Israer-shuar Patri untrishasha suntarnasha Yusa Jeen wáiniuncha Jesusan achikiarat tusa akupkarmiayi. Niisha machitniasha nankincha rámparancha jiniasha júkiar weriarmiayi. <sup>4</sup>Jesussha ashí átinia nuna neka asa jiintiuki “¿Ya eaarum?” tímiayi.

<sup>5</sup>Niisha “Nasarénumiá Jesus” tiarmiayi.

Jesussha “Wiitjai” tímiayi.

Jútassha Jesusan surukua nu nijjaj pujuarmiayi. <sup>6</sup>Tura Jesus “Wiitjai” takui ti ashamkar úkumur waketainiak iniaarmiayi.

<sup>7</sup>Ataksha Jesus “¿Ya eaarum?” tímiayi.

Niisha “Nasarénumiá Jesus” tiarmiayi.

<sup>8</sup>Nuinkia Jesus tímiayi “Wiitjai, tájar me. Winia eatkurmeka Wíi shuar ainia júka wakеткиarti” tímiayi. <sup>9</sup>Jesus nuik aujuk “Winia Apar surusma nu menkakacharai” timia nu uminkiatu tusa Jesus “wakеткиarti” tímiayi. <sup>10</sup>Nuyá Semun Pítiur machitian jusa Marku kuíshin untsuurnumaani tsupirkamiayi. Markusha Israer-patri untrí takarniuriyayi. <sup>11</sup>Túramtai Jesus Pítrun tímiayi “Machitrumka awainki ikiusta. Winia Apar wáitsatniun surakuinkia ¿wáitsashtinkaitiaj?”

**Israer-patri úuntriniam júkiarmiania nu**  
(*Mat. 26.57-58; Mar. 14.53-54; Ruk. 22.54*)

<sup>12</sup>Nuinkia apach suntarsha ni kapitántrishasha Yusa Jeen wainniusha Jesusan achikiar jinikiawarmiayi. <sup>13</sup>Nuyá Anasa jeen júkiarmiayi. Anassha Kaipiasa wearíyayi. Tura Kaipias nu uwitin Israer-patri untriyayi. <sup>14</sup>Kaipiaska nuik “¿Ashí Israer-shuar mesertin pénerkait. Antsu aya chikichik shuar jákatin pénerchakait?” timia núiti.

**Pítiur Jesusan natsantramiania nu**  
(*Mat. 26.69-70; Mar. 14.66-68; Ruk. 22.55-57*)

<sup>15</sup>Semun Pítiur chíkich unuiniamujaj Jesusa uku weriarmiayi. Israer-patri untrí nú unuiniamunka nékauyayi. Tuma asamtai ni jeen jeawar, suntar Jesusjaj aa tanishnum wáiniakui niisha wayamiayi. <sup>16</sup>Tura Pítiur aa wáitiniam wajaamiayi. Túramtai chíkich unuiniamu jiinki wáitin wáinia nú nuwajaj chichas Pítrun awayamiayi. Nuí nékanu asa yúpichuch awayamiayi. <sup>17</sup>Waiti wáinniusha Pítrun aniasmiayi “¿Amesha nuna unuiniamurinchukaitiam?”

Pítrusha “Atsá, núchaitjai” tímiayi. <sup>18</sup>Tsetsek asamtai suntarsha tura nuí takarniusha jinia ikiapárar ni nawen anaak pujuarmiayi. Pítrusha nuí pachiiniak anamuk pujumiayi.

**Kaipias Jesusan aniasmiania nu**

(*Mat. 26.59-66; Mar. 14.55-64; Ruk. 22.66-71*)

<sup>19</sup>Israer-patri uuntri Jesusan aniasmiayi “Ame unuiniamurmesha ¿ya ainia. Tura warí nin jintintiaitiam?”

<sup>20</sup>Jesusha tímiayi “Ashí ímiainiajn tuke etserniuitjai. Israer-shuar iruntainmasha Yusa Uunt Jeencha Israer-shuar irunainia nu arantutsuk tuke etserkaitjai. <sup>21</sup>¿Urukantai Winia inintiam? Winia chichamprun antukua nu aniastarum. Wi timian nii ujatmakarti. Wi timiancha niisha nékainiatsuk.”

<sup>22</sup>Jesus nuna takui Yusa Jeen wáiniua nu nu pujá Jesusan yapiniam awati tímiayi “¿Núnisan nekas úuntnum chichastinkait?”

<sup>23</sup>Jesusha tímiayi “¿Warinmampa yajauch aa? Turuttia. Tura tájana nu péñkeraitkiuinikia ¿urukantai awattiniam?” <sup>24</sup>Nuyá Anas Jesusan jinkiá Kaipias takaamunam akupkamiayi Kaipias Patri uuntri asamtai.

**Pítiur ataksha Jesusan natsantramiania nu**

(*Mat. 26.71-75; Mar. 14.69-72; Ruk. 22.58-62*)

<sup>25</sup>Tuke Anasa jeen chichainiaí Pítiur jinia anamuk puján shuar aniak “¿Amesha Jesusa unuiniamurinchukaitiam?” tiarmiayi.

Pítrusha “Atsá, wíchaitjai” tímiayi.

<sup>26</sup>Chíkich takarin, Marku shuari, nu pujumiayi. Pítiur Marku kuíshin tsupirkamia nuna shuari asa tímiayi “¿Ajanam Jesusjái wekaamin wáinkiachmakajam?”

<sup>27</sup>Pítrusha ataksha “atsá” tain atash shiniukmiayi.

**Piratu Jesusan aniasmiania nu**

(*Mat. 27.1-2, 11-14; Mar. 15.1-5; Ruk. 23.1-5*)

<sup>28</sup>Nuyá Kaipiasaiya Jesusan júkiar tsawant tsawaamunam apach kapitían Piratu takatai jeenam ejeniarmiayi. Israer-shuarsha ni uuntri akupkambia nunisar wapik ajasajj tusar nu jeenam wayacharmiayi. Wayawarka paskua nampernum yurumáchmin ármiai. <sup>29</sup>Nu asamtai Piratu nijjái chichastaj tusa jiinki tímiayi “¿Jú áishmansha warí tunáa túrait?”

<sup>30</sup>Niisha “Tunaarinchaitkiuinikia amijini itiachajj” tiarmiayi.

<sup>31</sup>Tutai Piratu tímiayi “Atumek júkirum atumí akuptammarijjái ni tunaari nekaatarum.”

Israer-shuarsha tiarmiayi “Antsu iikia Israer-shuartikia tunáa shuarsha máachminiaitji.” <sup>32</sup>Yaunchu Jesus ni jákatniurin enentáimtus “Wi awajnitniuitjai” tímiayi. Niisha krúsnum awajnain asamtai apach máataijjái Nii timia nu uminkiamiayi.

<sup>33</sup>Piratusha atak jeá wayá Jesusan untsuk “¿Ámeka Israera Uunt Akupniurinkaitiam?” tímiayi.



<sup>34</sup>Jesussha tímiayi “¿Amekek nu inintram. Kame chíkich túramainiatsuash?”

<sup>35</sup>Piratusha tímiayi “¿Wi Israer-shuarkaitiaj? Ameer shuarak Israer-patri uuntrijjaj winin itiarमारai. ¿Warí tunáa túraitiam?”

<sup>36</sup>Nuinkia Jesus tímiayi “Wi jú nunkanam akupniuchuitjai. Juyaitkiuinikia Winia nemartuiniana nu máanaikiaraayi. Túrawarmatai Israer-shuarnum surutkacharaayi. Antsu juyān akupniuchuitjai.”

<sup>37</sup>Piratusha “¿Nuikia ame nekas uunt akupniukaitiam?” tímiayi.

Jesussha tímiayi “Ee, ame támena nu nekasaiti. Jú nunkanam akiinian ashí shuuran nekas ana nuna ujaktinian táwitjai. Ashí shuar nekas ana nuna umirniuka Wi táman ántawai.”

<sup>38</sup>Tura Piratu “¿Nekasa nusha warimpiait?” tímiayi.

**Piratu Jesusan mantamnatniun tímiania nu**  
(*Mat. 27.15-31; Mar. 15.6-20; Ruk. 23.13-25*)

Piratusha nuna ti, atak Israer-shuarjaj chichastajtsa jiinki tímiayi “Jú aishmaṅka tunaarín penké wáittsujai. <sup>39</sup>Tura ashí uwitin paskua nampernum sepunmayā shuar anṅkant akupkatniuiti. Núnisrum tuke searme. Tuma asamtai, ¿yamaikia Israera Uunt Akupniurín anṅkant akupkattajak?” tímiayi.

<sup>40</sup>Nuinkia ashí kakantar unsumainiak “Jú akupkaip; antsu Parapás akupkatá” tiarmiayi. Nu Parapássha kásauyayi.

**19** <sup>1</sup>Nuyá Piratu suntaran akupkamiayi Jesusan asutiáwarat tusa. <sup>2</sup>Suntarsha Jesusan wishikrar tawasap jaṅki najanamun etsenkrumtikiarmiayi. Yamakai pushincha uunt akupniua áintsan áentsrarmiayi. <sup>3</sup>Nuyá “Israera Uuntria, kakaram ajasta” tiar yapiniam awatiarmiayi. <sup>4</sup>Nuyá Piratu atak jiinki tímiayi “Átum wáinkiarum nekaatarum tusan Jesusan jíiktijatjai. Wikia tunaarínkia penké wáittsujai.” <sup>5</sup>Tímiatai Jesussha jaṅkin etsenkruku tura pushin yamakairman entsaru jíinkimiayi. Tura Piratu nuí káunkarun tiarmiayi “Pai juiti, íistarum.”

<sup>6</sup>Israer-patri uuntrisha suntarsha Jesusan íisar ataksha ataksha kakantar unsumainiak “Krúsnum jakati” tiarmiayi.

Piratusha “Átum júkiirum máatarum. Ni tunaarín penké wáittsujai” tímiayi.

<sup>7</sup>Tura Israer-shuar tiarmiayi “Nu shuar “Yusa Uchiríntjai” takui jákatniuiti. Iiniu akupeamu aarma nuí núniskete” tiarmiayi. <sup>8</sup>Nuna antuk Piratusha nu nanṅkaamas ashamkamiayi. <sup>9</sup>Ataksha init wayá Jesusan aniasmiayi “¿Tuyāmpaitiam?” Tura Jesussha penké áikchamiayi. <sup>10</sup>Nuyá Piratu tímiayi “¿Urukamtia winia airtsum. Wi jeajna nu nékatsmek? Wakeraknaka krúsnum máatniuncha tura anṅkant akupkatniuncha jeajai.”

<sup>11</sup>Tutai Jesussha tímiayi “Yus nuna amaschaitkiuinikia penké tujinkiaintme. Nu asamtai amiin surutka nu ámin nanṅkaamas tunaarinniuiti.”

<sup>12</sup>Piratusha nú chichamtaik Jesusan ankant akupkattsa wakerimiayi. Antsu Israer-shuar untsumainiak tiarmiayi “Ju ankant iníakmeka ame úunt akupniu amikrinchuitme. Juka “úunt akupniuitjai” taku atumí uunt akupniuri nemasrinti” tu untsumkarmiayi.

<sup>13</sup>Piratusha taman antuk akupin pujutainium pujus Jesusan untsukmiayi. Nu kaya ukatkamu asamtai Israer-shuara chichamen Kapata anaikiarmiayi. <sup>14</sup>Paskua jisat jeatsain nantu tutupin ajatsain Piratu Israer-shuaran tímiayi “Uunt akupniuram ístarum.”

<sup>15</sup>Tura ashí “Jakati, jakati, krúsnum máatá” tu untsumkarmiayi.

Tura Piratu “¿Atumí uunt akupniurin krúsnum máattajak?” tímiayi.

Tura Israer-patri uuntri tiarmiayi “Atumí uunt kapitántrumek in akuptamji. Chíkichka atsawai.”

<sup>16</sup>Tutai Piratu Jesusan krusnum mantamnati tusa tsankatkarmiayi. Tutai niisha Jesusan júkiar wearmiayi.

**Jesusan krúsnum máawarmiania nu**  
(*Mat. 27.32-34; Mar. 15.21-32; Ruk. 23.26-43*)

<sup>17</sup>Jesussha ni krusri yanaki Kúrkuta náinnium wémiayi. Kúrkuta naarisha Israer-shuara chichamen “muuka ukunch” tawai. <sup>18</sup>Nu krúsnum ajintrurar awajainiarmiayi. Tura mai pæ jimiara shuaran chikichik chikichik awajainiarmiayi. Tura Jesus ajapén ámiayi. <sup>19</sup>Piratusha Jesusa krúsrin uunt áarman anujkamiayi. *NASARETNUMIA JESUS, ISRAERA UUNT AKUPNIURI*

Tu áarmauyayi. <sup>20</sup>Israer chichamjaisha Kriaku chichamjaisha Rúmanmaya chichamjaisha áarmauyayi. Menaintiu chichamnum aarma asamtai tura Jesusarén pepru tjiuch asamtai Israer-shuar ti untsurí áujiarmiayi. <sup>21</sup>Nu asamtai Israer-patri uuntri Piratun jeariar “Israera Uunt Akupniuri” áaraip. Antsu “Israera Uunt Akupniurintjai tawai” tu aarta” tiarmiayi.

<sup>22</sup>Tura Piratu nincha áikiar “Wi áaraj nuke átatui” tímiayi.

<sup>23</sup>Suntarsha Jesusan krúsnum awajainiar ni entsarmarin kuátru akankar ankant ankant júkiarmiayi. Tura ni pushirin apatsuk najanamu asamtai jáaktinian nakitrarmiayi. Kame yakíya nunkaani apaiyichma takamtsukuyi. <sup>24</sup>Tuma asamtai suntar tiarmiayi “Juka jáakchatai. Antsu nakurakin yának ati nu jukiti.” Nújainkia yaunchu Yus-Chichamnum aarma nu uminkiamiayi:

“Winia entsarmarun akantrarmiayi tura nakurusar awakmakua nuna winia pushirun súsarmiayi” áarmaiti.

<sup>25</sup>Krúsnumsha Jesusa nukurísha Kriúpasa nuarí Marisha tura Máktaranmaya Marisha wajaarmiayi. <sup>26</sup>Jesus ni nukuríncha tura ni ti aneamu unuiniamuríncha nu wajan wáiniak ni nukurín tímiayi “Nukuru, ju ame uchirnea áintsan atí.” <sup>27</sup>Nuyá ni unuiniamuríncha

tímiayi “Ju ame nukua áintsan atí.” Nu tsawantaik nu unuiniamurí ni jeen jukí awayámiayi.

### Jesusa jakamurí

(Mat. 27.45-56; Mar. 15.33-41; Ruk. 23.44-49)

<sup>28</sup>Nuyá ashí uminkiamtai Jesus nuna nekáa yaunchu Yus-Papinium aarma uminkiatí tusa “kitiamajai” tímiayi. <sup>29</sup>Nuisha pininum churuín ámiayi. Tura shuar nuna uruchjai ejampar sapapjai ijiu mukunaati tusa susamiayi. <sup>30</sup>Jesusha churuínian najekaa “ashí túrunatniua nu mash uminkiai” tímiayi. Nuna ti, muuken nená jakamiayi.

### Suntar Jesusan paenam nan̄kijjai ijiumiania nu

<sup>31</sup>Nu tsawantai, kashinkia paskua námper uunt tsawantri asamtai tura ayampratin tsawant aa asamtai, Israer-shuar jaka ayashí nuí paant aín tusa nakitrarmiayi. Nu asamtai Piratun seainiak “Krúsnum ajintrurma ainia nuna kan̄kajin suntar kupirkarti. Nuyá wari jákarmatai krúsnumia júkiarti” tiarmiayi. <sup>32</sup>Nuyá suntarsha weriar emka krúsnum amia nuna kan̄kajin kupirkarmiayi. Nuyá chikichnasha Jesusjai atsankiar ajintrurma nuna kan̄kajincha kupirkarmiayi. <sup>33</sup>Tura Jesusan weantuk yaunchu jákaiti tusa kan̄kajin kupirtsuk <sup>34</sup>suntar aya paenam ijiumiayi. Ijiumtaisha nu chichamtaik numpa yumijjai puarmiayi. <sup>35</sup>Wi, Juan, nuna wainkia asan nekas tajai. Atumsha Yus enentáimtustarum tusan tí nekas tajai. Wi áarajna nu nekasaiti nékajai. <sup>36</sup>Yaunchu Yus-Chichamnum aarma uminkiatí tusa túrunaiti:

“Ni ukunchin kupirkachartatui” tu áarmaiti.

<sup>37</sup>Tura chikichcha:

“Ijiuarmiania nuna wáinkiertatui” tu áarmaiti.

### Jesús iwíarsamu amiania nu

(Mat. 27.57-61; Mar 15.42-47; Ruk. 23.50-56)

<sup>38</sup>Nuyá Arimatéanmaya Jusé Jesusa ayashín jukitiaj tusa Piratun seamiayi. Nu Jusé Jesusan enentáimtaiat Israer-shuara úuntrin ashamak paant nemarsachmiayi. Niisha seamtai Piratu “Jukitia” tímiayi. Tutai Jusé Jesusa ayashín jukimiayi. <sup>39</sup>Nikiutémusha Jesusjai chichastaj tusa kashi tarimia nu jimiará kun̄kuin pachimpramun ti nukap sumak itiamiayi. Mira kun̄kuinniasha aruí kun̄kuinniasha sumakmiayi. <sup>40</sup>Nuyá Jusé Nikiutémujai Jesusa ayashín júkiar kun̄kuinian kuérar jaanch esarmajai penuararmiayi. Israer-shuar tuke nunisar ikiúu ármiayi. <sup>41</sup>Jesus krúsnum maamua nuí aja tíjiuch ámiayi. Nu ajanmasha waa náinnium paka taurma ámiayi. Nusha yama taurma asamtai jaka nuí ikíuschamuyayi. <sup>42</sup>Nu waa sha tíjiuch asamtai tura Israer-shuara ayampratin tsawantri jeatemamtai Jesusa ayashín nuí iwíarsarmiayi.

**Jesus nantakmiania nu**

(Mat. 28.1-10; Mar. 16.1-8; Ruk. 24.1-12)

**20** <sup>1</sup>Tumintincha káshik kirit aín Máktaranmaya Marí Jesus iwiarsamunam ístajtsa wémiayi. Jesusan iwiarsar kaya uuntjai waan atutkarmiayi. Tura Marí nui jeá nu kaya uraimiun wáinkiamiayi. <sup>2</sup>Nuna wáiniak Semun Pítiur pujamunam tsékenki wémiayi. Chíkich unuiniamurí Jesus ti anemia nusha nuísha pujumiayi. Tura Marí tímiayi “Iwiarsamunmaya ii Úuntrin júkiarai. Tura ¿tuínsuk ikiusara?” <sup>3</sup>Pítrusha chíkich unuiniamuríjiai jíinkiar iwiarsamunam iyuwarmiayi. <sup>4</sup>Mai métek tsékenkiar Pítiur jeatsain chíkich unuiniamurí iwiarsamunam emka jeamiayi. <sup>5</sup>Niisha wayatsuk tsuntsumá iis penuarmarínkia nui tepan wáinkiamiayi. <sup>6</sup>Nuyá Semun Pítiur ukunam jeá iwiarsamunam wayá penuarmarí nui tepan wáinkiamiayi. <sup>7</sup>Chíkich jaanchcha Jesusa muuken penuarma nusha nanerma niisháa tepan wáinkiamiayi. <sup>8</sup>Nuyá chíkich unuiniamurí emka tamia nusha iwiarsamunam wayamiayi. Niisha túruna wáiniak “Jesus nekas nantakni” tu enentáimpramiayi. <sup>9</sup>Nuna wáintsuk Yus-Chichamnum “Jesus jakamunmaya nantaktiniaiti” áarman áujariat nekaacharmiayi. <sup>10</sup>Nuyá mai ni jeen wakеткиarmiayi.

**Máktaranmaya Marincha Jesus wantintiukmiania nu**

(Mar. 16.9-11)

<sup>11</sup>Tura Marikia iwiarsamunam juak úutu pujumiayi. Niisha úutiatañ tsuntsumá iwiarsamunam ímsamiayi. <sup>12</sup>Tura Jesusa ayashí nuik tepesmanum nayaimpinmaya suntar puju entsaru jímiar pujan wáinkiamiayi. Chikichik múuknumaaní tura chíkichka nawenmaani pujumiayi. <sup>13</sup>Nayaimpinmaya suntarsha “¿Urukamtai úutam?” tiarmiayi.

Marisha tímiayi “Winia Úuntrun jurutkiarai tura ¿tuínsuk ikiusara?”

<sup>14</sup>Nuna tí ayanmar Jesusan wáiniak Nin nekaachmiayi.

<sup>15</sup>Jesus aniak “¿Urukamtai úutam. Ya eeam?” tímiayi.

Marisha ajan wáinnia nuiti tusa tímiayi “Uunta, ame ni ayashí jukimkia, tui ikiusmam ujatkata wi jurumkitiaj” tímiayi.

<sup>16</sup>Nuyá Jesus “Mariya” tímiayi.

Tutai niisha ayanmar “Rapuni” tímiayi. Nusha Israer-chichamnum “Uuntá” tawai.

<sup>17</sup>Jesusha tímiayi “Emetruawaip. Winia Aparuí wáatsjai. Antsu weme Wíi shuar titiá “Winia Aparuí nayaimpiniam wéajai. Niisha atumí Aparínti. Winia Yúsruiti tura atumí Yúsrinti” tawai titiá” tímiayi.

<sup>18</sup>Nuyá Máktaranmaya Marisha Jesusa unuiniamurín wáiniak “Wi Úuntan wáinkiajai, tímiayi. Niisha juna mash túrutui” tu ujakarmiayi.

**Jesus ni unuiniamurĭn wantintiukmiania nu**  
(*Mat. 28.16-20; Mar. 16.14-18; Ruk. 24.36-49*)

<sup>19</sup>Nu tsawantaĭ, tumiņtin, ni unuiniamurĭ Israer-shuara úuntrin ashamainiak kashi iruntrar waiti epeni pujuarmiayi. Túrasha Jesus áyatik wayamiayi. Tura ajapén wajas “shĭir pujustarum” tímiayi. <sup>20</sup>Nuna tĭ, nuyá ni uweĵen ajintruamuncha ni paen iĵiumuncha iniakmasmiayi. Ni unuiniamurĭsha Úuntrin wáinkiar shĭir warasarmiayi. <sup>21</sup>Ataksha Jesus “Shĭir pujustarum, tímiayi. Winia Apar akatar akuptukma núnisnak Wisha akatran akupeajrume” tímiayi. <sup>22</sup>Nuyá ni matsatmanumaanĭ umpuĭ tímiayi “Yusa Shĭir Wakanĭ atumĭ enentáĭn wayaĭti. <sup>23</sup>Shuara tunaarĭnkia átum “asakártĭ” tákurminkia tsanĭkurnartatui. Tura nu shuar “sumamati” tákurminkia tuke sumama pujawai” tímiayi Jesus.

**Tumas Jesus nantakniun wáinkiamiania nu**

<sup>24</sup>Tura chikichik unuiniamu, Jímiampramu Tumas, Jesus tamia nuĭ pujuchmiayi. <sup>25</sup>Tura ukunam chikich unuiniamurĭ ujainiak “ĭi Uuntri wáinkiaĭi” tiarmiayi.

Tura Tumas tímiayi “Ajintruamurĭ wáinkian uweĵrun awąintĭuatniuitĭai. Tura paenumsha awąintĭuatniuitĭai. Peņké jaka asamtai aya nujai iniantkimiun enentáĭmtustatĭai” tímiayi.

<sup>26</sup>Chĭkich tumiņtin ataksha Jesusa unuiniamurĭ iruntrarmiayi. Nuiņkia Tumassha niĭĭĭai pujuarmiayi. Tura waiti epenmianumaņ Jesus wayá ajapén wajas “Shĭir pujustarum” tímiayi. <sup>27</sup>Nuyá Tumasán tímiayi “Winia uweĵur ĭsam ame uweĵem awąintĭuata. Núnismek winia paerui uweĵem awąintĭuam ĭstá. Tura arantutsuk nekas enentáĭmtursata.”

<sup>28</sup>Nuyá Tumas “Winia Úuntrua, nekas winia Yúsruitme” tímiayi.

<sup>29</sup>Jesussha tímiayi “Winia wáĭtkiam nuiņ enentáĭmtursame. Antsu Winia wáĭttsuk enentáĭmturaru nekas shĭir áiniawai” tímiayi.

**Shuar Yusa Uchirĭn enentáĭmtusarti tusa ĵu papĭ áarmaiti**

<sup>30</sup>Aentsti tujintĭamuncha Jesus túramu ti untsurĭ ĵu papĭniun áarchamu áiniawai. Tura ni unuiniamurĭ mash wáinkiarmai. <sup>31</sup>Antsu Jesuska Kristu asa Yusa Uchirĭnti tu enentáĭmtustarum tusan ĵúnaka áarmajai. Tura enentáĭmtakmin Jesus ni iwĭaakmarĭn yamarma nuna amastatui.

**Entsá yantamnum Jesus siati (7) unuiniamurĭn wantintiukmiania nu**

**21** <sup>1</sup>Tipirias antumianĭka káanmatkariĭn Jesus ni unuiniamurĭn wantintiukmiayi. Júnisanĭ ámiayi. <sup>2</sup>Semuņ Pĭtrusha Jímiampramu Tumassha Kananmaya Natanaérsha Sepetéu uchirĭsha tura chĭkich jímiar unuiniamurĭsha métek iruntrar pujuarmiayi. <sup>3</sup>Semuņ Pĭtrusha “Namakan nekajai nanĭkiattsan wéajai” tímiayi.

Chíkich mash “Iisha winittiaji” tiarmiayi.

Wéar uunt kanunam enkemprar nu kashi achitsuk tsawararmiayi. <sup>4</sup>Káshik aín Jesus entsá káanmatkarín wantinkiamiayi tura ni unuiniamurísha Jesusan nekaacharmiayi. <sup>5</sup>Jesussha tímiayi “Uchiru, ¿namak achikiurmek?”

Niisha “Atsá” tiarmiayi.

<sup>6</sup>Tutai Jesus tímiayi “Neka untsuurnumaani ajunkatarum. Nui achiktatrum.”

Nii timia núnisan túrawar namakan ti achikiar nekan júsatniun tujinkiamiayi. <sup>7</sup>Nújainkia Jesusa unuiniamurí Jesus ti aneemia nu Pítrun tímiayi “Ti Úntrinti.” Takui Pítrusha ámiaku asa ni pushirín entsar entsá iniañmiayi yukuak jeataj tusa. <sup>8</sup>Chíkich unuiniamurísha jeachat pujuiniachuk nekan japiki kanujai káanmatkanam jeawarmiayi. <sup>9</sup>Káanmatkanam jeawar ji kaijr ámanum namakan jiámun wáinkiamiayi. Tantanha wáinkiamiayi. <sup>10</sup>Jesussha “Átum achikiurmena nuyá jiátin itiatarum” tímiayi. <sup>11</sup>Tutai Semuñ Pítiur kanunam we nekan nekartiuk káanmatak japiki itiamiayi. Itiar namaknasha siañtu senkuenta nuyá tres (153) nekapmararmiayi. Ti untsurí áyat nekasha jáankachmiayi. <sup>12</sup>Nuyá Jesussha “Yurumátiarum” tímiayi. Ni unuiniamurísha “aya ii Uuntri áminiaiti” tusar inintrustinian natsantiarmiayi. <sup>13</sup>Nuyá Jesus wajaki tantan jukí súsarmiayi. Núnisan namaknasha súsarmiayi.

<sup>14</sup>Jesus jakamunmayá nantaki jujai menaintiu ni unuiniamurín wantintiukarmiayi.

### Jesus Semuñ Pítrujai chichasmiania nu

<sup>15</sup>Nuyá yurumáwar Jesus Semuñ Pítrun aniasmiayi “Junasa uchirí Semuñka, ¿ju shuar nankaamas anentmek?”

Pítrusha tímiayi “Ee, Uunta, wi wakerajam nu Ame nékame.”

Jesussha “Nuiñkia winia murikiur ayuratniua áintsam Winia enentáimturainia nu yaíntá” tímiayi. <sup>16</sup>Ataksha aniasmiayi “Junasa uchirí Semuñka, ¿Winia anentmek?”

Pítrusha “Ee, Uunta, wi wakerajam nu Ame nékame” tímiayi.

Jesussha “Winia murikiur wáinkiatá” tímiayi. <sup>17</sup>Nú ataksha aniasmiayi “Junasa uchirí Semuñka, ¿winia wakerutamek?”

Pítrusha menaintiu iníam kúntuts enentáimiar tímiayi “Uunta, ashí nékame. Wi wakerajam nu Ame nékame.”

Jesussha tímiayi “Winia murikiur ayurata. <sup>18</sup>Maa, nekas tájame. Natsa asamka iwiarmampram ame wakeramunam wéuyame. Tura úuntach ajasmeka ame kunturam ayaparakmin chíkich aentstampattawai tura ame wétin nakitiam nuj juramkiartatui.” <sup>19</sup>Jesus nújainkia Pítiur máatniun ujakmiayi. Tura núnisan jakamtai shuar Yúsán shiir awajsatniun ujakmiayi. Nuyá Pítrun “Nemartusta” tímiayi.

**Juan túrunatniun Pitiur Jesusan aniasmiania nu**

<sup>20</sup>Pítrusha ayanmar chíkich unuiniamurín Jesus ti anea nuna némarun wáinkiamiayi. Kame nu unuiniamuka nuik Jesus jáatsain yurumáiniakui “Uunta, ¿ya surutmaktata?” timia núiti. <sup>21</sup>Nincha Pítiur wáiniak Jesusan aniasmiai “Uunta, ¿jusha warí urukatniuit?”

<sup>22</sup>Jesussha ayak “Wi wakeraknaka iwiaaku pujain tátatjai tíminiaitjai. Nuna tákuisha ¿warí itiurtama? Ámeka nemartusta” tímiayi. <sup>23</sup>Nújainkia “Nu unuiniamurí jákashtatui’ tusa Yus-shuarnum áujmatiarimiayi. Túrasha Jesus “jákashtatui’ tíchamiayi antsu áyatik “Wi wakeraknaka iwiaaku pujain tátatjai takuisha ¿warí itiurtama?” tímiayi. <sup>24</sup>Wikia nú unuiniamuríntjai. Ju papincha aaru asan “mash nekasaiti’ tajai. Ashí shuarsha núnisaran tuńniawai.

<sup>25</sup>Nu arantcha juí áarchamusha ti awai. Kame ashí áamka ti untsurí papí asa ashí nunkanam ikiuschamnia ainti. Nuke atí.

# Jesusa Akatramurí Yusa Wakaníjiaí TÚRAMU

## Yusa Wakanín nákasarmiania nu

**1** <sup>1</sup>Amikiur Tiúpiru:  
Nuik akupkamiaj nú papinium ashí Jesus túramia nuna áatramiajme. Tura unuitiampramij nunasha áatramiajme. Yámankamtaiknumia, <sup>2</sup>nayaimpiniam wétsuk, ashí Nii túramia nuna tímiajme. Jesuska, nayaimpiniam waketsuk Yusa Wakaní kakarmaríjiaí túratnia nuna ni akatramurín jintintiawarmiaí. <sup>3</sup>Tura jaka nantaki, Jesus tímiajajik wantintiukmiaí ni akatramurín. Tura kuarenta (40) tsawant nin wantintiukarmiaí. Nuna tura nekas iwiaakjai tusa iniakmasmiaí, nekaawarat tusa. Tura Yusa akupeamurí urukukit nuna mash ujakmiaí.

<sup>4</sup>Jesuska ni akatramuríjiaí tuke pujus, nin chicharuk “Jerusarénumia wéerap, tímiaí. Winia Apar “amastatjai” tímia nuna, paant ujakchamkajrum. Nu túrunat tusarum Jerusarénum nákastarum, tímiaí. <sup>5</sup>Tuke enentáimsatarum. Juan entsajai atumí ayashín imiatmimiarme. Túrasha wárik Yusa Wakanísha atumniasha tarutmar, atumí enentáin enkemprutmattarme. Nusha enentáí imiantin áintsan̄kete” tímiaí.

## Jesus nayaimpiniam wakamiania nu

<sup>6</sup>Tura Jesusjai irunar matsamas anintriarmiaí “Uunta, Israer-shuar ájinia nu, an̄kant ajasakrin iiniuk Akupin atak naamkatin yamaí jeayash” tiarmiaí. <sup>7</sup>Jesus ámiuk tímiaí “Winia Apar túrattana nu warí tsawantinik túrunatí nu nekaatniusha atumniachuiti. Apar Niñki neka asa ni kakarmaríjiaín túrattawai. <sup>8</sup>Tura atumsha Yusa Wakaní kakarmarín sunastatrum. Nii taa enkemprutmamtai kakaram ajasrum,



Wíi túramu etserkattarme. Emka juí Jerusaréñ péprunam etserkattarme. Nuyá ashí Jutía núñkanam, tura arant Samaria nuñkanmasha, tura nú arant ashí núñkanam werum, Wíi túramu etserkattarme” tímiayi Jesus.

<sup>9</sup>Nuyá chichas amir, ashí ni akatramurí ii wajainiái, Jesus nayaimpinmaani junakmiayi. Wéa-wéakuí yurankim mash Nin amuámiayi. Tuma asamtai ni akatramurí Nin wáinkiacharmiayi. <sup>10</sup>Tura Jesus waakkui ni akatramurísha yakí ii wajainiái, jimiara áishman puju entsaru nuí wantintiukarmiayi. Tura ayamach wajattsarmiayi. <sup>11</sup>Nu áishmansha Jesusa akatramurín tiarmiayi “Kariréanmaya áishmanka, çurukamtai nayaimpinmaani imiá ímprum? Ju Jesusak atumíya nayaimpiniam wea wáinkiarumna núnisan ataksha winittiawai” tiarmiayi.

### Matíasan anaikiarmiania nu

<sup>12</sup>Tuasua amikmatai Jesusa akatramurí Uriwiu náinniumiá akaikiar Jerusaréñnum waketkiarmiayi. Uriwiu naincha Jerusaréñnumsha tíjüchiiti, chikichík kirumitrua núnisan. <sup>13</sup>Tura Jerusaréñnum jeawarmiayi. Nuí jeawar, jeá wayawar yakí wákararmiayi. Nuí Pítrusha, Jakupusha, Juansha, Antressha, Jiripisha, Tumassha, Parturumísha, Mateusha, tura Arpeu uchirí Jakupusha, nuyá ásump Semunsha, Jakupu yachi Jútassha, tímian wayawarmiayi. <sup>14</sup>Jusha mash tuke iruniarmiayi Jesusa yachijíai. Tura Jesusa nukurí Marijiaí, nuyá chíkich nuwajaisha tuke iruniarmiayi, Yus áujstai tusar. <sup>15</sup>Nuí siántu painti (120) aents iruntrarmia nuí Pítiur chichastaj tusa wajakmiayi.

<sup>16</sup>Pítiur juna tímiayi “Yatsurtírmesha, umarutírmesha antuktarum. Yuska yaunchu ni Papiriñ Jutasnan áamtikramiayi. Jútas akiintsain Tawitkia, Yusa Wakani jintintiam Jutasnan áarmiayi. Jesusan achik surukarmia nú shuaran nekapruamia núiti. Kame Tawitia áarmari Yus-Chicham asa tímianak uminkiatniuyi. <sup>17</sup>Nú Jutaska ii írutramuitiat, ii takaamurín páchitkiaiat, <sup>18</sup>tunáa tura nujai kuítian achik nuñkan sumakmiayi. Tura piniakum iniaa tantane páttimiayi. <sup>19</sup>Tuma asamtai ashí Jerusaréñnum pujuarmia nu, nuna nekaawar nú nuñkan “Numpa Nuñka” anaikiarmiayi. <sup>20</sup>Kame Sarmu papinium Tawitkia juna áarchamkia:

“Ni jeesha itiarak atí.

Nu jeanmanka penké pujuschartí.” Tura

“Ni takatri chíkich atankiti.”

Tu aarmaiti’ tímiayi.

<sup>21</sup>Tuma asamtai yamaikia chíkich anaikiatniuitji. Tura nánkamas achikchatniuitji. Antsu ii nemartamkau atí. Uunt Jesus ijiaí pujumia nuí tuke Nin nemarsamia nu atí. <sup>22</sup>Juan Jesusan imiaimiania nú tsawantnumia jukí, Jesus nayaimpiniam wémiania nú tsawantan tímianu ejé tuke Niijiaí

wekaimia nu atí. Nu shuar enentáimtusar, chikichik achiktai. Iisha iruntrar Jesusa nantakmiarj etserkamí tusar túramí” tímiayi Pítiur.

<sup>23</sup>Tura nuyá jimiara shuaran anaikiarmiayi. Matíasan anaikiarmiayi. Tura chikichnasha Jusen, ni chíkich naarj Parsapas, tura apach náarinkia Justu, nunasha anaikiarmiayi.

<sup>24-25</sup>Tura nuyá Yus-shuar Yúsán áujainiak juna tiarmiayi “Ii Uuntri, Amesha ashí shuara enentáí nékame. Jui awai jimiara áishman. Jútas tunáa túrak jákatniunam wéak akatramu takatan ikiukmiayi. Yamaikia Jútasa takatri achikiat tusam, ¿tuá achikium, Uunta? Paant iniakmasta.” Tu aujsarmiayi.

<sup>26</sup>Tura Israer-shuara túrutairi núnisan, wats yaki nupetmakat tusar túrawarmiayi. Tura Matías nupetmakmiayi. Túrunamtai Matíasnak pachikiarmiayi.

### Yusa Wakaní taramiania nu

**2** <sup>1</sup>Pintikiustís náartin jísat jeamtai, chikichík jeanman nuiñ Yus-shuar tuakarmiayi. <sup>2</sup>Tumaj aya aneachma nayaimpinmaya nasea áintsan téter ajaki winian antukarmiayi. Ashí mash jeá pujuarmia nuka antukarmiayi. <sup>3</sup>Tura nuí pujuiniaji ji wajaí kea áaniun wáinkarmiayi. Túruna ankant ankant puunak tarurarmiayi. <sup>4</sup>Tuma asamtai Yusa Wakaní ashí ni enentáin pimiutkarmiayi. Túram chichasarat tusa Yusa Wakaní ni nekatairi súsarmiayi. Tuma asamtai nujaj niisha chíkich chichaman chichasarmiayi.

<sup>5</sup>Nui Jerusarénum Yus táman umirin Israer-aents áirmiayi. Ashí nunkanmaya Jerusarénum taar matsamarmiayi. <sup>6</sup>Tura túrunamia nuna antukar káunkarmiayi. Tura ashí shuar ni chichamejain chichaamun antukarmiayi. Tuma ásar, warinkit, tu enentáimsarmiayi. <sup>7</sup>Nekaachar ashamkarmiayi. “Warinkit, tunaim ajarimiayi. Ju aents chíkich chíkich chichaman chichainia nu, ashí Kariréanmayanchukait, tiarmiayi. <sup>8</sup>Tura iisha ankant ankant ii chichamenka ántatsjik. Ausha urukainiakua, nunak chichainiawa, tiarmiayi. <sup>9</sup>Jui ashí nunkanmaya aents pujuiniatsjik. Partianmaya, Eramnumiasha, Misiuputámianmayasha, Puntanmayasha, tura Asia nunkanmayasha, <sup>10</sup>Príjianmayasha, Pampirianmayasha, Ejiptunmaya tura Áprikianmaya Serinia nú nankaamasnumiasha pujuiniatsjik, tiarmiayi. Nuyasha ii shuarsha Ruma péprunmaya yaunchu taar jui matsatainiawai. Chikichcha tuke Israer-shuar áiniawai. Tura chikichcha Israer-shuar ajastaj tusa Israer túrutairin mash túruiniawai. <sup>11</sup>Kritianmayasha Arapiamaya pujuiniaji. Tura ashí mash ii chichamejajsha Yusa péñker túramuri ántaji” tiarmiayi.

<sup>12</sup>Ashí aents nuna nékachu ásar ashamkarmiayi. Tura nuámtak aniniaisarmiayi “¿Warinminiait ju?” <sup>13</sup>Tura chikichcha wishikiarmiayi. “Nampeku áiniatsuash” tiarmiayi.

Pítiur ujakmia nu

<sup>14</sup>Nuñkia Pítiur, chíkich áuntse Jesusa akatramurijiaí wajaki, kakantar chichasmiayi. Chichaak tímiayi “Jútíanmayá shuartiram, Jerusarénnumiätirmesha antuktarum. Wi títiatjana nu antukrum pénker enentáimpratarum. <sup>15</sup>Ju áishman, nampekarai, tárumna nu, nampekcharai. Warí, nantu imiá ishichik takuni. ¿Aísha itiurak? <sup>16</sup>Antsu Yúsnan etserin, ni naari Juér, yaunchu áarmia nu, yamá túrunayi, tímiayi.

<sup>17</sup>Juna áarmiayi: “Yus tawai “Jú nunka amuukatin jeatemamtai, winia Wakantrun ashí áentsnum akupkattajai, yumi yaraanua áintsan. Atumí uchiri, atumí nawantrisha Yusa chichamen áujmariartatui. Tura nátsaka ímariartatui. Tura uuntka mesekramiartatui. <sup>18</sup>Tura áishmansha nuwasha winia takartin ainia núnaka winia Wakantrun akuptukartatjai. Túram niisha Wíi túramun áujmariartatui. <sup>19</sup>Yakí nayaimpiniam, aents túrachminian iniakmastatjai. Tura nunkanmasha winia kakarmarun iniakmastaj tusan numpancha, jiniasha, mukuintiuncha yuranmia áintsan akupkattajai. <sup>20</sup>Tura tsawái nantusha kajinkiattawai. Tura nantusha mushatmar numpa núniktatui. Uunt tsawant achikmiajna nu jeatsain, túrunattawai. Nú tsawantcha imiá nekas uunt átatui. <sup>21</sup>Nuñkia ashí shuar nekas winia kakarmarun seana nuka uwemprartatui” tímiayi Yus.”

Núnis Juér áarmiayi’ tímiayi Pítiur.

<sup>22</sup>Tuke chichaak: ‘Israernumia shuartiram, wi títiatjana nu antuktarum. Nasarénumia Jesusnan tajai. Nú Jesusan Yus shiir enentáimtawai. Yuska, átum ti enentáimprarum ni kakarmarin paant nekaatarum tusa, nú Jesusan ti ikiakármiai. Tura Jesusjai aentsti túrachminian Yuska túramiayi, átum ímmianum. Nuka ti paant nékarme, tímiayi. <sup>23</sup>Tura Jesus surunkamia nuna Yuska yaunchu, túruntsain, paant nekaamiayi. Túrasha Yus enentáimmia nujai métek túrawarmiayi. Tura atumek emetarum Jesus jukimiarme. Nú arant, krúsnum máatarum, tunáa shuar tímiarme. <sup>24</sup>Túramunak Yus Jesusan jákatniun nupetmamtik iniantkimiayi, tuke jákachmin asamtai.

<sup>25</sup>Iimiata, ii uuntri Tawit Jesusnan kantamprua juna áarmiayi:

Úuntan tuke pujurtan wáinmiajai. Winia pujurtakui awajkamu áchattajai.

<sup>26</sup>Tuma asamtai winia enentáirjaisha Nin shiir enentáimtusmiajai. Tura wenurjaisha shiir chichaman chichamiajai. Jáaknasha shiir enentáimsan jakattajai, aneantiniapitjia tusan.

<sup>27</sup>Winia wakaniur, Yusru, jákatniunam ikiurtuschattame. Wi ame Uchirmetjai, Tunaarincha. Túmaitkui anentu asam ayashur káurtin tsankatrukchattame.

28 Tura iwiaaku átin jintia jintinrutamame. Tura tuke pujurtakum waramtikrustatme.

Tu áarmiayi Tawit' tímiayi.

29 Pítiur tuke chichaak: 'Páantchakait. Ii uuntri Tawit yaunchu jákai. Tura iwiansamuiti. Ni iwiansamuri iini pujatsuk. 30 Túrasha Tawitkia Yúsnan etserniuyayi. Tuma asa Yus tímia nuna nekaamiayi. Yus Tawitian chicharuk tímiayi "Ame akupniutme. Nekas tájame, ukunam ame iniannamurminian Kristu akiiniattawai. Niisha Akupin anainiaktatui, amea áintsan." Nuna Yus táman Tawit nekaamiayi. 31 Neka asa, túruntsain Tawit, wainkia nútiksán, Kristu nantaktintri áarmiayi. Kristu túrunatniuri chicharuk tímiayi "ni wakaníncha jákatniunam ikiukchatniuyi. Ayashíncha káurtinian tsankatkashtiniuyi." 32 Au Krístun tímia nu Jesusaiti. Nu Jesusnak Yus iniantkimiayi. Nuka iisha neka asar étsereaji. 33 Yuska, Jesus nankaamantuiti tusa ni untsuuriñi apujsaiti. Tura ni Wakanín Jesusan súsaiti, Nii yaunchu tímia nútiksán. Tuma asantai jusha átum antukurmena nuna, tura úsurmena nunasha Yus suramsaiti. 34 Tawitkia ayashtiuk nayaimpiniam wákachmiayi. Tura nú Tawitiak juna áarmiayi:

"Uunt Yus winia Úntrun tímiayi "akupin pujutainium, winia untsuuruñi pujustá.

35 Ame nemasrumin nupetkattajai. Nu túruntsain jui pujustá' tímiayi." Nuní áarmaiti Jesusnan, tímiayi. 36 Tura ii, Israer áentsti, Jesus krúsnum maaitji, tímiayi. Jú Jesus máamjinia nuna Yuska Uunt Akupin anaikiamiayi. Túrasha Jesussha in uwemtikkiartin Krístuiti. Ashí áentstíram nu péñker nekaatarum" tímiayi Pítiur.

37 Nuna antukar wake mesekarmiayi. Tura Pitruncha chíkich akatramuncha aniasarmiayi "Yatsuru, ¿nuínkia iturkatjik?" tiarmiayi. 38 Tutai Pítrusha chichaak "Atumí tunaari ikiuktiaj tusarum Yus nekas enentáimtustarum. Tura ashí shuartiram Jesukrístu naari pachisrum imiantiarum. Nuínkia atumí tunaarin Yus tsankurtamprattarme. Túrunawakrumin Yuska ni Wakanín suramsattarme, tímiayi. 39 Yus tímia nuka atumin túramprume. Atumí uchiríncha tura ashí arant matsatainia nunasha tawai. Kame ii Yusri áentsun untsuktaj tusa wakerana nuna tawai" tímiayi.

40 Nú chichamjai tura nuyasha Pítiur tuke jintintiuk tímiayi "Yajauch shuara asutiátniuri átatna nuyá uwempratarum" tímiayi. 41 Tuma asantai nuna antukarmia nuka imianiarmiayi. Nú tsawantai menaintiú mir (3000) aents Yus-shuar ajasarmiayi. 42 Ashí nu shuar Jesusa akatramuri jintintiarum nuna tímiatrusan antukarmiayi. Tura irunar shiir enentáimtunaisar yurumin áarmiayi. Túrawar, Kristu enentáimtustin namperin najanin áarmiayi. Túrawar Yúsan áujiarmiayi.

### Yus-shuar pampararmiania nu

43 Tura Yuska aentsti túrachminian Jesusa akatramurijjai túramiayi ni kakarmarin iniakmastaj tusa. Tuma asantai ashí aents nuna wáinkiar

ashamkarmiyai. <sup>44</sup>Yúsan umirkaruka ashí métekrak pujuarmiyai. Tura ashí niiniu armia nuna sunaisarmiyai. <sup>45</sup>Ni nun̄ken surukar, ni takakmarincha surukar, atsumainia nuna súarmiyai. <sup>46</sup>Tuke tsawantak Yusa Uunt Jeen káuniarmiyai. Tura ni jeencha iruntrar warainiak Kristu enentáimtustin námper najanin ármiyai. Tura nan̄kaamantu enentáimtumatsuk, yurumkan ajamnainiarmiyai. <sup>47</sup>Túrawar, Yuska ti úuntaiti, tu wearmiyai. Tura ashí aents nin shiir enentáimtiarmiyai. Tura Uunt Yus tuke tsawant shuaran uwemtikiar Yus-shuar írunmanum íkiaun̄ki wémiyai.

### Wekaicha wekasamiania nu

**3** <sup>1</sup>Chíkich tsawantaj, nantu nun̄kaach ajasmatai, Pítiur Juan̄jaj, Yusa Uunt Jeen Yus áusatai tusar wearmiyai, Israer-shuar tuke turin armia nútiksaran. <sup>2</sup>Tura áishman̄, ni akiiniamuriniá wekaicha amia nu, nuí aá wáitiniam tuke tsawant pujumiyai. Nu áishman̄nasha ni shuari entsakí júkiar nú wáitiniam apujin ármiyai, nuí shuar wayan̄ kuítian seat tusar. Nú wáitisha, Shiir Waiti, tutaiyai. <sup>3</sup>Tura nú shutuapsha Pitrun Juan̄jaj wayan̄ wáinkiamiyai. Wáiniak kuítian seamiyai. <sup>4</sup>Tura Pítiur Juan̄jaj apajas ísarmiyai. Tura nú áishman̄nasha chicharuk “Íirsata” tímiyai. <sup>5</sup>Aishman̄sha, surustatuapi, tu enentáimias, ímsamiyai. <sup>6</sup>Nuyá Pítiur chichaak “Kuítrusha atsawai, tímiyai. Kurisha atsawai. Antsu kuítjaj nan̄kaamas takakjana nuna amastajai. Wats, Nasarénumia Jesukrístu kakarmarijjaj wajakim wekasata” tímiyai.

<sup>7</sup>Tinia iniais, Pítiur ni untsuurin̄i achik awajkimiyai. Túram ni nawesha, wanusesha kakaram ajasmiyai. <sup>8</sup>Tura niisha wajakí nantent ajakmiyai. Nuyasha wekasamiyai. Tura Pítrujajsha Juán̄jajsha Yusa Uunt Jeen wayawarmiyai. Nuik shutuapka wayá nantent nantent ajak Yusa náarin̄ shiir pachimiyai. <sup>9</sup>Ashí aents pujuarmia nu, nin wekaan wáinkiarmiyai. Tura ni chichamen̄ anturkarmiyai. <sup>10</sup>Tura chichainiak “Nuik Yusa Uunt Jeen wáitirin̄, Shiir Waiti tutainium, nu áishman̄ tuke pujuuya núchakait” tiarmiyai. Tura ni túrunamurin̄ nekaawar, ti ashamkar nusháa enentáimsarmiyai.

### Pítiur ujakmiania nu

<sup>11</sup>Shutuapka péñker ajasu asa Pítrujaj Juán̄jajsha pen̄ké tsurachmiyai. Tura aents nuí pujuarmia nu, warinkit tusar, jeáshkirí tséken̄ki wearmiyai. Nuka Sarumún̄na tiniu ármiyai. <sup>12</sup>Aents káunkarun Pítiur wáiniak, chicharuk “Israer-shuartiram, ¿urukamtai winiasha imiá írum? tiarmiyai. ¿Isha péñker asarik<sup>i</sup> tsuarmaji? ¿Ii kakarmarijjain̄kik<sup>i</sup> ewekamsamaji? <sup>13</sup>Atsá. Antsu Yuska ni Uchirin̄ Jesusan ashí nan̄kaamantu awajsaiti. Ii uuntri Apraamsha, Isaksha tura Jakupsha enentáimtin armia nú Yusan tajai. Átumka Jesus nakitrarum kapitían

Piratuí surukmarme. Tura Piratu akupkataj tau atumsha suritkiamarme. <sup>14</sup>Jesus péñker nákak enentáimniuyana nu “akupnakchati” tímiarme. Antsu shuáran main akupnakat tusarum wakerimiarme. <sup>15</sup>Túrarum iwiaaku átinian Amaana nu maamarme. Tuma ain Yuska Nin jakamunmayá iniantkimiayi. Nuka iisha neka asar étsereaji. <sup>16</sup>Tura ju aishman ju wajaana ju tura nékarmena ju, Yusa Uchiri naari enentáimta asa kakaram ajasuiti. Jesus enentáimtusú asa nekas péñker ajasuiti. Nusha wáinniu asarum nékarme’ tímiayi.

<sup>17</sup>“Wats, yatsurtiram, wi nékajai. Atumsha atumí úuntrijiai Jesusan túramarmena nu nékatsuk túramarme. <sup>18</sup>Tura nu túramurmijiai Yus yaunchu tímia nu tímianak umikiurme. Ni Krísturí wáitsatniuya nuna Yuska ashí ni etserniurín áamtikramiayi. <sup>19-20</sup>Wats, yamaikia tunaaruminiá kanaktiarum. Túrarum Yúsnumaaní ayantártarum, tunaarun asakárat tusarum. Túrunawakrumniñkia, atumin uwentikramprarat tusa Yus yaunchu anaikiamia nuna akupturmaktatrome. Nusha Jesukristuiti. Tura Nijiai enentáimin ayampratin átatui. <sup>21</sup>Tura yamaikia Jesukrístu nayaimpiniam pujustiniaiti, ashí iwiarnatsaiñ. Yuska ukunam ataksha nunkan shiir awajsattawai. Nuna ni etserniurín tsáapin enentái takaku armia nuna yaunchu áamtikramiayi. <sup>22</sup>Tuma asa Muisais ii aparín tímiayi:

“Atumi Uunt Yusri ukunam etserniun akupturmaktatrome, winia akuptukmia núnisan. Nuámtaktirminiá achik akupturmaktatrome. Tura nii títiatna nu umirkatarum” tímiayi.

<sup>23</sup>Nánkamas aents nu etserniun chichamen umíachkunka emesnartatui. Tura Israer-shuarnum páchitkia áchattawai.

Núnisan áarmiayi Muisaissha’ tímiayi.

<sup>24</sup>Pítur tuke chichaak ‘imiata, Yúsnan etserin Samuer ju tsawantin túratniurí etserkamiayi. Nuyá ashí Yúsnan etserniusha tuke nuna etseriarmiayi. <sup>25</sup>Etseriarmia nuka atumin túramprume. Tuma asa átum péñker pujustinian Yuska ii uuntri Apraáman ju chichaman susamiayi. “Nekas tájame, ame shuarum akiiniattana nujai ashí áentsnasha shiir awajsattajai’ tímiayi. Tura ii úuntrín tímia núnaka incha túramji, tímiayi. <sup>26</sup>Imiata, Yus ni Uchirín iniantkimia nui, atumin emka akupturmakmiarme. Atumsha, atumí tunaariya kanaktiarum tusa, tura atumin shiir awajtamsatniun wakerak túramiayi.” Nunak tímiayi Pítur.

#### Pitruncha Juánnasha kajerkarmiania nu

**4** <sup>1-2</sup>Pítrusha Juanjai Yusa chichamen áentsun jintintiainiak pujuarmiayi. Jesus nantakin asantai aencha nantaktin áiniawai, tiarmiayi. Tura chichaak pujuiniaí Israer-patri táarmiayi. Tura Yusa Uunt Jeen wainniu úuntrisha Satuséu aentcha táarmiayi. Taar Pitruncha Juánnasha kajerkarmiayi, niisha Jesusa nantakmiari chichaman

jintintinia asamtai. <sup>3</sup>Yamaikia k<sub>í</sub>awai, kashin iismí tusar achik sepunam en<sub>ke</sub>a iniaisarmiayi. <sup>4</sup>Tura Pitrun nuik anturkarmia nú aents untsur<sub>í</sub> Yus-shuar ajasarmiayi. Nuik Yus-shuaraim tura yamaiyaim iruram ti untsur<sub>í</sub> ajasarmiayi. Aya áishman<sub>ñ</sub>ak, sen<sub>ku</sub> mir (5000) aents áirmiayi.

<sup>5</sup>Kashin tsawarmatai Israer-shuara akupniur<sub>í</sub>, ni únuntr<sub>í</sub>sha, tura ni jintinniur<sub>í</sub>sha Jerusarén<sub>ñ</sub>num iruntrar<sub>í</sub>armiayi. <sup>6</sup>Nu<sub>í</sub>sha Anassha, Israer-patri uuntr<sub>í</sub> anaikiamu amia nu, tura Kaipiassha, Juansha, Arejantrusha, tura Israer-patri kapitiántr<sub>í</sub> shuar<sub>í</sub>sha tímian iruntrar<sub>í</sub>armiayi. <sup>7</sup>Iruntrar Pitruncha Juán<sub>ñ</sub>nasha utitiarum tusar akupkarmiayi. Tura itiar<sub>m</sub>atai, ajapén awajsarmiayi. Tura aniasarmiayi “Kame ¿yana kakarmarij<sub>í</sub>ai, yana chichamej<sub>í</sub>ai túrarum?” tiarmiayi. <sup>8</sup>Tutai nuyá Pítiur, ni enentáin Yusa Wakan<sub>í</sub> pimiutkamu asa tímiaiyi “Akupniutiram, tura úuntirmesha antuktarum. <sup>9</sup>Ju áishman<sub>ñ</sub> nuik shutuap amia nu pé<sub>ñ</sub>ker ajasmar<sub>í</sub> anintrarme. Kame itiurak pé<sub>ñ</sub>ker ajasuit tátsurmek. <sup>10</sup>Urukamtia ú<sub>ú</sub>ktataj. Anintrakrumin iisha paant títiat<sub>í</sub>, Israernum<sub>í</sub>a shuar ashí nekaawarat tusar. Ju áishman<sub>ñ</sub> Jesukrístu kakarmarij<sub>í</sub>ai pé<sub>ñ</sub>ker ajasuiti. Nasaré<sub>ñ</sub>num<sub>í</sub>a Jesukrístun, á<sub>t</sub>um máamurmena nuna, tura Yus jakamunmay<sub>a</sub> iniantkímiania nuna tajai, tímiaiyi. <sup>11</sup>Nú Jesuska kayaa áintsan<sub>ke</sub>te. Atumsha jeamniutiram, nú kaya yajauchiiti, tímiarme Jesusna. Tú<sub>r</sub>asha túramaitiat<sub>ñ</sub> Niisha je<sub>ñ</sub>am emka apujsamua núnisan ajasuiti, tímiaiyi. <sup>12</sup>Tura chíkichj<sub>í</sub>ai uwempratin pen<sub>ké</sub> atsawai. Ju nun<sub>ñ</sub>kanam ii chikicha naar<sub>í</sub> pachisar uwempratin atsaji. Jesuskete ii uwemtikrampratniun Yus suramsam<sub>í</sub>aj nu” tímiaiyi Pítiur.

<sup>13</sup>Pítrusha Juansha nán<sub>ñ</sub>kamas shuara áintsan<sub>ñ</sub> áirmiayi. Núkap unuimiarcharu áirmiayi. Tura unuimiarchaitiat, arantutsuk etseriarmiayi. Aentsu uuntr<sub>í</sub> núnaka nekaawar “Nékachuitiat, itiura sapijmiatskesha chichainia” tiarmiayi. Tura, ju<sub>ñ</sub>sha Jesusa nemarkin ármia núiti tiar nekaawarmiayi. <sup>14</sup>Nuyasha áishman<sub>ñ</sub> pé<sub>ñ</sub>ker ajasmia nu niij<sub>í</sub>ai nu<sub>í</sub> wajamiayi. Tuma asamtai, niisha a<sub>í</sub> wajaku<sub>í</sub>, Israer-shuara úuntr<sub>í</sub>nkia, pé<sub>ñ</sub>ker ajaschaiti títiat tukamá tujinkiar<sub>í</sub>armiayi. <sup>15</sup>Tuma ásar, iik nuamtak áujmatsatai tusar, Pítrusha Juansha shutuapsha a<sub>a</sub> awemartai, tiarmiayi. <sup>16</sup>Tura áujmatainiak tiarmiayi “Ju Pítrusha ju Juansha itiurkat<sub>í</sub>jk. Ju uunt túrunamun Jerusarén<sub>ñ</sub>num matsatainia nu ashí nékainiatsuk. Wáit<sub>í</sub>aiti titin tujintiaj<sub>í</sub>, tiarmiayi. <sup>17</sup>Tura, ashí aents nekaawar<sub>í</sub>in tusar yamaik jiaktai. “Ju Jesusa naar<sub>í</sub> pachisrum pen<sub>ké</sub> jintintiarairap,” titiat” tiarmiayi.

<sup>18</sup>Tura árusan<sub>ñ</sub> Pitruncha Juán<sub>ñ</sub>nasha shutuapnasha ataksha untsukarmiayi. Tura chicharkarmiayi. “Jesusa naar<sub>í</sub> pen<sub>ké</sub> áujmatsairap. Tura Jesusa túramur<sub>í</sub> pen<sub>ké</sub> jintintiarap” tiarmiayi. <sup>19</sup>Tutai Pítiur Juan<sub>ñ</sub>j<sub>í</sub>ai áimkiarmiayi “Enentáimpratarum. ¿Yus warinia wakera? ¿Iikia Yus umirtsuk atum<sub>í</sub> chichame<sub>ñ</sub> umirkatniukaitiaj<sub>í</sub>? tiarmiayi. <sup>20</sup>Nekaatarum. Iisha f<sub>í</sub>sjinia nu, tura antukjinia nusha ii etsertsuk pujustin tujintiaj<sub>í</sub>.” Tu áimkiarmiayi.

21-22 Shutuá

́

p p<sub>́</sub>nker ajasmia nu kuarenta (40) uwí nan<sub>́</sub>kaamas takakuyayi. Ni p<sub>́</sub>nker ajasmari<sub>n</sub> aents nekaawar, “ju<sub>́</sub>ka aentsti túrachminiaitji” tusar Yusa naar<sub>n</sub> uunt awajsarmiayi. Tuma asamtai aentsu uuntri<sub>́</sub> Pitruncha, Juan<sub>́</sub>nasha asutiátaí tukamá aentsun ashamainiak áyatik chicharkar iniaisarmiayi.

#### Yus-shuar Yusa kakarmari<sub>n</sub> seawarmiania nu

23 Pítiur Juan<sub>́</sub>jai an<sub>́</sub>kant ajasar ni írutramuri<sub>n</sub> wakеткиarmiayi. Tura jeawar Israer-patri uuntri<sub>́</sub> tura aentsu úuntri<sub>́</sub>sha nin tiarmia nuna mash etserkarmiayi. 24 Nu ujakam antukar métekrak Yúsan áujuk tiarmiayi “Winia Uunt Yusru, Amesha nayaimpisha nun<sub>́</sub>kasha najanaitme. Nayaantsasha tura ju<sub>́</sub>i írunna nusha najanamiamie, tiarmiayi. 25 Tura Tawit ámin umirtamin amia nu ju<sub>́</sub> áamtikramiamie:

“¿Urukamtai ashí nun<sub>́</sub>kanmaya aents charaatum ajainia? ¿Tura Israer-shuarsha urukamtai ántar chichaman enentáimiamia?

26 Uunt kapitián ármia nuka chichaman jurusarmiayi Uunt Yúsan. Tura pepru úuntri<sub>́</sub>sha iruntrar Uunt Yúsan kakerkarmiayi. Ni anaikiamuri<sub>n</sub> Krístun nútiksá kakerkarmiayi.”

27 Tu áarmaiti, Uunta, tura nekasaiti. Erutis apachi kapitiántri<sub>́</sub> Punsiu Piratujai jú péprunam iruntrarmiayi. Niisha yajaya shuarjai tura Israer-numiá shuaraim nuim iruntrarmiayi. Ame Uchirmin Jesusan tunaarinchan kakerkarmiayi. Jesuska Ame anaikiamiamie, winia takatron túrat tusam. 28 Tura ame enentáimjai iwiamamna nu uminkiatniuiti. Tura apachcha Jesusan kajerainia ásar, Ame iwiamamna tímianak umikiarmiayi. 29 Uunta, iisia kajertamainiaj nu. Jes, Áminiu asakrin áujmatramtsujik. Túmaitkuisha ame chichamem ii ashamsuk etserkatín ame kakarmaram amasta. 30 Tura ame kakarmarmijjai jaasha tsuártin amasta. Ame Uchiram Jesus tunaarincha nujai ii aentsti túrachmin túratniusha amasta. Aents Yusa kakarmari<sub>n</sub> nekaawarat tusam túrata” tiarmiayi.

31 Tura Yúsan tú áujas umikmatai nuin irunar pujuiniain úurkamiayi. Túrunamtai ashí shuara enentáin Yusa Wakaní pimiutkarmiayi. Túmaitkiui ashamsuk Yusa chichamen etserkarmiayi.

#### Wíniakete, tícharmiania nu

32 Yus-shuar ajasarmia nu, ti untsuritiat, ashí chikichík enentainiak enentáimainiak, ni takaku armia nuna, aya wíniakete tútsuk, jusha ashí iiniu ainiawai, tiarmiayi.

33 Tura Jesusa akatramuri<sub>́</sub>sha, Yus ti yayamu ásar, Yusa kakarmari<sub>́</sub>jai Uunt Jesusa nantakmari<sub>n</sub> tuke etseras pujuarmiayi. 34 Tura ashí Yus-shuarka nun<sub>́</sub>kan takakusha jean takaku armia nusha, núnaka surukar kuítian itiariarmiayi. 35 Tura itiaar Jesusa akatramuri<sub>n</sub> súarmiayi.



Akatramusha susam, niisha atsumainia nuna súarmiayi. Tuma asamtai shuar atsumaka penké atsuarmiayi. <sup>36</sup>Chikichík shuar, ni naari Jusé, nunkan takakuyayi. Jesusa akatramurisha Jusen chíkich náarín apujtusarmiayi, Pirnapín. Nu náarisha, shiir enentáimtikkiartin tawai. Tura Pirnapísha Riwí áentsuyayi. Tura ni akiiniamurí núnkenka Chípriiyayi. <sup>37</sup>Niisha ni nunken surukmiayi. Tura nu kuítian itiá Jesusa akatramurín súarmiayi.

### Ananíasa tunaari

**5** <sup>1</sup>Tura chíkich áishman, ni naari Ananías, ni nuwe Sapirjai ni nunken surukarmiayi. <sup>2</sup>Niisha nunkan suruk kúitian emeenak akanak jukí Jesusa akatramurín werí takamtsukea nútikias susamiayi. Ni nuwésha, Sapir, nuna túran nekaamiayi. <sup>3</sup>Túramtai Pítiur chichaak “Ananías, ¿urukamtai uunt iwianch enentáimin enkemturmatai, Yusa Wakanín anankataj tusam nunka surukam kuit achikumna nu akankam ikiurmasam? tímiayi. <sup>4</sup>Entá, nuiñkia nunka áminiuchukait. Surukumna nu kuitcha áminiuchukait. Nusha, ¿urukataj tusamea tu enentaímpram? Amesha aya áentsnum wáitruachume. Antsu Yusnumsha wáitruame” tímiayi Pítiur. <sup>5</sup>Tutai Ananías nuna antuk nú chichamaik jakamiayi. Tura ashí shuar nuna antuk nekaawar ti ashamkarmiayi. <sup>6</sup>Nú turunamtai áishman tariar Ananías jakan penuararmiayi. Túrawar iwiarsatai tusar júkiarmiayi.

<sup>7</sup>Tura Ananías nuwe arur, menaintiú ura nankaamasají támiayi. Túrashá ni áishri jakanka nekaachmiayi. <sup>8</sup>Támatai Pítiur nuwan tímiayi “Turuttia. Átum nunka surukurmena nui, ¿kuit itiarumna núnikik surukuram?” tímiayi. Tutai nuwá tímiayi “Ee, núnik surukji.” <sup>9</sup>Tutai Pítiur tímiayi “¿Urukamtai atumsha Uunt Yusa Wakaní nekapkamsatai tusarum imiá enentáimprarum? Pai, iisiá. Ame áishrumin iwiarsatai tusar júkiaria nu wininiawai. Tura yamaikia amincha juramkiartatui” tímiayi. <sup>10</sup>Tutai nu chichamaik niisha imia Pitru wajamunam jaka iniaantmiayi. Aishman wayaj tukamá jaka tepan wáinkarmiayi. Túramtai júkiar ni áishrinin ayamach iwiarsarmiayi. <sup>11</sup>Tura ashí Yus-shuar armia nu tura ashí aencha nuna antukarmia nu ti ashamkarmiayi.

### Yusa kakarmarijjai túrawarmiania nu

<sup>12-14</sup>Tura ashí Yus-shuar Yusa Uunt Jeen shikirin irunin ármiai. Nu shikirisha, Sarumúnna, tu anaikiamuiti. Tura chíkichmamtinkia nuim iruntratniun ashamiarmiayi. Túmainiyatan, ti péñker áiniawai, tu wearmiayi. Tura Yus-shuar Yusa kakarmarin iniakmasarmiayi. Túra asamtai imiá untsurí aents Yus-shuar ajasarmiayi. <sup>15</sup>Tura chíkich aents ni shuari jainia nuna jintiá amamtikiarmiayi. Peakjai júkiar, tampunmasha enkeawar júkiar jintiá ayamach áepsarmiayi. Pítiur nankaamak ni

wakanínsha enkemprutmawainti tusar nu shuar túrawarmiayi. <sup>16</sup>Núnisan arantiq shuarsha ti untsurí ni shuarí jáinian tura iwianchrukuncha nuí Jerusarénum itiarmiayi. Tura ashí nuí táaruka tsuámararmiayi.

<sup>17</sup>Israer-patri uuntri, tura Satuséu aencha niijíai pujuarmia nu suiir iiniak <sup>18</sup>Jesusa akatramurín achikiar enkeawarmiayi. <sup>19</sup>Túrasha kashi Uunt Yusa suntari nayaimpinmaya tara sepú wáitirín uraimiayi. Tura Jesusa akatramurín aa jíikiarmiayi. <sup>20</sup>Tura tímiayi “Wetarum. Tura Yusa Uunt Jeen wajasrum Yusjái tuke iwiaaku átinia nu etserkatarum” tímiayi.

<sup>21</sup>Nuna antukar kashin tsawar káshik Yusa Uunt Jeen wayawar jintintiawarmiayi.

Nu túmainíai Israer-patri uuntri, tura niijíai pujuarmia nusha iruntrararmiayi. Tura Israer-shuara uuntri, naamka armia nuna iruntrami tusa untsukarmiayi. Ashí iruntrar akatar akupkarmiayi, Jesusa akatramurí sepunmaya itiatarum tusar.

<sup>22</sup>Tura suntarsha sepunam jeariar Jesusa akatramurín wáinkiacharmiayi. Atsawai tukam táarmiayi. <sup>23</sup>Taar chichainiak “Sepú waiti asakamua tímianisan aa wáinkiaji, tiarmiayi. Tura suntar wáitin iimpru wajainia wáinkiaji. Tura waiti urair wayají tukamar atsá wáinkiaji” tiarmiayi.

<sup>24</sup>Israer-patri uuntri, tura Yusa Uunt Jeen wainniu úuntriasha, nu chichaman antukar, “tsej ausha ¿urutiak nunasha iniaisarat?” tiarmiayi. <sup>25</sup>Nu chichamaik áishman taa tímiayi “Aishman átum sepunam enkeamarmena nu, Yusa Uunt Jeen wajasar áentsun jintintiuk pujuiniawai” tímiayi.

<sup>26</sup>Túrunamtai Yusa Uunt Jeen wainniu uuntri ni suntaríjiaí wear achik itiarmiayi. Túrasha penké aents kayajái tukurmarají tusar, yajauch awajtsuk itiarmiayi. <sup>27</sup>Tura achik itiaar Israer-shuar naamka pujamunam naka awajsarmiayi. <sup>28</sup>Tura Israer-patri uuntri tímiayi “Iisha atumin chicháa chicharu awajsar, Jesusa naari pachisrum etserkairap tusar akupkachmakajrum. Túrasha, ¿antukurmek? Atsá. Mash Jerusarénum átum etserkamu pampankai. Jes, átum, Jesusan máawarai, in tátsurmek. Nusha in makuutai tusarum tárume” tiarmiayi.

<sup>29</sup>Nuyá tutai Pítiur chíkích Jesusa akatramuríjiaí chichainiak “Iikia aentsjainkia iniankasar Yus emka umirkatniuitji, tiarmiayi. <sup>30</sup>Jesus atumek krúsnum máamurmene nuna ii iwiaaku Yusrí Nin iniantkimiayi. <sup>31</sup>Yus ni kakarmaríjiaí Nin nankaamantu awajsamiayi. Tura nekas Akupniuiti tusa ni untsuuríni apujsamíayi. Tura áentsun Uwemtikniuiti. Israer-shuar enentái yapajíawar tunaaríniá uwemprarat tusa Yus túraiti. <sup>32</sup>Nu tuma asamtai iisha nu nekaar étsereaji. Tura Yusa Wakanísha nuna étsereawai. Túrasha aya Yusa umirkarua nunak ni Wakanín súsaruiti” tímiayi Pítiur.

<sup>33</sup>Tutai nuna antukar ti kajerarmiayi. Túrawar, maatai tusar wakerarmiayi. <sup>34</sup>Tura nuí Israer-shuara uuntri pujumiayi, ni naari

Kamarír. Niisha Pariséunam páchitkiauyayi. Tura akupeamun jintinniuriyayi. Túmakui ashí aents nin shiir enentáimtin ármiai. Tura niisha wajaki tímiayi “Jū áishman̄ ăă ishichik wajasarti” tímiayi. <sup>35</sup>Nuyásha irunar matsamarmia nuna chicharuk “Israer shuartiram, jū áishman̄ tú túratai tu enentáimsarumna nu aneartarum. <sup>36</sup>Enentáimsatarum. Nuik áishman̄ Tiútas wantinkiachmakia. Niisha kapitíaniitjai takui, kuaru siántu (400) shuar nemarkarmiai. Tura ukunam nin maawarmatai, ni némarkamurisha pisararmiai. Túrunawar nuní amuukamiayi. <sup>37</sup>Ukunmasha, iruntrar nekapmartin tsawantincha Kariréanmayă Jútas wantinkiachmaka. Tura nincha nútiksān ti untsurí nemarkarmiai. Túman máawarmiai. Nu túrunamtaí nútiksān ni némarkamurisha pisararmiai. <sup>38</sup>Jes, tuma asamtaí nu áishman̄ ăă wajainia nu iniaisatarum. Auka pachisairap. Au tumainia nu aya áentsnaketkuin̄kia amuukattawai. <sup>39</sup>Tura antsu Yúsnaítkuin̄kia atumsha amuktai tukamarum tujinkiattarme. Aneartarum. Iniaiyachkurmeke nu tumá pujusrum Yusjají máanikchattarmeash” tímiayi Kamarír.

<sup>40</sup>Tú tútai tímianak umikiarmiai. Túrasha Jesusa akatramurin untsukar asutiáwarmiai. Tura chicharuk “Jesusa naari pachisrum penké ishichikisha etserkairap” tiarmiai. Tú tiar akupkarmiai. <sup>41</sup>Jesusa akatramurisha Israer-shuara uuntri pujamunmayă jíinkarmiai. Tura wáitsamniaitrome tusa Yuska Jesusa naari pachia asakrin ii natsantin wáitsatniun tsānkatramkaitji tusar ti shiir enentáimsar wearmiayi. <sup>42</sup>Tura Jesukrístunun áujmatsatniun penké iniaisacharmiai. Antsu tuke tsawant Yusa Uunt Jeencha tura chíkich jeanmasha páchitsuk etseriarmiai.

#### Yus-shuaran yainian siati anaikiarmiania nu

**6** <sup>1</sup>Nú tsawantin Yusan umirkaru ti kawenkar ármiai. Tura tuke tsawant yurumak súsatin ámiayi. Túmakui Yus-shuar Kriaku chichaman chicharmia nu, Israer-shuaran kajeriarmiai. “Tuke tsawantin yurumak súarmena nuí atumí waje ti nukap súarme. Tura íniuka ishichik súarme” tiarmiai. <sup>2</sup>Túruinia Jesusa tuse akatramurí ashí Yus-shuaran irurar tiarmiai “Iisha Yus-Chicham etserkatin iniaisar yurumak súsachminiaitji. <sup>3</sup>Tuma asamtaí yatsurtiram, atumíniā siati áishman̄ eáktárum yurumkan súsarat tusarum. Pénker wekainia nu, tura neka shuar, Yusa Wakaní pimiutkamu ainia nu achiktarum. <sup>4</sup>Iikia antsu Yus áujkir unuiniakratkir Yusa chichame etserkir wétatji” tiarmiai. <sup>5</sup>Akatramu tiarmia nuna ashí aents enentáimsar pujuarmiai. Túmainiak Estepānkan anaikiarmiai. Estepānsha Yúsān tuke enentáimtinuiyayi. Tura Yusa Wakanísha pimiutkamuyayi. Chíkich áishman̄kan anaikiarmiai, niisha Jiripi, tura nuyá Purukuru, Nikianúrsha, nuyá Temun, Parmenassha, Nikiurássha. Nikiurássha Antiukía nunkanmayaitiat Israernancha ashí umirniuyayi.

<sup>6</sup>Tura nu siati áishmankan Jesusa akatramurin itiariarmiayi. Táarmatai, akatramusha, Yus áujtusar, anaikijai tusar múuknumsha ni uwejen awantsarmiayi. <sup>7</sup>Túrasha Yusa chichamenka tuke pampanki wémiayi. Nuí Jerusarennumsha Yus-shuar ti kawenkarmiayi. Tura imia Israer-patrisha untsurí Yus-Chichaman umiriarmiayi.

### Estepankan Israer-shuara uuntriin júkiarmiania nu

<sup>8</sup>Estepansha Yusa waitnenkartutairi pimiutkamuyayi. Tura Yusa kakarmarisha pimiutkamuyayi. Tuma asa aentsti túrachminian shuar írunmanum túramiayi. Nu shuar Yusa kakarmarin nekaawarat tusa túramiayi. <sup>9</sup>Israer-shuar iruntai jea, ni naari Ankantin, ámiayi. Nuyá áishmansha tura Serini nunkanmaya áishmansha, tura chíkich nunka Arijiantrianmayasha, Serisianmayasha, Ásianmayasha, tímian Estepanjai áujmatsatai tusar káutkarmiayi. <sup>10</sup>Estepaní Yusa Wakaní nekatairijjai tímianak chicháa asamtai, nu áishmankan Estepanjai inkiunaikiar nupetkataj tukamá tujinkiarmiayi. <sup>11</sup>Tuma asamtai suiir enentáimtuiniak chíkich áentsun Estepankan tsanumprurarat tusar eákarmiayi. Estepaní Muisaisnasha Yúsnasha yajauch áujmatui, titiarum tusar akikiarmiayi. <sup>12</sup>Penké áentsun, tura uunt ainia nunasha, jintintin ármia nujajisha chichaman júsar yajauch enentáimtikrarmiai. Tura Estepankan jintiá akirtuawar achikiarmiayi. Túrawar Israer-shuar naamka matsamarmia nuí júkiarmiayi. <sup>13</sup>Tura wait chichamtinian itiarmiayi. Niisha taar chicharainiak “Yusa Uunt Jeen ti penker ana nu, tura Yusa akupkamurincha ju Estepaní tuke yajauch chicharui, tiarmiayi. <sup>14</sup>Nú arantcha ju Estepaní tímia nu antukji, tiarmiayi. Estepaní chichaak “Nasarénumia Jesuska Yusa Uunt Jeen sáaktiatui, tura nuyá Muisais in ikiurtamkimiay nunasha yapajíttawai” tímiai. Nusha Estepaní tímia nu antukji” tiarmiayi. Tura nunasha penké ántar tsanumprurarmiai.

<sup>15</sup>Nuyasha ashí Israer-shuar naamka iruntramunam pujuarmia nu Estepankan iiyaj tukamá ni yapin nayaimpinmaya suntara yapiya nuní fíran wáinkiarmiayi.

### Estepaní etserkamiania nu

**7** <sup>1</sup>Tuma wáiniak Israer-patri uuntri Estepankan aniasmiayi “¿Ju tuinia nu nekaskait?” tímiai. <sup>2</sup>Tutai niisha áimkiamiayi “Winia úuntrutirmesha, yatsurtirmesha anturtuktarum. Ii Waantu Yusri ii úuntrin Apraáman wantintiukmiayi. Apraámka Misiuputámia-Karteá nunkanam pujai, Aran nunkanam wéatsain, nuí wantintiukmiayi. <sup>3</sup>Tura wantintiuk tímiai “Ame nunkemsha áminiurmesha ikiukim nunka Wi iniaktustatjamena nuí wetá” tímiai Yus. <sup>4</sup>Tutai Apraám Misiuputámia-Karteá nunkan ikiuki Aran nunkanam pujustaj tusa wémiayi. Nuyá ni aparí jakamtai “Arant wetá” tímiai Yus. Nuna taku ju nunkan ii

pujajnia jui pujsamiayi. <sup>5</sup>Túrayat nunkan ishichkisha súsachmiayi ju nunkanam. Antsu “Ukunam amastatjai. Ame jakakmin ame uchirmin susattajai” tímiayi. Tura Apraama uchirí penké atsan nuní tímiayi Yus. <sup>6</sup>Nuyasha Yus tímiayi “Ame uchirmesha írara núnisanu chíkich nunkanam pujusartatui. Nuisha emetamu itit awajtai pujuartatui. Kuaru siántu (400) uwí, tímianu uwí wáitsartatui, tímiayi. <sup>7</sup>Túrasha, Wi asutiáttajai ame shuárumin wáitkia núnaka, tímiayi. Túram nuyá nú nunkanmaya shiákartatui. Tura Winia enentáimtusartatui jú nunkanam’ tímiayi. <sup>8</sup>Yus tuke Apraámasha chicharuk ‘Yamaikia Wíi-shuar asarum tsupirnaktiniaitrumé. Tuma asam amesha uchiram áishmankach akiiniamtai, Wi tímiajna núnismek, sirkunsisiún tutai, shunichirí nuape tsupirkata, tímiayi. Tura chícham Wi yamaikia ámijíají najanaj nu nekas umínkatniuiti tusam nusha túrata” tímiayi Yus. Tuma asamtai ni uchirí Isak akiiniamtai, uchu tsawant nankaasmatai, Apraám nin tsupirkamiayi. Tura Isaksha ukunam ni tuse (12) uchirín ii uuntri armia nunasha nútiksán túramiayi. <sup>9</sup>Tura niisha ni yachín Jusén suiir íiyarmiayi. Túmainiak Ejiptu nunkanam júkiarat tusar surukarmiayi. Túrasha Yus némarkauyayi. <sup>10</sup>Tuma asa, ashí ni itiurchatriiníá uwemtikramiayi. Tura waitnenkartutairíncha nekairíncha susamiayi. Tuma asamtai Ejiptunam uunt akupin Paraún Ejiptu nunkaa akupniuri ajasat tura ni jeen wáinniuri ajasat tusa anaikiamiayi.”

<sup>11</sup>‘Tímiatam tsuka tura itiurchatcha ámiayi Ejiptu núnkanam. Tura jui Kanaan nunkanmasha núnisanu ámiayi. Tuma asamtai ii uuntri yurumkan penké wáincharmiayi. <sup>12</sup>Tura Jakup, Ejiptunam yurumak ikiusma awai taman antuk ni uchirín akupkarmiayi. Túrasha wekaicha wearmiayi. Wats, ii úuntriníun ujaajrume. <sup>13</sup>Tura ii uuntri atak Ejiptunam wéenak Jusesha, wíitjai takui ni yachí Jusén nekaawarmiayi. Tura Jusé “Yatsur áiniawai” takui Paraún, antuk “au shuarapitia” tímiayi. <sup>14</sup>Nuyanka Jusé ni yachín chicharuk “Apar itiatarum uchirtuk” tímiayi. Nu shuarsha untsurí, setenta senku (75) matsamarmiayi. <sup>15</sup>Nuní tutai Jakupsha ni shuarijiaí Ejiptunam pujustai tusar wearmiayi. Tura ukunam nú nunkanman jakamiayi. Tura ni uchirísha ii uuntri ainia nu, núnisanu nú nunkanman jákarmiayi. <sup>16</sup>Tura atak ukunam ni shuari Sikiam nunkanam ni ukunchín júkiar iwíarsarmiayi. Kame Sikiam nunkanam Apraámka yaunchu játsuk Amura uchirí nunken sumakmiayi. Túramtai nui iwíarsarmiayi’ tímiayi.

<sup>17</sup>‘Yus, Apraáman chicharuk “Nekas wi susattajme” tímiania nú tsawant jeatemamtai, Ejiptu nunkanam Israer-aents pampanki ti kawenkararmiayi. <sup>18</sup>Nu tsawantincha Ejiptunam chíkich akupin naamka ámiayi, tura Jusén nekaachmiayi nii. <sup>19</sup>Nu akupin ii yaunchu úuntrin anankawar yajauch awajiararmiayi. “Atumí uchirí kuírchich ana nu ajapa ikiuktiarum” tu wémiayi. Pampankarain tusa tímiayi.

<sup>20</sup>Tiri iniaisamunam Muisais akiiniamiayi. Muisaisnaka Yus shiir enentáimtimiai. Tura ni nukurí menaintiu nantu takusmiayi. <sup>21</sup>Tura nuyá ajapa ikiuktin jeamtai entsá apujsamiai. Uunt Paraunka nawantri Muisaisan wainiak jukimiayi. Achik, ni uchirínia tímiatrusan jukí tsakatmarmiayi. <sup>22</sup>Tuma asa Muisais unuimiátrauyayi ashí Ejiptu aents nékarmia nuna. Túramurísha chichamesha kakarmauyayi.'

<sup>23</sup>Estepañ tuke étseruk juna tímiayi: 'Nuyá Muisais kuarenta (40) uwí takaku asa Israer áentsun iyutaj tusa wakerimiayi, ni shuarí asamtai. <sup>24</sup>Nuyá we Ejiptunmayá áishman ni shuarín máatasa pujurun wáinkiamiayi. Tura Muisais ni shuarín ayamprak Ejiptunmayá áishman kan máamiayi. <sup>25</sup>Wíi turamujai Yuska Israer-aentsun uwemtikrattawai, tu nekaamiayi Muisais, Yus timia asamtai. Tura Israer-aencha áintsaran nékainiawai tu enentáimsamiayi. Túrasha niñkia nekaacharmiayi. <sup>26</sup>Kashin tsawar Muisais ni shuarí jímiar maani pujuinian wáinkiamiayi. Tura nawamnaikiarat tusa "¿Urukamtai nuamtak yatsumjaisha yajauch awajniarum?" tímiayi. <sup>27</sup>Tutai emka nankaama nu Muisaisan kárut shitiá "¿Ya amincha ii akuptamin tura ii chichartamin anaitiamkamam?" <sup>28</sup>¿Winiasha maantuátaj tusam wakeramek, yaú Ejiptunmayá áishman máamamna nútiksamkea?" tímiayi. <sup>29</sup>Nuna antuk Muisaiska Matian nunkanam pisar, nú nunkanam kuarenta (40) uwí yajayá áintsan pujumiayi. Nú nunkanam pujus, nuatak, jimiará uchin yajutmarmiayi.'

<sup>30</sup>'Kuarenta uwí nankaamas, nu atsamu nunkanam Senai náinnium tíjiuch Yusa suntari nayaimpinmayá taa Muisaisan wantintiukmiayi. Numi uchich ukat-ukatin keamunam wantinkiamiayi. <sup>31</sup>Muisais, nuna kean wainiak ashamkamiayi. Tura weantuk iistaj tukamá Uunt Yusa chichamen antukmiayi. <sup>32</sup>Yus tímiayi "Witjai Yus. Ame úuntrumí Apráama Isaka, Jakupa Yúsríntjai" tímiayi. Tutai antuk Muisaiska ti kuraimiayi sapijin. Tura íistinian tujinmiayi. <sup>33</sup>Nuyá Uunt Yus tímiayi "Úuntrun shiir awajsataj tusam, ame sapatrum ukuiníkiam ikiuktia, wajamna nuí Wi pujakui. <sup>34</sup>Nuyá nekaata, tímiayi. Wíi-aents Ejiptunam wáitias pujuinia nuna wáinkiajai. Tura úutainia nunasha antukjai. Tuma asamtai uwemtikrataj tusan tarajai. Wats, akupkatjame ámin. Ejiptunam waketkitia" Yus tímiayi Muisaisan.'

<sup>35</sup>Estepañ tuke étseruk: 'Jú Muisaisan ni shuarí "¿Ya amincha ii akuptamin tura ii chichartamin átinniasha anaitiamkamam?" tiarmia nuna Yuska akupniun anaik uwemtikrarat tusa awainíki akupkamiayi. Numiniam ni suntari wantintiukmia nuna chichamejai Yuska Muisaisan akupkamiayi, tímiayi. <sup>36</sup>Muisaisaiti Israer-aentsun Ejiptunmayan uwemtikramia nu. Yusa kakarmarin nekaawarat tusa, aentsti túrachminian untsurín túramiayi Ejiptu nunkanam. Nuyá Kapaantin Nayaantsanmasha, tura nuyá kuarenta (40) uwitin atsamunam

pujuiniaisha ti kakarman iniaktusmiayi. <sup>37</sup>Jú Muisaisak Israer-shuaran chicharuk “Atumíñiñnak etserniun Yus ukunam anaikiattawai, winia anaitiukma áintsan. Tuma asamtai nu shuarsha umirkamniuram” tímiayi. <sup>38</sup>Jú Muisais Israer-aentsjai atsamunam pujumiayi. Senái nainnium Yusa suntari níjijaisha pujumiayi. Tura Muisaiska ii úuntrijjai pujumiayi. Níiyaiti iwiaaku pujustin chichaman sunasmia nu. In ujatmaktinian sunasmiayi.’

<sup>39</sup>“Túrasha ii yaunchu uuntri Muisaisan umirkatniun nakitiarmiayi. Áaniuk imiá umirtaint tusar Ejiptunam waketikniun wakeriarmiayi. <sup>40</sup>Túmainiak Muisais Yusjai chichastajtsa murá wématai nu shuar Muisaisa yachin Arunkan tiarmiayi “Ti yusrí najanatá, ii nemarsatin. Áaniusha Muisaissha Ejiptunmayá in juramkiyatcha tútsuk weruma” tiarmiayi. <sup>41</sup>Nuyá wáakachia áaniun najanawarmiayi. Túrawar, júiti ii yusrí tusar, kuntinian maantuawarmiayi, nu susatai tusar. Tura ni uwejejai najanamun ísar ti wararsarmiayi. <sup>42</sup>Nuna túruinian wániak Yus, iniaisajai taku, niiya kanakmiayi. Nii wakerak yaan tikishmatrarti, tímiayi. Tuma asamtai, yaunchu Yusa etserniuri juní áarmiayi:

“‘Israer-aentsu, kuarenta (40) uwitin atsamunam wekaimiarmena nuí, ¿Winiak kuntin maanturtuamarum? Winia surustai tusarum penké túrachurme, tímiayi Yus. <sup>43</sup>Antsu, Muruk naartin ántar-yusa pujamurin jukimiarme. Tura chíkich ántar-yussha, ni naari Rempan, yaa ánin najanarum nusha jukimiarme. Júkin asakrumin atumí nunkeya jukin, tímiai Papirúnia nunkan nanakaiki akupkatjarne” tímiayi Yus.”

Nuní áarmaiti’ tímiayi.

<sup>44</sup>Estepañ tuke étseruk: ‘Yus Muisaisan tímiayi “Wi akupeamu chicham ikiunsatin jeá áaniun Wi iniaktusjamna tímiatrusmek atsamunam najánatá” tímiayi. Tutai Muisais Yus tímianak umikmiayi. Nu jean ii uuntri yaunchu takaku áarmiayi. <sup>45</sup>Nu jean ni uchirí akintkiar akintkiar wearmiayi. Ukunam, jú nunka achiktin jeamtai, Yuska kapitíán Jusuejai jú nunkanmayá aentsun jiki akupkarmiayi. Tura ii uuntri kapitíán Jusuejai winiarmia nu, nu jeancha jú nunkanam itiarimiayi. Tura Tawit uunt akupin náamtsain, ii úuntri sha nu jean takaku áarmiayi. <sup>46</sup>Kame Yus Tawitian yájau enentáimtichmiayi. Tuma asamtai Tawit Yus shiir pujustinian jean jeamtinian seamiayi. <sup>47</sup>Túrasha antsu Tawitia uchirí Sarumún Yusa jeen jeammiayi. <sup>48</sup>Túrasha aents jeammanuman Uunt Yus pujuschamniaiti. Jes, yaunchu Yusa etserniuri Yus tímia nuna áarchamkia. <sup>49</sup>Juna áarmiayi:

“Nayaimpikia winia pujutairuiti. Nunkanmasha nawer tarimiui. ¿Warí jea najatruatai tusarme tarum? tímiayi Uunt Yus. Tura Wi ayampratniusha, ¿tuí aa?

<sup>50</sup>Wiki winia uwejrujain ashí najanachmakiaj” tímiayi.’

<sup>51</sup>Estepañ tuke étseruk: ‘Tura átumka Israer-shuartirmeka atumí enentájjiaí tuke umichuitrume. Atumí kuishjsha weaktsui tura Yus nékachua núniniaitrume. Yusa Wakaníjjiaísha tuke nemasnaikiaitrume. Tura atumí yaunchu úntrijjiaí métek túrarme’ tímiayi.

<sup>52</sup>‘Iisia, atumí úntrisha Yusa etserniurín tuke kajerin ármiai, tímiayi. Tura nú arant atumí úntrisha Tunaaríncha tátatui tu etseru wekaan, máacharmakia. Jes, nútiksarmek yamaisha, Tunaaríncha támania nusha atumek anankarum máachmakuram, tímiayi. <sup>53</sup>Tura Yusa suntari nayaimpinmaya Yusa chichamen susamuitatrum atumsha penké umikchamarne’ tímiayi Estepañ.

### Estepañka jakamuri

<sup>54</sup>Israer-aencha Estepañ tu chichaamu antukar imiá kajerkar nain kátetete awajiarmai. <sup>55</sup>Tura Estepañsha imiá Yusa Wakaní pimiutkamuyayi. Tuma asa nayaimpinmaani ímias, Yusa wincharín, tura Yusa untsuuríniní Jesusan wajan wáinkiamiayi. <sup>56</sup>Tumá wániak Israer-áentsun tímiayi “Núá ískua, nayaimp uranniun wáinjai. Tura Jesusan, Aents Ajasu tutaiya nuna Yusa untsuuríniní wajan wáinjai” tímiayi. <sup>57</sup>Támaitiat niisha kuishín akiriarmiayi, tura achiktai tusar charáa tiar ashí wajakarmiayi. <sup>58</sup>Túrawar, péprunmaya arant júkiarmiayi. Tura antuk etserkarmia nu pushirín áikiar, natsa Sauru wajamunam au iisti tusar áeprusarmiayi. Tura máawartai tusar kayajai tukurarmiayi Estepañkan.

<sup>59</sup>Tura Estepañka tukamaitiat Yúsán áujjamiayi. Tura áujuk “Untru Jesúsá, winia wakantrusha jurutkitia” tímiayi. <sup>60</sup>Tura tikishmar áujuk “Uunta, ju winia túrutainiana ju makuip” tímiayi. Tura nuna tí iniais, jakamiayi.

### Sauru Yus-shuaran kajerkarmiania nu

**8** <sup>1-2</sup>Estepañkan máawarmatai Sauru, péñkeraiti, tímiayi. Tura áishman Yúsán péñker enentáimta armiania nu, Estepañka ayashíncha iwiarsarmiayi, tura aneenak ti uutiarmiayi. Tura nú tsawantai Yus-shuaran Jerusarénum pujuarmia nuna ti kajerkatin nan kamnamiayi. <sup>3</sup>Sáuruka Yus-shuaran kajerek ti pataat wémiayi. Túmak nuí jeá wayá, nuí wayá áishmannasha nuwáncha wáinkianka japiki jukí sepunam enkeataj tusa túrimiayi. Tumakui Yus-shuar Jerusarénumiá pisarar Jutía nunkanam, tura Samaria nunkanmasha jeawarmiayi. Jesusa akatramurínkia antsu Jerusarénuman juakarmiayi.

### Samaria nunkanam etserkarmiania nu

<sup>4</sup>Túrasha Jerusarénumiá aents pisararmia nu, arant wénaksha tuke Yusa chichamen etserkini yujarmiayi. <sup>5</sup>Tura Jiripi Jerusarénumiá we



tura chíkich péprunam Samaria núñkanam ámiania nui jeá, chichaak “Yus anaikiamu ana nu Jesusaiti” tu etsermiayi. <sup>6</sup>Túrukui aents iruntrar chikichík enentáijjaj Jiripi étsereamun titiú pujusar antukarmiayi. Yusa kakarmarín nekaawarat tusa aentsti túrachminian túrimia nunasha wáiniarmiayi. <sup>7</sup>Ti untsurí aents iwianchruku ármia nuna Jiripi nu iwianchin jírki akuptiarmiayi. Tura íwianch jíiniainiak kakantar charáa tiar jíiniarmiayi. Tura ti untsurí emearusha shutuapsha péñker ajasarmiayi. <sup>8</sup>Tuma asamtai nú péprunmayan̄ka ashí shuar ti warasar pujuarmiayi.

<sup>9</sup>Tura nú nun̄kanam uwishin Semun̄ pujumiayi. Nuikkia wi ímianaitjai tusa Samarianmayá aentsun ananniyuyai. <sup>10</sup>Tuma asamtai ashí aents úmamkesar uchichisha, uuntcha, nin anturiarmiayi. Tura tiarmiayi “Ju Semun̄sha Yusa kakarmaríjjaj áitkiawai.”

<sup>11</sup>Tura ti untsurí uwí wawekratmaríjjaj anan̄karta asamtai, umirkarmiayi nu aents. <sup>12</sup>Túrasha Jiripi Yusa akupeamurín, tura Jesukrístununcha shiir chichaman etserkamiayi. Tura, nuna antukar nuwasha áishman̄sha umikiar imian wearmiayi. <sup>13</sup>Semun̄sha imia uwishniutiat Yus-Chichaman enentáimtus imianmiayi. Tura Jiripíjjaj tsaniñ wekaimiayi. Yusa kakarmarín shuar nekaawarat tusa Jiripikia aentsti túrachminian túrimiai. Nuna wáiniak Semun̄ ti enentáimsamiayi.

<sup>14</sup>Tura Jesusa akatramurísha Jerusaréñnum pujuarmia nui Samarianmayá aents Yusa chichamen umirainiawai taman nekaawarmiayi. Tuma asamtai Pitruncha Juán̄nasha nekáa ikiuutarum tusa akupkarmiayi. <sup>15-16</sup>Tura Samarianmayá Yus-shuarsha aya Uunt Jesusa náariñ imianiarmiayi. Yusa Wakaníñkia tárachmiayi. Tuma asamtai Pítrusha Juan̄jaj nui jeawar Samarianmayá Yus-shuara enentáin Yusa Wakaní pimiutkarat tusan Yusan áujtusarmiayi. <sup>17</sup>Tura áujtua umikiar Pítiur Juan̄jaj ni uwejeñ nú Yus-shuaran awantsarmiayi. Nuñkia Yusa Wakaní taramiayi.

<sup>18</sup>Jesusa akatramurí uweje awasmanum Yusa Wakaní taramtai, Semun̄sha nuna wáiniak, kuitjaj nu kakarman sumaktaj, tímiayi. <sup>19</sup>Tura Jesusa akatramurín chicharuk tímiayi “Winiasha kuitjaj surustarum nu kakaram. Wisha nútiksanak nán̄kamas aentsnum winia uwejur awantsam Yusa Wakaní tarurat tusan tajai” tímiayi. <sup>20</sup>Tutai Pítiur tímiayi Semun̄kan “Ámeke kuítrumjaj métek men̄kakatniuitme. Warí, Yus amaana nu ¿kuitjaj sumaktinkiait? <sup>21</sup>Yus esetram enentáimtachu asam nu túramu pachistincha pen̄ké tujinkiam, tímiayi. <sup>22</sup>Enentáimprata. Túram Yus seata. Enentáimtamna nuna Yus tsan̄kurtamprashtimpiash. <sup>23</sup>Nékajme, tsañkea áintsan̄ yapá enentáimin pimiutramkaiti. Tura tunaarmiñ jinkíámua núniniaitme” tímiayi.

<sup>24</sup>Tutai Semun̄ áimkiamiayi “Uunt Yus aajtursatarum. Túrutrumna nuna túrunawaj tusan tajai” tímiayi. <sup>25</sup>Nuyasha Jesusa akatramurí

Jesusa túramurin nú áentsun ujakarmiayi. Tura wésar Samaria nunkanam pepru ámunmanka Yus-Chichaman nuí etserkiar, nuí etserkiar Jerusarénum waketkiarmiayi.

### Jiripi Yus-Chichaman etserkamiania nu

<sup>26</sup>Tura Yus ni suntarin nayaimpinmayan Jiripincha akuptukmiayi. Niisha chicharuk tímiayi “Wátskea. Juya jiinkim Jerusarénumia jintia Enkasa péprunam wea nuní weme, anaraaní wetá. Nú jintiaka atsamu nunkanam nankaamawai’ tímiayi. <sup>27</sup>Tutai Jiripisha wémiayi. Jintiá wesa Itiupianmaya áishmankan wáinkiamiayi. Nú áishmansha Itiupia nunka akupniurin, ni naari Kantasen takarniuyayi. Kantaseka núwauyayi. Tura nu áishman ti neka asa nuna kuítrin írniuyayi. Nú áishmansha Yúsan áujstaj tusa Jerusarénum wéu wáketmiayi. <sup>28</sup>Karetanam enkemar wesa, Yusa etserniurí Isayas aarmia nuna aujki wémiayi. <sup>29</sup>Wats, Jiripi nú jintianam wéakui, Yusa Wakaní nin tímiayi “Nú kareta amayánta.” <sup>30</sup>Tura Jiripisha amayán, Yusa etserniurí Isayasa áarmarin áujun antuk, chicharuk “¿Aujeamna nu nékamek?” tímiayi.

<sup>31</sup>Tutai nú áishman tímiayi “¿Itiurak nekaataj? ¿Yaki jintintruat?” tímiayi. Tura antsu iijíají wetái tusa, Jiripincha enker jukimiayi karetanam.

<sup>32</sup>Nu papí áarman áujmia nu júuyayi: “Murikiua áitkiasan jákatniunam júkiarmiayi. Tura uchich murik, ure tsúpiram chichaatsna núnisan niisha chichakchamiayi. <sup>33</sup>Nincha iniatsáarmiai. Túrasha penké chichamnaka tútsuk tsankamakmiayi. Niisha nunkanam iwiaaku pujá maamu asamtai, ¿yaki nuna áujmatkat?” Nuní aarma ámiayi.

<sup>34</sup>Kantase takarniurí Jiripin aniasmiayi “Waitneasam turuttia, tu aarma nusha, ¿yana ta? ¿Yusa etserniurí nínkik túmama? ¿Chikichnash ta?” tímiayi. <sup>35</sup>Nuyá Jiripi nu aarman áujtus “Júka Jesusnan tawai” tímiayi. Tura nú arantcha Yus-Chichaman ujakmiayi.

<sup>36</sup>Nuyá entsa ámanum nankaamak áishman Jiripin chicharuk “Juí entsá jeaji. Wikia juí imianchamniakaitiaj” tímiayi.

<sup>37</sup>Tutai Jiripisha tímiayi “Tuke enentáimjají Jesus nekas enentáimtakminkia túramniaitjame.”

Tutai áishman chichaak “Ee nekasaiti, Jesukrístuka Yusa Uchirínti tajai” tímiayi. <sup>38</sup>Tura, kareta awajas mai jiinkiar entsá wearmiayi. Nuí Jiripikia Kantase takarniurin imiaimiayi.

<sup>39</sup>Tura kukar jiinkiar matai Uunt Yusa Wakaní Jiripinkia jukimiayi. Tuma asamtai Kantase takarniurisha Jiripin wáinkiachmiayi. Túrasha nínkia waras wémiayi. <sup>40</sup>Jiripisha jeachat Asutu péprunam wantinkiamiayi. Tura nuyá jiinki péprunam nuí wayá, nuí wayá Yus-Chichaman etserki we, Sesaria peprunam jeamiayi.

Sauru Jesusan umirkamiayi

(Tur. 22.6-16; 26.12-18)

9<sup>1</sup> Nuna tumaj, Jerusarénnun Uunt Jesusan umirkarmia nuna máataj tusa áujmattan Sáuruka penké iniaichamiayi. Tuma asa Israer-patri uuntri iyutaj tusa werimiayi. <sup>2</sup>Tura jeari tímiayi “Papí ame naarmijiai áaram surusta. Wi nuna papí jukin timiai Tamasku péprunam jean, Israer-shuar iruntainiam wayattajai. Túran nú papijiai Jesusan umirkaru ainia nuna, nánkamsan achikiartatjai. Túran áishmannasha nuwancha achikian jinkian, juí Jerusarénnun enkeataj tusan ikiaankattajai” tímiayi. <sup>3</sup>Tura papí susam Sauru jintiá wéai, Tamasku péprunam nuntumsaj nuí aya aneachma nayaimpinmaya tsápin jiitsumir téntakmiayi nin. <sup>4</sup>Túrunamtai Sauru nunká iniaarmiayi. Tura nayaimpinmaya chichaamun antukmiayi. “Sauru, Sauru, ¿Urukamtai yajauch awajtustaj tusam imiá pataaturam?” tímiayi.

<sup>5</sup>Táman antuk “¿Amesha, yáitiam, uunta?” tímiayi Sauru. Tutai ataksha áimkiamiayi “Wikia Jesusaitjai. Ame pataaturmena núitjai, tímiayi. Wíi aents pataatamna nuí, amek enentáimin yajauch awajmamsame, waaka sankanmiak numin ijiuma núnismek” tímiayi.

<sup>6</sup>Nuyanka Sauru sapijin kuranki tímiayi “Nuinkia Uunta, ¿wi warinia itiurkat tusamea wakeram?” tímiayi.

Tutai Uunt chichaak “Wajakim weme péprunam wayatá, tímiayi. Nuí jeawakmin ame túratamna nuna turamiartatui” tímiayi.

<sup>7</sup>Tura Sáurujai irunar wearmia nu, chichaamun antukarmiayi. Tura áentsnaka penké wáinkiacharmiayi. Tuma ásar ti ashamkarmiayi.

<sup>8</sup>Nuyá Sauru nunká tepá nantakmiayi. Tura wáinmaktaj tukamá wáinmakchamiayi. Tuma asamtai chíkich shuar uwejunum enkekiar júkiarmiayi Tamaskunam. <sup>9</sup>Nuí jeá menaintiu tsawant íimtsuk tura yurumsuk penké úmutsuk pujumiayi.

<sup>10</sup>Nuí Tamaskunam Yus-shuar Ananías ámiayi. Nin mesekranam Uunt Jesus tímiayi “Ananías.”

Tutai “¿Warí wakeram, Uunta?” tímiayi.

<sup>11</sup>Nuyá Uunt Jesus tímiayi “Wajakim jintia, Naka tutaiya nuí wetá. Nuísha Jutasa jeen jean, Társunmaya Sáurun eaktaj tusan winijiai, titiá, tímiayi. Niisha Yúsán áujuk pujawai. <sup>12</sup>Tura juna mesekranam ipiatkamjai Sáurun. Aishman wayá ni uwejéjai ántiawai, ataksha íimit tusa. Nú áishmanka ámetme, Ananías” tímiayi Jesus.

<sup>13</sup>Táman antuk Ananías chichaak “Túrasha Uunta, ju áishman ame áentsrumin Jerusarénnun ti yajauch awajchakait. Ni yajauch túramurín ti untsurí aents ujatainiawai, tímiayi. <sup>14</sup>Tura yamaisha Israer-patri chicharniun papirín takakui. Tura nujai ame náarmin páchiaj nuna achik jukitiaj tusa tímiajaisha tarutramji” tímiayi Ananías.

<sup>15</sup>Tutai Uunt Jesus tímiayi “Áankisha wetá. Jü áishmaṅkan winia etserniur atí tusan achikjai Wi. Niisha Israer-shuarchancha tura kapitiánniasha tura Israer-shuarnasha wínian etserin átatuí, tímiayi.

<sup>16</sup>Tura Sauru winia náarun páchia asa ti wáitsattana núnaka nin iniaktustatjai” tímiayi Jesus.

<sup>17</sup>Tura Jesus táman umirak Ananías Sauru pujamunam wémiayi. Tura jeari wayá uwején awantas tímiayi “Yatsuru Sauru, Uunt Jesus jintiá wantinturmakamna nusha ame ataksha ímiat tusa, tura Yusa Wakanísha enentáimin pimiutramkat tusa winia akuptukai” tímiayi.

<sup>18</sup>Nu chichamaik ni jiiya namaká saepeya áanin iniaarmiayi. Túrnamtai ataksha ímmiayi. Túruna wajaki we imianmiayi. <sup>19</sup>Nuyasha yurumámiayi. Tura yurumásha kakaram ajasmiayi. Tura Yus-shuarjají Tamaskunam wárumchik tsawant pujusmiayi.

### **Sáuruka Tamasku péprunam Yus-Chichaman etserkamiania nu**

<sup>20</sup>Nuyañka Sauru Israer-shuara iruntairin wayá Jesusa túramurin etserkamiayi. Etseruk tímiayi “Nekasaiti, jü Jesus Yusa Uchirínti” tímiayi.

<sup>21</sup>Nuna ashí anturú pujuiniaka “¿Ausha urukakua aania? tiarmiayi. Entá jü áishmaṅsha Jerusarénum Jesusan enentáimtuinian ti pataatimia núchakait. Tura tímiajaisha nuna achik Israer-patri akupniurin jukitiaj tusa tamia núchakait” tiarmiayi.

<sup>22</sup>Tura Sáurusha sapijmiatsuk etsermiayi. “Jü Jesus nekas áentsun Uwemtikniuiti” tu etsermiayi. Tura ti paant étserkui, Tamaskunmaya Israer-aents, nekaschaiti titiaj tukamá tujinkiarmiayi.

<sup>23</sup>Tura ukunam, Israer-aents Sáurun maatai tusar chichaman jurusarmiayi. <sup>24</sup>Tura Sáurusha nu chicham jurusman nekamamiayi. Israer-aents pepru jínmanum tuke tsawaisha, káshisha achikiar maatai tusar jintian akirtiarmiayi. <sup>25</sup>Nuna antukar Yus-shuar Sáurun chiiknium kashi enkeawar itiararmiayi. Pepru tanishnum itiarar awemarmiayi.

### **Sáuruka Tamaskunmaya Jerusarénum wémiania nu**

<sup>26</sup>Tura Sauru Jerusarénum jeá Yus-shuarjají iruntrattsá wakerimiayi túrasha ninṅkia ashamiarmiayi. Sáurusha nekas Yus-shuar ajaschaiti tusar ashamiarmiayi. <sup>27</sup>Túmainiajin Pirnapí Jesusa akatramuri matsatmanum jukimiayi Sáurun. Tura nuí ejé tímiayi “Jü Sauru jintiá wesa Uunt Jesusan wáinkiaiti. Tura Yus chicharkaiti. Tuma asa Sauru Tamaskunam sapijmiatsuk Jesusa náarin etserkaiti” tímiayi. <sup>28</sup>Tura Sauru Jerusarénum juákmiayi. Tura Yus-shuarjají irunar pujumiayi. <sup>29</sup>Nuyasha Yus, etserkata tutai, sapijmiatsuk Jesusa túramurin etsermiayi. Tura Israer-shuar Kriaku chichaman chichau ármia nu, nuí pujuarmiayi. Sáurusha nu shuarjají áujmatsarmiayi. Túrasha nu shuar Sáurun itiuur

máatjik tusar chichaman juriarmiayi. <sup>30</sup>Tura Yusaj̄ yachi ármia nu, chicham jurusman nekaawarmiayi. Neka ásar Sáurun Sesaria peprunam júkiarmiayi. Tura nuyasha Tarsu péprunam akupkarmiayi.

<sup>31</sup>Tura Jútíanmaya, Kariréanmayasha, Samarianmayasha Yus-shuar shiir tímiajnisan̄ ajasar kakaram ajasarmiayi. Yúsan ashamainia ásar, tura Yusa Wakaní̄ yayamu ásar kawen̄ki kawen̄ki wearmiayi.

### Pítiur Eneasan yáin̄miania nu

<sup>32</sup>Tura Pítiur Yusaj̄ yachi armiania nuí̄ iráa wekaimiayi. Wekaak Yus-shuar Rítianam matsamarmia nuí̄sha iraumiayi. <sup>33</sup>Nuí̄sha Rítianam jeá áishmañkan Eneas náartinian wáinkiamiayi. Niisha emearu asa wekaicha uchu uwí̄ aya tépenuyayi. <sup>34</sup>Tura Pítiur chicharuk “Eneasa, Jesukrístu tsuármawai. Nantaktia. Tura esekmatairam iwiarata” tímiayi. Tutai Eneas nu chichamaik nantakmiayi. <sup>35</sup>Nuna túman wáinkiar Rítianmayā aents tura Saruñmayā aencha enentáimprar Uunt Yusan nemarsarmiayi.

### Nuwá Túrkas nantakmiania nu

<sup>36</sup>Túrasha Jupe péprunam nuwá Yus-shuar pujuyayi, ni naarī Tapitia. Tura nusha Kriaku chichamjain̄kia Túrkas tuiniawai. Nu nuwasha nuí̄ pujus tuke péñker túriniuyayi. Tura niisha nútiksan̄ yaj̄ wémiayi. <sup>37</sup>Nu tsawantinik Túrkas sun̄kuran jateemak jakamiayi. Túrunamtai ayashin nijjarar yakí̄ tesaamunam áepsarmiayi. <sup>38</sup>Jupe péprusha Rítianmayā tíj̄iuch ámiayi. Júpenmayā Yus-shuar Rítianam Pítiur pujan nekaawar jimiará áishmañkan akatrar akupkarmiayi, Júpenam wari winití̄ tusar. <sup>39</sup>Nuí̄ tutai Pítiur niij̄iaí̄ wémiayi. Tura támatai jaka tepemia nuí̄ awayáwarmiayi. Nuí̄ wayam̄tai wajē pujuarmia nu úutkiar Pítrun téntakarmiayi. Túrawar pushir̄in, Túrkas iwiaaku pujus najankamia nuna iniaktusarmiayi.

<sup>40</sup>Nuyañka Pítiur aā akupkarmiayi ashí̄. Tura niisha nin̄ki tikishmar Yúsan áuj̄samiayi. Nuyasha nuwan̄ jaka tepaan iis tímiayi “Tapitia nantaktia.” Tutai niisha íimi Pítiur wajaan wáiniak nantaki pujusmiayi. <sup>41</sup>Tura Pítrusha nuwan̄ uwejn̄um achik awajkimiai. Tura iniais Yus-shuar ármia nuna tura wajencha untsukar Túrkas iwiaaku ajasun iniaktusarmiayi. <sup>42</sup>Nu túrunamun ashí̄ aents Jupe péprunmayā nekaawarmiayi. Túrawar untsurí̄ aents Uunt Jesusan umirkarmiayi. <sup>43</sup>Tura Pítruka Jupe péprunam untsurí̄ tsawant nuapen-iwiarin Semuñka jeen̄ pujusmiayi.

### Pítiur Kurniriujaí̄

**10** <sup>1</sup>Sesaria péprunam Kurniriu naartin suntara kapitíantrī pujumiayi. Ni suntarī Itiaria nun̄kanmayā ármiai. <sup>2</sup>Nu kapitían Kurniriu ni shuarij̄iaí̄, Yuska nan̄kaamantuiti, tu enentáimtiarmiayi.

Tuma ásar Yúsan enentáimtin ármiayi. Tura nútiksan̄ kuítniasha takakchan yáintaj tusa Israer-shuaran súuyayi. Tura tuke tsawant Yúsan áujtiniuyayi. <sup>3</sup>Chíkich tsawantaj̄, nantu aan̄ku ajasaj̄ Kurniriu ímiarmiayi. Yusa suntarj̄ Yus nayaimpinmaȳ akupkamu, ni pujamunam utuá “Kurniriuá” tímiayi.

<sup>4</sup>Kurniriuá tutai, Yusa suntarj̄n ashamak ímia pujumiayi. Tura “¿Warimpiait, Uunta?” tímiayi.

Tutai Yusa suntarj̄ tímiayi “Ame seamun Yus anturtamkai. Tura atsumainia nu yayakmin Yus shiir enentáimturmawai’ tímiayi. <sup>5</sup>Tura Yusa suntarj̄ Kurniriuun tuke chicharuk “Wats, áminiuram Júpenam akupkata. Semun̄, chíkich naarī Pítur, tatí tusam akuptukta, tímiayi. <sup>6</sup>Nu Semun̄sha chíkich Semun̄jaj̄ pujawai. Nuka nuapen-iwiarin Semun̄kaiti. Tura ni j̄esha nayaantsanam ayaamach pujawai, tímiayi. Nūj̄ jeawakmin, ame túratamna nuna Semun̄ Pítur turamtatui” tinia ikiukmiayi. <sup>7</sup>Tura Yusa suntarj̄ waketkimtai, Kurniriuka ni takarniurj̄n j̄miaran itiamiayi. Tura suntaran chikichkiniak nemarsat tusa itiamiayi. Nu suntar ni írutramuriyayi. Tura Yúsan enentáimtiniuyayi. <sup>8</sup>Kurniriusha ni túrunamurj̄n ashí ujáa-já awajas Jupe péprunam akupkarmiayi.

<sup>9</sup>Kashin tsawantaj̄ Kurniriu suntarj̄ Júpenam nuntumsaraj̄, tutupin aj̄ Pítur j̄ej̄ yakí wáakunam Yúsan áujstajtsa wakamiayi. <sup>10</sup>Pítrusha ti tsukamak yurumátaj tusa wakerimiayi. Túrasha yurumkan iniarainiaj̄ Pítur íkijajtusmak, <sup>11</sup>nayaimp uranmianum wan̄karam tarachia áanin tura nuna tsakarj̄n jin̄kiakman tárun wáinkiamiayi. <sup>12</sup>Nu tarachnium yajasma irunmiayi. Wekainiusha, nanamtincha, tura napisha en̄kemiarmiayi. <sup>13</sup>Tumaj̄ Yus Pitr̄un chicharuk “Pitru, wajakim maam yuata” tímiayi.

<sup>14</sup>Tutai Pítur tímiayi “Atsá Uunta. Ii Israer-shuartikia yajauch yajasma áinia nu tura yúatin surimkiamu ana nuka pen̄ké yúchaitji. Tuma asamtai j̄únaka wikia yuashtatjai” tímiayi.

<sup>15</sup>Túrasha Pitr̄un atak Yus chicharuk “Wi, pen̄keraiti, tájana nu, yajauchiiti, tiip” tímiayi.

<sup>16</sup>Nuka menaintiú túrunamiayi. Tura nuyasha tarach ataksha nayaimpiniam wakamiayi. <sup>17</sup>Nuna túrunan wáiniak Pitiur wariniak áaniuncha wáinkiaj tusa enentáimia pujaj̄ kapitián Kurniriu ayakma armia nu, anintruiniak jeawariayi. <sup>18</sup>Tura jeawar kakantar unsummiar “¿Semun̄, Pítur, jin̄ pujá?” tiarmiayi.

<sup>19</sup>Tura Pítruka ímiarmarj̄n tuke enentáimia pujaj̄ Yusa Wakaní chichaak “Menaintiu áishman̄ untsurmainiawai, tímiayi. <sup>20</sup>Wajakim akaikim arantutsuk au nemariarta, Wi akupkamu asamtai” tímiayi.

<sup>21</sup>Nuna antuk Pítur taramiayi. Tura áishman̄kan Kurniriu akupkamia nuna wajainian wáiniak “Wiitjai Pítur. Átum eattrumna núitjai. ¿Warí tarintrum?” tímiayi.

<sup>22</sup>Tutai niisha tiarmiayi “Iisha kapitíán Kurniriu akupkamu taji. Kurniriuka áishman pénkeraiti. Yúsan enentáimtiniaiti. Tura Israer-aencha nin shiir enentáimtuiniawai. Nííya winiaji, tiarmiayi. Kame nuik, Yusa suntari, nayaimpinmaya akupkamu, ii kapitíántrín tímiayi “Pitrun untsukát akupkata. Nii tatí. Tura nii títiatna nu pénker anturkata” tímiayi. Nuna ii kapitíántrín takui iisha winiji” tiarmiayi.

<sup>23</sup>Tutai Pítiur jeá awayámiayi. Tura nu kashi nuí kanarmiyai.

Kashin tsawarar Pítiur niijai wearmiayi. Túrasha Júpenmaya Yushuarsha nin nemariarmiayi. <sup>24</sup>Nuyá tsawarar Sesaria péprunam, Kurniriu nákamun jeariarmiayi. Kurniriuka ni shuarín tura ni nekas amikrín, nekaatarum tusa untsuk ikiaankamiayi. <sup>25</sup>Tura Pítrusha jeamtai Kurniriu aa jiintiuki Pitrun tikishmatramiyai. <sup>26</sup>Túrasha Pítiur awajki tímiayi “Wajaktia. Wisha aya áentsketjai. Ámea núnisketjai” tímiayi. <sup>27</sup>Tura chichasar jeá wayawarmiyai. Tura wayá, untsurí aents matsatun wáinkiamiyai. <sup>28</sup>Nuyá Pítiur chichaak tímiayi “Amikrua, atumsha nékarme. In Israer áentstinkia, chíkich áentsjai pachiniarchatniuitrume, tura ni jeencha wayashntiniaitrume in jintintramin turamainiaji, tímiayi. Túrasha Yuska ni enentáimsamurín wíniaka paant iniaktursayi. Túmaitkiui wikia nánkamas áentsun yajauchiiti, tura auka wapikiaiiti, tíchamniaitjai, tímiayi. <sup>29</sup>Tuma asamtai, untsurkurmin, páchitsuk winimjai. Túmaitkiui nekaataj tusan wakerajai. ¿Urukamtai untsurkamarum?” tímiayi.

<sup>30</sup>Tutai Kurniriu tímiayi “Kuatru tsawant nankaamasai tura nantusha juni ai, wikia yurumtsuk Yúsan áujсамjai, kjarai áujsatín ana nuna. Túran chichai, áishman, ni entsatairi wincharpatniun, naka wajatran wáinkiamjai, tímiayi. <sup>31</sup>Niisha chichartak turutmiayi “Kurniriu, Yus ame áujman anturtamkayi. Tura shuar atumainia yáinmamna nunasha nekarmayi, turutmiai, tímiayi. <sup>32</sup>Tuma asamtai, Jupe péprunam akatramuram akupkata. Semun Pítrun itiatí. Nu Semun Pítrusha, chíkich Semunjai pujawai. Nuapen-iwiarin Semunkaiti nuka. Tura ni jeesha nayaantsanam ayamach pujawai. Niisha taa ámin chichartamkattawai” turutmiai, tímiayi. <sup>33</sup>Túrutkui, wi umikian áentsun wárikmasan ámin akuptukjame utitia tusan. Tura nékasen taume. Tuma asamtai iisha juí Yus ímmianum pujuiniaji. Tuma asamtai, ashí Uunt Yus ámin au ujakarta túramna nu, iisha antuktai tusar pujaji” tímiayi Kurniriu.

### Kurniriu jeen Pítiur etserkamia nu

<sup>34</sup>Nuyá Pítiur chichaak “Ayu. Yus ímmianum ashí aents métekrak áiniawai nekas nékajai, tímiayi. <sup>35</sup>Antsu ashí nunkanam nánkamas aents Yúsan umirak pénker tura nuna, Yus nú aentsun shiir enentáimtai, tímiayi. <sup>36</sup>Yuska shiir chichaman Israer-aentsun akuptukmiayi. Nuí chichaak “shuar Jesukrístu naarín páchiakka, Yusjai nawamnaikiatin

átiniaiti, tímiayi. Nú Jesukristu ashí shuara Úuntrinti' tímiayi Yus. <sup>37</sup>Túrasha Kariréa nunkanam nan̄kamak ashí Israer nunkanam túrunamia nu paant nékarme. Imiakratin Juan imiaak etserak amukmia nú tsawantin nan̄kamamiayi. <sup>38</sup>Tura júsha nékatsrumek, tímiayi. Nasarénumiá Jesus, Yus Anaikiamu asa, Yusa Wakaní kakarmarijiaí pênker túriniuyayi. Iwianchruku wáitias pujuarmia nuna pênker awajsamiayi. Yus Niin pujurma asa ashí nuna túriniuyayi. <sup>39</sup>Tura Israer-aents matsatkamunam tura imia Jerusaréñ péprunmasha Jesus túramia nu, iisu asar, iisha étsereaji. Tura ayu, Nin achikiar krúsnum máacharmakia, tímiayi. <sup>40</sup>Tura menainti tsawant jeamtai Yus Nin iniantkimiayi. Tura ataksha iwiaintiurtamkachmakaj', tímiayi. <sup>41</sup>Ashí áentsnumka wantinkiachmiayi. Antsu íniak nuik, etserin atarum tusa Yus achirmakmij nú áentstiniak wantinturmakmij, tímiayi. Au nekas jakamunmayá nantakmiatai iisha Niijiaí tsaniñkiar yurumámji, tímiayi. <sup>42</sup>Tura Jessusha in akuptamkaitji. Jesuska “Wiitjai Yus Anaikiamun, tímiayi. Ashí áentsun, júka makuumawai, túrasha júka makuumatsui, Wiki títiniaitjai. Kame ashí áentsun, jaka áinia nuna tura iwiaaku áinia nunasha, Wikiitjai nuna títinian” tímiayi Jesus. Nusha átum werum ujatruktarum, Jesus turammaji, tímiayi. <sup>43</sup>Ya shuarak Jesusa náarín pachia nú shuarnaka tunaarín tsan̄kurattawai, nuna ashí Yúsnan etserniusha yaunchu etseriarmiayi” tímiayi.

### Israer-shuarchan Yusa Wakaní tarurarmiania nu

<sup>44</sup>Tura Pítiur tuke chichaak pujai, tura chikichcha antúu pujuiniaí Yusa Wakaní tarurarmiayi. <sup>45-46</sup>Tuma ásar an̄kant an̄kant chíkich chichamjai chichasarmiayi. Túmainiak, Yus ti pênkeraiti, tiarmiayi. Tura Israer-shuar, Yus-shuar armia nuka Pítrujai táarmia nu, nuna antukar ti enentáimsarmiayi. Maa, Yusa Wakanísha Israer-shuarcha ainia nunasha tarurcharaik, tu enentáimsarmiayi <sup>47</sup>Túmakui Pítiur chichaak “¿Yaki surimkiat ju aents imiantinian? Warí nincha ínia áintsan̄ Yusa Wakaní tarurcharaik” tímiayi. <sup>48</sup>Nuyá Pítiur, Jesukristu náariin imiantiarum tusa akupkarmiayi. Tura nuyasha Pitrunka, niijiaí ishichik tsawant pujustinian seawarmiayi.

### Ni túrunamurín Pítiur ujakmiania nu

**11** <sup>1</sup>Israer-shuarchasha Yusa chichamen umirkarai táman Jesusa akatramurísha tura Jutíanmayá Yus-shuarsha antukarmiayi. <sup>2</sup>Túmainiak Pítiur Jerusaréñnum jeamtai, Israer-shuar Yus-shuar ármia nu chichainiak <sup>3</sup>“¿Urukamtia Israer-aents áiniachusha iyumam? ¿Tura aujai tsaniñkiam urukamtai yurumámum?” tiarmiayi.

<sup>4</sup>Tutai Pítiur ashí yámankamtaiknumiá túrunamun ujakmiayi. <sup>5</sup>Chichaak tímiayi “Wikia Jupe péprunam pujumjai. Tura nuí Yusan auju



pujusan ímiarmajai. Tura wan̄karam tarachia áanin kuaru tsakarín jin̄kiakma, nayaimpinmayá táarun wáinkiamjai. Tura wi pujamunam jeartimiai, tímiayi. <sup>6</sup>Tura nuí iijaj tukaman init yajasman, napincha, nanamtinnisha en̄ketainian wáinkiamjai, tímiayi. <sup>7</sup>Tura chichaman antukmajai “Pítru wajakim maam yuata” túrutun antukmajai, tímiayi. <sup>8</sup>Túrutkui “Atsá, Uunta, áanin wapiknaka, Israer-aents yuatin surinkiamu ana núnaka tuke yúchaitjai” tímiajai, tímiayi. <sup>9</sup>Atak nuyá túrutuk “Wi, péñkeraiti, tájana nu, ámeka, yajauchiiti, tiip” turutmiai, tímiayi. <sup>10</sup>Nunasha menaintiú túrunan wáinkiamjai. Túruna nayaimpiniam mash waketkimiai, tímiayi. <sup>11</sup>Nuí túruna pujai menaintiú áishman̄ Sesarianmayá akupkamu, winia eatainiak wi pujamunam tarutiarmiai, tímiayi. <sup>12</sup>Tura nuí Yusa Wakaní chichartak “Arantutsuk aujai wetá” túrutkui, wémajai. Tura ju sais Yus-shuarjai wi wémajai. Túrunar ashin̄kiar Kurniriu jeen wayam̄ji, tímiayi. <sup>13</sup>Niisha chichaak “Jearuí Yusa suntarī nayaimpinmayá taa wajan wáinkiamjai, tímiayi. Tura niisha chichartak “Jupe péprunam Semun̄ Pítiur tatí tusam áishman̄ akatram akupkata. <sup>14</sup>Pítrusha taa, itiura amesha tura áminiuimesha tunaarminiā uwemprattam nuna turamtatui.” Yusa suntarī nuní turutmiai” tu ujatkamiai Kurniriu’ tímiayi.

<sup>15</sup>“Wi chichastasan júarai, Yusa Wakaní tarurarmiai, yámankamtaik in tarutrampramijá nútiksān, tímiayi. <sup>16</sup>Nuñkia Uunt Jesus timian enentáimpramjai. Niisha tíchamka “Juan̄ entsajain̄ imiakratmiai. Tura antsu Yusa Wakanínkia imiantinia áintsān atumí enentáin en̄kemprutmattarme.” Nu timian enentáimpramjai, tímiayi. <sup>17</sup>Atumsha enentáimpratarum. Uunt Jesukrístu umirkamijá nuí, incha Yuska ni Wakanín suramsamijai. Tura in suramsamijá núnisan̄ Yus nincha ni Wakanín súsararmiai. Nuna tura asamtai, wikia, túrashtiniaiti, Yúsan tíntkiaitiai” tímiayi Pítiur.

<sup>18</sup>Tura Pítiur taman antukar mitiat wáinkiar “Nekasaiti, Israer-shuarchancha ni enentáin yapajíáwarmatai tuke iwiaaku átinian Yuska nin súsaruiti” tiarmiai. Tusar Yusa náarin ti shiir awajсарmiai.

### Yus-Shuar Antiukía péprunam wearmiania nu

<sup>19</sup>Estepañkan máawarmia nuí, chíkich Yus-shuarnasha maatai tusar pataatiarmiai. Túram chíkichkia pisarar Pinisia nun̄kanam, Chipri nun̄kanmasha, tura Antiukía péprunmasha wearmiai. Tura nuí jeawar Yus-Chichaman chikichnaka ujatsuk aya Israer-aentsnak ujakarmiai. <sup>20</sup>Tura nijjaī Chipri nun̄kanmayá pisararmia nu Serini nun̄kanmayasha Yus-shuar ármiai. Nuka Antiukíanam jeawar Israer-shuarchan Uunt Jesusa túramurin̄ ujakarmiai. <sup>21</sup>Tura Uunt Jesus ikiakárma ásar, nú nun̄kanmayá aents ti untsurí yaunchu túrutairin̄ iniaisar Jesusan enentáimtuiniak Yus-shuar ajasarmiai.

<sup>22</sup>Tura nu chichaman antukar, Jerusaréñnumiã Yus-shuar, ame iyutã tusar, Pirnapín Antiukíanam akupkarmiayi. <sup>23-24</sup>Pirnapísha jeá, Yus nú shuaran uwentikrarma nuna wáiniak warasmiayi. Pirnapísha péñker áishmañkayayi. Yusa Wakanísha pimiutkamuyayi. Tura Yúsan nekas umirkayayi. Tuma asamtai nu shuaran mash jintintiainiak chicharuk “Tuke enentáimjaj̄i umirkarum Yus nemarsatarum.” Tu chicharak ikiukmiayi. Tura nuisha nú arant untsurí aents Yusaj̄ kawen̄karmiayi.

<sup>25</sup>Nuna turasua amik Pirnapí Tarsu péprunam wémiayi Sáurun wáinkiat̄aj tusa. Tura wáiniak Antiukía péprunam jukimiayi. <sup>26</sup>Tura nuí jeawar, nú péprunmayã Yus-shuarjaj̄i iruntrar chikichík uwí pujusarmiayi. Yus-Chichaman untsurí shuáran ujaak pujuarmiayi. Tura nuí Antiukía péprunmañka Yus-shuaran émkaka, Kristu shuarí, tiarmiayi. <sup>27</sup>Nuyá Yusnan etserin Jerusaréñnumiã táarmiayi Antiukíanam. <sup>28-30</sup>Túmainiãj̄i chikichík etserin, ni naarī Akaapu, Yus-shuar matsatmanum ajapén wajaki chichasmiayi. Tura Yusa Wakaní nekatairij̄ij̄i chichaak “Ti tsuka ashí núñkanam átatui” tímiayi. Tuma asamtai Antiukíanmayã Yus-shuar chichainiak “Jutía nun̄kanmayã Yus-shuar ainia nu yáñtai” tiarmiayi. An̄kant an̄kant ni wakeriarmia núnik súsarmiayi. Tura nú kuítniasha Jutíanmayã Yus-shuara úuntr̄in akuptukarmiayi. Pirnapísha Sáurusha nú kuítian júkiarmiayi. Tura Akaapu tímia núnisañ túrunamiayi, akupin Krautiu pujaj̄i.

### Pitrun sepunam en̄keawarmiania nu

**12** <sup>1</sup>Nu tsawantaj̄i akupin Erutis Yus-shuaran máataj tusa chichaman jurus áentsr̄in ishiakmiayi. <sup>2</sup>Tura Juañka yach̄in Jakupun suen tsupirkar máawarmiayi. <sup>3</sup>Nuna tura máawarmatai Israer-aents wáinkiar “juka péñkeraiti” tiarmiayi. Erutissha nuna antuk, Pítrusha achikrum itiatarum tusa akupkarmiayi. Núnaka wakapruachu tanta yuatin nampertin túrawarmiayi. <sup>4</sup>Pítruncha achik itiarmatai, Erutis sepunam en̄keata tusa akupkamiayi. Tura sepunam suntarsha an̄kant an̄kant, kuaru kuaru, ashikia tiasisáis (16) irunar Pitrun téntakarmiayi. Tura, ju jísat nan̄kaasmatai, mantamnatí tusan j̄ij̄iktiat̄aj̄i aents iruntramunam, tu enentáimsamiayi Erutis. <sup>5</sup>Túramu asa Pítruka sepunam pujumiayi. Tura suntarsha mij̄iatrutsuk iiyarmiayi. Túramunak Yus-shuarka, Pitrun yáñkiat̄ tusar iniaitsuk Yúsan ti áujiarmiayi.

### Yusa suntarī Pitrun uwentikramiania nu

<sup>6</sup>Wats, Erutis, kashin j̄ij̄iktiat̄aj̄i takui, nú kashi Pítruka jimiará suntar wajamunam etema tepes kanarmiayi. Tura jimiará jirujaj̄i j̄in̄kiamuyayi. Tura chíkich suntarka j̄in̄manum ii wajarmiayi. <sup>7</sup>Tumaj̄i aya aneachma Yusa suntarī nayaimpinmayã taa ajapén wajasmiayi. Túrunamtai jeanmañka tsáapin ajasmiayi. Tura Yusa suntarīsha Pitrun páenum

antiñ ishintiarmiayi. Tura jirusha Pitru uwejeýa sayat atiniamiayi. <sup>8</sup>Tura Yusa suntarí tîmiayi “Kaki emenmamata. Túram sapatrumsha aweekata” tîmiayi. Tutai Pítiur túramiayi. Nuyá chichaak “Pushiram entsarta. Túram nemartusta” tîmiayi. <sup>9</sup>Tutai Pítiur nemarsamiayi. Túrusha Pítruka, mesekranmaapi júniaya, tu enentáimsamiayi. <sup>10</sup>Túrusha emka suntar ímia wajan nan̄kaikiarmiayi. Tura nuyasha chíkich suntar ímia wajan nunasha nan̄kaikiarmiayi. Tura nuyasha jíintiainium jiru waiti ámanum jeawarmatai, nú wáitisha ímia-niñki kuat uranmiayi. Túrunamtai jíinkiarmiayi. Tura jintiá ishichik wésan, Yusa suntarí Pitrun níniak ikiukmiayi.

<sup>11</sup>Túram Pítiur enentáimiar tîmiayi “Yamaikia nékajai. Mesekranmachuiti. Antsu Uunt Yus ni suntarin nekas akupturkayi. Erutis mantuataj tusan pujurtana nuyá Yusa suntarí winia uwemtikrurai. Tura Israer-aents túrutatajtsa wakeriarmia nuyasha uwemtikrurai” tîmiayi. <sup>12</sup>Nuna tu enentáimias nekáa, Marí jeen wémiayi. Nú Marisha Juan Márkusan nukuríyayi. Nú jeenam untsurí aents irunar Yúsán auju matsatainíaj Pítiur jeamiayi. <sup>13</sup>Tura jeá aá wáitin tuntuimiayi, wayataj tusa. Túmakui nuwá uchich, ni naari Ruti, yákit tusa iyumiayi. <sup>14</sup>Tura jeari, Pitru chichamen anturak ti shiir enentáimsamiayi. Túmak wáitin urattsuk ikiuki, inít matsatainian werí “Pítiur taa wáitiniam wajaawai” tîmiayi.

<sup>15</sup>Tutai “Wáurtsumek” tiarmiayi.

Tútaisha núwaka “Atsá nekasaiti” tîmiayi.

Tútaisha nú arant “Níchuiti. Antsu ni wakaní túratsuash” tiarmiayi.

<sup>16</sup>Tu chichainiañ Pítruka tuke tuntuí wajamiayi. Tura wáitin uraj tukamá Pitrun wáinkiar ashamkarmiayi. <sup>17</sup>Ashamak chichainiakui Pítiur, uweje takuí itiatmamtikiarmiayi. Tura nuyá Uunt Yus sepunmayaan uwemtikramun ujakmiayi. Tura “Jú chicham Jakupu tura chíkich Yushuarsha ujaktarum” tîmiayi. Nuna tî iniais jíinki arant wémiayi.

<sup>18</sup>Kashin tsawar suntarsha Pitrun atsá wáinkiar “Chuwa urukakua men̄kaka. Áyawa urukattajia” tiarmiayi. Pítiur túrunamun nékachu ásar nuna tiarmiayi. <sup>19-20</sup>Túrunamtai Erutis chichaak Pítiur eaktarum tusa akupkarmiayi, túrusha wáinkiacharmia. Túrunamtai Erutis suntaran untsukar, Pítrun ísarmia nuna aniasarmiayi “¿Pítiur itiura men̄kakama?” tîmiayi. Niisha áimiainiachkui, nu suntaran mantámnatí tusa akupkamiayi.

### Erutis jakamiania nu

Erutissha Tirunmaya tura Setúnmaya áentsjaisha nemasnaikiarmiayi. Túmayatan Jutía nun̄kan ikiuki Sesaria péprunam pujustaj tusa Erutis wémiayi. Sesaria péprusha Tiru péprunam tíjiuchiiti. Setúnmaya aents Tirunmaya áentsjai Erutisa nun̄keyan yurumkan súmainia ásar, Erutisjai

nawannaikiatniun wakeriarmiayi. Tuma asamtai métekrak enentáimsar, Erutisa takarniurí penkerí, ni naarí Parastu, nijiaí emka amikmawar nuyá Erutisan weriar shiir matsamsatniun seawarmiayi. <sup>21</sup>Tuma asamtai tsawant jeamtai Erutissha akupin entsatai pushin entsarmiayi. Tura akupin pujutainium pujus áentsun ikiaanak áujmatmiayi. <sup>22</sup>Nuí pujus chichaakuí aents unsumainiak tiarmiayi “Ju chichaa pujana júka áenchaiti. Antsu nekaska yúsaiti” tiarmiayi. <sup>23</sup>Tumáí nuyáik Yusa suntarí nayaimpinmayá tarí Erutisan jaa awajсамиayi. Tuma asamtai nusha aka yuam jakamiayi. Erutissha Yusan waantu awajtsuk níñki waantu enentáimtuma asa túruna jakamiayi. <sup>24</sup>Túrunamtaisha Yusa chichamenka nú arant pampanki wémiayi. Túmakí ashí núñkanam anturamiayi.

<sup>25</sup>Tura Pirnapísha Sáurusha ni takatrín amukar Jerusaréñnumia Antiukíanam waketainiak Juan Márkusan júkiarmiayi.

### Yus-Shuar Pirnapíncha Sáuruncha Yus-Chichaman etserkarat tusar akupkarmiania nu

**13** <sup>1</sup>Antiukíanmayá Yus-shuarnum Yusnan etserin páchitra ármiai. Nútiksáñ Yus-Chichaman jintinniurísha ármiai. Pirnapísha tura Mukusa Semunsha, nuyá chíkich, Serinianmayá Rúsiusha tura akupin Erutisa tsakatkesha, ni naarí Manaen, Sáurusha tímianu ármiai. <sup>2</sup>Tura chíkich tsawantáí niisha yurumsuk Yúsán áujeak pujuiniáí Yusa Wakaní tímiayi “Pirnapísha, Sáurusha akanturkitiarum, tímiayi. Wi takatan súsaitjiana nuna takasarat tusarum túratarum” tímiayi. <sup>3</sup>Tutai ijiarma Yusan aujsua amikiar, shiir wetarum tusar ni uwején Sáurun Pirnapíncha awantkarmiayi. Túrawar Antiukíanmayá akupkarmiayi.

### Chipri nuñkanam jeawarmiayi

<sup>4</sup>Tura nuyánka Yusa Wakaní akupkam Pirnapísha Sáurusha jíinkiar Serusia péprunam jeawarmiayi. Tura nuyá uunt kanunam enkemprar Chipri nuñkanam jeawarmiayi. <sup>5</sup>Juánsha yáintaj tusa némarkauyayi. Nuí Saraminia péprunam jeawar Israer-shuar iruntai jeanam wayáwar Yus-Chichaman etseriarmiayi. <sup>6</sup>Tura Chipri nuñkanam pepru ainia nuí wáirkutak Papus péprunam jeawarmiayi. Nuí jeawar Israer-aents uwishin ni naarí Parjesúsán wáinkiarimiayi. Ni chíkich náarínkia Erimiasauyayi. Niisha uwishniuitiat, Yúsán étsereajai, tíniuyayi. <sup>7</sup>Akupin Serjiu Páurujáí pujuyayi. Nu akupniusha ti péñker enentáimniuyayi. Tura Pirnapín Sáuruncha chichaman akuptukmiayi, taarti tusa. Kame Yus-Chichaman antuktaj tusa wakerak untsukmiayi. <sup>8</sup>Tura uwishin Erimias nuna nakitiak “Auka péñkerchaiti” tímiayi. Akupniusha Yúsán umirkáin tusa nuna tímiayi. <sup>9</sup>Nuyánka Sauru, ni chíkich naarí Papru, Yusa Wakaní pimiutkamu asa, nu uwishniun úmamkemas iis tímiayi <sup>10</sup>“Ámeka

wáitaitme. Anan̄kartiniaitme. Yajauchiitme. Maaj, iwianchiitme. Tura ashí péñker ana nuka imiá nakitniuitme. Tsej, ¿urukantai Yusa jinti naka ana nu emeskim weam? <sup>11</sup>Pajj, yamaikia Uunt Yus asutiámattawai. Yamaikia amesha jiiimi kusurmatai untsurí tsawant tsáapnin penké fischattame” tímiayi. Tura nú chichamaik jii kusurmatai kirit ímiuk chikichan eamiayi enkeki jurukit tusa. <sup>12</sup>Nu túrunamtai akupin nuna wáinak, ti enentáimpramiayi. Túruna Uunt Yusa chichamen enentáimtur umikmiayi.

### Chíkich Antiukíanam etserkarmiania nu

<sup>13</sup>Nuyá Juan waketki Jerusaréñnum wémiayi. Tura antsu Pápruka ni tsaniakmarijjiai kanunam enkemprar Pápus péprunka ikiukiár Pirji péprunam jeawarmiayi. Nusha amaini Pampiria nunkanam pujawai. <sup>14</sup>Nuyá Pirji péprun nan̄kaikiar Antiukía péprunam jeawarmiayi. Nú Antiukíasha Pisitia nunkanam pujawai. Nui jeawar Israer-shuar ayampratin tsawantin, nuka sáwartin, Israer-shuar iruntai jeanam wayawar pujusarmiayi. <sup>15</sup>Tura nuí Yus-Papinium yaunchu áarman áujas aminkiamtai, Israer-shuar iruntai jeanam írniuri Páprun tiarmiayi “Yatsuru, jintíatin chicham takakkurmeka yamaik titiarum. Antukarmí” tiarmiayi.

<sup>16</sup>Tutai Papru wajaki uweje takuimiayi. Tura chichaak “Israer-shuartiram, tura Yúsán umirkataj tusa wakerarmena nu antuktaram, tímiayi. <sup>17</sup>Ii Yusrí ii yaunchu uuntrin Israer-shuartin achikmiayi. Tura niisha írara núnik Ejiptunam matsatainai Yuska nin páchiniak uunt awajsarmiayi. Yus ni kakarmarijjiai nú nunkanmaya ii yaunchu uuntrin uwemtikrarmiayi. <sup>18</sup>Túrasha atsamu nunkanam ii uuntrin kuarenta (40) uwitin Yuska aya kátsuntramiayi. <sup>19</sup>Tura nuyanka siati áentsun mátsatkainian, Kanaan nunkanam matsamarmia nuna amukarmiayi. Nú nunkan ii yaunchu úuntrin susataj tusa Yus túramiayi. <sup>20</sup>Nuyanka ii uuntri akupniurín, juís tútain, anaikiamiayi. Tura chikichan ukunam anaiki anaiki wémiayi. Nuna tura túraakua kuaru siántu senkuenta (450) uwí ejemiayi. Samuersha Yúsán etserin náamtsáin nuna túrimiayi Yus. <sup>21</sup>Tura nuyanka áencha juísan nakitiainiak, uunt akupin náamkat tusar Yúsán seawarmiayi. Tuíniakui Yuska Sesa uchirín Saúran anaikiamiayi. Nú Saúra úuntrin̄kia Pinjamín̄kiauyayi. Tura Saúrsha kuarenta (40) uwí nú áentsun akupkat tusa Yus tsan̄katkamiayi. <sup>22</sup>Tura Saúr náamkan ataksha Yus awain̄kimiayi. Tura nuyá iiksan̄ nú nunkanam uunt akupin atí tusa Tawitian anaikiamiayi. Tura Yuska juna Tawitian tímiayi “Isaí uchirín Tawitian winia enentáir jeamtai achirmakjai. Tura Winia umirtin átatuí” tímiayi. <sup>23</sup>Wats, Tawit weeanmaya Jesúsaiti. Tura Yuska Israer-aentsun Uwemtikrartinian Jesusan anaitiukmiayi, yaunchu timiarín uminkiát tusa. <sup>24</sup>Jesuska táatsain̄ Juan ashí Israer-

shuaran tunaariniá enentáimtumar imiantinian ujakmiayi. <sup>25</sup>Tura Juansha ni jákatniurí jeatemamtai, chichaak “Átum enentáimtarmena núchaitjai. Wikia Yusa anaikiamurí, Kristu tutai, nákarmena núchaitjai. Antsu Niñkia winia ukunmaruí winittiwai. Tura Niisha wíjñainkia ti nankaamantu asantai wikia sapatrincha atitrataj tíchamniaitjai.” tímiayi.’

<sup>26</sup>‘Pai, yatsurtiram, Apraám weeatiram, tura ashí Yus ashamkarum umirkaitrumna nu, antuktarum. Ju uwempratin chichamka íniuiti, tímiayi. <sup>27</sup>Iis, Jesusa túrunatniurín Yuska yaunchu ni etserniurín áamtikrachmakia. Tura ukunam Jerusaréñnumiá shuar ni akupniuríññai tuke sáwartin nuna áujeatskesha penké nekaacharmiayi. Tuma ásar Jesuska Yusa Uchirínti tícharmiayi. Tura, jakatí, tiarmia nuí, Jesusa túrunatniurín, Yus yaunchu chichakmia nuna, tímiatrusaran umikiarmiayi, tímiayi. <sup>28</sup>Jesuská penké tunaamkachunak yamaikia mantamnatí tusar Piratun seawarmiayi, tímiayi. <sup>29</sup>Tura Yusa Papiñin ashí Jesusnan tía nuna tímiannak umikiarmiayi. Tura nuyá krúsnumiá itiarar iwíarsarmiayi. <sup>30</sup>Túramunak Yus jakamunmayan iniantkimiayi. <sup>31</sup>Jesuská jakamunmayá nantaki, yaunchu Kariréanmayá Jerusaréñnum Niññai irutka wéarmia nuna núkap tsawantin pujus wantintiukmiayi. Nú shuaraiti yamaikia Jesusa túrunamurín etserainia nu’ tímiayi.

<sup>32</sup>‘Iisha núnisrik shiir chichaman Yus yaunchu ii apachrín tiarmia nu étsereaji. <sup>33</sup>Iisha Israer-weeá asakrín, Yuska Jesusan iniantkímia nujai ii apachrín anajmatramia nuna yamá uminkiaiti. Kame Sarmu Jímiar papinium ju áarmaiti:

“Ámeke winia Uchiruitme.

Túmaitkiui yamaikia winia iwíiakmar susamuitme.”

<sup>34</sup>Tura Yuska Jesusa nantakmiarín jintintiak, tura ni ayashí káurchatniun jintintiak, chíkich Sarmu papinium juna áamtikramiayi:

“Nekas penkeran Tawitian anajmatramaj nuna atumin amastatjai.”

<sup>35</sup>Tura nú arant, nú paant atí tusa, chíkich Sarmu papinium ju aarma awai:

“Yusa, ame Uchiram aneamna nuna ayashí káurtincha tsankatkashtatme.”

<sup>36</sup>‘Nekaatarum, yatsurtiram, Yuska Tawitia ayashín tíchamiayi nuna. Tawitkia Yus tímian amuk jakamiayi. Túrasha ni ayashínkia káurmiayi.

<sup>37</sup>Tura antsu Yus iniantkímia nuna ayashínkia penké káurchamiayi.

<sup>38</sup>Tuma asantai, yatsurtiram nekaatarum. Jesusjainkete tunáa asakártin.

<sup>39</sup>Tura Muisais yaunchu akupkámia nujai tunáa tsankurnarchamnia nu, yamaikia Jesusjai tsankurnartiniaiti. <sup>40-41</sup>Yúsnan etserin juna áarmiayi:

“Enentáimpratarum wishikkiartintiram. Ashamkatarum. Túrarum menkatumpratarum. Wi Yus asan, átum pujarmena nuí, aents túrachminian túratajna nusha penkesh nekaashtatrumé, chíkich ujatmainiakuisha.” Tu áarmaiti.

Tuma asamtai yatsurtiram, aneartarum atumin nuna túrutmawajirum, Yusnan etserin aarma tana nútiksān.” Nuna chichaak amukmiayi Papru.

<sup>42</sup>Tura nuyá Papru Pirnapíjiaí jiiñki wéenakuí aents chichainiak “Chíkich sáwartincha jútiksarmek etserkatarum” tiarmiayi. <sup>43</sup>Tura nuyá iruntsua tsenkeenak Israer-shuarsha, tura chíkichkia Israer ajasarusha, Yúsan umirkatajtsa wakeriarmia nuka, Páprun Pirnapíncha nemarsarmiai. Niisha nu áentsun chicharuk “Yusa anenkrattairi enentáimtusrum kakartarum” tiarmiayi.

<sup>44</sup>Tura chíkich sáwartinchia nu péprunmaya ti untsurí aents Yus-Chicham antuktai tusar tuakarmiayi. <sup>45</sup>Tura Israer-shuarka ti untsurí áentsun tuakarun wáinkiar, suir iiniak, ti kajerarmiayi. Tuma asamtai Páprun katsekkar “Ju chichaana júka ántar tawai” tiarmiayi. <sup>46</sup>Támaitai Pápruka Pirnapíjiaí arantutsuk chichainiak tiarmiayi “Israer-aentstirmin, atumin emka Yus-Chicham ujaktiniuji. Túrasha átum támaitiatrum nakitramarme. Tura atumsha nakitia asarum, Yúsnum tuke iwiaaku pujuschamnia ajasurme, tímiayi. Tuma asamtai iikia yamaikia Israer-aencha ujaktai tusar weraji, tiarmiayi. <sup>47</sup>Nu túratarum tusa, Uunt Yus akuptamtsujik. Jes, ni Papiríin júna tawai:

“Israer-shuarcha Winia nekarawarat tusan anaitiukjame. Tura ashí nunkanmaya aents uwemprarat tusan akuptajme.”

Tu áarmaiti” tímiayi. <sup>48</sup>Nú chichaman antukar Israer-shuarcha ti wararsar “Uunt Yus tana nuka imiá péñkeraiti” tiarmiayi. Tura, tuke iwiaaku pujusmin armia nu Yus-shuar ajasarmiayi. <sup>49</sup>Tú tumakí Yus-Chicham nú nunkanam ashí jamarmiayi. <sup>50</sup>Túrasha nuwan, Yúsan péñker enentáimtuinian tura péñker wekainian, Israer-shuarka yajauch enentáimtikrarmiayi. Áishman penkerí ármia nunasha, yajauch enentáimtikrarmiayi. Túram Páprun Pirnapíncha katsekkar, chichaman irunturar najatawarmiai. Tú-turukiar ni nunkeya jiiñki awemarmiayi. <sup>51</sup>Túram Papru Pirnapíjiaí, ju aentska yajauchiiti tusar, wéenak naweyan nunkan akakekiar ikiukiarmiayi. Túrawar Ikiuniu péprunam wearmai. <sup>52</sup>Yusa Wakanísha pimiútkamu ásar Yus-shuarka ti warasarmiayi.

### Ikiuniu Péprunam túrunamia nu

**14** <sup>1</sup>Ikiuniu péprunam Papru Pirnapíjiaí jeawar Israer-shuar iruntai jeanam wayawarmiayi. Túrunawar Yus-Chichaman etserkarmiayi. Túram ti untsurí Israer-shuar ármia nu, Israer-shuarcha ármia nusha Yúsan umirkarmiayi. <sup>2</sup>Tura chíkich Israer-shuar, Yúsan umirkacharu ármia nu, Yus-shuaran kajerkarat tusar Israer-shuarchan yajauch enentáimtikrarmiayi. <sup>3</sup>Tuma asamtai Papru Pirnapíjiaí nú nunkanam ti nukap tsawant pujusarmiayi. Tura Uunt Yúsan enentáimtuinia ásar, arantutsuk Yusa waitnenkratairín etserkarmiayi. Tura, etserinia nu winia kakarmarjainti tusa, Yuska aents túrachminian

najanmamtikiawarmiayi. <sup>4</sup>Tura Ikiuniunmayá aentska jímiar kanakarmiayi. Chíkichkia Israer-shuar tuinia nu nekasaiti, tiarmiayi. <sup>5</sup>Tura nuyá Israer-shuarchajái Israer-shuarka chichasar pepru uuntrijíai chichasarmiayi. Tura Papru Pirnapíjiaí katsekkar tura kayajái tukurar, yajauch awajsatniun nan\_kamawarmiayi. <sup>6</sup>Túrasha Papru Pirnapíjiaí nuna anturmamkar, Ristra péprunam wearmiayi. Nuyasha Tirpi péprunam wearmiayi. Nu péprusha mai Rikiaunia nun\_kanam pujuiniawai. <sup>7</sup>Tura Yus-Chichaman etserkarmiayi.

### Ristra péprunam Páprun kayajái tukurarmiania nu

<sup>8</sup>Ristra péprunam tunamaru áishman pujumiayi. Ni akiiniamuriya tuke wekaichauyayi. <sup>9</sup>Nú áishman Papru chichaamun antúu pujumiayi. Túman Papru úmamkemas nin ísmiayi. Niisha, Yusa kakarmarijiaí tsuamartatjai, tu enentáimiun Papru nekaamiayi. <sup>10</sup>Tura Pápruka kakantar chicharuk “Wajakim wewe ajasam wajasta” tímiayi. Tutai áishman wiut kutsuar wajakí wekaimiayi. <sup>11</sup>Papru túramia nuna aents wáinkiar Rikiaunia chichamjai untsumainiak “Yuska áishmanka áanin ajasaru in tarutramarji” tiarmiayi.

<sup>12</sup>Pirnapínkia, Júpitir náartin yúsaiti, tiarmiayi. Tura Páprunka, Mirkiuriu náartin yúsaiti, tiarmiayi. Pápruka chichau asamtai tu anaikiarmiayi. <sup>13</sup>Nú pepru jeamunam Júpitir náartin yusa jeen pujumiayi. Tura Júpitir náartin yusa pátriri kukujin iwiarkamun, wáakajái itiamiayi. Tura niisha ni áentsrijiaí wáakan maatai tusar pujuarmiayi. Tura tikishmatrar ajamsatai, tiarmiayi. <sup>14</sup>Tura Jesusa akatramurí Pirnapísha Páprusha nuna nekaawar, auka nakítiaji tusar, ni pushirín jaararmiayi. Túrawar aents írunmanum pachiniawarmiayi. <sup>15</sup>Tura tiarmiayi “Shuara, ¿urukamtaí áitkiarum? Iisha yúschaitji. Atumea áankiitji, tiarmiayi. Penké ántrarum túrarmena nu ikiukrum, nekas Yus nemarsatarum tusar iisha taji. Nekas Yuska nayaimpincha, nun\_kancha, nayaantsancha, tura ashí nuí írunna nunasha najanaiti, tiarmiayi. <sup>16</sup>Jes, aents ni enentáimmarijiaín wekasarat tusa Yuska yaunchu tsankatkamiayi. <sup>17</sup>Tuma ain shuaran pénker awajsamujai Wiitjai Nekas Yus tusa paant awajmamsamiayi. Kame yumi yutuktinian nayaimpinmayá akupturmaji. Tura ejemamar warasarmí tusa yurumak nerektinniasha súramji” tímiayi.

<sup>18</sup>Túrasha Pápruka tímianu támaiat, nuna anturtsuk wáakan maawar nin tikishmatrar ajamsataitsa wakeriarma nuna suritkiachminiak suritkiarmiayi nu áentsun.

<sup>19</sup>Tura nuyá Antiukíanmayá Ikiuniunmayasha Israer-shuar táarmiayi. Taar nuyá áentsun Páprun yajauch awajsatniun enentáimtikrarmiayi. Tú tutai Páprun kayajái tukurarmiayi. Tura jakayi tiar péprunmayá



japiki júkiar arant áepsarmiayi. <sup>20</sup>Túrasha Yus-shuar Páprun tariar téntakarmiayi. Túram nuñkia Papru wajaki wé ataksha péprunam wayamiayi. Tura kashin tsawarar Papru Pirnapíjiaí Tirpi péprunam wearmiayi.

<sup>21</sup>Tírpiniun pujusar uwempratin chichaman etserkarmatai untsuri shuar Yúsan umirkarmiayi. Nú shuaran Yus-Chichaman jintintia amuukar Rístranam, Ikiuniunam, Antiukíanmasha waketkiarmiayi. <sup>22</sup>Waketainiak “ashí Yus tana nu tímiatrusumek tuke umirkatarum” tuñiak Yus-shuaran ikiakármayi. Tura nin tiarmiayi, “Yusa akupeamuriñ pachiiñkiataj tákurkia ti wáitsatniuitji.” <sup>23</sup>Tura Yus-shuar írunmanum Yus-shuaran wáinniun anaikiarmiayi. Yurumtsuk Yúsan áusjar chicharainiak, “umirkarumna nú Yus iirmasarti” tiar ikiukiarmiayi.

#### Yaunchu jíinkiarmia nú Antiukíanam waketkiarmiayi

<sup>24</sup>Nuyá Pisitia nuñkanam nankaamakiar Pampiria nuñkanam jeawarmiayi. <sup>25</sup>Nui jeawar Pirji péprunam Yus-Chichaman etserkar nuyá Ataria péprunam wearmiayi. <sup>26</sup>Nui kanunam enkemprar, yaunchu jíinkiarmia nú Antiukía péprunam waketkiarmiayi. Páprusha Pirnapísha tuke jíintsajñ nú Antiukíanmaya Yus-shuar chichainiak, Yusa takatři túrattarmena nuna Yus waitnentramak yáinmakarti, tiar akupkarmiayi nuik<sup>1</sup>. <sup>27</sup>Nú Antiukíanam jeawar, Yus-shuaran irurar, ashí Yus nin yáinkiarmia nuna ujakarmiayi. Tura nútiksajñ Israer-shuarchan Uunt Yus uwemtikrataj tusa untsukmia nunasha ujakarmiayi. <sup>28</sup>Tura nuyá Yus-shuarjají Papru Pirnapíjiaí núkap tsawant pujusarmiayi.

#### Jerusaréñnum Yus-shuara úntrijiaí iruntrarmiania nu

**15** <sup>1</sup>Nu tsawantin áishmanñ Israer nuñkanmaya wear, Antiukíanam jeawar Yus-shuaran jintintiainiak “Muisais tímia nútiksarmek tsupirnaktin ana nu túrachkurmeke uwemprashtatrumé” tiarmiayi. <sup>2</sup>Tuma asantai Papru Pirnapíjiaí, núchaiti tusar, nú áishmanjají ti kakaram chicharnaikiarmiayi. Túrasha nuu enentáiniak enentáimsatniun tujinkiarmiayi. Tuma asantai Antiukíanmaya Yus-shuar Páprun Pirnapíncha, atumsha chíkich áentsjají Jerusaréñnum wétarum tusar akupkarmiayi. “Tura nuí Jesusa akatramurísha Yus-shuaran wáinniusha iniasrum itieurmainkit tusarum péñker nekaatarum” tiarmiayi. <sup>3</sup>Papru Pirnapísha akupkamu ásar wéenak Pinisia nuñkanam, Samaria nuñkanmasha nankaamainiak Israer-shuarcha Yus-shuar ajasman Yus-shuaran ujakarmiayi. Tura Yus-shuarsha nuna antukar ti warasarmiayi.

<sup>4</sup>Tura Páprusha Pirnapísha Jerusaréñnum jeawarmatai Jesusa akatramurísha Yus-shuara wáinniurísha tura penké Yus-shuarsha itiwarmiayi. Tura niisha túrunamia nuna mash etserkarmiayi. <sup>5</sup>Túrasha Pariséu aencha, Yus-shuar ajasarmiania nu, wajakiar chichainiak

“Muisais tsupirnaktinian akupkamia nuna tura nú arant ashí Muisais tímia nunasha Israer-shuarchasha umirkatin ániawai” tiarmiayi. <sup>6</sup>Nuyasha Jesusa akatramurisha Yus-shuaran wáinniusha nu chichaman nekaatai tusar iruntrarmiayi. <sup>7</sup>Chichasua umikiarmatai Pítiur wajaki tímiayi, “Yatsurtiram, Yus nuik winia chichartak “Israer-shuarchasha winia chichamprun antukar umikiarat ujakarta” tu anaitiukmia nu nékarme. <sup>8</sup>Tura Yus Niñki ashí aentsu enentáin neka asa, Wíi shuar ajasmin ániawai tusa, ni Wakanin Israer-shuarchancha susamiayi, in suramsamij nútiksā. <sup>9</sup>Yus incha aushatka awajtamsachmaji, tímiayi. Antsu métekraketji. Tuma asamtai niisha Yúsan enentáimtuiniakui, Yuska enentáiyān ni tunaarīn japirarmāi, tímiayi. <sup>10-11</sup>Tura iikia nékaji niya áantsarik Jesukrístu waitnenkartutairijīai uwempraitji. Nuñkia ħurukamtia Yus uwempraru ániawai taisha, átum Muisais yaunchu akupkamia nu umikiarat tusarum wakerarum? Nu túrakrumka Yus túrana nu jeatsui tarume. Tura nuka kaarka áintsanchakait. Warí, ii úuntriŕsha tura iisha ashí Muisais tímia nu umiktin tujinkiamji. Tuma asamtai, ħurukamtai nú káarkasha Israer-shuarchasha áentskatin wakerarum?” tímiayi Pítiur.

<sup>12</sup>Pítiur nuna tutai Pirnapísha Páprusha chichainiak, “Israer-shuarchasha ni kakarmarīn nekaawarat tusa aentsti túrachminian túratniun Yuska ti yáinmakmaji” tú ujuam mitiat wáinkiar antúu pujuarmiayi. <sup>13</sup>Nuna ujasua amikmatai, Jakupusha tímiayi “Yatsurú, antuktarum. <sup>14</sup>Nuik túrachman Yus túramia nuna ii yachi Semuñ Pítiur ujatmakji. Júiti: Yuska Israer-shuarcha waitnentak Winia ajasarat tusa chikishtarchiniak achikiuiti” tímiayi. <sup>15</sup>Jusha Yúsnan etserin yaunchu áarmia nu tímiatrusān túrunayi. Júiti aarma:

<sup>16</sup>“Israer-aents meserar, jeā sāanakniua áintsān ániawai. Tura ukunam ataksha tana, Tawitia jeēn sāanaki ana nuna, ataksha najanattajai. Juakai nuna achikian ataksha awajrattajai. <sup>17</sup>Ashí nunkanmaya aents, Israer-shuarcha ainia nu, winia náarun pachinia nu, Winia eātkarat tusan túrattajai. <sup>18</sup>Uunt Yus nuna yaunchu ujakmiayi.”

Tu áarmaiti’ tímiayi.

<sup>19</sup>“Tuma asamtai, yatsurtiram, wi tájarme: Israer-shuarcha Yus-shuar ajasaru ániana nu, imiatik awajsachmi. <sup>20-21</sup>Iimiatarum, ashí péprunam Israer-shuar iruntainiam yáunchuyān tuke sáwartin Muisaisa áarmarīn jintintiainiatsuk. Tuma asamtai, áyatik áatratai ju “Ántar-yus susamu ana nu iniaisatarum. Ántar-yusan susamu asamtai yajauchiiti. Tura tsanirmawairap. Tura kajemtikramua nu yuawairap. Tura numpasha umairap.” Tu áatratai’ tímiayi Jakupu.

<sup>22</sup>Nuyá Jesusa akatramurisha Yus-shuaran wáinniusha nuyá ashí Yus-shuaraim enentáimsarmiayi. “Papru Pirnapíjīai wéakui, shuar niijīai

nenakar Antiukíanam akupkatai” tiarmiayi. Tuma ásar Jútas Parsapasan, Sérasnasha anaikiarmiayi. Niisha mai uunt Yus-shuar áirmiayi. <sup>23</sup>Tura niijiaí ju papin áarman akupkarmiayi:

“Iisha Jesusa akatramuri tura Yus-shuara wainniuri tura ashí Yus-shuaraitjinia nu, atumin Israer-shuarcha árumna nu, Antiukíanam, Sírianam, tura Sirisianmasha, ju papí akupeaji. <sup>24</sup>Juyá aents ii chichamejainchu atumiin jeartamarai. Túrawar, tsupirnaktin ana nu, tura ashí Muisais akupkamia nu túratarum, turammiarne. Nunasha ni chichamejain turamarmayi. Nu chicham atumsha antukrum nushá enentáimprarum “entá nuyanka itieurkatjik” tárume. <sup>25</sup>Tuma asamtai nu nekaar, iisha métekrak enentáimsar, jimiará áishman akupkatin anaikiamji. Ju áishman ii aneamu yachi Páprujai Pirnapíjiaísha atumin írmasarat tusar akupeaji. <sup>26</sup>Papru tura Pirnapísha ii Uuntri Jesukrístunam surumakarmiayi, ni takatrisha tsuumai ain túrami tusar. <sup>27</sup>Niijiaí Jútassha tura Sérassha akupeaji. Ii chichaajnia nuna niisha ni wenejai atumin ujatmakartatui. <sup>28-29</sup>Kame túratin asamtai iisha Yusa Wakanjiaí ju áartin enentáimsaji. Naman ántar-yus susamu ana nu yuawairap. Tura numpasha umarairap. Kajemtikramu ana nusha yuawairap. Tura penké tsanirmawairap. Nuyasha chíkichkia nú nankaamas tíhattaji. Tura antsu nu iniaisarmeka, penker áatrume. Ayu, Yus wáitmakarti.” Tu áarman akupkarmiayi.

<sup>30</sup>Tura Antiukíanam akupkam wearmiayi. Nui jewar Yus-shuaran irurar, papin súsarmiayi. <sup>31</sup>Tura Antiukíanmaya Yus-shuarsha nu papin áujsar, penker jintíamu chichaman áarman wáinkiar, ti shiir enentáimsarmiayi. <sup>32</sup>Tura Jútassha, Sérassha, ímia niisha Yus-Chichaman etserin ásar, Yus-Chichaman núkap jintintiawar, Yus-shuaran ikiakáarmiayi. <sup>33</sup>Tura nui ishichik tsawant pujusarmatai, Yus-shuarka, penker waketkitiarum, tiar akupkarmiayi. <sup>34</sup>Tura Séras juáktinian wakerukmiayi. <sup>35</sup>Páprusha Pirnapíjiaí juakarmiayi Antiukíanam. Niisha chíkich aentsjai Yus-Chichaman étseruk pujuarmiayi.

#### **Papru atak Yus-Chichaman ipiampártasa wémiania nu**

<sup>36</sup>Nuyá ukunam Papru tímiayi Pirnapín “Ashí péprunam iisha Yus-Chicham etserkamaj nui Yusai ii yachi ainia nusha urukák pujuinia iyutai” tímiayi.

<sup>37</sup>Pirnapíkia Juan Márkusán iijiaí winiti tusa wakerimiayi. <sup>38</sup>Tura Pampiria nunkanam Juan Márkussha niisháa weu asamtai tura Yusa takatrin iniaisa asamtai, Pápruka ayatniun nakitramiayi. <sup>39</sup>Papru Pirnapíjiaí ti kakannairar kanakarmiayi. Tura Pirnapíkia Márkusán ayaki Chípriniam wémiayi. <sup>40</sup>Pápruka Sérasan ayaki wéakui Yús-shuar Yus

yáinmakarti tinia akupkarmiayi. <sup>41</sup>Tura Siria nun<sub>kan</sub>maani wekaráktak, Yus-shuaran ikiakárkutak Sirisianam jeamiayi.

### Páprusha Sérasjají Timiutéun júkiarmiania nu

**16** <sup>1</sup>Papru Sérasjají Tirpi pepru írkutak Ristra péprunam jeawarmiayi. Tura nuí Rístranam Yus-shuaran wáinkarmiayi, ni naari Timiutéu. Ni nukurínkia Israer-shuar Yus-shuarauyayi. Tura ni aparínkia Kriaku áentsuyayi. <sup>2</sup>Tura Ristra péprunmaya Ikiuniu péprunmayasha Yus-shuar ármia nu, Timiutéu pé<sub>nker</sub> wekaawai, tiarmiayi. <sup>3</sup>Kame Pápruka Timiutéun uyuuntusat tusa wakera asa, Timiutéu aparí Kriaku-apachin nekaawarmatai Israer-shuar nuí pujuarmia nu yajauch enentáimpraraí<sub>n</sub> tusa tsupirmantikiamiayi. <sup>4</sup>Tura nuyá Papru Timiutéujají ashí péprunam nuí sétur nuí sétur wéenak Jesusa akatramurísha Yus-shuaran wáinniusha Jerusaré<sub>n</sub>num nuik jintintian umiktarum tusa ujarkutak wearmiayi. <sup>5</sup>Tu ujamu ásar Yus-shuar nú arant Yúsán enentáimturar kakararmiayi. Tura ashí tsawant kawen<sub>ki</sub> wearmiayi.

### Papru iimiarmia nu

<sup>6</sup>Tura Yusa Wakaní<sub>ki</sub> Páprun Yus-Chichaman Asia nun<sub>kan</sub>am ujaktinian tsan<sub>katk</sub>achmiayi. Tuma asamtai Pirijia nun<sub>kan</sub>am tura Karasea nun<sub>kan</sub>am aír<sub>ku</sub>tak, <sup>7</sup>Misia nun<sub>ka</sub> jeatniunam jeawarmiayi. Túrunawar “Pitinia nun<sub>kan</sub>am wetai” tiarmiayi. Túrusha Yusa Wakaní nuísha wétinian suritkiarmiayi. <sup>8</sup>Tuma asamtai Misia nun<sub>kan</sub>am menantki Truas péprunam pachiniawarmiayi. <sup>9</sup>Nu<sub>i</sub> jeawar Papru kashi iimiarmiayi. Masetúnia nun<sub>kan</sub>maya áishman<sub>kan</sub> wajan wáinmiayi. Nu áishman<sub>kan</sub> Páprun chicharuk “Winitritia. Yáin<sub>tk</sub>iamnium” tímiayi. <sup>10</sup>Nuyán<sub>ka</sub> tu iimiarmatai, wisha Páprujají wetai tusar iwiarnarmiaji. Tura Yus incha nú nun<sub>kan</sub>am ni chichame<sub>kan</sub> etserkat tusa ti nekas untsurmakrin wéaji, tímiaji.

### Jiripius Péprunam túrunamia nu

<sup>11</sup>Tura nuyán<sub>ka</sub> kanunam en<sub>kan</sub>emprar Truas péprunmaya jíinkir Samutrásia nun<sub>kan</sub>am jeamiaji. Tura kashin tsawar nuyán<sub>ka</sub> katjarar Niápuris péprunam jeamiaji. <sup>12</sup>Tura Niápurisnumiá náwek Jiripiusnum jeamiaji. Nuí Jiripius péprunmanka Rúmanmaya aents matsamsa ármiai. Tura nú péprusha Masetúnia nun<sub>kan</sub>am nekas uunt pepruyayi. Tura nuísha seturmaji. <sup>13</sup>Nuyá sáwartin tsawarmatai pepru ikiukir entsá supichik wémiai. Yus áujsatniun iruntrarmia nuí pujusar, nuwá iruntrarmia nu Yus-Chicham ujakarmiaji. <sup>14</sup>Nu<sub>i</sub> Tiatira péprunmaya nuwá, ni naari Ritia wáinkiamiaji. Niisha tarach yamakain pé<sub>nker</sub>an súriniuyayi. Yúsnasha shiir awajniuyayi. Yus-Chichaman Papru

etserkamia nuna niisha péñker anturkamiayi. Túman, Uunt Yus Papru chichaamun umirkat tusa ni enentáin takasmiayi. <sup>15</sup>Túruna nú nuwá níniurijjaj imianmiayi. Tura nuyasha chichaak “Yus-shuar nekas ajasai túrutkurmeka winia jearuj winitiarum” tímiayi. Tura nuj jeawakrin setumtikrampramijai.

<sup>16</sup>Tura nuyá ukunam Yus aujsatai tusar wekaamar nuwäch nekaamin-  
iwianch enkentuamu inkiunmakmiayi. Nu nuwächikia misatkauyayi. Niisha nékamkui nérenniurisha ti kuitriniawarmiayi. <sup>17</sup>Tura nú nuwäch incha Pápruncha pataaturmamijai. Tura kakantar untsumuk “Ju áishmansha nekas Uunt Yúsan umirkaru áiniawai. Tuma asa niisha atumin uwempratin chichaman ujatmarme” tímiayi. <sup>18</sup>Tura nú nuwächisha ti núkap tsawant tu wekaimiayi. Titmakui, Papru ayanmar iwianchin chicharuk “Jesukristu naarijjaj tájame: jíinkitiá ni enentáiya” tímiayi. Tutai íwianchkia nú chichamaik jíinkimiayi.

<sup>19</sup>Tura nuwächí nérenniurisha, íwianch jíiki awematniun nekaawar, Páprun Sérasnasha kajerak achikiar pepru uuntri físarat tusar ajapén júkiarmiayi. <sup>20</sup>Tura pepru úuntriin ejeniar tiarmiayi “Ju áishman Israer-shuar áiniawai. Tura in páchim enentáimtikramainijai. <sup>21</sup>Tura iisha Rúmanmayá aents árin, ii túrachminian, iikia asumprachman jíintintramainijai” tiarmiayi. <sup>22</sup>Tura nuyanka ashí aents Páprun Sérasnasha kajerkararmiayi. Túramtai pepru uuntri chichainiak “Pushiri áitkiarum numijjaj asutiátarum” tiarmiayi. <sup>23</sup>Tura nuyá ti asutsua amikiar sepunam enkeawarmiayi. Tura sepú-iinian chicharuk “Ti péñker iistá pisararain” tiarmiayi. <sup>24</sup>Nu chichaman antuk, sepú-iin ti inít awayámiayi, tura nawen numi najanamujaj tee chanuntamiayi. Tú tura ikiukmiayi. <sup>25</sup>Tura kashi ajapén Papru Sérasjaj Yusan áujainiak kantampriarmiayi. Tura chíkich enkeamusha nuna antúu pujuarmiayi. <sup>26</sup>Tu pujuiniáj aya aneachma ti kakantar uurkamiayi. Tura sepusha muchitramiayi. Túrunamtai sepú wáitirisha ashí urantrarmiayi. Tura aents jirujaj enkekar jíinkiamusha mash atiniakarmiayi. <sup>27</sup>Túrunamtai sepú-iin shintiarmiayi. Tura wáitisha mash uranar aan wáiniak, enkeamusha jíiniar shiákchariash tusa ni puniariniak ukuiniak máamattsa pujumiayi. <sup>28</sup>Tura Papru untsuak “Amek yajauch awajmamsaip. Ashí pujuiniaji” tímiayi.

<sup>29</sup>Tutai sepú-iincha jinia ekeemak tsékenki wayamiayi. Tura Papru Sérasjaj pujamunam kuranki jearmiayi. <sup>30</sup>Tura aa jíiki aniasmiayi “Uunta, ¿warí ititurkattaj uwemprataj tusana?” tímiayi. <sup>31</sup>Tutai niisha tiarmiayi “Uunt Jesukristu nekas enentáimtustá. Túrakmeka amesha, tura áminiurmesha uwemprattarme” tiarmiayi. <sup>32</sup>Tura nuyá ashí ni jéen pujuarmia nunasha Yus-Chichaman ujakarmiayi. <sup>33</sup>Tura tsawant irankaj sepú-iincha Páprun Sérasjaj numpamnamurin nijiararmiayi. Túramtai nuyasha sepú-iincha nuarijjaj uchirijjaj imianiararmiayi. <sup>34</sup>Túramtai

nuyasha ni jeen júkiarmiayi. Tura nuisha ayurawarmiayi. Tura sepú-iincha niiniurjijai Yus-shuar ajasu ásar ti shiir warasarmiayi.

<sup>35</sup>Kashin tsawar pepru uuntrí, Páprun Sérasjai akupkata tusar suntaran sepú-iinian akuptukarmiayi. <sup>36</sup>Tura nuyanka sepú-iin Páprun tímiayi “Yamaikia pepru uuntrí chichaman akupturmakai, átum wétinian. Tuma asantai yamaikia péñkerak jíinkitiarum” tímiayi. <sup>37</sup>Túrasha Papru suntaran chicharuk tímiayi “Warí, iisha Ruma aents árinin, niisha chichaman iwiartsuk ashí shuar íimiainiain asutiámamji. Túrawar sepunam enketmamji. Tura zurukantai yamaikia uu\_k akuptamkataj tusa wakeruinia? Atsá. Antsu uuntcha nin\_ki taar jíirmaktiai” tímiayi.

<sup>38</sup>Tutai suntarsha waketkiar nuna ujakarmiayi pepru úntrin. Tutai niisha ti ashamkarmiayi Ruma aentsun nekaawar. <sup>39</sup>Túmak ashamainiak Páprun Sérasan weriarmiayi tsankurturtarum titiai tusar. Nuyasha sepunmayá jíikiar “Yamaikia wáitneasrum wetarum” tiarmiayi. <sup>40</sup>Papru Sérasjai nuyá jíinkiar Ritia jeen wearmiayi. Tura Yus-shuaran ikiakárar ikiukiarmiayi.

#### Tisarúnikianam charaatum ajarmia nu

**17** <sup>1</sup>Papru Sérassha wéenak Ampipuris péprunam Apurunia péprunmasha nankaamakutak Tisarúnikia péprunam jeawarmiayi. Nuí Israer-shuara iruntai jee ámiayi. <sup>2</sup>Tura Pápruka nuna tuke túrin asa nu jeenam wémiayi. Tura nuisha menaintiu sáwartin Yus-Chichaman paant etsermiayi. <sup>3</sup>Tura Páprusha Yus-Chicham tana tímiatrusan jintintiarmiayi. Tura Krístusha wáitias jákatniuyi, tura nuyasha jakayat nantaktiniuyi, tímiayi. Tura nuyasha chicharuk “Wi Jesusnan atumin ujaajrumna nusha Yusa anaikiamurin Kristu tútain tájarne” tímiayi Papru.

<sup>4</sup>Nuna takui Israer-aents chikishtarchik umikiarmiayi. Túrawar Paprujai Sérasjaisha tsaninkiarmiayi. Tura Kriaku aencha ti untsurí Yúsan umirkarmiayi. Tura nuwá penkeri armia nusha nútiksaran umikiarmiayi. <sup>5</sup>Tura Israer-shuarka Yus-shuar ajascharmia nu, Páprun Sérasnasha suiir íisarmiayi. Túrawar chíkich yajauch áishman naki yujáu armia nujai chichasar nu peprunam charáa charáa ajarmiai. Tura Páprun Sérasnasha achikiar aentsu úntrin suruktai tusar Jasunka jeen árenkarmiayi. <sup>6</sup>Túrasha Páprun Sérasnasha awetrar, Jasunkan tura chíkich Yus-shuarnasha achikiar japirkutak júkiarmiayi. Tura pepru úntrin juíniak tiarmiayi “Ju áishmansha ashí nunkanam charaatum ajá wekarmia nu yamaikia tímiajai tarutramarji. <sup>7</sup>Tura ju Jasun ni jeen itiaarmiayi. Tura niisha ashí mash Rúmanmayá uunt akupniu chichamen nakitiainiawai, tiarmiayi. Tura jes, chíkich akupin awai, tuiniawai. Niisha Jesusaiti, turamainiaji” tiarmiayi. <sup>8</sup>Nu chichaman antukar, aents nuí pujuarmia nu, úntrimiak charaatum ajarmiai. <sup>9</sup>Tura Jasun chíkich

Yus-shuarjaj̄ Papru nekas awemattaji tusar, pajj, kuit ikiauji, tiarmiayi. Nuna takui pepru uuntrī nin akupkarmiayi.

### Piríanam

<sup>10</sup>Nuñkia nú kashi Yus-shuar Páprun Sérasnasha Piría péprunam akupkarmiayi. Tura nū jeawar Israer-shuar iruntai jeanam wearmiayi. <sup>11</sup>Piríanmayā aentska Tisarúnikianmayā áentsjain̄kia nan̄kaamas pen̄ker enentáimkia ármiayi. Tuke enentáij̄j̄j̄ Yus-Chichaman ántiarmiayi. Túrawar tuke tsawant imia n̄nkisha Papru tana nuna nekasashit tusar Yusa papir̄in ii wearmiayi. <sup>12</sup>Tuma ásar untsur̄i shuar Yus-shuar ajasarmiayi. Tura Kriaku aents nuw̄a pen̄ker̄i armia nusha áishman̄sha umikiarmiayi. <sup>13</sup>Túrasha Tisarúnikianmayā Israer-shuarka Papru Yus-Chichaman Piría péprunam étsereun antukar nūj̄ weriar charaatum awajarmiayi. <sup>14</sup>Túmainiakui Yus-shuar Páprun árutsuk nayaantsanam akupkarmiayi. Tura Séraska Timiutéuj̄aj̄ nūñ Piríanam juakarmiayi. <sup>15</sup>Tura Páprun nemariarmia nu Atenas péprunam nin ejeyarmiayi. Tura niisha waketainiakui, Papru chichaman akatar akupkamiayi, Sérassha Timiutéusha wárik winiartí tusa.

### Atenasnum

<sup>16</sup>Tura Papru Atenas péprunam pujus Sérasnasha Timiutéuncha nákamiayi. Nūj̄ nú péprunam ántar-yus ti írunkui Páprusha kúntuts enentáimmiayi. <sup>17</sup>Tuma asa Israer-shuar iruntai jeanam Israer-shuarjaj̄ tura chíkich aents Yúsan enentáimtiarmia nuj̄aj̄ chichasmiayi. Tura tuke tsawant pepru ajapén aentsjaj̄ in̄kiunaikiar chichasarmiayi. <sup>18</sup>Nuyá chichaman jintin chíkich naari, ipikiuriu, armia nu, tura chikichcha, ni naari, estuikiu, armia nusha Páprun áujmatsarmiayi. Chikichcha tiarmiayi “Imiá chichamtincha jusha waritramtajik.” Tura chikichcha tiarmiayi “Yajayā yusnan etserniuchuashit.” Páprusha Jesusa túrunamur̄in tura aents jakamunmayā nantaktinian étsereki nuna tiarmiayi. <sup>19</sup>Nuyañka aents iruntainiam, naari Ariupaku támanum Páprun júkiarmiayi. Nūisha tuke irunin ármiayi. Nūj̄ Páprun aniasarmiayi “Iisha ame yamaram támena nu nekaatai tusar wakeraji, tiarmiayi. <sup>20</sup>Amesha nusháa chicham jintinaitme. Túmaitkiui ju chichamsha warintiuak tusar nekaatai tusar wakeraji” tiarmiayi.

<sup>21</sup>(Atenasnumiá aencha tura chíkich nuñkanmayā shuar nūj̄ pujuarmia nusha aya yamaram chicham amia nunak ántiarmiayi. Tura aya nunak áujmantiarmiayi.) <sup>22</sup>Nuyañka Papru Ariupakunam ajapén wajaki tímiayi “Atenasnumiá áishman̄tiram, wi nékajai, atumsha atumi yusr̄i ainia nuyá tsurakchamniaitrome, tímiayi. <sup>23</sup>Kame wi nuik atumí yusr̄i enentáimtutainiam íistaj tukaman nūj̄ jeachin iwiamun, JU NEKAACHMA YUSNAITI, tu áarman wáinkiamjai. Wátsek, ju Yus átum nékachiatrum tikishmatrumna nuna ujaktajrume’ tímiai.

<sup>24</sup>Nekaatarum, nu Uunt Yuska ashí nun̄kan tura nuí írunna nuna najanaiti. Tura Niisha nayaimpin nun̄kancha nérenniurinti. Tura aents najanamú jeānam nú Yuska pujuchuiti. <sup>25</sup>Niisha aents yáinkiat tusa atsumatsui. Warí, imia-nin̄ki Niisha ii iwiaakmarin, ii mayattairincha tura ashí írunna nunasha súramtsujik, tímiayi. <sup>26</sup>Nekaatarum. Nuu numpanmayanak ashí áentsun najanamiayi ashí nun̄kanam matsamsarat tusa. Tura Yuska ii tsawantrin nekapmaiti; ii pujustinniasha nútiksan̄ nakakmiayi. <sup>27</sup>Winia eátkar wáitkiarat tusa Yus nuna túrayi. Túrasa Yus jeashtaka pujurtamtsuji, tímiayi. <sup>28</sup>Jes, iisha Yusjaj̄ iwiaakji. Yusjaj̄ muchitaj̄i. Tura Yusjaj̄ ii kakarmari takakji. Nútiksan̄ atumí papí-aintrī tíchamka “Ashí incha Yus najatmaitji.” <sup>29</sup>Tura iisha Yus najatma asakrin kuri najanamusha, yúsaiti, tu enentáimsashtiniaitji, tímiayi. Tura kuit-yussha, kaya-yussha aents enentáimsar najanamuka, yúsaiti tu enentáimsashtiniaitji, tímiayi. <sup>30</sup>Aents Yúsan nékainiachuk túrawarmiania nuna Yuska yáunchuka pachischamiayi. Túrasa yamaikia Yus ashí aentsun chicharuk “Tunaaruminia enentáimpratarum” túramji, tímiayi. <sup>31</sup>Yuska áishman̄kan anaikiaiti. Nú áishman̄ ashí aentsti, yáki péñkeran túriniait, yáki yaj̄auchin túriniait núnaka nekarmattaji. Nú áishman̄ Yus akupkamun tuke enentáimtakui Yus nin anaikiaiti. Tura tsawant nú túrunatin átatna nuna Yus Nin̄ki achikiuiti. Túrasa nekas anaikajai tusa, tura ashí áentstiram nekaatarum tusa nú áishman̄kan jakamunmaya iniantkimiayi” tímiayi Papru. <sup>32</sup>Tura nuna jakamunmaya nantaktinian áujmatun antukar chikichcha wishikiarmiayi. Tura chíkich “Yamaikia máakete. Antsu chíkich tsawantin antukmí” tiarmiayi. <sup>33</sup>Tutai Papru iniaisamiayi. <sup>34</sup>Tura chíkich aentska Papru táman umikiar nin nemarsarmiayi. Nuisha Tiuníseu páchitkiauyayi. Niisha Ariupaku áentsuyayi. Tura nuyasha nuw̄a, ni naari Támaris, tura chíkich aencha nútiksaran̄ nemariarmiayi Páprun.

### Kurintiu péprunam

**18** <sup>1</sup>Nuyanka Papru Atenas péprun ikiuki Kurintiu péprunam wémiayi. <sup>2</sup>Tura nuí Israer-shuaran ni naari Akiran wáinkiamiayi. Akiraka Puntu nun̄kanam akiiniauyayi. Tura ukunam Itiaria nun̄kanam pujaj̄i uunt akupin Krautiu ashí Israer-shuaran Ruma péprunmaya awemarmiayi. Rúmaka Itiaria nun̄kanmaiti. Nuí awemamu ásar Akira Kurintiunam nuik támiayi nuw̄e Pirisírajaj̄i. Tura Pápruka Akiran chichastaj tusa werimiayi. <sup>3</sup>Akirasha Páprusha mai juna takau ármiayi, tarach ti núparman jeā najantain najanin ármiayi. Tuma asamtai Papru Akiraj̄i seturmiayi nu takat túrawartai tusa. <sup>4</sup>Tura tuke sáwartin Papru Israer-shuar iruntai jeān wéuyayi. Nuisha Israer-aentsun Kriaku-aentsnasha nútiksaran̄ Yus-Chichaman ujakar enentáimtikrarmiayi. <sup>5</sup>Tura nuyá Séras Timiutéujaj̄i Masetúnianmaya táarmatai Pápruka mijiatrutsuk Yus-Chichaman étseruk “Yusa anaikiamurī Kristu, atum nákarmenta nu Jesusaiti” tímiayi. <sup>6</sup>Tura támaitiat nú chichaman



nakitiarmiayi. Túmainiak Páprun katsekkarmiayi. Tuma asamtai Papru, nuñkia ikuijume tusa, ni pushirín pear tímiayi “Atumek makuumarme. Tura wikia Yusaj makuumatsjai. Yamaikia Israer-shuarcha ainia nuna Yus-Chichaman ujakartaj tusan werajai” tímiayi.

<sup>7</sup>Tura nuyanka Israer-shuar iruntai jeanmaya jinki, Yúsan enentáimtin áishman Justu jeen wémiayi. Ni jeenka Israer-shuara iruntai jeen ayamach pujumiayi. <sup>8</sup>Israer-shuar iruntai jea chicharniuri, Krispu, Uunt Jesusan nekas enentáimturmiayi. Túruna nuarijiaí uchirijiaísha Yúsan umirkamiayi. Tura chíkich aencha Kurintiumaya armia nu nútiksaran Yus-Chichaman antukar, Jesusan enentáimtusar imianiarmiayi.

<sup>9-10</sup>Nuyá Uunt Yus Páprun mesekran ipiatkamiayi. Chicharuk “Penké ímiatik awajtamsachartatui Wi ámijiaí pujakui. Ju péprunmasha untsurí aents Winia ajasartin írunui. Tuma asamtai ashamtsuk winia chichamur tuke etserkata” tímiayi Yus.

<sup>11</sup>Tura nuí Kurintiu peprunam jimiará uwí ejesattuk Yus-Chichaman étseruk pujumiayi. <sup>12</sup>Tura Kariun, Akaya nunka akupniuri anaikiamu aí, Israer-aents Páprun kajerkarmiayi. Tura kajerainiak akupniunam irunturarmiayi. Túrawar Páprun júkiar ejeniarmiayi. <sup>13</sup>Tu túrawar akupniun chicharainiak “Ju áishman Yúsan umirkatniun Muisais akupkama núnaka íkias ausháa jintíawai” tiarmiayi. <sup>14</sup>Tura Páprusha chichastaj táunak, Kariunka Israer-shuaran tímiayi “Jusha nekas tunáa túrakuñkia, tura akupniun umirchakuñkia, tárumna nuna anturkaintjarme. <sup>15</sup>Túrasha aya chichamnak tura aya náariniak atumí uuntri akupkama nunak tau asamtai, atumek nuámtak fistarum tájarme. Wikia nu chichamnum pachinkiatniun nakitiajai” tímiayi. <sup>16</sup>Taku aa jíikmiayi. <sup>17</sup>Tura nuyanka Kriaku aents Israer-shuar iruntai jea úuntrin Sústinisian achikiar awatiarmiayi akupniusha ímmianuman. Túrasha akupin Kariunka túranak penké pachischamiayi.

### **Papru Antiukíanam waketki, nuyá atak Yus-Chichaman ipiampartasa wémiania nu**

<sup>18</sup>Tura ni jeen waketkiarmatai, Papru nu péprunam untsurí tsawant pujusmiayi. Tura nuyasha ukunam Yusaj yachi ármiania nuna áujas ikuiak Pirisírajai ni aishri Akirajai Senkrea péprunam wearmiayi. Nuí Israer-shuar túrutain umiak Papru ni intiashin awampramiayi, nuik Yúsan tímiaj nuna yamáí umíajai tusa. Nuñkia kanunam enkemprarmiayi Siria nunkanam waketkitiai tusar. <sup>19</sup>Tura nuyá Ipiisu péprunam jeawar Pápruka Pirisíran tura Akiran ikiukmiayi. Tura Israer-shuar iruntai jeanam wayá Israer-shuar irunar pujuarmia nujai chichasmiayi. <sup>20</sup>Tura niisha Páprun juin pujustá tusar seawarmiayi. Túrasha támaitiat, tujintiajai, tímiayi. <sup>21</sup>Nuyanka áujas ikuiak “Wisha Jerusarénum námper átatna nuna pachiiintiuktiníaitjai. Tura Yus

akuptakuin̄kia atak tatajai atumin íistaj tusan” tímiayi. Tura kanunam en̄kemar Ipsiunmayā jíinkimiayi.

<sup>22</sup>Nuyá Pápruka Sesaria péprunam jeá, nuyan̄ka Jerusaren̄num wémiayi, Yus-shuaran nuī áúsataj tusa. Tura nuyá Antiukíanam wémiayi.

<sup>23</sup>Tura Antiukíanam ishichik pujus ataksha weak Karasea nun̄kanam tura Pirijia nun̄kanmaani wekaráktak wémiayi. Tura weak Yus-shuar matsamarmia nuna chicharak ikiakáarmiayi.

<sup>24</sup>Tumáa pujaī Arijiántria péprunmayā Israer-aents Apurus Ipsiu péprunam jeamiayi. Niisha Yusa yaunchu papirin̄ ti péñker nekaamiayi. Etserkatniuncha ti nékauyayi. <sup>25</sup>Uunt Yus tímia nunasha unuimiátrauyayi. Tura tuke enentáijiaī chichasmiayi. Jesusa túramurin̄ péñker jintinniyuyayi. Túrasha aya Juan̄ imiakratmanak nekaamiayi. <sup>26</sup>Jū Apurus arantutsuk Israer-shuar iruntaī jeanam chichamiayi. Tura Pirisíra Akirajaī ni étserman anturkar, nincha akanki júkiar Yusa chichamen̄ ni nekaachmia nuna núkap jintintrarmiayi.

<sup>27</sup>Nuyá ukunam Apurus, Akaya nun̄kanam wétaj takui, Ipsiunmayā Yus-shuar yáin̄kiar papí áarar atakas akupkarmiayi. Nú áentsnum péñkerak jeat tusar túrawarmiayi. Tura Akayanam jeá, nú áentsun Yusa waitnenkratairijiaī uwempraru ármia nuna ti yáin̄kiarmiayi.

<sup>28</sup>Tura Apurus Israer-aentsjaī paant chichasmiayi. Túrasha Yusa Papirijiaī, Jesussha nekas Yusa anaikiamurintī tusa paant jintíak nincha nupetkamiayi.

### Papru Ipsiunam jeamiayi

**19** <sup>1</sup>Tura Apuruska Kurintiunam pujaī Pápruka náinniumaanī wekaráktak, Ipsiunam jeamiayi. Tura nuisha Yus-shuaran wáinkiamiayi. <sup>2</sup>Tura aniasmiayi “Atumsha Yus-shuar ajasmarmena nuī, ¿Yusa Wakaní̄ atumí enentáin̄ en̄kemturmakaitrum?”

Tutai niisha tiarmiayi “Atsá. Iikia nuka pen̄ke áyatkisha ántichuitji Yusa Wakaní̄ awai támaka” tiarmiayi.

<sup>3</sup>Tutai Papru aniasmiayi “Entá, ¿nuikia atumsha warí enentáimsarme imianmiarum?” tímiayi.

Tutai niisha tiarmiayi “Juan̄ jintintramamij nu iisha enentáimsar imianmijai” tiarmiayi.

<sup>4</sup>Tutai Papru tímiayi “Juan̄sha, tunaarminiā enentáimprarum imiantiarum, tíchamka. Nuyá tíchamka, winia ukurūj winittiana nu nekas enentáimtustarum. Niisha Jesus Yusa anaikiamurintī, tu ujatmakchamka” tímiayi Papru.

<sup>5</sup>Nuna antukar niisha Uunt Jesusa náarin̄ enentáimtusar ataksháa imianiarumiayi. <sup>6</sup>Tura Papru ni uwejejaī nin antiñmatai Yusa Wakaní̄ tarurarmiayi. Túram chíkich chichamjaī chichasarmiayi. Túrunawar Yus-Chichaman etseriarumiayi. <sup>7</sup>Nusha tuse (12) áishman̄ ármiai.

<sup>8</sup>Tura nuisha menaintiu nantutin Papru Israer-shuar iruntai jeanam werí Yusa akupeamurin pachis arantutsuk etsermiayi. Túrak nú áentsun ujaak Yúsnan nekasaiti tu enentáimtikrarmiayi. <sup>9</sup>Tura chíkichka ni enentáin ti ikiatsúáramiayi. Túrunawar umiktinian penké nakitiainia ásar aents ántamunam Yusa jintin penké yajauch chicharkarmiayi. Tuma asamtai Papru Yus-shuarnaka akanki yaruak Tiranu iskuirariin tuke tsawant Yus-Chichaman ujaarmiayi. <sup>10</sup>Nuna túruki jimiará uwí etserkamiayi. Túramu asamtai ashí Asia nunkanmaya aents Israer-shuar tura Israer-shuarcha Uunt Jesusa túramurin antukarmiayi. <sup>11</sup>Tura aentsti túrachminian túrat tusa Yuska ni kakarmarin Páprun susamiayi. <sup>12</sup>Jáanchniasha pushincha Papru antinman júkiar, nánkamas jaa shuaran etejim, nú jaa shuarsha nuna antinkiar péñker ajaarmiayi. Iwianchrukusha nuna antinkiar, íwianch jíinkimtai ankant ajaarmiayi.

<sup>13</sup>Tura chíkich Israer-aents uwishin ármiai. Tura niisha chíkich chíkich péprunam wear iwianchrukun iwianchrin jíirki akuptin ármiai. Tuma asa niisha Jesusa náaríjjai iwianchin jíiktiai tusar, iwianchin chichartuiniak “Nu Jesus Papru ujaana nuna náaríjjai jíinkitiarum tájarne” tiarmiayi. <sup>14</sup>Tura Israer Patri uuntri Esewia náartin, siati uchiri ármia nu, nuna túriarmiayi. <sup>15</sup>Túrasha Jesusa náaríjjai jíinkitia, tuiniakui, iwianchcha tímiayi “Jesusnaka nékajai. Tura Pápruncha nékajai. Tura atumsha, ¿yátsukaitrum?” tímiayi. <sup>16</sup>Nuna tinia iwianchruku áishman tsékenki nú áishmankan kakaram katsumak nupetkarmiayi. Túram ti katsumam niisha misú tura numpamnawar jíinkiar pisararmiayi. <sup>17</sup>Nusha Ipiisu péprunam túrunamiayi. Túrunamtai Ipiisu péprunmaya Israer-shuarsha tura Israer-shuarchasha nuna túrunamun nekaawar ti ashamkarmiayi. Tura Uunt Jesusa náarin shiir awajsarmiayi.

<sup>18</sup>Túmainiai untsurí shuar Yúsán umirkaru Yus-shuar ajatsuk tunáa túrawarmia nuna paant ujakarmiayi. <sup>19</sup>Tura untsurí uwishnumawarmia nu, wawekratai papí ármia nuna itiararmiayi. Itiar, júka iniaiyaji tusar, ashí íimiainiajn áesawarmiayi. Nú papí áesawarmia nuna kuítrisha senkuenta mir (50.000) nankaamasauyayi. <sup>20</sup>Tu túrunamtai Uunt Yusa chichame pampanki tura nupetmaki wémiayi.

<sup>21</sup>Tuma asamtai nuyasha Pápruka Masetúnia nunkanam Akaya nunkanmasha irautjai tu enentáimsamiayi. Tura nuyasha Jerusarénum waketitjai, tímiayi. Tura nuyá ukunam Ruma péprunmasha wetajai, tu enentáimsamiayi. <sup>22</sup>Masetúnia wétin asa Papru ni tsaniakmarin Masetúnia nunkanam emka akupkamiayi. Timiutéun Erastujai akupkarmiayi. Tura ninikia Asia nunkanam seturmiayi.

### **Ipisiunam ti charaatum ámiania nu**

<sup>23</sup>Pápruka tuke Ipiisiunam pujái, nuyá aents Yus-Chichaman nakitiainiak charaatum ajararmiayi. <sup>24</sup>Iis, nuí Ipiisiunam kaya-yusa jee

ámiaiyi. Nu yus núwauyayi, Tiana naartin. Tura áishman, Timitriu naartin, nú jean nakumak uchichin najanniuyayi kuitjai. Tura niisha nú takatjai ti kuítrintin ajasmiaiyi. Tura chíkich áishman nú takatan takarmia nunasha ti kuítrintin awajsarmiaiyi. <sup>25</sup>Timitriusha nijjiai takarmia nuna ikiaanak, chikichnasha nijjiai métek-taku takarmia nunasha ikiaanak nijjiai charaatum ajarmiaiyi. Timitriusha tímiayi “Winia írutramutiram antuktatum. Iisha ju takat takaajnia jujai ti kuit acháatsjik. <sup>26</sup>Tura atumsha ju Papru wáintrumna nu tura ántarmena nu chichaak “Ashí aents najanam yuska ántar ániawai” tatsuk. Nuna tau asa, ju Ipsiunam, tura arant ashí Asia nunkanam, ni yúsrin iniaisarat tusa enentáimtikrarai. Tuma asantai untsurí aents, ii yusrí Tiánan ikiuiniak, Papru tana nuna umirainiatsuk. <sup>27</sup>Papru tu étserkui, iisha iturchat pujuschattajik. Kuit ii achiaj nuka menkakashtatuak. Tura nú arantcha ii yusrí Tiana jeen shuar iniaisachartatuak. Tura nuyá Asia nunkanmayasha tura ashí nunkanmaya aencha, ii yusrí Tiana shiir awajainia nuna yapajáwar aun nakitrachartatuak” tímiayi Timitriu.

<sup>28</sup>Nuna antukar aencha ti kajekar charaatum ajarmiaiyi. Túmainiak “Ipsiu shuartikia, aya Tianak wakeraji” tu unsummiarmiaiyi.

<sup>29</sup>Nuinikia aents páchim enentáimprarmiaiyi. Túmainiak Masetúnianmaya Kayuncha Aristárkuncha Páprun nemanin ármia nuna achikiar japirkutak iruntai jeanam júkiarmiaiyi. <sup>30</sup>Tura Pápruka iruntai jeanam wayá chichastaj taun, nuyá Yus-shuar ármia nu, nuna suritkiarmiaiyi. <sup>31</sup>Tura Asia nunkanmaya uuntri, Páprun amikri ásar, ainikia wayawaiñ tusar chichaman akuptukarmiaiyi. <sup>32</sup>Túrasha irunar pujuarmia nu, páchim enentáimprar, chíkichka nusháa unsummiarmiaiyi. Tura chikichcha nútiksaran ausháa unsummiarmiaiyi. Tura chíkichka ti untsurí, nekaachar “wariniak irunturara” tiarmiaiyi. <sup>33</sup>Chíkich nuí wajarmia nu charaatum amia nuna Israer-shuaran Arejántrun jintintrar eem shitiawarmiaiyi. Arejántrusha Kayun tura Aristárkuncha ayampruktinian wakerak takamatsatarum tusa uwejen takuimiayi. <sup>34</sup>Túrasha aents iruntrarmia nu, júka Israer-shuaraiti tusa nekaawar, nú arant charaatum ajainiak “Ipsiu shuartikia aya Tianak wakeraji” ímia-imiatainiakua tí nukap pujursarmiaiyi.

<sup>35</sup>Ipsiu pepru papí-aintrisha áentsun itiatmamtik tímiayi “Ipsiu shuártiram antuktatum. Ii uunt yusrí Tiana jee íistinia íichukaitiaji. Tura ni nakumkamurisha nayaimpinmaya iniarmania nusha íischatniukaitiaji. Tura nunasha ashí aents paant nékainiatsuk, tímiayi. <sup>36</sup>Warí, núnaka ashí aents nékainia asantai atumsha itiatkatarum. Túrarum enentáimtsuk yajauch túrawairap, tímiayi. <sup>37</sup>Íimiatarum. Ju áishman átum itiarumna nu, ii yúsrin yajauch chicharkacharai. Tura ni jeen yajauch awajsacharai. <sup>38</sup>Wats, Timitriu tura nijjiai takainiana nu tunáa túramun ujaktai tusar wakeruiniakka pepru penkerin werishtinkiait. Nuinikia máimtek

iwiainiakartí. <sup>39</sup>Tura chíkich chicham ákuin<sub>nk</sub>ia pé<sub>nk</sub>er iruntrarum iwiaratarum. <sup>40</sup>Kame ju yamá túrunamun nekaawar Rúmanmayá kapitíán “Ti uunt kapitíán<sub>ri</sub> yajauch awajsatai tusarum túrachurmeash” turamchatjash. Warí, niisha “¿Urukamtai charaatum ajarum?” takuisha, áimkiatin pé<sub>nké</sub> tujinkiattaji” tímiayi. <sup>41</sup>Tura papí-aint nuna tuasua amik “Áukete. Wétarum” tímiayi.

### Papru Masetúnia nu<sub>nk</sub>anam Krisia nu<sub>nk</sub>anmasha wémiania nu

**20** <sup>1</sup>Charaatum ajasua amikiarmatai Papru Yus-shuaran untsuk Yusnan jintintrataj tusa ikiaankarmiayi. Tura áujas ikiuki Masetúnianam wémiayi. <sup>2</sup>Nú nu<sub>nk</sub>anam wekaráktak, Yus-shuaran jintintrar ikiakármiai. Tura nuyasha Krisia nu<sub>nk</sub>anam jeamiayi. <sup>3</sup>Nui menaintiu nántuk pujusmiayi. Tura nuyá<sub>nk</sub>a kanujá<sub>i</sub> Siria nu<sub>nk</sub>anam wétasa pujus Israer-shuar chícham jurusman anturmamak “antsu nu<sub>nk</sub>an Masetúnianmaan<sub>i</sub> wetajai” tímiayi. <sup>4</sup>Tura Piríanmayá áishman Súpater naartin Páprun atamprimiayi. Tura Tisarúnikianmayá Aristárkusha Sekuntusha Tírpinmayá Kayusha Timiutéusha Asianmayá Tíkikiusha, Trújimiusha ashí nu shuar Jiripius peprunam Páprun atampriarmiayi. <sup>5</sup>Túrawar niisha emki wear Trúas péprunam jeawarmiayi. <sup>6</sup>Tura iisha wakapruachu tanta yutai jisat amuukamtai, iisha Jiripius péprunmayá jí<sub>nk</sub>ir, kanunam é<sub>nk</sub>emprar Masetúnia nu<sub>nk</sub>anmayá jí<sub>nk</sub>imji. Tura se<sub>nk</sub>ku tsawant na<sub>nk</sub>kaamasmanum emki wearmia nu amaiya<sub>nk</sub>karmiaji Trúasnum. Tura nu<sub>nk</sub>sha siati tsawant pujusarmiaji.

### Trúas péprunam túrunamia nu

<sup>7</sup>Tura tumi<sub>nt</sub>in kíarai Jesukrístu enentáimtusar yurumáta<sub>i</sub> tusar iruntrarmiaji. Tura Papru Yus-shuaran jintintramiayi. Kame Pápruka kashinkia wétin asa chichaa-chichaakua kashi ajapé<sub>nk</sub> ejemiayi. <sup>8</sup>Tura yakí menaintiu pátaranam, tesaamu ámia nui iruntrarmiaji. Nu<sub>nk</sub>sha ji ekemarma untsur<sub>i</sub> irunmiayi. <sup>9</sup>Tura nu<sub>nk</sub>sha natsa Eutikiu, áa<sub>nk</sub>kamunam ayamas pujusmiayi. Tura Papru ti esaram chichaakui nu nátsasha kari pujumiayi. Tumáa pujus kanaki yakí pátanmayá akaiki iniaamiayi. Tura pé<sub>nké</sub> jakan jú<sub>s</sub>armiayi. <sup>10</sup>Tura Papru akaatuki tsuntsumprua miniakkamiayi. Tura Yus-shuaran chicharainiak “Ashamkairap. Ataksha iwiaakui” tímiayi. <sup>11</sup>Nuyá ataksha Papru wakamiayi. Tura tantan puukar yurumáwarmatai, tuke chichaa-chichaakua tsawantmarmiayi Papru. <sup>12</sup>Eutikiuncha iwiaakun ni je<sub>nk</sub>en jú<sub>k</sub>iarmiayi. Tura ashí aents shiir enentáimsarmiayi.

### Miritiunam wearmiayi

<sup>13</sup>Wats, Papru Asun péprunam nu<sub>nk</sub>an we jeatajtsa wakerimiayi. Tura incha, átumka kanunam wétarum, turamkurin, iikia emkir

wémaji Asunnum. <sup>14</sup>Nuĭ Asunnum inkiunaikiar, Páprusha kanunam enkemprantai, Mitiríniniam jeamji. <sup>15</sup>Tura nuyá jíinkir, kashin tsawarar Sámus péprunam jeamji. Tura nuyanka Trujiriunam jear ayampramji. Nuyasha kashin tsawarar Miritiunam jeamji. <sup>16</sup>Pápruka Jerusarénum wari wétajtsa wakerimiayi, pintikiustís naartin jístatin pachiiinkiataj tusa. Tuma asamtai, Asia nunkanam ti núkap pujustinian nakitaki “Ipisiunam wéhattajai” tímiayi.

### Papru Ipisiunmaya úuntrin áujsamiania nu

<sup>17</sup>Túrasha Papru tuke Miritiunam pujus, Ipisiunmaya Yus-shuara úuntrin winitiarum tusa untsukarmiayi. <sup>18</sup>Ni taarmatai Papru tímiayi “Atumsha wi Asia nunkanam pujusan itiura túraj nu nékarme. <sup>19</sup>Atumjai tuke tsawant pujumaj nuĭ, nankaamantuchu enentáimtumasan, úutchim winia Úuntrun takatrin takasmiajai. Tura Israer-shuar yajauch awajtustinian wakerutainiaĭn tuke takasmiajai. <sup>20</sup>Ashí péñker ana nu nekaatarum tusan mijiatrutsuk jintintiamjarme. Iruntramarmena nuĭ tura ankant ankant atumĭ jeen pujumarmena nuĭsha Yus-Chichaman ujakmajrume, tímiayi. <sup>21</sup>Tura Israer-shuarnasha Israer-shuarchancha nútiskanak, enentái yapajjárurum Uunt Jesukrístu umirkatarum, tímiajrume. <sup>22</sup>Tura yamáí Jerusarénum wéajai, Yusa Wakaní túrutkui. Nuĭsha túrunatana nunasha nekamatsuk wéajai. <sup>23</sup>Tura Yusa Wakaní iniakturkui juna nékajai, ashí pepru wi jeattajna nuĭ enketátai tusar nákarainiawai. Tura ti wáitsatniun nekapsattajai. <sup>24</sup>Kame wikia jákashtajash. Túrasha warí winia itiurtawa. Wikia Yusa jintiin warasan wekasataj tusan wakerajai. Yusajĭ wea-wéakuan jáakun iniaisataj tajai. Tura nuyá takatan Uunt Jesus surusmia nuna péñker amuktaj tusan wakerajai. Jes, Jesus chichartak “Yus wáitnenkartana nú chicham etserkata” turutchamka’ tímiayi.

<sup>25</sup>Tura, yatsurtiram, ashí Yúsnan atumin paant ujakjarme. Yamaikia wíniaka atakka wáitkiashtatume. <sup>26-27</sup>Nekaatarum, ashí Yusa wakeramurĭn wisha penké úurtsuk ujakjarme. Tuma asamtai atumin títiajtsan wakerajrume, chikichík shuara wakaní jinium wéakuisha wikia penké makuumashtatjai. <sup>28</sup>Tuma asamtai emka atumek ímiastarum. Túrurum nuyá chíkich Yus-shuar íistarum. Yus-shuaran wáinin ajastarum tusa, Yusa Wakaní achirmakurme. Yus-shuar ainia núnaka ni numpejain Uunt Jesus sumakchakait. <sup>29</sup>Kame wi wématai, chíkich táartatui. Núnaka nékajai. Tura niisha, Yus-shuaran amukartajtsa wakeriartatui, uunt yawasha murikiun amuinia áintsan. <sup>30</sup>Túrasha nemartusarat tusar wakeruiniak atumijinian wait chichaman unuikiartin wantinkiertatui. <sup>31</sup>Tuma asamtai yatsurtiram, aneartarum. Wisha menaintiú uwitin tsawaisha káshisha úutchim ankant ankant unuiniamajrumna nu kajinmatkiirap’ tímiayi.

<sup>32</sup>Pai, yamaikia, yatsuru, Yus yáinmakarti. Yusa anenkrattairi nékaitrumna nú chichamsha kakarmaiti. Nú chicham átum katsuarar kakaram wekasatniun yainmakarti. Kame nú chicham atumi enentáin pujakui, Yus ni shuarin matsamsatniun anajmatramia nuí pachiinkiatarme. <sup>33</sup>Wats, wisha chikichkí shuara kuítrín wariríncha wakerutkachuitjai. <sup>34</sup>Antsu winia uwejruijai takasan wi atsummiaj nuna sumarmakmajai. Tura winia írutkamuru atsumamuríncha wiki sumakmiajai. Nuka paant nékarme. <sup>35</sup>Kame átum takasrum, atsumainia nusha yáintarum tusan jintintiajrume. Wats, Uunt Jesusa chichame enentáimsami. “Achiana nujáinkia nankaamas, súana nuka shiir waraawai” tíchamka” tímiayi.

<sup>36</sup>Nuna tuasua amik Papru tikishmarmiyai. Tura ashí niijiai iruntrarmia nú shuar Yúsan áusarmiyai. <sup>37-38</sup>Tura Papru nuik chichaak “Atakka wáitkiashtatrumé” tiniu asamtai, ti kúntuts pujuiniak, úutchim Páprun miniaksarmiyai. Túrawar kanunam ejeniarmiyai.

### Papru Jerusarénum wémiania nu

**21** <sup>1</sup>Tura nuyá Yus-shuar aujsa ikiukir kanunam enkempramji. Tura ínkiuasmak Kus péprunam jeamji. Tura kashin tsawarar Rútas péprunam jeamji. Tura nuyanka Patara péprunam jeamji. <sup>2</sup>Tura nuí Pataranam pujusar, chíkich kanu Pinisia péprunam wea wáinkiamji. Túmakui nuí enkemprar wémaji. <sup>3</sup>Nuí wésar Chipri nunkaka wáinkiamji. Chíprikia menanmaani aa ikiuakur Sírianam jeamji. Kánuka Tiru péprunam jeá pujustiniuyi, káarak núkap ikiuktin akui. Tuma asamtai iisha Tírunam jear kanunmaya jíinkir péprunam wayamji. <sup>4</sup>Nuí Yus-shuar wáinkiar nuín siati tsawant pujusmaji. Tura Yus-shuaran Yusa Wakaní ujakam Páprun chicharainiak “Jerusarénumka wéchatniuitme” tiarmiyai. <sup>5</sup>Tura siati tsawant nankaasmatai jíinkimji. Ashí Yus-shuar ármia nu núwentuk uchirtiuk nemartamkamji, péprunam iniankatmaktiai tusar. Káanmatkanam jear tikishmarar Yus áusamji. <sup>6</sup>Tura nu amikiar nuínkia áujnaisar ikiukiarmaji. Tura iikia kanunam enkemprakrin ninikia ni jeen wakеткиarmiyai.

<sup>7</sup>Iisha Tirunmaya entsak wea-wéakuar Turumáitiamam nuín jíintramji. Tura nuí jearsha Yusai yachi ármia nu chichasar nuín chikichkí tsawant pujusmaji. <sup>8</sup>Kashin tsawarar nuyá jíinkir nunkan weri Sesaria péprunam jeamji. Nuí Jiripi jeen jear pujusmaji. Jiripikia Yus-Chichaman etserniuyayi. Nuik Jerusarénum siati áishmankan Yusa takatrín wáinkiarat tusar anaikiarmia nú Jiripiiti. <sup>9</sup>Jiripisha kuaru nawantrín yarumkauyayi nuatnakchan. Niisha Yusa chichamen etserin ármiyai. <sup>10</sup>Tura iisha Jiripi jeen wárum tsawantak pujarin Jutía nunkanmaya aents Yusa etserniuri, Akapu náartin támiayi. <sup>11</sup>Niisha taa Papru emenmamkarín achikmiayi. Tura achik niniki ni nawen tura

uwejéncha jin\_kiamamiayi. Nuna tura tímiayi “Yusa Wakaní tawai, juna emenmamka nérenniurín Israer-aents jútikia jin\_kiáwar Israer-shuarchanum surukartatui, tawai” tímiayi. <sup>12</sup>Iisha nu antukar Papru tímiayi “Jerusaré\_nnumka weep.” Sesarianmaya Yus-shuarsha núnisan Páprun tiarmiayi. <sup>13</sup>Tutai Papru tímiayi “¿Urukantai útukuram winia enentáruj kúntuts awajtarum? tímiayi. Wi Jesusna asamtai Jerusaré\_nnum jin\_kiatainiakuiisha mántuiniakuisha ashamatsjai” tímiayi. <sup>14</sup>Tura iisha Papru emetatai tukamar tujinkiar “wats, nuin\_kia Uunt Yus wakera nu tímianak atí” tiarmaji.

<sup>15</sup>Nu tiri iniiaisar iwiarnarar Jerusaré\_nnum wémaji. <sup>16</sup>Chíprinmaya yaunchu Yus-shuar Manasun ni jéen Jerusaré\_nnum takakuya nuna ikiatmastinian wakerimiayi. Tuma asamtai Sesarianmaya ishichik Yus-shuar nemartamainiak Manasun\_nasha júkiarmiayi.

### Papru Jakupu jéen irastajtsa wémiania nu

<sup>17</sup>Tura iisha Jerusaré\_nnum jeawakrin, nuj warasar Yus-shuar ti shiir áujtamsarmiaji. <sup>18</sup>Tura kashin tsawar Papru ímiak Jakupu jéen wémiaji. Nuisha Yus-shuara uuntri matsarmiaji. <sup>19</sup>Páprusha áujas amik, Israer-shuarchanum ni étsermajai Yus túramia nuna yámankamtaikniumia júkí chikichkimas ujakar ujakar awajsamiayi. <sup>20</sup>Papru taman antukar “Yus ti pé\_nkerchakait” tiarmiayi. Tura Páprun ju chichaman tiarmiayi “Támena nu pé\_nkeraiti, yatsurú, túrasha Israer-shuar timiá untsurí Yus-shuar ajasu áiniayat, “ashí Muisais akupkamia nu umiktinaitji” tuiniawai. <sup>21</sup>Nú arant yajaya aents taar, chichartamainiak “Pápruka nusháa jintintui, turamainiawai. Israer-shuar chíkich nun\_kanam pujuinia nuna Muisaisa akupkamurí umirkashtin Pápruka jintintui, turamainiawai. Israer-shuarti tsupirnaktin ana nu túrashtinian tura ashí Israer-shuar túrutai iniaisatniun Papru imia Israer-shuaran jintintui, turamainiawai.” <sup>22</sup>Wátsek, yatsuru, nuin\_kia itieurmain\_kit. Ame tátintrumin aents nekaawarka juj kajertamainiak káutramkachartatuak. <sup>23</sup>Wats, antsu nuin\_kia, ju túrata yatsuru. Juj kuaru áishman Yúsan yaunchu tiarmia nuna umiktasa pujuiniawai. <sup>24</sup>Nii júkiarta. Túram niisha Muisais akupkamia nuna umikiar nijiaamainiakui, amesha nijiaamarta. Núnismek kuítniasha ni susatin ana nu amesha akikmatkarta. Niisha ashí umikiarmatai, ni intiashin awampratin áchattawak. Nu áishman\_kia intiashin awampran Israer-aents wáinkiar, anturtamkarainia nu, nekaschaiti, turamartatui. Antsu, Pápruka Muisais akupkamia tímianak túrawai, turamartatui. <sup>25</sup>Túrasha yatsuru, nekaata, Israer-shuarcha Yus-shuarka papí yaunchu akuptukmiaji. Israer-shuarti túratin ana nu ashí mash túratarum tátsuji, tu áatramji. Tura antsu namánken máawar ántar-yusan susamu yúashtiniaitrome, tímiayi. Tura numpasha umarchatniuitrome, kajemtikramusha yúashtiniaitrome. Tura tsanirmashtiniaitrome. Tu áatramji” tiarmiayi.



### Páprun achikiarmiania nu

<sup>26</sup>Nuyá tiniu asamtai Papru nú kuaru áishman̄kan júkiarmiayi. Tura kashin tsawarar nímiak níjiaamararmiayi, Muisais timia nútiksaran̄. Tura Yúsan tiarmia nuna wárik umiktinian tura Muisais timia nuna Yus súsatniun ujaktajtsa Papru Yusa Uunt Jeen wayamiayi. <sup>27</sup>Túrasha nu siati tsawant amusattuk ajatemsaj, Ásianmaya Israer-aents Paprun Yusa Uunt Jeen pujan wáinkiararmiayi. Túrawar charaatum ajakiar Páprun achikiarmiayi. <sup>28</sup>Achikiar untsumainiak “Israer-shuártiram in yáinmaktarum. Ashí nun̄kanam Muisais akupkamuríncha Israer-shuarti túrutairíncha, ju Yusa Uunt Jeencha yajauch chicharea nu achikji, tiarmiayi. Warí, Kriaku áentsun awayáshtinia nuna awayá nujaj yamá ju Jeencha yajauch awajturmají” tiarmiayi.

<sup>29</sup>Jes, nuik Ipišunmaya Trúpimiu Páprujaj péprunam wekaan wáinkiaruyi. Wáinkiaru ásar, Yusa Uunt Jeen wayayí, tu enentáimsar tiarmiayi. <sup>30</sup>Tuiniakui aents ashí mash charaatum ajakiar tseke táarmiayi. Túrawar Páprun achikiar japirkutak Yusa Uunt Jeeya jjíkiarmiayi. Túrawar wáitíncha nú chichamaik epentrarmiayi. <sup>31</sup>Tura maatai tusar matsamtuiniaj suntara kapitíantri Jerusarénnumiã aents ashí charaatum ajainian antukmiayi. <sup>32</sup>Kapitiáncha ni suntarín tura sarjentuncha irur tseke weriarmiayi aents pujuarmia nuj. Aencha suntaran tura kapitíanin wáinkiar, Páprun asutíniyat iniaisarmiayi. <sup>33</sup>Kapitiánka Páprun jeari achikmiayi. Tura jimiará jirujaj jin̄kiamiayi. Nuyasha aniasmiayi “¿Niisha yait? ¿Warinia túrait?” tímiayi. <sup>34</sup>Túrasha aencha untsurí chichaman untsummiarmiayi. Túmainiakui kapitíancha penké nekaachmiayi. Tuma asamtai Páprunka suntar pujamunam júkiarmiayi. <sup>35</sup>Tura suntar pujamunam wáitíniam jeawar Páprun entsaki júkiarmiayi aents imiá kajerainia asamtai. <sup>36</sup>Tura aencha ukunmaani pataakar, mantamnatí, tu untsummiarmiayi.

### Papru chichastinian seamiania nu

<sup>37</sup>Tura Papru suntarnum awayám, Páprusha kapitíanin Kriaku chichamjaj chichaak “Wi ishichik chichasaintjame” tímiayi.

Tutai kapitían chichaak “Warí, ¿amesha Kriaku chicham chichastin nékamek? tímiayi. <sup>38</sup>Nuin̄kia amesha ¿Ejiptunmaya shuárchakaitiam? ¿Nuik kuaru mir (4000) aents, man̄kartin tutai atsamunam yaruakchamkam? ¿Kapitiánjaj meset najanataj tusa túrachmakum?” tímiayi.

<sup>39</sup>Tutai Papru tímiayi “Núchaitjai. Antsu wikia Israer áentsuitjai. Sirisia nun̄kanam uunt pepru Tarsu náartin ana nuj akiiniaitjai. Tura waitneasam ju aents chichastin tsan̄katrukta” tímiayi.

<sup>40</sup>Tura kapitían, ayu, tutai, Papru watainiam wajas, mitiat pujastarum tusa uwejen̄ takuimiayi. Tura aents itiatkarmatai Israer-chichamjaj chichasmiayi.

**Papru áentsun timia nu**

**22** <sup>1</sup>Papru chichaak juna tímiayi: “Yatsurtiram, tura úuntur árumna nu antuktarum. Wikia Pápruitjai. Kíishtumaktaj tusan títiatjana nu waitneasrum anturtuktarum” tímiayi. <sup>2</sup>Tura Papru Israer chichaman chichaakui, aents nuna antukar nú nan̄kaamas itiatkarmiayi. <sup>3</sup>Nui Papru chichaak “Wikia Israer-shuaraitjai. Tarsu pepru Sirisia nun̄kanam ana nui akiiniaitjai. Túmaitiatnak jui Jerusarénum tsakaruitjai. Tura unuikiartin Kamaríran chichamen unuimiaruitjai. Tuma asan ii uuntri akupkarmia nuna ashí umirkaitjai. Tura átum yamá túrarmena nuna wisha nútiksanak Yusna ana nuna tuke enentáijiai wakerukuitjai. <sup>4</sup>Tura Jesusan umirkaru ármia nuna máataj tusan pataatukni wekaimiajai. Túran áishman̄kan nuwancha achikian sepunam en̄keataj tusan túrimiajai. <sup>5</sup>Israer-patri uuntrisha Israer-shuara uuntrisha Tamaskunam íi-shuar susatá tusar papin ataktusar akuptukarmia nuna nin̄kia nékainiawai. Jesusan umirkarun achikia ikiaankan jui Jerusarénum asutniáwarat tusan werimjai’ tímiayi.

(Tur. 9.1-19; 26.12-18)

<sup>6</sup>“Tura wi jintiá wéai Tamaskunam jeastatuk ajasai nantu tutupin ai aya aneachma nayaimpinmaya newaat wajantruntmiayi. <sup>7</sup>Túrunamtai wisha nun̄ká iniaarmajai. Nuyanka chichaamun antukmajai. Chichartak “Sauru, Sauru, ¿urukamtia imiá pataaturam?” turutmiiai.

<sup>8</sup>Takui wi aniasmajai “¿Amesha yáitiam, Uunta?”

Tutai “Wikia Nasarénumia Jesusaitjai. Ame pataaturmena nútjai” turutmiiai.

<sup>9</sup>Wijiai pujuarmia nu, newaat wajantun wáinkiar ti ashamkarmai. Túrasha nin̄kia túrutun antukcharmai. <sup>10</sup>Tura wi tímiajai “¿Nuinkia, Uunta, warí itiurkattaj?” tímiajai.

Tutai Uunt chichartak “Wajakim Tamaskunam wetá. Nuisha ame túrattamna nuna ujatmakartatui” turutmiiai, tímiayi. <sup>11</sup>Kame wikia nú newaat ajakun íisan jiiu kusurmai. Tuma asamtai winia tsaniakmar en̄keki jurukiar Tamaskunam ejetiarmai’ tímiayi.

<sup>12</sup>Papru tuke aujmatki wéawai. “Tura nui Tamaskunam áishman̄ Ananías pujumai. Niisha Yúsan aneak, Muisais akupkarmia nuna umirkaui. Tura nú péprunmaya Israer-shuar ármia nu nin̄ pen̄ker enentáimtiarmiai. <sup>13</sup>Nú Ananías winia íirsataj tusa támai. Taa turutmai “Yatsuru Sauru, pen̄ker iimtia.” Túrutkui nú chichamaik pen̄ker íimmiyai. Túrunan Ananíasnasha wáinkiamjai. <sup>14</sup>Tura Ananías chichaak “Íwiaaku Yus, winia wakeramurun nekartuat tusa winia Uchirnasha, tunaarinchaa nuna, íisat tusa, winia chichampruncha antukat tusa ámin yaunchu Yus anaitiamkaiti. <sup>15</sup>Amesha Papru, Yusna ana nu íisumna nusha antukumna nusha ashí aents ujakartatme. <sup>16</sup>Tuma asamtai

yamaisha ¿warí nákam? Tunaarun asakátrurat tusam Uunt Jesus enentáimtusam weme ni náari\_ pachisam imiantia” turutmai.’

17“Tura Jerusarénnum waketkin Yusa Uunt Jeen wémajai Yúsan áujсатаj tusan. Nu\_ ímiarmajai. 18Nu\_ Jesus chichartak “Ju\_ Jesusarénnum Wí\_ túramur etserkattamna nuna antukchartatui. Tuma asamtai wari jíinkim wetá” turutmai.’

19“Túrutkui wi tímiajai “Túrasha Uunta, juyá aents wi Israer-shuara iruntai jeen wayan Ámin umirtamkarmia nuna nu\_ matsatun achikian awatin sepunam enkeawarmia nuna nékainiawai. 20Tura nuyá Áminiun etserniun Estepañkan máiniakuisha wisha wajamjai. Túruiniakui, “pénkeraiti” tímiajai. Nú arantcha ni pushirín írsamjai” tímiajai.’

21“Túrasha Uunt Jesus winia turutmai “Wetá. Israer-shuarcha matsatainia nu\_ akupkatjame” turutmai” tímiajai Papru.

### Suntara kapitíántriin túrunamia nu

22Nu\_ matsamarmia nu, núnaka antukarka untsumtan juáriarmiayi. “Ju\_ka mantamnatí. ¿Urukamtaik iwiaakusha pujusat?” tiarmiayi. 23Tura aentska Paprun kajerainiak, ti untsumainiak pushirín tujaat ajapawar nun\_kancha nan\_kimkiamaikia ajarmiayi. 24Tura kapitíán nuna wáiniak Páprun suntar pujamunam awayámiayi. Tura suntaran chicharuk “Átum asutiárum áimtikiatarum. ¿Urukamtaik aents nin kajerainiak imiá untsumainia? Nekaatarum” tímiayi. 25Tura Páprun asutiátai tusar jíinkíárar awajsam Pápruka kapitíánin chicharuk “¿Rúmanmaya aents áyatik asutiámniakait, ni túramur\_ nekartsuk?” tímiayi.

26Nuna táman antuk kapitíáncha uunt kapitíánin ujaktaj tusa werí chichaak “Maaj, túrataj tamena nu anearta. Ju\_ áishman\_ Rúmanam pachitkaiti” tímiayi.

27Nuna antuk uunt kapitíán Páprun werí aniasmiayi “¿Amesha nekasmek Rumanam pachitkaitiam?” tímiayi.

Tutai Papru “Ee” tímiayi.

28Tutai “Wikia ti kuítian akikmakmiajai Rúmanam pachiinkiatniun” uunt kapitíán tímiayi.

Tutai Papru tímiayi “Túrasha winia aparka Rúmanam pachitkia asamtai, wisha Rúmanam pachiinkian akiinaitjai” tímiayi.

29Nuna takui Páprun asutiátaj tiarmia nuna wárik iniaisar jíiniar wearmiayi. Tura imia uunt kapitíáncha Rúmanam pachitkian jíinkíá asa ashamkamiayi.

30Tuma asa kashin tsawar uunt kapitíán, urukamtaik Páprun imiá kajerainia, nekaataj tusa wakerak Paprun werí jíinkíámun atirmiayi. Tura Israer-patr\_ uuntrin\_ chíkich naamka armia nújaisha ikiaankamiayi. Tura nuínkia ni matsatmanum Páprun itiar ajapén awajsamiai.

### Israer-aentsu Úuntriñ Papru timiania nu

**23** <sup>1</sup>Papru Israer-patri naamkarin úmamkes iis “Wíi shuartiram antuktarum. Úchichik tuke yamaisha Yus ímmianum penker wekainuitjai” tímiayi.

<sup>2</sup>Papru nuna takui Israer-patri uuntri Ananías, ni suntarin Papru ayamas pujuarmia nuna “Wenunam awatiarum” tímiayi.

<sup>3</sup>Tutai Papru tímiayi “Tsej, jimiará chichamtinia ímiatá, Yus amincha asutiámattawai. Muisais akupeana nuna umiatsui tusam yajauch turutattsam pujame. Entá, ¿nuiñkia urukamtia Muisais tímia nuka iniaisam ame suntarum winia asutiátarum tame?” tímiayi.

<sup>4</sup>Tura nuna takui nuí wajarmia nu Páprun tiarmiayi “¿Maaj, amesha Patri uuntri ímiá yajauchisha chichaream?”

<sup>5</sup>Tutai Papru tímiayi “Yatsuru, wisha Patri uuntri áutskaitia tíchamjai. Nékaitkiunka núnaka tíchajjai. Kame wisha nékajai, Yus-Chichamnum tawai “Atumí uuntri yajauch chicharkairap” tawai” tímiayi.

<sup>6-8</sup>Israer-aentsu úuntriya jimiará írutka ármiai. Satuséu aents tura nuyá Pariséu aents nusháa írutkan Pápruka nekaamiayi. Kame Satuséu aentska, jakamunmayá nantaktincha Yusa suntarisha aentsu wakanísha tura iwianchcha atsawai, tiniu ármiai. Antsu Pariséu aentska, nuka ashí awai, tiniu ármiai. Nuna nekáa Papru kakantar chichaak “Wikia Pariséu áentsuitjai. Wíi shuarsha Pariséu áiniawai. Wikia ashí shuar jakamunmayá ukunam nantaktin átatui tu jintiamun, nekaatai tusar itiararmiayi” tímiayi. Tura Papru nuna takui Pariséu aents tura Satuséu aencha nuámtak kajernaikiarmiayi. Túrunawar kánasaran nusháa nusháa enentáimprarmiayi. <sup>9</sup>Nuiñkia ashí aents charaatum ajarmiayi. Tura Israer-shuara jintinniuri Pariséunam írutka armia nu wajakiar tiarmiayi “Ju áishman tunaan penké túrichuiti. Yusa suntari chíkich wakanha nin nekas chichaschamashi. ¿Ya neka?” tiarmiayi. <sup>10</sup>Ti charaatum ajainiakui suntara kapitiantri Páprun achiarchartimpiash tusa suntaran untuk, “Jiiktiarum, túrarum suntar pujamunam awayátarum” tímiayi. <sup>11</sup>Nuyá kashi Papru Uuntri mesekra ipiatuk “Kakaram ajasta, Papru. Juí Jerusarénum winia ujakarumna núnismek Rúmanmasha ujaktatme” tímiayi.

### Páprun máatniun wakeriarmiania nu

<sup>12</sup>Nuyá kashin tsawarmatai Israer-aents Páprun maatai tusar chichaman jurusarmiayi. “Papru máachkurkia yurumtsuk tura penké úmutsuk matsamsattaji. Máachrikia yajauchiniam yumiñkramu atai” tiarmiayi. <sup>13</sup>Nuna tiarmia nuka kuarenta (40) nankaamas ármiai.

<sup>14</sup>Tura Israer-patri úuntriñ tura Israer-aentsu úuntriñcha weriar “Papru máachkurkia penké yurumtsuk pujustatji. Máachrikia yajauchiniam

yumin̄kramu atai” taji. <sup>15</sup>Tuma asamtai ashí Israer-patr̄i naamkar̄ijiāi suntara kapit̄iántr̄i seatarum, Papru tatí tusarum. “Kashin Papru itiata, titiarum. Papru tana nu iisha nekas nekaatai tusar wakeraji” titiarum. Túrawakrumin iisha maatai tusar nin̄kia táatsāin̄ náakattaji” tiarmiayi.

<sup>16</sup>Tura Papru awe nú chichaman antuk suntar pujamunam taa Páprun ujakmiayi. <sup>17</sup>Tuma asamtai Pápruka suntara kapit̄iántr̄in̄ untsuk “Jū uchi uunt kapit̄ián̄nium jukitia. Niisha chichaman takakui” tímiayi.

<sup>18</sup>Kapit̄ián̄cha uchin uunt kapit̄ián̄nium ejé tímiayi “Papru en̄keamu pujana nu winia untsurak “Jū uchi uunt kapit̄ián̄nium jukitia. Chichaman takakui” túrutui” tímiayi.

<sup>19</sup>Uunt kapit̄ián̄cha nú uchin en̄keki arantach jukí chicharuk “¿Wari turuttiaj tame?” tímiayi.

<sup>20</sup>Tutai uchi tímiayi “Israer-aents Páprun chichaman jurusarai. “Papru túramur̄i ti paant nekaatai tusar kashin Israer-shuara uuntrīin̄ ejetarum” turamartatui. <sup>21</sup>Tura amesha nuna takui anturkaip. Kuarenta (40) nan̄kaamas jintiá akirtua pujurainiawai. Tura “Papru máachkurkia yurumsuk tura úmutsuk matsamsattaji” tuiniawai. Tuma asamtai yamaisha ámin tití tusa nákar̄mainiawai” tímiayi uchi.

<sup>22</sup>Tura uunt kapit̄ián̄cha uchin chicharuk “Ame túrutmena nu chíkich aents pen̄ké ujakaraip’ tímiayi. Nuna t̄i, uchin akupkamiayi.

### Akupin Piriksāi ejetiarmiania nu

<sup>23</sup>Nuyānka uunt kapit̄ián̄cha chíkich kapit̄ián̄in̄ jímieran̄ itiā chichaak “Urum, kashi ajapén̄ ajastatuk āi, untsur̄i suntar̄ ikiaankarta. Jimiará sián̄ (200) aya náwek, setenta (70) kawainium eketka, nuyá chíkich jimiará sián̄ (200) nán̄kijiāin̄ Sesaria nun̄kanam wétin̄ iwarata. <sup>24</sup>Páprusha kawainium ekemkatin̄ iwiarturta. Túrarum pen̄kerak̄ ejetarum akupin Piriksāi” tímiayi. <sup>25</sup>Tura niijiāi jū chichaman áatrar̄ akuptukmiayi:

<sup>26</sup>“Ti pen̄ker̄ akupin Pír̄iks, wikia Krautiu Rísias jū papin̄ áatjame.

<sup>27</sup>Israer-aents jū áishman̄kan̄ maatai tusar wakeruiniak achikiarmiayi. Tura niisha Rúmanmayā áentsuitkui wikia nuna nekaan̄ suntarj̄āi werin̄ jukimjai. <sup>28</sup>Wikia ¿urukamtaik achikiaruit? tusan̄ Israer-patri naamkar̄in̄ jukimjai nin̄. <sup>29</sup>Páprunka ii uuntrī akupkamur̄in̄ umiatsui tusar nin̄ kajeriarmiayi. Pápruka yajauch̄ túrachū asa mantamnachminiuyayi. Sepunmasha en̄kemachminiuyayi. <sup>30</sup>Tura wisha Israer-aents nin̄ máatniun̄ chichaman jurusman̄ nekaan̄ am̄īin̄ akuptajme. Nuyasha nin̄ kajerainia nunasha tajai “Atumsha Piriksāi werum átum warinma kajerarum nu títiarum” tajai. Ayu. Júch̄iniak̄ tájame.” Nuna tu áatar̄ akuptukmiayi.

<sup>31</sup>Tura suntarsha ni uunt kapit̄ián̄tr̄i tímia nútiksaran̄ Páprun kashi júkiarmiayi Antipatris péprunam. <sup>32</sup>Kashin tsawarar̄ suntar̄ aya náwek

wearmia nuka waketrarmiayi. Tura kawainium eketrainiaka Páprujai wearmiayi. <sup>33</sup>Sesaria péprunam jeawar papin Piriksan súsarimiayi. Tura Pápruncha nuí ejeniarmiayi.

<sup>34</sup>Akupniusha papí aajsua amik Páprun aniasmiayi “Amesha, ¿tuí akiiniaitiam?”

Tutai “Sirisia nunkanmayaitjai” tímiayi.

<sup>35</sup>Nuna takui akupin tímiayi “Wátskea kajertamainia nu taar turamainiakui anturkatjame” tímiayi. Tura nuyanka uunt akupin Erutisa jeen awayá apujsamiai, suntar ísarat tusa.

### Papru Píriksjai áujmatsamiania nu

**24** <sup>1</sup>Tura senku tsawant nankaamasai Israer-patri uuntri, ni naari Ananías, Sesianam támiayi. Tura Israer-aentsu uuntri tura ti unuimiaru chichamtincha, ni naari Térturu nujai táarmiayi. Ju aents Páprun kajerainia ásar akupniunam wearmiayi. <sup>2</sup>Nu Páprun itarmatai Térturu chichatan juáirmiayi. “Uunt akupin Píriks, amesha yaimiu asakmin iisha shiir matsatainijai. Tura imiá neka asakmin ashí aents tímiatrusrik matsatainijai. <sup>3</sup>Tuma asakmin iisha ashí matsatmanum tuke tsawant ti shiir yuminsamajme, uunta. <sup>4</sup>Tura amesha ti núkap chicham antuktin nakitiatspash. Tuma asamtai antsu ishichik waitneasam anturtukta, tímiayi. <sup>5</sup>Ju áishman Papru, sunkura utsukratniua núniniaiti. Niisha ashí nunkanam mesetan najanatniun Israer áentsun ikiakáiniaiti. Tura Jesusa aentsri, Nasarénu tuinia nuna úntrinti. <sup>6</sup>Nú arantcha Yusa Uunt Jeen yajauch awajsataj tusa pujuru wáinkiar achikmaji. Ii uuntri tana nujai métek asutiátai tusar wakerimji. <sup>7</sup>Túrarin nuyanka kapitían Rísias taa tapit achik jurutramkimijai. <sup>8</sup>Tura atumek akupin Píriksai werum nuí aujmatkatarum, turamaji, tímiayi. Tuma asamtai amesha Píriks, Papru aniasta. Nuinkia ii tájinia nu nekasaiti, nu nekaattame” tímiayi Térturu.

<sup>9</sup>Tura Israer-aents pujuarmia nu “Nekasaiti ashí ni tana nu” tiarmiayi.

<sup>10</sup>Nuyá Píriks, uwejejai, Papru chichasat tusa iniaktusmiayi.

Túram Papru tímiayi “Amesha uunta, ju aentsu akupniuri ti untsurí uwitin pujusuitme. Tuma asamtai nuikia shiir enentáimsan páchitsuk chichastatjai. <sup>11</sup>Wats, wi túramur nekartuata. Yúsan áujmataj tusan Jerusarénum wi wémajna nu tuse (12) tsawant nankaamasai. <sup>12</sup>Nuisha yajauch áujmatki weai wáitkiacharmai. Yusa Uunt Jeencha tura Israer-shuara aujtai jeencha tura pepru jintianmasha áentsnum charáa charáa ajá wekaai penké wáitkiacharmai, tímiayi. <sup>13</sup>Ju aents juí matsatainia nu wíniaka penké turutchamnia áiniawai. <sup>14</sup>Túrasha juna paant ujaajme. Jesus yamarman jintiana nuna umíajai. Kame Israer-aentska wáitiaiti tuinia nuna wikia umíajai. Túrasha nuna túran ii uuntri Yusri akupkamia nunak umiktasan pujajai. Jes, ashí Muisais aar akupkamia nuna tura

ashí Yúsnan yaunchu etserin aar akupkarmia nunasha uminiaitjai. <sup>15</sup>Tura jakaasha nantaktin átatui, tajai. Warí, penker aents nútiksan yajauch aencha nantakiartatui imia Israer-shuar tuiniatsuk. Tura wisha nútiksanak túrunatniuiti tajai. <sup>16</sup>Tura wisha tiniu asan, wikia winia enentáiruj Yus íimmianum makuumatsuk wekasataj tajai. Tura áentsnumsha nútiksanak penké makuumatsuk wekaajai' tímiayi.

<sup>17</sup>"Tura, uunta, untsurí uwitin chíkich chíkich nunkanam wekaasuan amikian winia shuaruj támajai. Kuítrinchan kuítian susataj tusan tura Yusa kuítríncha nin susataj tusan támajai. <sup>18</sup>Túran wisha, Muisais jintinmia nútiksanak nijiaamaran, Yusa Uunt Jēen pujumiajai. Untsurí aents charaatum ajainiasha atsumiayi. Nuí wiki pujáí Ásianmaya Israer-aents wáitkiarmiayi. <sup>19</sup>Tura wi yajauch túraitkuínkia winia wáitkiarainia nu táchatniukait ámin ujatmaktasa. <sup>20</sup>Túrachkuínkia juí pujuinia nu, Israer-patrí naamkarí matsatmanum wi pujumajna nuí yajauch túramun nékainiakka turutiarti. <sup>21</sup>Kame, "“jakamunmaya nantakminiaiti” tau asamtaí makuurtiajtsarum pujarme” matsatmanum tímiaj nujaí turutchartimpiash. Nú arantka yajauch túramun penké nekartuacharmai” tímiayi Papru.

<sup>22</sup>Táman antuk Píriks, Kristu shuarí túramun paant nekáa, áanik iniaisamiayi. "Antsu kapitíán Risias támatai nuínkia nu chichaman nekaatjai" tímiayi. <sup>23</sup>Tura nuyá suntara kapitíántrín chichaak "Ju Pápruka tuke emetnati. Tura ishichkikia ankant apujsatarum. Tura nuyá ni amikrú taa yáíntaj takui suritkiairap" tímiayi.

<sup>24</sup>Tura nuyá chíkich tsawantaj ataksha Píriks ni nuwejai Tursirajai támiaiyi. Núwenka Israer-shuarauyayi. Pírikska "Papru itiatarum' tímiayi. Papru Jesukrístunun étserkui antimiai. <sup>25</sup>Tura Pápruka yajauchiniam wekasastincha naka wekasatniuncha, tura ukunam Yus tunáa áentsnaka asutiátniuiti takui Pírikska ashamak tímiayi "Antsu yamaikía máakete. Tura ataksha wi ankant pujakun untsukmijiam" tímiayi. <sup>26</sup>Tura, ankant ajastaj tusa Papru kuítian akirkashtimpiash, tu enentáimias, Píriks tuke untsúu wémiayi, chichastai tusa. <sup>27</sup>Tura nuyanka jimiará uwí nankaasmatai Píriks akupin náamkamu ajapnamiayi. Tura chíkich aents, ni naarí Pursiu Jistu akupin náamkamiayi. Tura Pírikska, Israer-aents penker enentáimtursarat tusa wakerak, Páprun sepunam tuke ikiukmiayi.

### Papru Jístujai áujmatsamiania nu

**25** <sup>1</sup>Jístusha akupkatin takatan nankaamataj tusa Sesaria péprunam támiaiyi. Tura menaintiú tsawant nankaasmatai nuyá we Jerusarénum jeamiayi. <sup>2</sup>Nuisha Israer-patri uuntri tura Israer-aentsu penkerisha Páprun tsanumprurtai tusar Jístun weriarmiayi. <sup>3</sup>Tura tiarmiayi "Waitneasam Páprusha Jerusarénum akupkata" tiarmiayi. Jintía maatai tusar wakeruiniak nuna tiarmiayi.

<sup>4</sup>Tutai Jistu tímiayi “Atsá. Páprusha Sesaria péprunam sepunam enkeamu pujawai. Tura wikia nuí wárik waketskittijai” tímiayi. <sup>5</sup>Nuyá nin tímiayi “Atumsha penkeri árumna nu, wijiái Sesarianam wétiniaitrume. Tura nú áishmanka tunaari ákuinkia nuísha títiniaitrume” tímiayi.

<sup>6</sup>Jístuka Jerusarennum ishichik tsawant pujusmiayi. Kame uchu tsawant tura tias tsawantcha pujuschiawash. Nuyá ataksha Sesarianam waketskimiayi. Tura nuí jeá kashin tsawar, akupin pujutainium pujus “Papru itiatarum” tímiayi. <sup>7</sup>Tura Papru wayamtai, Israer-aents Jerusarennumia taarmia nu káunkarmiayi. Túrawar ti nukap chichainiak “Tunáa túraití Pápruka” tu tiarmiayi. Túrusha penké uyumamtekiacharmiayi.

<sup>8</sup>Pápruka chichamprumak tímiayi “Wisha tunaan penké túrachuitjai. Israera uuntri áarmarincha umirkaruitjai. Tura Yusa Uunt Jeencha yajauch awajsachuitjai. Tura uunt kapitíanniasha yajauch penké chicharkachuitjai” tímiayi.

<sup>9</sup>Jístuka Israer-aents penker enentáimtursarat tusa wakerak, Páprun tímiayi “Wakerakminka Jerusarennum wemí. Wisha nuí ame túramurmin nekaatjai” tímiayi.

<sup>10</sup>Tutai Papru tímiayi “Amesha paant nékame, Israer-áentsnum tunaan penké túrachjai. Tuma asamtai Rúmanmaya uunt akupniun wisha winia túramurun ujaktiniaitjai, nekartuati tusan. <sup>11</sup>Wisha jakamnia tímianu tunáa túranka, jákatniuncha ashamatsjai. Tura antsu turutainia nu nekaschaitkiunkia wíniaka Israer-shuarnum surunkachminiaitjai tajai. Tuma asamtai seajme, wíi túramun uunt akupin Sésar nekartuati” tímiayi.

<sup>12</sup>Tutai, nuyá ni írutramurijijai chichasua amik, Jistu Páprun tímiayi “Uunt akupniui wétaj tusam seame. Tuma asamtai nuí wétatme” tímiayi.

### **Papru uunt akupniujai áujmatsamiania nu**

<sup>13</sup>Tura ishichik tsawant nankaamasmatai akupin Akripia ni nuwejai Pirinisejai Jístun áujсатаj tusa Sesarianam wearmiayi. <sup>14</sup>Tura untsuri tsawant pujusarmiayi. Tura nuí pujuiniaí Jístuka Papru túrunamun akupniun ujaak tímiayi “Juí áishman pujawai. Píriks nin achik enkea ikiukmiayi, tímiayi. <sup>15</sup>Kame wikia Jerusarennum pujái Israer-patri uuntri tura Israer-aentsu úuntrisha, Papru yajauchin túraití tusar káutrukarmiayi, tímiayi. Mantamnati tusam akupkata, tu seattiarimiayi. <sup>16</sup>Takui wi tímiajai “Iisha Rúmanmaya áentstikia chícham nékatsuk, mantamnati tusar akupeatsji. Tsanumpruinia nu, emka táartin áiniawai. Tura nuyá chichamprumatsain mantamnati tusar akupeatsji iisha” tímiajai. <sup>17</sup>Tiniu asan, táarmatai, wikia nákatsuk kashin tsawaran akupin pujutainium pujusan, Papru itiatarum tusan akupkamjai. <sup>18</sup>Tura Páprun



tsanumprurtai tusar taar chichainiaksha, wi enentáimmiajna núnaka tícharmiaiyi. <sup>19</sup>Antsu áyatik Yus umirkar túmatairín Papru nuna túrachai, tiarmiaiyi. Tura nuyasha áishman Jesus naartin nantaki iwiaakui tawai Pápruka, tiarmiaiyi. Nunak tiarmiaiyi. <sup>20</sup>Tura wikia nú chichaman túratniun nékachu asan, Páprun aniasmajai “¿Amesha Jerusarénum wétaj tusam wakeramek? Nuj nu chichaman nekartamawarti” tímiajai. <sup>21</sup>Túrasha “Atsá. Juin pujustajai. Rúmanmaya uunt akupin Akustu Sésar nekartuati” tímiaiyi Papru. Takui, “nuinkia tuke sepunam pujustá. Tura wi ukunam uunt akupniun akuptuktatjame” tímiajai” tímiaiyi Jistu.

<sup>22</sup>Nuyá Akripia chichaak “Wisha itiursanak nu áishman chichaamun anturkaj” tímiaiyi. Tutai Jistu tímiaiyi “Amesha kashinkia anturkattame”. <sup>23</sup>Tura kashin tsawar Akripia Pirinisejai taar, iwiaa-iwiarmamu ajas wayawarmiaiyi. Suntara úuntrijjai tura nú péprunmaya úuntrijjai wayawarmiaiyi. Tura nu Jistu, “Papru itiatarum” tímiaiyi. <sup>24</sup>Tura Papru támatai Jistu tímiaiyi “Uunt Akripia, tura ashí áentstiram matsatrumna nu, pai, ju áishman íistarum. Ti untsurí Israer-aents Jerusarénumsha tura ju Sesarianmasha ju áishman kan Páprun kajerainiak yajauch chichartuiniawai. Tura tuke iniaitsuk, mantamnatniuiti, turutainiawai. <sup>25</sup>Túrasha wíjiainkia tunáa jakamnianka túrachuiti. Kame niisha “uunt akupin Akustu Sésar nekartuati” takui, wisha nin akupkataj tusan wakerajai. <sup>26</sup>Tura wariniak uunt akupniun áatratay nuna nékachu asan, Páprun atumin itiarjarme. Tura nekaska, Akripia, ame iniasta tusan itiarjame. Túrawakmin wi wariniak áartaj nuna nekaatjai. <sup>27</sup>Warí wisha, ni yajauch túramurín áattsuk, uunt akupniunam akupkashinaiitjai” tímiaiyi.

### Papru Akripia chichamprumakmiania nu

**26** <sup>1</sup>Jistu nuna tutai Akripia Páprun tímiaiyi “Wats, amesha tu timi chichamprumakta” tímiaiyi. Tutai Papru uweje takuí chichatan juarmiaiyi. <sup>2-3</sup>Chichaak tímiaiyi “Uunt Akripia, ii Israer-shuarti túrutai ainia nu amesha nékame. Tura ashí ii chicharnaiyajnia nusha nékame. Tuma asamtai yamá wisha ámin chichamprumaktaj tau asan shiir enentáimjai. Israer-aents turutainia nuna mash ujaktatjame. Waitneasam pénger anturtukta’ tímiaiyi.

### Papru ni yaunchu túrutairín ujakmiania nu

<sup>4</sup>Wi úchichik winia nunkarui tura Jerusarénumsha pujusan wi túramajna nuna ashí wí aents Israer ainia nu nékainiawai. <sup>5</sup>Pariséu ajasan, ni akupeamurín itiurchat aín ashí takamtsuk tuke umirniuitjai. Nunasha nékainiawai tura wakeruiniakka etserkamnia aintui. <sup>6</sup>Túrasha wikia, jakamunmaya nantaktin átatui, tiniu asamtai wíniaka emetruawar itiararmiaiyi. Túrasha núnaka Yuska ii úuntrín yaunchu tímiaiyi. Yus

tímia nuna túrunattawai wisha tiniu asamtai itiararmiayi, tímiayi. <sup>7</sup>Tura ashí mash Israer-shuarti, tuse (12) aents matsatka ájiniya nu, ju nantaktin chichaman Yus tímia nuna túrunati tusar nákeinijai. Tuma asar Yus áujkurí, tsawáisha káshisha nú enentáimtuiniyai. Tura wisha nú chichamnak enentáimta asamtai wíniaka kajertuiniawai, uunt Akripia. <sup>8</sup>Warí, atumsha “Yus jakancha iniantkimniyai” tátsurmek’ tímiayi.

<sup>9</sup>“Tura wisha yáunchuka Nasarénumiá Jesusnan umirkaruka kajerkatniuiti, tu enentáimniuyajai. <sup>10</sup>Tura Jerusarénum Yus-shuar ármia nuna kajerkarmiyajai. Israer-patri uuntri chichamejai untsurí áentsun Jesusnan umirkarmia nuna sepunam enkeamiyai. Tura nú shuaran máiniakuisha wikia péñkeraiti tu wémiyai. <sup>11</sup>Tura Israer-shuara iruntai jeen wayan ti asutiármiyajai, Jesusnan umirkatniun iniaisarat tusan. Tura imiá kajerkaran chíkich nunkanmasha pataatu wearmiyai achiktaj tusan’ tímiayi.

**Tamasku jintianam túrunamun ujakmiania nu**  
(Tur. 9.1-19; 22.6-16)

<sup>12</sup>“Tura Israer-patri uuntri tsankatrukmatái, papin ni surusarmia nujai, Tamasku péprunam wétaj tusan jíinkimiyajai. <sup>13</sup>Tura, uunta, nantu tutupin ai, jintiá wéai newaat ajaki ti tsápin, tsawái nantujai nankaamas etsantrutramiyai. Tura wijiai wearmia nunasha núnisaran etsantrurarmiyai. <sup>14</sup>Tura túrunamtai ashí nunká tepetar wáinkiarimiyajai. Wiki Israer-chichamjai túrutun antukmajai “Sauru, Sauru, ¿urukamtai imiá pataaturam? Amek enentáimin yajauch awajmamsame, wáaka sankanmiak numin ijiuma núnismek. Wíi aents kajera asam túruname” turutmai.’

<sup>15</sup>“Túrutkui wisha “¿Amesha yáitiam, Uunta?” tímiyai.

Tutai Uunt turutmai “Wisha Jesusaitjai, ame pataatamna núitjai. <sup>16</sup>Tura nantakim wajaktia. Winia takartusminiam tusan wantintiukjame. Tura ame wáinkiamna nusha etserkattame. Tura ukunam wantintiuktatjame. Wáinkiatamna nusha etserkamnum, turutmai. <sup>17</sup>Tura nuyasha turutmai, Wats yamaisha Israer-shuarhanum akupkatjame. Tura Israer-shuar kajertamainiakuisha, tura chíkich aents kajertamainiakuisha ayampruktatjame, turutmai. <sup>18</sup>Péñker jintintiata tusan akupeajme. Kame aencha kiritnumiá jíinkiar tsáapninium wekasarat tusan, tura iwianchin umirtsuk Yúsan umirkarat tusan akupeajme. Tura Winia enentáimtursarmatái Wisha ni tunaarín tsankurattajai. Nuna túran Yusna ajararu áiniana nujai apujstatajai.” Nuna Jesus turutmai’ tímiayi.

**Papru mesekrampra umikman ujakmiania nu**

<sup>19</sup>“Tuma asamtai, uunt Akripia, Uunt Jesus nayaimpinmaya wantintiurak turutmia nuna umirkataj tusan pujajai. <sup>20</sup>Enentai

yapajíáwar Yus-shuar ajastinian, emka Tamaskunam pujuarmia nuna ujakarmiajai. Tura nuyasha Jerusarénumian, Jutía nunkanmayancha tura nútiksanak Israer-shuarchancha nuna ujakarmiajai. Tura ujainiakun “Yus-shuar ajasmarum paant ajasat tusarum, péñker túratarum” tímiajai ashí shuaran. <sup>21</sup>Tura wi Yusa Uunt Jeen pujái, Israer-shuar achirkar emetruawar mántuatai tukamá tujintrukarmiayi, Yus winia yaintiu asamtai. <sup>22</sup>Yus winia yaintiu asamtai, iniaitsuk tuke Yus-Chichaman ujainiajai. Uunt ainia nunasha, tura péejchach ainia nunasha ujainiajai. Tura Muisaissha, Yúsnan etserniusha tiarmia nunak étsereajai. Nú arantka tátsujai. <sup>23</sup>Krístuka wáitsatniuyayi, tura jakasha émak nantaktiniuyayi, ii uuntri tiniu ármiayi. Tura Krístuka nantaki Yusa chichamen í áentsun tura Israer-shuarchancha nútiksan ujaktiniuyayi. Nuna tu tiarmiayi. Tura núnaka wisha tu ujainiajai” tímiayi Papru.

### Papru Akripian Yus-shuar awajsataj tusa wakerimiania nu

<sup>24</sup>Tura nuna takui Jistu kakantar tímiayi “Maaj, Papru, wáurme. Imiá unuimiatu asam wáurkame” tímiayi.

<sup>25</sup>Tutai Papru tímiayi “Atsá uunt Jistu, wáurtsujai. Antsu wi tájana nuka ti nekasaiti. <sup>26</sup>Wi tájana nuna, uunt Akripia juí pujana nuka nékawai. Tuma asamtai arantutsuk nin chichareajai. Kame ju túrunamu ti paant asamtai niisha nékawai, tajai” tímiayi.

<sup>27</sup>Nuyá Akripian chicharuk “Yaunchu Yúsnan etserin áarmari, nekasapitia tátsumek, uunt Akripia. Wikia nékajme. Nekasaiti, tame” tímiayi.

<sup>28</sup>Takui Akripia chichaak “Maaj, ishichik awajtame Papru, Yus-shuar ajastin” tímiayi.

<sup>29</sup>Tutai Papru tímiayi “Tura ishichík chichamjaísha untsurí chichamjaísha, amesha uunt Akripia, tura ashí winia anturtukurmena nu, wijíai métek ajasúk tusan wakerajai. Tura antsu wia núnisan jinkiámua núnaka wakeratsjai” tímiayi.

<sup>30</sup>Papru nuna tuasua amikmatai akupniusha, uunt kapitíancha, Pirinísesha, tura nuí ashí pujuarmia nu wajakiarmiayi. <sup>31</sup>Tura arant wear, túrunamun chichasarmiayi. Tura tiarmiayi “Ju áishman mantamnamnian tunaamkachuiti tura penkesha sepunmasha enkeachminiaiti” tiarmiayi.

<sup>32</sup>Tura Akripia Jístun tímiayi “Ju áishman “uunt akupin nekarati” tíchaitkuinkia akupmai makuitji” tímiayi.

### Páprun Rúmanam akupkarmiania nu

**27** <sup>1</sup>Tura Páprun Ruma péprunam akupkatniun enentáimsarmiayi. Rúmaka tímiai, Itiaria nunkanam pujawai. Wisha Páprujai wémiajai. Pápruncha tura chikichnasha achikma ármiia nunasha Akustunu tutai suntara kapitíantrijíai nenakar akupkarmiayi.

Nú kapitíáni naari Júriuiti. <sup>2</sup>Tura Atramitiunmaya kanu Asia nunkanam pepru ármia nui wétasa pujumia nu enkemprarmiaji. Tura Tisarúnikianmaya áishman, ni naari Aristárku, in páchitkiauyayi. Tisarúnikiasha Masetúnia nunkanmaiti. <sup>3</sup>Nui enkemprar kashin tsawarar Sitiun péprunam jeamiaji. Nui jeawakrin kapitíán Juriu, Páprun waitnentak tímiayi “Ame amikrumiin wetá. Au firmasarti” tímiayi. <sup>4</sup>Tura Sitiunnumia jíinkir, kanujai wesar nase tukumpramprakrin Chipri núnkaka menanmaani aa ikiukmiaji. <sup>5</sup>Tura nayaantsanam wesar Sirisia tura Pampiria nunkanam ayamchik nankamakir Mira péprunam jeamiaji. Nuka Risia nunkanmaiti. <sup>6</sup>Nui jear nú kanu ikiukmiaji tura chíkich kanu Arijiántrianmaya taa Itiaria nunkanam wétasa pujumiayi. Nú kanunam suntara kapitíántri, enkempratarum, turammiaji. <sup>7</sup>Tura untsurí tsawant yáitmataik we-wémiaji tura ti wiántkar Nítiunam jeastatuk ajasmiaji. Tura nuisha nase tuke tukumkarta asamtai Sarmun nunkanam ayamchik nankaamakir, Kritia nunkanam áawinini ayamchik wémiaji. <sup>8</sup>Tura Kritia nunkanam ayamchik wesar itiurchat akui wáitsar wea-wéakuar “Shiir Pujutai” tutainium jeamiaji. Nusha Rasea péprunam tjiuchiiti. <sup>9</sup>Yáitmataik wea asar ti táasmaji. Tura yumi yututai jeatema asa ti tsúumainiuyayi nayaantsanam wétin. <sup>10</sup>Tura Papru chicharuk “Amikru antuktatum. Wi nékajai, yamaí wéakrikia ti tsúumainti. Kanusha tura káarak kanunam enketainia nusha menkarattawai. Tura iisha núnisrik kajinchatjiaish” tímiayi. <sup>11</sup>Suntara kapitíántrinikia Páprunka anturtsuk, kanú wianniurin kapitíántrincha tura kanú kapitíántrincha chichamen anturkarmiayi. <sup>12</sup>Tura nui Shiir Pujutai tutainium yumitin pujustin pénkerchaitkui “Nuinikia juyanka wéartai. Pinise péprunam jeamainchuashit” ashí tiarmiayi. Nú péprusha Kritia nunkanam nayaants ayamach pujawai. Nú péprunam yumitin pujustinian wakeriarmiayi, arakia nunkaani kakaram nase nú péprunam jeachu asamtai.

#### Tsúumainium wekasarmiania nu

<sup>13</sup>Tuma asamtai ukunam nase nunkaania tápiriri ajakui, ii wétin yamaikia pénkeraiti, tu enentáimsarmiayi. Túmakui kanu emetai jiru júusar jíinkir Kritisianam ayamchik wearmiaji. <sup>14</sup>Túrasha árusan arakia kakaram nase, Nuristi tuinia nu tukumpramiayi. <sup>15</sup>Nase kanun tukumpra asamtai iisha atsantratin penké tujinkiamiaji. Túmakui, áankisha juramkitiai tusar iniaisamiaji. <sup>16</sup>Tura Kritia nunkanam áawinini nankaamakur nuinikia nase ishichik mijiantmatai, uchich kanu japikir wémiaj nu ti takasar uunt kanunam enkermiaji. <sup>17</sup>Tura enkerar chapikjai uunt kanun jinkíáarmiaiyi wewe najanatai tusar. Tura náikim mukutniunam, Serti tutainium nase juramkishtajiaish tusar, kanunam yakí tarach aan itiararmiayi. Nu tarach nase útsuktin tusar nenarma ármiaiyi. Túrawar áyatik nase juramkitiai, tiarmiayi. <sup>18</sup>Tura kashin tsawarmatai

nasesha chíchimisha tímiatrusan kakaram aa asamtai kanunmayan káarak irunmia nuna nayaantsanam ajapawarmiayi. <sup>19</sup>Menaintiú tsawant nankaasmatai iisha ii uwejéjain kanunam káarak iruniarmia nusha entsá utsan karmiayi. <sup>20</sup>Tura untsurí tsawant tsawajisha etsantrachmiayi tura káshisha yaasha tsaparcharmiayi. Tura nasesha ti kakantar tukumpramkurin “Yamaikia uwempratin atsawai” tiarmiayi. <sup>21</sup>Tura iisha ti untsurí tsawant yurumsuk matsatu asakrin, Papru ajapén wajaki tímiayi “Amikru winia nuik Krítianmayan ka jíintsuk anturtukuitkiurminka yamá jü itiurchatnum pujutsuk tura emenkatmatsuk pujuajji’ tímiayi.”

<sup>22-24</sup>Yamá kashi winia Yusrú suntarí nayaimpinmaya wantinturkayi. Nú Yúsan umirkaitjiana nu akupturkayi. Tura nu taruti “Ashamkaipia Papru, turutui. Amesha Ruma péprunam uunt akupniunam jeattame. Tura chikichnasha ámiijai kanunam enketainia ásarmatai uwempratniun Yus tsan katkarai” turutui. Tuma asamtai, amikru, shiir enentáimsatarum. Atumsha mash uwemprattarme. Túrasha kánuka mesertatui. <sup>25</sup>Wisha winia Yúsrún nekas enentáimtajai. Yusa suntarí turutainia nuna nekas tu túrunattawai, tajai. Tuma asamtai kakartarum. <sup>26</sup>Tura chíchimisha nunka uchich pújakmanum nuí patatmittijai” tímiayi.

<sup>27</sup>Ayu, katurse (14) tsawant nankaasmatai nú kashi Atria nayaantsanam jemiayi. Nuí nase nánkamas juram wémiai. Nuyanka kashi ajapén wiantin armia nu nunka ámunam jeateman nekaawarmiayi. <sup>28</sup>Tura urutmá kúnakit tusa nekapmamiayi. Túram tráinta sais (36) mítruuyayi. Nuyasha ékemasn ataksha nekapmamiayi. Nuinkia painti siati (27) mítru nekapmamiayi. Tuma asa nunká anumsatuk ajasun nekaawarmiayi. <sup>29</sup>Tura kayanam ijiukají tusar ashamainiak kuaru jirun kijinian chapikjají kanú senkarin jin kiáwar entsá ajun karmiayi. Kijin asamtai, inít tepeámtai nase juramkichmi tusar túrawarmiayi. Tura wake mesekar, tsawarti tusar matsamarmiayi.

<sup>30</sup>Tura matsatainai wiantin armia nu, iikia uchich kanunam enkemprar pisarchatjias tu enentáimsarmiayi. Túmainiak kanú nujinia chíkich jirun ajuntai tawa nútiksaran uchich kanun ajuntai tusar pujuarmiayi. <sup>31</sup>Tura tuma wáiniak Papru suntara kapitántrín tura ni suntaríncha ujakmiayi. “Ausha uunt kanunman enketainiachkuinkia atumsha uwemprashtatume” tímiayi. <sup>32</sup>Tutai sunarsha uchich kanú chapikrín tsupirkar entsá ajun karmiayi.

<sup>33</sup>Tura kashin káshik Papru ikiakártasa wakerak tímiayi “Ishichkisha yurumátarum. Atumsha katurse (14) tsawant kánutsuk yurumsuk pujarme. <sup>34</sup>Seajrume, ishichkisha yurumárum kakaram ajastarum, uwemprataj tusarum. Iimiata, nekaatarum, imiatkisha túmatsuk péemkattarme” tímiayi.

<sup>35</sup>Nuna tuasua amik Papru apatkun achik Yúsan yuminsamiayi ashí íimmianuman. Tura puuk yuamiayi. <sup>36</sup>Tura apatkun yuan wáinkiar, ashí

aents shiir enentáimsar yurumáwarmiayi. <sup>37</sup>Nusha ashí aents irurmaka jimiará sián nuyá ataksha setenta sais (276) ármiai. <sup>38</sup>Yurumáwar ejemakar, yurumkanka entsá utsañkarmiai, uunt kanu wampú ajasat tusar.

### Kanu penké mesermiania nu

<sup>39</sup>Tura tsawarmatai wiantin armia nu, nunkan nekaacharmiai. Túrasha éñkentamunam káanmatak aan wáinkiar “Ái kanu anuntai” tiarmiayi. <sup>40</sup>Nuyá jiru entsá ajunman chapikrin tsupirkar entsá ikiukiarmiayi. Tura kanait jiníárma ármia nuna chapikrin tsupirkarmiai. Tura tarach kanú nujiin amia nuna nenakarmiai. Túram kanu káanmatkanam anumsatuk ajasmiai. <sup>41</sup>Tura wainchi jímiar ámunam jeá kanu entsá wayá tepeamiayi. Tura kanú senkarínkia chíchimi yakí takuir ajíamu asa kupintramiayi. <sup>42</sup>Suntarsha, achik júamu armia nú shuaran máataj tusa wakeriarmiayi, yukuak pisararain tusar. <sup>43</sup>Tura kapitíancha Páprun uwemtikrataj tau asa nuna túratniun tsañkatkachmiayi. Antsu chichaak “Emka yukuaktin nékarmena nu yukuakrum péemkatarum, tímiayi. <sup>44</sup>Nuyá chíkichkia kanunmayá numi, kame nánkamas numi achikrum awamkarum péemkatarum” tímiayi. Tu túrawar ashí iwiaakuk jíintrarmiayi.

### Marta nunkanam túrunamia nu

**28** <sup>1</sup>Tura ashí iwiaakuk jíintrar, nu nunka Marta naartin nekaamiayi. <sup>2</sup>Tura nuí matsamin armia nu, shiir awajtamsarmiai. Tuma asamtai iisha tsetsema asakrin, tura yumisha yútakui, uunt jinia ikiapárrarmiayi. Tura “anamaitiarum” turammaji. <sup>3</sup>Pápruka jinia kukarun ikiaanank jinium pataamiayi. Túmawai napi tsuéran ashamak jiinki, Papru uwejeñ nemaramiai. <sup>4</sup>Tura nú nunkanmayá aents, Papru uwejeñ napi nemaran wáinkiar “Jú áishmansha shuáran maichuashit, tiarmiayi. Nayaantsanmayá uwempraitiatan ni yusrí iwiaaku átinian suritiawai” tiarmiayi. <sup>5</sup>Páprusha ni uwejeñ pear napin jinium awanmiayi. Tura penkesha yajauch ajaschamiayi. <sup>6</sup>Tura niisha eárchatpiash tusar ii pujuarmiayi. “Túmatskesha jaka inianchatpiash” tiarmiayi. Túrasha ti núkap pujussha penké najaweachmiayi. Túrunamtai, nuínkia nusháa enentáimprar “Pápruka yúschashit” tiarmiayi.

<sup>7</sup>Nú nunkanam aentsu penkerí ámiayi ni naari Pupriu. Nú Pupriu ni jeen in itiaarmiami. Tura menaintiú tsawant yurumkancha suramsarmiai. <sup>8</sup>Tura nuí pujarin Pupriu aparí tsuer, numpajai ijiarki jáamiayi. Túmakui Papru werí iyumiayi. Tura Yúsán áujtus amik uwejeñ nin awantkamiayi. Túram penker ajasmiai. <sup>9</sup>Nu túramun nekaawar, nú nunkanmayá aents jaa armia nu tariar, niisha penker ajasarmiai.

<sup>10</sup>Túram incha ti shiir enentáimturmasar núkap ajampamsamiai. Túram ukunam ii wétin jeamtai ashí ii atsumamun suramsarmiai.

### Rúmanam jeawarmiania nu

<sup>11</sup>Ii wétsuk nú nunkanam menaintiú nantu pujusmiai. Tura nuyá chíkich kanunam enkempramiai. Nu kanusha Arijiántrianmaya yaunchu tau menaintiú nantu yumi yútakuí nuí pujumiayi. Nú kanu nujiin numiyus najankamu jímiar ekemiarmiayi, ni náarinkia Kástur tura Púruks. <sup>12</sup>Iisha nuí enkemprar weri Serakúsa péprunam jeamiai. Nuí menaintiú tsawant pujusarmiai. <sup>13</sup>Tura jíinkir nuyanka nayaantsa ayamach weri Rijiú péprunam jeamiai. Nuí kanarmiai. Tura kashin anariá nase suut umpuunti támiayi. Tuma asamtai nú kashinkia Putiuri péprunam jeamiai. <sup>14</sup>Nuí jeawakrin Yus-shuar pujuarmia nu, ni jeen juramkimiai. Tuma asamtai nuin chikichkí tumin pujusmiai. Tura nuyanka nunkan Rúmanmaani wémiayi. <sup>15</sup>Tura Rúmanmaya Yus-shuar, ii jeatniurin neka ásar jintiá inkiunmaktai tusar winiarmiayi. Chíkichkia Apiu pepru támanum táarmiayi, tura chíkichkia, Menaintiú Jeá tutainium táarmiayi. Nuna káunkan wáiniak Papru shiir enentáimias Yúsan yuminsamiayi.

<sup>16</sup>Tura ii Rúmanam jeawakrin kapitián Juriu achikia yarumman Rúmanmaya uunt kapitiánin ejetimiayi. Túrasha, Pápruka jeá ikiamas niisháa pujustí, tiarmiayi. Tura Páprun ísat tusa chikichík suntarnak ni jeen apjatusarmiayi.

### Rúmanam Papru Yus-Chichaman etserkamiania nu

<sup>17</sup>Nuyá menaintiú tsawant nankaasmatai Pápruka Rúmanmaya Israer-aentsu penkerin untuk ikiaanak “Yatsurtiram antuktatum. Wisha Israer-áentsun yajauchin penké túrachmiajai. Tura ii uuntri akupkarmia nunasha yajauch chicharkachmiajai. Tuma ain Jerusarénum winia achirkar Rúmanmaya áentsnum surutkarmiayi. <sup>18</sup>Tura nu aencha winia anintsar, akupkatai, turutiarmiayi, wisha penké yajauchin, mantamnamnia tímianu túrachu asamtai. <sup>19</sup>Túrasha Israer-shuarka “Atsá, akupkairap” turutiarmiayi. Nu tuma asamtai, “antsu uunt akupin nekarati” tímiajai. Wikia wíi shuara tunaarin kapitiánin ujaktinian táchaitjai. <sup>20</sup>Tuma asamtai, yatsurtirmin, atumin untujukarme chichastaj tusan. Yusa anaikiamuri, Israer-shuarti náakajnia nu táwiti wi tu étserkui, juí achikiar jinkiámu pujajai” tímiajai Papru.

<sup>21</sup>Tutai niisha tiarmiayi “Iisha Jutía nunkanmaya aentsti, ame yajauch túramu papí penké wáinkichuitji. Tura ii shuar nuyá táarainia nusha “au yajauch túraiti” tu ujatmakcharmaji. <sup>22</sup>Túrasha ashí nunkanam yamaram chichaman jintinian yajauch chicharainiawai tama antukji. Tuma asamtai amesha nu warintia enentáimtam nekaatai tusar wakeraji” tiarmiayi.

<sup>23</sup>Nú tsawantai iruntrami tiarmia nú tsawant jeamtai, ti untsurí aents Papru pujamunam iruntrarmiayi. Papru jintintiainiak Muisais yaunchu

aar akupkamia nujaj tura chíkich Yúsnan etserniu aarmarijjaisha, Jesus nekas Yusa Anaikiamurinti tusa paant jintintiawarmiyai. Nuna tura káshik nankaama Yus akupeamunam pachiinkiatniun étse-étserkua kjaraj iniaisamiyai. <sup>24</sup>Tura Papru táman antukarmia nu, chíkichkia, nekasaiti tusar umikiarmiyai. Tura antsu chíkichkia, nekaschaiti tusar umikcharmiyai. <sup>25</sup>Chikichkí enentaik<sup>i</sup> enentáimsatin atsá asamtai, jinki weartasa pujuarimiyai. Túmainiakui Papru chichaak “Nékasen Yusa Wakaní yaunchu Yúsnan etserniu, Isayas naartin áarmarijjaí ii úuntrin chicharuk juna tímiyai:

<sup>26</sup>“Ame weme au aents ju titia:

“Ántutka ántakrumsha nekaashtatrome,  
Íitkia iyakrumsha wáinkiashtatrome.

<sup>27</sup>Warí, au shuara enentáí katsuárai;

Kuishijjaí ántaksha ántichua núnin ániawai,

Jiisha epetkamua áanin ániawai,

Iyaksha wáinkiaíin tusa, ántaksha antukain tusa

Enentáimkiusha nekaawain tusa,

Winí uwemprain tusa, tura Winí tsuamarain tusa túrunayi”.

Nuní áarmaiti. <sup>28</sup>Tuma asamtai, nekaatarum. Yamaikia Yusaj uwempratin ana nuna Israer-shuarsha susamuiti. Tura ninikia nekas umikiartatui” tímiyai. <sup>29</sup>Tura Papru nuna tì iniaisamtai Israer-shuar nuamtak núkap chicharnaiyasua wearmiyai.

<sup>30</sup>Tura Pápruka nuin jea ikiamsamunam jimiará uwí pujusmiyai. Tura ashí aents nin iyutaj tusa wearmia nuna ni jeen itiaamiyai. <sup>31</sup>Tuma asamtai Papru arantutsuk urukuk Yus akupeamunam ati, Uunt Jesukrístu túramuríncha ashí etserkamiyai. Nútiksan etserkatniuncha Páprun penké suritkiacharmiyai.



# Papru

## RÚMANMAYA SHUARAN

### papí akuptukma

---

#### Papru Rúmanmaya Yus-shuaran áatramania nu

**1** <sup>1</sup>Wi Papru Jesukrístu takarniuitjai. Núnisañ Yus achirak ni Shiir Chichamen etserkat tusa akatar akuptukmiayi.

<sup>2</sup>Nu Chichamun Yus yaunchu “akupkattajai” tímiayi. Núnaka Yúsna etserin Yus-Papinium paant ujakarmiayi. <sup>3</sup>Nu Chichamnum Yus ni Uchirín áujmatuí. Ayashijjainkia Tawit weeanum akiiniamiayi. <sup>4</sup>Tura ni tishiir wakanjainkia Yusa Uchirínti. Tura ti kakarmaiti. Jakamunmaya nantakmiajai nekas Yusa Uchiría nu, paant nekanamiayi. Niisha ii Uuntri Jesukrístuiti. <sup>5</sup>Ni túramujai Yus shiir enentáimturuk nu Shiir Chichaman etserkat tusa akuptukmiayi. Núnisañ ashí nunkanmaya shuar nu chichaman umirkar Jesusa náarín shiir awajarat tusa akuptukmiayi. <sup>6</sup>Atumsha nuyá shuaraitrume. Tura Jesukrístunu ajasarat tusa Yus achirmakuitrume.

<sup>7</sup>Ashí Yus aneamutirmincha Rúmanam matsatrum nuna ju papin áateajrume. Yus ti péñker awajtamsatniun wakerutmarme. Ii Aparí Yussha ii Uuntri Jesukrístusha waitnentramainia ásar imiatkinchanum ti shiir pujustinian yainmakarti.

#### Papru Ruma péprunam irautinian wakerimiania nu

<sup>8</sup>Émkasha, átum Yus nekas enentáimtamun ashí nunkanam áujmatenan nekaan Jesukrístun pachisan Yúsna ti shiir yuminsajai. <sup>9</sup>Tuke enentáirjai Yusa Uchirín ashí shuarnum etsertajai. Túrakui wi atumin ti Yus aneamutirmincha Rúmanam matsatrum nuna ju papin áateajuke áujtamun Yus nékarui. <sup>10</sup>Ashí tsawant ni wakerutakuinkia íitjarum tusan Yúsna seajai. <sup>11</sup>Nekas íitniun wakerajrume. Nuñ jean

wakanmin yainkian Yusjaj kanakchamin ajasúk tusan wakerajrume. <sup>12</sup>Kame atumsha tura wisha Yus nekas enentáimtuinia asar mai ikiakánai ajatai tusan wakerajai.

<sup>13</sup>Yatsurú, tuke ítjarum tusan wakerimjiarme. Túrasha iyatsjarne. Kame Yus-Chichaman ujaakun chíkich shuarnuma áintsan atumíncha Yus kakaram takasman wáinkiatniun wakerajai. <sup>14</sup>Wikia Yus akuptuku asantai ashí shuaran ujákártiniatjai. Unuimiaruncha tura unuimiaruncha, ti nékainia nunasha tura nékachuncha, métekrak ujakartiniatjai. <sup>15</sup>Tuma asan atumniasha Rúmanam pujarmena nunasha Uwempratin Chichaman ujjaitjarum tusan pujajai.

### Uwempratin Chicham kakarmaiti

<sup>16</sup>Nu Shiir Chicham Yusa kakarmarijjaj ti kakaram asa ashí shuaran uwemtikramniaiti. Tuma asantai natsantatsjai. Nekas Israershuarnasha tura chíkich shuarnasha núnisan uwemtikramniaiti. <sup>17</sup>Nu chichamnum Yus enentáimsamia nu páantaiti. Júiti: Áyatik Yúsan nekas enentáimtuiniakui Yuska “pénkeraitme” tíminiaiti. Yus-Papiniumsha núnisan tawai: “Yúsan nekas enentáimta nuna Yus “pénkeraitme” tutai tuke Yusjaj shiir wekasattawai.” Tu áarmaiti.

### Aentsu tunaari

<sup>18</sup>Shuar nekas chichaman nakitrar yajauchin túrataj tusar suriimiainiawai. Túrawar tuke tunaarintin áiniawai. Nu shuaran Yus ti kajerkar ti asutiátniun nayaimpinmayá paant awajsaiti. <sup>19</sup>Tura nu shuarka ashí Yusna nekaamnia nuna Yus paant awajsa asantai pénker nékainiawai. <sup>20</sup>Kame yámankamtaikniumiá Yus wáinchataitiat ni najanamurijjai júka paant nekaamniaiti: Nekas Yus asa tuke kakarmaiti. Nusha ti paant asantai nu shuar tsankurnarchartatui. <sup>21</sup>Yúsan nékainiayat shiir awajsacharmiyai tura yuminsacharmiyai. Tuma ásar aya ánta nunak enentáimtuiniak ni enentái tunaajaj piakai. <sup>22</sup>Tura ti nekajai tuíniayat enentáimcha núnin ajararai. <sup>23</sup>Túmainiak jákachmin Yus imiá shiira nuna iniaisar shuar jakamnia nakumkamun shiir awajenawai. Tura nu arant nanamtinniasha napincha kuntinniasha yajasmancha nakumkar nuna shiir awajenawai.

<sup>24</sup>Nu asantai imiá yajauch enentáimiainiakui “áanik asati” tímiyai Yus. Túramtai ti natsanmainian túrunainiawai. <sup>25</sup>Yusna imiá nekasa nuna nakitrar antsu wait-chichaman anturkar nuna túrin áiniawai. Tuke Yúsak shiir awajsatniun iniaisar antsu ni najanamun tikishmatainiak shiir awajenawai. “Antsu tuke Yúsak shiir awajnastí” tajai.

<sup>26</sup>Nuna túrin áarmatai Yus natsanmainia nuna wakeruktinian tsankatkarmiyai. Túramtai nuwasha áishmanjaj tsanintinian nakitrar nuamtak yajauch awajnainiawai. <sup>27</sup>Núnisan áishmansha nuwajaj

tsanin̄tinian iniaisar nuamtak áishman̄kak tsanirmanainiawai. Ti wakerunainiak ti natsanmainia nuna yajauch túrunainiawai. Tura yajauch túruiniak ni ayash̄j wáitsatniunak sumamawarmiayi.

<sup>28</sup>Tura tuke Yúsan nakitiainia asamtai ti yajauch enentáimiainiak pen̄ké túrachminia nuna túrawarti tusa Yus tsan̄katkarmiayi. <sup>29</sup>Nu shuar ti tunaajai piaku áiniawai. Tsanirmausha aya kuítniak wakerincha tura yajauch awajin̄ áiniawai. Nu arantcha awakmakun kajerniusha man̄kartincha tuke máanaincha anan̄kartincha pen̄kercha awajkartincha, tsanumniusha áiniawai. <sup>30</sup>Nu arantcha chikichnasha yajauch áujmatin áiniawai. Yúsnasha nakitiainiawai. Áimniusha áiniawai. Tura “pen̄keraitjai” tiar nan̄kaamantu enentáimtumainiawai. Tunáa túratniun eainiawai. Aparin̄cha nukur̄incha umirainiatsui. <sup>31</sup>Enentáincha áiniawai. Tana nuna umichu áiniawai. Aneñkartichu ásar waitneñkartichu áiniawai. Tsan̄kurcha áiniawai. <sup>32</sup>Yuska “Shuar nuna túrinkia jákatniuiti” taman nékainiyat tuke túrukin wénawai. Tura nu arantcha chíkich yajauch túramtai ti shiir wararenawai.

### Shuar tunáa túramun Yus paant nékawai

**2** <sup>1</sup>Amesha enentáimtumastá. “Shuar nu yajauchin túrana nu imiá tunáa shuaraiti” tákumka amesha métek túrakum imiá nekas sumamame. <sup>2</sup>Yuska nu tunaan túrin ainia nuna súmamtikiashtinkiait. <sup>3</sup>Amesha nuna túrin “imiá yajauchiiti” táyatam amesha métek túrakminkia Yus sumamtikiattana nuyá ¿itiurak uwemprattam? <sup>4</sup>Yus ti waitnentrama asa nu tunáa ikiukim Nin enentáimtustinian katsuntramuk nákarmawai. Tura pen̄ker asa wárik asutiámchakui sumamashtiniaitjai ¿tu enentáimtumamek? Tu enentáimkium ni waitnentrammari ántar awajsaitme. <sup>5</sup>Tura tunaarum enentáimtutsuk tuke túrakmeka súmamtikiatin tsawantai ti tunáa irutmampramujai ti asutniáttame. <sup>6</sup>Nu tsawantai ni túramujai métek Yus ashí shuaran akirartatui. <sup>7</sup>Shuar tuke pen̄ker túrak ashí shiira nunasha tura tuke amuukachmin ainia nunasha wakeruiniana nuna Yus tuke iwiaaku Nijijai shiir pujustinian sústartatui. <sup>8</sup>Antsu pen̄kera nuna wakerutsuk antsu aya yajauchin wakeruiniak Yúsan nakitiainia nuna Yus ti kakerak asutiáwartatui. <sup>9</sup>Nekas Israer-shuarsha tura núnisan̄ Israer-shuarchasha tunaan túrin áiniakka ti wáitsartatui. <sup>10</sup>Antsu nekas Israer-shuarnasha tura núnisan̄ Israer-shuarchan̄cha pen̄ker túrin áinia núnaka Yus ti shiir imiatkinchanum apujsartatui. <sup>11</sup>Yus ashí shuaran akantsuk mai metek iyawai. <sup>12</sup>Shuar Muisais akupkamun nékatsuk tunaan túraka aya júnisan̄ sumamawartatui. Tura shuar Muisais akupkamun nékayat tunaan túran̄ka nu akupkamujai sumamawartatui. <sup>13</sup>Akupkamun aya antukarua nuka Yusai pen̄ker áiniatsui antsu antukar umirainia nuna Yuska “pen̄keraiti” tawai. <sup>14</sup>Israer-shuarchaka Muisais akupkamun takakainiachkusha aya ni enentáijjai nu akupkamun

umirainiak <sup>15</sup> nu umireamujaj Yus nu akupkamun ni enentáin ikiursarua nuka paant nekaamniaiti. Nujaj métek túruiniak shiir enentáimiainiawai. Tura métek túruiniachkunka péñkercha enentáimiainiawai. <sup>16</sup> Wi Uwempratin Chichaman étsereaj nu ashí shuar uu<sup>u</sup>krissha túramun ashí paant awajsartatui. Tura nuna etserkatniun Jesukristun anaitiukmiayi. Nu tsawantaj tunaan túrin sumamawartatui.

### Israer-shuarsha Muisais akupkamun umircha áiniawai

<sup>17</sup> Ámeka “Tura Israer-shuaraitjai. Muisais akupkamun takakui winia Yúsruka ti shiir enentáimturui, tátsumeash. <sup>18</sup> Yus wakeramuncha nékajai. Tura akupkamun nekaan péñkera nuna wakerajai, tátsumeash. <sup>19</sup> Wakannium kusuraru áinia nunasha jintintiamniaitjai. Tura tsáapninian nekamtikiawarminiaitjai, tátsumeash. <sup>20</sup> Akupkamu ti péñker neka asan nekasa nuna unuimiaruitjai. Tuma asan nékachuncha ántuiniachuncha jintintiamniaitjai” tátsumeash. <sup>21</sup> Pai, chíkichka unuiniatiatmesha ¿urukamtaí imia ámeka unuimiatsum? “Kasamkashtiniaiti” tu étsereatsmek. Táyatmesha ¿urukamtaí ámeka kasamam? <sup>22</sup> “Tsanirmashtiniaiti” tátsumek. Enta, ¿urukamtaí ámeka tsanirmam? “Ántar-yusan nakítiajai” tátsumek. ¿Urukamtaí ámeka nu yusa jeeniá kasamam? <sup>23</sup> Akupkamun takakjai tusam shiir enentáimtumayatam nu akupkamu umireachkum Yus yajauch awajeatsmek. <sup>24</sup> Yus-Papiniumsha núnis áarmaiti: “Átum péñker umirchamujaj Israer-shuarsha Yúsán yajauch chicharainiawai.”

<sup>25</sup> Muisais akupkamia nu ashí umireakmeka nii timia núnismek tsupirnaktin péñkeraiti. Tura takamtsuk umireachkumka tsupirnakcha núnisketme. <sup>26</sup> Chíkich shuarsha tsupirnakchaitiat Muisais akupkamun umireakka tsupirnakkesha tsupirnakua áintsankete. <sup>27</sup> Nu shuar tsupirnakchaitiat akupkamun ashí umireak atumin tsupirnakutirmin akupkamu takakuitiatrum umircha asakrumin súmamtikramawartatui. <sup>28-29</sup> Kame nekas Israer-shuarka aya pátatkechu antsu tuke enentáijjaj Yúsán wakerá núiti. Núnisan nekas tsupirnakpinkia aya ayashíjjajinchuiti antsu enentáiniam shiir átinia núiti. Nekas akupkamu aya áarchamuiti antsu nekas enentáijjaj umirkamua núiti. Nekas tú tura núnaka aents shiir enentáimtuiniachkuisha Yus shiir enentáimtai.

**3** <sup>1</sup> Núnis aisha Israer-shuar ainia nu ¿warí péñkernak takakainia? Tura tsupirnaktincha ¿wariniak yayá? <sup>2</sup> Ti péñkeraiti. Warí, émkaka, Yus ni chichamen Israer-shuaran súsacharmakia. <sup>3</sup> Kame chíkich chíkich umichu áiniakui Yus tsan<sup>u</sup>katkamia nuna nú shuaran súsachmatainkia nuikia “Yus umichuiti” ¿títinkiait? <sup>4</sup> Péñkea. Antsu Yuska nekas túratniua nujaj métek ashí túriniaiti. Shuar umichu áiniakuisha ni támarin mash umiktatui. Ni tamajaj shuarán wáitrin awajeakka nusha péñkeraiti. Núnisan atí. Yus-Papisha métek tawai:

“Támena nuna “imiá nekasaiti” tiartatui, tura súmamtikramataj tuíniakuisha nupetmaktatme” tawai.

<sup>5</sup>Nu arantcha, “Wi tunaan túramujaj Yús imiá péñkera nuna paant awajeakka çurukamtaí winia asutiua? ¿Nuka péñkerkait?” tíchatapash. (Kame aents chichainia núnisnak tajai.) <sup>6</sup>Warí, Yús péñkerchaitkiunka çitiurak ashí shuara tunaarín súmamtikiawarat? Kame imiá péñkeraiti.

<sup>7</sup>Núnisan, “Wi umirkachmajaj Yús tuke umiiniana nuna paant awajeaknaka nuikia nujaj in shiir awajsamtaí çurukamtaí “tunaitme” túruta?” tíchatapash. <sup>8</sup>Warí, “tunáa túramujaj Yúsan péñker awajeajai,” tú nekas enentáimpramniaitkiuinikia shuar nuikia “Wats, ashí péñker áti tusar tunáa túratai” tímin ainti. Kame chíkich shuar in kajertamainiak “nuna jintintiainiawai” túramji. Nu shuar sumamawartin ániawai.

### Ashí shuar tunáa túraitji

<sup>9</sup>Nuikia Israer-shuartikia chikichjaj nankaamas çpéñkerkaitiaj<sup>i</sup>? Penkesha. Warí, Israer-shuartisha Israer-shuarchajajisha ashí métekrak tunaan túrin ániawai. Núnaka jú áarmajaj paant awajsaitjai. <sup>10</sup>Yús-Papisha núnisan tawai:

“Péñkeran túrin chikichkisha atsawai.

<sup>11</sup>Yúsnan nekaatniun nakitiainiawai. Yusnasha eainiatsui.

<sup>12</sup>Yusnumia kanakiar menkakatniunam wénawai. Chikichkisha péñkeran túrin penké atsawai.

<sup>13</sup>Ashí yajauch chichainiak iwiarsamu yama urainua núnisan ániawai. Ni chichamejaj tuke anankartin ániawai. Chichame napía áintsan najamin ániawai.

<sup>14</sup>Aya yajauchin kakaram áujmatin ániawai.

<sup>15</sup>Máataj tusa wárik yujarin ániawai.

<sup>16</sup>Aya ti itiurchat ti yajauch awajin ániawai.

<sup>17</sup>Shiir pujustinian nékainiatsui.

<sup>18</sup>Ishichkisha Yúsan ashamenatsui.”

<sup>19</sup>Yaunchu akupkamun umirkatin ainia nú shuar aya tákamtak umirkatin ániawai. Tuma asamtaí ashí shuar umirkachu ásarmatai Yús nujaj súmamtikiawartatui. Túrakui niisha pachischamin ániawai. <sup>20</sup>Akupkamuka aya ii tunaarín paant awajturmajai. Tuma asamtaí akupkamu péñker umirkatniujaj Yús “péñkeraitme” turamchamniaitji.

### Aya Yús shiir enentáimtusar uwempramniaitji

<sup>21</sup>Yús-Chicham yaunchu áarmanum itiura Yús in “péñkeraitme” túramminiaitaij nuna paant tawai. Kame akupkamujajinchuiti. <sup>22</sup>Antsu iisha ashí shuarsha núnisan aya Jesukrístu shiir enentáimtakrin Yús “péñkeraitme” túramminiaitji. <sup>23</sup>Kame ashí shuarti tunáa túraitji.

Tuma asar Yusjaj métek péñker ajastin penké jeatsji. <sup>24</sup>Tura Yus in waitnentrama asa kuitchajaj “pénkeraitme” túramji. Jesukrístujaj uwentikrampra asa túramji. <sup>25</sup>Tura Krístun akupkamiayi ni jakamujaj ashí tunaan asakátratniun. Túramtai shuar Nin nekas enentáimtuiniakui Yus tsan̄kuramniaiti. Yaunchu tunáa túramun katsunteak enentáimtuschiayi. Yamái tsan̄kuramnia nuna yaunchu nekáa, nuna túramniuyayi. <sup>26</sup>Tura yamaiya tunaancha tsan̄kureak ashí shuar Jesusan nekas enentáimtuinia nuna “pénkeraitme” tuke tíminiaiti. Kristu jakamujaj nuka paant ajasai.

<sup>27</sup>Nújajinkia ii péñker ajasjina nu “winia kakarmarjaj túrunajaj” tíchamnia asar çnan̄kaamantu enentáimtumarminkaitaj? Penkesha. Warí, akupkamu umitsuk aya Kristu nekas enentáimtakin Yus “pénkeraitme” túramji. <sup>28</sup>Nujaj páantaiti. Akupkamu umirtsuk aya Jesukrístu shiir enentáimtakin Yus “pénkeraitme” túramminiaitji.

<sup>29</sup>Warí, Yuska Israer-shuarnasha tura núnisan̄ Israer-shuarchancha mai ni Yúsriñchukait. <sup>30</sup>Kame aya chikichik Yúschakait. Tura tsupirnakuncha tsupirnakchancha mai metek aya Jesukrístun nekas enentáimtuiniakui “pénkeraitme” tíminiaiti. <sup>31</sup>Shuar Yúsan shiir enentáimtamujaj péñker ajastin áiniakui nujaj çakupkamu ántar awajsamukait? Atsá. Antsu nuna nan̄kaamas umirkatin awajsamuiti.

#### Apraámsha Yúsan shiir enentáimtamujaj péñker ajasmiania nu

**4** <sup>1</sup>Ashí Israer-shuara uuntri Apraám enentáimtustai. Niisha çitiurak Yusjaj péñker ajasma? <sup>2-3</sup>Ni péñker takasmajaj Yusjaj péñker ajasuitkiun̄ka nan̄kaamantu enentáimtumarainti. Antsu Yus-Papí tawai: “Apraám Yúsan shiir enentáimtakui Yus “pénkeraitme” tímiayi” tawai. Nu túramu asa Apraámsha Yus íimmianum nan̄kaamantu enentáimprachminiaitai. <sup>4</sup>Shuar íniamna nu takasmatai çaya tsan̄ka asam akiktatmek? Warí, ni takasmanum páchitsuk akikchatniukait. <sup>5</sup>Antsu shuar ni péñker turamuri enentaimtsuk áyatik “Yus tunáa shuaran péñker awajniuiti” tu enentáimtakui Yuska tsan̄ka asa “pénkeraitme” tawai. <sup>6</sup>Tura péñker túrachunak Yus “pénkeraitme” takui nu shuar shiir warasminiaitai. Núnisan̄ tawai uunt akupin Tawit:

<sup>7</sup>“Shuar ashí ni tunaarjñ Yus asakátar tsan̄kuramu ana nuka shiir enentáimpramniaiti.

<sup>8</sup>Uunt Yus ni tunaarjñ enentáimtachma asa ti warasminiaitai.” Tu tímiayi Tawit.

<sup>9</sup>çAya tsupirnakukeash warasminiait? Tura tsupirnakchasha waraschamniakait. Warí, Apraám Yúsan shiir enentáimtakui Yus “pénkeraitme” tímiayi. <sup>10</sup>Tura Apraám tuke tsupirnatsajñ Yus nuna tímiayi. Emka Yus “pénkeraitme” timia nú ukunam Apraám tsupirnakmiayi. <sup>11</sup>Apraám tsupirnatsuk Yúsan shiir enentáimtusmatai

Yus “pénkeraitme” tusa “tsupirnaktiniaitme” tímiayi. Nújajinkia ashí Yúsan shiir enentáimtuinia nú shuar tsupirnatskesha Apraám weeá ániawai. Tura nu shuaran Yus “pénkeraitme” tawai. <sup>12</sup>Tsupirnakuasha aya tsupirnaku asa Apraám weeá ániatsui antsu nu arant Apraámjaj métek Yúsan shiir enentáimtuinia nuka Apraám weeá ániawai. Kame Apraám tuke tsupirnatsuk Yúsan shiir enentáimtusmiayi.

#### Yus shiir enentáimtamujaj Nii timia nu uminkiattawai

<sup>13</sup>Yaunchu Apraáman Yus chicharuk “Amincha amée weeá shuarnasha jú núnkan susattajaj” tímiayi. Nunasha Apraám Yus akupkamun umireakui tíchamiayi. Antsu Apraám Yúsan nekas enentáimtakui Yus “pénkeraitme” taku nuna tsan̄katkamiayi. <sup>14</sup>Kame aya akupkamun umirniun súsatniuitkiuin̄kia nuikia Yus enentáimtustin ántrai. Tura Yus Apraáman timia nusha ántrai. <sup>15</sup>Akupkamu akui shuar umirkachka ti asutniáshtatuak. Tura atsakuin̄kia ¿asutniátniukait? ¿Itiurak umirtsuk ikiuktin?

<sup>16</sup>Tuma asamtai Yus ti anen̄kartin asa Nin nekas enentáimtuinian ashí tsan̄katkai. Nújajinkia Apraám weeasha Yus Apraáman timia nuna páchitsuk wáinkíártatui. Iisha Apraámjaj métek Yus nekas enentáimtakur ní weeitji. Tuma asamtai Muisais akupkamun umirniuncha tura umirniuchuncha mai metek ashí in Yus ashí Apraáman timia nuna tsan̄katramkattaji. <sup>17</sup>Kame Yus-Papinium Apraám áatramuuti: “Untsurí shuarsha amée weeá ajasartatui.” Nu asamtai iisha Apraámjaj métek Yus shiir enentáimtakrinkia Yus incha Apraám weeá áintsan̄ úirmaji. Nú Yuska ti kakaram asa jakancha iwiaaku awajniuiti; tura atsana nunasha ana nútiksān̄ nájānu.

<sup>18</sup>Yus “ti pampantatme” takui Apraám ti uuntach áyat Yus timian enentáimtak yajutmartinian nákasmiayi. Nujaj untsurí shuar ní weeá ajasarmiayi, Yus timia áintsan̄. <sup>19-20</sup>Apraámsha sian̄ (100) uwí takakuiat tura ni nuwé Sarasha júretsuk uunt ajasmataisha tuke iniaitsuk Yus tímia nuna nekas enentáimtusmiayi. “Yus nekasash ta” tútsuk shiir awajsamiayi. Nujajisha nuna nan̄kaamas kakaram ajasmiayi. <sup>21</sup>Tuma asa “nekas Yus tana nuna páchitsuk umiktatui” tu enentáimpramiayi. <sup>22</sup>Nu asamtai Yus “pénkeraitme” tímiayi.

<sup>23</sup>Tura Yus nekas enentáimtamunam Yus “pénkeraitme” tana nu aya Apraámnak áatrachmaiti. <sup>24-25</sup>Antsu incha túramji. Iisha núnisrik ii Uuntrj̄ Jesus nekas enentáimtakrinkia Yus incha “pénkeraitme” turamtatji. Jesuska ii tunaar̄in jarutramkatniun surunkamiayi. Tura nujaj Yus in “pénkeraitrume” taku Jesusan ataksha iniantkimiayi.

#### Yus “pénkeraitme” túramkurin shiiraiti

**5** <sup>1</sup>Tuma asamtai Yus nekas enentáimtakrin Yus “pénkeraitme” túramji. Nujaj iisha Yusjaj shiir nawamnaikiar pujaji. Núnaka

ii Uuntri Jesukrístu ni jakamujai sumartamkamiaji. <sup>2</sup>Tura Nii shiir enentáimtakur Yusai weankaitji. Tura Kristu jarutramkakin Yus ti anenmaji. Tura tuke anenma asakrin Nijijai métek shiir ajastin nákakur waraaji. <sup>3</sup>Nu arantcha yamá itirchat pujayatrik nu itirchatjai unuimiaratji tusar waraaji. Katsuntratniuncha unuitiamji. <sup>4</sup>Tura nu unuimiarar ii katsuntramu paant átatui. Tura nuyá Yus ti shiir awajtamsattajnia nuka shiir enentáijiai nákastatji. <sup>5</sup>Nu ti shiir enentáimsar nákamujai ananmamtsuji. Yuska ni Shiir Wakanin ii enentáin pujurtamuk ni anenkartutairin ti paant awajturmaj. Tuma asamtai Yus túratin nákaajnia nu imiá nekas wainkiattaji.

<sup>6</sup>Iikkia penké uwemprachmin asakrin tsawant jeamtai Kristu ashí shuara tunaarín jarukmiayi. <sup>7</sup>Shuar chíkich shuaran uwemtikratniun ¿jaruktatuak? Pénker shuar ain jarukchattawai. Kame ti penkeraitkiuinikia jarukchaintiash. <sup>8</sup>Antsu ii tuke tunáa árinin Kristu jarutramkamiaji. Nujai in ti anenmajnia nuna ti paant iniakturmaji. <sup>9</sup>Tura ni numpejai tunaaríncha awajsamu asar imiá nekas Yus asutiámatniua nuyá uwempraitji. <sup>10</sup>Yusa nemasri áyatar Yusa Uchirí jakamujai yamaikia Yusjai shiir nawamnaikiar pujaji. Nu arant nujka Kristu tuke iwiaaku asa iijai tsaninkiu asa ashí yajauchinmaya uwemtikramar tuke shiir awajtamsattaji. <sup>11</sup>Ii Uuntri Jesukrístu jakamujai Yusjai shiir nawamnaikia asar ti waraaji.

### Atansha tura Krístusha túrawarma

<sup>12</sup>Ayu. Yámankamtaik emka áishman Atan niniki tunaan túramtai nú tunaajai ashí shuar tunaarintin ajasarmiayi. Tura ashí tunaarintin ajarar mash jákatin ániawai. <sup>13</sup>Akupkamu atsakuinikia umirkachma nekaachminiaiti. Tuma ain Muisais akupkamu atsaisha tuke tunaan túrin ármiai. <sup>14</sup>Atan pujumia nuyá Muisais tuke akupeatsain shuara tunaari paantcha ain ashí shuar tunaan túrawar jákarmiayi. Kame ni tunaari Atanna áintsachauyayi. Atanka Yus akupkamu paant ujakman umirkachmiayi. Antsu nu shuar Yus akupkamu paant nékainiachiatan tunaan túrin ániak jákarmiayi. Tura Atanka Krístujai apatkar enentáimpratai.

<sup>15</sup>Atan tunáa túramia nujai apatka iisam, Yus in tsankatramaj nuka nankaamas penkeraiti. Kame Atan niniki tunaan túramujai ashí aents untsurí armia nu, tunaarintin ániak, jákarmiayi. Tura Yus in ti anenma asa chikichik áishmanjai nuna nankaamas tí shiiran tsankatramaji. Jesukrístujainikia untsurí shuaran uwemtikrar ti shiiran tsankateawai. <sup>16</sup>Atanka tunaari imiá yajauch ain nuna nankaamas penkeran Yus tsankatramkaitji. Iis, aya chikichik tunaan túramujai aents sumamawarmiayi. Antsu Yus uwempratniun tsankatramaj nújainikia ti untsurí tunaan asakáruiti, tura “penkeraitme” túramji. <sup>17</sup>Chikichik



áishman̄ tunaan túramujaj̄ aents jákatin áiniawai. Tura nuna nan̄kaamas chikichik áishman̄ Jesukrístu túramujaj̄ ti shiir pujustat̄ji. Kame Yus ti anenma asa ii pēnker túratsrinin̄ “pēnkeraitrume” túram̄ji. Nu asamtai yamaram iwiaakmanum kakaram ajaji.

<sup>18</sup>Atan̄ tunaan túramujaj̄ ashí tunaarintin̄ ajasar jákarmiayi. Núnisan̄ Jesukrístu pēnker túramujaj̄ ashí shuar Yus “pēnkeraitme” timia nuka yamaram iwiaakmajaj̄ tuke pujusartatui. <sup>19</sup>Núnisan̄ chikichik áishman̄ umirkachmajaj̄ untsurí tunaarintin̄ ajasarmiayi. Tura chikichik áishman̄ umirkamujaj̄ untsurí shuar pēnker awajnasarmiayi.

<sup>20</sup>Wats, tunáa ti paant atí tusa Yus ni akupkamurin̄ susamiayi. Túrashati tunáa pampaakuí Yus nuna nan̄kaamas waitnentramak nu tunaan asakátram̄ji. <sup>21</sup>Shuar tunaan túrin̄ ásar jákatin áirmiayi. Tura núnisan̄ ii Uuntr̄i Jesukrístu túramujaj̄ Yus in “pēnkeraitrume” túramkurin̄ iisha tuke iwiaaku pujustiniait̄ji.

### Krístujaj̄ jaka asar tunáa túrachminiait̄ji tura

#### Krístujaj̄ tsan̄n̄kiu asar iwiaakuit̄ji

**6** <sup>1</sup>Núnisait̄kiuin̄kia Yus nan̄kaamas waitnentrampratai tusar ζtunáa túrat̄tajik? <sup>2</sup>Pēnkea. Warí, iikia tunáa túrashtin̄ jákait̄ji. Jáka ζitiurak tunaan túramniait̄? <sup>3</sup>Imianniutikia Krístujaj̄ tsan̄n̄kiu asar imianir Nijijaj̄ métek jaka áintsar aji. <sup>4</sup>Tura imianir Krístujaj̄ jaka áintsar métek iwiarnasuit̄ji. Tura Yus ti kakaram asa Krístun̄ jakan iniantkimia núnisan̄ incha nu kakarmajaj̄ yamaram enentáijaj̄ pēnker wekasat̄niun̄ iniantamkimiaji.

<sup>5</sup>Krístujaj̄ tsan̄n̄kiu asar Nijijaj̄ métek jaka áintsan̄ket̄ji. Tura núnisan̄ Nijijaj̄ métek nantaktiniait̄ji. <sup>6</sup>Yaunchu enentáim̄tān̄kia Krístujaj̄ métek jaka asamtai ii yajauch wakerutain̄ emenkátrutmakuit̄ji. Tuma asamtai yamaikia pen̄ké umirkashtiniait̄ji. <sup>7</sup>Kame ζjákaka itiurak tunaan túrat? Yamaikia an̄kant̄ ajasuit̄ji. <sup>8</sup>Iisha nekas Krístujaj̄ jákait̄kiurkia Nijijaj̄ métek tuke iwiaaku pujustin̄ enentáim̄ji. <sup>9</sup>Kame Krístuka chikichkí jaka nantakin̄ asa atakka jákashtatui. Túmait̄kiui atakka ajakrachminiaiti. <sup>10</sup>Kristu chikichkí jaka asa ashí tunaajaj̄ itit awajsachmin̄ ajasuít̄i. Tura yamaikia iwiaaku pujá asa Yúsan̄ shiir awajsat̄niun̄ pujawai. <sup>11</sup>Atumsha núnisrumek̄ jaka áintsarum̄ tunáa túrachmin̄ enentáim̄tumastarum̄. Antsu ii Uuntr̄i Jesukrístujaj̄ tsan̄n̄kiu asarum̄ iwiaaku pujakrum̄ Yus shiir awajsat̄arum̄.

<sup>12</sup>Nu asamtai tunaaka ayash̄m̄in̄ akuptamkashtiniait̄rume. Ayash̄í wakeramur̄i umirkashtiniait̄rume. An̄kant̄ait̄rume. <sup>13</sup>Atumi ayash̄í tunaan túrat̄ tusarum̄ ikiasairap. Antsu jakamunmayá nantakin̄ asarum̄ Yus wakeramu túrat̄in̄ surumaktarum̄. Tura ayash̄m̄isha aya pēnkernak̄ túrat̄i tusarum̄ Yus íiktustarum̄. <sup>14</sup>Akupkamu umirkat̄niujaj̄ iwiaaku pujatsrume. Antsu atumin̄ Yus ti anenma asa yamaram iwiaakman̄ suramsait̄rume. Tuma asamtai yamaikia tunaaka nupettamkachminiaiti.

### Tuke umireajnia nuna takarniurintji

<sup>15</sup>Nuikia akupkamu umirtsuk antsu Yus ti anenma asakrin iwiaaku pujakur ¿“Páchitsuk tunaan túramniaitjai” títiatjik? Pénkea. <sup>16</sup>Tuke umireajnia nuna takarniurintji. Nuka nékatsrumek. Tura ni takarjin ajasam umirkatniuitme. Tuma asamtai tunáa umirkurkia ni takarniurintji tura umirkar jakattaji. Tura Yus umirkurkia péñker wekasattaji. <sup>17</sup>Atumsha yáunchuka tunáa umirniuiatrum ikiukrum yamaikia nekas chicham antukurmena nu nekas atumí enentájjiai umirkaitrume. Tuma asamtai Yus ti yuminsatniuiti. <sup>18</sup>Yamaikia tunaanumiá ankant ajasu asarum ti péñker wekasatniunam pachiinkiaitrume. <sup>19</sup>Paant nekaak tusan takarniun pachisan tájarne. Wats, yaunchu atumí ayashí mujjimianian tura ashí yajauchin túrat tusarum tsan̄kamakmarne. Núnisrumek yamaikia atumí ayashí péñkeran túrat tusarum tura tuke Yusjají shiir wekasat tusarum tsan̄kamaktarum. <sup>20</sup>Atumsha tunáa umirniuyarme nuikia péñker wekaichauyarme. <sup>21</sup>Tura nújaisha ¿warí péñkerna yáinmakmarum? Iista, yamá natsanmainchakait. Nusha jákatniunam júawai. <sup>22</sup>Antsu yamaikia, tunaanumiá uwempra asarum Yus umirniuitrume. Antsu júka Yusjají shiir wekasatniunam júawai tura nuyá tuke iwiaaku pujustatrume. <sup>23</sup>Tunáa takarkumka tuke jákatniun akirmaktatui. Antsu Yuska iikia takaatsrinin penké ántar tuke iwiaaku pujustinian suramsattaji. Ii Uuntri Jesukrístujají tsanin̄kia pujá asakrin nuna túrutmattaji.

### Akupkamujají an̄kantaitji

**7** <sup>1</sup>Enentáimpratarum yatsuru. Jáka akupkachminiaiti. Aya iwiaakna nu akupkamniaiti. Nu paant nékatsrumek. <sup>2</sup>Wats, nuwa nuátkamu ni aishri iwiaakkui nijjají tsanin̄ pujustiniaiti. Tura aishri jakamtai an̄kant ajawai. <sup>3</sup>Tuma asamtai aishri iwiaakain̄ chíkich áishman̄jají tsaníakka tsanirmawai. Tura ni aishri jakamtai chíkich áishman̄jají páchitsuk nuatnakminiaiti tura nuikia tsanirmatsui.

<sup>4</sup>Núnisrumek atumsha, yatsuru, Kristu ayashí muchitmarí ajasu asarum akupkamu emettachmin jaka áintsarum ajasuitrume. Túrakrum Krístujají nuatnaikiatin áintsarum an̄kantaitrume. Niisha jakamunmaya nantakniuiti. Yamaikia Krístunu ajasu asar Nijjají tsanin̄kiar Yus wakeramu péñker túratniuitji. <sup>5</sup>Yaunchu wakerutai umirniuyaj nui akupkamu enentáimtusar nuna nan̄kaamas yajauchia nu wakerimji tura jákatniunam juramkimji. <sup>6</sup>Antsu yamaikia akupkamu emettachmin jaka asar an̄kant ajasuitji. Túrunar akupkamu yaunchu áarma nu iniaisar yamaikia Yusa Wakan̄jjají tsaníakur yamaram iwiaakmajají péñker wekasamniaitji.

### Winia enentáiruují tunáa ana nu

<sup>7</sup>Núnisaitkiuin̄kia “Akupkamu yajauchiiti” ¿titiyajash? Atsá. Warí, akupkamuka tunaan ti paant awajeawai. Akupkamu

“Chikichna wakerukaip” táchakuĩnkia wakerukchaajai. <sup>8</sup>Tura nu akupkamun enentáimtakui winia enentáiruĩ tunáa ana nu ashí yajauchin ti wakerumtikrimiayi. Kame akupkamu atsakui tunaan ti enentáimtichaintjai. <sup>9</sup>Yaunchu akupkamun nékachkun nánkamsanak enentáimniuyajai. Tura akupkamun nekaan tunaan nekaamjai tura jaka áintsanak ajasjai. <sup>10</sup>Tuma asamtai akupkamujai péñker wekasatniuitiatan umirkatniun tujintiaakui aya jákatniunam jurukni. <sup>11</sup>Kame tunáa wakerutainkia nu akupkamujai anankrua péñker iwiaaku pujustinian surutsuk nu akupkamujai jákatniunam jurukmiayi.

<sup>12</sup>Tuma asamtai akupkamuka Yusna asa ti penkeraiti. Yajauchichuiti. <sup>13</sup>Nuikia ¿pénkera nu jákatniunam júrawak? Atsá. Antsu tunáa wakeruktin jákatniunam jurukmiayi. Nuna tura asa tunáa imiá yajauchia nu nekaamniaiti. Tura tunáa wakerutai péñker akupkamujai jákatniunam jurukmiatai, nujai Yus “tunáa wakerutai imiá yajauchiiti” tusa paant awajsamiayi. <sup>14</sup>Akupkamuka Yúsnaiti. Nu paant nékaji. Antsu wikia ayashna nuna wakerakun tunaan umireajai. <sup>15</sup>Kame túrajna nuna itiurchat enentáimtajai. Péñker túratniun wakeraj nuna túratsjai. Antsu nakitiaj nuna nekaska túriniaitjai. <sup>16</sup>Akupkamu péñkeran nekaan umirkatniun wakerajai. Túrayatnak umirchaitjai. <sup>17</sup>Tuma asamtai wíchaitjai tunaan wakerakun túrajna nuka. Antsu winia enentáiruĩ tunáa wakerutai pujá asa nu túrumtikriniaiti. <sup>18</sup>Yaunchu enentáimtai winia enentáiruĩ pujana nu penké yajauchiiti. Nuna ti paant nékaji. Tuma asamtai péñker túratniun wakerayatnak penké tujintiajai. <sup>19</sup>Péñker túratniun wakerayatnak túratsjai. Antsu tunaan nakitiaj nuna túrajai. <sup>20</sup>Nu asamtai nakitiaj nuna túrakun wíchaitjai antsu winia enentáiruĩ tunáa wakerutai pujana nu túriniaiti.

<sup>21</sup>Júnisaiti. Péñker túratniun wakerakun aya tunaan ínkiuajai. <sup>22</sup>Nekas enentáijjai Yusa akupkamurĩn wakerajai. <sup>23</sup>Tumai yaunchu enentáimtai winia enentáiruĩ pujurtak nupettawai tura nekas wakeraj nuna akirturui.

<sup>24</sup>Maa, ti waitiajai. Jú ayash wakeramujai jákatniunmaya ¿yaki uwemtikrurat? <sup>25</sup>Yuska ii Uuntri Jesukrístujai túrutmamniaitji. Tuma asamtai Yúsan ti yumĩnkiajai. Ayu. Winia enentáirjai Yus akupkamun umirniuitjai. Antsu winia ayashrujai tunaan umireajai.

### Yusa Wakanjijai péñker wekasatin

**8** <sup>1</sup>Jesukrístujai tsaniñkiarun Yuska “tunaan túrawar jákatniunam wémin áiniawai” tatsui. Nu shuar ni ayashi wakerana nuna umirtsuk Yusa Wakaní wakerana nuna umirainiawai. <sup>2</sup>Jesukrístujai tsaniñkiu asakrin Yusa Wakaní nekas iwiaaku awajtamsaitji. Tuma asamtai tunáa túratniunmaya tura jákatniunmayasha ankant ajasuitji. <sup>3</sup>Ayash wakerutainkia, wi akupkamun enentáimtakui, nuna nankaamas tunaan wakerumtikrimiayi. Tuma asamtai akupkamuka

yáinkiachminiuyi. Antsu akupkamu tujinkiamia nuna Yus túraití. Ni Uchirín ayash̄tin awajas tunaan jarukat tusa akupkamiayi. Tura nujaj̄ ayash̄ tunáa wakeramun nupetkamiayi. <sup>4</sup>Túramtai ii yamaikia ayash̄ wakerana nu umirtsuk tura Yusa Wakaní wakeramu túrar akupkamu tana nu umirniuitji. <sup>5</sup>Ayash̄ wakeramun umirainia nu, ayash̄nia nunak enentáimtuiniawai. Antsu Yusa Wakaní wakeramun páchinia nuka Yúsnan enentáimtuiniawai. <sup>6</sup>Ayash̄nia nuna enentáimtuinia nú shuar jákatniunam wénawai. Antsu Yúsnan enentáimtuinia nuka Yusjaj̄ shiir nawamnaikiar tuke pujusartatui. <sup>7</sup>Aya ayash̄ wakeramun enentáimtuinia nú shuar Yusa nemasr̄ áiniawai. Yus akupeamun nakitiainia ásar ni taman umirkatniun pen̄ké jeainiatsui. <sup>8</sup>Tuma asamtai shuar ni ayash̄í wakeramur̄ warareakka Yúsan shiir awajsachminiaiti.

<sup>9</sup>Tura átumka ayash̄ wakeramu umirtsuk tura Yusa Wakaní pujurtamkurmin ni wakeramu enentáimtuiniaitume. Ashí shuar Krísturtin ainia nu ni Wakanin̄ takaku áiniawai. Takakchaitkiun̄ka nuikia Krístunuchuiti. <sup>10</sup>Tura Kristu atumin̄ pujurtamkurminkia atumí ayash̄í tunaajaj̄ jakamnia aín̄ Yus “pen̄keraitme” túramu asamtai atumí wakanín̄kia nekas tuke iwiaakuíti. <sup>11</sup>Yus Jesukrístun jakan iniantkimiayi. Tuma asamtai ni Wakaní atumí enentáin̄ pujurtamkurminkia Jesusan iniantkímia núnisan̄ nu Wakanjaj̄ yamaram iwiaakmajaj̄ iniantamkittiarne.

<sup>12</sup>Tuma asamtai, yatsuru, ayash̄ wakeramu pen̄ké umirkashtiniaitji. <sup>13</sup>Ayash̄ wakeramu umirniuitkiurmeka jakattarme. Antsu Yusa Wakaní pujurtamkurmin ayash̄ wakeramu nupetkarmeka pen̄ker wekasarum nekas iwiaaku átatrume.

<sup>14</sup>Ashí shuar Yusa Wakaní timiajaj̄ métek wekainia nu, nu shuar nekas Yusa uchirín̄ti. <sup>15</sup>Yusa Wakaní in̄ pujurtamkurin̄ Yusa uchirí ajasar sapijmiatsuk Yusaj̄ weamkar “Aparú” tímimniaitji. <sup>16</sup>Nu Wakan “nekas Yusa uchirín̄me” ii enentáin̄ túramji. <sup>17</sup>Tura ni uchirí ajasu asakrin̄ Yus tímia núnisan̄ ashí Níiniun suramsattaji. Krístun ashí susattana núnisan̄ incha suramsattaji. Yamái Krístunu takaakur wáitiakrikia ukunam Krístujaj̄ métek ti shiir awajnastatji.

<sup>18</sup>Maa, yamá ti wáitiakrishia ukunman̄ka nayaimpiniam ti shiir pujakur nu wáitsamu kajinmatkittiaji. <sup>19</sup>Tsawant jeamtai Yus ashí ni shuarin̄ Nijjaj̄ métek ti shiir awajsartatui. Nuiñ̄ nekas Yusa uchirí ainia nu ti paant nekanattawai. Nu tsawantan wáinkiatniun ashí Yus najanamu írussa nu ti nákwainiawai. <sup>20</sup>Ashí Yus najanamia nuna yámankamtaik ti pen̄ker najanamiayi. Túrasha yajauch ajasmiayi. Nusha ní neaskeka túrunachmiayi. Antsu Yus ukunam ataksha iwiarnartin̄ atí tusa tunáa wayamunam yajauch ajasat tusa tsan̄katkamiayi. Tuma asamtai iwiarnartin̄ tsawantan nákwai. <sup>21</sup>Nu tsawantaj̄ ashí Yus najanamu emesnartinniumiã uwemprartatui. Tura ashí Yus najanamuka shuar

Yusa uchirí ajasarua nujai métek shiir awajnasar ankant ajasartatui. 22 Yamaisha ashí Yus najanamu ainia nu, nuwā jatema wáitia nunis ti wáitiainiawai. 23 Yus najanamuka ashí wáitiainiawai. Iisha Yusa Wakaní takakiatar ti wáitijai. Tura Yusa Wakaní takakkur ashí Yus suramsattajnia nu nékaji achiktin. Tuma asar nekas Yusa uchirí paant awajnastin tsawant nákaji. Nuisha ii ayashísha ankant awajnastatui. 24 Nu tuke enentáimtuki wéakur takamtsuk uwemprattaji. Yamái nu wáinchiatar tuke nákaji. Warí, ¿wáinjinia nu nákajik? 25 Tuma asar tuke waincha asar katsuntrar nákaji.

26 Nu arantcha ii kakarmachu nekapeakrin Yusa Wakaní yáinmaji. Kame Yus áujstaniusha nékachkurin in yáinmaji. ¿Warí seattaj<sup>i</sup> tura itiur seatjik? Nu nékatsji. Tura itiurchat pujakur ti wáitiakrincha Yusa Wakaní in áujturmaji. 27 Tura Yus ii enentáin enentáimtaj nuna nékaiti. Tuma asa ni shuari asakrin ni Wakaní ni wakeramujai métek seatramkurin ántawai.

### Ti nupetmakuitji

28 Yus anea asakrin ashí nankaatamjinia nujai Yus pujurtamji. Tura nujai péñker awajtamji. Nu paant nékaji. Tura Ni wakerimia núnisan Ní shuar awajtamaitji. 29 Yámankamtaiknumia in nekarmak ni Uchirí Jesukrístujai métek ajasat tusa achirmakmiaji. Nujai Yusa uchirí untsurí ajasji. Tura Kristu ii iwiairinti. 30 Tura Yus achikmia nuna Niiniu awajsamiayi. Tura nu shuaran “pénkeraitrume” tímiayi. Tura ti shiir awajsamiayi.

31 Wats, nuikia Yus in yáinmakrin ¿yaki in nupettamkattaj<sup>i</sup>? 32 Ni Uchiríncha suritramkachmiaji antsu in jarutramkat tusa akupturmakmiaji. Tura asa ni Uchiríjjai métek ti shiira nuna ashí suramsashtatjik. 33 Yus achikmia nú shuaran ¿yaki sumamtikiat? Yus Ápaka “pénkeraitrume” tiniu asa penké túrashtatui. 34 Tura ¿yaki “jiniu apenáti” titi? Warí, Kristu penké túrashtatui. Antsu nu shuaran jarukmiayi. Tura nantaki Yusa untsuuriní ekemas in áujturmaji. 35 Kristu ti anenma asakrin in akantamkitin atsawai. Wáitiakrishia, itiurchat ínkiuakrishia, shuar áintramkurnisha, tsukamakrishia, entsatai atsakuisha, tsúumainjaisha, tura mantamnakrishia, nujai “Kristu anentsui” tíchamniaitji. Nuka Kristu anenkrattairiya akantamkitin jeatsui. 36 Yus-Papniumsha júnis áarmaiti:

“Amée-shuar asar tuke mantamnatin pujaji. Murik máatniua áintsan enentáimturmaji.”

Tu áarmaiti.

37 Tuma ain Kristu in anenma asakrin Nijjai ti nupetmakuitji.

38 Kristu anenkrattairiya akantamkitin penké atsawai. Nuna ti paant nékajai. Jákatniusha, iwiaakmasha, nayaimpinmaya suntarsha, ashí

nayaimpinmasha tura nunkanmasha akupin ainia nusha, yamá írunna nusha, ukunam átatna nusha, <sup>39</sup>yakí írunna nusha, nunká írunna nusha, kame ashí Yus najanmu írunna nusha Yusa anenkrattairiya penké akantamkichminiaitji. Yusa anenkrattaishha ii Uuntrí Jesukrístu túrunamujai paant wainji.

**Yus Israer-shuaran ni shuari arti tusa achikiarmiania nu**

**9** <sup>1</sup>Yamá tájana nu Kristu shuari asan imiá nekasan wáitrutsuk tájai. Winia enentáirsha tura Yusa Wakanísha “nekas tawai” turutainiawai. <sup>2</sup>Israer-shuaran waitnentakun ti kuntuts enentáimjai. <sup>3</sup>Wíshuar ániakui Krístunmaya kanakin yuminnaraintjai nujai wíshuaran yáinminiaitkiunka. <sup>4</sup>Israer weeá shuar ániawai. Tura ni uchirja áinis Yus achikiaruiti. Yusa wincharisha niijai pujumiayi. Yaunchu Chicham ni weatrijai iwiamuncha tura Muisais akupkamuncha susamiayi. Tura Yusa Jeen Nin shiir awajsatniun jintintiamiayi. Tura ukunam shiir tsankatkattana nunasha ujakmiayi. <sup>5</sup>Ni weatrín Yúsán ti penker enentáimtin irunmiayi. Krístusha aents ajas nú shuarnum akiiniamiayi. Krístuka Uunt Yus asa tura ashí akupin asa Ninki tuke shiir awájnastí. Núnisan atí.

<sup>6</sup>Kame Yus ashí Nii timia nuna Israer-shuaran súsachmataisha nujai “Yus timia nu uminkiachuiti” tíchamniaiti. Antsu junis enentáimpratniuiti: ashí Israer weeá ániayatan Yusjai íismaka ashí nekas Israer-shuar ániatsui. <sup>7</sup>Núnisan Apraám weeá shuarsha ashí nekas ni shuar ániatsui. Iis, Yus Apraáman tímiai “Aya Isak pampanma amee shuarum ártatui.” <sup>8</sup>Nujai páantaiti. Shuar aya Apraam weeá akiinia asa Yus timian wáinkiashtiniaiti. Antsu Yus timiajai métek akiinia nu nekas Apraám weeá shuar ániak Yus timian wainkiattawai. <sup>9</sup>Kame Yus Apraáman tímia nu júiti: “Tsawant jeamtai jeartiatjame, tura ame nuwem Sara uchin takustatui.” Tu tímiai.

<sup>10</sup>Nu arantcha, ii weatri Isaka nuwe Ripikia jimiampramiayi. <sup>11-13</sup>Nu uchisha akiiniainiatsain penkernnasha tura yajauchincha túruiniatsain Yus Ripikian tímiai: “Iwiaria nu ni patain umirkattawai.” Ataksha núnisan Yus ni Papirin chichak “Jakupan aneakun Esaun nakitramjai” tímiai. Nujainkia páantaiti. Yus wakerak aya ni enentáijiain shuaran achikminiaiti. Nu shuar túrunamu enentáimtutsuk túramniaiti.

<sup>14</sup>Túriniaitkiui “Yus penkerchaiti” ¿titiajiash? Atsá. <sup>15</sup>Yus Muisaisan júnis tímiai:

“Wi wakerajna nunak waitnentattajai.”

<sup>16</sup>Tuma asamtai shuar ti wakerakuisha tura kakaram takaakuisha aya nujai Yus waitnentatsui. Antsu aya ní enentáijiain wakerak waitnentawai.

<sup>17</sup>Ataksha Yus-Papininum tawai “Yus Ejiptu nunka akupniurin tímiai “Ámijai ashí nunkanam winia kakarmarun nekaawarat tusan uunt akupniun awajsamjame” tímiai” tawai.

18 Tuma asamtai Yus Nii wakera nuna waitnentawai. Túrasha Ejiptu akupniur<sub>in</sub> túramia núnisan<sub>n</sub> Nii wakera nú shuaran enentá<sub>in</sub> kátsuram awaj<sub>tawai</sub>.

19 Tura “Núnisaitkiu<sub>in</sub>kia ¿urukam<sub>tai</sub> shuaran Yus súmamt<sub>ik</sub>ia? turutchat<sub>apash</sub>. Nii wakeraku<sub>in</sub>kia ¿itiurkattaj<sub>ik</sub>?” turutchat<sub>apash</sub>.

20 Warí, aents asam Yus<sub>ja</sub>i ¿tunaiminkiaitiam? Nuwá pinin<sub>ki</sub>an nájankui núweka “¿urukam<sub>tai</sub> jú<sub>n</sub>is najatam?” tíminkiait. 21 Nuwá wakerakka nu nuwe<sub>ja</sub>i amamkuncha tura yukunnasha nusháa takakmastinian mai najanachminkait.

22 Yajauch shuar ti asutiá<sub>in</sub> ániak emesnartinnium wétin ániawai. Yus nu shuaran asutiá ni kakarmar<sub>in</sub> iniaktustaj tayat ti katsuntramia<sub>yi</sub>.

23 Tura katsunteak ni ane<sub>n</sub>krattair<sub>in</sub> iniakmasmi<sub>ai</sub>. Nú arant nuikia in waitnentramak shí<sub>r</sub> enentai<sub>ja</sub>i p<sub>é</sub>nker awajtamkur ni anenkrattair<sub>i</sub> ti paantchakait. Nekas shí<sub>r</sub> enentai<sub>ja</sub>i p<sub>é</sub>nker ajasat tusa yaunchu iwiartamprami<sub>ai</sub>. 24 Tura incha, Israer-shuar<sub>numi</sub>asha Israer-shuar<sub>chanu</sub>mi<sub>asha</sub>, ni shuar<sub>i</sub> ajasat tusa achirmakmi<sub>ai</sub>. 25 Núnisan<sub>n</sub> yaunchu Yúsnan etserin Useas Yus-Papini<sub>um</sub> tawai:

“Wíishuar<sub>chan</sub> Wíishuar awajsattaj<sub>ai</sub>. Aneachmancha aneamu awajsattaj<sub>ai</sub>.

26 Tura Yus “Wíishuar<sub>chait</sub>rume” tímia nú shuaran “Nekas iwiaaku Yusa uchir<sub>in</sub>iu<sub>it</sub>rume” ukunam tftiatui.”

Tu áarmaiti. 27 Antsu Isayas Israer-shuaran páchis tími<sub>ai</sub>:

“Israer weeá ti nan<sub>ka</sub>amas untsur<sub>i</sub> ániay<sub>at</sub> p<sub>é</sub>nké ishichik uwemprartatui. 28 Kame Yus yajauchin akupkataj timia nuna takamtsuk wárik umiktatui.”

29 Núnisan<sub>n</sub> Isayas ataksha tawai:

“Ashí akupeana nú Yus in waitnentramachkurni<sub>n</sub>kia Sutuma péprusha Kumura péprusha takamtsuk jákarmia núnisan<sub>n</sub> jáka<sub>aj</sub>i.”

### Israer-shuar uwempratin chicham<sub>ja</sub>i tujinkiar<sub>mian</sub>ia nu

30 Wátsek, Israer-shuar<sub>cha</sub>, Yus iisam ni túramurij<sub>ia</sub>i “p<sub>é</sub>nkerait<sub>ji</sub>” tu enentáimtumainiachunak, Yuska, Nii enentáimtusam, “p<sub>é</sub>nkerait<sub>rume</sub>” tími<sub>ai</sub>.

31 Antsu Israer-shuar<sub>ka</sub> p<sub>é</sub>nker akupkamun umiktinian wakeruiniayatan<sub>n</sub> tujintiainiakui nuj<sub>ai</sub> p<sub>é</sub>nker ajastinian tujinkiar<sub>mian</sub>ia<sub>yi</sub>.

32 ¿Urukam<sub>tai</sub> tujinkiar<sub>ma</sub>? Yúsan enentáimtutsuk aya ni p<sub>é</sub>nker túramuj<sub>ai</sub> p<sub>é</sub>nker ajastinian enentáimtuiniak tujinkiar<sub>mian</sub>ia<sub>yi</sub>. Krístun enentáimtustinian nakitiainiak shuar kan<sub>ka</sub>pen awan<sub>ka</sub>emtuktinia núnisan<sub>n</sub> iniararm<sub>ai</sub>.

33 Tura kaya tukumkar iniar<sub>cham</sub>niakait. Nu asam<sub>tai</sub> Yus-Papini<sub>um</sub> Krístun pachis tími<sub>ai</sub>:

“Se<sub>n</sub> péprunam kayan ikiuaj<sub>ai</sub>, tawai Yus. Nu kayanam Israer-shuar tukumkar iniarartatui. Antsu Nin shiir enentáimtuinia nú shuar natsa<sub>ar</sub>chartatui” tawai.” Tu áarmaiti.

**10** <sup>1</sup>Yatsuru, Israer-shuar uwemprarat tusan ti wakerakun Yúsán áujtajai. <sup>2</sup>Maa, uwempratniun nékachiatañ Yúsán shiir awajsatniun ti wakeruiniawai. <sup>3</sup>Túmaitiat shuáran Yus péñker awajsatniun nékachu ásar aya ni péñker túramujajñ péñker ajastinian wakeruiniawai. Tuma ásar Yus péñker enentáimtamujaj péñker ajastinian jecharai. <sup>4</sup>Aya Kristu enentáimtamujaj péñker ajastin asamtai akupkamu umirkatniujaj péñker ajastin ántrai.

<sup>5</sup>Akupkamujaj péñker ajastinian pachis Muisais tímiayi: “Nuna takamsuk umirniuka nujaj péñker pujustatuí.” Tu áarmaiti. <sup>6</sup>Antsu Krístun enentáimtus péñker pujustinian pachis shuar juná tíminiaiti: “Ti itirchata áinis “¿Yaki nayaimpiniam waka Krístun itiarat?” tiirap,” tawai. <sup>7</sup>Tura ¿Yaki jakamunam we Krístun iniantkit?” tiirap” tawai. <sup>8</sup>Tura junasha tawai: “Yus-Chicham yúpichuch umirkamniaiti. Aya enentáimjaj enentáimtakum wenumjaj ujaktiniaitme.” Nu Chicham “Yus enentáimtusiniaiti” tawai. Nu Chicham tuke étsereaj núiti. <sup>9</sup>Yus Jesusan jakan iniantkimia nu enentáimtakum tura wenumjaj “Jesus winia Úuntruiti” takum uwemprattame. <sup>10</sup>Kame Kristu enentáimtakmin Yus “péñkeraitme” turamtatui nuyá wenumjaj “Jesukrístun enentáimtajaj” tákum uwemprattame.

<sup>11</sup>Ataksha Yus-Papinium tawai: “Nin shiir enentáimtuinia nú shuar natsaarchartatuí.” <sup>12</sup>Tuma asamtai ashí shuar, Israertisha Israerchasha, mai metek Yúsán shiir enentáimtuinia nuna Yus ti aneak ashí péñkeran súawai. Tura ashí métek ni Úuntrinti. <sup>13</sup>Nu arantcha “Ashí shuar Uuntan áujea nu uwemprattawai” yáunchu Krístunun tu áatramuiti. <sup>14</sup>Tura Krístun enentáimtuiniachusha ¿itiurak Nin áujsarat? Tura Krístun nékainiachusha ¿itiurak Nin enentáimtusarat? Tura Yus-Chicham ujaachmasha ¿itiurak nekaawarat? Shuar Yus-Chichaman ujaktiniaiti. <sup>15</sup>Tura akupkachmasha ¿itiurak Yus-Chichaman ujararat? Tura shuar Yus-Chichaman etserkataj tusa wéana nuna Yus-Papinium tawai:

“Shuar Yusa Shiir Chichamēn etserki weana nu ti shíirchakait.”

<sup>16</sup>Tura ashí shuar uwempratín chichaman ántuiniayatañ umirainiatsui. Isayassa yaunchu aak tímiayi:

“Uuntá, ¿yaki ii étserman antukaruit?”

<sup>17</sup>Paantchakáit. Kristu túramu ujakam antuktiniaiti. Tura antukar Krístun shiir enentáimtusiniaiti.

<sup>18</sup>Tura ¿Israer-shuar Yus-Chichaman antukcharu ásarāñ Yúsán enentáimtuscharma? Atsá. Warí, Yus-Papí tawai:

“Ashí nunkanam ni chichame antunkaiti.”

<sup>19</sup>Tura “Israer-shuar nu chichamān antukariat ¿paant nekaawarmaashi?” inintrusminiaiti. Tura nekas nekaawarmai. Tuma asamtai Muisais tawai:

“Israer-shuar chān nékachu ainiana nuna shiir awajeakun akajkattajrume.”



<sup>20</sup>Nuyá Isayas ashamtsuk áarmiayi:

“Eṭkcharua nu wáitkiarmiayi. Inintruiniatsain wantintiukmiajai.”

<sup>21</sup>Tura Israer-shuaran áujmatuk tímiayi:

“Tuke iniaitsuk Winin winiarti tusan nu shuaran untsúajai. Tura nakitrurar umirtuiniatsui.”

### Chíkich Israer-shuarsha uwemprartatui

**11** <sup>1</sup>Tura Israer-shuar Yúsan umiiniachkui ¿Yus nin iniaisaashit? Pénkea. Warí, wi Israer-shuarchakaitiaj. Wi Aprámsha tura Pinjamin weeá akiiniachukaitiaj. <sup>2</sup>Yámankamtaiknumiá Yus Israer-shuaran ni shuar arti tusa achikiu asa yamaikia iniaiasastatui.

Ti yaunchu Yúsnan etserin Eriás Israer-shuaran pachis Yúsan áujtak tímiayi: <sup>3</sup>“Uuntrú, naman awasar Yus sútaincha mash saákiarai. Áminiun etserniuncha mash máawarai. Tura wiki juakjai. Tura winiasha “mantuatai” turutainiawai.” Tu áujsamiayi.

<sup>4</sup>Tura Yus ayak tímiayi “Siati mir (7000) áishmankan Israer-shuarnumiá apujtumsaruitjai. Nu shuar ántar-yus Páaran tikishmatrachu áiniawai” tímiayi Yus.

<sup>5</sup>Núnisan yamaisha Yus ti waitnentainia asa ashí Israer-shuarnumiá ni shuarin achikiuiti. <sup>6</sup>Yus ni enentájjiajin waitnentak túrait. Nú shuar péñker tura asamtai waitnentatsui. Yus aya péñkernak waitnentakka nuikia waitnenkratchainti.

<sup>7</sup>Ayu. Nuikia ashí Israer-shuar péñkeran eakarú aijn aya Yus achikmia nú shuar wainkiarmiayi. Antsu ni achikchamuka nuna nankaamas nekaachmin ajaras kusurua núnin awajnasarmiayi. <sup>8</sup>Yus-Chichamsha núnisan tawai: “Yus enentáimchatai enentáin súsarmiayi. Wáinmashtai jijncha tura ántushtai kuíshniasha súsarmiayi. Yamaisha núniskete.”

<sup>9</sup>Tawitcha yaunchu aak tímiayi:

“Tuke tunáa túrin ásar namperan najanainiaksha achinkiar ti asutniáwarti.

<sup>10</sup>Ni enentáin kusurarti tura wainmakcharti. Itiurchat ana nusha, káarak kijinia áintsan, tuke áentskatá.” Tu áarmiayi.

### Israer-shuarsha uwempramin áiniawai

<sup>11</sup>Watsek, Israer-shuar kayá tukumkar ¿tuke iniaararuk áinia? Atsá. Antsu Israer-shuar umirkachmajai Israer-shuarsha yamaikia uwempratin jeiniawai. Nujai Israer-shuarsha nujai métek uwempratniun enentáimsartatui. <sup>12</sup>Israer-shuar umirkachmajai ashí shuar, Israercha ainia nusha, uwempramnia ajararmiayi. Nuna nankaamas Israer-shuar atak Yúsan enentáimtuiniak uwemprarmatai nujai ashí shuar ti penker ajarartatui.

<sup>13</sup>Israer-shuarchatirmea, atumin uwempratin chichaman etserkatniun Yus akupkamu asan nu takatan ti takaajai. <sup>14</sup>Nuna túrakun átum

uwemprarmena núnisan niisha, wíishuar ainia nu, nuna íisar uwemprarat tusan wakerajai. <sup>15</sup>Kame Israer-shuaran iniaisamujai ashí shuar Yusjai shiir nawamnaikiarmatainkia nuikia atak nin achikmajai jakamunmaya nantaktinia áintsan ti shiir átatui. <sup>16</sup>Emka apatuk ana nu Yus súakur yuminsamuitkiunka nuikia ashí apatkunam Yus yuminsamuiti. Núnisan numí kankapé péñkeraitkiunka numi takamtsuk péñkeraiti.

<sup>17</sup>Yuska chíkich chíkich Israer-shuaran, numí kanawen tsupik ajapniua áinis, iniaisamiayi. Tura nuyá atumin niisháa numinmaya árumnin nu numiniam anujtamkamarme. Nujai péñker numijiai tsanínkrum nu kakarmajai iwiaakrume. <sup>18</sup>Tura kanawé tsupikmajai nankaamantu enentáimtumasaip. Warí, ame kakarmarmijiai numi wajatsui antsu ni kakarmarjijai iwiaakme.

<sup>19</sup>“Túrasha wi anujnaktinian kanawen tsupikchamka” tíchainmeash. <sup>20</sup>Nekasaiti, túmaitiat niisha Yúsan enentáimtuiniachu ásar tsupinkiarimiayi. Atumsha aya Yus nekas enentáimta asam anujnakuitme. Tuma asamtai nankaamantu enentáimtumatsuk aya anearta. <sup>21</sup>Yus nekas kanawé péñkercha túrawarun tsupikkia páchitsuk amincha tsupirmakchamniakait. <sup>22</sup>Iista, Yus atumjai ti tsánkaiti tura Israer-shuar umichua nuna ti wari asutiaiti. Tura péñker wáinmamkata. Yus tuke nekas enentáimtachkurminkia atumniasha páchitsuk tsupirmaktatrome. <sup>23</sup>Núnisan Israer-shuar ataksha Yúsan enentáimtuiniakui páchitsuk ataksha anujkachminkait. Nekas túrattawai. <sup>24</sup>Túram Israer-shuarcha asam niisháa numinmaya tsupikiar penké numiniam anujnakuitrome. Nuna tura asa nekas ni kanawé tsupikia ajapamun páchitsuk atak anujkamniaiti.

### Israer-shuarsha uwempratin áiniawai

<sup>25</sup>Yatsurú, nankaamantu enentáimtumarajirum tusan yaunchu nekaachman ujaajrume. Júiti: Israer-shuarnumiánka chíkich chíkich Yúsan nekas enentáimtustinian nakitiainiawai. Tura aya Israer-shuarchasha Yus-shuar ajasarat tusa túrunamiayi. <sup>26</sup>Tura Israer-shuarchasha ti untsurí Yus-shuar ajasarmatai nuyá Israer-shuarsha ashí uwemprartatui. Tuma asamtai Yus-Papí tawai:

“Seúnnumia Uwemtikkiartin tátatui. Israernumiá tunaan asakátrattawai.

<sup>27</sup>Jú Chichamnasha nijjai najanattajai: ni tunaarín asakturtatjai.”

<sup>28</sup>Uwempratin chicham atumsha nekaatarum tusa Israer-shuaran Yus ni nemasri awajsaruiti. Tura yaunchu ni weatrín achikiu asa nincha tuke anenawai. <sup>29</sup>Kame Yus amáa nuna ataksha ataatsui. Shuáran achiksha atak iniaiyatsui. <sup>30</sup>Átumka yaunchu Yus umirchayarme. Tura yamaikia Israer-shuar umirainiachkui Yus atumin waitnentrarmarme. <sup>31</sup>Núnisan nii yamaikia Yúsan umirainiatsui. Tura atumin waitnentramparam

núnisan níncha waitnentrattawai. <sup>32</sup>Nujaj ashí métek sumamtikiak métek waitnentrar uwemtikrattawai.

<sup>33</sup>Maa, Yus imiá shiirchakait. Tí nekachukait. Ni túramu penké nekaachminiatji.

<sup>34</sup>“Uunt Yus enentáimmian ¿yaki neka? Tura ¿ya Nin unuiniaruit.

<sup>35</sup>Yaki Nin péñkeran susa shiira nujaj yapajniuit?” Tu áarmaiti.  
<sup>36</sup>Ashí najanamu ainia nu Yus najanamu ániak Niiniu ániawai. Tura Nin shiir awajsatniun najanawarma ániawai. Yus tuke iniaitsuk shiir awájnástí. Núnisan atí.

### Yusaj surumaktarum

**12** <sup>1</sup>Atumsha Yus-shuar árumna nu, atumek Yusaj surumaktarum. Yus ti anenma asakrumin nuna seajrume. Yaunchu Israer-shuar ni waakarín maa Yúsan suu ármiai. Atumsha núnisrumek iwiaaku árumna nuñ Nii túrutataj taku túrutati tusarum tuke enentáijjaj Yusaj tsan̄kamaktarum. Yusaj ísam ti shiir atí tusarum túratarum. Nu túrakrumka pátatkechu antsu ti nekas enentáim̄jaj Yus shiir awajin átatrume.

<sup>2</sup>Chíkich shuar aya jú nuñkanm̄ya ana nuna enentáimt̄usar wekainiawai. Tura átumka nu túrawairap. Antsu Yus winia enentáim̄miarun yapajtiurat tusarum tsan̄katkatarum. Nu túrakrumka Yus wakera nu nekaattarme. Ni wakeramusha yajauchichuiti antsu imiá nekas péñkeraiti.

<sup>3</sup>Yus winia waitnentrak akatar akuptuku asamtai juna tájarme. Atumek wíkítiajtai tu enentáimt̄umatsuk jeamna nujaj métek enentáimt̄umasta.

Yus enentáim̄ta asakmin takastinian suramsana nujaj apatkam nekaamata. <sup>4</sup>Ii ayashí chikichkiitiat ii muchitmar̄i untsur̄ínti. Tura métekrak muchitáiniatsui. <sup>5</sup>Núnisrik iisha, Yus-shuarti, ayashí muchitmar̄iya áintsarik untsur̄íntiatar chikichik ayashtinia áintsar takaaji. Nusha Krístujaj tsan̄kiu asar áitkiamuitji. Túramu asar nuamtak atsumnaiyaji.

<sup>6</sup>Ii túratniun Yus nusháa nusháa súram̄ji Nii wakera nujaj métek. Wats, Yus ámin suramsamna nu túratniuitme. Yus ni chichamen etserkatniun suramsaitkiuñkia Yus enentáim̄takum unuimiarmam nujaj métek etserkata. <sup>7</sup>Chíkich shuar yáint̄nian Yus suramsaitkiuñkia nekas enentáim̄jaj yáint̄á. Unuiniartiniaitkiumka yawetsuk unuiniarta. <sup>8</sup>Chíkich shuar ikiakártiniaitkiumka nekas péñker ikiakárta. Súsatniuitkiumka shiir enentáijjaj ementutsuk súsarta. Shuaran wáinin atí tusa Yus apujtamsaitkiuñkia ti enentáim̄sam túratá. Tura shuar itiurchat pujuinia nu yáint̄nian Yus suramsaitkiuñkia shiir enentáim̄sam túratá.

### Yus-shuar túratniua nu

<sup>9</sup>Nekas enentáijjaj mai anenai ajatarum. Yajauch nakitrarum péñkera nu túratarum. <sup>10</sup>Nuamtak yachi asarum núnisrum mai anenai ajatarum. Chíkich wijjaj nan̄kaamas úuntaiti tu enentáimt̄unaistarum.

<sup>11</sup>Nakittsuk kakaram ajasrum ashí enentáimjaj̄i ii Uuntri wakera nu túratarum.

<sup>12</sup>Ukunam Yus tsan̄katramkattajnia nu enentáimtusrum warastarum. Wáitiakrumsha katsuntrararum. Tuke iniaitsuk ashí túrunamujaj̄i Yus áuj̄satarum.

<sup>13</sup>Yus-shuar atsumainia nujaj̄i yáintarum. Írarsha péñker itiaatarum.

<sup>14</sup>Yajauch awajtamainia nu shiir awaj̄satarum. Yus yajauch yumintsuk nu shuaran péñker túrawarat tusarum seattiarum.

<sup>15</sup>Warainia nujaj̄i warastarum. Kúntuts pujuinia nujaj̄isha úttiarum.

<sup>16</sup>Chikichik enentáij̄ijaj̄i métekrak shiir enentáimtunaitiarum.

Nan̄kaamantu enentáimtumasairap. Antsu péejchach ajastarum. “Ti nekajai” tu enentáimtumasairap.

<sup>17</sup>Shuar ámin yajauch awajtamkuisha nincha yapajkiataj tu enentáimsáip. Aents ísam péñker áminia nu amesha tuke túratá.

<sup>18</sup>Ame jeamna nujaj̄i ashí shuarjaj̄i nawamnaikiam wekasata. <sup>19</sup>Yuska ni Papir̄in̄ juna áamtikramiayi: “Wíitjai tunaan asutiátniun. Wisha yapajkiattajai” tawai Uunt Yus. Tuma asamtai yatsuru, kajertamkuisha atumsha yapajkiairap. Antsu yajauch awajtamkana nuna Yus ístí. Yus asutiáti. <sup>20</sup>Tura nu arantcha tawai: “Ame nemasrum tsukamakuisha ayurata. Kitiamakuisha umartin susata. Nu túrakum péñker ajachua nu iniatsaartatme.” <sup>21</sup>Yajauch nupettamkaj̄in̄. Antsu péñker túrakum yajauchia nu nupetkata.

**13** <sup>1</sup>Akupniunka ashí shuar umirkatniuiti. Akupniuka Yus apuj̄samuiti. Yus apuj̄sachma akupin atsawai. <sup>2</sup>Tuma asamtai shuar akupniun umirtsuna nu, Yus apuj̄samun umireachu asa nekas asutniátniuiti. <sup>3</sup>Kame akupniuka péñker shuar sapijmiakarat tusar apuj̄sachma áiniawai. Antsu yajauch shuar ashamkarat tusar apuj̄samu áiniawai. Nii ashamsuk pujustin wakerakmeka péñker túratá. Túrakminkia akupin shiir enentáimturmartatui. <sup>4</sup>Yainmakat tusa Yus apuj̄samuiti. Antsu yajauch túrakmeka akupin nekas ashamkatniuitme. Warí, Yus ántar apuj̄sachmaiti. Tunáa shuaran asutiátniun Yus apuj̄saiti. <sup>5</sup>Nu asamtai akupin tuke umirkatniuiti. Aya asutiúwaj̄in̄ tusar umirkashtiniait̄ji. Antsu shiir enentáij̄ijaj̄i wekasatin umirkatniuiti. <sup>6</sup>Tuma asamtai núnisan̄ akupniun kuit súsatniua nu páchitsuk susatarum. Nu takatan pujursarat tusa Yus apuj̄saruiti.

<sup>7</sup>Ashí túratniua nu túratarum. Akiktiniaitkiumka páchitsuk akikta. Akupniusha uuntcha ashí núnisan̄ írunka nusha shiir enentáimtikratarum.

<sup>8</sup>Kuitjaj̄i tumashrintin airap. Antsu mai anenai tuke ajatarum. Chíkich shuar aneakum nin péñker túrattame. Túram ashí akupkamu páchitsuk umirkattame. <sup>9</sup>Akupkamusha tawai: “Tsanirmawaip, man̄kartuawaip, kasamkaip, chíkich shuar tsanumpruraip, chikichna wakerutkaip” tawai. Tura nusha ashí chikichik chichamjaj̄in̄ t̄iminiaiti: “Ame ayashim aneam

núnismek ashí shuar aneata.” <sup>10</sup>Shuar chíkich shuaran aneakka yajauch awajsashtatui. Tuma asa akupkamun ti shiir umirkattawai.

<sup>11</sup>Ii yámankamtaik Yus nekas enentáimtusmiaj nui “Ii ti shiir ajasar tuke uwempratin ukunam átatui” tu enentáimprachmashiaj<sup>1</sup>. Antsu yamaikia nu tsawant yuntumsamtaí ashí túrajnia nujají shintiarar enentáimpratniuitji. <sup>12</sup>Tuke káshiitiat tsawaqatempaí. Ii Uuntri<sup>1</sup> Kristu jú tunáa nuñkanam tátin ishichik ajasai. Tuma asamtaí ii túrutairí kiritniua núnisan<sup>1</sup> yajauch túrutai ana nuka túrutsuk tsáapninium péñker wekasatin kakaram ajastai. <sup>13</sup>Túratniua nujají métek wekasataí. Tsawai<sup>1</sup> wekaakur kiritniunam uumkar tunáa túrutai túrashtai. Nampetsuk, yajauch warartsuk, tsanirmatsuk, jianaitsuk, tura kajernaitsuk aya péñker túrataí. <sup>14</sup>Ii Uuntri<sup>1</sup> Jesukristu túramia núnisrik túrataí. Tura ii ayashí wakeramu umikiat tusar tsañkatkashtiniaitji.

### Ame yatsum kakantraip

**14** <sup>1</sup>Shuar Yúsan ishichik enentáimtana nu itiaatarum tura kakantraírap. <sup>2</sup>Iis, chíkichka ashí yuamniaiti tuiniawai. Tura chikichcha, Yúsnan awajirar, naman<sup>1</sup> yúashtiniaiti tuiniawai. <sup>3</sup>Tura ashí yúa nuka naman<sup>1</sup>ken yúatsna nuna wishikrashtiniaiti. Núnisan<sup>1</sup> ashí yucha nu ashí yuun kakantrashtiniaiti. Warí, núnaka Yus ni shuarín awajsachukait. <sup>4</sup>¿Ámeka timiataash péñkeraitiam chíkich shuar kakantinia? Antsu ni úuntri<sup>1</sup> ni péñker túramuncha tura yajauch túramuncha íschatniukait. Enentáimpratá. Yus kakaram asa nin péñker awajsamniaiti.

<sup>5</sup>Chikichcha enentáimprataí. Chíkich shuar tsawantan achikiar “Jú tsawantaj<sup>1</sup> Yus nan<sup>1</sup>kaamas shiir awajsatniuiti” tuiniawai. Chikichcha ashí tsawantan métek enentáimtuiniawai. Ayu, tura ni enentáimtamun nekas paant nekaatniuiti. <sup>6</sup>Chikichik tsawantan enentáimtakka Yusan shiir awajsatniun túrawai. Tura ashí métekrak enentáimtakka Yúsan shiir awajsataj tusa túrawai. Yurumkajajísha ashí yúana nu Yúsan yumíñkias shiir awajsataj tusa túrawai. Núnisan<sup>1</sup> ashí yúatsna nusha Yúsan yumíñkias shiir awajsataj tusa túrawai.

<sup>7</sup>Iikkia ii enentáijiaín iwiaaktsuji. Tura jáakrishá ii enentáijiaín jaatsji. <sup>8</sup>Kame iwiaaku pujakrishá ii Uuntri<sup>1</sup> Kristu shiir awajsataí tusar pujurji. Tura jáakrishá tuke Níiniuitji. Nu asamtaí iwiaaku pujakrishá tura jakarsha tuke Krístunuitji. <sup>9</sup>Kame jakancha iwiaakuncha ashí ni Uuntri<sup>1</sup> ajastaj tusa Kristu jaka nantakmiayi.

<sup>10</sup>Tura çurukamtaí ame yatsum “yajauchiiti” tame. Urukamtaí nakitiam? Warí, ashí iikia ii túramu paant awajnasat tusar Kristui<sup>1</sup> naka wajastatji. <sup>11</sup>Nu asamtaí Yus-Papinium tawai:

“Wi nekas iwiaaku pujá asan ashí Winí tikishmatrurartatui. Tura ashí “Yus asa tuke péñker túriniaiti” túrutiartatui” tawai.” Tu áarmaiti.

<sup>12</sup>Tuma asamtai iisha chikichik chikichik ashí ii túramu Yus paant ujakartatji.

### Ame yatsum tunaanum ajurairap

<sup>13</sup>Nu asamtai “yajauch túriniaiti” tu áujmatnaisashtiniaitji. Antsu ii yachi tunaanum ajuarchatin ti enentáimturtniaitji. <sup>14</sup>Jesukrístu jintintiamu asan juna nékajai: Yus najanamuka péñkerchaka atsawai. Ashí túramniaitjai. Túrasha shuar chichaak “Nu túrushtainti” táyat nuna túrakka nijijai tunaiti. <sup>15</sup>Tuma asamtai shuar chichartamuk “Nu yúakminkia Yusjai péñkerchaiti” tai, ame yúakminkia nu shuar itirchat enentáimsashtatuak. Tura niisha tunaanum iniaar menkakamniaiti. Nu shuar aneakum túratsme. Enentáimpratá. Aya ame yuamna nujain ame yatsum Kristu jarukmia nu emenkákaip. <sup>16</sup>Tura “yuamniaitjai” táyatam wi yúakui yajauch áujmatrusarain tusam iniaisata. <sup>17</sup>Kame Yus umirkatin yurumátniuajisha umartinjajisha enentáimtuschatniuiti. Antsu Yusa Wakanjijai shiir wekasar Yusjai tura shuarjai nawamnaikiar ti péñker wekasatniuitji. <sup>18</sup>Ashí shuar Krístun núnis umireakui Yussha tura chíkich shuarsha péñker enentáimtuiniawai.

<sup>19</sup>Nu asamtai tuke shiir pujusminia nu túrakur Yusjai kakaram ajastin yáiniaiktai. <sup>20</sup>Yus iisam ashí yuamniaitji. Antsu ame yuamna nujai chíkich shuar tunaanum ajuartin tunaiti. Tuma asamtai ame yuam nujai Yus nu shuara enentáin takarsamu emesraip. <sup>21</sup>Nu túrashtin nuikia naman yúashtincha karía umarchatniusha péñkeraiti. Warí, túrushtaijjai ame yátsum itirchat enentáimtikram tunaanum ajuarchatapash. Tura nu shuar Yúsan nekas enentáimtusshamnia ajastatui. Nuka atsutí. <sup>22</sup>Ame Yus nekas enentáimtakum ashí túramniaitkiumka Yúsak wararsata. Shuar Yus ímmianum shiir enentáijjai mash túramnia nu nekas shíiraiti. <sup>23</sup>Tura araantushim yua nuka Yúsan shiir enentáimtutsuk yua asa sumamattawai. Kame ashí Yus shiir enentáimtutsuk túramu tunaiti.

### Chíkich shuar wakeramuk enentáimtustiniaiti

**15** <sup>1</sup>Yusjai katsuaru ájinia nu iik enentáimtumatsuk kakarmachu ainia nu yáintiniaitji. <sup>2</sup>Chíkich shuar wakeramu enentáimtustiniaitji. Tura Yusjai nu nankaamas shiir wekasatniun yáinminiaitkiui túratniuitji. <sup>3</sup>Krístusha ni wakeramun túrachmiayi. Antsu Yus-Chicham tana núnisan chikichnan enentáimtusmiayi. Nu asamtai Yúsan umirin asa wáitiak timia nu áarmaiti: “Ámin katsekramainiak Winiaja katsekrukarmiayi.” <sup>4</sup>Núnisan ashí yaunchu Yus-Papinium aarma in jintintramatniun áararmiayi. Nujai atsantamkurin shiir wáinkiattajnia nuka katsuntrar nákastatji. <sup>5</sup>Yus atsantamar katsuntratniun jintintramji. Tuma asa Jesukrístu túramia áintsan atumniasha chikichik enentáijjai enentáimtunaisar pujustinian yáinmakartí. <sup>6</sup>Nujai ashí métekrak Yus shiir awajsattarme. Niisha ii Uuntrí Jesukrístuncha Aparínti.

**Israer-shuarchanmasha Uwempratin Chicham etserkamu**

<sup>7</sup>Tuma asamtai chíkich shuarjaisha shiir awajnaistarum. Kristu núnisan Yúsán shiir awajsat tusa incha shiir awajtamsamijai. <sup>8</sup>Juna tajai. Kristu Israer-shuaran yáintaj tusa támiayi. Tura Yus ti yaunchu nuna weatrín “túrataj” timia nu uminkiat tusa támiayi. Nujai Yus timia nuna umikmia nu nekaamniaiti. <sup>9</sup>Tura nu arantcha Israer-shuarchasha Yus waitnentrartin ásarmatai nin shiir awajsarát tusa támiayi. Tura Yus-Papisha tawai:

“Ámin kantamprakun ashí shuarnum shiir awajstatajme.”

<sup>10</sup>Tura nu arantcha tawai: “Ashí nunkanmaya shuarteram ashí Israer-shuar Yúsna ainia nujai warastarum.”

<sup>11</sup>Tura ataksha tawai: “Ashí aents ii Úuntrín shiir awajstari. Tura ashí shuarsha Nin “Ti úuntaiti” tiartí” tawai.

<sup>12</sup>Isayasha áarmiayi: “Tawitia aparí Isai weatriya akupin akiinkiattawai. Niisha ashí nunkan akupeakui ashí shuar niiniak shiir enentáimtusartatui.” Tu áarmaiti.

<sup>13</sup>Yus ashí shíiran suramsattakrin nu shiir nákaaji. Tuma asamtai Nii nekas enentáimtakrumin warasa shiir pujustinian yamá suramsati. Nuyá Yusa Wakaní kakarmaríjiai ti shiir enentáijiai katsuntrarum, nu nákastarum.

<sup>14</sup>Yatsurú, atumsha anenainaitrume. Tura ashí Yusna nekaarum nuamtak chicharnaikiatin nékarme. <sup>15</sup>Tuma ain kajinmatkijirum tusan ataksha ti paant áakun jú enentáimtikeajrume. Yus winia waitnentrak ni Chichamen etserkat tusa akuptakui nuna áatjarme. <sup>16</sup>Kame Jesukristu Israer-shuarchanum Yusa shiir chichamen etserkat tusa akuptukuiti. Nuna túrakun Israer-shuarchan Yusa Wakaníjiai shiir awajsamu ásarmatai Yusai juiniajai. Tura Yussha shiir enentáijiai itiaiiniawai.

<sup>17</sup>Jesukristu yaintiu asamtai Yusna takarsamaj nuna wararsamniaitjai. <sup>18</sup>Tura chíkich shuarjai Kristu túramun pachischattajai. Aya wi chichasmajaisha tura wi túramujaisha Israer-shuarchan Kristu umimtikiamia nunak áujmatsattajai. <sup>19</sup>Yusa Shiir Wakaní kakarmaríjiai aents tujintiamun túran ashí shuaran Jerusarén péprunam nanakan etserkin Iririkiu nunkanam ejekamjai. Kristu-chichaman ashí nu nunkanam etserkaitjai. <sup>20</sup>Nuna túrakun chíkich shuar etserkachmanum Krístunun ántichu áiniamunam Uwempratin Chichaman etserkaitjai. Nujai chíkich takasmanum takarsachuitjai. <sup>21</sup>Yus-Papisha núnisan tawai: “Chichaman penké antukcharuka nekaawartatui. Nin áujmatman anturkacharusha unuimiarartatui.”

**Papru Rúmanam wétaj tawai**

<sup>22</sup>Nuna pujuru asan íitjarum táyatan íichmajrume. <sup>23</sup>Tura yamaikia juyá takatrún umikian tura yáunchusha tuke íitjarum tiniu asan

<sup>24</sup>Ispania nukanam wéakun íistatjarme. Tura atumfín shiir irasan Ispanianam wéakuí atumsha yaintkiarum shiir akuptukchattarpash. <sup>25</sup>Tura yamaikia kuitjají Jerusarénumiá Yus-shuaran yáintaj tusan wéajai. <sup>26</sup>Masetúnianmayá shuarsha tura Akayanmayá shuarsha kuítian irurar Jerusarénumiá Yus-shuaran atsumainia nuna akuptuktai tuiniawai. <sup>27</sup>Ti wakeruiniak túrawarmiayi. Nu nekas túrashtinkiait. Israer-shuarnumiá Yus-Chichaman antukaru ásar yamaikia ni kuítrijají páchitsuk yáinchatniukait. <sup>28</sup>Tuma asamtai jú kuitian sú saran umiran nuikia Ispanianam wéakun íiktijatjarme. <sup>29</sup>Tura nuí winiakun Kristu Shiir Chichamen nujají shiir yáintajrum tusan ejeettiajrum.

<sup>30</sup>Yatsurú, ii Uuntrí Jesukristunu asarum tura ni Wakaní pujurtamkurmin anenia asarum Yus áujtursatarum. Núnisrum wijjají métek Yusna takastin yaintkiattarme. <sup>31</sup>Jutia nunkanmayá Israer-shuarnumiá uwemtikrat tusarum Yus áujtursatarum. Tura jú kuitian júajna nunasha Jerusarénumiá Yus-shuar shiir achikiartí tusarum Yus áujtursatarum. <sup>32</sup>Nujají, Yus wakerakuinkia, péñker wampú enentáimsan warasan fittiajrum. <sup>33</sup>Yus ti shiir pujustinian súana nu atumjají tsanin pujurtamsati. Núnisan atí.

### Amikmaamun akupramiania nu

**16** <sup>1</sup>Ii umai Jépeka Senkrea péprunmayá Yus-shuaran yáiniaiti. Ti péñker Yus-shuaraiti. <sup>2</sup>Kristu náariin shiir wáinkiatatum. Nuamtak yachí wáinkiatniua núnisrum wáinkiatatum. Niisha chikichnasha tura winiasha ti péñker wáitin asamtai atumsha ni atsumamusha yaintatum.

<sup>3</sup>Pirisirasha Akirasha wijjají métek Jesukristunun takasaru ásar amikmaatainajai. <sup>4</sup>Niisha winia uwemtikrurtai tusar jáninkiarumiayi. Tuma asamtai yuminkinijai. Tura aya wíkichu antsu ashí Israer-shuarchanumiá Yus-shuar ánia nusha yuminkiniawai. <sup>5</sup>Núnisan ashí Yus-shuar Pirisiran tura Akira jeen irunainia nusha amikmaatarum. Tura winia aneamu amikiur Epenetu amikmaatruatarum. Niisha Akaya nunkanam emka Krístun nekas enentáimtusmiayi. <sup>6</sup>Marisha, atumjají ti takasua nu amikmaatruatarum. <sup>7</sup>Tura wíi shuarsha Antrunikiusha Júniassha amikmaatruatarum. Niisha wijjají sepunam pujusarmai. Wijjají emka Krístun shiir enentáimtusar chíkich akatramujají nankaamas takasaru ániawai.

<sup>8</sup>Ámpriassha Krístunam winia aneamu amikiur asamtai amikmaatruatarum. <sup>9</sup>Urpanujajísha Jesukristu takatrí tsaninniuitji. Niisha tura aneamu Estakissha amikmaatruatarum. <sup>10</sup>Apirissha amikmaatruatarum. Niisha Krístun ti shiir enentáimtamu ti páantaiti. Núnisan Aristúpuru shuarsha amikmaatruatarum. <sup>11</sup>Wíishuar Erutiúnsha tura Narsisu shuarsha Kristu shuari ásarumatai



amikmaatruawarta. <sup>12</sup>Tripiniasha tura Tripiusasha Yúsnan takainia ásar matai amikmaatruatarum. Núnisan̄ ii umai Pírstitia Yúsnan ti takasu asamtai amikmaatruatarum. <sup>13</sup>Rúpusha, nusha ti penker Yus-shuar, tura nukurísha amikmaatruatarum. Niisha wíjjaī nekas winia nukurua núnisaiti. <sup>14</sup>Asin̄kritiusha, Pirikiuntisha, Érmassha, Patrupalasha, Érmessha, tura ashí niijjaī Yús-shuar ainia nu amikmaatruatarum. <sup>15</sup>Núnisan̄ Jirurukusha, Júriasha, Néreusha, ni umajjiaisha, Urimpiassha, tura ashí Yus-shuar niijjaī pujuinia nu amikmaatruatarum.

<sup>16</sup>Nuámtaksha shiir aujnaisatarum. Ashí juyá Kristu shuari amikmaatmainiawai. <sup>17</sup>Yatsurú, shuar nusháa enentáimtuiniak Yus-shuaran akanainiak itiurchat awajenawai. Nu shuar wáinkiarum kanaktiarum. Ni yajauch túramu átum penker takastin unuimiarmena núnischaiti. <sup>18</sup>Nu shuar ii Uuntr̄i Jesukrístunun takainiatsui. Antsu ni wakeramun uminiawai. Tura ti shiir chichasar nékachun anan̄kenawai. <sup>19</sup>Átum umirma ashí shuar nékainiakur ti waraaji. Yajauch túrutsuk aya penker túratin enentáimsarum pujustarum. <sup>20</sup>Yus tuke shiir pujustinian amawa nu ti wárik uunt iwianchin nupetturmaktatui. Tura ii Uuntr̄i Jesukrístu shiir yainmakarti.

<sup>21</sup>Timiutéusha, wíjjaī takau, amikmaatmarme. Núnisan̄ Rúsiusha, Jasun̄sha, Susipatresha, mash wíshuar ainia nu amikmaatmarme. <sup>22</sup>Wi, Tersiu asan, Papru chichamen̄ ju papinium áateakun Kristu náariin̄ amikmaajrume.

<sup>23</sup>Káyusha amikmaatmarme. Ni jeen̄ pujaji tura juísha ashí Yus-shuar irunainiawai. Erastusha jū pepru kuítr̄in̄ wáinniuiti. Niisha ii yachī Kuártujaī amikmaatmarme.

<sup>24</sup>Ii Uuntr̄i Jesukrístu ti shiir yainmakarti. Núnisan̄ atí.

### Yus shiir awajsatai

<sup>25</sup>Watsek, Yus shiir awajsatai. Niñki nekas kakaram awajtamsamniaiti. Wi Uwempratin Chichamnum Jesukrístunun étsereaj nujaī ikiantamprattawai. Nu chicham yámankamtaiknumiá nekaachmanak Yus yamaikia paant awajsaiti. <sup>26</sup>Yaunchu Yúsnan etserin ni áarmanum nu chichaman etserkarmiayi. Tura yamaikia Yus wakerak ashí nun̄kanmaya shuar Nii enentáimtusar umirkarat tusa nu Chichaman yamaikia paant awajsaiti. Yus amuutsuk tuke pujuwiti.

<sup>27</sup>Yúsak Niñki ti neka asa tura Jesukrístu ti penker tura asamtai Niñki tuke shiir awájnástí. Nuke atí.

# Papru

## KURINTIUNMAYA SHUARAN

### EMKA papin aar akuptukma

---

**Kurintiumaya Yus-shuaran Papru áatramiania nu**

**1** <sup>1</sup>Wi Páruitjai, Jesukrístu akatramu. Yus nuna wakerak, ni akatramurí atí tusa anaitiukmai. Wi, ii yachi Sústinisjai, ju papí akupeaji. <sup>2</sup>Ashí Yus-shuar Kurintiu péprunam iruntrumna nu ju papí akupeaji. Átumka Jesukrístujai tsaniñkiu asarum Yusna árume. Atumsha tura ashí shuar Jesukrístun enentáimtuiniana nunasha Yus ti penker awajsatniun wakerawai. Nincha incha Jesukrístu mai metek Uuntrinti. <sup>3</sup>Yus ii Aparí tura ii Uuntri Jesukrístusha waitnentrainia ásar yainmakarti imiatkinchanum tuke shiir pujustinian.

**Ii Uuntri Jesukrístujai tsaniñkia pujustin**

<sup>4</sup>Yusan áujkun yuminsan atumin shiir enentáimtajrume. Jesukrístujai tsaniñkia pujakrumin Yus shiir enentáimturmawai. <sup>5</sup>Jesukrístujai tsaniñkia pujakrumin Yus atumin ti yáinmawai ashí penker ana nu enentáimtakrum tuke shiir chichastinian. <sup>6</sup>Kristu juna túramniaiti tíchamkaji. Ashí yamaikia uminkiaiyi. <sup>7</sup>Tuma asamtai ashí Yus súramna nu atsumatsrume. Nu túrakrum ii Uuntri Jesukrístu tatin tuke nákarne. <sup>8</sup>Tura iniaitsuk tuke emettamattawai ii Uuntri Jesukrístu támatai atumi tunaarin pachischatin. <sup>9</sup>Jesukrístu ii Uuntrinti. Niijjai tsaniñkia pujusúk tusa Yus achirmakmarme. Tura Nii tana nuna tuke umiktatui.

### Yus-shuar akantramu

<sup>10</sup>Yatsuru, ii Uuntri Jesukristu naari pachisan, seajrume métek enentáimpratarum tusan. Níisháa níisháa enentáimprairap antsu chikichik enentáijjai métek enentáimsa pujustarum. <sup>11</sup>Átum yajauch chicharnaisarum pujarme. Kruu shuari tu ujatarmatai tájarme. <sup>12</sup>Kame júnis awai: Chíkich “Wi Páprunuitjai” tuiniawai. Chíkich “Apurusnaitjai” tuiniawai. Chikichcha “Wi Pítrunuitjai” tuiniawai. Chikichcha “Wi Kristu-shuaraitjai” tuiniawai. <sup>13</sup>¿Warí, nuñkia, Kristu akantramukait. Páprusha krúsnum jarutramkamaashi. Tura Papru naari pachisa imiaimiukaitrum? <sup>14</sup>Atumin untsurí imiaichu asan shiir enentáimjai. Aya Krispu Káyujai jímiarchiniak imiaimjai. <sup>15</sup>Nújainkia shuar “Papru náariñ imiaimiuitjai” tíchamniaiti. <sup>16</sup>Maa, nekas, Estepanasa shuarincha imiaimjai tura chíkich wi imiaimiun nékatsjai. <sup>17</sup>Kristu imiakrattia tusa akuptukchamai antsu uwempratin chichaman etserkat tusa akuptukmai. Tura ti neka chichainia núnisan chichaatsjai shuar wi shiir chichaamun enentáimprarañ tusan. Antsu yúpichuch chichaajai Kristu krúsnum jakamuk paant atí tusan.

### Kristu Yusa kakarmaríncha ni nekatairíncha paant iniakmasmiania nu

<sup>18</sup>Kristu krúsnum jarutramkamu étsereaji. Antsu Yus-shuarchaka menkaakatniunam wéana nu, “ántraiiti nu chicham” tu enentáimainiawai. Antsu Yus-shuarti, uwempratniunam wéakur, “nu chichamjai Yusa kakarmari takusminiati” tu enentáimji. <sup>19</sup>Núnisan tawai Yus-Chicham yaunchu aarma: “Ju nuñkanmayan ti neka áiniana nuna chichamen emesrattajai; ti unuimiararu áinianak ántar awajsattajai” tawai Yus ni chichamen. <sup>20</sup>Iis, ju nuñkanam uwempratin chicham íruntsuk. Nu chichaman ashí mash Yus ántar awajsaiti. Ti neka áiniana nusha, jintinkiertin áiniana nusha, ashí ju nuñkanmayan unuimiar ti chichastinian nékana nusha, nu shuar mash “wi tájana nujai péñker pujusam uwemprattame” tu enentáimiainiawai. Tura núnaka mash Yus penké ántar najanaiti. <sup>21</sup>Aya ni nékamujai aents Yúsán nekaacharmiayi. Núnisan atí tusa Yus túramiayi, timiá neka asa. Antsu ashí aentsun Yus ni chichamejai uwemtikratniun wakerimiayi. Chíkich “ántraiiti” tuiniana nu chichamjaink<sup>i</sup> Yus Nin enentáimtuinia núnaka uwemtikratniun wakerak túramiayi. <sup>22</sup>Israer-shuar “aentsti túrachminian iniakmasta, wi nekaataj” tuiniawai. Kriaku shuarsha “ti enentáimsam, mash péñker jíikim turuttia wisha métek enentáimprataj” tuiniawai. <sup>23</sup>Iikia antsu Kristu krúsnum jarutramkamuk étsereaji. Israer-shuarsha “ju chicham natsantaiti” tu enentáimiainiawai. Israer-shuarchasha “ju chicham ánttraiiti” tu enentáimiainiawai. <sup>24</sup>Tura Yus achikiarma, Niiniu ajasarat tusa, Israer-shuarsha Israer-shuarchasha mai metek “Kristu krúsnum

jarutramak Yusa kakarmarincha ni nekatairincha paant iniakmasmiayi” tu enentáimji. <sup>25</sup>“Yusa nekatairi áénkeraiti. “Yusa kakarmarisha jeatsui” tuiniawai aents, túrasha imiá nekas kakarmaiti. <sup>26</sup>Enentáimtumastarum yatsuru. Yus achirmakmarme Niiniu ajastinian, tura ju nunkanam ti neka áinia núnisan atumin ti neka íruntsui. Ti akupniusha ti nankaamakusha atumin íruntsui. <sup>27</sup>Antsu ju nunkanam nékachua núnis ana nuna Yus achikiuiti ti neka nuna iniatsáartinian. Tura ju nunkanam kakarmachua núnis ana nunasha Yus achikiuiti kakarma nuna iniatsáartinian. <sup>28</sup>Péejchachincha, nakitsamuncha, ákaamantu írunna nuna amuktinian. <sup>29</sup>Nújainkia chikichkisha Yusjai waantu enentáimprachminiaiti. <sup>30</sup>Tura Yus atumin Krístujai tsanin apujtamsaiti. Tura Kristu enentáimtusar Yus nekas nekatainkia nekaattaji. Kristu enentáimtakrin Yus shiir enentáimturmaj*i*, pénker awajtamji, tura uwentikramji. <sup>31</sup>Yus-Papinium yaunchu aarma núniskete: “Shuar nankaamantu enentáimprataj tákunka ii Uuntri Yus túramun wararsati.”

### Kristu krúsnum jakamu etserkamu

**2** <sup>1</sup>Wisha, yatsuru, atumin jeamaj nu*i* Yus-chichaman ti neka chichainia áintsan tura íwiasanak ujakchamajrume. <sup>2</sup>Tura atumjai pujakun aya chikichkiniak nekaatniun enentáimpramjai. Júiti: Jesukrístu, tura Jesukrístu krúsnum jakamu. <sup>3</sup>Nékayatan kakarmachu sapíjmiashím jearmiajrume. <sup>4</sup>Yus-Chichaman ujaakun ti neka chichainia áintsan nupetkataj tu enentáimturchamajrume. Antsu Yusa kakarmarincha tura ni Wakanincha paant iniakmasan Yus-Chichaman ujakmajrume. <sup>5</sup>Aentsu nekatairijai Yus enentáimtuschatniuiti antsu Yusa kakarmari paant nekaarum Yus enentáimtustiniaitruume. Nuní asamtai Yus-Chichaman tu ujakmajrume.

### Aya Yusa Wakanijai Yúsnan nekaamniaiti

<sup>6</sup>Túmaitiat Yusa nekatairi átsuk. Yúsnan unuimiararujai Yusa nekatairin áujmatji. Tura Yusa nekatairinkia aentsu nekatairi áintsachuiti. Ju nunkanam akupin ainia nuna nekatairinchuiti Yúsna*ka*. Ju nunkanam akupniuka ishichik pujus amuukachartatuak. <sup>7</sup>Yaunchu ju nunka atsain Yus in uwentikrampratniun enentáimpramiayi ti shiir pujusarmi tusa. Ju Yusa enentáimmiari yaunchu nekanachmiayi, tura yamaikia nu nekaar áujmatji. <sup>8</sup>Ju nunkanam akupniuka nuna pénké nekaacharmiayi. Nékainiakka ii Uuntri timiá shiira nuna, krúsnum máacharu ayi. <sup>9</sup>Yaunchu Yus-Papinium áarchamukait: “Shuar Yúsan aneana nuna Yus ti shíiran susattawai. Susattana nuka timiá pénker asamtai shuar wáinkiachman, antukchamuncha, enentáimtachmancha

Yus susattawai” tu áarmaiti. <sup>10</sup>Tura Yusa Wakaní ii enentáin pujurtamuk Yus suramsattajnia nuna yamá paant jintintramji. Nu Wakancha imia Yus enentáimmiancha mash nékawai.

<sup>11</sup>Shuar enentáimna nuna chíkich shuar nekaamniakait. Antsu aya ní enentáijiaín nékatsuk. Núnisan aya Yusa Wakaní Yúsnan paant nékawai. <sup>12</sup>Ju nunkanmaya aents enentáimiania nujai Yusna nekaachminiaiti. Antsu Yusa Wakanin in súramaj nujai Yus shiir tsankatramajnia nu nekaamniaitji. <sup>13</sup>Yusa Wakaní jintintramji Yúsnan chichastinian Nii wakera áintsan. Ni chichamen súramji. Túramtai ii nékamujai Yúsna étsertsuji. Tuma asamtai imia Yusna nuka Yusjai péñker wekainia nu jintiaji.

<sup>14</sup>Yus-shuarcha Yusa Wakaníniun ántatsui ántrai tusa. Aya Yusa Wakaní jintintiamniaitkiui Yus-shuarcha nuna penké nekaachmin ániawai. <sup>15</sup>Antsu Yusa Wakanin takaku ashí mash iis, péñkera nuna nekaamniaiti. Nii túrana nunasha chíkich shuar súmamtekiachminiaiti. <sup>16</sup>Yus-Papinium yaunchu áarmaiti: “¿Yusa enentáimmiari ya neka. Tura Yúsna ya jintintiamniait?” tu áarmaiti. Tuma ain iikia Yus-shuar ájinja nu, Kristu enentáimna núnisrik enentáimji.

### **Páprusha Apurussha Yusa takatrin mai tsaniñkiar takainiawai**

**3** <sup>1</sup>Tura wikia, yatsuru, nuik aji atumjai pujakun Yusa Wakanin umirniun chichastinia áintsanak atumjai chichastinian tujinkiamjai. Antsu ayash wakeramu umirin asakrumin Kristunam katsuarcharujai chichastinia áintsanak atumjai chichasmajai. <sup>2</sup>Uchi kuírach naman ayurachminiaiti antsu aya umuntsatniuiti. Núnisan aya yúpichuchin ujakmajrume, itiurchat ana nu tujintiakrumin. Tura yamaisha itiurchat ana nu tuke tujintiarne. <sup>3</sup>Tuke ayash wakeramu umirniuitrume. Yajauch enentáimtunaiyakrum tura katsumnaiyakrum akantramuitrume. Nujai páantaiti átum ayash wakeramu umirniuitrume. Yúsnan enentáimticharujai métek wekainiaitrume. <sup>4</sup>Atuminkia shuar “wi Páprunuitjai” tuiniatsuk. Chikichcha “wi Apurusnaitjai” tuiniatsuk. Tu chichaakrum ayash wakeramu umirniuitrume. <sup>5</sup>Wátsek. Wi Papru ti péñkeraashitaj. Apurussha ti péñkeraashit. Antsu iisha aya Yusa takarniurintji. Yus-Chicham étserkurin ii Uuntri enentáimtusamkuram. Ii Uuntri takatan chíkich chíkich suramsamajnia nuke takasmaji. <sup>6</sup>Wi Yus-Chichaman étserkun arakan araktinia áinis takasmajai. Apurussha entsan ukatramai. Tura Yus nu arakan tsakatmarmai. <sup>7</sup>Arakan araana nusha, entsan ukatna nusha ánrachukait. Antsu Yusak arakan tsakatmaru asa ashí túrachukait. <sup>8</sup>Arakan araana nusha, entsan ukatna nusha métek ániawai. Túmaitkiuisha takasmajai métek Yus akiktatui. Péñker takasmatainkia péñker akiktatui. <sup>9</sup>Wisha Apurussha Yusa takatrin mai tsaniñkiar takaaji. Tura Yus atumí enentáin takaakui atumsha Yusa núnkea áintsaitrume.

Jeasha enentáimpramniaiti. Yus atumjai takaak jeá jeamtinia áintsan takaawai. <sup>10-11</sup>Jeá jeamainiak, emka uunt kaya nunká init ikiursar kaki awajsatin ániawai. Tura nuyanka nu kayanam ekeniar júkitniuiti jeá wewe atí tusa. Wikia jeá jeammin ti unuiniamiarua áintsanak uunt kaya nunká emka ikiustinian nekaan, núnisnak Jesukrístunun emka ujakmajrume. Tura Jesukrístu uunt kaya kaki ikiusma áinis asa Nínkiti nuí jeá ekenkatin. Iis, ashí enentáimtustinia nankaamas Jesukrístu enentáimtustiniati. Nu asantai Jesukrístunun emka ujakmajrume. Yus nuna etserkatniun tsankatrúkui. Wi emka, uunt kaya ikiursatniua áintsan, Jesukrístunun ujakmajrume. Tura nuyanka chíkich shuar ekeniar jeammin ániawai. Tura anearti péñker jeamtinian. <sup>12</sup>Tura jeá jeamainiak nii wakerak péñker ana nujai jeamminiati. Nii péñker jeamtinian wakerak kurijiaisha, kuítjaisha, shíirmach kayajaisha jeamminiati. Chíkich jeamkuka numijiaisha, kenkujajisha, nukajaisha jeamminiati. Núnisan shuar Yúsna takaak péñker takasminiati túrasha nánkamas takasminiati. <sup>13</sup>Tura amuukatin tsawant jeakui ashí ni takatri paant átatui. Nu tsawantaisha Yúsaiya ji átatui tura nu jisha ni takatri péñkera nunasha tura yajauchia nunasha nekapsattawai. <sup>14</sup>Tura shiir jeamuka tura nu jeasha esaachmatainkia shiir akinkiattawai. <sup>15</sup>Antsu nánkamas jeamuka imianiniki jiniumia uwemprattawai, tura ni jeamma esaa penké atsuttawai.

<sup>16</sup>Enentáimpratarum. Yusa Wakaní atumín pujá asantai Yusa Jee ajasuram nu nékatsrumek. <sup>17</sup>Shuar Yusa Jee emeseakuinkia Yus nu shuaran emesattawai. Yusa Jee nka timiá shiir asantai túrattawai. Nu Jeá atumketrume.

<sup>18</sup>Ju nunkanmayan unuimiarua núnisrum “ti nekaitjai” tu enentáimtumasrum ananmamawairap. Antsu ju nunkanmayan nékachu áinis ajas Yúsna ti shiir unuimiártiniati. <sup>19</sup>Ju nunkanmaya aents nékainia nuna Yus “ántrai” tawai. Yus-Papinium áarmaiti:

“Ju nunkanmayan unuimiarun ni enentáimmiajin Yus sumamtikiattawai.”

<sup>20</sup>Tura nu arantcha áarmaiti:

“Uunt Yuska “unuimiaru enentáimmiancha penké ántrai” tawai.”

<sup>21</sup>Tuma asantai “Páprunuitjai tárugna nusha, “Apurusnaitjai”, tura “Pítrunuitjai” tárugna nusha ántar enentáimprume, nii aya aents ásarmatai. Tu enentáimprurum warasairap. Antsu nekaatarum. Ashí írunga nu atumin yainmaktiniati. <sup>22</sup>Páprusha, Apurussha, Pítrusha, ju nunkanmayasha, iwiaakmasha, jákatniusha, yamáí írunga nusha, ukunam átatna nusha, mash atumniati shiir yainmaktin. <sup>23</sup>Atumsha Krístunuitrume, tura Krístusha Yúsnaiti.

#### Yus akatramu takatri

**4** <sup>1</sup>Júnisan ashí shuar enentáimturmastiniatji. Iikia aya Kristu yáintrintji. Kristu akatramurintji Yusna yaunchu nekaachma ana nu

yamá etserkatin. <sup>2</sup>Wátsek, akatramuka tána nujaj métek umiktiniaiti. <sup>3-4</sup>Wi umikmancha umikchamuncha ii Uuntrj Kristu nékawai. Átum enentáimturarmena nusha tura chíkich aents enentáimturainia nusha wíjjajnkia ántrai. Imia wíkisha nekamatsjai. Kame winia tunaarun penké wáintsujai tura aya nujaj “pénkeraitjai” tíchamnaitjai. Niñki Yus iirui. <sup>5</sup>Tsawant jeamtaí ii Uuntrj Kristu atak tátatui. Tura ashí yamá kiritniunam uuqma nuna tura shuar ashí enentáimprarma nunasha paant awajsattawai. Nu tsawant jeatsajin shuar umikiuashit tusarum enentáimtusairap. Tura nu tsawantaj Yus ashí pénker umikiarun shiir awajsattawai. Pénker umikiuncha ishichik umikiuncha takasmajaj métek Yus shiir awajsattawai.

<sup>6</sup>Átum “Ju shuar pénkeraiti tura chíkich pénkerchaiti” tu akannáirarum penké tíchatniuitrume, yatsuru. Nuka paant atí tusan “Átum “Wi Páprunuitjai” tura “Wi Apurusnaitjai” tírap” tajai. Antsu aya Yus-Papinium áarmajaj métek enentáimsatarum. <sup>7</sup>Ámeke chíkich shuarjaj méteketme. Tura ashí takakmena nusha Yus amasmaiti. Tura Yus amasu asamtaí çitiurak áminiukea áintsam nujaj nankaamantu ajai tu enentáimtumam?

<sup>8</sup>ÇTi kuítrinnia áintsan tura ashí takakua áintsan enentáimtsurmek. In nankaakarum uunt kapitián ajasua áintsan enentáimtsurmek? Nekas uunt kapitián ajasrumka maak. Nuñkia iisha atumjaj akupkaintji. <sup>9</sup>Chíkich shuar mash nankaamantu áinis ániakuisha Yus in ni akatramurin ashí amúamunam apujtamsaitji. Tu enentáimpramniaiti. “Yajauch ániawai, máatái” tu pujurtamji shuar. Tura Yusa suntarisha ashí juyá shuarsha in íistai tusar káutramkaitji. <sup>10</sup>Iikia atumjaj jeatsji. Kristu shuari asakrin nékachua áinis enentáimturmajaj shuar. Átum antsu Krístunam tí nékachushitrum. Iikia kakarmachuitji. Átum timiá kakarmaitrume. Átumka ti penkeraitrume. Antsu iikia muíjtiaintji. <sup>11</sup>Tuke yamaisha tsukamajaj, kitiamaí, entsartin atsumajaj. Katsumpramjaj. Jeasha atsumajaj. <sup>12</sup>Ii ewejéjaj takaakur ti pimpíajaj. Shuar katsekramainiaíjaj túrasha iikia shiir chichamajaj aiyajaj. Itiurchat awajtamainiakuisha katsunteajaj. <sup>13</sup>Tsanumprutmakrincha tuke shiir chichaajaj. Tsuata áintsarik tuke yamaisha ashí yajauchia núnisan ajapramatniun enentáimturmainiaíjaj.

<sup>14</sup>Atumin aya iniatsaartajtsan juní áattsujrume. Antsu winia aneamu uchirua áintsan jintintjarme. <sup>15</sup>Atumin Yus-Chichaman ujaakun Yus-shuar ajastinian unuiniamjarme. Nujaj Jesukrístu enentáimtakrumin atumí aparía áintsan ajasmajaj. Chíkich shuar Krístunun jintinrámatin timiá untsurí ákuisha aya wiki atumí aparíntjai. <sup>16</sup>Tuma asamtaí wi wekaajna áintsan wekasatarum atumsha.

<sup>17</sup>Nu túratarum tusan winia aneamu uchirun Timiutéun akuptukmajrume. Niisha ii Uuntrj Krístun enentáimtamunam winia uchiruiti tura Krístun enentáimtak tuke shiir wekaawai.

Túrasha wi Krístujai wekaamun ataksha enentáimtikramprattawai. Núiti ashí Yus-shuarnum wena jintíajna nuka. <sup>18</sup>Papru yamaikia iraishtatui enentáimturainiak chíkich chíkich nan̄kaamantuitjai tu enentáimtumainiawai. <sup>19</sup>Antsu Yus wakerakuin̄kia wárik íitjam tusan wakerajai. Nuin̄kia nan̄kaamantu chichamen̄ antukchattajai antsu wátskea, ni túramurisha íístái. <sup>20</sup>Yus akupeana nú shuar aya chíchainiatsui antsu Yusa kakarmarin̄ iniaktuiniawai. <sup>21</sup>Wátsek, ¿wari enentáimprum? Átum tuke núnisan̄ enentáimkiurminkia wi winin asutiátniuitjarne. Tura péñker enentáimkiurminkia, aneakun shiir chichasminiaitjarne. ¿Atumsha túa wakerarum?

### Tsanirmamu ti tunaiti

**5** <sup>1</sup>Atumíin shuar ti tunáa tura awai. Ju yamá ashí nekanaiti. Nu shuar ni aparí nuwé achikiuiti. Timia tunaaka nu tsanirmamu Yus-shuarchanumsha atsawai. <sup>2</sup>¿Nu tunaajajisha tuke nan̄kaamantu enentáimprumek? Antsu úttiniaitrum. Nu shuar tunáa túraka atumíin̄ akankatniuiti. <sup>3</sup>Ayashur pujachkuisha wi nuí pujáa áintsan nuna tunaarin̄ paant nekaamjai, tura asutiátniuiti tajai. <sup>4</sup>Tuma asamtai átum káunkakrumin ii Uuntri Jesukrístu kakarmarijijai tura wi nuí pujáa áintsanak, ii Uuntri Jesukrístu kakarmarijijai <sup>5</sup>nu shuar uunt iwianchnum surunkatniuiti ni ayashi wakeramurí amukati tusa. Nujai ni wakaní uwemprattawai ii Uuntri Jesukrístu támatai.

<sup>6</sup>“Tikia péñkeraitji” tárúmna nu ántrai, tunáa atumíin tuke akui. Iis, “Karía ishichik yuminnium en̄ketam mash karimtiktsuk” tiniu áiniawai. Núnis átatui ju tunaajají. <sup>7</sup>Tuma asamtai nu karía ukartarum yajauch awajturmasajj tusarum. Núnisrum ju tunaanumiá kanakrum péñker átatrum. Yaunchu enentái karía núnis amuukatniuiti. Ashí yamarmak yuminia áintsan̄ ajasuitrum. Tanta wakapruachusha enentáimpratai. Israer-shuar paskua nampernum aya wakapruachu tantan yuu áiniawai. Atumí tunaari atsakui atumsha nu námper-tantaa áintsar péñker ajasuitrum. Paskua nampertincha Israer-shuar murikiun main áiniawai. Núnisan̄ Kristu jaka ii murikria áinis ajasuiti. <sup>8</sup>Tuma asamtai iisha paskua námper nájanku pujakur tuke núnisan̄ shiir wekasatniuitji. Tuma asamtai ashí yajauch tunaasha írunna nuka karía yaunchu nawamua áintsan̄kete. Nuka atsutniuiti. Antsu nekas ana nuka shiir enentáimsar wekasatniuitji. Nuka yuminia áintsan̄kete.

<sup>9</sup>Nuik papin áatramajrumna nuí “Tsanirma shuarjain̄kia íischatniuitrum” tímiajrum. <sup>10</sup>Ju nun̄kanam Yus-shuarchaka aya tsanirma, aya kuitniak ikiauwin, aya kasak, aya ántar-yusan tikishmatin áiniatsuk. Nú shuarjain̄kia pen̄ké íischatniuitkiurmeka ju nun̄kanmaya jíinkinrum. Núnaka tátsujai. <sup>11</sup>Antsu wi tájana nu júiti, Shuar “Yus-shuaraitjai” tákun̄ka tura tunáa túriniaitkuin̄kia nijijai íischatniuitrum.



Tsanirmasha, kuítian ikiauwincha, ántar-yusan tikishmatniusha, tsanumniusha, nampencha, kasasha “Yus-shuaraitjai” tákuin<sup>1</sup>kia físchatniuitrume. Penké niijjai<sup>2</sup> yurumáshtiniaitrume. <sup>12-13</sup>Yus-shuarcha tunaari<sup>3</sup> pachischatniuitjai. Yus núnaka fístatui. Átumka antsu atum<sup>4</sup>in Yus-shuar ainia nuna tunaari<sup>5</sup> fístiniaitrume. Tuma asamtai nu shuar tunaarintin atum<sup>6</sup>iyá akankatarum.

**Yus-shuar nuámtak itiurchat awajnisarka Yus-shuarchajai nuna iwiarashtin ániawai**

**6** <sup>1</sup>Yus-shuarka chíkich Yus-shuarjai<sup>2</sup> itiurchat pujakka kapitánjai<sup>3</sup> chichas iwiarashtiniaiti Yus-shuarcha asamtai. Antsu Yus-shuar írunna nujai<sup>4</sup> iwiarati. <sup>2</sup>Enentáimpratarum. Amuukatin tsawantai<sup>5</sup> Yus-shuarka ashí ju<sup>6</sup> nun<sup>7</sup>kanmaya<sup>8</sup> shuara tunaari<sup>9</sup> mash nekaawartatui. Tura ashí tunáa nekaatniuitkiurmeka itiur yúpichuchia nu nekaashtatrum. <sup>3</sup>Nu arantcha Yusa suntari<sup>4</sup> túramurísha nekaattaji pen<sup>5</sup>kerashit tusar<sup>6</sup>. Nayaimpiniam túrawarma nekaatniuitkiurkia itiura ju<sup>7</sup> nun<sup>8</sup>kanmaya<sup>9</sup> nu tujinkiat<sup>10</sup>taji. <sup>4</sup>Pai, itiurchat ákuin<sup>11</sup>kia Yus-shuar pen<sup>12</sup>ké tujintiainiana nujai<sup>13</sup> iwiaratarum antsu. <sup>5</sup>Natsaruk tusan nuna tájarme. Warí, ¿atum<sup>14</sup>íni chikichkisha atsawak ni yachi<sup>15</sup> itiurchat<sup>16</sup>ri pen<sup>17</sup>ker iwiaramnia? <sup>6</sup>¿Urukamtai Yus-shuar ni yachijjai<sup>18</sup> itiurchat pujakka Yus-shuarchanum wea iwiaratniun? <sup>7</sup>Atum<sup>19</sup>í itiurchat<sup>20</sup>ri kapitannium jukirmeka nujai<sup>21</sup>in<sup>22</sup>kia átum tujinkiamu páantaiti. Natsantchakait. Itiurchat ana nusha ¿urukamtai antsu katsuntram asakáatsum? Kasamkamusha ¿urukamtai katsuntram asakáatsum? <sup>8</sup>Antsu átumka nuámtak yachijjai<sup>23</sup> itiurchat awajnáiyarme tura kasárnáiyarme.

<sup>9</sup>Tunáa túrinkia Yus akupeemunam pachiinkiachmin ainia nu nékatsrumek. Anan<sup>10</sup>nawairap. Ashí tsanirma nusha, ántar-yusan tikishmatniusha, nuamtak áishmanjai<sup>11</sup> tsanirmasha, <sup>10</sup>kasasha, ashí kuítian ikiauwincha, nampencha, tsanumniusha, yajauch chichainia nusha, chíkich shuara anan<sup>12</sup>kawar atantin ainia nusha Yus akupeemunma nuí<sup>13</sup> pen<sup>14</sup>ké wayashtin ániawai. <sup>11</sup>Atum<sup>15</sup>íiyasha chíkich chíkich nuna túrin armai. Tura yamaikia ii Uuntri<sup>16</sup> Jesusa kakarmarijjai<sup>17</sup>isha tura ii Yusrí Wakani<sup>18</sup> kakarmarijjai<sup>19</sup> atumi enentái<sup>20</sup> shiir ajasuiti, atumsha Yusna ajasurme, tura tuke pen<sup>21</sup>ker ajasurme.

**Ii ayashi yajauch áchatniuiti**

<sup>12</sup>“Ashí túramniaitjai” tiniu ániawai tura nekasaiti. Tuma ain<sup>13</sup> mash yain<sup>14</sup>kiash<sup>15</sup>tatui pen<sup>16</sup>ker wekasatniun. Nekas ashí túramniaitjai tura nan<sup>17</sup>nkamas túratniujai<sup>18</sup> nupetnakchattajai. <sup>13</sup>Junasha tiniu ániawai: “Apatuk wakejai<sup>19</sup>nchu tura wake apatkujai<sup>20</sup>nchu mai ántrai<sup>21</sup>.” Apatkujai<sup>22</sup> wakesha nekas mai metek enentáimpratin ániawai tura Yus mai metek amuktatui. Núnisan<sup>23</sup> ii ayashi<sup>24</sup> ii Uuntri<sup>25</sup> Krístunuiti tura Kristu ii ayashi<sup>26</sup>

nérenniuiti. Tuma asamtai ii ayashíjiaí tsanirmashtiniaiti. <sup>14</sup>Tura Yus ii Uuntri Jesusan iniantkimia núnisan ii ayashíncha nu kakarmaríjiaí iniantkittiawai.

<sup>15</sup>Ashí ii ayashiin Kristu ayashímkiaiti. ¿Nu átumka nékatsrumek? Winia ayashrusha Kristu ayashíiya asamtai ¿itiurak nuna tsanirí ayashín najanattaj? Penké túrachminiaitjai. <sup>16</sup>Kame ¿jusha nékatsrumek? Áishman tsaniríjiaí tsanínkiar chikichik ayashtinia áinis ajainiawai. Núnisan Yus-Papinium áarmaiti: Mai chikichik ayashtinia áinis ajasartatui. <sup>17</sup>Tura shuar ii Uuntri Krístujai tsanínkia mai chikichík wakantin ajainiawai.

<sup>18</sup>Tuma asamtai tsanirmatniunmayá yajáyan wainkiarum tséquentiarum. Chíkich tunáa írunna nu ii ayashínkia ti yajauch awajeatsui. Túrasha shuar tsanirmakka ní ayashiniak yajauch awajeawai. <sup>19</sup>Yusa Wakaní ame enentáimin pujurtamu asamtai, ame ayashim ni jeente. Nu Wakanínkia Yus amasuiti. ¿Nuka nékatsrumek? Tuma asamtai ame ayashmi nérenchaitme. <sup>20</sup>Kristu numpejají sumakma asamtai, ayashmisha wakanmisha Yusna áiniawai. Yusna asamtai ayashmíjiaí péñker túratniuitme, Yus shiir awájnástí tusam.

### Nuatkatniusha péñkeraiti, nuatkashtincha péñkeraiti

**7** <sup>1</sup>Ayu. Átum áatrurmarmena nuna yamaikia ujaktajrume. Shuar nuattechkusha péñkeraiti. <sup>2</sup>Tura ti tsanirmatniun enentáimtuinia ásar ashí áishman ní nuwenak nuatkati tura ashí nuwá ní áishrinin iniumkati. <sup>3</sup>Áishmansha ni áishri asa nuwen túratniua nuna umiktiniaiti. Núnisan nuwasha ni nuwe asa ni áishrin túratniua nuna umiktiniaiti. <sup>4</sup>Núwaka niní ni ayashí nérenniuchuiti, antsu ni áishriníuiti. Núnisan áishmansha niní ni ayashí nérenniuchuiti, antsu ni nuwénuiti. <sup>5</sup>Ni ayashí suritnaikiashtin áiniawai. Tura mai itit awajnaitsuk Yus áujsatin wakeruiniak ishichik tsawant kanakmin áiniawai. Tura nuínkia atak tsanin pujustin áiniawai. Túracharmataínkia uunt iwianch, Satanás, tunaanum iniantinian útsutkattawai katsuntratniun tujintiakuí.

<sup>6</sup>Ayu. Tura nuna áarayatan nújainkia “ashí shuar páchitsuk nuatkatniuiti” tátsujai. Nuatkatniuitkiumka péñkeraiti. <sup>7</sup>Túramtai “ashí wijiaí métek nuatkachuitkiuiníka maak ainti” tajai. Tura Yus ashí shuaran imiá métek najanachuiti. Chikichan nuatkatniun súsaiti, tura chikichan yúpichuch katsuntratniun súsaiti.

<sup>8</sup>Natsancha wajencha juna tájai, “Wijiaí métek nuattsuk pujusrumka péñkeraiti.” <sup>9</sup>Tura katsuntratniun tujinkiarka nuatkarti. Ti katsuntrachmin nekapeakum nuatkatniun péñkeraiti.

<sup>10</sup>Nuatnaikiarun antsu tájai, “Nuwá nuatkamuka ni áishrin ikiukchatniuiti” tajai. Núnaka ii Uuntri Kristu akupkaiti aya winia chichampruchuiti. <sup>11</sup>Túramtai ni áishrin ikiukkia niní atak nuatnatsuk

pujustí tura tsanin̄ pujustinian wakerakka ataksha ni áishriin̄ waketkiti. Núnisan̄ áishmansha ni nuwen̄ ajapashtiniaiti.

<sup>12</sup>Chíkich shuaran̄ juna tájai wikia, ii Uuntrī Kristu juna akupkachuiti. Yus-shuara nuwen̄ka Yus-shuarchaitkiun̄ka tura ni áishrijiaī pujustinian wakerakka péñkeraiti; ajapashtiniaiti, tájai. <sup>13</sup>Núnisan̄ Yus-shuara aishrī Yus-shuarchaitkiun̄ka tura ni nuwejaī pujustinian wakerakka péñkeraiti; ikiukchatniuiti. <sup>14</sup>Nu nuwakā “Yus-shuarchajaī tsanin̄ pujakun̄ Yusjaī yajauch̄ ajastatjaī” tu enentáimprashtiniaiti. Antsu nii Yus-shuar asamtai ni aishrī niijiaī pujá asa péñker̄ ajasminiaiti Yusjaī. Núnisan̄ núwakā Yus-shuarchaitiat̄ ni aishrī Yus-shuaraitkiuin̄kia niijiaī tsanin̄ pujá asa péñker̄ ajasminiaiti Yusjaī. Núnisan̄ ni uchirísha péñker̄ ajasmin̄ áiniawaī Yusjaī. Núnischaitkiuin̄kia ni uchirí Yus-shuarcha uchiríá áintsar̄ ainti. <sup>15</sup>Tura áishmansha nuwashā Yus-shuarcha ana nu kanaktinian wakerakka túratí. Yus-shuar nujaī an̄kantaiti. Núnisan̄ asati. Tuke máaniaktinian Yus nakitramaji. <sup>16</sup>¿Núwakā ni aishrī Yus-shuar ajastatna nuna nekas nékawak. Tura áishmansha ni nuwē Yus-shuar ajastatna nuna nekas nékawak? Yus-shuarcha nuka wétinia wakerakka wetí.

<sup>17</sup>Wátsek. Shuarka Yus-shuar ajaska Yus nin najanama áintsan̄ tuke átiniaiti. Pujumia áintsan̄ pujusminiaiti. Núnaka ashí Yus-shuarnum̄ akupejai. <sup>18</sup>Iis, Yus-shuar ajasuka Israer-shuaraitkiun̄ka tuke Israer-shuar atí. Tura Israer-shuarchaitkiun̄ka Israer-shuar ajastin̄ enentáimprashtiniaiti. <sup>19</sup>Israer-shuaraitkiumsha tura Israer-shuarchaitkiumsha nuka enentáimtuschatniuiti. Aya Yus tana nu umirkatin̄ nekas enentáimtushtiniaiti. <sup>20</sup>Yus-shuar ajasuka nuik̄ pujumia áintsan̄ pujusminiaiti. <sup>21</sup>Chíkich shuara takarniurí asam̄ ti itiurchat̄ pujakmeshā itiurchat̄ enentáimpráip. Tura an̄kant̄ jíinkimniaitkiumka jíinkitiá. <sup>22</sup>An̄kantchaitkiumka an̄kantaitkiumshā jū enentáimpratá. Takarniuka Yus-shuar ajas tuke chíkich shuara takarniurínkiusha shiir̄ enentáimpratniuiti Kristu nin tunaanumiá an̄kant̄ awajsamtai. Tura shuar takarniuchua nu, Yus-shuar ajas Kristu takarin̄ ajasuiti. <sup>23</sup>Ti wáitsamiayi Kristu in̄ an̄kant̄ awajtamsatniun̄. Ni numpejaī sumakma asarum̄ shuar emetamu áirap. <sup>24</sup>Tuma asamtai shuar Yus-shuar ajas nuik̄ pujumia áintsan̄ yamaishā pujústí tura Yusan̄ enentáimtus̄ wekasati.

<sup>25</sup>Nuwá natsa túratniua nuna yamaikiā áujmatjai. Kristu juna akupkachmai tura Kristu anen̄kratmarí ti nekapsa asamtai wi tájana nu antukminiaiti. <sup>26</sup>Tuma asamtai juna tájai. Ti iturchatnum̄ pujá asakrin̄ shuar aya júnisan̄ nuattsuk̄ pujustin̄ péñkeraiti. <sup>27</sup>Nuatkaitkiumka núwem̄ ikiukip. Nátsaitkiumka nuwá eakaip. <sup>28</sup>Tura nuatkumka tunáa túratsme. Nuwashā iniurtukka niishā tunáa túrachuiti. Túrasa nuatnaikiarū itiurchatan̄ ti wáinkiatatuī jū nun̄kanam. Nú iturchatnumiá wi uwemtikraintjai.

<sup>29</sup>Yatsuru, juna tajar̄me. Ishichik̄ tsawant̄ taasai. Juyānkā nuatkarū ainia nuka aya ni nuarin̄ enentáimprashtiniaiti antsu Yúsna

enentáimtustiniaiti. <sup>30</sup>Núnisan̄ tuke Yúsnan enentáimsar úutainia nusha uutcha áintsar pujustin áiniawai. Warainia nusha warascharua áintsar pujustin áiniawai. Súmiania nusha sumakcharua áintsar pujustin áiniawai. Jū nuṅkanmayajain̄kia itit awajmamsashtiniaitji. <sup>31</sup>Núnisan̄ aya jú̄ nuṅkanam péṅker pujustin ti takaschatniuiti. Ashí jú̄ nuṅkanmayan̄ka amuuakatniuiti.

<sup>32</sup>Jú̄ nuṅkanmayajain̄ itit ajaschak tusan wakerajrume. Nátsaka Yúsnan enentáimtawai ni wakera nuna umiktinian. <sup>33</sup>Túrasha nuatkaka jū nuṅkanman̄ enentáimtawai ni nuar̄in shiir enentáimtikattsatsa. <sup>34</sup>Núnisan̄ nuwá nátsasha nuatkamusha niisháa enentáimiainiawai. Nuwá natsa Yúsnan enentáimtawai ni ayashísha ni wakanísha tuke Yúsjaí shiir atí tusa. Tura nuátkamuka jū nuṅkanmayan̄ enentáimtawai ni áishr̄in shiir enentáimtikattsatsa.

<sup>35</sup>Atumin yáintajtsan̄ juna tájarme. Itiurchat awajsattsan wakeratsjai antsu shiir wekaakrum itit awajtsuk Yus shiir enentáimtustarum tusan wakerajai.

<sup>36</sup>Tura shuar ni nawantr̄i natsan nuatnaikiati tákuṅka péṅkeraiti. Nawantr̄in natsa tuke apujsatniun nakitiakka surukminiaiti. Nusha tunaachuiti. <sup>37</sup>Tura chíkichka tuke natsan apujsatay tákuṅka nekas péṅkeraiti. Apujsatin̄ itiurchatchaitkiuin̄kia tura ni nawantr̄i nuatnakchatniuitkiuin̄kia apujsatniuiti. Apujsan̄ka nekas péṅker túraití. <sup>38</sup>Tuma asamtai nuatmamtikian̄ka péṅker túrayi tura apujsan̄ka nu nan̄kaamas péṅker túrayi.

<sup>39</sup>Nuwá aishr̄i iwiaaku pujakuin̄kia tuke niijjaī tsanin̄ pujustiniaiti. Tura ni aishr̄i jakamtai an̄kant ajas ni wakera nujaī Yus-shuaran iis nuatnaikiamniaiti, <sup>40</sup>tura tuke nuatnatskesha nu nan̄kaamas nekas shiir pujustatui. Tú enentáimjai wikia tura Yusa Wakanísha métek tátsuash.

### Yurumkasha namansha ántar-yusnum susamu

**8** <sup>1</sup>Ayu. Yamaikia yurumkasha namansha ántar-yusnum susamun áujmatsattajai. Jujaī túratniua nuka mash nékaji. Tura shuar “ti nékaitjai” enentáimkiun̄ka nujain̄kia “neka asan nan̄kaamantuitjai” tu enentáimiui. Antsu shuar chíkich shuaran aneakka nin péṅker atí tusa yayawai. <sup>2</sup>Shuar “ti nékaitjai” tákuṅka nekas nekaatniua núnaka unuimiarchaiti. <sup>3</sup>Tura Yúsan aneana núnaka Yus péṅker nékawai.

<sup>4</sup>Wátsek. Ántar-yus susamu yúatin̄ junis enentáimpratniuiti. Yuska aya chikichkiiti. Tura chíkich Yus atsakui, <sup>5</sup>aentsu yusr̄i nayaimpinmasha nuṅkasha írunna nuka peṅké ántar áiniawai. Kame aentsu yúsr̄isha tura úuntr̄isha ti írunui. <sup>6</sup>Tura iikia nékaji, aya chikichik Yus awai, nusha ii Apar̄inti. Ashí írunna nuna najanaiti tura ni wakera nuna umikiat tusa najatmamji in. Ii Úuntr̄isha chikichkiiti, Jesukrístu. Niijjaīnkia ashí najanamuiti. Tura iisha ni kakarmarijiaī iwiaaku pujajai.

<sup>7</sup>Tuma asamtai ántar-yus susamu yuamniaiti tura Yus-shuar awai juna nékainiatsna nu. Nu shuar ántar-yusan yaunchu tikishmatraru ásar nú yusan susamun yuawarka itiurchat enentáimprar “enentáiruī yajauch ajasjai” tiartatui. <sup>8</sup>Watsek, yuamujai Yus in shiir enentáimtikrampratniun jeatsui. Yuarkia nujai péñker áhattaji tura yúachrikia yajauch áhattaji. <sup>9</sup>Ankantaitme yúatin wakerakmeke. Tura anearta. Ame yúakmin chíkich shuar itiurchat enentáimna nusha ámin wáitmak yúanka ni enentáin tunáa ajastatui. <sup>10</sup>Íistá. Ámeke neka asam ántar-yusa jeen wayam tura nuī yúakminkia ame yatsum nuī wáitmákchanpiash. Tura niisha itiurchat enentáimiat ántar-yus susamun yúashtimpiash. <sup>11</sup>Nújainkia ame nékamujai ame yatsum Kristu jaka uwemtikramia nu yajauch ajastatui. <sup>12</sup>Túramtai ame yatsum itiurchat enentáimna nu yajauch awajeakum Krístunmasha tunáa túraitme. <sup>13</sup>Nu asamtai winia yatsurun wi yúajna nujai yajauch awajeaknaka namañnaka penké yuashtatjai nii tunáa ajasain tusan.

### Kristu akatramu túramnia nu

**9** <sup>1</sup>Ashí Kristu akatramurī túratniua nuna wisha túramniaitjai ni akatramurī asan. Iis, wisha ii Uuntrī Jesusan wáinkiaitjai tura wisha Jesukristu takatrīn takaajai. Winia takatrujain átumka Yus-shuar ajasuitrume. <sup>2</sup>Chíkich shuar “Kristu akatramurīnchuiti” túrutainiakuiusha átumka winia takatrujai Yus-shuar ajasu asakrumin nujai wi nekas Kristu akatramurīntiaj nu paant nekaamniaiti. Tura tu enentáimtursatniuitrume.

<sup>3</sup>Ashí shuar “Kristu akatramurīnchuiti” túrutainia nuna juna tájai. <sup>4</sup>Wisha Yus-Chichaman etserkataj tusan shuárnum irakun ashí ajampruinia nuna yuamniaitjai tura umarminiaitjai. <sup>5</sup>Tura Pítrusha, Jesusa yachisha, tura chíkich akatramusha irainiak ni nuwen Yus-shuar ainia nuna jukimnia áiniawai. Wisha núnisnak túramniaitjai. <sup>6</sup>Chíkich akatramuka kuit susamujai Yus-Chichaman etserainiawai. Wisha Pirnapísha núnisrik túramniaitjai. Kame ¿aya íichikik takastiniaitjai? <sup>7</sup>Suntarka ¿ní kufríjiaimpiash takaa? ¿Tsanimpian aráa nu nuna nerēn yúatsuk. Wáakan wainiua nusha muntsurīn úmatsuk? Núnisan Yus-Chichaman étsera nusha nú takasmanumiā yurumámniaiti. <sup>8</sup>Aya aents enentáimmian chichaatsjai. Muisais akupkamunmasha métek tawai. <sup>9</sup>Muisais akupkamunam áarmaiti:

“Turu takaak jinkiaia saepen pakartaj tusa nájakui ni nujī jinkiatáshtiniaiti. Antsu ni wakerak yuati.” Tu áarmaiti.

Tura Yus aya túrunak enentáimprachmiayi jujai. <sup>10</sup>Antsu in jujai nekaawarat tusa tímiayi. Jinkiaian araana nusha tura júukmatai saepen pakaana nusha nuna jinkiaian mai yurumátin áiniawai. Paant atí tusa Yus nuna áarmiayi. <sup>11</sup>Tuma asamtai Yus-Chicham atumiin etserakrin nuyá átum takakrumna nujai in ajamsatniuitrume. ¿Nusha itiurchatkait?

<sup>12</sup>Chíkich akatramu atumin irutainiak ajamsamun yuamniaitkuinkia iikia nekas túramniaitji ii etserkamujai Yus-shuar ajasakrumin.

Tura wikia antsu túrachuitjai. Atsumaknasha ashí itiurchat ana nuna katsuntramjai Kristu shiir chichamen étserkui shuar itiurchat enentáimturarin tusan. <sup>13</sup>Ashí shuar ni yúsrniun tuke pujurin ainia nu, ni yusrí jeen írunna nuyan yurumáiniawai. Tura yus-sutai namanken maawar nuyá yurumáiniawai. <sup>14</sup>Núnisan Yus-Chichaman etserniua nuka Yúsnan takasu asamtai penker ajamsatniuiti. Nuna Kristu akupkamiayi. <sup>15</sup>Tura wisha ajamsamun yuamniaitiatan tuke winia kufrujai yurumámjai. Tura yamaisha surúsúk tusan áattsujrume. Antsu nuna túrutsuk jakanka maak áintjai.

<sup>16</sup>Uwempratin chichaman wi étserkun aya nújain “ti penkeraitjai” enentáimtumatsjai. Kame Yus nuna túratniun surusuncha itiurkatjak. Nuna túrachkunka ti itiurchat pujusaintjai. <sup>17</sup>Wakerakun étserkunka, warasminiaitjai. Tura nakitiaknasha tuke Yus surusmanka umiktiniaitjai. <sup>18</sup>Tura jujai antsu nekas warasminiaitjai: Wi túramnian iniaisan chikichnan takatsuk aya winia kufrujain uwempratin chichaman étserjai. Nujai waraakun akikma áintsanketete.

<sup>19</sup>Chíkich shuara takarniuchuitiatan ashí shuara takarniuriya áintsanketjai Kristu shuari untsurí ajasarat tusan. <sup>20</sup>Israer-shuarjai pujakun niisha Yus-shuar ajasarti tusan Israer-shuara áintsan ajai. Kame Muisaisa akupkamurí umirkatin áiniakui wisha aun umirkashtiniaitiatnak umirniuitjai. <sup>21</sup>Tura Israer-shuarchasha Yus-shuar ajasarti tusan, nu shuar Muisaisa akupkamurin umirkashtin áiniakui, wisha nuna umirkashtinia áintsan ajai. Tura Kristu akupeana nuna umirkatin asan nekas Yus akupkamun umirniuitjai. <sup>22</sup>Yusjai katsuarchasha ti penker Yus-shuar ajasarti tusan wisha katsuarcha áintsan ajai. Chíkich chíkich shuarjai métek ajajai ishichkisha Yus-shuar ajasarti tusan. <sup>23</sup>Ashí wi túraj núnaka uwempratin chicham tuke shiir atí tusan túrajai. Tura nu chichamjai wisha atsumtsuk shiir wekaajai.

<sup>24</sup>Shuar nekapnaisatniusha untsurí tsékentin átsuk tura aya chikichik awakmatsuk. Ninki, awakmakun súsatniua nú shiirmachin achiktatui. Núnisrum kakarum ajasrum awakmak shíirmachin achiktinia áintsarum Yusna takastarum. <sup>25</sup>Shuar nakurak nekapnaisatin ainia nuka nupetmaktaj tákunka ashí itit awajea nuna ikiuniawai. Iisha núnisrik nu enentáijjai Yusna nu takastiniaitji. Nakuruinia nu shuar awakmakun tawasap súsatniua nuna achikiarsha nú tawaspan wárik kajinmatkimniaiti. Antsu Yus in amastatjinia nú tawasap tuke amuukashtatui. <sup>26</sup>Wikia aya nánkamsan tsékeatsjai. Nasejai maania áintsan máaniatsjai. <sup>27</sup>Antsu winia ayashrun awatinia áitkiasnak umimtikiajai. Túrachkunka chikichan unuiniariatan winiasha awakmakun súsatniua nú shiirmachin Yus surustinian nakitrurainti.

Ántar-Yus tikishmatrashtiniaiti

**10** <sup>1</sup>Enentáimpratarum, yatsuru. Yus yaunchu ii úuntrín ashí métek yáinmiayi. Nusháa yuranmijíai jintian nekapruamiayi. Tura ashí ii uuntri nu yuranmin apapekar wearmiayi. Ashí núnisar Kapaaku Nayaantsan Yus akankamunam wekasar katitkiarmiayi. <sup>2</sup>Tura Muisaisan umirkar yuranminiam tura nayaantsanam ashí imiaimiu áintsan ajasarmiayi. <sup>3</sup>Núnisan ashí mash Yusnumia yurumkan yuawarmiayi. <sup>4</sup>Entsancha ashí mash Yus susamunak umararmiayi. Kame Yus kayanmaya entsan akupkamtai ashí umararmiayi. Krístusha, nú kaya áintsan, niijíai tuke weakui ni wakaní atsumamurín Krístunmayan takusarmiayi. <sup>5</sup>Tuma aín Yus ti yáinmaitiat ni wakeramun umikcharmiayi. Tura ásar ni nunkeen jeatsuk atsamu nunkanam ti untsurí jákarmiayi.

<sup>6</sup>Iisha nujai unuimiartiniaitji. Iikia ni wakeriarmia áintsar<sup>i</sup> yajauchia nu wakerukchatniuitji. <sup>7</sup>Nu asamtai ántar-yus ni túrawarmia áintsarum tikishmatrairap. Iis, jiru yusrí shiir awajenakui Yus-Papinium áarmaiti, “Nu shuar yurumáwar nampekar námper ti najanawarmiayi.” Tu áarmaiti.

<sup>8</sup>Nii túrawarmia núnisrik iikia tsanirmashtiniaitji. Nuna túrawar paintitres mir (23.000) chikichik tsawantai jákarmiayi. <sup>9</sup>Iisha tunáa túrar “Yus asutiuáshtatui” tu enentáimprashhtiniaitji. Niisha nuna túrawar napijíai esaim untsurí jákarmiayi. <sup>10</sup>Yussha yajauch áujmatsashtiniaiti. Nuna túrawarmatai Yus ni suntarín akupak untsurín maawarmiayi.

<sup>11</sup>Yaunchu ii úuntrijíai túrunamu in amúamu tsawantnum pujajnia nuna jintinramat tusa áarmaiti. <sup>12</sup>Tuma asamtai shuar “Tunaanum iniaarchattajai” tákunka anearti. Anearchamka iniaarminiaitme. <sup>13</sup>Tura ame itiurchatrumka aya amek nekapeatsme. Chíkich shuarsha nu itiurchatjai métek nekapsatin áiniawai. Jusha ti enentáimpramniaiti. Ame katsuntratin tujintiamna nuna nankaamas itiurchatan Yuska pénker asa tsankatramatsui. Antsu itiurchat tarutrammatai, nu itiurchatnum pujamin Yuska uwempratniun jintinramattawai. Nújainkia katsuntrattame.

<sup>14</sup>Nu asamtai aneamu yatsuru penke ishichkisha ántar-yus enentaimtusairap. <sup>15</sup>Atumsha nékatsrumek. Wi tájana nu nekaschakait. <sup>16</sup>Kristu jakamu enentáimtustin námper najanar Yus áujeaji Kristu numpen nakumea nu shiir atí tusar. Tura métek umarar nujai Kristu numpé métek enentáimtaji taji. Tura apatkusha púurar<sup>i</sup> tura métek yuar<sup>i</sup> nujai Kristu ayashí in jarutramkamu métek enentáimtaji taji. <sup>17</sup>Apatkusha chikichkiitiat púuram untsurí ajatsuk. Iisha núnisrik untsuríitiatar nu apatuk métek yuar<sup>i</sup> métek enentáimprar chikichik yashtinia áintsar aji.

<sup>18</sup>Israer-shuartisha enentáimpratai. Yus-sutai namanken yuinia nu, métek yuawar Yusan métek enentáimtuiniatsuk. <sup>19-20</sup>Núnisan Yus-

shuarcha ántar-yus sutai namanken suiniak nekas-Yusan suiniatsui antsu yajauch wakanin suiniawai. Kame ántar-yus ániak penké ántar ániawai, iwiaakuchu ániawai. Nu namansha sutai namanketiat penker namankete, yajauchichuiti. Aya junak tajai. Yus-shuarcha ántar-yus sutai namanken suiniakui amesha niijai métek yuamka yajauch wakanniasha niijai métek enentáimtajai tame. Nu antsu yajauchiiti. <sup>21</sup>Kristu numpen nakumea nu úmakrum íwianch susamua nuka umarchatniuitrume. Kristu ayashin nakumea nu yúakrumka íwianch susamua nuka yúashtiniaitrume. <sup>22</sup>¿Warí, Yus akajkatin wakeramek. Iisha nin nupetkamniashitaj'?

### Aya aneakur takastiniaitji

<sup>23</sup>“Ashí túramniaitjai” tiniu ániawai. Ayu, tura mash yáintkiashtatui penker wekasatniun. Nekas ashí túramniaitjai tura mash yáintkiashtatui wakaniur kakaram ajastin. <sup>24</sup>Nú arantcha chíkich yáintincha enentáimpratniuitji. Aya finiuk pachischatniuitji.

<sup>25</sup>Namanu súmakum inintrutsuk sumakta. Tura ántar-yusan susamusha yajauchichuashit enentáimtsuk páchitsuk yuata. <sup>26</sup>Ashí ju nunkasha tura ashí írunka nusha Yúsnachuk ainia. Tuma asamtai penker ániawai.

<sup>27</sup>Yus-shuarchasha yurumkan ajampramkuisha ashí mash yajauchichuashit tu enentáimtsuk páchitsuk yuamniaitme. <sup>28</sup>Tura chíkich chichaak “Juka ántar-yus susamu namankete” túramkuinka nuikia yuawaip. Yúakminkia nu shuar itiurchat enentáimprattawai. <sup>29</sup>Ame páchitsuk yuamniaitkiumnisha nii antsu yúachmin asa itiurchat enentáimprattawai.

Tura amesha tíchatameash “¿Urukamtia nii tujintiakuwi wi yúachminiaitaj. <sup>30</sup>Wi Yúsan yuminsan yúakuisha urukamtia itiurchat enentáimturainia. Yus yuminsachmakait?” tíchatameash. <sup>31</sup>Ayu, yúakmesha úmakmesha ashí túramna nusha ashí shuar Yúsan shiir enentáimtusarti tusam túratá. <sup>32</sup>Tuma asamtai ii túramujai chíkich shuar tunaanum ajuashtiniaitji. Israer-shuarsha, Israer-shuarchasha, Yus-shuarsha ashí yáintiniaitji. <sup>33</sup>Wisha ashí shuaran yáintinian tuke enentáimjai. Ashí shuar uwemprarti tusan wi wakeraj nuna enentáimtsuk nin yáintinian tuke pujurjai.

**11** <sup>1</sup>Kristu turamia áintsan takaajai wisha. Atumsha núnisrum wi takaajna áintsarum takastarum.

### Nuwa Yusa jeen túratin

<sup>2</sup>Yatsuru, átum winia tuke enentáimturarum wi tímiajrumna nu umirniuitrume. Tuma asakrumin shiir enentáimtajrume. <sup>3</sup>Nu arantcha ujaajrume. Yus Apa Krístun akupea áintsan Kristu ashí áishmankan akupeawai. Núnisan áishmansha ni nuwen akupeawai. <sup>4-5</sup>Íjjainka



shuar Yus áujenak tura núnisan Yus-Chichaman étserainiak áishman etsenkrukchatniuiti antsu nuwá múuknum nukumaktiniaiti. Tuma asamtai áishman nui etsenkkrakka natsantaiti. Tura nuwá múuknum nukumakchanka natsantaiti. Intiashin tsupimiarua áintsankete. <sup>6</sup>Nuwá múuknum nukumaktinian nakitiakka intiashin tsupirtí nuikia. Watsek, nuwá ni intiashin tsupirtinian nakitiakka, tura awampratniun natsamakka múuknum nukumakti nuikia. <sup>7</sup>Áishmanka Yúsan nakumeawai. Yusna shiir ana nuna nakúmkáttsa Yus áishman kan najanamiayi. Tuma asamtai áishmanka etsenkrukchatniuiti. Antsu nuwanka áishmanna shiir ana nuna nakúmkáttsa Yus najanamiayi. <sup>8</sup>Iis, Yus áentsun najaneak nuwanmayan áishman kan najanachmiayi antsu áishmanka ukunchíjiaj nuwan najanamiayi. <sup>9</sup>Nuwan yáinkiát tusa áishman kan najanachmiayi antsu áishman kan yáinkiát tusa nuwan najanamiayi. <sup>10</sup>Tuma asamtai núwaka múuknum nukumaktiniaiti, nayaimpinmaya aencha ísarti tusa. <sup>11</sup>Ayu, tura áishman nuwajainchu atsuinti tura nuwasha núnisan áishmanjainchu atsuinti. Yus ju nun kan núnisan atí tusa najanaiti. <sup>12</sup>Iis, Yus nuwan áishmannumia najanamiayi tura áishmansha nuwanmaya akiiniaiti. Tura Yus mai najanaiti. <sup>13</sup>Enentáimpratarum atumsha. Nuwá múuknum nukumatsuk Yus áujsatin ¿pénkerkai? <sup>14</sup>Ii shuartinkia áishman intiash ajakin natsantchakait. <sup>15</sup>Antsu núwaka intiash ajakin pénkerchakait. Múuknum nukumaktinian susamuiti. <sup>16</sup>Watsek, shuar tuke umiktinian nakitiakka juna nekaati, iisha tura ashí Yus-shuartisha aya tu enentámji.

### Kristu jakamu enentaimtustin nampernum yajauch túramu

<sup>17</sup>Yamáí áarattajrumna nujain shiir enentáimtatsjarne. Atum irunkuram yáiniaiktiniaitrume tuke pénker wekasatin. Átum antsu iruntrarum yajauch awajnaiyarme. <sup>18</sup>Wats, Yusa Jeen irunkuram atumsháa enentáimprarum kanakurme. Kame tu ujatkarmai. Nekaschashit. <sup>19</sup>Tuke tupartatrumek Yúsnan ti nekana nu shuar paant nekanat tusarnea. Antsu kajernaikiar kanaktin pénkerchaiti. <sup>20</sup>Kanakin asarum Kristu jakamu enentaimtustin nampernum atum iruntrarum yúarmena nu nekas Yúsnachuiti. <sup>21</sup>Iis, ashí ní yurumken itiaawai aj yurumáttsa tura chikichan náksuk niá niá wari yuattsá wakerawai. Chíkichia ishichik itiaana nu tsukamawai tura chikichcha nampekarai. <sup>22</sup>Yurumkan ishichik itiaana nu iniatsáarchamek. Atum áitkiarum núnisan Yusa jeen yurumáshtiniaiti. Natsantaiti. Warí, chíkich jea átsuk aj yurumátin. ¿Warimpait. Jujai shíirash áujsatjarum? Átsá. Jujai shiir áujsachminiaitjarne.

### Kristu jakamu enentaimtustin námper

<sup>23</sup>Ii Uuntri Kristu jintintruama núnaka ujakmajrume. Jútas tuke súratsain, nu kashi ii Uuntri Jesus apatkun jukí <sup>24</sup>Yusan yuminsamiayi.

Nuyá puur tímiayi “Yuatarum. J<sub>u</sub>sha winia ayashruiti; atumin jarutramkatta núiti. J<sub>u</sub> yúakrum Winia enentáimtursatarum” tímiayi. <sup>25</sup>Núnisan<sub>n</sub> yurumá umik pini<sub>n</sub>nasha achik tímiayi “J<sub>u</sub> pini<sub>n</sub> Yamaram Chichamaiti. Tura winia numpar puármatai Yamaram Chicham nekas uminkiatatawai tawai. J<sub>u</sub> tuke úmakrum Winia enentáimtursatarum’ tímiayi. <sup>26</sup>Tuma asamtai j<sub>u</sub> apatuk yúakrum tura pini<sub>n</sub>sha úmakrum ii Uuntri<sub>i</sub> Kristu jakamuri<sub>i</sub> enentáimtarme. Kristu táatsain<sub>i</sub> j<sub>u</sub> tuke túratniuitrume.

**Shiir enentajijai<sub>i</sub> Kristu jakamu enentaimtustin nampernum yuatniuiti**

<sup>27</sup>Tuma asamtai shuar Yusan enentáimtutsuk j<sub>u</sub> apatkun yuawar tura j<sub>u</sub> pini<sub>n</sub>numi<sub>a</sub>ncha umarar Kristu ayash<sub>i</sub>ncha ni numpen<sub>a</sub>cha yajauch enentáimta asa tunáa túrait. <sup>28</sup>Nu asamtai ashí shuar j<sub>u</sub> apatkun yútsuk tura j<sub>u</sub> pini<sub>n</sub>numi<sub>a</sub>ncha úmutsuk ni enentáin<sub>i</sub> iwiaratniuiti Yus<sub>j</sub>ai. <sup>29</sup>Kristu ayashí<sub>i</sub> jakamu enentáimtutsuk yúakka tura úmakka nuna tura asa asutiáttawai. <sup>30</sup>Atumsha tura asarum jaarme tura pimpiruitrume. Chikichcha jákaru ániawai. <sup>31</sup>Ímia-iik fimiakrinkia Yus in asutiámachaintji. <sup>32</sup>Tura ii enentáin<sub>i</sub> Yus yajauchia nuna wáiniuk asutiám<sub>j</sub>i. Túrachkun<sub>a</sub> ashí Yus-shuarchajai<sub>i</sub> súmantikramawaintji.

<sup>33</sup>Tuma asamtai, yatsuru, iruntrar yurumáttsa matsatkurmeke nákastarum métek yurumátin. <sup>34</sup>Shuar tsukamakka ni jéni<sub>i</sub>nk<sup>1</sup> yurumáti. Nújain<sub>k</sub>ia yajauchijai<sub>i</sub> irunchakrumin Yus asutiámashtatrume. Ayu, chíkich áatrururmena núnaka wi ai<sub>i</sub> jean iwiarattajai.

**Yusa Wakaní ni shuarin susamu**

**12** <sup>1</sup>Yusa Wakaní ashí ni shuarin súana nuna yamáí ujaktatjarme. Nekaatarum, yatsuru. Yus-shuar shiir takasarti tusa Yusa Wakaní juna súsaiti.

<sup>2</sup>Yaunchu átum Yus-shuar tuke ajatsuk chíkich shuarjai<sub>i</sub> métek ántar-yus tikishmatramarme. Niisha ántar-yus ásar áujmatramsachmin ármiai. <sup>3</sup>Tura jújain<sub>i</sub> shuar Yusa Wakaní kakarmarijai<sub>i</sub> chichaana nu nekaamniaiti. Yusa Wakaníjain<sub>k</sub>ia shuar “Jesus yajauchiiti” tíchamniaiti. Núnisan aya Yusa Wakaníjain<sub>i</sub> “Jesus winia Úuntur asa akuptukiniaiti” tíminiaiti.

<sup>4-5</sup>Yusa takatri<sub>i</sub> íruntsuk. Tura Yusa Wakaní<sub>n</sub>k<sup>1</sup> ashí nuna takastinian súsaiti. Tura shuar Yus-shuara Uuntri<sub>i</sub> chikichik ain<sub>i</sub> ashí Yusa takatrin<sub>i</sub> métek takaatsui. Antsu chikichkin ashí nan<sub>k</sub>aamas pé<sub>n</sub>ker takaawai. Yusa Wakanísha nuna shiir takasat tusa súawai. Tura Nii wakera nuna Ni<sub>n</sub>k<sub>i</sub> ni shuarin chikichik chikichik niisháa niisháa súawai. <sup>6</sup>Yúskete ashí ni shuarin niisháa takamtikeana nu. Ni<sub>n</sub>k<sub>i</sub> ashí ni shuar<sub>i</sub> enentáin<sub>i</sub> takaak takatnasha shiir takamtikeawai. <sup>7</sup>Yusak túratin súam Yusa Wakaní kakarmari<sub>i</sub> paant átatui nu takasmanum. Tura ashí shuar ní takatrijai<sub>i</sub>

yáiniaiktin ániawai. <sup>8</sup>Júnaka Yus takamtikeawai. Nékana nu shuarnasha, unuimiarua nunasha Yúsnan ujaktinian súawai. Tura mai shuaran Yusa Wakaní kakarmarijiaí nuna túratniun súsaiti. <sup>9</sup>Chikichnasha Yúsan áujenak Yúsan ti enentámtusar nekas itiuurchat ana nuna iwiaratniun súawai. Nincha Yusa Wakaní kakarmarijiaí nuna takastinian súsaiti. Chikichnasha jaan tsuártinian súawai. <sup>10</sup>Chikichnasha aents nínki túrachminian túratniun súawai. Chikichnasha Yúsnan etserkatniun súawai. Chikichnasha shuar wari yajauch wakannia péñker wakanniasha apatka nekaatniun súawai. Chikichnasha niisháa chichaman chichastinian súawai. Chikichnasha niisháa chichasman jintíatniun súawai. <sup>11</sup>Tura ashí shuara enentáin nu Wakanik takaawai. Tura Nii wakera nuna ankant ankant súawai takastinian.

### Ashí Yus-shuar Kristu ayashía áintsan ajainiawai

<sup>12</sup>Iikia Kristu ayashía áintsar<sup>1</sup> ayashímkiaitji. Kristu ayashí muchitmarisha írunui. Niisha túmaitiat chikichik ayashíniait. <sup>13</sup>Tura imianiakrin Yusa Wakaní chikichik awajtamsamji, Kristu ayashía áintsan. Israer-shuarsha, Israer-shuarchasha, ti itiuurchat takaana nusha, ankant ainia nusha, ashí yamáí chikichik ajasuitji. Tura Yusa Wakaní pimiutkamuitji Niijiaí tsanínkia pujakur.

<sup>14</sup>Ayashi muchitmarí aya chikichkichuiti. <sup>15</sup>Tuma asamtai, winia nawer uwejruchuitiat tuke winia ayashrunuiti. <sup>16</sup>Winia kuíshrusha jíiruchuitiat tuke winia ayashrunuiti. <sup>17</sup>Wátsek winia ayashur aya jíikitkiuinínia ¿itiurak antukaintiaj? Winia ayashrusha aya kuíshkitkiuinínia ¿waríjiaín nekapsaintiaj? <sup>18</sup>Nu asamtai Yus winia ayashru muchitmarí ni wakeramunam ikiusuiti. <sup>19</sup>Chikichik muchitmajain ¿ayash ámkiait? <sup>20</sup>Antsu untsurí muchitma akuisha chikichik ayashkiiti. Iisha núnisrik chíkich chíkich iisháa takayatrik métek takasar Yus wakeramu takamtsuk umáji.

<sup>21</sup>Winia jíiru péñker aín winia uwejrúncha wakerishtatjak. Winia muukarsha péñker aín winia nawernasha wakerishtatjak. Núnisan Yus-shuar shiir enentámtumak ni yachin “atsumatsjame” tíchamniait. <sup>22</sup>Antsu ii muchitmarí ishichik enentámtajnia nu atsakuínkia ti atsumawaintji. <sup>23-24</sup>Chíkich muchitmasha, ímiancha nu, shiir iwíarmamtaji. Tura nu muchitmaka shiir ísminia nujai naníkaamas péñker wainji. Iis, shiircha nu antsu péñker wainji. Yus ii ayashín núnisan atí tusa najanamiayi. <sup>25</sup>Nujainínia ayashí muchitmarí máanaitsum métek yáiniainiawai. <sup>26</sup>Chikichik muchitmaram najaimiakum ashí ayashníum wáitiatsmek. Núnisan chíkichik muchitmaram ayap ajakum ashí ayashníum shiir átsumek.

<sup>27</sup>Núniskete Kristu ayashíjiaí ayashímkiaí nu. Tura chíkich chíkich ni muchitmarí aji. <sup>28</sup>Ayashníum muchitma írunna áintsan Yus ni shuarín

untsurí takatan súsaiti. Emka Yus akatramu, nuyá ni chichamen etserin, nuyá jintinkartin, nuyá aents túrachminian túrin, nuyá tsuákratin, nuyá yáinkratin, nuyá akupin, nuyá niisháa chichamjají chicharin, mash írunuí. <sup>29</sup>¿Ashí Yus akatramuk ainia. Ashí Yus-Chichaman etserniuk ainia. Ashí jintinkratniuk ainia. Aents túrachminian ashí túriniak ainia. <sup>30</sup>Ashí tsuákratniuk ainia. Ashí niisháa chichamjají chichamtiniak ainia. Ashí niisháa chichamjají chichasman jintinkratniuk ainia? Atsá. Túmachuiti. <sup>31</sup>Túmaitkuin\_kia pén\_kera nu takastin wakeruktarum. Tura imiá pén\_kera nuna juí jintintiatjarme.

### Aneatin

**13** <sup>1</sup>Ju nunkanmaya aentsu chichamen untsurí chichayatnak tura nayaimpinmaya aentsu chichaméncha chichayatnak anenkratchaknaka tampur meserua áintsanak aya ten-ten ajajai. Penké ántranak chichajají. <sup>2</sup>Yus-Chichamnasha ti shiir étseriatnak, túrasha ashí uu\_kmancha tura ashí nekaamniancha nékayatnak, túrasha Yúsan ti enentáimtusan murá umuchiayatnak, anenkratchaknaka penké ántraitjai. <sup>3</sup>Ashí wi takakjana nuna atsumainian súayatnak tura Yus shiir awajsattsan winia ayashrúncha áesawarti tusan surumayatnak tura anenkratchaknaka ántranak túraitjai.

<sup>4</sup>Anenkartaka wari kajeatsui, tsánkaiti, chíkich shuaran shiir awajniuiti, péejchach asa waantu enentáimtumatsui. <sup>5</sup>Anenkartaka natsanta nuna túrichuiti, níniunak enentáimchaiti, kajechuiti, páchichuiti. <sup>6</sup>Chikicha tunaarín wararchaiti antsu pé\_nker shuaran wararniuiti. <sup>7</sup>Anenkartaka aya katsunteawai. Tsanú chichamnasha nakítiawai antsu aya pé\_nker ana nuna nákwai. Tunáa shuar shiir ajastí tusa tuke nákwai.

<sup>8</sup>Anenkrattain\_kia tuke amuukashtiniaiti. Antsu juí nunka amuukmataisha Yus-Chicham etserkatin atsuttawai, tura niisháa chichamjají unuimiatsuk chichastincha amuukattawai, tura ashí nekanamtai unuimiartincha atsuttawai. <sup>9</sup>Kame yamaikia aya ishichik nékají. Yus-Chichamsha amutsuk étserají. <sup>10</sup>Túra ukunam mash nekanamtai yámankamtaik nekaamuka ántar átatui.

<sup>11</sup>Yaunchu wi uchich asan uchichia áintsan enentáimkiun chichasmajají. Antsu yamaikia uunt ajasan uchiniun iniaisaitjai. <sup>12</sup>Núnisrik yamáí juí nunkanam Yus paant wáintsuji. Íspik kusurunam ímsatniua áintsan\_kete. Antsu ukunam mai métek paant wainniaikiattají. Yamaikia aya ishichik nékají. Nuí antsu Yus winia nékara áintsanak nekaattají. <sup>13</sup>Watsek, menaintiu amuukashtin áiniawai. Ju áiniawai: Yus shiir enentáimtustin, shiir ana nu nákastin, tura anenkrattai. Ju menaintiunmasha anenkrattain\_kia ashí nankaamakuiti.

### Niisháa chicham unuimiatsuk chichastin

**14** <sup>1</sup>Nu asantai, anenkratin atarum. Tura núnisrumek Yúsan pé\_nkera nu takastin wakeruktarum. Imiankaska Yus-Chicham

etserkatin pénkeraiti. <sup>2</sup>Nújainkia niisháa chichamjai unuimiatsuk chichastin pénkerchaiti. Iis, nu shuar chíkich shuarjai chichatsuk aya Yusjai chichaawai. Ni chichame penké antukchamniaiti. Yusa Wakaní nin chichastinian súawai túrasha tana nu nekaachminiaiti. <sup>3</sup>Antsu Yus-Chichaman étserea nuka shuaran yayawai. Shuaran ikiatsuártasa, tura ikiakártasa, túrasha atsankrattsa yayawai. <sup>4</sup>Niisháa chichamjai unuimiatsuk chichaana nuka aya niniki katsuartinian yáinmamui. Antsu Yus-Chichaman étserea nuka ashí Yus-shuaran ikiatsuáwai.

<sup>5</sup>Atumsha ashí mash niisháa chichamjai chichastinian wakerajrume. Túrasha nuna nankaamas Yus-Chicham etserkatniun wakerajrume. Aya chichastinjainkia ju imiá pénkerchakait. Kame chichasma jintiákmeka maak. Nujai Yus-shuar tsakarartatui. <sup>6</sup>Enentaimpratarum, yatsuru. Nui irakun aya niisháa chichamjai chichaaknaka çitiura yáintatjarum? Antsu Yus winia jintinruamuncha tura wi nékajna nunasha étserkunka yáintatjarne. Yus-Chichamnasha tura ashí Yúsnancha jintinkuncha yáintatjarne.

<sup>7</sup>Peemsha tura tumansha wi tájana áintsan áiniawai. Pénker tuntuíyamuka paant nekaamniaiti. Tura pénker tuntuíyachkuinkia, nu tuntuíyamu nekaachminiaiti. <sup>8</sup>Suntarsha mesetnum wéenakui ni kapitíantri ni wakeramun ujaktinian kachun umpuawai. Paant umpuakuinkia suntarsha ni wakeramun nekaawartatui. Tura paant umpuachkuinkia suntarsha çitiurak mesetnum wétinian iwiarat?

<sup>9</sup>Atumjai sha núniskete. Nekaachmin chichamjai chichaakminkia çtámena nuna itiur nekaawartata? Nase chichartsumeash. <sup>10</sup>Ju nunkanmaya chichamka ti untsurí írunui. Nu chichaman nékakka ashí antukmin áiniawai. <sup>11</sup>Tura chíkich shuara chichamen ántachkunka níjjainkia yajaya apachia áintsanak ajajai. Niisha wíjjainkia yajaya apachia áintsankete. <sup>12</sup>Tuma asamtai, Yusa takatri ti wakera asarum ashí Yus-shuaran ikjarartatna nú takat nekas wakeruktarum.

<sup>13</sup>Nu asamtai niisháa chichamjai chichaitkiumka chichasumna nu jintiartin Yus seata. <sup>14</sup>Niisháa chichamjai Yusan áujeaknaka nekas winia wakanrujai áujeajai tura áusajna nuna nékatsjai. <sup>15</sup>Antsu wikia júnisan enentáimjai. Yúsan áujeakun winia wakanrujai sha áusattajai tura enentáimtsuk áusashtatjai. Kantamkuncha kantamaj nuna enentáimkium winia wakanrujai sha kantamattajai. <sup>16</sup>Amesha shuar iruntramunam aya wakanmijjai niisháa chichamjai Yus shiir yuminsakmincha nekaachmin asamtai nékachuka ámijjai métek áusatsniun jeatsui. <sup>17</sup>Ti shiir Yus yuminsam áujeatsmeash tura chíkichka Yusjai ikiakáatsme. <sup>18</sup>Ashí átum nusháa chichamjai chicharmena nuna nankaamas wikia chichaajai. Nuna Yusan yuminsajai. <sup>19</sup>Túmaitiatnak untsurí chichamjai chichasan ántumtikiashtinjainkia nankaamas Yus-shuar iruntramunmanka aya senku chichamchijain tiintjai, paant jintintiawartaj tusan.

<sup>20</sup>Yatsuru, uchia áintsarum enentáimprairap. Kuirchia áintsarum tunáa túrashtin enentáimpratarum tura chíkich írúnna nujaj̄ uunt enentáimpratniua áintsarum enentáimpratarum. <sup>21</sup>Yus-Papinium áarmaiti: ““Yajaya shuaran akupkan niisháa chichamjaj̄ chichastatjai. Tura nújaj̄sha anturtukchartatui” tawai Yus.” Tu áarmaiti. <sup>22</sup>Nújaj̄inkia páantaiti, nusháa chichamjaj̄ chichastinkia Yus-shuarchan ashamtikiar enentáimtikratniun Yus súsaiti. Yus-shuaran tu enentáimtikratniun súsachuiti. Antsu Yus-Chichaman etserkatniunka Yus-shuarchan enentáimtiktsuk Yus-shuaran yáintinian súsaiti. <sup>23</sup>Tuma ain̄, nékachusha tura Yus-shuarchasha Yus-shuar iruntramunam wayan̄ka tura ashí niisháa chichamjaj̄ chichainianak wáinkian̄ka “mash waurka ajasarai” enentáimturmarshartatuak. <sup>24</sup>Tura Yus-Chicham étserkurminkia nékachusha tura Yus-shuarchasha nūj wayan̄ka ashí tárúmna nujaj̄ ni tunaar̄in íimias enentáimturtatui. <sup>25</sup>Nújaj̄inkia ni enentáin̄ úumak ana nuna paant wáiniak tikishmatar Yusan shiir awajsattawai. Tura “nekas Yus atumjaj̄ pujawai” títiatui.

#### Ashí tuke shiir takastarum

<sup>26</sup>Ayu, júnisaiti, yatsuru. Átum irunkurmin shuar takastinian Yus nin susamu túratí. Kantamátniuncha, jintintiatniuncha, Yus iwiainiakman ujaktinniasha, nusháa chichamjaj̄ chichastinniasha, nusháa chichasman jintfatniuncha, ashí Yus-shuar Yusjaj̄ tsakararti tusar júna mash takasarti. <sup>27</sup>Nusháa chichamjaj̄ chichainiakka chikichik chikichik chichasarti. Tura j̄miarchik menaintiuchiksha chichasarti. Tura ni timianka jintiartiniaiti. <sup>28</sup>Jintiartin atsakuinkia nusháa chichamjaj̄ iruntramunam chichaschatniuiti. Antsu nin̄ki Yusjaj̄ chichasti. <sup>29</sup>Núnisan̄ jimarchiksha menaintiuchiksha Yus-Chichaman etserkarti. Tura chíkich shuar nūj iruntrar ni etserkamun enentáimprarti péñkerashit tusar. <sup>30</sup>Tura chikichik chichaakui Yus chikichan nūj pujana nuna yamaram chichaman súakuinkia emka chichaa nu iníáisatí. <sup>31</sup>Núnisrum Yus-Chicham etserkatin wakerarmena nu chikichik chikichik chichasrum ashí jeattarme. Nújaj̄sha Yus-shuar unuimiarar kakarartatui. <sup>32</sup>Yúsnan̄ étserainia nuka tuke enentáimprar chichastin áiniawai. Enentáimtsuk nánkamsan̄ chichasmin áiniatsui. <sup>33</sup>Yuska pachimtak chichaman nakitiak shiir chichasmanak wakerawai.

Chíkich nun̄kanmasha ashí Yus-shuar iruntramunam túrainia áintsarum túratniuitrume atumsha. <sup>34</sup>Yus-shuar iruntramunam nuw̄a chichastin surimkiamuiti. Yus akupea núnisan̄ núw̄aka chichatsuk umin̄ átin áiniawai. <sup>35</sup>Inintrustininian wakerakka ni jeen̄ waketkin ni aishrin̄ nūj aniaisti. Ashí iruntramunam nuw̄a chichastin natsantaiti.

<sup>36</sup>Jusha enentáimpratarum. Yus-Chicham atumjaj̄ nan̄kamnachmai. Núnisan̄ aya atum̄ijn̄ Yus-Chicham jeartamchaiti. Chíkich

nuṅkanmasha Yus-shuarti túrutai enentáimpratniuitrume atumsha. <sup>37</sup>Atumjín shuar “Yus-Chichaman tuke etserniuitjai” enentáimtumatsuash. Tura chíkich shuarsha “Yusa Wakanj tuke winia akuptaiti” enentáimtumatsuash. Nu shuarka wi áatjarmena nuna enentáimprar “nekas Yúsnan tíniuiti” tiartí. <sup>38</sup>Tu táchakuñkia niisha ánrar ániawai.

<sup>39</sup>Nu asamtai, yatsuru, Yus-Chicham etserkatin wakeruktarum. Nusháa chichamjai unuimiatsuk chichastincha surimkiarap. <sup>40</sup>Túmaitiat antukchamin awajtsuk ashí shiir túratarum.

### Kristu nantakmia

**15** <sup>1</sup>Ataksha, yatsuru, uwempratin chichaman wi etserkamaj nuna atumin enentáimtikrattsan wakerajrume. Nu chichamsha atumsha enentáimturarum tariarurme. <sup>2</sup>Nu chichamsha átum ántar enentáimtachkurmeka uwempraitrume. Wi ujakmajrum nu tuke enentáimtaitkiurmeka nekas uwempraitrume.

<sup>3</sup>Winia ujatkamunak ujakmajrume. Nu chichamsha ashí nankaamas úuntaiti. Júiti nu chicham: Ii tunaarjín asakártasa Kristu jarutramkamiayi, Yus-Papinium tana núnisan. <sup>4</sup>Tura jakamtai iwiarsarmiayi. Nuyá menaintiú tsawant tsawarmanum Yus Nin iniantkimiayi, Yus-Papinium tana núnisan. <sup>5</sup>Nantakisha Pítrun wantintiukmiayi, nuyá ni akatramurjín wantintiukmiayi. <sup>6</sup>Nuyañka kiniantusa (500) nankaamas Yus-shuaran wantintiukmiayi. Nú shuarnumiasha ishichik jákaru ániawai tura untsurj tuke pujuiniawai. <sup>7</sup>Nuyasha Sántiakun tura nuyá ashí ni akatramurjín wantintiukmiayi.

<sup>8</sup>Ashí amúamunmasha winiasha wantinturkamiayi, wi yajauch wekaa ajn. <sup>9</sup>Wisha Yus-shuaran ti yajauch awajsa asan chíkich Yus-akatramujaj ímianchaitjai. Nekas winia péñkerujaj ni akatramurjintjai tíchamniaitjai. <sup>10</sup>Antsu Yus ti shiir anentak winia enentáiruuj pujurtus péñker najataiti. Nu asamtai winia kakarmarjaj takaschaitjai, antsu Yus, anenkartin asa, winia enentáiruuj takaakui ashí ni akatramurjín nankaamas takasuitjai. <sup>11</sup>Tura wi takaakuisha tura ni takainiakuisha mai péñkerkete. Nu chichamka mash étsereaji tura nu chichamsha átum enentáimtusmarme.

### Jákaru nantakiartatui

<sup>12</sup>Iisha “Kristu jakamunmayá nantakniuiti” tu étsereaji. ¿Itiur nuikia shuar jakamunmayá nantakchatniuiti tuinia? <sup>13</sup>Jakamunmayá nantakchatniuitkiuñkia nuikia Krístusha nantakchaiti. <sup>14</sup>Tura Kristu nantakchaitkiuñkia ii ujajnia nu penké ántraiti, atumsha Kristu enentáimtarmana nusha ántraiti. <sup>15</sup>Núnisaitkiuñkia iisha “Yus Krístun iniantkimiayi” tákur waitruamji. Iis, nekas jakamunmayá nantakchamniaitkiuñkia nuikia nekas Yus Krístun iniantkichiuiti. <sup>16</sup>Jaka

nantakchatnuiitkiuin̄kia imia Krístusha iniantkichmaiti. <sup>17</sup>Tura Kristu iniantkichmaitkiuin̄kia átum Kristu enentáimtamusha penké ántraiti. Tunaarmisha asakárchamu ániawai. <sup>18</sup>Núnisaitkiuin̄kia Yus-shuar jákaru ainia nu tuke men̄kakarú ániawai. <sup>19</sup>Iikia Kristu enentáimtusar tuke Nijjaj̄i shiir pujustin náka. Tura aya jú nun̄kanam pujustiniaitkiurkia Kristu ántar enentáimtakrin ashí nan̄kaamas waitnentrampnatnuiitji.

<sup>20</sup>Antsu imiankas Kristu jakamunmaȳa nantaknuiiti. Ashí ukunam jakanmaȳa tuke jákashtinian nantakiartatna nuna Nii émtukuiti. <sup>21-22</sup>Yaunchu Atan̄ tunáa túramtai ashí shuar jákatin ániawai. Núnisan̄ yamaikia Krístujain̄ tuke atakka jákashtinian nantakiartiniaiti. Iis, chikichik áishman̄jain̄ jákatin nan̄kamnamiayi. Nuka Atan̄kauyayi. Núnisan̄ chikichik áishman̄jain̄ nantaktin nan̄kamnamiayi. Nuka Krístuiti. <sup>23</sup>Yus wakerana nuí Yusna nu mash nantakiartatui: Kristu emka-juukma áintsan̄ émtukim nantaknuiiti tura atak jú nun̄kanam tara ashí ni shuarin̄ júuktinia áintsan̄ iniantkittiawai. <sup>24</sup>Nuin̄kia mash amuukattawai. Nuí Kristu ashí kapitániasha, ashí akupniuncha, ashí núnisan̄ jú nun̄kanam írúnna nunasha nupetak emesattawai. Krístusha ashí mash ni Aparin̄ susattawai. Tura Yus Apa ashí akupin̄ átatui nuikia. <sup>25</sup>Iis, júnisan̄ átatui. Emka Yus Apa ashí ni nemasrin̄ nupetak Krístun̄ susattawai akupin̄ atí tusa. <sup>26</sup>Tura ni nemasrin̄ nupetak ashí amúamunam jákatniuncha nupetkattawai. <sup>27</sup>Yus Apa ashí Krístun̄ súsaiti ashí akupin̄ atí tusa. Yus-Papinium tu áarmaiti. Tura “ashí Krístun̄ súsaiti” táyat Yus Apancha susamuiti tátsui. Antsu Yus Apa ashí Nin̄ susa asa Nin̄ki súsachmaiti. <sup>28</sup>Tura Yus Apa ashí mash ni Uchirin̄ Krístun̄ nekas susamtai Kristu nuikia ashí akupin̄ ajas atak ni Aparin̄ mash awantuki núnisan̄ surumaktatui. Nuin̄kia Yuska tuke ashí nan̄kaamantu átatui.

<sup>29</sup>Ayu. Tura shuar jakan enentáimtusar imiantinniasha ¿urukamtia nuna túruinia? Jákaru nantakchatniuncha ¿urukamtai imianainia?

<sup>30</sup>Iikia ¿urukamtai tuke jánin̄kiaruitiaj̄i? Nantakchatnuiitkiuin̄kia ánta wáitsaintji. <sup>31</sup>Atsá, penké áintsachuiti. Nu asamtai átum ii Uuntrī Jesukristu enentáimtakrumin̄ wi shiir enentáimtajrume. Tura wisha tuke tsawantin̄ ti itirchat pujakun̄ jákatniua áintsan̄ pujajai. <sup>32</sup>Jakamunmaȳa nantakchatnuiitkiuin̄kia wi ántanak kajen shuarjaj̄i Ipiasiunam máaniakuitjai. Maa, uunt yawáa áinis kajen áрмаi. Wats, núnisaitkiuin̄kia antsu “yurumár nampektai, kashin̄ jákashtatjik” titiai nuikia.

<sup>33</sup>Anannawairap. “Pén̄keraitiatam̄ yajauch shuarjaj̄i tsanin̄kia wekakmeka yajauch máatrattame” tiniu ániawai. <sup>34</sup>Tunáa ikiuakrum pén̄ker wekasatin̄ shiir enentáimpratarum. Iis, shuar Yúsan̄ nékainiachu tuke awai. Atumin̄ natsāaruk tusan̄ tájarne.

### Iniantkimiu ayash̄ átatna nu

<sup>35</sup>Shuarsha inintruschaimpiash̄ ¿jákarusha itirak nantakiarat. Nantakiarsha warí ayash̄niak takusarat? <sup>36</sup>Enentáimtsuk inin̄trawai.



Jiñkiaí araamsha jaka áintsan amúatsuk. Túrayat tsapaatsuk.

<sup>37</sup>Tsapaitniurisha araatsme antsu trikiu jin̄kiaichisha ch̄kích áraaka jin̄kiaichirisha araame. <sup>38</sup>Nuyá tsapaakuisha Yus wakerana núnisan ní tsapaitniurincha súawai. Tura an̄kant an̄kant tsapaitniurin̄kia súsaiti. <sup>39</sup>Núnisan ashí ayash métekcha ániawai. Áentsnaka niishaaiti. Kuntinniasha niishaaiti. Nanamtinniasha namaknasha niisháa ániawai. <sup>40</sup>Nayaimpiniam yaa írunui tura jū nun̄kanam írunna nujaī nusháa ímtin ániawai. Nayaimpinmayasha nun̄kayasha sh̄írmari nushaiti. <sup>41</sup>Etsá wincharisha nantunusha yáanusha mash nushaaiti. Nuamtak yaaksha chikicha wincharin̄kia chikichnain̄kia nushaaiti. <sup>42</sup>Núniskete jaka nantaktincha. Káurtinnium iwiarsam jákashtinnium nantaawai. <sup>43</sup>Antra nu iwiarnawai, shiira nu nantaawai. Kakarmachua nu iwiarnawai, kakarma nu nantaawai. <sup>44</sup>Juyá ayash iwiarnawai, nayaimpinmayá ayash nantaawai. Juyá ayash átsuk. Núnisan̄ nayaimpinmayá ayashsha awai.

<sup>45</sup>Yus-Papinium nuní áarmaiti:

“Emka áishman̄ ni naarī Atan̄, aents ajas iwiaaku ajasmiayi.” Tu áarmaiti.

Ukunman̄ka, yamaram Atan̄ka áintsan̄, Kristu, wakan asa, ashí áentsun nekas iwiaaku átinian susamniaiti. <sup>46</sup>Nayaimpinmayá ayashkia émkachuiti antsu juyá ayash émkaiti tura nuyá nayaimpinmayá nu. <sup>47</sup>Emka áishman̄ nun̄kajaī najanamu asa nun̄kayaiti. Ukunmayá áishman̄sha ii Uuntrī Kristu asa nayaimpinmayaiti. <sup>48</sup>Atan̄ka áintsan̄ ainia nusha juyá ayashtin ániawai. Kristu áintsan̄ ainia nusha nayaimpinmayá ayashtin ániawai. <sup>49</sup>Yamá juyá ániakur ukunam nayaimpinmayá ayashtin ajastatji.

<sup>50</sup>Juna tájarne, yatsuru. Ayash númpentin asa nayaimpiniam, Yus akupeana nūi, wayachminiaiti. Iis, káutain̄kia káurchatniunam wayachminiaiti. <sup>51</sup>Yaunchu uukma nu yamá nekaatarum. Ashí jákashtatji, túmaitiatar ashí yapajniáttaji. <sup>52</sup>Tura púsar<sup>1</sup> muíttarnin̄ ti wárik yapajniáttaji. Tura ashí amuukai tusa umpuuartatui. Nú umpúamunmasha Yus-shuar jákaru ainia nu atak jákashtinian nantakiartatui. Iisha nuin̄ yapajniáttaji. <sup>53-54</sup>Jú kautain̄kia yamá jákatniuiat káurchamnia ajastiniaiti. Túrasha jákachmin átatui. Nu túrunamtaisha Yus-Papinium aarma uminkiattawai:

“Jákatniun Yus nupetak amukuiti. <sup>55</sup>¿Itiur jákatjik yamaikia.

Jákatniusha itiur nupettamkan̄ mantamataji?” Tu áarmaiti.

<sup>56</sup>Yaunchu Yus akupkamu tiniu asamtai shuar tunáa tura jákatniuiti.

<sup>57</sup>Yamá antsu ii Uuntrī Jesukristu túramujaī jákatniunka Yus nupetkaiti. Tura incha nujaī uwempratniun amaakui shiir yúmin̄kaiji.

<sup>58</sup>Nu asamtai, aneamu yatsuru, kakaram ajasrum yawetsuk nan̄kaamas Yusa takatrī takastarum. Ii Uuntrī Krístujaī tsanin̄kia takaarum nuka pen̄ké ánrachuiti. Nu paant nékarme.

## Yusa kuitrj irurtin

**16** <sup>1</sup>Yusa kuitrj irurtinkia, Yus-shuaran Karasea nunkanam tímiaj núnisnak atumniasha tájarme. <sup>2</sup>Ashí tumiñtin, Yus súramna áintsam akankam ikiusta. Nújainkia wi jeattaj nui yaunchu akankamu mash irurmin átatui. <sup>3</sup>Nui jeancha átum anaiyarmena nu shuaran papijjai Jerusarénum akupkattajai. Tura atumí kuítrumin aisha ii yachin sústartatui. <sup>4</sup>Wisha wéminiaitkiuinikia wijjai wéartatui.

## Papru irastatna nui

<sup>5</sup>Wi Masetúnia nunkanam wétiniaitjai tura nuyá Kurintiunam jeattajai. <sup>6</sup>Nuisha untsurj tsawant pujuschatjash. Ishichik nantusha wéchanianum pujuschatjash. Tura wi atak wéakuí atumsha yáintkiarum shiir akuptukchattarpash. <sup>7</sup>Aya wárik nankaamaktinian nakitijai. Antsu Yus wakerakuinkia untsurj tsawant atumjai pujustaj tajai. <sup>8</sup>Tura juin Ipsiunam pintikustís nampernum pujustajai. <sup>9</sup>Juinikia Yusa takatrj tí shiir takastin awai. Tura untsurj shuar wi takaamun nakitiainiawai.

<sup>10</sup>Timiutéu nui jeamtainkia, shiir awajsatarum; sapijmiakain. Niisha wijjai métek Yusa takatrj takaawiti. <sup>11</sup>Nu asantai nakitirairap. Antsu yáinkrum winí shiir akupkatarum. Chíkich yachijjai tatí tusan nákaiai.

<sup>12</sup>Apurusnasha chíkich yachijjai winí firmasartí tusan ti seamjai tura penkesha nakiarmai. Kame nii ankant aku nui winishtimpiash.

## Áujmamsamu

<sup>13</sup>Aneara tariarum Yus nekas enentáimtustarum. Áishmanchakaitrum, kakaram ajastarum. <sup>14</sup>Anenkartamujai mash túratarum.

<sup>15</sup>Ayu, yatsuru. Estepanasa shuari ashí emka Akaya nunkanam Yus-shuar ajasarmenékarme. Niisha Yus-shuaran yáintajtsar tuke takainiawai. <sup>16</sup>Niisha tura ashí nijjai métek yáinkiar takainia nú shuar seatmana nu tuke túratarum. <sup>17</sup>Estepanassha Jurtunátusha Akaikiusha atumíiya táarmatai shiir waraajai. Átum yajá pujakrum tujintiarmena nuna túrawarmai. <sup>18</sup>Niisha winia shiir enentáimtikrurarai. Núnisan shiir enentáimtikramprattarme. Nuní aents tuke shiir enentáimtustiniaiti.

<sup>19</sup>Asia nunkanmaya Yus-shuar amikmáatmainiawai. Akirasha ni nuwe Prisirajajisha ashí Yus-shuar ni jeen Yus-Chichaman irunturarusha Jesusa náariin amikmáatmainiawai. <sup>20</sup>Ashí ii yachisha amikmáatmainiawai. Nuámtaksha shiir awajnaisrum amikmáaniatarum.

<sup>21</sup>Wi Papru asan júchiniak winia uwejruijai áaran amikmaajrume.

<sup>22</sup>Ii Uuntrj Jesukristun aneachuka yajauchiniam yuminkramu atí. “Ii Úuntrj, wari tatá.”

<sup>23</sup>Ii Uuntrj Jesukristu yainmakarti. <sup>24</sup>Jesukristunu asakrumin atumin ashí ti aneajrume. Nu atí.

# Papru

## KURINTIUNMAYA SHUARAN

### ATAKSHA papin aar akuptukma

---

Kurintiumaya Yus-shuaran Papru áatramiania nu

**1** <sup>1</sup>Wi Pápruitjai Jesukrístu akatramu. Yus nuna wakerakui ni akatramurí anaikiamuitjai. Ii yachi Timiutéujai Yus-shuar Kurintiu péprunam íruntrumna nuna áatjarme. Kame ashí Akaya nunkanam Yusna ajasurmena nunasha áatjarme. <sup>2</sup>Apa Yussha, ii Uuntri Jesukrístusha shiir enentáimturma ásar imiatkinchanum tuke shiir pujustinian yáinmakarat tusan wakerajrume.

Papru wáitsamurí

<sup>3</sup>Ii Uuntri Jesukrístu Aparí, ii Yusrí ana nuna naarí uunt awajsatai. Niisha ii Aparínti. In waitnentramaji. Tura Niisha ii Yúsrínti. Tuma asa in tuke atsantamji. <sup>4</sup>Ii wáitajnia nui Yuska in atsantamji. Tura in atsantamjia nútiksarik iisha chíkich shuar wáitainia nuna atsankrarat tusa túrutmaji. <sup>5</sup>Warí, Kristu wáitsamurí núkap pachiinkiaitjia núnisrik ni atsankramurín núkap pachiinkiaitji. <sup>6</sup>Tuma asamtai, wáitajnia nu, Yusa uwemtikrampratniurí tura ni atsankratniurí atumsha takustarum tusar wáitaji. Tura Yus in atsantampramjia nu, Yusa uwemtikrampratniurí tura ni atsankratniurí átum takustarum tusar atsankramuitji. Wats, átum uwemtikramu tura atsankramu asarum, ii wáitsajnia nútiksarmek wáitiayatrum shiir enentáimsarum katsuntramniaitrume. <sup>7</sup>Tura “túratwai” tu enentáimtajrume.

Warí, átum ijjai métek wáitsaitrume. Núnisan ijjai métek Yus atsantamtsurmek.

<sup>8</sup>Yatsurtiram, iikia Asia nunkanam ti itiurchat wáinkiamjinia nu nekaatarum tusar wakeraji. Imiá itiurchat wáinkiar iikia katsuntratin jeachmaji. <sup>9</sup>Nu itiurchatnumiá “iwiaaku jíinkishtatji” tu enentáimsamji. Túrasha “iikia tujinchaitji” tu enentáimtumatsuk, antsu jakamunmayan iniannua nú Yúsan enentáimtusarat tusa nu túrunamji. <sup>10-11</sup>Jakamnia itiurchatnumiá Yuska uwentikrampramji. Tura yamaisha uwentikrampratajtsa pujurtamji. Tura atumsha in Yus áujtakrumniñkia “Yuska tuke uwentikramprattaji” taji. Tura untsurí shuar Yus aujsa asakrumin, ii uwempra asakrin untsurí shuar Yúsan yuminsartatui.

### Kurintiunam wau wéchatniun Papru ujakmiania nu

<sup>12</sup>Yatsurtiram, ju nekaatarum tusar wakeraji. Ju nunkanam pujusar tura nekaska atumjai pujusar anantsuk tura Yus umirkar wekaimji. Aya ii nekatairijjai wekaichamji. Antsu Yus in waitnentrana asa péñker wekasatniun yainmakmaji. Nu nekaar shiir enentáimji. <sup>13</sup>Áatjarmena nu páantaiti. Átum áujсарum nekaatin jearmena nunak aarjai. Chikichan nekaachminian aatsjai. Péñker nekaatarum tusan wakerajrume. <sup>14</sup>Ishichik nékayatrumek nú núkap tuke nekaki wetarum tusan wakerajrume. Nuñkia Jesukrístu tátinia nú tsawantai átum winia shiir enentáimtursattarme. Tura átum péñker wekasa asakrumin shiir enentáimtustatjarne. <sup>15</sup>Tura ii shiir enentaimtuniaj nuna nékakun ataksha Yusá waitnenkartutairi nekapsak tusan ataksha atumiin irastinian wakerimjai. <sup>16</sup>Masetúnia nunkanmaani wéakun írkuta nankaikitjarum tusan enentáimmiajai. Tura wáketkuncha ataksha ístajrum tusan wakerimjai. Túramtai wi Jutía nunkanam weakui átum yáintkiatarum tusan atumin ístinian wakerimjai. <sup>17</sup>Nuñkia ¿urukamtai túrachmaj? ¿Péñker enentáimtsukek “wetajai” tímiaj? ¿Wi Yus-shuarcha nunisan, jimiará chichamtiniaiti, tú enentáimtursarumek? <sup>18</sup>Núchaiti. Yus tana nuna tímiatrusan umána nútiksarik iikia ii chichame umiktai tusar wakeraji. Jú chichamaik, “Ee, atsá” tátsuji. <sup>19</sup>Wisha Serpanujai Timiutéujai Yusa Uchiri Jesukristunun ujakmajrume. Niisha jú chichamaik, “Ee, atsá” tíchaiti. Antsu nii tana nuna tuke umíawai. <sup>20</sup>Niijiaisha Yus tana nu tímiatrusan uminiui. Tuma asamtai Jesukrístu enentáimtukur “nii tana nuna nekas túrattawai” tu enentáimji. Tu enentáimsar Yusa naari shiir awajeaji. <sup>21</sup>Atumniasha incha ikiakátmajnia nu Yúsaiti. Krístunu ajasu asakrin túrutmaji. Tura anaitiamak Niiniu awajtamji. <sup>22</sup>Tura ukunam ii achiktatjinia nuna, nekas amastatjai tusa Yus ni Wakanin ii enentáin apujturmaji. Nujai Niiniuitji tusar paant nékaji.

<sup>23</sup>Atumiin itiurchatan wáinkiaij tusan nakitiakun atumí péprurin Kurintiunam jeachmajai. Wáitrakuñkia “Yus iirsati” tajai. <sup>24</sup>“Aya wi

tájana nútiksarmek Yus enentáimtustarum” waantu enentáimtumasar nu titin nakitijai. Yus nekas enentáimtusmaajai kakaarme. Antsu nekas warastarum tusar wakeraji.

**2** <sup>1</sup>Tuma asamtai, atak kúntuts awajsajrum tusan nakitiakun, “atumí tunaari íwiartsurminin jeashtatjai” tímiajai. <sup>2</sup>Wi atumin kúntuts awajkuncha, ¿yaki winia waramtikrusat? Aya atumek, wi nuik kúntuts awajsamjarmena nuke waramtikrusminiaitume. <sup>3</sup>Wi jeakun atumí tunaari íwiartsurminin kúntuts enentáimsaj tusan nakitiakun, nu papin áarmaj nútiksanak áarmajai. Warí, atumketrume winia waramtikrustin. <sup>4</sup>Nekaatarum. Nu papin áarmiajai. Kúntuts awajsatjarum tusan áarchamjai; antsu ti aneajrumna nu nekaatarum tusan wakerakun áatramajrume.

### Yajauchin túrana nu tsankuratin

<sup>5</sup>Túrasha kúntuts awajtusmia nu, aya wíniak kúntuts awajtushamai. Antsu atumniasha ishichik kúntuts awajtamsayi. Patasa chichasaj tusan “ishichik” tajai. <sup>6</sup>Kame nu áishmañkan iruntra chicharkarum wáitkiasmarum nuke máakete. <sup>7</sup>Antsu yamaikia tsankuratniuitrume. Shiir enentáimtikratniuitrume. Niisha imiá kúntuts pujus nú arant ajasáin tusarum túratniuitrume. <sup>8</sup>Túrakrum nii nekas anearmena nu paant iniaktustarum tusan seajrume. <sup>9</sup>Kame “aajna nuna umirtukartimpiash” tímiajai. Kame nuna nekaataj tusan wakerakun nu papin nuik áatramjarme. <sup>10</sup>Átum tsankurearmena nú shuaran wisha núnisnak tsankureajai. Tura tsankuratin ákuinikia, wi tsankurajna nu ashí atumnian enentáimtusar, Kristu ímmianum túrajai. <sup>11</sup>Kame uunt iwianch Satanás in emestampratajtsa wakerana nusha nékaji. Tuma asamtai, túrawain tusar tsankuratniuitji.

### Trúas péprunam Papru juákchamiania nu

<sup>12</sup>Krístunu shiir chichaman Trúas péprunam etserkatajtsan jean, ti péñker takastinian wáinkiamjai. <sup>13</sup>Túrasha ii yachi Titiun wáinkiachu asan, shiir enentáimsatniun tujinkiamjai. Tura asamtai Trúasnumia aentsun áujsan ikiukiaran Masetúnia nunkanam wémiajai.

### Krístujai nupetkamniaitji

<sup>14</sup>Kristu Jesusjai Yuska incha nupetmamtikramak ewekatmasuitji. Tuma asamtai Nincha ti shiir yúminsa pujajai. Tura kukují kunjúakui, ashí nékainia núnisan ii etserkamujai Kristu shiir chichamen Yuska ashí aentsun nekamtikiainiawai. <sup>15</sup>Kristu in pujurtamu asamtai Yusjai nekapsamka iikia kunjúaji. Ii kunjúajnia nuna uwemtikramu ainia nusha tura uwemtikrachma ainia nusha nekapramnia ainiawai. <sup>16</sup>Menkakatniunam weena nuka ii kunjúajnia nuna jakamnia mejea

nekapramji. Tura iwiaaku átinnium weena nuka iwiaaku átin kun\_kúa nekapramji. Maa, nu túratniuncha ¿yaki jeá?

<sup>17</sup>Kame untsurí aents kuítian achiktaj tusar Yusa chichamen yapajinia núniskechuitji. Antsu Krístunu ajasu asar, Yus akupkamu asar, Yus íimmianum anantsuk esetsar étsereaji.

### Yamaram chícham najanamu

**3** <sup>1</sup>¿Nu tákurnin\_kia, “ataksha nin\_ki waantu enentáimtumainiawai,” tu enentáimsarmek? ¿Chíkich túruinia núnisrik, “Ju áishman nekas Yus-Chichaman etserin áiniawai” tusa papí aarma atumin iniaktustinkiaitaj? ¿Chíkich iniaktustin nú papí atumin seatniukaitaj? <sup>2</sup>Atsá. Átumka ii papirja núniskechukaitrum. Ii enentáin nu papí áarmaiti. Tura nú papí áujsatniua núnisan\_ ashí aents atumí túramurí wáinkiar ii etserkamaj nu, Papru nekas Yusa takatrín takaawai tusa nekaamnia áiniawai. <sup>3</sup>Iis, tátsujak. Papí aarma núnisketrume. Nu papí Krístu áarmaiti tura iisha nú papí atumin súaji. Tíntiajainchu antsu iwiaaku Yusa Wakaníjiaí áarmaiti. Kayanmasha áarchamuiti; antsu shuara enentáin, auka, áarmaiti.

<sup>4</sup>Kame Krístunu asar, Yus enentáimta asar, nusha t́miniaitji, taji. <sup>5</sup>Ju nékaji; imia iik pen\_ké tujinkiaitji. Antsu ii túrajnia nu Yus ni kakarmarin súramkurin túraji.

<sup>6</sup>Yamaram chichaman Yus najanamia nuna, incha pé\_nker etserkatniun suramsaitji. Yaunchu aarma chichamnum, ashí takamtsuk umirkachrikia tuke jakamniuyaji. Antsu yamaram chichamnum, Yuska ni Wakaníjiaí yamaram wekasatniun súramji. Yusa kakarmaríjiaí nu chicham étserji. <sup>7</sup>Yaunchu chichamnaka kayanam aar Yus Muisaisan susamiayi. Susamia nuí, Muisaisa yapi ti wincha ajasmiayi. Túrunamtaí Israer-shuar ni yapin íistinian tujinkiarimiayi. (Túrasha nu wincha mushatmaki wémiayi.) Túrasha nu chichaman shuar umirkatniun tujintiakui, nu chichamsha aya tuke jákatniunam shuáran ejemiayi. Túmayatan\_ winchajai susamuyayi. <sup>8</sup>Tura yamaram chichaman Yusa Wakaní súramna nu, nujai nan\_kaamas shíiraiti. <sup>9</sup>Kame mesertinnium ejeana nú chicham winchajai susamuyayi. Tura nujai nan\_kaamas Yúsnum ejeana nú chichamka Yus íimmianum pé\_nkeraiti. <sup>10</sup>Iista; yamaram ana nu imiá shiir asa, yaunchu wincha amia núnaka mushatmamtikiui. <sup>11</sup>Núkap arur pujuschamnia nu wincha áchamkia. Kame tuke átinia nuke nujai nan\_kaamas shíiraiti.

<sup>12</sup>Nu nékakur ti paant étserji. <sup>13</sup>Muisais túramia nútiksarik túratsji. Ii uuntri Israer-shuar ni yapin wincha ajas men\_kaan wáinkiarain\_ tusa tarachjai ni yapin Muisaiska nukumakmiayi. <sup>14</sup>Tura nu arantcha Muisaisan anturkarmia nuna enentáisha nukukmauyayi. Nekaatniun tujinkiarimiayi. Tura yamaisha núnisan\_ yaunchu aarma chichaman áujsam antukar nekaatniun tujintiainiawai. Krístu enentáimtuschatin ni

enentáin nukukma nu yapajíáchmaiti. Aya Krístujai nuka yapajíámniaiti. <sup>15</sup>Yamaisha Muisaisa áarmarín áujсар nékainiatsui, ni enentáimmiari nukurkamu asa. <sup>16</sup>Tura aencha ni enentái yapajíá Uuntna ajasmataikia ni enentáimmiariya nukurkamu ana nu jusamuiti. <sup>17</sup>“Uunt” tájinia nu, Yusa Wakaníiti. Uunt Yusa Wakaní pujana nuí ankant ajastiniaiti. <sup>18</sup>Nuke asamtai, iisha ii yapi tarachjai nukukchamu asar íspikia núnisketji. Uunt Kristu péñkeri iniakmaji. Kristu péñkeri nú núkap takaki wéakur, Krístujai métek ajastasa pujaji. Yusa Wakaníkia nuna túrawai.

**4** <sup>1</sup>Yus in waitnentrama asa ni chichamen etserkatniun ataktamsaitji. Tuma asamtai yawetsuk takaaji. <sup>2</sup>Uuka túratin ana nuyá tura natsanmai ana nuyasha kanakmiaji. Anankatai tusar wekaatsuji. Tura Yus-Chichamjai nakuratsji. Étserkur aya Yus-Chicham tana núchik étserji. Ashí aents nuna antukar, “nekas núiti Yus-Chicham” tiarat tusar túraji. Wi tájana nuna Yus nékawai. <sup>3</sup>Uwempratin Chicham ii étserjinia nu páantaiti. Áyatik menkakatniunam weena nu “páantchaiti” tuñiawai. <sup>4</sup>Uunt iwianch, ju nunká uuntri ana nu, nu aentsu enentáin ukusturuiti. Uunt Krístunu shiir chichaman ii étsermajai tsáapnin enentáimpraraín tusa ukustawai. Nu Kristu Yúsan ímiatrusan nakumui. <sup>5</sup>Iisha étserkur, Jesukristu ii Úuntriñti tu étsereraji. Iikia atumí úuntriñtji tátsuji. Antsu, Jesus ii uuntri asamtai, atumi yáintriñtji, taji. <sup>6</sup>Yaunchu kiritin aan Yus tsáapin ati tusa tsáapnin awajsachmakia. Nú Yúsaiti ii enentáin tsaapnin awajtamsamia nu. Nu tsaapnijiaí ni shiirmarín, Jesukristu iniakmia nuna, ashí aents nekaawarat tusar Jesukristunun étsereraji.

#### Yusak enentáimtusar wekasatin

<sup>7</sup>Nu tsáapin imiá péñker ana nuna ii ayashiin Yus ikiusuiti. Tura ii ayashi kakarmachu, nuwe najanamua áanin asamtai, warí, kakaram ájinia nu Yúsnumiächukait. Ii aí nuna nekaawarat tusa Yuska ni tsáapnintrin ii ayashiin ikiusuiti. <sup>8</sup>Tuma asamtai ii itiurchatri árentmaku árinin tuke jiinkimniaitji. “Itiurkatjik” taji, túrasha Yus yáinmaji. <sup>9</sup>Aents pataaturmainiakrincha Yus ikiurmatsji. Emesrataj tukamá tujintiainiawai. <sup>10</sup>Kame Krístun máataj tusa tuke wakermia núnisan incha tuke mantamataj turamainiaji. Túrasha jákachu asar Kristu kakarmari ii ayashiin iniakmaji. <sup>11</sup>Iisha Jesusna ajasu asar wekaajnia nui tuke tsawant tsúmainium jasattuk ajaji. Túrar ii ayashi jakamniaitiat nu ayashnium Jesusa iwiaakmari paant iniakmaji. <sup>12</sup>Iisha Yus-Chicham étserkur ii ayashiin jasattuk ajaji, tuma aín atumsha umikiu asarum nekas iwiaaku atin wáinkiarne.

<sup>13</sup>Yus-Papinium yaunchu áarmanum: “Yúsan enentáimtusmajai, tuma asan etserkamjai” tátsuk. Iisha núnisrik Yus enentáimtusar wekaaji. Tuma asar étserji. <sup>14</sup>Yus kakarmaiti. Uunt Jesusan jakamunmayan iniantkimiayi. Incha núnisan Jesusjai iniantamkittiaji. Tura atumjai

métek ni pujamunam juramkittiaji. Nusha paant nékaji. <sup>15</sup>Atumsha untsurí aencha Yus-Chicham antukakrumin, Yus yáinmakurme. Tuma asamtai atumsha nútiksarmek Yus yuminsarum pujarme. Nujai Yusa naarí uunt awajsamuiti. Nu nekaar wáitsatin ashamatsji. <sup>16</sup>Tura yaweatsji. Ii ayashí amuiki wéakuisha ii enentáinkia yamaram ajaki wéawai. <sup>17</sup>Warí, ukunam tuke shiir pujustatjinya nu enentáimtakrika, ju nunkanam wáitiajnya nu, ti itiurchataitiat, aya yamaiya asa tiikia itiurchatchaiti, tura wárik nankaamawai. Túrasha ii itiurchatrijai Yuska ti shiir ana nuna amuukachmin ana nuna núkap suramsattaji. <sup>18</sup>Tuma asamtai wáinjinya nu ti enentáimtatsji. Antsu wáintsujnya nu nekas enentáimtaji. Wáinjinya nusha aya yamaiyaiti. Antsu wáintsujnya nuka tuke amuukachminiaiti.

**5** <sup>1</sup>Wats ju nékaji. Nayaimpiniam ii shiir pujustinian amuukachmin ayashin Yus najanamun ikiurtamsaitji. Aents najanachmaiti nu. Tuma asamtai ii ayashí emesnakuisha warí itiurtamajia. Nuka aaka núnisan amuukamniaiti. <sup>2</sup>Ju ayashnium pujusar wáitiaji, taji. Yamaram ayash nayaimpiniam pujana nu achiktaí tusar wakeraji. <sup>3</sup>Ayashtichu ajasaj tusar, yamaram ayashtin ajastaisar wakeraji. Pushía núnik yamaram ayash in nukurmaktai tusar wakeraji. <sup>4</sup>Tura juí ayashjai pujusar wáitsar pujakur shiir enentáimtsuji. Arut pushí áiktinia núnisrik ju ayash ikiuktiaitsar tátsuji. Antsu yamaram pushí entsartinia núnisrik yamaram ayashnium tuke pujusmí tusar taji. Iista, ju ayash amuukachminkiaiti. Yamaram ayashnium pujusar tuke iwiaaku pujustatji. <sup>5</sup>Yamaram ayashintin ajastinian iwíarturmaruitjinya nu Yúsaiti. Tura nekas túrattajai tusa ni Wakanin suramsaitji.

<sup>6-7</sup>Ju nékaji. Ju ayashnium pujajnya juinkia Uunt Jesusjai pujatsji. Tuma asamtai, wáinjinya nu ti enentáimtutsuk Yus enentáimtsusar tuke shiir enentáimsar wekaaji. <sup>8</sup>Tura ju ayashniumia jíinkir Uunt Jesusjai tuke pujustaisar wakeraji. Tura túrattaji tu nékaji. <sup>9</sup>Tuma asamtai ju ayashnium pujakrishia tura ju ayash ikiukrishia Uunt Jesus tuke waramtiksatata taji. <sup>10</sup>Warí, ju ayashjai ii túramajnya nu ujakam, “pénkeraiti”, “yajauchiiti” Kristu turutit tusar, ashí iisha Uunt Kristui jeatniuitji. Tura ii túramujai métek akirmaktatji.

### Krístun waramtiksatata taji

<sup>11</sup>Tuma asamtai ju nékaji: Uunt umirkashtin ti tsúumainti. Nu nekaar ashí shuar Yus-shuaran awajsataj tusar ti takaaji. Tura incha Yus nékarmaji. Tura ii túramurí átumka atumí enentáin paant nékarme, tajai. <sup>12</sup>Ataksha, “wi pénkeraitjai” tusar nu tátsuji. Antsu, ii túramu nekáa asakrumin enentáiniam ana nuna enentáimtsuk aya pátatkea nujai warainia nú shuar tsanumprutmainiakui yaintkiatarum tusar taji. <sup>13</sup>“Wáurkaiti” turamainiajyash. Nusha warí, itiurtamajia. Ashí túrajnya



nu, Yus aneakur tura atumin yáintai tusar túraji. <sup>14</sup>Kame ashí ii túrajnia nu Kristu anenkrattairjiaí túraji. Kame ju nékaji: Kristu ashí shuaran jaruku asamtai, Yus íimmianum ashí iisha jaka núnisaitji. <sup>15</sup>Kristu ashí shuaran jaruk nantarkimiayi. Tuma asamtai Krístunam iisha iwiaaku pujajnia juí, iik wararmamtsuk, Kristu umirkatniuitji. <sup>16</sup>Tura yamaisha aya ni ayashí fírsar, “nu shuar péñkeraiti” tura “nu shuar yajauchiiti,” titin tujintiaji. Kame yaunchu aya ni ayashí fírsar “Kristu yajauchiiti” tu enentáimsamiaji. Tura yamaikia yapajiár, esetsar enentáimkiur “Kristu Yusa Uchirínti” taji.

### Krístujai yamarmaitji

<sup>17</sup>Tuma asamtai, Krístunu ajasúka yamaram najanamuiti. Yaunchu enentáimtai*ri* menkakayi. Antsu núnaka íkias ni enentáimtai*ri* nekas yamarmaiti yamaikia. <sup>18</sup>Nunasha Yus túraiti. In nawampramkattsa Krístun akupturmakuitji. Tura nu etserkatniun incha ataktamsaitji. <sup>19</sup>Yuska in tunaarínniutin asutiámatniun nakitiak Krístujai nawampramkamiaji. Tura incha Yus-shuartin nu ujaktinian ataktamsaitji. <sup>20</sup>Krístunu ataksamu asar, Yuska “winia Uchirjai nawamnaikiatarum” tusa ii wenejai atumin seatmarme. Tuma asakrin, Kristu náariin “túratarum” tájarme. <sup>21</sup>Krístuka tunaan penké túrachmiayi. Túmanak ii tunaariin Yus Krístun makuumiayi. Nuna tura Krístunam makuuchmin awajtamsamiaji.

**6** <sup>1-2</sup>Ni Papiriin Yus yaunchu Isayasan juna tímiayi: Tsawant jeamtai, ame seatmena nuna anturkamjame. Uwempratin tsawant jeamtaisha yainmajme.

Wats yamaikia Yus seatin jeayi. Yamái Yúsnum uwempratin jeayi. Tuma asamtai, iikia Yusa takatrin pachitkiajnía nu, Yusa anenkrattairi penker achiktarum tusar seajrume. <sup>3</sup>Tura “Papru etserkamuri ántrai” tíarain tusar chíkich yajauch enentáimtiktsuk penker wekaaji. <sup>4</sup>Nekas Yusa takarniurintji nuna paant nekaawarat tusar wáitiatyatrik, atsumayatrik, itirchatnum pujayatrik shiir katsunteaji. <sup>5</sup>Ju itirchat wáinkiamji: katsumpramkarmaji; sepunam enketmáwarmiaji; charáa-charáa awajtamiarmiaji; takatcha ti itirchat takasmiaji; kanutsuk pujumiaji; tura tsukasha ti tsukammiaji. <sup>6</sup>Tunáa nakitrar wekaaji; Yus-Chicham unuimiátraitji; shiir enentáijjai katsuntrar wekaaji. Chíkich shuar penker awajeaji; Yusa Wakaní pujurtamkurin shuar nekas aneaji; <sup>7</sup>nekas chicham ana nu étsereaji; tura Yusa kakarmarisha nú paant iniakmaji. Tura ni nemasrin nupettukain tusa suntar ni tantarin júana núnisrik iisha ii nemasri íwianch nupettamkajj tusar ii Yusri tuke umirkar wekaaji. <sup>8</sup>Shuar shiir enentáimturmainiakrincha, yajauch enentáimturmainiakrincha, penker chichartamainiakrincha, yajauch chichartamainiakrincha tuke Yusjai shiir wekaaji. “Wáitruiniawai”

turamainiakrincha tuke nekas chichaaji. <sup>9</sup>“Nu aents nékatsji” turamainiakrincha Yusnumka nékanji; jákatin tsúumainnium wekayatrik tuke iwiaaku pujaji; asutiámuitiatrik mantamnatsji. Yusa takarniuríntiaj nu ashí nujají paant nekaamniaiti. <sup>10</sup>Kúntuts pujayatrik ii enentáinkia waraaji; kuítrinchaitiatrik chíkich shuar kuítrintin awajeaji; penké takakchiatrik ashí wáinjji.

<sup>11</sup>Yatsurtiram, Kurintiunam pujarmena nu, ashí paant ujakchamkajrum. Ti aneajrumna nu nékarme. <sup>12</sup>Wikia atumin paant chichastajtsan wakerajrume; antsu átumka anenttsuk paant chichastin nakitrarme. <sup>13</sup>Winia uchirua núnisnak chichaajrume; wi tuke paant chichaarjarmena núnisrumek atumsha atumí enentáin ana nu, paant ujakatarum tusan seajrume.

### Yusa jeentji

<sup>14</sup>Yus-shuar Yus-shuarchajají tsanin̄ktinian enentáimsashtiniaiti. Warí, ¿Yusan umirna nú shuar, iwianchin umirna nú shuarjají métek enentáimiainiawak? ¿Tsáapnisha kiritjají máimtek áminkiait? <sup>15</sup>¿Krástuka uunt iwianchjají nawamnaikiamniakait? ¿Yus-shuar Yus-shuarchajají tsanin̄ shiir pujusminkiait? <sup>16</sup>¿Iwiaaku Yusa jeencha ántar-yus pujustinkiait? Tura atumsha iwiaaku Yusa jéentrume. Yus Niñki ni Papiriin juna tíchamka:

Niijjají tsaninkia pujusan, niijjají wekasartatjai tura ni Yusrjí átatjai; tura niisha Wíi aents ajasartatui.

<sup>17</sup>Tuma asamtai junasha tímiayi:

Nii matsatainia nuyá jíinkitiarum, tura niija kanaktiarum, tawai Uunt Yus; tura yajauch ana nu antinkiairap. Túrakrumninkia awayattajrume.

<sup>18</sup>Tura atumí Aparí átatjai; átumka winia uchir átrume. Nuna Wi imiá kakaram uunt Yus asan tajai. Tu áarmaiti.

**7** <sup>1</sup>Tuma asamtai aneamur yatsurtiram, nusha, Yus tímia nu, in túramji. Nu tuma asamtai ii ayashí tura ii enentáisha yajauch ajasajin̄ tusar, ashí tunáa ana nuyá kanaktiniaitji. Túrar “Yusak nekas ii úuntrinti” takur, ii ayashísha, ii enentáisha takamtsuk tuke tsawant Yus íiktustiniaitji.

### Kurintiunmaja shuar enentáimprarmatai Papru warasmiai

<sup>2</sup>Ataksha nawamnaikiatai. Iikia shuar yajauch awajsachmaji; yajauch jintintrachmaji; anankachmaji. <sup>3</sup>Makuutai tusan nuna tátsujai. Antsu nuik tíchamkajrum, iwiaaku pujakrishá jakarsha átumka ii enentáin áchitkiarme. <sup>4</sup>Araantutsuk áatjarne; shiir enentáimjai. Itiurchatnum pujayatnak, atumin enentáimtusán enentairuí kakaram enentáimsan waraajai.

<sup>5</sup>Juì Masetúnianum penké ayamprachmaji. Antsu ti wáitsamji. Áentsnumià itiurchat wáinkiamji, tura ii enentáijjainkia ashamkamji. <sup>6</sup>Tura kúntuts pujakrincha Yus ikiakátmartinian nékawai. Tuma asamtai Titiún akupturkamai. Nujajì winia enentáirun ikiakármai. <sup>7</sup>Tura átum nii ikiakármarumna nuna Titiu ujakkamai. Nuna antukan ti warasmajai. Títiuka átum firsatin wakerarmena nuna ujakkamai; túrunamia nuna kúntuts enentáimmiarumna nusha, tura winia anentu asarum enentáimturumna nuna ujakkamai. Nuna antukan nú nankaamas warasmajai.

<sup>8</sup>Papí nuik akupkamaj nu áujsarum kúntuts enentáimprarme; núnaka nékajai. Túrasha ii akupmainchu túraitjai tátsujai. Eta, nuikkia tímiajai, túrasha yamaikia tátsujai. Papí áujsarum ishichik kúntuts enentáimprarumna nuna nekaan waraajai. <sup>9</sup>Kame kúntuts enentáimprakrumin waraatsjai. Antsu atumí tunaarì nekaarum kúntuts enentáimprarum atumí enentái Yusjajì yapajjá asakrumin nuna nekaan waraajai. Kame Yus wakerana nútiksarmek kúntutsrum katsuntearme; tuma asamtai iikia nu papijjajì yajauch awajsachji. <sup>10</sup>Nekaatarum. Yus wakerana nútiksajñ kúntuts katsunteakka ni enentái Yúsnum yapajjáiawai. Nuinñkia ni tunaaríyã uwempraiti. Nuka “túruminchu túraitjai” tíchamniaiti. Antsu Yusan enentáimtutsuk kúntuts pujakka ni enentái yapajjáshtatui; yapajjítuk ni tunaaríyã uwemtsuk jakattawai. <sup>11</sup>Tura iistarum; Yus wakerana nútiksarmek atumí kúntutsrì katsuntearme. Tuma asarum wi áatjarmena nu esettsarum enentáimtusurme. Atumí túramurì ujakkatajtsa wakerimiarme. Tura nu tunáa nakitramarme; tura ashamkamarme. Tura yajauchin túramia nu asutiámarme. Tura winia anentu asarum wi timia tímiatrusrumek turatai tusarum ti wakerimiarme. Nu tura asakrumin péñker túrarmena nu, paant iniakmarme. <sup>12</sup>Kame yajauchin túramia nuna ni tunaarìn iniaiasat tusan wakerakun, tura wáitias pujumia nu atak shiir enentáimsati tusan wakerakun nu papin áatramjarme. Tura nú nankaamas átum Yúsnum in anearmena nu nekamatarum tusan áatramjarme. <sup>13</sup>Atum umikiu asarum waraakrumin iisha shiir enentáimji. Tura shiir itiaamarumna nuna Titiu waraak ujakkamtai nú nankaamas shiir waraaji. <sup>14</sup>Atumin shiir enentáimtajrumna nuna Titiun ujakmajai. Tura nuna nekas aan Titiu nekaamai. Tuma asamtai atumin natsantrachmajrume. Kame atumin tuke nekas ana nuna tímiajrume. Núnisan atumnian Titiun tímiaj nusha nekasauyi. <sup>15</sup>Tura Títiuka atumin enentáimturmas ti waraawai. “Jiatmaktajtsa winiatsuash” tusarum ti ashamkachurmek. Túmayatrum, nii péñker tati tusarum pachischarmek. Tura nii taa seatmarma nu umikiurme. Títiuka nuna enentáimias waraawai. <sup>16</sup>Tura wikia, átum péñker túramurmin nekaan tura péñker túrawartatui tu enentáimsan waraajai.

## Yus-shuarti ii kuitrj súsatin

**8** <sup>1</sup>Yatsurtiram, Masetúnia núnkanmaya Yus-shuaran Yus waitnentainia nuna yamáí ujaktatjarne. <sup>2</sup>Ti itiurchatnum nekapsamu ainiawai. Túmayatan warainiawai. Tura ti kuítrinha áiniayatan emeentutsuk kuítrinnia núnisan suiniawai. <sup>3</sup>Juna wi paant nekaan ujaajrume. Niisha wakeramujai súsatniun jeainia nuna súiniawai; tura nú nankaamassa súiniawai. <sup>4</sup>Yus-shuaran kuítrinchan súsartaitsa ti wakeruiniak, nu túratniun ti seatmarmaji. <sup>5</sup>Tura ii enentáimmiaj nú nankaamas túrawarmiyai. Emka Yúsnum niñki sumamawarmiyai. Tura Yusa wakeramurj túratitaji tusar incha “yáíntajrume” turammiaji. <sup>6</sup>Tuma asamtai, “Masetúnia nunkanam kuit júuktin nankamamamna nu, Kurintiu peprunmasha amukta” tusar Titiu seamiaji. <sup>7</sup>Atumsha ashí péñker túratin ti nékarme. Yus enentáimtustincha, unuiniartincha, ju nunkanmaya nekaatniusha, in aneatniusha nuka ashí nékarme. Wats, jusha túratarum. Yus-shuar kuítrincha ainia nu achikiarat tusarum Titiu támatai núkap susatarum.

<sup>8</sup>Kame atumí úuntria núnisnak akupeatsjarne, túratniuitrume tusan. Antsu chíkich shuar ni kuítrin susartasa ti wakeruiniá nuna atumin ujakan, atumí anenkrattairi nekaspashi tusan nekapsatajtsa pujajai. <sup>9</sup>Ii uuntri Jesukrístu waitnenkartutairi nékarme. Ashí takakuyayi, tura atumin anenma asa kuítrincha núnisan ajasmiaji. Ju nunkanam kuítrincha núnis ajasmatai átum nayaimpiniam kuítriniak tusa túramiyai.

<sup>10</sup>Juna enentáimjai. Nuik uwitin, “yáíntatji” tíchamkarum. Tura nu túratin ti wakerimiarme. <sup>11</sup>Nan kamamarmena nu yamaikia amuktarum. Nuik ti wakerimiarmena núnisrumek yamaisha súsatin jearmena nu susatarum. <sup>12</sup>Iistarum. Ni kuítrin Yúsan nekas susatajtsa wakerakuinkia, nii jeana nuna susat tusa Yus wakerawai. “Jeana nú nankaamas susati” tátsui Yus.

<sup>13</sup>Chíkich ti núkap susarum atumnia táasat tusan tátsujai. <sup>14</sup>Antsu ashí métek takusarat tusan tajai. Iis atumsha yamaikia ti nukap takakrume; nujai atuma nu súsatniuitrume. Ukunam chíkich tsawantaji átum atumashtarmeash. Nuinkia niisha atumin suramsarti. Nu túratin ákuinkia ashí métek takustin átatui. <sup>15</sup>Yusa Papiriin yaunchu árman núnis tátsuk:

Núkap takusmia nu ampirchamiyai; tura ishichik takusmia nu atumachmiyai.

## Titiu chíkich Yus-shuarjai Kurintiunam wetin ármiaji

<sup>16</sup>Tura wi aneajrumna núnisan atumin aneatniun Yus Titium susamiyai. Tuma asamtai Yúsan yuminsan pujajai. <sup>17</sup>Iis, wi takui wétinian

wakerimiayi. Tura nú nan̄kaamas, atumin anenma asa, ni enentájjain wéawai.

<sup>18</sup>Tura ch́kich Yus-shuar Titiujai akupkatajtsa pujaji. Nu shuar Yusa Chichamen ti penker etserainakui, ashí Yus-shuar iruntramunam nin penker áujmatainiawai. <sup>19</sup>Tura nú shuarnaka ii tsaniakmarí atí tusar ashí Yus-shuar iruntramunam nuna anaikiarmiayi. Iijai kuítian jukiarti tusar anaikiarmiayi. Iis Yusa náarin ashí aents uunt najanawarat tusar tura ashí shuar atumí tsankarin nekaawarat tusar nu takat túratsjik. <sup>20</sup>Iis, ju kuit ii jukittiajnia nu, núkap asamtai, aents tsanumprutmawarajj tusar, Titiujai tura ju shuarjaisha wéaji. <sup>21</sup>Yus ímmianumsha, aents ímmianumsha ii naka wekaajnia nuna nekaawarat tusar túraji.

<sup>22</sup>Nu jimiará shuarjai ch́kich Yus-shuar akupeaji. Yusa takatrin takastasa ti wakerana nu nekas nékaji. Tura átum yáintin ti wakerarmena nuna nekáa niisha atumiin jeataj tusa ti wakerawai. Nuna túmak Yusa takatrin takastinian wakerana nuna paant iniakmawai. <sup>23</sup>Tura aisha ch́kich shuar Titium nekaataitsar anintruiniakuisha, “Titium Papru tsaniakmarinti. Incha yáinmaktajtsa Páprujai takaawai” titiarum. Ch́kich Yus-shuaran nekaataitsar anintruiniakuisha, “Yus-shuar akupkamu áiniawai, tura Kristu náarin shiir awajin áiniawai” titiarum. <sup>24</sup>Tura atumí anenkrattairi ashí Yus-shuar nekaawarat tusarum, nu shuar penker itiaatarum. Nu túrakrum, atumnia ii shiir tímiaj nu nekasaiti tu iniaktustatrome.

#### Yus-shuaran kuítrinchán súsarmia nu

**9** <sup>1-2</sup>Kame átum Yus-shuar kuítríncha súsatín wakerarme; nuna nékajai. Tuma asan núnaka áatrachminiaitjarne. Atumsha súsatín wakera asakrumin wi nunasha shiir enentáimsan, “Akaya nun̄kanmayá shuar nuik uwitínia wakerusmatak yáintínian wakeruiniawai” tusan Masetúnianmayá shuáran ujaajai. <sup>3</sup>Tura “kuítniasha súsatniun ti wakeruiniawai” tímiaj nuna, “wáitíaiti” tírajin tusan nakítiajai. Tuma asan, kuit susatajtsa wakerarum nu iwiaratarum tusan nu menaintiu Yus-shuaran nuna yáinmakarat tusan emka akupenajai. <sup>4</sup>Wi ukunam Masetúnianmayá shuarjai atumiin jean, kuit súsatín tímiarmena nuna iwiarachman wáinkian natsarajj tusan, tura atumsha natsarajrum tusan túrajai. Warí, “súsatniun ti wakeruiniawai” tuke tu wéatsjak. <sup>5</sup>Nu tuma asamtai, au takui súarme tu enentáimsarajin tusan ju Yus-shuaran emka akupenajai. Niisha nu kuítian iwíaratniun yáinmakarti, tajai. Nuínkia wisha Masetúnianmayá shuarjai ukunam jeawakrin, nu kuit atumsha nekas atumí enentájjaink<sup>i</sup> súsatín wakerarmena nu nekaamnia átatui.

<sup>6</sup>Tura junasha paant tájarne: ishichik araana nu ishichik júuktatui. Núkap araana nusha núkap júuktatui. Kuit súsatniusha núniskete. <sup>7</sup>Tura ashí shuar ni enentáin enentáimsana nunak susati. “Nakítiaiatnak

susatjai” tíchamniaiti. “Turutainiakui susatjai” tíchamniaiti. Shiir enentáimias súana nuna Yuska shiir enentáimtai. <sup>8</sup>Ashí pénker ana nuna suramsatniun Yus tujintiatsui. Nujají átum atsumashtatrumé. Tura chikichan yáintin núkap takustatrumé. <sup>9</sup>Yus-Papinium ju aarma awai:

Kuítrinchan núkap susayi;  
nuna tura, tuke túratin átatui.

<sup>10</sup>Arakmaun araakan súana nusha Yúsaiti. Tura yurumkan súana nusha Yúsaiti. Niisha átum pénker araatniun suramsattarme. Tura araarumna nujají pénker túratarum tusa araakrumin ipiampartatui.

<sup>11</sup>Tuma asamtai núkap juukma takaku asarum, núkap súsatin jeattarme. Nuiñkia súarmena nuna ii uwejeyan chíkich Yus-shuar achikiar Yúsán yumínsartatui. <sup>12</sup>Warí, ju kuit Yus-shuar kuítríncha súakrin ni atsumamuríncha atsumachartatui. Tura nú nankaamas Yúsán ti yumínsartatui. <sup>13</sup>Nu shuar yáintai tusarum tura ashí Yus-shuar yaintai tusarum súatsrumek. Nujají Kristu shiir chichamen umiarmena nuna nékainiawai. Tura kuítrum emeentutsuk sua asakrumin niisha Yusa náarin uunt awajsartatui. <sup>14</sup>Kame Yus atumin ti waitnentramainiakui kuítrum súatsrumek. Sua asakrumin nu shuar atumin ti anenmainiak Yúsán áujturmasartatui. <sup>15</sup>¡Tura ashí iisha ii Yusrí ti yumínsatniuitji! ¿In súramjinia nuna yaki jintíartinian jeá?

### Papru nekas jintintiamniaiti

**10** <sup>1</sup>Wats, “Papru iijjají pujak péejchach ajawai, tura yajá pujak kakaram chichaawai” chíkich shuar turutainiatsuk. Kame imia wiki Papru Kristu anenkartutairijjají juna seatjarum tusan pujajai. <sup>2</sup>Atumí weatkamuriya shuar chichainiak “Papru ni tsaniakmarijjají ju nunkanam akupin ajastai tusar wakeruiniak jintintiaiawai” turutainia nuna kíishtumaktajtsan enentáimjai. Wisha atumijn jean kakaram chichaschataj tusan, nu antukairap tu seajrume. <sup>3</sup>Áentstanka nunkanmaya áentsuitji, túrasha jú áents maania aintsar máaniatsji. <sup>4</sup>Ju nunkanmaya nankejají máaniatsji antsu ii nankirí Yusa kakarmarinti. Nujají iwianchi kakarmari núpeteaji. <sup>5</sup>Ju nunkanmaya aentsu jintiamurínkia tura waantu enentáimtumamurínkia, Yus nekaatniun itit awajea nuka, nu nankejají núpeteaji. Tura ashí ju nunkanmaya enentáimsatin yapajniak, emetamu áintsan, Kristun umirkarat tusar nu nankejají núpeteaji. <sup>6</sup>Nekas umirkatin átum jeawakrumniñkia nuñkia umirkatniun tuke nakitiainia nu, Yusa kakarmarijají asutiáttaji, tajai.

<sup>7</sup>Atumsha aya pátatek ana nu iiyarme. Wats, shuar nekas Krístunu ajasman nekamaka, núnisan winiasha Krístunuiti tu enentáimtursatniuiti. <sup>8</sup>Yusa kakarmarijají akupeaji tuke tákuncha natsaamatsjai. Nu kakarman atumin pénker jintintiatarum tusa Kristu suramsaitji. Kame atumin emesratniun suramsachuitji. <sup>9</sup>“Ni áarmarijají

awaktamkatajtsa wakerutmaji” tátsurpash. Núchaiti. <sup>10</sup>“Papru áarmari ti kakaram áiniawai, tura juí pujak kakarmachuiti; tura etserkatniuncha nékatsui” turutainiawai. <sup>11</sup>Wats, tuinia nuka junasha nekaawarti. Yajá pujakur kakaram áajinia núnisrik atumjai pujakrishá kakaram túrattaji.

<sup>12</sup>“Wiki imiá péñkeraitjai” tuinia nujai méteketji tátsuji. Ní shuaraitji tátsuji. Warí, niisha imia niñki nekapmamainiawai. Tura ni aī ísar “nu nankaamas péñkeraitjai” tu wéenawai. Nuna túruiniak netse túruiniawai. <sup>13</sup>Antsu iikia, ii nekamatin jeajnia nú nankaamas waantu ajaschattaji. Ii takastatjinia nuí Yus Niñki jintintramji. Nu arant wéatsji. Kame atumjin takastinian Yus tsañkatramkaitji. <sup>14</sup>Tuma asamtai, tájinia nu Yus tsañkatramka nú iniankas túratsji. Warí, iisha emka Kristu chichamejai atumjin jeachmakají. “Emka jeamji” tájinia nu ántar tátsuji. Kame Yus tsañkatramakrin jeamji. <sup>15</sup>Chíkich takasmanum iikia waantu enentáimtumasar, “ii takatrínti” tátsuji. Antsu yamá enentáimtarmenta nú nankaamas Yus enentáimtustarum tusar wakeraji. Nu túrakrumninkia atumjin tuke takasminiaitji. <sup>16</sup>Nuyasha chíkich takaana nuí takatsuk átum pujarmena nú arant pujuinia nusha Yus-Chicham ujaktaj tusar wakeraji. Nu túrar chíkich shuar takasma “íniuiti” tíchattaji.

<sup>17</sup>Tura péñker enentáimtumastaj tusa wakerakka, Yúsnaítjai tusa péñker enentáimtumasti. <sup>18</sup>Warí, niñki “péñkeraitjai” tumamna nuka anturkachminiaiti. Antsu Uunt “péñkeraiti” tana nú shuar nekas péñkeraiti.

### Ántar etserniun Papru áujmateawai

**11** <sup>1</sup>Waurua núnisnak chichastatjana nu anturtukaintrumeash. Ee, anturtuktarum tusan seajrume. <sup>2</sup>Atumniasha Krístunak anajmamtikrajrume. Tura nuwá chíkich áishmankan nékatsuk ni áishrijainkí nuatnaiya núnisrumek átum chikicha chichame umirtsuk aya ni chichamenkí umiakrumin Krístuí ejetaj tusan wakerajrume. Nuna túrataj tusan atumin akasmatajrume. Nu akasmaktinian Yus surusuiti. <sup>3</sup>Túrasha íwianch ni nekatairijiai emka nuwá Epan anañkamia nútiksan atumniasha Yusa jintiyá awajimtikramar Kristu aneashstinian enentáimtikramprarmatai anañkamu aīrum tusan tsuutajrume. <sup>4</sup>Warí, chíkich shuar Jesusnan nusháa éterkamujai táiniakuisha péñker ántarme. Tura nusháa wakan achikiam, nusháa chichamjai uwempramniaiti tu etserainiakuisha, nekasapitia tárume. <sup>5</sup>Kame “Yúsnumiá akatramu asar etserkatin imiá nékaitji” tuinia nujai nankaamas nékaitjai, tu enentáimjai. <sup>6</sup>Ti péñker chichastinian nékachiatnak winia nekaatairsha taamtsui. Núnaka ii túramurijiai tuke paant iniakmaji.

<sup>7</sup>“Akirkata” tútsuk Yus-Chichaman atumin ujakmajrumna nuí ¿tunáa túrajak? Átum ankant ajastarum tusan wikia pééjchach ajasu asan,

“etserkamunam akirkata” tíchamjarme. <sup>8</sup>Antsu atumin yáintaj tusan pujakun chíkich Yus-shuarnumiá kuítian suruiniakui achikmiajai. Nuna túran ni kuítrín emeentukmiajai. <sup>9</sup>Tura atumjají pujusan atsumaknasha atumniaka seachjarme. Masetúnianmayá Yus-shuar taar, wi atsummiajna nuna surusarmiayi. Nu tuma asamtai tájarme, seachjarme tura seashtatjarme. <sup>10</sup>Ashí Akaya nunkanam nuna ujaktinian suritrukchartatui. Nuna tákun Kristu nekasrijiaí tajai. <sup>11</sup>¿Urukamtai nuna taja? ¿Atumin aneachu asanak taja? Atsá. Aneajrumna nuna Yus nékawai. <sup>12</sup>Túrasha wi túrajna nuna tuke turu wétatjai. “Papru túrana núnisrik túraji” tuinia nuna tíarain tusan túrattajai. <sup>13</sup>Warí, niisha Yúsnumiá akatrachma ániawai. Anan̄kartin ániawai. “Kristu akatramurintji” tumá átaj tusar wekainiawai. <sup>14</sup>Nusha urukaku túmait tíchamniaiti. Warí, imia Satanáskesha “nayaimpinmayá akatramuitjai” tumá átaj tusa wekaatsuk. <sup>15</sup>Nuiñkia imia ni suntarisha péñkeran túrawai tumá atai tusar wekasachartinkiait; túrasha ni amuamurinkia tunáa túriarma nujai métek nekapmá asutiátin átatui.

### Papru wáitsamia nu

<sup>16</sup>Ataksha tájarme “wáurkaiti” tu enentáimtursacharti. Kame “wáurkaiti” tu enentáimturiatrumek, chichastin tsan̄katruktarum. Ishichik waantu enentáimtumastaj tusan wakerajai. <sup>17</sup>Tura waantu enentáimtumastaj tájana nu, Uunta tsan̄katramurijiaí tátsujai. Antsu waurka núnisnak chichaajai. <sup>18</sup>Untsurí ju nunkanam uunt ajasar ti waantu enentáimtumainiakui wisha ishichik waantu enentáimtumastajai. <sup>19</sup>Imiá nékayatrum waurka ainia nu shiir enentáimtusrum ánturearme. <sup>20</sup>Niisha atumin takamtikramainiakui, kasartamainiakui, atumí nérenniurí ajainiakui, yajauch chichartamainiakui, yapimin awattamainiakui ashí nu katsuntearme. <sup>21</sup>Natsamayatnak tájarme iikia nu túratin kakarmachuuji! Wats, niisha araanainiatsna nuna wisha araantatsjai. (Waurka núnisnak chichaajai.) <sup>22</sup>Niisha Iprú-shuar ániakuisha wisha núnisnak Iprú-shuaritjai. Israer-shuar ániakuisha wisha núnisnak Israer-shuaritjai. Apráama weetri ániakuisha pai, wisha núnisnak. <sup>23</sup>Kristu takarniurintji, tuiniawai. Wikia aujai nan̄kaamasaitjai. Kame nuna tákun waurka núnisnak chichaajai. Kame nijiaí nan̄kaamas takasuitjai; nijiaí nan̄kaamas asutiámuitjai; nijiaí nan̄kaamas sepunam en̄keamuitjai; ti núkap jániñkiamjai. <sup>24</sup>Israer-shuar chikichkí achirkacharmai. Antsu tímiajni sen̄ku jea achirkarmai. Tura emka achirkarmia nui awa-awatatkua trainta nuiwi ejeyarmiayi. Tura nu tímiajni sen̄ku jea achirkarmia nuisha nútiksana nujai métek awatturarmiayi. <sup>25</sup>Numijiaí menaintiú awatturarmai. Kayajaísha mantuatai tusar chikichkí tukurarmai, kanusha menaintiú wayamai wi en̄kempran wekaimiaj nui.



Tura nayaantsanam ajapén chikichik kashi nuĭ pujusan tsawarmajai tura nu tsawantcha tuke pujusmajai. <sup>26</sup>Ti nukap wekasaitjai. Tura entsá wekasan tsúumainian wáinkiaitjai. Tura kasa shuarjaisha, wíi shuarjaisha tura yajaya shuarjaisha tsúumainian wáinkiaitjai. Péprunmasha, kampuniunmasha, nayaantsanmasha tsúumainian wáinkiaitjai. Wait Yus-shuarsha yajauch awajtustaj tusar wakeriarmai. <sup>27</sup>Itiurchatnasha ti wáinkiaitjai; takatnasha ti takasuitjai. Ti untsurĭ kánutsuk pujusuitjai. Tsukamaknasha, kitiamaknasha wáitsaitjai. Ti ijiarmaitjai. Pushir táasmatai tsetsekrúĭ wáitsaitjai.

<sup>28</sup>Tura nuna nanĕkaamas, kaarka kijin júkitniua núnisnak Yus-shuar péñker wekainiawash tusan ashí tsawant ti enentáimsan pujajai. <sup>29</sup>Chikichik Yus-shuar kakarmachu pujakuĭ wisha kakarmachu nekapeajai. Shuar chikichan tunaanum ajuawarmatainkia wisha natsamakun kajekan wáitijai. <sup>30</sup>Maa, waantu chichastin ákuñkia, antsu winia kakarmachu awajtuinia nuna ujakan waantu ajasaintjai. <sup>31</sup>Yus, ii Uuntrĭ Jesukristu Aparĭ ana nu (ni naarĭ tuke shiir awajsamu atĭ) wi wáitratsjana nuna nékawai. <sup>32</sup>Tamasku péprunam pujajĭ nu nunĕkamaya akupin winia jinkiá juruktiaj tusa wakerak pepru tanish téntakma wáitirĭin suntaran apujсамиyi. Aretas uunt kapitĭán pujajĭ túramiayi. <sup>33</sup>Túrasha uunt chankinnium enĕketawar pepru aa tanishrĭ áñĕkamunam jĭiki itiararmiayi. Tu uwempramiyai.

### Papru wáinkiamia nu

**12** <sup>1</sup>Kame wiki shiir chicharmamsatniun nakítiajai. Túmayatnak íimiarjana nuna tura uunt Yus iniaktursamia nuna ujaktiniaitjarne. <sup>2</sup>Kristun umirin ana nú áishmanĕkan nékajai. Nu áishmanĭ jimiará nayaimpin nanĕkaikin menaintiúĭ nayaimpiniam junakniuiti. Nusha katurse uwĭ nanĕkaamasuiti. Kame ayashtiuk wakaashit, tura ayashtichu wakaashit. Núnaka nékatsjai; aya Yúsak nékawai. <sup>3</sup>Tura nekas junakniua núnaka nékajai. Ayashtiuk wakaashit, ayashtichu wakaashit, núnaka aya Yúsak nékawai. <sup>4</sup>Yus-shuara wakanĭ shiir pujutanium junakmiayi. Nuĭsha paant awajsachmin ana nuna antukmiayi. Nii antukmia nú chicham paant awajsatniun suritkiamuiti. <sup>5</sup>Nu áishmanĕka túrunamurĭ nanĕkaamakuiti tajai. Tura wikia nanĕkaamakuitjai túmamtsuk, kakarmachuitjiana nuna paant ujaajai. <sup>6</sup>Nanĕkaamakuitjai túmamtiaj tusan wakeraknaka nekas tímĭniaitjai, ántran tíchaintjai. Túrasha túratsjai. Winia túramuruk wáinkiarum winia chichampruk antukrum, waritia enentáimsarum nujajĭ métek enentáimtursatarum tusan wakerajai.

<sup>7</sup>Wi nayaimpiniam wáinkiamajna nu timiá péñker asamtai ántar waantu enentáimtumaschatniun, janĕki mesertinia núnisanĭ winia ayashruĭ najaimiatniun sunasmiajai. Nuka wi wáitsatin Satanásnumĭa

akupkamuiti. <sup>8</sup>Nuka jurutkitia tusan Úntan menaintiú seamjai. <sup>9</sup>Tuma ain Uunt winia turutmiai “Atsá. Jaa pujayatmek winia waitnenkartutairjai shiir pujame. Shuar kakarmachun winia kakarmarun Wi suakui ashí aents nu shuara ayashijn winia kakarmarun wáiniainiawai.” Tuma asamtai, Kristu kakarmari winia ayashruj paant ati tusan kakarmachuitiatnak araantatsjai. <sup>10</sup>Tuma asamtai, wi Krístun aneakui shuar katsekruiakuisha, kajertuiniakuisha, winia kuítrusha, kakarmarsha atsain warajai. Kame ashí itiurchat ana nui kakarmachuitiatnak kakaram nekafejai.

<sup>11</sup>Wi “pénkeraitjai” túmankun waurua núnisnak chichaajai. Tura atumsha winia péñker chichartusminiaitiatrumek, túrachu asakrumin tu chichasjai. Warí, wi penké ántraiiatnak, “ti péñker akatramuitji” tumamainia nú nunkaachichuitjai. <sup>12</sup>Atumjai pujumiaj nui, itiurchat ámanman katsuntran takasmiajai. Yuska ni kakarmarin iniakmastaj tusa ti uuntan aents tujintiamun túratniun surusmiayi. Nujai “Papru nekas winia akatramuruiti” tusa paant iniakmasmiayi. <sup>13</sup>Warí, chíkich Yusshuaran yáinmiaj núnisnak atumniasha yáinmajrume. Áyatik atumin “kuit surusta” tíchamjarne. ¡Nu yajauchiitkiuinikia tsankurturtarum!

#### Papru atak tátinrin ujakmiania nu

<sup>14</sup>Jújaínkia menaintiú iwiarnarjai atumin ístaj tusan. Tura jeaknaka, “etserkamun akirkatarum” tíchattajrume. Atumí kuítrin wakeratsjai. Antsu atumin wakerajrume. Warí, winia uchirchakaitrum. Uchisha aparín kuítian ikiauntukchatniuiti. Antsu aparí ni uchirín kuítian ikiauntuktiniaiti. <sup>15</sup>Atumniasha yáintaj tusan ashí takakjana juna ajapawaintjai, tura winia kakarmarnasha ashí emenkákaintjai. Wi ti wakeramaitiatrum átumka ishichik wakerutarminiñ túrawaintjai.

<sup>16</sup>Túrasha chíkich shuar chichainiak “Nekasaiti; Papru niníi ii kuítrin jurutramkichmaji. Túrasha anankartuatniun neka asa in anankramachmiashia” turutainiatsuk. <sup>17</sup>¿Nusha itiura? ¿Shuáran wi akupkamaj nujai kuítrumin achikjak? <sup>18</sup>Atumin írmasat tusan Titiun “wetá” tímiajai. Tura nin atamprit tusan chíkich Yusshuaran akupkamjai. ¿Titiusha kuítrumin juruttramkimkiarum? ¿Wisha niisha mai metek enentáimsar métek takaschamkají?

<sup>19</sup>¿Warí enentáimsarum? ¿Átum péñker ániawai turutik tusar nu tájik? Antsu, aneamu yatsurtiram, ii tájinia nu atumin Yúsnum ikiakártajrum tusar taji. <sup>20</sup>Wi atumiñ jeaknasha, wi wáitkiataj tusan wakeraj nuna wáinkiashtatjai, tu enentáimsan itiurchat enentáimjai. Tura atumsha wakerarmena núnisrumek wáinkiashtatrume, tu enentáimjai. Yajauch chicharnaikiatniuncha, yajauch enentáimtunaistinniasha, kajernaikiatniuncha, niníi enentáimtumastinniasha, tsanumpratniuncha, mái-tunai ajatniuncha, waantu enentáimtumastinniasha, yajauch

wekasatniuncha, ashí nuna wáinkiashtajash tusan itiurchat enentáimjai.

<sup>21</sup>Tura wi jeaknasha, átum yajauch túratniusha, tsanirmatniusha tura yajauch ti wakerarmena nu, yaunchu túriniarmena nu, untsurí shuártiram iniaisachurmena nuna nekashtajash. Tura enentáim yapajítsuk tuke tura asakrumin útchatjash tajai. Kame wi átum umikchamun nekaamtai Yus winia iniatsátrattawai tusan tsúumajai.

**13** <sup>1</sup>Jujají menaintiú ístajrum tusan winiajai. Ashí iwiaratin ana nu, jimiará tura menaintiú shuara chichamejají iwiarnartatui.

<sup>2</sup>Wi atumjají pujachiatnak, atumjají pujáa núnisnak áatjarme. Yaunchu tunáa túrimiarmena nuna tura ashí shuártirmin wi nuik tímiajrumna nuna ataksha tájarme, wi atak tana tunaarum iwiareachkurminkia iniaisashtatjarme. <sup>3</sup>Nuñkia wi Kristu kakarmaríjjají chichaajna nu nekaattarme. Nu nekaataj tusarum wakeratsrumek. Tura Krístuka kakarmachuchuiti. Antsu atumí enentáin kakaram takaawai. <sup>4</sup>Kristu nekas kakarmachua nútiksañ krúsnum máamuitiat, Yusa kakarmaríjjají iwiaakuiti. Ayashnium Kristu kakarmachu nekapmia núnisrik iikia kakarmachuitji. Túrasha Yusa kakarmaríjjají ni takatrí takaají. Nu atumin iniakmastatji.

<sup>5</sup>“Nekas Yúsan umirniuashitiaj” tusarum nekamatarum. Ímiastarum. Ántar Yus-shuarchaitkiurmeka Jesukrístu atumí enentáin pujurtama nu nekaattarme. <sup>6</sup>Tura iikia ántar Yus-shuarchaitji nu nekaatarum tusan wakerajai. <sup>7</sup>Tura átum tunáa túrawáirum tusar Yus seaji. Aents in péñker enentáimtikramprat tusar tátsuji. “Ántar áiniawai” túramprinin, átum péñker wekasatarum tusar wakerají. <sup>8</sup>Warí, Yusa nekas chichamejají túraji. <sup>9</sup>Tuma asamtai, átum kakarmaitkiurminkia iikia kakarmachuitiatar shiir enentáimji. Atumsha nekas kakaram ajasúk tusar Yus tuke seaji. <sup>10</sup>Atumin emesratin Yuska winia akuptatsui. Antsu Yus akuptukuiti atumin ikiakártinian. Tuma asamtai, wi atumíin jeaknaka kakaram chicharkajjrum tusan winitsuk ju papin áatjarme.

### Amikmaawai

<sup>11</sup>Ayu, yatsurtiram, shiir pujustarum. Krístunam tuke kakaram ajastarum. Yus shiir enentáimtikramprarti. Chikichík enentáik enentáimsatarum. Shiir awajnaisarum pujustarum. Tura Yus anenmarmena nu, shiir enentáimtikramna nu atumjají pujurtamsattarme. <sup>12</sup>Yúsnum shiir enentáimtunaisrum amikmaanaisatarum. <sup>13</sup>Ashí Yus-shuar ainia nu amikmaatmarme. <sup>14</sup>Uunt Jesukrístu waitnenkartutairí, Yusa anenkrattairísha atumíin pujurtamsati. Tura Yusa Wakanísha tuke nemartamsarti. Nu atí.

# Papru

## KARASEANMAYA SHUARAN

### Papí aar akuptukma

---

#### Karaseamaya Yus-shuaran Papru áatramiania nu

**1** <sup>1</sup>Wi Pápruitjai, Yus akatramu. Yúsak winia akatturuiti. Shuarka akatturchamai. Yussha chíkich shuáran akupturak akatturchamai, antsu Nun̄ki, Yus Apa, Jesusan jakamunmaya iniantkimia nu, tura Jesussha winia akatturarmai Yusa shiir chichamen etserkatniun.

<sup>2</sup>Wisha, ashí Yus-shuar wíjjaī pujuinia nusha, ju papí akupeaji. Ashí Yus-shuar Karasea nun̄kanam pujarmena nu áuj̄satarum tusan ju papin akuptajrume.

<sup>3</sup>Yus Apa tura ii Uuntrī Jesukristusha waitnentramiania ásar yainmakarti imiatkinchanum tuke shiir pujustinian. <sup>4</sup>Yus ii Aparí̄ nuna wakera asamtai, Jesus ni ayash̄in surumak wáitsamiayi ii tunaarī asakártinian. Nuna tura ashí tunáa ju nun̄kanam ana nuyá̄ an̄kant awajtamsatai tusa in yáinmaji. <sup>5</sup>Tuma asamtai tuke Yus shiir atí. Ayu.

#### Chíkich uwempratin chichamka atsawai

<sup>6</sup>Maa, nekasaash timiá wárik Yus ikiukmiarum. Kristu in ti anenma asamtai Yus ni shuarī ajastinian in anaitiamkamji. Urukamtaitasuk nuikia imiá wárik ni chichamē inaisamarum nusháa chicham umikrum uwemprataj tusarum. <sup>7</sup>Wátsek, nekas chíkich chicham pen̄ké atsawai shuar umikiar uwempratin. Antsu yajayā shuar atum̄in taar pen̄kercha awajtamainiawai. Tura nusháa chichaman etserkar Yusa shiir chichamen yapajilatniun wakeruinaiwai. <sup>8</sup>Tuma asamtai Yus nin yajauchiniam yuminkrattawai. Wisha Yus-Chicham yapajíamun etserkamtain̄kia Yus

winia yumĩnkruurtatui. Nayaimpinmayā suntarsha nusháa chichaman wi etserkachmaj nuna étserkuĩnkia nunsha yumĩnkraatawai. <sup>9</sup>Paant ujakjarme túmaitiatnak ataksha ujaajrume: Nánkamas shuar niisháa uwempratin chichaman, wi etserkachmaj nuna étserkuĩnkia Yus yumĩnkraatawai.

<sup>10</sup>Ti kakaram chichaatsjak. Nuna chichaakun shuar shiir enentáimtursarti tusan chichaatsjai. Antsu Yus shiir enentáimtursarti tusan nuna tajai. ¿Shuar wakeruinia nuna enentáimsan chichaajak? Nuna enentáimkiunka Kristu wakera nuna umirkachaintjai.

### Papru júnis Yus akatramu ajasmiai

<sup>11</sup>Antsu nekaatarum, yatsuru. Uwempratin chichaman wi étserjana nuka áentsnumiānchuiti. <sup>12</sup>Aentska ujakkachmai. Unuitiutnasha unuitiurchamai. Antsu Jesukrístuk winia paant jintintruamai.

<sup>13</sup>Tura wi yáunchu ti yajauchin túramiáj nuka antukchakaitrum. Israer-shuar Yúsna takainia nútiksanak wisha takasmajai. Tuma asan Yus-shuaran ti kajerkan tuke pataatukmajai amuktaj tusan. Nusha nékarme. <sup>14</sup>Tura kakaram ajasan, ii uuntri yaunchu tiarmia nuna yawetsuk umiktinian ti enentáimpramjai. Tura untsurí shuaran wijíaj métek uunt armia nuna nankaamas Yúsna takasmajai. Túmaitiatan aya winia úuntrun chichamen ti umirniuyajai. <sup>15</sup>Túrasha wikia akiintsain Yus winia achirkamiayi, tura ti anenkratmaríjjai winia anaitiukmiayi. <sup>16</sup>Nuikia shiir enentáimiuk ni Uchirín paant nekamtikruamai. Tura Israer-shuarchanum ni shiir chichamen etserkat tusa akuptukmiayi. Tuma asamtai chíkich shuaran aniaschamjai. <sup>17</sup>Uunt péprunmasha, Jerusarénumka, wéchamjai winí emkaru Yus akatramujaj chichastinian. Antsu wárik Arapia nunkanam wémajai. Tura nuí Yúsna enentáimtasuan atak Tamasku péprunam waketkimjai. <sup>18</sup>Tura menaintiú uwí nankaasmatai, nuyá Pítrujaj áujmattsataj tusan Jerusarénum jeamjai. Tura jimiará semanachik pujusmajai Pítrujai. <sup>19</sup>Tura Jakupuncha, ii Uuntri Jesusa yachia nuna, wáinkiamjai. Nú arantka chikichnaka Yus akatramunka wáinkiachmajai. <sup>20</sup>Yus iirui. Wi tájana nu nekasaiti, wáitchaiti.

<sup>21</sup>Nú ukunmasha Siria nunkanmasha, Sirisia nunkanmasha wémajai. <sup>22</sup>Tuma asamtai ashí Yus-shuar Jutía nunkanam pujuarmia nu winia nekaracharmai. <sup>23</sup>Aya antukarmai. “Yaunchu in ti áintrammíaj nu yamaikia Yus-Chichaman étseruk wekaawai. Yáunchuka in amutmaktinian wakeriniaitiat yamaikia iniaisaiti” tiarmai. <sup>24</sup>Túrawar winia enentáimtursar Yúsna shiir yumĩnsarmai.

### Chíkich Yus akatramu Paprun shiir enentáimtuiniawai

**2** <sup>1</sup>Tura katurse uwí nankaasmatai wisha Pírnápíjjai Jerusarénum wémaji. Titiuncha jukimjai wijíaj. <sup>2</sup>Yus akupta

asantai Jerusarénum wémajai. Tura nuí jean aya Yus-shuara úuntriñiañ áujmattsamjai. “Júnisnak ashí Israer-shuarchan Yus-Chichaman ujainiajai” tímiajai. Takasmajna nusha tura tuke takastin enentáimjiana nusha ántar aín tusan tu áujmattsamjai. <sup>3</sup>Niisha Yus-shuara úuntriñtiat itiurchat enentáimpracharmai. Antsu chíkich shuarka Titiu Israer-shuarchaitiat wijiaí pujakui niisha Israer-shuar ajastí tusa tsupimiamtikiatniun wakeriarmai. Túrasha tujinkiarmai. <sup>4</sup>Tura nu shuar ántar yachi ániak antuktai tusar wayawarmai. Tura ii chichamen antukar itiurchat awájtámsatai tusar wakeriarmai. Iis, Kristu Jesus in uwentikrampra asantai ti shiir iisha Yus yúpichuch umíaji. Tura nuna nekaawar, atakka, aya yáunchu akupkamu itiurchat ana nujai uwentikrampratniun wakerutmakarmaji. <sup>5</sup>Túrasha penké ishichkisha umikchamji. Antsu atumíñ Yus-Chicham yapajniátsuk métek jeartamat tusar ni chichame penké anturkachmaji. <sup>6</sup>Nu arantcha Yus akatramu uuntriñkia yamaram túratniunka suruscharmái. Nincha ashí aents ti neka ainiawai tu enentáimtuiniawai. Kame nu shuar ti nékainiakuiisha ti enentáimtatsjai. Yus ashí shuaran mash métek iyatsuk. <sup>7</sup>Yus akatramu uuntriñsha Yus winia Israer-shuarchan Yus-chicham ujaktinian akuptukma nuna nekarawarmai. Tura Pítruncha akupkamai Israer-shuaran Yus-Chicham ujaktinian. <sup>8</sup>Pítrun Israer-shuarnum akupkama nú Yusak winiasha akuptukmai Israer-shuarchanum. <sup>9</sup>Tuma asantai Jakupusha, Pítrusha, Juansha, Yus akatramu uuntriñ ásar, Yus winia ti paant akuptan nekaawar, winiasha Pirnapínsha, “Ayu, átum, Israer-shuarchanum Yus-Chicham etserkatarum, tiarmai. Iisha Israer-shuarnum Yus-Chicham etserkattaji” tiarmai. Túrawarmatai shiir áujnaisar ii uwejejai achirnaikiamji métek enentáimji tusar<sup>1</sup>. <sup>10</sup>Áyatik “Kuítrincha enentáimtusrum tuke yáñtarum” tiarmai. Wisha núnaka ti wakerakun tuke túriniaitjai.

### Papru Pítrun chicharkamai

<sup>11</sup>Tura nú ukunam wi Antiukía péprunam pujain Pítiur tamai. Tura nuí yajauch túramtai, Yus-shuara úuntriñiak chicharkamjai. <sup>12</sup>Iis, Israer-shuar tuiniawai, “Israer-shuarcha Muisais timia núnisan tsupirnakcha asantai, nu shuarjai yurumáshtiniaiti” tuiniawai. Túmaitiat Pítiur yurumámñian nékak<sup>u</sup>, emka Sántiak shuar táatsañ Israer-shuarchajai yurumámai. Tura nuyá Sántiak shuar Jerusarénumiá Antiukíanam jeawarmatai Pítiur ashamak tsupirnakcha shuarnumiá kanakin yurumáchmai. “Tsupirnaktiniaitme” tiniu ainia nuna ashamak túramai.

<sup>13</sup>Tuma asantai chíkich Yus-shuar, Israer-shuar armia nu, Pítrujai métek emka yurumáwaru ániayat jimiará enentai takusar ukunam iniaisarmai. Pirnapísha neka áyat nútiksan nupetnakmai. <sup>14</sup>Tura nuna íisan ashí íimiainiañ Pítrun chicharkamjai. Yus Shiir Chicham tana nujai

métek wekasachu ásarmatai tímiajai “Ame Israer-shuaraitiatam Israer-shuarti ikiukim tsupirnakchajaj*í* yurumám Israer-shuarcha áintsamek túrame, tímiajai. Nuikia “Israer-shuarcha Israer-shuartijjaj*í* métek wekasatin ániawai” tiip” tímiajai.

**Israer-shuarsha Israer-shuarchasha mai métek  
Yúsán enentáimtusar uwemprartatui**

<sup>15</sup>Iikia nekas Israer-shuaraitji. Israer-shuarcha, tunáa ainia áaniuchuitji. <sup>16</sup>Túmaitiatar ju nékaji. Akupkamu umíamujaj*í* uwemprachminiatji antsu Jesukrístu nekas enentáimtakum uwemprattame. Nu nekaar iisha Jesukrístu nekas enentáimtusmaji tunaajaj*í*nchu atai tusar. Aya Kristu nekas enentáimtusar péñker átatji. Akupkamu takasar umirkarsha tuke nujaj*í* péñker ajaschattaji. Akupkamunka shuar umiktaj táyat, chikichkí shuarkesha nujaj*í* péñker ajaschamniaiti. Nu nekaar antsu Jesukrístu nekas enentáimtusmaji péñker ajastai tusar. <sup>17</sup>Tura Israer-shuar enentáimprashimpiash, “Wátsek, núnisaitkiuinqia wisha Krístun enentáimtustaj tákunka, emka tunáa shuaraitjai tu enentáimtumastiniaitjai” tíchanpiash. Nuka nekasaiti tura nuyá “Nu asamtai Kristu winia tunáa shuaran najataiti” penké tu enentáimprashiniaiti. <sup>18</sup>Antsu yaunchu, wi túrashtiniaitjai tímiaj nuna awaiñkin túratniuitjai tákunka nuikia nekas tunaitjai. <sup>19</sup>Iista, akupeamun umiktaj tukaman penké tujinkiamjai. Umiktinian tujinkian jaka áintsanak ajasmajai akupeamunam. Antsu Yusjaj*í* iwiaaku pujajai ni wakera nuna umiktinian. <sup>20</sup>Wisha Krístujaj*í* krúsnum jákaitjai. Tuma asamtai yamaikia wikia iwiaaktsujaj*í* wi wakeraj nuna túratniun antsu Kristu winí iwiaakui ni wakera nuna túratniun. Tura ju ayashnium pujayatan aya Kristu enentáimtakun iwiaakjai. Krístusha Yusa Uchiríntiat winia ti anentuk jarutkamiayi. <sup>21</sup>Yus ti péñker asamtai itiurak “Kristu ántar jakamiayi” títiaj. Iis, aya akupkamun umirkan péñker ajasminiaitkiuinqia, nuikia Kristu ántar jákaayi.

**Yus akupkamu tura Yus enentáimtustin**

**3** <sup>1</sup>¿Wariñ aa Karaseanmayatirmea. Waweamukaitrum netse enentáimprarum Yus tama umirkashtin. Kristu krúsnum máamun ti paant étserkun atumin iniaktuschkamkajrum? <sup>2</sup>Wátsek, aniastatjarne, enentáimpratarum. ¿Warijjaj*í*n Yusa Wakaní atumí enentáin achikmarum. Akupkamu umirkarmek enentáimin achikmarum, antsu Yus enentáimtusrum ni Wakaní achikchamkuram? <sup>3</sup>¿Tuke nétsekaitrum. Yusa Wakaní emka atumí enentáin wayá takasmatai atumek yamaikia nu takat aya ayashí kakarmarijjaj*í* umiktin enentáimprarmek. <sup>4</sup>Penké ánrarmek wáitsamarum tura antsu ishichkisha unuimiarchamkarum? <sup>5</sup>Naka enentáimpratarum. Yus ni Wakanín súrantsuk tura aents

túrachminian atumín ti takaatsuk. Átum aya akupkamun umirkurmin Yus nuna túrachuiti. Antsu ni chichame antukrum Yus enentáimtakrumin Yus nuna túraiti.

<sup>6</sup>Yaunchu ii uuntri Apraám enentáimpratai. Yus-Chicham nin tawai: “Apraám Yúsan enentáimtusmatai Yus “Ayu, pênkeraitme” tímiayi” tawai.

<sup>7</sup>Iis, nujai páantchakait. Ashí shuar Yúsan enentáimtuinia nuka Apraámjai métek enentáimpraru ásar, ni uchiría áintsan ajasaru ániawai. <sup>8</sup>Yamáí páantaiti. Yus ashí Israer-shuarchancha tawai “Aya winia enentáimtursarum pênker átratume”. Israer-shuarchasha nujai pênker ajastinia nuna ti yaunchu neka asa, Apraáman ujakmiayi, “Ámijjai ashí aents ti shiir ajasartatui.”

Tu ujakmiayi. <sup>9</sup>Tuma asamtai ashí shuar Yúsan enentáimtuinia nuke Apraámjai métek pênker ajasar shiir warasartatui.

<sup>10</sup>Antsu ashí shuar “akupkamun umirkan uwemprattajai” tuinia nuka yajauchiniam yumiñkramu ániawai. Yus-Papinium árchamukait “Ashí shuar Yus akupkamun ashí aarma nuna takamtsuk umirkachka yajauchiniam yumiñkramu ániawai.” Tu áarmaiti.

<sup>11</sup>Nújainkia páantaiti. Akupkamu umirkatniujai pênker ajaschamniaiti Yusjai, antsu aya Yus enentáimtusam pênker ajasam uwemprattame.

<sup>12</sup>Shuar akupkamu umirkatniun enentáimna nuka aya nujai pênker ajastinian enentáimui; Yúsan enentáimtak pênker ajastinian enentáimtsui.

<sup>13</sup>Tura Kristu yamaikia uwemtikrampramji. Akupkamun umirkachu yumiñkramuiti tana nuka in túramtsuji. Antsu Kristu in yainmaktin krúsnum jaka yumiñkramu ajasmiayi. Kame áarmaiti:

Shuar jakati tusa numiniam nenasma yumiñkramuiti.

<sup>14</sup>Tuma asamtai Jesukrístu jakamujai ashí Israer-shuarchasha Apraámjai métek pênker shiir warasartatui. Iisha núnisrik nu shuarjai Yusa Wakaní, Yus akupkataj timia nusha, achiktatji Yus enentáimtusar.

### Yus akupkamu tura Yus túrattana nu anajmarma

<sup>15-16</sup>Iis, yatsuru, Yus Apraáman Chichaman najana anajmatuk, “Ámijjai tura amée weeá akiinkiattana nujajisha ashí aents ti shiir ajasartatui” tímiayi.

Kame ‘amée weeá akiinkiartatna nujai’ tíchamiayi, antsu ‘akiintiatta nujai’ tímiayi. Nuna taku chikichik átinia nuna enentáimpramiayi. Nusha Krístuiti. Aentstisha enentáimpratai. Shuar chichaman najana tura papinium aar nuyá ni naari apujas nuikia nekas yapajítsuk umiktiniaiti. Umitsuk iniaisachminiaiti. Patattasha patattsachminiaiti.

<sup>17</sup>Wátsek, Yus núnisan Chichaman Apraámjai najana, ukunam umitsuk iniaisachminiaiti. Tura Chichaman najanamia nú ukunam, kuatru siantu



nuyá trainta (430) uwí nan̄kaasmatai, Yus ni akupkamur̄in Muisaisan susamiayi. Túramaitiat nuj̄aj̄i Yusa yaunchu Chichamen yapajíachmiayi iniaisatniun. <sup>18</sup>Tuma asamtai Yus timia nuka tuke uminkiattawai, Yus yaunchu Apraámj̄aj̄i Chichaman najana asamtai. Núj̄aj̄in̄kia páantaiti, péñker ajastajtsar akupkamu umikrikia shiir pujuschartat̄ji antsu Yus timia nuj̄aj̄i iikia takatsuk shiir pujustat̄ji. Nuna tsan̄katkamiayi Yus Apraámj̄aj̄i Chichaman najaneak<sup>4</sup>.

<sup>19</sup>“¿Nuikia Yus urukamtai akupkamun susamia?” tíchaintmeash. Ayu, Apraám weean, Kristu táatsain̄ Yus tímía nu uminkiachminiuyayi. Tuma asamtai nii táatsain̄ ashí tunaan túrawarmia nu timiá yajauchiiti tusa Yus akupkamun susamiayi. Tura Yusa suntarī j̄u akupkamun ashí iwarar Muisaisan susar akatrarmiaīyi Israer-shuaran susártí tusa. <sup>20</sup>Antsu chikichik shuar niñki takastinian enentáimkiun̄ka chikichan atsumatsui. Tura Yus aya chikichkiiti. Niñki chikichan akattsuk ashí aentsun Apraámj̄aj̄i péñker awajsatniun Apraáma anajmatar niij̄aj̄i Chichaman najanamiayi.

#### Yus akupkamu itiúrkáti

<sup>21</sup>“¿Tura Yus jimiará chichamj̄aj̄i chichaawak, tíchaintmeash. Emka Apraáman “Juj̄aj̄i uwemprattame” tíchamkia, nuyá Muisaisan ni akupkamur̄in súsachmakia?” tíchaintmeash. Tura áintsachuiti. Nekaata, akupkamu umirkatniuj̄aj̄i Yusj̄aj̄i tuke péñker pujusminiaitkiumka nuyá aya akupkamuj̄aj̄i uwempram tunaaj̄aj̄in̄chu ajasaintme. <sup>22</sup>Tura Yus-Chicham paant “Ashí tunáa áiniawai” tawai. Nu asamtai yamaikia ashí Jesukrístu enentáimtuinia nú shuar, aya Yus timiá asamtai, uwemprattatui. <sup>23</sup>Tura Kristu táatsain̄ Nin enentáimtuschan̄niauyayi. Tuma asamtai Nii táatsain̄ akupkamuka in emettama pujurtam̄ji aya akupkamu tana nu umirkatin. Tura ukunam j̄u nekanayi: Kristu enentáimtusar uwempratniuit̄ji. <sup>24</sup>Akupkamu, nuika, in waitmakm̄aji uchin kuírchin wainnia áintsan̄. Kristu tatí tusa waitmakm̄aji. Tura Kristu támatai ashí nekas Nin enentáimtuinia nuka Yús̄j̄aj̄i péñker áiniawai. <sup>25</sup>Yamáí Kristu nekas enentáimtustiniaiti tuma asamtai yamaikia akupkamu kuirchia áintsan̄ wáitmats̄ji. <sup>26</sup>Antsu Jesukrístu enentáimtusar, nuj̄aj̄i Yusa uchirí úuntmaru ajasuit̄ji. <sup>27</sup>Ashí Kristu náarīin imiaimiutirmeka Kristu áintsan̄ ajasuitrume. <sup>28</sup>Jesukrístuj̄aj̄i tsaniñkiu asar<sup>i</sup> imiá métek aji. Israer-shuar, Israer-shuar̄cha, ankant ainia nu, ankant̄cha ainia nu, áishman̄, nuw̄a, ashí mash Jesukristunuitkiun̄kia yamaikia “niishaaiti” tu enentáimprashtiniaiti. Ni shuarī mash chikichik áiniaji. <sup>29</sup>Tura Krístunuitkiurmeka Apraám weeá áintsan̄ ajasurme atumsha. Tuma asarum, Yus Apraáman anajmatramia nu atumsha jurumkitniuitrume.

**4**

<sup>1</sup>Kuítrinniu uchirí ashí ni aparí takakna nuna niiniu áhattawak ukunam. Tura uchichitkiun̄ka ni aparí takarniuriya núkete. <sup>2</sup>Tuke

uunt ajatsuk ni wáinnia nuna umirkatniuiti. Tura uunt ajasmatai tura ni aparí “Ayu” takui nuyá nii antsu ni aparíni ashí wáinkiatniuiti. <sup>3</sup>Núnisrik iisha úchichik asarkia ashí aentsu akupkamurí umirkatniuji. <sup>4</sup>Tura tsawant jeamtai, Yus ni Uchirín akupkamiayi ju nuñkanam. Niisha Yúsaitiat nuwanam akiiniamiayi. Tura aents ajasmiai. Tura aents ajas yaunchu akupkamuncha umirkatniuyayi. <sup>5</sup>Nujai ashí aents akupkamun umirkatin armia nuna uwentikrataj tusa támiayi. Tura iisha yamaikia nujai ni uchirí uunt ajasminiaitji. <sup>6</sup>Atumsha nekas ni uchirí ajasakrumin Yus ni Uchirí Wakanin atumi enentáin akupturmakuiti. Tura nu Wakan atumí enentáiya Yúsán “Aparú” tawai. <sup>7</sup>Tuma asamtai yamaikia aya takarniuchuitme antsu Yus ni uchirín najatmaiti ámin. Tura ni uchirí asakmin ashí Yus takakna nuna amastatui Krístuiyan.

### Papru nu Yus-shuaran yáintinian wakerawai

<sup>8</sup>Yaunchu átum nekas Yus nékachkuram, ántar-yus írunna nu umirkamarme nekascha yúsak. <sup>9</sup>Tura yamaikia nekas Yus nékarme, kame Yus atumin nekarmarme. Núnis asamtai itiuksuk atak aentsu akupkamurí umirkatin enentáimprum. Nujai kakaram ajaschamniaitme tura umikmesha yainmakchattawai uwempratin. <sup>10</sup>Átumka jísat ti najanearme. Yaunchu jísat najanatin amia nú tsawantcha, nantusha, uwisha, jísat tuke najanearme Yus shiir enentáimtursati tusarum. <sup>11</sup>Ashamajai, atumíin ántrankeash takasmaj tusan. <sup>12</sup>Yatsuru, wi atumea áintsanak ajaschamkaj; atumsha yamaikia wi wekaajna áintsarmek wekasatarum. Wi nui pujakui ishichkisha yajauch awajtuscharmarme. <sup>13</sup>Antsu nekarmarme ayashruj itiuksat pujayatan Yusa shiir chichamen emka ujakmajrume. <sup>14</sup>Tura winia sunkur ti yajauch awajtaiñ atum winia nakitrurum muñrukchamarme, antsu Yusa suntaríá áintsarmek itiamarmarme. Jesukrístu anturkatniua áintsarum anturtukmarme. <sup>15</sup>Maa, wi nékajai, nuik atumí jimi ukuinkiarum surusaarme, túramniaitkiurmeka. Tura shiir enentáimprarmena nusha itiuksukait yamaisha. <sup>16</sup>Yamaikia nekas chichaman étserkun ¿atumí nemasrj ajasjak? <sup>17</sup>Chíkich yajaya taaru ti shiir awajtamainiawai tura atumin yainmaktasa áitkiarmainiatsui. Aya winíya akantamkitiai tusa wakerutmainiawai, winia antsu shiir enentáimtursat tusar. <sup>18</sup>Niisha nekas yainmaktinian wakerutmainiakka atumin shiir awajtamsatin tuke péñker ainti, wi atumjai pujainsha tura pujatsainsha. <sup>19</sup>Uchirú, nuwá jurertaj tana núnisnak ataksha wáitiajai Krístu atumíin paant atí tusan. <sup>20</sup>Atumjai pujaknaka maak aintjai. Yamái pujaknaka nekas nushaa chichasaintjarme. Itiuksatjarmetsuk nékatsjai.

### Akarsha, Sarasha jimiará Chichaman nakumainiawai

<sup>21</sup>Ayu, “akupkamu umirkatniuiti” támena nu nekaata; akupkamuka júnisaiti. <sup>22-23</sup>Aarma awai: Apraám jimiará uchirtiniuyayi. Emka

ni takarniurĭ jurermiayi Ismaeran. Nuyá Apraáma nuwĕ jurermiayi Isakan. Ismaera nukurĭ Apraáma takarniuriyayi. Tura Apraám Yusan enentáimtutsuk niijĭajĭ kanarmatai, ni takarniurĭ jurermiayi. Tura antsu Isaka nukurĭnkia takarniurĭinchuyayi, antsu nekas ni nuwĕ áuyayi. Niisha ti úntchiniak, Yus “jurertatme’ tímiayi. Tuma asamtai Yus timiajajĭ Isakan jurermiayi. <sup>24</sup>Ayu. Yamái tájana nuka Yusa Chichamen jímiaran nakumui. Ismaera nukurĭ Akar chikichik Chichaman nakumui. Yaunchu Senái muranam Yus ni akupkamurĭn áarmiayi Israer-shuar, takarniua áintsanĭ, umirkarti tusa. <sup>25</sup>Senái murasha Akara nunĭke Arapianam wajaawai. Akarsha Senái muran nakumak, ashí Israer-shuaran “Akupkamujajĭ uwempramniaiti” tuinia nuna nakumui. Yamaisha Israer-shuara uuntrĭ Jerusarénnun pujuinia nuka tu chichainiawai. Tuma asamtai Akarsha, ashí nu shuarsha núnisar, akupkamu umirkatin ásar, ti takarniu áintsanĭ wáitsar takainiawai. <sup>26</sup>Antsu ashí Yus-shuarti uwempra asar imiankas anĭkant pujajĭ. Nayaimpinmayaĭ Jerusarénnumiá áentsuitĭji. Nuyá áentsti tuke anĭkant pujuiniaji. Nuyá aents asakrin, nu yakiya Jerusaréńka ii nukurĭa áintsanĭ enentáimpramniaiti. <sup>27</sup>Junis áarmaiti:

Warasta, misurma, uchi takakchiatmek;

Ti shiir warasta, uchí najawĕ nékachiatmek.

Nuwá ajapamu uchin jurertatui;

Nuwá áishrinnia núnaka nanĭkaamas uchirtin átatui.

<sup>28</sup>Iisha, yatsuru, Isaka áintsar<sup>1</sup>, Yus timiajajĭ akiiniatĭji. <sup>29</sup>Yaunchu Ismaer Isakan kajerak itirchat awajsamiayi. Núnisanĭ yamaisha Ismaera áintsanĭ aya ayashnumiá ainia nú aents Yusa Wakaníya akiinia nuna yajauch awajenawai. <sup>30</sup>Tura Yus-Papinium áarmaiti:

“Takarniusha, ni uchirĭjĭajĭ, ajapam awemata. Nekas péńker nuwá uchirĭjĭajĭ tsaniĭ pujuschamniaiti. Aparĭ kuĭtrĭncha achikchamniaiti,” tawai Yus-Papí.

<sup>31</sup>Ayu, yatsuru, nekaatarum. Takarniu uchirĭnchuitĭji antsu anĭkant pujajĭ nekas péńker nuwá uchirĭ asar<sup>1</sup>.

#### Yusjajĭ tuke anĭkant atarum

**5** <sup>1</sup>Kristu uwemtikrampramiaiĭji tuke anĭkant átinian. Tuma asamtai kakaram ajasam tuke anĭkant pujustá. Ataksha nu itirchatnum waketkip.

<sup>2</sup>Wi Papru asan ujaajrume. Átum Muisais timia núnisrumek tsupirnakrumnińkia ĩKristu nuikia warĭ itirtamkamniat?

<sup>3</sup>Ataksha tájarne, ashí tsupirnakua nu shuar ashí Muisais timia nuna takamtsuk umirkatniuiti. <sup>4</sup>Atum “Akupkamu umíakmin Yus shiir enentáimturmastatui” tárumna nu, nu shuartiram Krístuiyaĭ tupanĭniuitrume. Yusa anenĭkrattairiyaĭ kanakniurme. <sup>5</sup>Iikia, antsu, Yusa Wakanĭjĭajĭ tura Yus enentáimtakrin Yus shiir enentáimturmastatĭji, tu

enentáimji. <sup>6</sup>Nekas Krístunuitkiurkia tsupirnaktin atsumatsji. Antsu aya Yus nekas enentáimtakur ashí anenaitniuitji.

<sup>7</sup>Atumsha Krístujai péñker wekaimiarme. ¿Urukamtai nekas Yus timia nu iniaisatin enentáimprum ataksha akupkamunam waketkitin? <sup>8</sup>Nú enentai Yúsaiyanchuiti. Nijijai wekasatniunka Yus achirmakuitrume. <sup>9</sup>Ju enentáimpratarum: Karía ishichik yuminnium enketam mash<sup>i</sup> karimtiktsuk. Aneartarum atumsha. <sup>10</sup>Ayu, Yus yáinmakrumin wi tájana nu nusháa enentáimprashtratume, nékajai. Tura atumin yajauch áujmatramainia nuna Yus asutiáttawai páchitsuk.

<sup>11</sup>Wíkia, yatsuru, yamaisha “tsupirnaktiniaiti” tuke tákuin̄kia Israer-shuar yajauch awajtuscharainti. Antsu Kristu jakamun étsereatnak “tsupirnaktiniaiti” tákuin̄kia kajertukcharainti. <sup>12</sup>Atumin yajauch awajtamsatin wakeruiniana nú shuar antsu niñki tsupimiakar yajauch awajmamsarti.

<sup>13</sup>Atumniasha, yatsuru, Kristu tuke an̄kant awajtamsarme. Tura an̄kant ajasrum, “Aya wi wakerajna nuna túramniaitjai” tu enentáimprairap. Antsu nuámtak aneniakrum péñker yáiniáiktarum. <sup>14</sup>Ju chichamjai ashí akupkamu mash uminkiatawai: Ame ayashim aneamna áintsamek chíkich shuarsha aneata. <sup>15</sup>Tura aneartarum. Aneniachkurmeka, antsu esanairum mai yunai ajakrumka nuámtak amunaiktatume.

### **Ayash wakeramu tura Yusa Wakaní wakeramu**

<sup>16</sup>Juna tájarme: Atumí ayashi wakerana nu umikijai tusarum Yusa Wakaní kakarmarjijai wekasatarum. <sup>17</sup>Yusa Wakaní wakera nuna ame ayashim nakitiawai. Tura ame ayashim wakerana núnaka Yusa Wakaní nakitiawai. Mai maanai ajainiawai. Túmaitkui péñker wekasataj tukamam tujintiame. Páantchakait. <sup>18</sup>Tura Yusa Wakaní jintinramkuin̄kia, aentsu akupkamurijijai itit áchattame.

<sup>19</sup>Wats, ayash túramu ti paant áiniawai. Ju áiniawai: tsanirmatin, wapik túratin, yajauch túratin, <sup>20</sup>ántar-yus ainia nu tikishmatratin, wawekratatin, nemasnaikiatin, katsumnaikiatin, akasmaktin, wari kajektin, nan̄kaamantu enentáimtumastin, aya niisháa niisháa enentáimsartin, níniunak íistin, <sup>21</sup>yajauch enentáimtunaistin, man̄kartuatin, nampektin, nampernum aya ti yurumin, tura ti nampen átin. Chíkich nujai métek áiniawai. Nuik ujakmajrumna núnisnak ataksha tájarme: Shuar nuna túrakka Yusai pujustinian pen̄ké tujinkiattawai.

<sup>22</sup>Ayu, yamaikia Yusa Wakaní kakarmarjijai túratin enentáimsatai. Yusa Wakaní ii enentáin pujak, péñker túratniun nerektinia áintsan̄ neremtikramji. Ju áiniawai: aneatin, shiir enentáimsatin, Yusjai tura shuarjai nawamnaikiar wekasatin, shiir enentáijjai katsuñtratin, chíkich shuar shiir awajsatin, tsan̄ka átin, tana nuna tímiatrusan̄ umiktin, <sup>23</sup>péejchach ajastin, iik íimiasar tunáa túrashtin. ¿Ju túratniuncha yaki

surimia? <sup>24</sup>Shuar Jesukrístunu ainia nu, ni ayashí wakeramuríncha tura nunisañ ni túramuríncha surimiak wekaawai. Ni ayashí krúsnum maantniua áintsañ túraiti.

<sup>25</sup>Yusa Wakaní kakarmarijijai Yus-shuar ajasu asar, núnisrik Yusa Wakaní kakarmarijijain wekasatai. <sup>26</sup>“Wats, nekapnaisatai. Wi imiá péñkeraitjai” nuámtak túnaisuk, yajauch enentáimtunáischatniuiti.

### Yáinniaiktarum

**6** <sup>1</sup>Túrasha, yatsuru, Yus-shuar tunáa túrashtimpiash. Atumsha nekas Yusjai wekaarumna nu, nu wáinkiumeka, yátsum Yusjai iwiarat tusarum yáintárum. Tura nankaamantu enentáimtumatsuk túratarum. Tura amesha nekamata. Tunaanum iniarajij tusam anearam wekasata. <sup>2</sup>Káarak kijin akui nuámtak yáiniaiktin átsuk. Núnisrumek atumsha, itiurchatrí akui nuámtak yáiniaiktarum. Túrakrumka Kristu akupeamurí umíarme.

<sup>3</sup>Shuar tujintiyat “nankaamantuitjai” tákuñka ananmamui. <sup>4</sup>Shuar ní túramuríniak enentáimtumastiniaiti. Níniunak enentáimtumakuiníquia tura péñkeraitkiuiníquia chikicha túramurí iirtsuk, antsu níniun péñker iis wararsattawai. <sup>5</sup>Iis, ashí ní káarkariniak júkishtinkiaiti.

<sup>6</sup>Shuar Yus-Chichaman unuimiatna nu, nu shuar nin jintíana nuna ashí takakna nujai yáintí.

<sup>7</sup>Ananmamawairap. Shuar Yúsan anankatniun tujintiawai. Ame araamna nuna nereñ júuktatme. Chíkich nere áchattawai. Atumi enentáincha núniskete. <sup>8</sup>Iista. Shuar ni ayashí wakeramunak tuke enentáimtakka, jatai nerea áintsañ araaiti. Nerekmatai jákatniun júuktatui. Tura Yusa Wakaní wakera nuna tuke enentáimtakka Yusjai tuke shiir pujustinian júuktatui. <sup>9</sup>Nu asamtai péñker túratin yawetkishtiniaiti. Tura pimpitsuk takasar júuktin tsawant jeamtai, páchitsuk júuktatji. <sup>10</sup>Tuma asamtai yáinmin ákuiníquia ii jeajnia nu túratniuitji nekaska ii yachí yáiníkiartin, Yus-shuar ainia nu. Tura ashí shuarsha yáintinaiti.

### Jesukrístunu ajasar yamaram akiiniatin nekas péñkeraiti

<sup>11</sup>Íimsakua, winia uwejruijai urutá uuntna áatjarum. <sup>12</sup>“Nekas tuke tsupirnaktiniaitme” tuinia nuka áyatik shuar shiir enentáimtursartí tusa tuiniawai. Kristu krúsnum jakamun étsereakuiníquia itiurchat awajtusarajin tusar “tsupirnaktiniaitme” tuiniawai. Shuar “ashí akupkamun umiktajai” tusa, Muisais timia núnisañ tsupirnaktiniaiti. <sup>13</sup>Pai. Tura nú shuar tsupirnaku áiniayat ashí akupkamun umiiniatsui. Muisais timia nuna ajapén ikiuiniawai. Túmaitiat tsupirnaku tusa wakerutmainiawai. Áyatik atumin “Pai, niisha tsupimiatiakji” titiai tusar wakerutmainiawai. <sup>14</sup>Wikia, antsu, aya ii uuntri Jesukrístu

krúsnum jakamunak wararsatniun enentáimjai. Tu enentáimkiun Kristu krúsnum jakamia áintsanak jū nun̄kanmaya ana nuna jaka áintsan páchiatsjai; tunaanum winia útsutkatin atsawai. <sup>15</sup>Krístunu ajasrikia tsupirnaktincha tsupirnakchaitkiursha mai ántraiti antsu yamaram akiiniatin nekas pénkeraiti. <sup>16</sup>Ashí nekas Yus-shuaran, wi tájana nujai métek wekainia nuna, Yus shiir enentáimias yáinti tuke shiir pujustinian.

<sup>17</sup>Yamaikia itiurchat najatawarain̄. Jesusa takatri takaakui asutiawarma paant ayashruj chimikma írunui.

<sup>18</sup>Yatsuru, ii uuntri Jesukrístu atumin shiir yainmakarti. Nuke atí.

# Papru

## IPISIUNMAYA SHUARAN

### papí akuptukma

---

**Ipisiunmaya Yus-shuaran Papru áatramiania nu**

**1** <sup>1</sup>Yus nuna wakerakui Jesukrístu akatramuitjai. Jesukrístu nekas enentáimtusrum Yus-shuar ajasrum Ipisiunam pujarmena nuna ju papin áatjarne. <sup>2</sup>Yus ii Aparísha tura ii Uuntrí Jesukrístusha waitnentrainia ásar imiatkinchanum shiir pujustinian yainmakarti.

**Krístujají tsaniñkiu asakrin Yus ti shiira nuna tsan̄katramji**

<sup>3</sup>Ii Uuntrí Jesukrístu Aparí Yus nekas shiir awajtustiniaiti. Iisha Krístujají tsaniñkiu asar ii enentáin ashí nayaimpinmaya ana nujají warasminiaitji. Túmaitkiui Yus nu waratain ashí suramsaitji. <sup>4</sup>Krístujají uwemprar ti shiir tunaajajin̄chu Nijjijají pujusarat tusa Yus, ju nun̄ka atsaish̄a, anaitiamkamiaji. <sup>5</sup>Yámankamtaiksha incha ti anenmak Jesukrístu túrunamujají ni uchirí ajasat tusa wakerutmakmiaji. <sup>6</sup>Ni aneamu Uchirijají tsaniñkiu asakrin nekas ti anenmaji. Nu enentáimsar ti shiir awajsatniuitji. <sup>7</sup>Yus ti anenmakrin ni aneamu Uchirí numpé puarmatai, nu jakamujají ii tunaarín akikmatramak uwemtikrampraitji. <sup>8</sup>Tura ti anenmak ni enentáimtairín tura nekatairíncha suramsamajiaji. <sup>9</sup>Nujají shiir enentáimturmak in uwemtikrampratniun wakerutmakmiaj nuna, yaunchu nekaachman, yamá paant awajturmajiaji. <sup>10</sup>Ashí jú nun̄kanam írúnna nunasha tura nayaimpiniam írúnna nunasha Kristu ashí akupin ati tusa Yus tsan̄katkattawai. Nunasha Yus yaunchu enentáimturú asamtai tsawant jeamtai ashí uminkiaítawai.

<sup>11</sup>Iisha Krístujají tsaniñkiu asakrin Yus yaunchu achirmakmiaji ashí Niiniu ana nuna tsan̄katramkatniun. Nunasha, ashí Nii túrana núnisan̄, aya Nii wakera asa túramiayi.

<sup>12</sup>Iikia Israer-shuar asar Kristu emka umirkakrin in imiá pénker túrutmamun nekaawar ashí shuar Yúsan ti shiir awajsamin ániawai. <sup>13</sup>Núnisan atumsha nekas uwempratin chicham antukrum Kristu nekas enentáimtusurme. Túrarum Kristu-shuar ajasakrumin Yus ni shiir Wakanin akuptuktaj timia nuna akupturmakmai. Nuna tura “nekas Wíi shuaraitrume” tawai. <sup>14</sup>Yamáí Yusa Wakani ii enentáin pujuruk tuke uwemtikramji. Tura takas umik nu tsawantai ashí tsankatramkattaji. Tura ii enentáin pujá asantai Yus ukunam Nijjiaisha ashí tsankatramkattaj nu paant nékaji. Maa, Yus ti penker asantai Nin ashí ti shiir awajsarti.

### Papru Yus-shuaran áujtusmiania nu

<sup>15</sup>Átum ii Uuntri Jesukristu nekas enentáimtamuncha tura ashí Yus-shuarjai shiir awajnaiyamuncha antukjai. <sup>16</sup>Túran shiir enentáimkium Yúsan áujkun tuke yúmiñkijai. <sup>17</sup>Ii Uuntri Jesukristu Apari Yus ti shiir asantai Nin áujeakun ni Wakani ni nekatairin suramas ashí jintintramawarti tusan sejai. Nujai nuna nankaamas Yus nekaattarme. <sup>18</sup>Tura enentáimincha paant enentáimtikramprarti tusan sejai. Nujai shiir túrutmataj tusa achirmakuitrum nu nekaattarme. Nu arantcha imiá shíira nu, Yus ni shuarin ashí tsankatkattana nusha nekaattarme. <sup>19</sup>Nu arantcha Yus umirkurin ti kakaram tujincha asa in yáinmaj nu nekaattarme. Tura nu kakaram ti kakaram asantai <sup>20</sup>nujai Krístun jakamunmayá iniantkimiayi. Tura nayaimpiniam jukí ni untsuurini akupin pujutainium apujsamiayi. <sup>21</sup>Tura ashí ju nunkanam akupin ainia nújaisha tura ukunam nunka átatna nu akupin áminia nújaisha tura ashí akupin ainia nújaisha tura ashí naari nékamu ainia nujajisha Yus Krístun ashí nankaamas akupin najanamiayi. <sup>22</sup>Tura ashí írunna nu, Krístun umirkartin ániawai. Tura Yuska Krístunak ashí Yus-shuara Akupniuri awajsamiayi. Túramtai Kristu ni shuari muuké áintsankete. <sup>23</sup>Tura ashí nunkanam Yus-shuar ainia nu Kristu ayashí najanainiawai. Tura Kristu ashí ni ayashin pimiutkaiti tura nu arantcha ashí írunna nunasha pimiutkaiti.

### Yus anenma asa uwemtikramji

**2** <sup>1</sup>Átum yajauch túrakrum tunaanum tuke wekaakrum Yúsnumia kanakin asarum jákauyarme. <sup>2</sup>Nu tunaanum jú nunkanam pujuinia nujai métek tuke wekainiuyarme. Túrarum uunt iwianchi wakeramuri umirniuyarme. Uunt iwianch ashí Yúsan umirainiatsna nuna akatenawai. <sup>3</sup>Ashí iisha núnisrik yaunchu nu shuarjai métek ii ayashí wakerakmu umirniuyaji. Tura íi enentái wakeramusha umirniuyaji. Tuma asar tura tunaajai akiinia asar chíkich shuarjai métek ti kajernakmiaji. <sup>4</sup>Antsu Yus ti waitnenkartin asa in ti anenmamiaji. <sup>5</sup>Tuma asa ii tunaanum tuke jaka pujarnin Krístujai métek iwiaaku awajtamsamiaji. Aya ti anenkartin



asa uwentikrampramijai. <sup>6</sup>Tura Krístujají métek iniantamkimijai. Nuyá Jesukrístujají métek, akupin pujutainium yamaisha apujtamas tuke nupetkatniun tsan̄katramkaitji. <sup>7</sup>Nujají ni ti anen̄kratmarin̄cha tura Kristu túrunamujají waitnentrampmuncha tuke iniaktusmin átatui. <sup>8</sup>Jesukrístu nekas enentáimta asakrumin Yus waitnentramar uwentikrampraiti. Juka átumkeka túrunachuitrume. Antsu Yuska Nínki kuítchajají suramsaitrume. <sup>9</sup>Shuar ni takatríjjají uwempratniuitkiun̄ka nan̄kaamantu enentáimsainti winia kakarmarjají uwemprajai tusa. Nu enentáimsatniuka atsutí tusa Yuska átumka takaatsrumnin̄ uwempratniun suramsamiarme. <sup>10</sup>Yus najanamuitji. Kame Jesukrístujají tsan̄ákkrin̄ yamaram iwiaakman suramas tuke péñker túratniun najatmamji. Yáunchuk nuna enentáimturmasmijai.

### **Krístujají tsan̄in̄kiu asar shiir nawamnaikiar pujají**

<sup>11</sup>Nuik ámarum nu enentáimpratarum. Ashí Israer-shuar ni ayashín̄ tsupirnaku ásar ashí Israer-shuarchan, tsupirnakcha ániakui, pen̄ké Yúsnachua núnis enentáimtuiniawai. Tura atumsha Israer-shuarcha asakrumin “tsupirnakcha” turamniuyarme. <sup>12</sup>Nuik Krísturtin̄chauyarme. Israer-shuarcha asarum ashí ni túrutair̄isha tura ashí Yus nin̄ tsan̄katkarmasha nekaachuyarme. Tura jú nun̄kanmayá asarum nekas Yusa nu enentáimtichuyarme tura shiir pujustin̄ nán̄kamsarum enentáimpramarme. <sup>13</sup>Antsu yamaikia Krístujají tsan̄in̄kiu asarum, yaunchu Yusaíya yajá pujuwitiatrum, yamaikia Kristu numpé puármatai ni jarutramkamujají tántaitrume. <sup>14</sup>Israer-shuarjají Israer-shuarchajají nemasmanaikiar ajapén péen̄kramu ámijai. Tura Kristu nuna sáaki nawamnaimtikramkamijai. Tura chikichik shuar najatmamijai. <sup>15</sup>Nuik aya Israer-shuar Muisais akupkamu untsurí armia nuna umirkatin̄ ániak nujají chíkich shuarjají nemasmanainiarmiayi. Tura Kristu jaka nu akupkamun̄ ántar awajas chikichik shuar yamaram awajtamsamijai. <sup>16</sup>Núnisan̄ ámiayi. Kristu krúsnum jaka nemasjají mai apattamak chikichik awajtamas Yusjajisha nawamnaimtikramkamijai.

<sup>17</sup>Kristu taa nawamnaikiatniun chichaman Israer-shuaran ujakmiayi. Tura nu chichamnak atumin Yus nékachuyarmena nunasha ujaktinian akupkamiayi. <sup>18</sup>Yamaikia Israer-shuartisha tura Israer-shuarchasha mai metek Kristu túrunamujají tura Yusa Wakanī takaku asar Yusají jeatniuitji. <sup>19</sup>Tuma asamtai yamaikia chíkich shuarchaitrume, antsu ashí Yus-shuarjají métek ajasuitrume. Nekas Yusa shuarin̄trume.

<sup>20</sup>Átum uunt jeā jeamma núnisaitrume. Uunt jeā jeamtin̄, emka kaya apujtuktin̄iaiti jeā ti wewe atí tusa. Núnisan̄ yaunchu Yúsnan̄ etserniusha tura Kristu akatramur̄isha Yus-Chichaman etserainiak imiá nekas enentáimtustinia nuna apujtukarmiayi. Tura ashí nujají nan̄kaamas Jesukrístu enentáimtustiniaiti. <sup>21</sup>Jeā apujtukmarī Kristu asamtai Niī ti

penker ekeniar jea jeamnaki wéawai. Tura ii Uuntri Krístujai Yusa Jee ti shiir átatuí. <sup>22</sup>Núnisrumek atumsha Krístujai tsaniñkiu asarum átum ashí Yus-shuarjai Yusa Jeeya áintsan ajasuitrume. Tura Yusa Wakani ashí Yus-shuara enentáin pujú asamtai nekas Yusa Jeeente.

### Papru Israer-shuarchanum Yus-chichaman etserkatniuya nu

**3** <sup>1</sup>Nu asamtai atumin Israer-shuarchatirmin yáintaj tusan Jesukrístunu éterkun sepunam pujajai. <sup>2</sup>Yus anentak Yus-Chichaman atumin etserkatniun akatar akuptukuiti. Nu nékatsrumek. <sup>3</sup>Yus nuna túrutak yaunchu nekaachmancha paant awajtursamiayi. Núnaka ishichik áatraitjarne. <sup>4</sup>Nu áujsarum Krístunu yaunchu nekaachman yamaikia paant nékajna nu nekaattarme. <sup>5</sup>Nú chichaman yáunchusha chikichkinkesha ujankachmiayi. Túrasha yamaikia Yusa Wakani Kristu akatramuríncha etserniuríncha nu chichaman paant awajtusarai. <sup>6</sup>Nu chicham juiti: Uwempratin chichaman umirkar Israer-shuarcha Israer-shuarjai métek Krístujai tsaniñkiaru ásar chikichik shuar ajasartatuí. Tura nu arantcha Yus ni shuarin ashí shííran tsan̄katkatniun anajmatrama nuí métek pachiinkiertatuí. <sup>7</sup>Yus ni kakarmarijiaí winia yáintiuk tura ti anentu asa nu uwempratin chichaman etserkat tusa akatturmiayi. <sup>8</sup>Ashí Yus-shuarjai nan̄kaamas wi péñkercha aín Israer-shuarchanum shiir chichaman etserkat tusa Yus tsan̄katrukmiayi. Krístujain̄kia kuitjaj nan̄kaamas péñker, enentáimtustin jeatsjinia nu, takakji. Nusha ti shiir chichamaiti. <sup>9</sup>Yuska, ashí najana nu, nu enentáimmian yáunchusha etsertsuk yamaikia ashí shuar nu chichaman nekaawarat tusa winia akatturmiayi. <sup>10</sup>Yamaikia ashí nayaimpiniam pujuinia nuka Yus ni shuariin túrunamun ísar Yuska imiá neka asa ashí enentáimniua nuna paant nékainiawai. <sup>11</sup>Yus júnis túratniun yáunchuk enentáimpramiayi. Tura ii Uuntri Jesukrístujai mash uminkiamiayi. <sup>12</sup>Tura Krístujai Yusai yúpichuch jeaji. Tura Nin nekas enentáimtusar sapijmiatsuk Niin tantamniaitji. <sup>13</sup>Tuma asamtai tájarne, atumin yáintaj tusan sepunam pujakuí kúntuts enentáimprairap. Antsu nujai Yus atumin ti shiir awajtamkurmin átum warasuk tusan wakerajrume.

### Kristu ti anen̄kratniuiti

<sup>14</sup>Nu asamtai ii Uuntri Jesukrístu Aparín tikishmatran áujtajrume. <sup>15</sup>Ashí nayaimpinmasha tura nun̄kasha Yus-shuar ájinia nu nekas ni shuari áiniaji. <sup>16</sup>Yus ti kakaram asa ni Wakan̄jiaí atumí enentáin pujureak ashí ni kakarmariyan atumin suramsarat tusan áujtajrume. <sup>17</sup>Yus nekas enentáimtakrumin Kristu atumí enentáin pujusat tusan áujtajrume. Tuke yapajítsuk anen̄kratin átarum tusan áujtajrume. <sup>18</sup>Túrakrum ashí Yus-shuarjai Kristu anen̄krattairi nekaattarme. Imiá uunt asa nan̄kantsuk tuke amuukachminiaiti. <sup>19</sup>Nu anen̄krattai ashí

takamtsuk nekaachmin aḡn nekaatarum tusan áujtajrume. Nujaj̄ Yus takamtsuk pimiutramkattarme.

<sup>20</sup>Nekas Yus shiir awaj̄nasti. Ni ti kakaram asa ii seaj̄nia nuna nan̄kaamas tura enentáimprachminia nunasha nan̄kaamas iḡn pujurtamuk ashí túramniaiti. <sup>21</sup>Ashí Yus-shuarjaj̄sha tura Krístujaj̄sha Yusa pēnker̄i tuke paant wantinin atí. Yus tuke iniaitsuk shiir awaj̄nasti. Núnisan̄ atí.

### Yusa Wakan̄jjaj̄ tsaniḡkiar pujakur túratin

**4** <sup>1</sup>Atumsha ni shuar̄i ajastin Yus achikma asarum pēnker̄i wekasatarum tájarme. Ii Úuntriḡniun étserkun sepunam pujakun seaj̄rume. <sup>2</sup>Nekasmiancha ajasrum aneniakrum katsunnairatarum. <sup>3</sup>Yusa Wakan̄i chikichik shuar̄i awaj̄tamkurmin shiir awaj̄naisarum pujustarum. <sup>4</sup>Yusa Wakan̄kia chikichkiiti. Tura ashí métek Yus achikma asar métek Niijjaj̄ shiir pujustin enentáimji. Iisha Kristu ayashí ayashímkia asar chikichik ayashkiitji. <sup>5</sup>Ii Uuntriḡ chikichkiiti. Niḡki nekas enentáimtusar métek imiantiniaitji. <sup>6</sup>Chikichkiiti Yus, ashí Yus-shuarti ii Apar̄inti. Ashí akuptamniuitji. Ashí ni shuar̄iḡn pujak ii enentáin̄n pujurtamji. Ti nekas ashí mash, Israer-shuartisha Israer-shuarchasha, imiá chikichik ajasuitji.

<sup>7</sup>Tura chikichik chikichik niisháa shiir takastinian suramsaitji. Tura Kristu wakerimia núnisan̄ suramsaji. <sup>8</sup>Nu asamtai Yus-Papiniumsha tawai:

“Achikman jukí nayaimpiniam wakamiayi. Tura shuáran shíiran susamiayi.”

Tu áarmaiti.

<sup>9</sup>Tura “wakamiayi” tana nu ¿warintiua? Kristu nayaimpiniam pujá asa yakí wákan̄ka emka tárashtinkiait. Nekas nun̄ká taramiayi. <sup>10</sup>Niḡki ataksha nekas nayaimpiniam wakamiayi. Nuna tura asa ashí ni shuar̄iḡn pimiutkarmiayi. <sup>11</sup>Tura nujaj̄i chikichan akatramun awajsamiayi. Chikichnasha Yúsnan etserniun awajsamiayi. Chikichnasha uwempratin chichaman etserniun awajsamiayi. Chikichnasha Yus-shuara wáinniun awajsamiayi. Tura chikichnasha unuikiartinian awajsamiayi. <sup>12</sup>Túramtai ashí Yus-shuar̄i ni takatrijjaj̄i yáiniaikiar ti pēnker̄i shuar̄i ajainiakui Kristu ayashí takamtsuk katsuarartatui. <sup>13</sup>Nujaj̄i Yus nekas enentáimtamunam Yusa Uchirí ashí métekrak pēnker̄i nekaattaji. Nu túrakur katsukir Krístujaj̄i métek pēnker̄i ajastatji. <sup>14</sup>Tura uchía áintsar áchattaji. Úchikia ashí yamaram chichaman antukar wari yapaj̄iniawai. Tura anan̄kartinia chichamen̄ antukar waaku áiniawai. Kame nu anan̄kartin shuar̄i ti paant chichayatan̄ ni shiir chichamejjaj̄i anan̄katniun pujurenawai. <sup>15</sup>Antsu nekas aneniakur nekas chicham ujanaiktiniaitji. Túrar Krístujaj̄i tsaniḡkiar tuke tsakakir ashí pēnker̄i túratniujaj̄i Niijjaj̄i métek ajastatji. Krístuka ashí ni shuar̄i muuké áintsan̄kete. <sup>16</sup>Tuma asa ni ayashíḡn

wáinkiu ashí nuna muchitmarí péñker yáiniaikiar ashí ni túratniurín shiir takasartatui. Nujáí nu ayashnium muchitmarí chíkich chíkich péñker takainiak métekrak shiir tsakartatui. Tura anenainiakui nu ayashsha péñker úntmartatui.

### Kristujáí tsanínkiu asar yamaram iwiaakmanum wekaaji

<sup>17</sup>Ii Uuntri Kristu ímmianum júna akatjarne: Chíkich aents Yúsán nékachu ásar ántar ni enentáimmiajain wekainia núnisrum wekasairap.

<sup>18</sup>Ni enentáin kusuru ániak Yusna nuna nekaatniun wakeruiniatsui.

Tuma ásar shiir wekasatniun, Yus amaana nuna, nékainiatsui. <sup>19</sup>Nu arantcha, ni túramurijjáí natsamtichu ásar ti yajauchiniam surumakar ashí tunaan wararainiak túrin ániawai.

<sup>20</sup>Antsu átumka núnisrum enentáimtustin unuimiarchamarme. <sup>21</sup>Nekas Nii anturkaitkiurmeka tura Jesus nekas tama Kristu unuiniarmaitkiurmeka Nin shiir enentáimtustin unuimarmarme.

<sup>22</sup>Yaunchu enentáimtairmeka ayash wakeramu anañkramin ainia nujáí piaku asa imiá yajauchiiti.

Nu enentáimtairmesha yaunchu túrutairmesha ajapa iniaisatarum.

<sup>23</sup>Túrarum péñker enentáimsarum wakannium yapajátarum. <sup>24</sup>Tura yamaram enentáimtairam emetatarum. Nuka Yusjáí métek najanamu asa nekas péñker tura shiira nuna tuke túriniaiti.

<sup>25</sup>Nu asamtaí chikichik ayashi muchitmarí asarum wáitrutsuk nekas chicham chicharnaisatarum.

<sup>26</sup>Kajeakrum tunáa túrawairap. Tura nu kajekmasha tsawant takamtsuk áchatniuiti. <sup>27</sup>Uunt iwianch yajauch awajtamsatin tsañkatkaip.

<sup>28</sup>Kasasha kasamtsuk kakaram takakmasti. Tura ni uwejéjái péñker takaak atsumainia nú shuarnasha susati.

<sup>29</sup>Muijmiai chicham chichasairap. Antsu chichastin akui péñker chicham, chíkich shuar péñker awajsamnia nu chichastarum. Anturtuinia nuna yáintaj tusarum nu chicham ujaktarum. <sup>30</sup>Yusa Shiir Wakaní kúntuts awajsairap. Warí, Yúsnaiti tusa pujurtamji. Tura pujurtamuk takamtsuk uwemtikramprattaji.

<sup>31</sup>Ashí yajauch ana nuyá kanaktiarum. Nakitratniusha, kajernaikiatniusha, tura kakantrar charáa charáa ajatniusha, katsekmaktincha, tsanumpratniusha mash atsutí. <sup>32</sup>Antsu shiir awajkartin ajasrum waitnennairarum, Kristu jakamujáí Yus atumí tunaarin tsañkurtampra nútiksarmek tsañkurnairatarum.

### Yus-shuar túratin

**5** <sup>1</sup>Nekas Yusa Uchirí aneamu asarum Nii tura núnis túratin wakeruktarum. <sup>2</sup>Kristu in anenmaj núnisrum anenaitiarum. Kame ii tunaarin akikmaktaj tusa jákatniunam surumakmiayi. Túramtai Yus shiir enentáimtusmiayi.

<sup>3</sup>Yusna asarum tsanirmatniusha yajauch túratniusha tura jú nunkanmayan ikiaunkatniusha ishichkisha enentáimtuschatniuitrume. <sup>4</sup>Natsanmaincha, ántar chichamsha yainmakchamnia asamtai chichaschatniuitrume. Antsu Yus shiir yuminsatniuiti. <sup>5</sup>Shuar chíkich nuwajai tsanirmakka tura ashí yajauchin wakerakka tura jú nunkanmayan ikiaunkatniun wakerakka Yusai Kristu akupea nui penke pachiinkiachminiaiiti. Kame ju nunkanmayan ikiaunkatin ántar-yus tikishmatratniua nujai méteketete. <sup>6</sup>Nu túramniaiiti tusar ántar chichamjai anankramacharti. Warí, nuna túruiniakui Yúsan umirainiachun Yus ti asutiáwartatui. <sup>7</sup>Tuma asamtai nu shuar penke pachischatniuitrume. <sup>8</sup>Yáunchuka atumsha kiritniunam wekainiuyarme. Tura yamaikia Krístujai tsaninkiu asarum penker tsáapninium wekaarme. Shuar tsáapninium wekainia nujai métek wekasatarum. <sup>9</sup>Tsáapninium wekainiaka shiir awajkartincha tura nekas chichamtincha tura penker túrin ániawai. <sup>10</sup>Ii Uuntri Kristu wakeramu nekaatin wakeruktarum. <sup>11</sup>Kiritniunam wekainia nu túramu pachisairap. Antsu nu shuar tsáapninium enkeatarum. <sup>12</sup>Ni uuk túruinia nu áujmatsatin natsanmainiaiiti. <sup>13</sup>Tura ashí tsáapninium itiamu ashí paant ajawai. Tsáapnikia ashí paant awajeatsuk. <sup>14</sup>Nu asamtai Yus-Papiniun tawai: “Kanáruitme nu shintiártá. Jakamunmaya nantáktiá. Tura Kristu tsáapin awajturmastatui.”

Tu áarmaiti.

<sup>15</sup>Nu asamtai átum túramu ímiastarum. Nékachu áintsarum pujusairap. Antsu penker enentáimprarum wekasatarum. <sup>16</sup>Penker túratin tsawant wasúrkáip. Tunáa ti pampaatsuk. <sup>17</sup>Enentáincha áirap. Ii Uuntri Kristu warinia wakera nu enentáimtustarum. <sup>18</sup>Nampekairap. Nampeakmeka aya yajauch ajame. Antsu Yusa Wakanii winia enentáirui takamsuk pujurtusti, tu enentáimsatarum. <sup>19</sup>Túrarum Yus shiir enentáimtakrum Yus-kanta kantamkirum shiir áujnaisatarum. <sup>20</sup>Ii Uuntri Jesukrístu náarijai ashí irunna nu Yus Apa tuke yuminsatarum.

### Yus-shuar túratin

<sup>21</sup>Yus-shuar asarum nuámtak umirnaikiatarum. Túrakrum Kristu shiir awajsattarme.

<sup>22</sup>Núwaka Krístun umirna núnisann ni áishrincha umirkatniuiti. <sup>23</sup>Kristu ni shuarin akupeana núnisann áishmansha ni nuwen akupkatniuiti. Kristu ni shuarin ayashimiak ni muuké áintsankete. Tura nin uwemtikiartiniiaiiti. <sup>24</sup>Nu asamtai Yus-shuar Krístun umirin ániawai. Núnisann ashí ana nujai nuwa ni áishrin umirkatniuiti.

<sup>25</sup>Kristu ni shuarin ti aneak nin yáintaj tusa jákatniun surumakmiayi. Núnisrumek áishmantirmesha atumi nuwé aneatniuitrume. <sup>26</sup>Kristu ashí ni shuarin ni Chichamejai tura entsajai nijjar ní shuar penker árat

tusa jakamiayi. <sup>27</sup>Nujaj ashí ni shuarin tunaarinniuchu tura yajauch máatrachu antsu ti penker shiir awajas Niini éjetaj tusa túramiayi. <sup>28</sup>Núnisan áishman ni ayashin anea núnisan ni nuwen aneatniuiti. Shuar ni nuwen aneak nujaj ni ayashincha aneawai. <sup>29</sup>¿Yaki ni ayashin nakitniuit? Antsu penker wáiniuk áyureatsuk. Kristu núnisan ni shuarin wainiui <sup>30</sup>ni ayashí asamtai. Kame ni ayashí muchitmarintji. <sup>31</sup>“Tuma asamtai áishman ni aparincha nukurincha ikiukin ni nuwejaj tsaninkiar chikichik ayashin ajainiawai.” Tu áarmaiti. <sup>32</sup>Nusha Kristu ni shuarijaj tsaninmán tawai. Nuka yaunchu nekaachma yamaikia nekanaiti, tura ti enentáimturiniaiti. <sup>33</sup>Tura núnisan ashí áishmantiram atumí nuwé atumí ayashía nútiksarmek aneatniuitrume. Nuwasha ni áishrin umirkatniuiti.

**6** <sup>1</sup>Uchitirmesha, Yus-shuar asarum apasha nukusha umirkatarum. Nuka ti penkeraiti. <sup>2</sup>Emka akupkamu “umirkam nekas shiir átatme” tana nu júiti:

“Apasha nukusha umirkata.

<sup>3</sup>Túrakmeka shiir átatme tura jú nunkanam untsurí tsawant pujustatme” tawai.

<sup>4</sup>Atumsha, uchirtintirmesha, atumí uchirí ántrarum akajkairap. Antsu Yúsan shiir enentáimtusarat tusarum ti penker jintinkirum tsakatmartarum.

<sup>5</sup>Takakmautirmesha, atumí uuntri ju nunkanam pujuinia nu ti penker umirkatarum. Kristu umirkatniua áintsarum wishiktsuk ashamakrum tuke enentáijaj takarsatarum. <sup>6</sup>Aya wáitmakui shiir enentáimtursat tusarum penker takarsairap. Antsu Kristu takarniurija núnisrum ashí ame enentáimjaj Yus wakera nu túratarum. <sup>7</sup>Aya shuárnak yayá nútiksarum takasairap. Antsu ii Uuntri Kristu takarsatniua nútiksarmek ásump enentáijaj takastarum. <sup>8</sup>Kame chíkich chíkich ni takasmajaj métek akinkiertatui. Ii Uuntri Kristu nu shuar penker túramujaj métek akiktatui.

<sup>9</sup>Tura atumsha, iniamniutirmesha, atumí takartamu wakaní mántutsuk shiir enentáijaj iniartarum. Nekas enentáimpratarum. Ii Uuntri nayaimpiniam pujana nuna niisha atumjaj métek umirainiawai. Tura Yuska ashí shuaran akantsuk métek iyawai.

### **Yusa kakarmarijaj íwianch taritratarum**

<sup>10</sup>Wátsek, yatsuru, ii Uuntri Yusjaj tsaninkiu asarum ni ti kakarmarijaj iwianchjaj máanaiktin kakaram ajastarum. <sup>11</sup>Apach máanainiak jiru entsarua núnisrum Yus susamujaj entsartarum. Nujaj íwianch nupettamkui tariartatme. <sup>12</sup>Kame Yusna takáa asar penké áentsjaj máaniatsji antsu yajauch wakan kakaram írunna nujaj máaniaji. Niisha ju nunkanam, kiritniunma áintsan, tunaanum wekainia nuna akupin áiniawai. <sup>13</sup>Jiru entsartinia áintsarum Yus súramna nu entsartarum.

Nu entsarmajaj*̄* itiurchat tsawant taritra nupetkarum tuke tariarum wajastatrum*e*. <sup>14</sup>Wats, nekas tariartin nekas chicham emenmatarum. Tura penker túratniujaj*̄* jatairum ajaktarum. <sup>15</sup>Suntar iwiarnak sapatán aweá áintsarum Yusa shiir chichame*̄* etserkatin iwiarnartarum. <sup>16</sup>Nuyasha ashí nankaamas, tantar takustinia áintsan*̄*, Yus tuke nekas enentáimtustarum. Nujaj*̄* íwianch eketrámkamusha uwemturtatme. <sup>17</sup>Múukem ajaktincha Kristu uwentikrampramu múukmjin*̄* etsenkruktarum. Tura Yus-Chicham puniáá áintsan*̄* achiktarum. Nuka nekas Yusa Wakaní puniarinti. <sup>18</sup>Yusa Wakaníjjaj*̄* Yus áujeakrum tuke seatniuitrum*e*. Tura tuke aneara pujustarum wake mesetsuk, tura ashí Yus-shuar ainia nusha Yus áujtustarum. <sup>19</sup>Núnisan*̄* winiasha áujtursatarum. Wi sepunam pujayatan Yus winia chichastinian surusat tusarum seatritiarum. Tura wi chichaakun sapijmiatsuk Shiir-chichaman yaunchu nekaachma paant awajsat tusarum áujtursatarum. <sup>20</sup>Yus nu chichaman etserkatniun akuptukuíti. Nuna túrakun sepunam pujajaj*̄*. Sapijmiatsuk etserkat tusarum Yus áujtursatarum.

#### Amikmaamu

<sup>21</sup>Ii aneamu yachi*̄*, Tíkikiu, ashí wi túramun ujatmaktatui. Niisha Ii Uuntri*̄* Krístunu etserkatniun ti penker yáinniuiti. <sup>22</sup>Tuma asamtai ii jui*̄* pujamun ujatmak ikiantamprarat tusan akuptajrume.

<sup>23</sup>Yus Apasha tura ii Uuntri*̄* Jesukrístusha ashí Yus-shuartirmin anenmak shiir imiatkinchanum pujustinian suramsarti. Tura Nin tuke nekas enentáimtustinian suramsarti. <sup>24</sup>Ashí ii Uuntri*̄* Jesukrístun tuke enentáijjjaj*̄* aneana nuna Yus shiir yáintí.

Nuke atí.

# Papru

## JIRIPIUSNUMIĄ SHUARAN

### papí akuptukma

---

Papru sepunam pujus Jiripiusnumiā Yus-shuaran áatramiania nu

**1** <sup>1</sup>Wi Papru Timiutéujai Jesuskrístu takarín asar ashí Yus-shuar Jiripius péprunam pujarmena nu jū papí akuptaji. Yus-shuaran wainín árumna nusha tura Yus-shuaran yain árumna nusha ashí Yus-shuarsha nunisañ Yusna asarum tura Jesukrístujai tsaniñkiu asakrumín jū papí áateajrume. <sup>2</sup>Yus ii Aparísha Jesukrístu ii Úntrisha atumin waitnentramainia ásar imiatkinchanum tuke shiir pujustinian yainmakarti.

**Papru Yus-shuaran Yúsan áujtawai**

<sup>3</sup>Ashí tsawant atumin enentáimtakun Yúsan tuke shiir yúmiñkijai. <sup>4</sup>Yúsan áujeaknasha ti warasan seatjarme. <sup>5</sup>Kame iikia yámankamtaiknumiā Yus-Chicham métek yáiniáikiar iniaitsuk takasuitji. <sup>6</sup>Yus atumín ti péñker awajsatniun nan̄kama asa núnisañ Jesuskrístu táatsaíñ tuke shiir awájtámki nekas péñker najatmattarme. Nuka ti nekasaiti. <sup>7</sup>Atumin ashí ti aneajrume. Kame wi sepunam pujakun Yus-Chichaman akasmatkun tura Yus-shuar kakararti tusan takaakui átum yáintiarme. Yus ti anen̄kartin asa nu túratniun mai metek tsan̄katrámkaitji. Tuma asamtai atumin júnisan enentáimtustin ti pen̄keraiti. <sup>8</sup>Jesukrístu anen̄krattairijiai wi atumin aneamun Yussha paant nékarui. <sup>9</sup>Yúsan áujeakun anearmena nú nan̄kaamas aneak tusan seatjarme. Tura nújajisha ti neka ajasrum <sup>10</sup>ashí péñkera nu achikiuk tusan Yúsan áujtajrume. Atumin nu túrunamtaíñkia yamaisha tunáajainchu pujustatrume tura Kristu támatai sumamashtatrume. <sup>11</sup>Núnisañ Jesukrístu kakarmarijiai ashí péñker túrin átatrume. Tura nújai ashí shuar Yúsan ti shiir enentáimturartatui.



**Wi ju nunkanam aya Krístunak enentáimtakun pujajai**

<sup>12</sup>Winin túrunamu itiurchat aín nujají uwempratin chicham nekas pampaawai. Nu nekaatarum tusan wakerajrume, yatsuru. <sup>13</sup>Iis, uunt akupniu suntarísha tura ashí shuarsha wi Krístunun etseru asan sepunam pujamun paant nékainiawai. <sup>14</sup>Ti untsurí Yus-shuar wi sepunam enketman nekaawar ii Uuntrí Jesusan nekas enentáimtusar sapijmiatsuk Yus-Chichaman etserainiawai.

<sup>15</sup>Kame shuar awai winia kajertuiniak tura nankaamantu enentáimtumainiak Krístun páchiniawai. Antsu chíkich shuarka nekas enentáijjají Krístun etserainiawai. <sup>16</sup>Yajauch shuarka Krístun shiir enentáimtutsuk antsu ashí shuar ní chichamenak anturkar wíi shuar ajarat tusar etserainiawai. Túruiniak wisha sepunam pujakui nu arant itit awajtustinian wakerutainiawai. <sup>17</sup>Antsu péñker shuar Krístun nekas aneenak etserainiawai. Nu uwempratin chicham imiá péñkeraiti wi titin asamtai winiasha anentainiak shiir etserainiawai. <sup>18</sup>Wats, mai metek chíkich yajauch enentáijjají tura chíkich shiir enentáijjají Krístun etserainiakui shiir enentáimjai.

Tura nuna nankaamas shiir enentáimprattajai. <sup>19</sup>Kame Yus áujtursa asakrumin tura Jesukrístu Wakanísha yaintiu asamtai ti péñker uwempran jiinkittiajai. <sup>20</sup>Nekas juna wakerajai: Natsamtsuk uunt akupniun Jesukrístun paant ujakartinian wakerajai. Nujají winí Kristu kakarmari pujamu ti paant nekanattawai. Mántuiniakuisha tura mántuiniachkuisha ashamatsjai. Aya Kristu kakarmarin winí nankaamas nekaawarat tusan wakerajai. <sup>21</sup>Wíjjajíinkia ju nunkanam iwiaaku pujakun aya Krístunak enentáimtakun pujajai. Tura jákatniusha juí pujajnia nuna nankaamas péñkeraiti. <sup>22</sup>Ju nunkanam pujakun Uunt Jesusnan takasminiaitjai. Nu asamtai tunatsuk achiktaj nékatsjai. <sup>23</sup>Wíjjajíinkia itiurchataiti mai achiktin. Jákatniuncha wakerajai Krístujají tsaninikian pujustaj tusan. Wíjjajíinkia nu imiá péñkeraiti. <sup>24</sup>Túrasha atumin yáintaj tusan tuke ju nunkanam iwiaaku pujusminiaitjai. <sup>25</sup>Kame tuke pujustajjai nékajai. Núnisnak atumjai pujakun Yus nekas enentáimtakrum nankaamas waraakrum tuke katsuáruk tusan yáintatjarme. <sup>26</sup>Nu asamtai wi atumjai pujakui Jesukrístu yuminsarum shiir warastatrum.

<sup>27</sup>Kristu chichame ti péñker asamtai atumsha aya péñkera nuke túratarum. Wi atumjai pujaknasha tura yajá pujaknasha átum ti shiir túrarmena nuna antuktinian wakerajai. Ashí shuar uwempratin chichaman nekaawar umirkarat tusarum chikichik enentáijjají kakaram ajastarum. <sup>28</sup>Atumí nemasrísha ishichkisha sapijmiamtikramkarain. Nu túrakrumin nu shuar emesratniunam weena nusha tura átum uwempratniusha paant nekanattawai. Núnisan atí tusa Yus túraití. <sup>29</sup>Krístunu asarum Nii nekas enentáimtustinniasha tura Niiniu asarum

wáitsatniusha Yus anenma asa tsan̄katramkaitrume. <sup>30</sup>Yus-Chicham pamparat tusar maimetek ti takáa asar wáitijai. Wi nuik ti takasmaj nu nekamarme. Tura yamáí tuke takaaj nusha ántarme.

**Kristu péejchach ajasmatai Yus ti uunt awajsamiayi**

**2** <sup>1</sup>Kristu ikiantamkuisha, ni anenkrattairī atsantamkuisha, ni Wakanī atumjaī pujakuisha, anenkratniuitkiurmesha, waitnenkratniuitkiurmesha <sup>2</sup>waramtikrustarum. Métekrak takastarum. Mai metek anenaitiarum. Yusa Wakanī atumí enentáin̄ pujá asantai chikichik enentáik enentáimsatarum. <sup>3</sup>Átum wakeramuk túrawairap. Nan̄kaamantu ajastaj tírap. Antsu péejchach ajasrum chíkich shuar atumjaī nan̄kaamas péñker enentáimtusta. <sup>4</sup>Aya níniak péñker átatna nunak shuar túrashti. Antsu chíkich shuar yáin̄minia nuna túrati.

<sup>5</sup>Kristu Jesus enentáimpramia núnisrum enentáimpratarum. <sup>6</sup>Niisha Yúsaitiat̄ jū nun̄kanam winiak tuke Yusjaī métek átinian emettsuk <sup>7-8</sup>antsu nuna ikiuak aents ajas péejchach asa ashí aentsu takar̄in̄ ajasmiaī. Tura aentsu ayash̄in̄ ayashimiak tura Yúsan umireak jákatniuncha surimiakchamiayi. Maa, imiá tunaarinnia áintsan̄ krúsnum natsanmainium jakamiayi. <sup>9</sup>Túramtai Yus nekas nan̄kaamantu awajsamiayi. Ni náarin̄cha ashí paant awajsamiayi. <sup>10</sup>Tuma asantai ashí nayaimpiniam írunna nusha, nun̄ká írunna nusha, tura iwiarsamusha Jesusa náarin̄ antukar tikishmatrartatui. <sup>11</sup>Tura ashí shuar Jesukrístu ashí akupin̄ ajasman paant nekaawartatui. Nújain̄kia Yus Apá kakarmarisha paant nekanattawai.

**Yus-shuar kiritniunam keeák tsáapin̄ awajeana áintsan̄ áiniawai**

<sup>12-13</sup>Nu asantai, aneamu yatsuru, wi atumjaī pujakuí umirtukmarmena nuna nan̄kaamas yamaikia arant pujakuisha umirtuktarum. Iis, Yus atumí enentáin̄ takaak ni shiir wakeramu wakeruktinniasha tura umiktinniasha pujurtamprume. Nu asantai atumsha kakaram ajastarum Yus ti péñker awajtamsatniun wakera nu túrunati tusarum. Tura péejchach enentáimprarum awajirminiaitjaī tusarum aneara wekasatarum.

<sup>14</sup>Ashí yajauch tunaitsuk tura jianaitsuk wekasatarum. <sup>15</sup>Túrakrum makuumatsuk tunaajain̄chu átatrume. Antsu Yusa uchirí̄ átatrume. Jū nun̄kanmasha shuar imiá tunaan túrin̄jaisha máatrachu asarum kiritniunam ji keeá áintsan̄ketrume <sup>16</sup>iwiaaku pujustin̄ chicham paant awajeakrum. Nújaī Kristu támatai atum̄in̄ ántran takascha asan ti shiir wararsattajrume. <sup>17</sup>Winia takatrujaī Yus-shuar ajasakrumin̄ wi jákatniuitkiuncha nújajisha warasaintjaī. Atumsha wi waraajna jūī núnisrumek warastarum tusan wakerajrume. <sup>18</sup>Atumsha waraakrumin̄ métek wararnaisatai.

### Timiutéuncha Epaprutíiuncha Papru ujakamiania nu

<sup>19</sup>Ii Uuntri Jesus wakerakuin<sub>ki</sub> Timiutéun írmainiarat tusan ti warik akuptuktatjar<sub>me</sub>. Tura átum shiir pujamu ujateakui warastatjai. <sup>20</sup>Kame Timiutéu wijj<sub>ai</sub> métek enentáimna áinis chíkich shuar atsawai. Niisha átum shiir pujusuk tusa ti nekas enentáimturmar<sub>me</sub>. <sup>21</sup>Chíkichka Kristu wakeramun iniaisar ní wakeramunak páchiniawai. <sup>22</sup>Túrasha átumka Timiutéu tuke péñker túramu nékarme. Uchi ni aparíj<sub>ai</sub> takaana áinis Yusa shiir chichame etserkatniun yáintkiaiti. <sup>23</sup>Winia itiurtukarti<sub>n</sub> nuna nekaan Timiutéu írmainiarat tusan akuptuktatjar<sub>me</sub>. <sup>24</sup>Kame Kristu yáintkiui wíkisha wárik ímniaitjar<sub>me</sub>.

<sup>25</sup>Wi atsumaj nuna írsati tusarum Epaprutíiu akupturkamarme. Wijj<sub>ai</sub> métek tsani<sub>n</sub> takasuiti. Tura métek wáitsaitji. Áunkesha akupkamnia enentáimjai. <sup>26</sup>Nii jaawai taman átum antukman nekáa, írmaitniun ti wakerutmarme. <sup>27</sup>Maa, nekas ti janin<sub>ki</sub>iamai. Túrasha Yus nin waitnentr<sub>mai</sub>. Kame winiasha wi ju<sub>i</sub> wáitiakun nii jakamtai nu arant ti kuntuts pujuschatniun waitnentr<sub>mai</sub>. <sup>28</sup>Tuma asamtai akuptuktinian wakerajrume. Tura atumsha ataksha wáinkiarum waraakrumin wisha ti kuntuts enentáimchakun akuptuktatjar<sub>me</sub>. <sup>29</sup>Kristu yuminsarum ti shiir warasum wáinkiarum. Chíkich shuar niij<sub>ai</sub> métek péñker Yushuar ainia nusha shiir enentáimtustarum. <sup>30</sup>Kristu takatr<sub>n</sub> takaak ti janin<sub>ki</sub>iamai. Átum yáintkiachminia nuna winia yáintkiataj tusa pujus janin<sub>ki</sub>iamai.

### Kristu nekaatin ashí nan<sub>ka</sub>amas péñkeraiti

**3** <sup>1</sup>Ayu. Warastarum, yatsurtiram, ii Uuntri Kristu ti péñker asamtai nuik áatramajrum nuna ataksha títiatjar<sub>me</sub>. Ataksha ujam yainmakminiaitkiuin<sub>ki</sub> wíj<sub>ai</sub>in<sub>ki</sub> itiurchatchaiti atak enentáimtikratin. <sup>2</sup>Yajauch shuarj<sub>ai</sub> aneartarum. Nu shuar Muisais timia núnis tuke yamaisha tsupirnaktiniaitrum<sub>e</sub> tuiniawai. <sup>3</sup>Antsu iikia ayash tsupirnakmaj<sub>ai</sub> péñker átiniaitji tu enentáimtsatsji. Iikia antsu ii wakaníj<sub>ai</sub> Yus shiir awajeaji tura Jesukristunu asar Niñki shiir wararji. Nu túrakur Muisais timia nu umintikia iitji. <sup>4</sup>Ju nuñkanam írunna nuj<sub>ai</sub> waantu enentáimpramniaitkiuin<sub>ki</sub> ashí shuarj<sub>ai</sub> nan<sub>ka</sub>amas wikia waantu enentáimtumaraintjai. <sup>5-6</sup>Israer-shuar asan Muisais timia núnisan wi akiiniamtai uchu (8) tsawant nan<sub>ka</sub>asmatai tsupirtukarmiayi. Israer-shuarum Pinjamín weeitjai. Winia aparsha nukursha mai Israer-shuar áiniakui wi imiá Israer-shuaraitjai. Wisha Pariséu tuinia núnisan Muisais akupkamun ti umirin asamtai chíkichka winia sumamtikiatniun tujintrin ármiayi. Tura Pariséu asan Kristu-shuarin ti kajerkan áintramjai. <sup>7</sup>Ashí nuj<sub>ai</sub>in<sub>ki</sub> waantu enentáimtumauyajai. Antsu yamaikia Kristuj<sub>ai</sub>in<sub>ki</sub> penké ántar áiniawai tajai. <sup>8</sup>Ashí enentáimpramnia ákuisha

winia Úuntur Jesukrístu shiir enentáimtustin nekas péñkeraiti. Nu asamtai Krístunu ajakun wi takusmaj nu muijmiai ajasmatai núnaka iniaisamjai. <sup>9</sup>Nuna túran Niijjai tsaniñkian pujajai. Tura akupkamumirkatniujai péñker ajaschaitjai antsu Krístun enentáimtakui Yus “péñkeraitme” túrutui. <sup>10</sup>Tuma asamtai ashí nankaamas wakeraj nu júiti: Krístun péñker nekaan nekas enentáimtustinniasha tura ni iniantkimiu kakarman takustinniasha wakerajai. Tura Niijjai métek ajastinian wakerakun ni wáitkiamunam tsaniñtinniasha tura Nii jakamia núnisan jákatniuncha wakerajai. <sup>11</sup>Túraknaka Krístujai métek jakamunmaya nantaktiaj tusan wakerajai.

### Papru kakaram ajasmiai Kristu wakeramun umiktinian

<sup>12</sup>Kame wakerukuitjia nuna mash umirkachuitjai. Krístujai métek nekas péñker shuar ajaschaitjai. Túrasha Kristu Jesus “nuj ejetajam” emka túrutkui, wisha nuj jeataj tusan kakaram ajasan pimpitsuk takaajai. <sup>13</sup>Yatsuru, wisha nuj jeajai tátsujai. Antsu yaunchu túrutain kajinmatkin kakaram ajasan Kristu wakeramunam jeatniun takaajai. <sup>14</sup>Tura nuna umikmatai nayaimpiniam Jesukrístujai tsaniñkian shiir pujustinian Yus surustatui.

<sup>15</sup>Ashí shuar Yusjai katsuaru ájinja nu wi tájana núnis “jeachuitjai” tu enentáimpratniuitji. Tura “jeaitjai” enentáimkiurminkia Yus nunasha atak enentáimtikramprattarme. <sup>16</sup>Tura aneartarum. Naki pujutsuk jeajnia nujai métek umirkatin pimpitsuk takastiniaitji. <sup>17</sup>Yatsuru, wisha tura chikichcha wijjai métek péñker túrajnia nu wáinkieuram atumsha núnisrumek túratarum. <sup>18</sup>Tura yajauch shuarsha írunui. Wi nuiksha ti ujakmajrume tura ataksha úutkun ujaajrume, nu shuar Kristu krúsnum jakamun muñjiainiawai. <sup>19</sup>Tuma ásar emesratniunam akupnakartatui. Ni ayashí wakeramun, ni yusria áintsan, tuke umirainiawai. Natsanmainian túruiniayat wararainiawai. Tura ju nunkanmayanak enentáimtuiniawai. <sup>20</sup>Antsu iikia nayaimpinmaya shuar asar ii Uuntri Jesukrístu in uwemtikrampra asamtai nayaimpinmaya tatí túsar nákaaji. <sup>21</sup>Nii taa, ii yajauch ayashin yapajia ni ayashíjjai métek ti shiir awajsattawai. Ashí uunt akupin ajas nu kakarmajai túrutmattaji.

### Krístujai tsaniñkia wekáa asarum warastarum

**4** <sup>1</sup>Nu asamtai, aneamu yatsuru, ii Uuntri Krístujai tsaniñkiu asarum kakaram ajastarum. Maa, ti aneakun atumin enentáimtakun ti waraajai tura íistajrum tusan wakerajrume. Tawasap achikiar shiir enentaimsatniua núnisnak shiir enentáimtajrume.

<sup>2</sup>Ewautiancha tura Séntikincha, ii Uuntri Kristu shuari ásar, mai metek enentáimsarat tusan seajai. <sup>3</sup>Amincha, winia airú, nu nuwa yáinkta tusan seajme. Niisha wi iwiaaku chichaman étsereakui wijjai métek

takasarmai. Tura Krimintisha tura chikichcha wijaj*ai* métek takasarmai. Nuna náar*in* iwaaku átinnium Yus átrai*ti*.

<sup>4</sup>Nu asamtai Uunt Jesusj*ai* tsanin*ki*a pujá asarum warastarum. Ataksha “warastarum” tájar*me*. <sup>5</sup>Uunt Jesus tátin ishichik ajasai. Tuma asamtai tsan*ka* enentá*í* takakrum nu paant nekanati.

<sup>6</sup>Itiurchat enentáimsatin atumj*ai* pen*ké* atsut*í*. Antsu tuke Yus áujkum ashí itiurchatrum ujakta. Atsumamuram Yus seata. Túram Yus yuminsata. <sup>7</sup>Nuin*ki*a atumí enentá*í* an*ka*nt átinian, áentstikia pen*ké* nekaachminia nuna, Yus amastatui. Yus atumin an*ka*nt awajtamsa asa atumí enentá*in* tura atumí enentáimsamur*in*cha yajauch wayaw*ai*n tusa shiir waitmaktatrum*e* Jesukristuj*ai* tsanin*ki*u asakrumin.

### Ashí pé*ñ*ker ana nu enentáimsatarum

<sup>8</sup>Yamaisha yatsuru, júchiniak títiatj*ai*. Yus-shuarti enentáimsatniun chichastatj*ai* yamaikia. Ashí nekas ana nu enentáimsatarum. Tura ashí anturkamnia ana nusha, naka chicham ana nusha enentáimsatarum. Tura yajauch chichamsha enentáimsairap. Tura antsu ashí shiir ana nusha, chíkich shuarnasha pé*ñ*ker enentáimtusminia nusha, kame ashí pé*ñ*ker ana nu enentáimsatarum. Nuyásha chíkich shiir anturkamnia ana nusha enentáimsatarum.

<sup>9</sup>Wi unuiniarmajrumna nu umiktarum. Tura wi túramur ísurmena nu tura antukurmena nusha umiktarum. Túrakrumn*in*ki*a* Yuska an*ka*nt átinian amastaj tusa pujurtamsattarme.

### Jiripiusnumi*á* Yus-shuar Páprun kuítian akuptukarmiania nu

<sup>10</sup>Ii Uuntri*í* Kristu anea asarum winiasha ataksha enentáimturu asakrumin ti waraaj*ai*. Kame kajinmatrukmiarme tátsuj*ai* antsu kuítium atsakui yáintkiatin tujinkiamarme. <sup>11</sup>Tura kuítian atsumakun tátsuj*ai*. Antsu wi takakjana nujaj*in* warastinian unuimiáruitj*ai*. <sup>12</sup>Kuítrinchati pujustinia nuna nékaj*ai* tura ti nukap takustinia nunasha nékaj*ai*. Tsukamknasha jéemarnasha, itiarar takustinniasha tura pen*ké* takutsuk pujustinniasha unuimiáruitj*ai*. <sup>13</sup>Kristu ni kakarmar*in* surakui ashí túramniaitj*ai*. <sup>14</sup>Tuma aj*in* atumsha wi atsumamu akupturkarum ti pé*ñ*ker túramarme.

<sup>15</sup>Jiripiusnumi*á* shuairam, ju ti pé*ñ*ker nékarme. Masetunia nunkanam Yus-Chichaman etserumtai aya atumek kuit akupturkamiarme. Wi etserkamuj*ai* atumí wakan*in* yáin*ma* asamtai yuminsarum akupturkamiarme. <sup>16</sup>Atumek wi Tisarúnikia nunkanam atsumakun pujaj*isha* kuit akupturkamiarme. <sup>17</sup>Aya kuit akupturkakrumin tu enentáimtsuj*ai*. Antsu nu kuit Yusaj*í* kawentramkaku tusan wakerajrume. <sup>18</sup>Eprutítuij*ai* akupturkamarum nujaj*isha* atsumamaj nuna nan*ka*amas tiaruncha wáinkiaj*ai*. Akupturkamarum nusha ti

kuṅkuin Yus susamua áinis ti shiir auyi. <sup>19</sup>Winia Yúsrusha ti péṅkeran núkap takakui. Atumsha Jesukrístunu ajasu asarum Yus seamniaitrume. Tura Yuska ti takakna nujají ashí atsumarmena nuna suramsattarme. <sup>20</sup>Ii Aparí Yus tuke shiir atí. Nuke atí.

#### Amikmaamu

<sup>21</sup>Winia náaruisha tura Jesukrístu náarincha ashí Yus-shuar ainia nu chícham ujatruktarum. Niisha shiir pujusarti. Wi írutramusha núnisan shiir pujusarti tusa akupturmainiawai. <sup>22</sup>Tura ashí akupin Sésarají pujuinia nuyá Yusna ajasaruka tura chíkich Yus-shuarsha shiir pujusarti tusa chichaman akupturmainiawai.

<sup>23</sup>Ii Uuntri Jesukrístu atumniasha ti shiir yainmakarti. Nuke atí.

# Papru

## KURUSENMAYA SHUARAN

### papí akuptukma

---

#### Kurusenmaya Yus-shuaran Papru áatramiania nu

**1** <sup>1</sup>Wi Pápruitjai. Yus wakerutak Jesukrístunun etserkat tusa akatra akupkamuitjai. Wisha ii yachi Timiutéujai <sup>2</sup>ju papí áarar nuí Kuruse péprunam Kristu péñker umirkarum Yusna ajasuitrumna nu akuptaji. Yus ii Aparí atumin wáitnentaimturma asa yainmakarti imiatkinchanum tuke shiir pujustinian.

#### Papru Yus-shuaran Yúsan áujtusmianis nu

<sup>3</sup>Iisha atumin Yus áujtakur ii Uuntrí Jesukrístu Aparí Yus ashí tsawant yúmiñkijai. <sup>4</sup>Atumsha Jesukrístu ti shiir enentáimtamusha tura ashí Yus-shuar aneamusha antukji. <sup>5</sup>Uwempratín chicham nekasa nu antukrum atumsha nayaimpiniam atumnian Yus ti shiir ikiusman wáinkiatái tusarum nákarne. <sup>6</sup>Nu chicham ashí nunkanam pampaakui shuara enentáin nereá áinis nusháa ajarar yamaikia péñker túrin áiniawai. Núnisan atumíincha túrunaiti. Yus ti nekas anenkartiniaiti tu etserkamu ántakrumin nu chicham atumí enentáincha nerekmiai. <sup>7</sup>Nu chichaman Épapas ujatmakmarme. Niisha iijjai métek takasu asamtai ti aneamuiti. Atumniasha Kristu takatrín ti shiir takartamsaiti. <sup>8</sup>Niisha átum Yus-shuar asarum mai anenai ajamun ujatmakmaji.

<sup>9</sup>Iisha nu antukar Yus ashí tsawant áujtajrume. Yus ni wakeramun ti paant nekaprutmawarat tusar seaji. Ashí Yúsnan ni enentáimtairijjai ashí Níiniun paant nekaatniun Yus jintinramat tusar seaji.

<sup>10</sup>Atumsha Krístunu ainia núnisrum péñker túrutak tusar seaji. Tura ashí ni wakerana nu umiakrum ashí péñker ana nu, nerektinia áintsarmek, túrattarme. Núnis túrarum Yus unuimiatki wéakrum

Nin ti penker nekaak tusar seaji. <sup>11</sup>Yus ti kakaram asa ikiantamprat tusar seaji. Nujaj ashí itiurchat ákuisha páchitsuk ti shiir warasrum katsuntrattarme. <sup>12</sup>Yus ni shuarin tsáapnia nuj ashí péñkeran susattawai. Tura incha nuj pachiinkiatniun tsankatramka asakrin Yus Apa yuminsamniaitrume. <sup>13</sup>Yus iwianchin nupetak íwianch akupeana nú kiritniunmaya uwemtikramar ni aneamu Uchirí akupeana nuj wearmakmaji. <sup>14</sup>Ni Uchirí krúsnum jaka ii tunaarín nijiar tsankurtamar uwemtikrampramaji.

### **Kristu jakamujaj Yusjaj nawamnaikiar shiir pujustin**

<sup>15</sup>Yus wáinkiachminiaitiat ni Uchirí akiiniamai tura ayashimkiamiyai. Túmaitiat ashí najanamua nuna yaunchu pujú asa ashí akupniuiti. <sup>16</sup>Nijijaj Yus ashí nayaimpiniam írunna nunasha nunká írunna nunasha, ashí wáiniaj nunasha núnisan wáintsuj nunasha mashi najanamiyai. Nu arantcha ashí akupin ju nunkanam írunna nusha, nayaimpiniam írunna nusha, iwianchnium írunna nusha, ashí Nijijaj najanamu ániak Nin umirkarti tusa najanamu ániawai. <sup>17</sup>Ashí najanamua nuna yaunchu, Krístuka tuke pjuwiti. Ashí najanamu írunna nuna emestsuk wáinniuiti. <sup>18</sup>Ashí Yus-shuar métekrak chikichik ayashinia áinis enentáimkiumka nuna muuke Krístuuiti. Tura nu ayashín ni iwiaakmarijaj iwiaaku átinian súsaiti. Niisha ashí jakamunmaya nantakniujaj imiá nankaamantuiti. Nujajinkia ashí enentáimpramnia írunna nunasha akupniuiti. <sup>19</sup>Yus ashí takamtsuk Kristuj shiir pujumiyai. <sup>20</sup>Núnisan Yus Kristu krúsnum jakamujaj ashí nayaimpinmasha tura ju nunkanmasha írunna nuna Nijijaj nawamnaikiar shiir pujusarat tusa wakerukmiyai.

<sup>21-22</sup>Atumsha nuik tunáa túrin asarum atumí enentáin Yusa nemasri ámarme. Tuma asarum yajá wekaimiarne. Antsu Kristu, aentsu ayashín ayashimiak, krúsnum wáitias jakamujaj ii tunaari asakármatai yamaikia Yusjaj nawamnaikiar shiir pujaji. Nujaj Kristu in penker ajasuncha tunaan máatrachmancha tura sumamachuncha Yúsaj ejetamatjaj. <sup>23</sup>Tuma asamtai Jesukrístu shiir enentáimtusrum kakaram ajasrum katsuartiniaitrume. Tura uwempratin chicham antukuitrum nuyá kanakchatniuitrume. Ju uwempratin chichaman ashí nunkanam etsernakuiti. Wisha, Papru asan, etserkatniun yaimjai.

### **Papru ashí Yus-shuaran yáinkratniuiti**

<sup>24</sup>Atumin wáitiaknasha ti shiir waraajaj. Kristu ni shuarin nekas penker awajsat tusa wáitiana nuj pachiinkia asan waraajaj. Ashí Yus-shuar Kristu ayashí áintsan ániakui Yus-shuaran yáintajtsan ayashrujaj wáitiakun shiir enentáimjai. <sup>25</sup>Atumin yáinkiai tusa Yus akattur Yus-Chichaman takamtsuk ujakai tusa akuptukmai. Nuna takaakun ashí Yus-shuara yáintrintjai. <sup>26</sup>Yámankamtaiknumia nekaachman



Yus yamaikia ni shuarin paant awajsaiti. Nu chichamnasha ujakarai tusa winia akatar akuptukuiti. <sup>27</sup>Nu chichamsha júiti: Kristu atumí enentáin pujak Nijjiaí métek ti shíram awajtamsattawai. Nu imiá shiir chichamnum Israer-shuarchasha pachiiniainian Yus ashí ni shuari nekawaarat tusa wakerimiayi.

<sup>28</sup>Iisha Kristu étsereaji. Túrar ashí enentáimtikrar péñker nekaawarat tusar jintintiainiaji. Nujai Krístujai tsanin̄kiar ashí péñker tsakarartatui. <sup>29</sup>Tuma asamtai Kristu ni kakarmarin̄ tí surakui nekas kakaram takaajai.

**2** <sup>1</sup>Nekaatarum, yatsuru. Yus-shuaran yáintaj tusan ti takaajai. Tura atumíncha, Rautiséanmaya shuarnasha, tura ashí winia waitcha ainia nunasha yáintaj tusan ti takaitjai. <sup>2</sup>Ashí shiir enentáimtikratniun ti takaajai. Núnisan aneniarum chikichik enentáijjiaí métekrak wekasatarum tusan wakerajrume. Nu arantcha, ashí Yusna ti péñker nekaarum tuke katsuáruk tusan takaajai. Nujai Kristu ti péñker nekaattarme. Tura yaunchu nekaachman Yus yamá paant awajsaiti. Nuka Krístuiti. Tura Nii nekaatin nekas shíraitai. <sup>3</sup>Tura kakaram ajasam Kristu péñker nekaam ashí shiir enentáimpramnia nusha tura ashí Yusna nekaamnia nusha nekaattarme. <sup>4</sup>Atumin chíkich shuar niisháa chichamjai shiir chichartamas anan̄kramawaraín̄ tusan nuna tájarme. <sup>5</sup>Wi nuí atumjai pujachkuncha nuí pujajna áintsanak enentáimtajrume. Tuma asan átum métek enentáimprarum tura kakaram ajasrum Kristu nekas enentáimtururmena nuna ísnaka shiir enentáimjai. <sup>6-7</sup>Nu asamtai átum ii Uuntri Jesukrístu nekas enentáimtusrum Yus-shuar ajasmarmena núnisrum yamaisha Nii nekas enentáimtusrum Nijjiaí tsanin̄krum ashí túratarum. Nu túrakrum Nii enentáimtakrum tuke tsakaki wétarume. Tura te tariara wajasrum Yusjai kanakchattarme. Yus-Chicham núnisan̄ etsernakmatai nekarmarme. Tuma asarum Yus tuke yuminsarum, núnisan̄ péñker wekasatarum.

### Krístujai yamaram iwiaakma takakji

<sup>8</sup>Aneartarum atumsha. Shuar aentsti enentáimmiajain̄ ashí ju nun̄kanmayan̄ enentáimprar tura Krístun enentáimtutsuk niisháa chichaman áujtamainiak nekaschajai anan̄kramataj tusa wakerutmainiawai.

<sup>9</sup>Krístunam Yus ashí takamtsuk pujuwiti. <sup>10</sup>Túmakui atumsha Krístujai tsanin̄kiu asarum ni iwiaakmarí takamtsuk takakuitrume. Krístusha ashí akupniun akupniuiti. Áentsnumsha iwianchniumsha tura nayaimpinmasha ashí akupin írunna nuna akupniuiti. <sup>11</sup>Nu arant átum ayashniun tsupirnatskesha Kristu shuari ajasakrumin ashí ayash wakeramun, tsupirkatniua áintsan̄, Kristu ajapamiayi. <sup>12</sup>Tura atumsha Yus ni kakarmarijjiaí Kristu jakan iniantkimia nu enentáimtusrum imianmiarme. Túrarum Krístujai métek iwiarnasmarme.

Tura núnisrumek Krístujají métek nantakmiarme. <sup>13</sup>Nuikkia átumsha tsupirnatsuk atumí tunaarí tuke akui atumí wakaníin jákauyarme. Tura yamaikia Jesukrístujají tsanin̄kiu asakrumin Yuska atumí tunaarí tsan̄kur yamaram iwiaakman suramsaitrume. <sup>14</sup>Tura ashí ii tumashrin̄ sumamtikramatin amia nuna japiruiti. Kristu krúsnum jakamtai ashí akupkamujají sumamtikramamun tsan̄kurtampramijai. <sup>15</sup>Núnisan̄ Kristu krúsnum jaka, iwianchnium ashí akupin ainia nuna nupetak ashí íimiainain̄ iniatsararmiayi.

### Nayaimpiniam írunna nu enentáimtustarum

<sup>16</sup>Akupkamunmaya Yus an̄kant awajtamsamtai chíkich shuar ame túramujají yajauch enentáimturmarajin̄. Yúamna nujají, úmamna nujají, uwitíncha, nantutíncha, tura tsawantíncha nampermam nujají chíkich shuar yajauch áujmatramkuisha ¿warí urukatin̄? <sup>17</sup>Nu nampernum Israer-shuar Kristu túrattana nuna nakumainiak túrin̄ ármiai. Tura Kristu taa imia Nin̄ki pujá asamtai nakumkamuka ántraiti. <sup>18</sup>Tura shuar “Péejchach ajasam Yus áujtsuk aya Yusa suntarí shiir awajsatniuiti” túramkuin̄kia anturkairap. Nu shuar mesekranam wáinkiamun áujmatenak ántar nan̄kaamantu enentáimtumainiawai. Aya aentsti enentáimian chichainiawai. <sup>19</sup>Tuma ásar Krístujají tsanin̄kiar wekainiatsui. Kristu ashí akupin asa ni shuarin̄ Yúsnan jintintíá shiir tsakarat tusa péñker wáiniui. Nu arantcha ashí ápateak Yus wakerana áintsan̄ chikichik awajeawai.

<sup>20</sup>Atumsha Krístujají jaka asarum aya aentsti enentáimtai ikiukniuitrume. Nuikia ¿urukamtai ju nun̄kanmaya ana nu tuke páchiarum? Nii tuinia nu umirkashtiniaiti. <sup>21</sup>“Ju antin̄chatniuiti, tuiniawai. Ju yúashtiniaiti. Tura ju achikchatniuiti” tuiniawai. <sup>22</sup>Nusha ¿warí, takasam amuukashtatuak? Kame áyatik aents akupkamu áiniawai. <sup>23</sup>Shuar nu akupkamu umiiniak Yúsnan ti nékaitjai tura Yus shiir enentáimturui tu enentáimtumainiawai. Nu arantcha péjchach ajasan winia ayashrun ti asutiájai tu enentáimtumainiawai. Túrasha ayash wakeramunka nupeteatsui.

**3** <sup>1</sup>Nuikia Krístujají nantakin asarum nayaimpinmaya írunna nu wakeruktarum. Nují Kristu pujawai Yusa untsuurín̄i. <sup>2</sup>Ju nun̄kanam ana nu enentáimtsuk aya nayaimpinmaya ana nu enentáimtustarum. <sup>3</sup>Atumsha Krístujají tsanin̄krum jakamarme. Tuma asarum Krístujají tsanin̄krum Yusjají iwiaaku pujarme. <sup>4</sup>Krístukete ii iwiaakmarí. Nii nayaimpinmaya wantinkuisha atumsha Nijjají métek wantinkiattarme. Tura Nijjají métek ti pen̄ker átatrume.

### Yaunchu iwiaakmasha tura yamaram iwiaakmasha

<sup>5</sup>Tuma asamtai ju nun̄kanmaya ana nu ajakratniua áintsarum iniaisatarum. Tsanirmatniusha, tunáa wakeruktin̄cha, tura takakna

nujaj nankaamas wakeruktincha ántar-yus tikishmatratniua áintsan asamtai iniaisatarum. <sup>6</sup>Shuar Yúsan umirtsuk aya nuna túrin ásarमतai Yus nin kakerak ti asutiáttawai. <sup>7</sup>Atumsha núnisrumek túriniuyarme. <sup>8</sup>Tura yamaikia júsha iniaisatarum: kajektincha, yajauch wakeruktincha, yajauch túratniusha, katsekmaktincha, yajauch chicham chichastincha, mash iniaisatarum. <sup>9</sup>Yus-shuar ajasrum yaunchu enentáimtairam iniaisamarme. Tura yaunchu túrutairmesha iniaisaitrume. Tuma asarum nuamtak tsanumprunairairap tura wáitruawairap. <sup>10</sup>Yaunchu enentai, pushí mamuru áiktinia áintsarum, iniaisaitrume. Núnisrum yamaram enentái, shiir pushí entsartinia áintsarmek, wekasaitrume. Tura Yus nu yamaram enentáin najana asa ashí tsawant pujurtawai nuna nankaamas Nijijaj métek shiir atí tusa. Túramtai Yus ti penker nekaki wéaji. <sup>11</sup>Kristuka ashí írúnna nujaj nankaamas ashiyaiti. Niiniun pujurui. Tuma asamtai ashí ni shuari enentáin pujá asamtai nusháa enentáimtunairchatin áiniawai. Kriaku-shuarsha tura Israer-shuarsha, tsupirnakusha tura tsupirnakchasha, apachcha tura yajaya shuarsha, takarín ainia nusha tura ankant ainia nusha, Kristu ashí ni enentáin pujakui nusháa enentáimtunairchatniuiti.

<sup>12</sup>Yus atumin anenmak Niiniu arti tusa achirmakmarme. Túrutma asamtai jujaj shiir iwiarmampratniua áintsarum tuke túrin atarum: waitnenkartin, shiir awajkartin, péjchach átin, émtin áchatin, tura katsuntin átin. <sup>13</sup>Kristu atumí tunaarín tsankuramia núnisrumek nuamtak tsankúrnáiratarum. Chíkich yajauch awajtamkuisha shiir katsuntram yapajniaitsuk tsankúrnáiratarum. <sup>14</sup>Tura ashí nankaamas anenaitiarum. Túrakrumka chikichik ajasrum mash pénger túrattarme. <sup>15</sup>Kame chikichik ayashtinia áintsarum ajastarum tusa Yus ni shuari ajasat tusa achirmakmarme. Tuma asamtai Yusa shiiri atumí enentáin pujurtamsati. Nujaj Yus yuminsatarum.

<sup>16</sup>Kristu shiir chichame atumí enentáin piakti. Nekas naka enentáimprarum jintinniaiyarum mai ikiakánai ajatarum. Yus kanta kantamárum tuke enentáijijaj Yus yuminsatarum shiir awajsatarum. <sup>17</sup>Tura takaakmesha, chichaakmesha, kame ashí túramna nuka Jesukristu shiir awajsataj tusam ni kakarmarijiajn túrata. Túrakum Krístujaj Yus Apa yuminsata.

### Yus-shuar túratniua nu

<sup>18</sup>Nuwatiram, atumí aishri umirkatarum Uunt Yus nuna wakerakui. <sup>19</sup>Áishmantiram, atumí nuwé aneatarum. Atumí nuwejaj kajernaikiairap. <sup>20</sup>Uchitiram, ame apa nukusha tuke umirkatarum. Nu túrakrum Yus shiir enentáimtikstarme. <sup>21</sup>Uchirtintiram, atumí uchiri ti kakantrairap. Ti kakanteamka uchisha ti kuntuts pujus pénger wekasatniun nakitchanpiash. Nu túrunawain tusarum ántrarum atumí

uchiri kakantrairap. <sup>22</sup>Takarniutiram, atumí uuntri shiir umirkatarum. Ju nunkanmaya uuntri ain aya nii iimkiui shiir enentáimturati tusarum takaschatniuitrume. Antsu Yus enentáimtakrum tuke penker takastiniaitrume. <sup>23</sup>Ashí túramna nu asump enentáijiai takakmasta. Aya aentsuk yáintinia áintsachu antsu nayaimpinmaya Úuntrum yayá áitkiasrum takastarum. <sup>24</sup>Ame Úuntrum Kristu asa nayaimpiniam ashí shiir takustinian tsankatramkattawai. <sup>25</sup>Antsu tunáa túrin ni yajauch túramujai métek akinkiáttawai. Yus ashí áentsun métek iyawai.

**4** <sup>1</sup>Úunttirmesha, atumí Uuntri atumin wáiniuk nayaimpiniam pujatsuk. Tuma asamtai atumí yáinma jiatsuk penker iniartiniaitrume.

<sup>2</sup>Yus áujkuram Nii yuminsarum asummiarum iniaitsuk áujsatarum. <sup>3</sup>Incha Yus áujtustarum. Kristu-chicham yaunchu nekaachman yamáí étserkun sepunam pujajai. Tuma asamtai nuna shiir ankant etserkat tusarum áujtursatarum. <sup>4</sup>Tura wi paant etserkatniuitiaj núnisan etserkat tusarum áujtursatarum.

<sup>5</sup>Yus-shuarchajai shiir túratarum Yus-Chichaman yajauch enentáimturarain. Kakaram ajasrum tsawant ánrarum iniankasairap. <sup>6</sup>Ti shiir chichamtin átiniaitrume tura anturújamin átiniaitrume. Núnisrum chíkich chíkich Yus-chicham paant ujaktin nekaattarme.

### Amikmaamu

<sup>7</sup>Ii aneamu yachi Tíkikiu ashí wínian ujatmaktatrume. Niisha wijiai métek Yúsnan pimpitsuk ti penker takasuiti. <sup>8</sup>Nu asamtai ii juí pujajnia nuna ujatmak ikiantamprarat tusan akuptajrume. <sup>9</sup>Núnisan ii aneamu yachi Unisemu nijjiai winiawai. Niisha atum wéeaiti, tura Yusjai shiir wekaawai. Nu shuar ashí juí túrunamun ujatmaktatrume.

<sup>10</sup>Aristarku wi sepunam tsaniñkia pujamur amikmaatmarme. Núnisan Markus, Pirnapí kaná yachia nu, amikmaatmawai. Niisha nui jeamtai antukmarum núnisrum penker wáinkiatarum. <sup>11</sup>Justu Jesus náartin amikmaatmarme. Júchik áiniawai Rúmanmaya Israer-shuar winia Yúsnan etserkatin atutkaru ainia nu. Túmainiak ti shiir ayamtikruiniawai. <sup>12</sup>Épaprassha, atum weeá, Krístunun etserin asa atumin amikmaatmarme. Niisha ashí tsawant Yúsán áujeak Yusjai kakaarum tuke shiir Yus wakera nu túrak tusa seatramprume. <sup>13</sup>Wisha Épapras atumin ti enentáimturman nékajai. Núnisan Rautiséanmaya shuarnasha tura Iarapurisnumia shuarnasha ti páchiniawai. <sup>14</sup>Rukas, aneamu tsuákratin, núnisan Témassha amikmaatmarme.

<sup>15</sup>Tura Rautiséanam pujuinia nú Yus-shuarsha amikmaatruatarum. Núnisan Nímpiassha tura ni jeen irunainia nú Yus-shuarsha amikmaatruatarum. <sup>16</sup>Átum ju papí áujsarum umikrum Rautiséanmasha nuyá Yus-shuar áujsarti tusarum akupkatarum. Tura atumsha núnisan

Rautiséanmayá papí támatai atumsha áujsatarum. <sup>17</sup>Tura ju Arkipiu titiarum: “Ii Uuntri Jesus ni takatrín suramsa nu péñker umikta” tawai, titiarum.

<sup>18</sup>Wi, Papru, winia uwejrújai júchiniak áatkun amikmaajrume. Sepunam pujajna ju enentáimturatarum. Yus shiir yainmakarti. Nuke atí.

# Papru

## TISARÚNIKIANMAYA SHUARAN

### EMKA papín aar akuptukma

---

Papru ni tsaniakmarijjaj Yus-shuaran áatramiania nu

**1** <sup>1</sup>Wikia Pápruitjaj. Wisha Serpanujaj tura Timiutéujaj Tisarúnikianmaya Yus-shuar ajasuitrumna nuna áatjarme. Atumsha Yus-shuar asarum Apa Yúsnaitrume, tura Uunt Jesukrístunuitrume. Ii Apari Yus, tura ii Uuntri Jesukrístu waitnentrana ásarmatai, ti shiir imiatkinchanum pujustarum, tu wakerajrume.

Tisarúnikianmaya shuar Yus nekas enentáimtusar  
umirkatniun jintintiarmiania nu

<sup>2</sup>Iisha Yus áujkurkia atumniasha tuke enentáimtusar Yus shiir yuminsaji. <sup>3</sup>Atumsha Yus nekas enentáimtakrum umirkarumna nu nékaji. Núnisrumek, Yus aneakrum takaarme. Tura Jesukrístu tatí tusarum tuke tsawant nákarme. Nu neka asar, ii Apari Yus áujkur, nusha ashí enentáimsar áujtajrume. <sup>4</sup>Yatsurú, Yus anenmarme. Anenma asa Winia arti tusa achirmakurmena nusha nékaji. <sup>5</sup>Enentáimpratarum. Iisha Yúsa Uwempratin Chicham atumin ujakmajnia nusha aya chíchamjain tíchamji. Antsu nú arant, nu chicham nekasaiti tusar Yusa Wakaní kakarmarijjaj tímiaji. Tura átum péñker matsamsarat tusar atumjai pujusar shiir iruntrar wekasarmiaji. Nusha paant nékarme.

<sup>6</sup>Atumsha yamaikia íksarmek ii túramiaj nu, tura ii Uuntri Jesukrístu túramia nu túrarme. Itiurchat ajin Yus-Chicham umikiurme. Tura

wáitiatrumek Yusa Wakan̄i shiir enentáimtikramkui warasrum pujarme. <sup>7</sup>Nu túrakrum ashí Masetúnia tura Akaya nun̄kanmaya Yus-shuarsha shiir wekasatin jintintiarme. <sup>8</sup>Tuma asarum Uunt Yusa chichamē ti ipiamparurme. Tuma asamtai Masetúnia tura Akaya nun̄kanmaya shuar nuna nékainiawai. Tura nú nan̄kaamas Yus nekas umirkarmena nuna ashí aents nékainiawai. Nuna nékainia ásar ii étserman atsumainiatsui. <sup>9</sup>Antsu átum in péñker itiaamun nii íksan̄ ujatmainiaji. Tura nuyasha ántar-yus enentáimtustin iniaisarum nekas iwiaaku Yus nekas enentáimtusrum umirkarumna nunasha ujatmainiaji. <sup>10</sup>Tura nuyasha Yusa Uchirī Jesus jakamunmayan̄ Yus iniantkimia nu, nayaimpinimayā tatí tusarum átum nákamuncha ujatmainiaji. Iis, Jesus Niñkiti Yusa kajetaírī tsawanrī jeattana nuyá uwemtikrampratin.

### Yus-chichaman paant ujakarmiania nu

**2** <sup>1</sup>Atumsha nékarme, yatsurú, iisha ántar atum̄in̄ jeachmaji. <sup>2</sup>Antsu itiurchat wáinkiaitiatar arantutsuk shiir Uwempratin Chichaman ujakmajrume. Iis, nuik Jiripius péprunam incha katsekramkarmiaji. Tura nú arant, ti itiurchat wáinkiamiajai. Túmaitiatan Yus yáintkui Yusa chichamen̄ ujakmajrume. Nuka atumsha ti péñker nékarme. <sup>3</sup>Warí, iisha Yus-Chicham atumin̄ ujakmiaj nu nekasauyi. Tura yajauch enentáimsan, anan̄katjarum tusan tichamjarme. <sup>4</sup>Antsu Yús in péñker enentaimturmas Uwempratin Chicham etserkatarum tusa akatrampramiaji. Tuma asamtai núnisrik étseraeji. Túrash aya aents waramtiksatái tusar étsertsuji. Antsu Niñki Yúsak ii enentáin̄ nekartamin̄ asamtai, shiir enentáimtiksatáitsar túraji. <sup>5</sup>Átumka nékarme, péñkesha shífirmach chichasan anan̄kachjarme. Nuyasha, kuit achiktaí tusar ántar chichaschamji. Núnaka Yús nékawai. <sup>6</sup>Iisha Kristu akatramur̄nt̄ji. Tuma asar ni kakarmarij̄iāi akupkatin takakuji. Páchitsuk túramniauji. Túrash waantu ajastaj tichamji. Nuyá atumsha tura chikichcha in waantu awajtamsataj tákuisha iikia nakitmiaji. <sup>7</sup>Antsu uchi kuírchin̄ ni nukurí péñker iis tsakatmana áintsarik iikia atumniaka shiir fismajrume. <sup>8</sup>Iisha ti shiir aneajrume. Tuma asar Yús-Chicham ujaktaí tusar ti wakerukmaji. Tura aya ujakar iniaisatin wakerukchamji. Antsu ii jákatniuitkiursha iniaisachāaji, atumín̄ ti anea asar<sup>i</sup>. <sup>9</sup>Yatsurú, ii atumaj nu sumarmaktaí tusar kakaram takakmasmaj nu ¿kajinmatkintrumek? Atsá. Nékarme. Iis, Yús-Chicham étserkur, tsawaisha káshisha takasmiaji. Nusha, akirkata, t̄ij̄i tusar takakmasmiaji.

<sup>10</sup>Yatsurú, atum̄jaī pujumiaj nū iisha Yús wakerana nu túrimiaji, tura yajauch túrutsuk shiir wekasamiaji. Nuj̄aī incha chikichkisha yajauch chichartamkatniusha atumiayi. Nuka atumsha nékarme tura nú arant Yús nékawai. <sup>11</sup>Tura atumniasha an̄kant an̄kant Yúsnum ikiakármajrumna nu nékarme. Tura uchin̄ ni apar̄ī átsan̄keana nútiksarik

shiir enentáimtikramajrumna nusha nékarme. <sup>12</sup>Tura Yúsjaí shiir wekasatarum tímiajrumne. Yus nan̄kaamas uunt asa ashí akupeawai. Tura Yus-shuaraitrumna nuna, Winin pachiinkiarat tusa, Yus untsurmarme. Yus untsurma asamtai Níniuitrumne. Niiniu asarum Yusa uchirja núnisrumek wekasatniuitrumne.

<sup>13</sup>Yus-Chicham ii étserma antukrum, aya áentsnumiānchaiti tímiarme. Yúsnumiāiti tímiarme. Nu tiniu asarum umirkamarme. Kame nekas tárume. Ii étserjinia nu nekas Yusa chichamēnte. Átum nu chicham umirka asakrumin, atumí enentáin kakaram ajastinian amaawai, Yus-Chicham asa. Átum Yus-Chicham umirkaru asakrumin iisha tuke tsawant Yus yúmiñkijai. <sup>14</sup>Yatsurú, ju nekaatarum. Aya atumek wáitiatsrumne. Ashí Jutía nun̄kanam Israer-shuar, ni shuarin̄ketiat, Yus-shuaran wáitkiascharmakia. Iis, Yus-shuaran Kristu Jesusan umirkaru ásarmatai wáitkiasarmiayi. Yamaikia atumniasha atumí shuárin̄ wáitkiarmainiawai. Nujai Jutía nun̄kanmaya Yus-shuarjai métekrak ajasurme. <sup>15</sup>Niisha Israer-shuaraitiatan̄ Yus-Chichaman etserin armia nuna nuamtaketiāt máawarmiayi. Tura nú weeák Uunt Jesusnasha máawarmiayi. Tura incha aa jiki akuptamkarmijai. Maaj, niisha Yúsan shiir enentáimtikiainiatsui. Tura núnisan̄ ashí áentsun kajerainiawai. <sup>16</sup>Warí, Israer-shuarcha Uwempratin Chicham ujaktaj tákurnisha niisha suritramainijai. Nuna túruiniak yaunchu tunaan túriarmia nújain̄kia nan̄kaamas yamaikia túrawarai. Pai, túrasha yamaikia Yusa kajetairij imiá tsumaj ana nuí pujusarai.

### Papru ataksha Tisarúnikianam irautajtsa wakerimiania nu

<sup>17</sup>Iisha, yatsuru, ishichik tsawant atumiya kanakir jeachat pujayatrik, atumjaisha wáinniaiyachiatrik tuke ii enentáinkia enentáimtimjarme. Tuma asar ataksha atumin iistai tusar ti wakerimji. <sup>18</sup>Nekas winitiaitsar wakerimji. Imia wíkisha winitniun ti nukap enentáimsamjai. Tura iwianchi uuntri Satanás tuke nuna suritrammijai. <sup>19-20</sup>Atumsha shiir wekasa asakrumin iisha ti shiir enentáimsar waraaji. Nu tuma asar Uunt Jesukristu tátintri shiir enentáimsar nákJai. Nii támatai imiá warastatji. Atumin Yus-shuar awajsa asar, Nii támatai atumsha iijjai Jesus shiir inkiuntatji. Tuma asamtai nu enentáimsar tawasap achiktinia áintsar waraaji.

**3** <sup>1-2</sup>Iisha ataksha atumin ístaitsar ti wakerimji. Tura tujintiakur iikia Atenas péprunam juákur ii yachi Timiutéu atumin írmainiarat tusar akupkatai, timiaji. Iisha Kristui Uwempratin Chicham etsermiaj nuí, Timiutéuka iijjai métek takasuiti. Tuma asa niisha Yusa takatrin takáa asa atumniasha Yusai kakartarum turamarti tusar akupkamji. <sup>3</sup>Tura nú arant, itiurchatan wániuk iniaisarain̄ tusa ikiakátmararti tusar Timiutéu akupkamji. Yatsurú, átumka nékarme, ashí Yus-shuaraitjinia nuka



páchitsuk wáitsatniuitji. Iis, tuma asamtai atumsha ti nekas ititurchatnum pujarme, Yus-Chicham umirka asarum. <sup>4</sup>Iimiatarum, atumjaj̄ nuik tuke pujumjiniã nū “iisha wáitsartatji” tíchamkajrum. Iis, túrunachaik. Nuka nékarme. <sup>5</sup>Tura atumin íwianch tunaanum ajunmarchariash tusan, wisha kúntuts enentáimsamiajai. Tura ánrar takaschajiash tu enentáimsamiajai. Tuma asamtai nekaataj tusan ti wakerakun, wisha ti nukap tsawant nákaschamiajai. Antsu wárik Timiutéun akupkamiajai. Yúsjāi péñkerash wekainia tusan, “nu inintrusam ikiuuta” timiajai.

<sup>6</sup>Tura yamaikia Timiutéu Tisarúnikianmaya waketki tayi. Niisha taa, átum Yus aneakrum shiir enentáimtamuncha ujatmaji. Tura átum in anenma asarum tuke enentáimsar pujamuncha tura ii atumin ístaitsar wakerajnia núnisrumek atumsha incha írmaitiai tusarum wakeramuncha Timiutéu ujatmaji. <sup>7</sup>Tuma asamtai, yatsuru, ashí ititurchat tura wáitsatin wáiniatrik átum Yus shiir enentáimta asakrumin iisha shiir enentáimji. <sup>8</sup>Atumsha Yúsjāi tariara weká asakrumin, shuar jaa péñker ajas enentáí chinkiana áintsarik enentáimji. <sup>9</sup>Yus péñker umirka asakrumin, iisha shiir waraaji. Warasu asar ii Yusr̄i ti yúmĩnkiaji. <sup>10</sup>Incha Yus akuptamkurnĩnkia atumiin tĩmiajaik jeartiai tusar wakeraji. Túrar Yusna nekaatin mash nékatsrum nu jintintiatai tusar tuke ti seaji.

<sup>11</sup>Atumiin weri ístinian ii Apar̄i Yussha tura ii Uuntr̄i Jesukrístusha in yáinmaktai tusar wakeraji. <sup>12</sup>Atumin ii aneajnia núnisan̄ Yus atumniasha mai anenai ajatniun tura chikichcha aneastinian enentáimtikramprartí. Tura nú nukap anenkrattain Yus amasartí tusar wakeraji. <sup>13</sup>Yus ikiakátmakui átum tunáa túrutsuk Yus umirkarum wekasatarum tusar ii Apar̄i Yus seaji. Ii Uuntr̄i Jesus Níiniurijjiāi winiak péñker wekaarmin tati tusar taji.

### Péñker túratniun Yus wakerana nu

**4** <sup>1</sup>Iikia Uunt Jesus akupkamuitji. Tuma asar nu kakarmajaj̄ atumniasha ju túratarum tusan akupeajrume. Atumsha iwiaaku pujarmena nū Yus shiir waramtiksataram tura tuke péñker túrukum wetarum tusar seajrume. Iisha nuik atumin unuiniarmajrumna nútiksarmek túratarum. <sup>2</sup>Uunt Jesusa akupeamurijjiāi tura nu kakarmajaj̄ atumniasha nuik unuiniarmajrumna nu átumka nékarme. <sup>3</sup>Atumin Yus wakerutmarmena nu júiti: “Shuar aya Win̄in sumama pujusat tusan chikichkinkesha shuar tsanirmaashti”. <sup>4-5</sup>Yus-shuarcha ainia nu, Yúsã nékainiachu ásar, aya nĩki enentáimtumasar aya ni ayash̄i wakeramunak umiktinian wakeruiniak nuwan enentáimtuiniawai. Atumsha núnisrumek túrawairap. Antsu atumsha atumí nuar̄i péñker enentáimtusrum shiir aneasrum ayastarum. <sup>6</sup>Nú arant, amesha ame yatsum anan̄kam ni nuar̄i yajauch awajtusaip. Nu túrakrumnĩnkia ii tĩmiajrumna nútiksã Uunt Yus ti kakaram asutiámawartatui. <sup>7</sup>Warí, Yus

incha pénkercha yajauch túratarum turamchaitji. Antsu aya pénkerak túratarum turamji. <sup>8</sup>Tuma asamtai shuar ju chichaman nakitiakka áentsun nakitiatsui, antsu Yúsan nakitraití. Tura nu Yussha ni Wakanin amaawiti tunaan túrashtinian.

<sup>9</sup>Tura yamaikia nuamtak Yus-shuar aneniastin ana nuna ti neka asakrumin áatrashtatjarme. Warí, imia Niniki Yus atumin mai anenai ajatniun jintintramawarmatai nékarme. <sup>10</sup>Iis nútiksarmek aneniatsrumek ashí Masetúnianam matsatainia nujai. Túrasha, yatsuru, atumí anenkrattairi nú nukap ajasti tusan, seajrume. <sup>11</sup>Yamaikia tímiaj nútiksarmek, yayauchin túruinia nuí wekatsuk, chíkich shuarna pachittsuk, atumí takatriin shiir ankant pujusrum atumí uwejejain takakmá pujutarum. <sup>12</sup>Átum táasairum tusan tájarme. Túrakrumniñkia atumniasha chíkich shuar pénker enentáimturmasartatui.

### Kristu tátintri

<sup>13</sup>Yatsuru, Yus-shuarcha ni shuari jakamtai “atakka wáinkiashtatjai” tusa ti kuntuts enentáimainiawai. Tuma asamtai atumsha nútiksarmek kúntuts enentáimsairum tusan juna tájarme. Jákaru ainia nu urukawartinkit paant nekaatarum. <sup>14</sup>Jesus jákayat nantakchamkia. Núnisan Yus Jesusan iniantkin Nin umirkar jákaru áiniana nunasha iniantkittiawai. Paant nékaji nusha. <sup>15</sup>Tuma asamtai Yus-Chicham nekaprutamnia nuna atumniasha jintintiajrume. Iisha tuke iwiaaku pujarin Kristu táakuisha jákaru ainia nuka ikiuakur émkishtatji. <sup>16</sup>Antsu Yus akupeakui, Yusa suntarí uuntri untsumkui tura Yusa kachurin umpuarmatai Uunt Jesukristu untsumuk Yus pujamunmaya tarattawai. Nuñkia Krístunu ajarar jákaru áiniana nu iwiarsumunmaya nantakiartatui emka. <sup>17</sup>Tura nuyá iisha Yus-shuar tuke iwiaaku pujajnia nu Krístujai yuranminiam ajapén inkiunaikiartatji. Nuní ashí nayaimpiniam ii Uuntri Jesukristujai tuke iwiaaku pujusartatji. <sup>18</sup>Tuma asamtai ju shiir chicham atumin ujakjana jujai mai ikiakánai ajatarum.

**5** <sup>1</sup>Túrasha, yatsuru, ni tátintri waritin tura warí tsawantai, nuka áatratin atsumatsrume. <sup>2</sup>Ni tátintri júnis átin nékarme. Kiritniunam kasá shuar kasamkataj tusa tátatna nu nekaachminiaiti. Núnisan nákatasuk pujuinia Uunt Kristu tsawantri jeattawai. <sup>3</sup>Ashí shuar “Pai, yamaikia ti nekas shiir pénker pujuiniaji” tu matsatainiaj, aya aneachma nunka mesertin tsawant jeattawai. Nuwá ajamtin aya aneachma jatema áintsan, nékachmanum átatui. Túmakui pisartin penké atsuttawai. <sup>4</sup>Túrasha, yatsuru, átumka ujakmaitrume. Nu tsawant atumsha aneara pujarmin jeattawai. Atumsha aneara pujá asakrumin kasá áintsan tarutrámashatui. <sup>5</sup>Enta, átumka tsáapninium wekáa asarum Yus-shuarmek nékaitrume. Iikia kiritniumianchuitji. <sup>6</sup>Nu tuma asar, chíkich uruka núnisrik, ii enentáin kanartinia núnisrik

“Warí, winia itiurtawa” tíchami. Antsu naka enentáimsar anearmi. 7Iis, kashi kanarchatniukait. Tura nampeena nu kashi nampeenawai. 8Túrasha iikia shiir tsáapninium wekainiaj nuka naka enentáimprar tuke nampetsuk pujustiniaitji. Suntar ni nemasrj anan̄kruawaj̄n tusa anear wekasatniuiti. Tura iisha núnisrik íwianch yajauch awajtamsaj̄j tusar anearmi. Yus enentáimtusar aneetniuitji. Tura núnisrik iisha, ju nun̄kanmaya uwemprar Yúsaj̄ tuke pujustatji, tu enentáimprar wetái. 9Páantchakait. “Jinium wéchatniuitrume” Yus incha túramji. Antsu ii Uuntrj̄ Jesukrístujaj̄ uwempratniun tsan̄katramkaitji. 10Nijijaj̄ métekrak iwiaaku ami tusa Jesukrístu in jarutramkamiaji. Nu tuma asantai iisha ii ayashijaj̄ iwiaaku pujakrishá Nijijaj̄ iwiaakji, tura ii ayashijaj̄ jáakrishá Nijijaj̄ tuke iwiaakji. 11Tuma asantai tuke túrarmena núnisrumek, shiir enentáimtiknaisarum mai ikiakánai ajatarum.

### Papru Yus-shuaran jintintiamiania nu

12Yatsurú, juna seajrume. Atumjaj̄ pujuinia nú shuar Yúsnan takakmainiakui shiir enentáimtustarum. Jintintramuk chichartamainiakui umirkatarum. 13Yúsnan takainia ásarmatai ti péñker enentáimtusrum aneestarum. Tura yajauch awajnaitsuk ti shiir nawamnaikiarum matsamsatarum. 14Tura junasha seajrume, yatsuru. Takastinian nakitiana nusha chicharkatarum. Tura yaweena nusha ataksha enentáimtikrarum ikiakártarum. Kakarmachu ana nusha yáintarum. Tura ashí shuarjaj̄ kajetsuk katsuntrarum wekasatarum.

15Aneartarum, yatsuru. Chíkich yajauch túrutmamtai amesha nútiksamek yapajkiaip. Antsu nuka túrutsuk átumka mai péñker awajnai ajatarum. Tura nú arant, ashí nun̄kanmasha ashí shuarsha nútiksarmek túratarum. 16Tuke shiir warasrum pujustarum. 17Tuke tsawant iniaitsuk Yus áuj̄satarum. 18Péñker pujakmesha, itiurchat pujakmesha ashí warí wáiniam nujsa Yus shiir yum̄nsatarum. Kristu Jesusaj̄ Yus-shuar ajasutiram nu túratniun Yus wakerawai.

19Ji ikiajniaktinia núnisan̄ Yusa Wakanj̄ enentáimin keana nuka tunaajaj̄ téenmamtikiarum ikiajniakairap.

20Yus jintintrar akupkamu asa péñker chichaman etserainia nu nakitirairap.

21Ashí etserkamu ana nu nekasashit tusarum nekaatarum. Túrarum aya péñker ana nuke achiktarum. 22Ashí yajauch ana nuyanka kanaktiarum.

23Yuska, imiatkinchanum wekasatin amaana nu, atumin takamtsuk shiir awajtamsartí. Tura ii Uuntrj̄ Jesukrístu táatsaj̄n, atumí wakanj̄ atumí enentaj̄ tura atumí ayashishá mash métek tunaajaj̄inchu awajtamsati. 24Yus atumin untsurmakmarumna nu tímianak uminiaiti. Nii tana nuna yawetsuk túrattawai.

**Amuamunam amikmaatin**

<sup>25</sup>Ashí yatsurtiram winiasha Yus áujtursatarum. <sup>26</sup>Ashí Yus-shuar árum nu, amikmaaniatarum. <sup>27</sup>Winia Uuntru Jesukrístu chichamejají juna tájarne. Ju papí ashí Yus-shuar antukarti tusarum ashí iruntramunam áujtsatarum. <sup>28</sup>Ii Uuntri Jesukrístu atumin yáinmákartí. Nu atí.

# Papru

## TISARÚNIKIANMAYA SHUARAN

### ATAKSHA papin aar akuptukma

---

Papru ni tsaniakmarijjaj Yus-shuaran áatramiania nu

**1** <sup>1</sup>Wikia Pápruitjaj. Wisha Serpanujaj tura Timiutéujaj iruntran atumin Tisarúnikianmaya Yus-shuar árumna nuna ju papin áatjarme. Atumsha ii Aparí Yusna tura Uunt Jesukrístunu ajasuitrume. <sup>2</sup>Tuma asakrumin ii Aparí Yus tura ii Uuntri Jesukrístusha waitnentrama ásarmatai yáinmakar péñker awajtamsarat tusan wakerajrume.

Kristu támatai tunáa shuáran Yus asutiáttawai

<sup>3</sup>Yatsurú, átum péñker matsatu asakrumin iisha Yus tuke yúmin̄kijaji. Átumka Yus nekas enentáimtustin nú núkap nekaakrum wéarme. Tura nuamtak aneniastincha nú núkap nékarme. Nu tuma asamtai Yus yuminsatniuitji. <sup>4</sup>Átum Yus-shuar asakrumin chíkich shuar atumin yajauch awajtamainiawai. Tura itiurchat wainiu asarum ti wáitiarme. Nu tuma aj̄n átumka katsuntearme, tuke Yus enentáimta asarum. Nu tuma asakrumin, iisha Yus-shuar matsatainia nuka warasar ujainijaji. <sup>5</sup>“Yusa akupeamur̄in pachiinkiamniaitrume” Yus túramprume. Nūi pachiinkiat̄aj tau asarum ju nuñkanam wáitiarme. Tura wáitiakrumsha nuna nan̄kaamas iwiarnaruitrume nūi pachiinkiat̄in. Kame nújaj̄nkia Yus atumin achirmak péñker túrait̄i, nuka páantait̄i. <sup>6</sup>Núnisan̄ atumin wáitkiarmainia nunasha Yus tímiatrusan̄ wáitkiasartincha nekas péñkerait̄i. <sup>7</sup>Tura wáitiarmena nusha Yus f̄ij̄jaj̄isha ayamtikramprartin

pénkeraiti. Ii Uuntri Jesukrístu ji keana ímianisan kakaram suntarijiaí nayaimpinmaya tara wantinkiamtai, nu tsawantaj Yus ayampratniun suramsartatji. <sup>8</sup>Tura nú tsawantajsha Yúsán nékainiatsna núnaka ii Uuntri Jesukrístu ti asutiátajtsa tátatui. <sup>9</sup>Taa, nincha menkkatniunam akupkartatui. Chichaak “Wi pujajna juyá akupeajrume” títiatui. Tura winia ti kakarmar atsana nu akupeajrume, átum winia umirtukcha asakrumin” nin tiartatui. <sup>10</sup>Kame Uunt Jesukrístu tátin tsawantri jeamtai, ni shuari, ni enentái pénker awajrsaru áinia nu, ni náarin shiir pachisartatui. Tura Yúsán umikiaru ásar, ti shiir enentáimsar Jesukrístun íisartatui. Ii ujakmajrumna nu antukrum umirka asarum atumsha nu pachiinkiatarme. <sup>11</sup>Nu tuma asamtai ii Yusrin atumin tuke áujtajrume. Yus atumin achirmakuitrume. Nuiñkia Yuska atumí enentáin takas Nii wakera nujai métek awajtamsati, taji. Yus umirka asarum pénker wekasataj tusarum wakerarme. Túrarum Yus enentáimtusrum pénker túratin wakerarme. Tura wakerarmena nu umiktin Yuska ni kakarmarijiaí yáintí, tu áujtaji. <sup>12</sup>Átum pénker wekasa asakrumin chíkich shuarsha ii Uuntri Jesukrístu náarin nankaamantu enentáimtusartatui. Nusha auka ii Yusrí tura ii Uuntri Jesukrístu waitnentáimturmasar pénker wekasatniun yáinmakui túrarme. Túramtai chíkich shuar shiir enentáimturmasartatui.

### Tuke Tunaarintin wantinkiattana nu

**2** <sup>1</sup>Tura, yatsuru, ii Uuntri Jesukrístu tátatna nuna tura Nijjiaí inkiunaiktatjinia nunasha ujaktinian wakerajrume. <sup>2</sup>Chíkich shuar anankramawar “Uunt Jesukrístu tsawantri jeayi” tu ujatmaktaj tusar wakeruiniawai. “Iimiarmaj nujai nékajai” turamainiakuiasha, “chícham étserman antukmaj nujai nékajai” turamainiakuiasha, tura “Papru papí áarmari nuna takui nékajai” turamainiakuiasha, páchim enentáimprairap. Tura sapijmiakairap tusan seajrume. <sup>3</sup>Penké anannawairap. Nekaatarum. Nu tsawant jeatsain Yúsnumia kanaktin átatui. Tura nú arant, Tuke Tunaarintin, emesnartatna nu wantinkiattawai. <sup>4</sup>Niisha aya wíniak enentáimtursarat tusa wakerak, ántar-yusnasha tura nekas Yúsasha shuar tikishmatrarain tusa ti nakitrattawai. Niñki ti nankaamantu enentáimtumas, Yusa nuke ajas, Uunt Yusa Jeeen wayáa pujustatui. “Júiti Yus” shuar turutiarat tusa mash túrittaiawai. <sup>5</sup>Yatsurtiram, wi atumjai pujakun nuna ashí ujakmajrume. ¿Nuka kajinmakniurmek? <sup>6</sup>Yámaikikia, ni tsawantri jeatsain, Tuke Tunaarintin wantinkiaíin tusa surimia nu nékarme. <sup>7</sup>Tunaasha yamaisha awai, tura paantcha. Túrasha tunaan surimia nu juramkitniuk taasai nu tunaaka paant átin. <sup>8</sup>Nuiñkia nu Tuke Tunaarintin wantinkiattawai. Tura Uunt Jesus ni wengjai umpuí aun máattawai. Tara ni wincharijiaí nuna amuktatui. <sup>9</sup>Nu Tuke Tunaarintin, iwianchi uuntri Satanás akupkam tátatui. Ni kakarmari iniakmastaj tusa,

arentsti túrachminian túrak anaṅkawartatui. <sup>10</sup>Jinium wémin ainia nú shuaran ashí tunáa ana nujají anaṅkawartatui. Nu shuar Yus-Chichaman nekas ana núnaka nakitraru ásar uwemprachmin áiniawai. <sup>11</sup>Iis, nekas ana nuna nakitia ásarmatai, ti anaṅmamawar wait-chichaman umirkarat tusa Yuska tsanṅkattawai. <sup>12</sup>Warí, niisha ni tunaarín wararainiak, nekas ana nuna nakitraru ásarmatai, Yuska “jinium wétatrume” tiartatui nuna.

### Uwempramin ainia nu

<sup>13</sup>Tura, yatsuru, Uunt Jesus aneamu árumna nu, iisha atumin enentámtusar ii Yusrî yuminsaji. Átum nekas ana nuka umikiurme. Tuma asakrumin Yusa Wakaní atumí enentáin pēṅker awajtamsaitrume. Nu tuma asamtai yámankamtaikniumiá Yuska “átum uwempramniaitrume” túramprume. <sup>14</sup>Nu túrunat tusa Yus wakerutmarme. Krístujají Uwempratin Chicham ii ujakjinia nujají Yus untsurmakmarme. II Uuntri Jesukrístu ti pēṅker pujana nuí pachiinkiamniuram tusan ujakmajrume, nú chichaman.

<sup>15</sup>Wátsek, yatsuru, Yusjají katsuártarum. Yus-Chicham etserkamu antukurmena nu, tura wisha áaran akuptukjarmena nusha kajinmatkiirap. <sup>16</sup>Ii Uuntri Jesukrístusha tura ii Aparí Yussha ti pēṅker ásar incha anenmatsjik. Tura waitnentrama ásar incha shiir enentámtikramji. Tura nú naṅkaamas ii tuke pēṅker pujustinian ikiurtamsaitji. <sup>17</sup>Nu tuma asamtai, pēṅker chichastarum tusa, tura pēṅker takastarum tusa Jesukrístuka shiir enentámtikramar ikiakátmarartí.

### Papru “áujtursatarum” tímiania nu

**3** <sup>1</sup>Nuyá, yatsurú, Yusa chichame shiir pampartí tusarum Yus áujtursatarum. Átum Yus-Chicham wakerukmarmena áintsan ashí nunṅkanam wakerukartí tusarum Yus seatarum. <sup>2</sup>Tura yajauch shuar, pēṅker ana nuna ti nakitiaiania nu, incha yajauch awajtamsachartí tusarum Yus áujkartustarum. Kame chíkich aents Yúsan umirkacharu áiniawai. <sup>3</sup>Túrasha Uunt Jesusak atumin iniaitsuk wáitmaktatrume. Tura atumin ikiakátmartatrume. Tura íwianch anaṅkramataj takui kíishturmaktatrume. <sup>4</sup>Kame Yus atumin yainmaktatrume, taji. Ii tájinia nu yamáí umíarme. Tura tuke umirkattarme. Nusha nekaar shiir enentáimji. <sup>5</sup>Uunt Yus yainmakartí ni aneṅkrattairín nekaatniun. Kristu itiurchatan katsuntramia núnisan atumniasha katsuntratniun Yus yainmaktí.

### Takastiniaitji

<sup>6</sup>Yatsurtiram, antuktarum. Ii Uuntri Jesukrístu chichamejají ju taji: “Nuyá Yus-shuar wi jintintramun nakitiaak aya wékana nu ikiuktiarum.”

7-8Ii túrajnia núnisrumek túratin nékarme. Júiiti: atumjai pujusmaj nui tuke takakmasmijai. Atumí yurumkarí iisha akikmakar yurummijai. Atumjai itiurchat áchatí tusar tsawajsha káshisha tuke takakmasmijai. 9Kame iisha, Kristu akatramu asar “yáintkiatarum” tíminiuji; túrasha nu tútsuk, ii túrajnia núnisrumek túratin nekaatarum tusar, iisha tuke tsawant takaamijai. 10Warí, atumjai pujumij nui “Takastinian nakitiana nuka yurumáshti” tíchamkají. 11Iis, atumiinia weeá, nánkamas enentáimiainiak tura nánkamas túruiniak penké takatsuk pujuiniawai, túramainijai. 12Nú shuáran ii Uuntri Jesukrístu chichamejai “Táksamtak shiir takakmasartí” tajai.

13Yatsurtiram, yawetsuk shiir túratarum. 14Ju papinium ii tájnia nuna, shuar umiktinian nakitiakuinkia “umichuiti” tákuram, ni natsarat tusarum ikiuktiarum. 15Túrasha “Yus-shuara nemasrinti” tiip. Áyatik jintintrata, tura Yúsaj enentáimtikrata, ame nekas yatsumeá áitkiasmek.

#### Papru aujsua ikiuamu

16Uunt Yuska, imiatkichu enentái susamniaiti. Jú Yus, itiurchatnum pujarminin atumin tuke imiatkichu enentáimtikramsarti. Uunt Yuska atumin pujurtamsarti, tajai.

17Jui wi Papru juna aajai. Wi papin akupeaj nui júnisnak winia náarun áaran apujeajai, wíniaiti tusan. 18Ii Uuntri Jesukrístu atumin ashí yainmakarat tusan wakerajrume. Nu atí.



# Papru

## TIMIUTÉUN

### EMKA papin aar akuptukma

---

**1** <sup>1</sup>Wi Papru Jesukrístu akatramurintjai. In uwemtikkiartin Yussha tura ii Uuntri Jesukrístusha winia akuptuku áiniawai. Jesukrístujai métek ti shiir ajastai tusar nákaji. <sup>2</sup>Timiutéu, ju papin áateajme. Wi ujakam Yus-shuar ajasu asam nekas winia uchirua áinkiaitme. Tuma asakmin Yus Apasha tura ii Uuntri Jesukrístusha ti anenma ásar waitnentrainiak imiatkinchanum ti shiir pujustinian yainmakarti.

#### Wait chichamjai anearta

<sup>3</sup>Masetúnia nunkanam wéakun “Ipisiu péprunam pujuuta” timiaj núnisnak tájame. Shuar nuj wait-chichaman jintin ainia nu suritkiarta. <sup>4</sup>Niisha Israer-shuara weatrin áujmatsamunak tura ni weatri naari ti untsurí irurtinniak Yus-Chichamjai nankaamas enentáimtuiniawai. Nunak áujmatsar tuke ántar tuiniawai. Nu túramuka Yus enentáimtusar Nin shiir umirkatniun yáinmatsji. Tuma asamtai nusha surítkiatá.

<sup>5</sup>Yus-shuar tuke enentáijjai Yúsán shiir enentáimtusar tura tunáa túrutsuk aya péñkera nuna wakerukar anenkartin ajastin áiniawai. Núnisan péñker ajasat tusar Yus-Chicham étsereaji. <sup>6</sup>Chíkich shuar juna iniaisar ántar chichaman áujmatainiawai. <sup>7</sup>Yúsnan nékachiat “jintinniuítjai” tuiniawai. Tura unuiniainia nuna nékainiatsui.

<sup>8</sup>Yus wakeramun nekaatin tura tunaan suritkiatin akupkamuka nekas péñkeraiti. Nu paant nékaji. <sup>9</sup>Kame akupniuka péñker shuaran itit awajsatniun akupenatsui. Antsu yajauch shuar juna túrin ainia nuna itit awajsatniun akupenawai: Tunáa shuarnasha, umichuncha, Yúsasha tura ashí Yúsancha nakitiainia nunasha, aparín máinniasha, nukurín

máinniasha, kame maṅkartinniasha, <sup>10</sup>nuwancha tura áishmaṅnasha tsanirma áinia nunasha, shuaran kasamak juu ainia nunasha, wáitrinniasha, tsanumniuncha, ashí nuna itit awajsatniun akupenawai. Kame ashí péṅkercha nuna iwiaratniun akupenawai. <sup>11</sup>Núnisaṅ tawai ti shiir uwempratin chicham Yus suramsamajnia nu. Nu chichamnaka etserkatniun Yus péṅker asa tsanṅkatrukuiti.

### Yus waitnenkartin asamtai Papru yumĩṅsamiayi

<sup>12</sup>Ii Uuntriṅ Jesukrístu shiir enentáimtururu asa Níiniun etserturkat tusa kakarman surusuiti. Túruta asamtai yúmiṅkiajai. <sup>13</sup>Wi Yúsan imiá yajauch chicharniuyajai. Yus-shuarnasha áinṅrarmiajai. Yusnasha katsekniuyajai. Túrin aiṅ Yus winia waitnentrurmiayi. Kame Jesuska Yus Anaikiamun nékachu asan wi túramu yajauchiiti tu enentáimchayajai. <sup>14</sup>Tura ii Uuntriṅ Jesukrístu ti nekas waitnentrurmiayi. Tura Jesukrístujai tsaniṅkia pujakui Yus nekas enentáimtustinniasha tura aneṅkartin ajastinniasha surusuiti.

<sup>15</sup>Ju chicham ti nekasaiti. Tunáa shuáran uwemtikrataj tusa Jesukrístu ju nunṅkanam taramiayi. Nunasha ashí shuar nekaatin áiniawai. Tura wikia ashí shuarjai naṅkaamas tunáan túriniaitjai. <sup>16</sup>Ti tunáa aiṅ Jesukrístu ti aneṅkartin ana nu paant nekanati tusa Yus winia waitnentrurmiayi Tuma asamtai chíkich shuar, wijiajai métek, Yúsan nekas enentáimtusar Nijijai tuke iwiaaku pujusartatui. <sup>17</sup>Yus tuke jacha asa tuke iniaitsuk akupniuiti. Wáinchataitiat imiá naṅkaamas nékaiti. imia Niṅki Yúsaiti. Tuma asamtai imia Niṅki tuke iniaitsuk ti shiir awajsatniuiti. Núnisaṅ tuke atí.

<sup>18</sup>Uchiru, Timiutéu, yáunchuya Yus-shuar ámin “Ju shuar péṅkeran túrattawai” túramarmia nútiksam yamaikia kakaram ajástá. Nii timia enentáimsam suntara áintsam Yúsna kakaram takastin asumprurta. Nuna tájame. Tura Yus tuke nekas enentáimtusam tura tunaan túrawajj tusam anearam túrata. <sup>19</sup>Chíkich shuar tunaajai anearcharu ásar Yúsan ikiukiarmai. <sup>20</sup>Iminúsha tura Arejántrusha núnisaṅ Yúsan ikiukiarmatai uunt iwianchnium surukarmajai. Nujai Yúsan ti yajauch chicharsacharat tusan túraitjai.

### Yus áujsatin

**2** <sup>1</sup>Wátsek, emka seajrume Yus áujeakum Yus yumĩṅsam ashí shuar yaiṅkiat tusam áujtusarta. <sup>2</sup>Imiatkinchanum pujusar Yusjajsha tura áentsjajsha shiir túratai tusar tura ashí akupin ainia nusha péṅker akupkarat tusar Yus áujtustiniaitji. <sup>3</sup>Áitkiasar seatin péṅker asamtai, uwemtikramajnia nú Yus wakerawai. <sup>4</sup>Ashí shuar nekas chichaman nekaawar uwemprarat tusar wakerawai Yus. <sup>5</sup>Aya chikichik Yus awai. Tura Jesukrístu aents ajas Yusjai áentsun nawamnamtikiartiniaiti.

<sup>6</sup>Ashí shuara tunaarín akikmatkataj tusa jákatniunam Jesukrístu surumakmiayi. Tura tsawant jeamtai nu chicham ashí shuarnum etsernaktiniuyi. <sup>7</sup>Nuna túratniun Yus winia akatar akuptukuiti. Israer-shuarcha nekas chichaman enentáimtusarti tusa Yus akuptukmiayi. Krístunu asan wáitrutsuk nekas tajai.

<sup>8</sup>Nu asamtai áishman̄ka kajetsuk yajauch tunaitsuk antsu péñker enentáijjaj̄i uweje takuiniar Yúsan áuj̄sarti. <sup>9-10</sup>Núnisan̄ núwaka iwiarmamuk nekasmiancha péñker enentáijjaj̄i entsararti. Chíkich shuar nu nuw̄an iis temashmarmaríncha, sháukríncha, kurimkiamuncha, iwiarmampramuríncha núnaka enentáimtutsuk antsu ni péñker túrunamun enentáimtusarti. Núnisan̄ áchatniukaīt nuw̄a Yús-shuar ainia nuj̄aj̄i. Ni péñker túramuj̄aj̄i nekas shiir awajmamsashtinkiait. <sup>11</sup>Núwaka takamtak pujusar umiiniak unuimiararti. <sup>12</sup>Nuw̄anka ashí iruntramunam unuiniartinniasha tura ni áishrín akupkatniuncha suritij̄aj̄i. Antsu takamtak pujustiniaiti. <sup>13</sup>Yus emka áishman̄kan Atañkan najanamiayi. Nuyá nuw̄an Épan najanamiayi. <sup>14</sup>Tura Yus timian umirkach Atañka anañnachmiayi. Antsu Épa anañna asa tunaan túramiayi. <sup>15</sup>Túmaitiat jurertin asa, emesnartinniumiã uwempraiti. Tura Yúsan nekas enentáimtak anenkartiniaitiuk tura esetar enentáimiuk péñker wekasatniuiti.

### Yus-shuaran wáinin

**3** <sup>1</sup>Shuar Yus-shuaran wáinkiatniun wakerakka péñker takatan achikiuiti. Nuka nekasaiti. <sup>2</sup>Tura Yus-shuaran wáinin ajastinian wakerakka chíkich shuar nin yajauch áujmattsachmin átiniaiti. Nuwá apatka áchatniuiti. Niisha péñker esetar enentáimin naka wekasatniuiti. Íraran ni jeen ti shiir itiaatniuiti. Péñker jintinkratin átiniaiti. <sup>3</sup>Nampechusha tura suiir enentáimtichusha átiniaiti. Aya kuítian ikiaun̄katniun enentáimtuschatniuiti. Antsu tsañka átiniaiti. Kajechusha átiniaiti. Chikichnancha wakerutkashtiniaiti. <sup>4</sup>Ni shuarín shiir akupeakui ni uchirísha umin tura shiir awajkartin ártiniaiti. <sup>5</sup>Kame ni shuarín akupkachminiaitkiun̄ka ¿itiurak Yus-shuaran wáinkiat? <sup>6</sup>Yus-shuaran wáinniuka yama Yus-shuar ajasu áchatniuiti. Túmaitkiun̄ka ti nan̄kaamantu enentáimtumak iwianchjaj̄i métek tunaan túrak sumamattawai. <sup>7</sup>Yus-shuarchasha nin shiir enentáimtustin ániawai. Núnischaitkiuin̄kia nin yajauch chicharainiakui íwianch wárik tunaanum ajuartatui.

### Yus-shuaran yain

<sup>8</sup>Núnisan̄ Yus-shuaran yaincha péñker asamtai ashí shuar nin shiir enentáimtustin ániawai. Nii tana nuna tímatrusan̄ umin átiniaiti. Nampechu átiniaiti. Aya kuítian ikiaun̄katniun enentáimtuschatniuiti.

<sup>9</sup>Yúsnan ti penker nekaatniuiti. Tura esetar enentáimsatniuiti. <sup>10</sup>Emka penker fístiniaiti nuyá penker wekaakka Yus-shuaran yain átiniaiti. <sup>11</sup>Nuwasha penker asamtai ashí shuarsha nin shiir enentáimtustin ániawai. Tsanumniuchu antsu esetar enentáimiar nii chichaa ímiatrusan umin átiniaiti. <sup>12</sup>Yus-shuaran yainkia nuwan apatkachu átiniaiti. Tura ni uchiríncha ni shuaríncha ashí shiir akupin átiniaiti. <sup>13</sup>Yus-shuaran yayak nekas penker takaakka shiir enentáimtusmin asa páchitsuk Kristu Jesus enentáimtamun arantsuk etserkamniaiti.

### Yusna ana nu imiá nankaamas penkeraiti

<sup>14-15</sup>Wárik íitniun wakerajme. Túmaitiatak sétaknasha Yus-shuarjai takastin nekaak tusan juna áatjame. Ashí Yus-shuar, iwiaaku Yusna ainia nu, nekas chichaman tuke emetawar akasmatainiawai. <sup>16</sup>Maa, imiá nekasaiti, Yus iwiainturmakma ashí nankaamas ti penkeraiti. Tura júiti:  
 Yuska aents ajas jú nunkanam paant wantinkiamiyai.  
 Yus Wakancha “ti shiiraiti” Nin tímiyai.  
 Yusa suntarisha Nin wáinkiarimiyai.  
 Ashí nunkanam nu etsernakmiyai.  
 Túramtai ashí nunkanmaya shuar umirkarmiiai.  
 Tura nayaimpiniam waketkimiyai.

### Amuukatin tsawantin

**4** <sup>1</sup>Yusa Wakani ti paant tawai, amuukatin tsawant jeakui untsurí aents Yus enentáimtustinian iniaisar antsu yajauch wakanin nemarsar íwianch jintíamun anturkartatui. <sup>2</sup>Yajauch shuaran anturkartatui. Nu shuar ni enentái narúa áinin ásar ni tunáa túramun penké enentáimtichu ániawai. Tuma asa shiir chichainiayatan wáitrin ániawai. <sup>3</sup>Nu shuar nuatnaikiatniun suritiainiawai. Núnisan chíkich chíkich yurumak yúatniuncha suritiainiawai. Warí, Yus ashí yurumkan najana asamtai Yus-shuar nekas chichaman nékainia ásar Yúsan yuminsar páchitsuk yuámin ániawai. <sup>4</sup>Ashí Yus najanamu penker asamtai nakittsuk antsu Yusan yuminsar yúatniuiti. <sup>5</sup>Yus-Chicham tana nújajisha tura yuuniak Yúsan yuminkias áujsamujai ashí penker ajasuiti.

### Jesukristu penker takarin

<sup>6</sup>Wi tájamna nu chíkich Yus-shuar jintintiakmeka Jesukristu penker takarin átatme. Tura ashí Yus-Chicham penker jintíamu unuimiaru asam nujai kakaram ajastatme. <sup>7</sup>Ántar chichamsha tura netse chichamsha enentáimtutsuk nekas Yusna ana nu túratin kakaram ajasta. <sup>8</sup>Kame ayash kakaram awajatsniusha ishichik penkeraiti. Antsu Yusna nu túratin kakaram ajastinkia imiá penkeraiti. Yamái ju nunkanmasha yáinmaji tura ukunmasha Yusjai pujustin asakrin nankaamas penkeraiti. <sup>9</sup>Nu imiá

nekas asamtai ashí shuar nuna enentáimtustiniaiti. <sup>10</sup>Nekas iwiaaku Yus ashí shuaran uwentikramniaiti, tura ashí Nin enentáimtuinia nú shuaran nekas uwentikratniuiti. Nu chicham imiá nekasaiti tu enentáimtakur katsekramainiakrincha kakaram takaaji.

<sup>11</sup>Nuka ashí ame jintíakum akupkatniuitme. <sup>12</sup>Ti úuntchaitkiumnisha nakitrampraraín. Antsu péñker túrakum Yus-shuar unuiniarta. Chichammijiaisha, túramurmijiaisha, anenkratmarmijiaisha, nekas Yus enentáimtamujiaisha, tura esetra enentáimsam Yusna péñker túramujiaisha niisha túrawarat tusam iniaktusarta. <sup>13</sup>Wi jeatsaín Yus-Chicham áujeakum shuar jintintiata. Túram Yus-shuar ikiakárarta. <sup>14</sup>Yus-shuara uuntri Yúsnan takastin anaitiamak uwejeñ awantramsarmai. Nuna túramainiak “Ju shuar kakarman Yúsnumiañ takustatui” túramarmia nu, kakaram ajasam tímiatrusam túratá.

<sup>15</sup>Tuke enentáimjai wi tájamna nu enentáimtakmin ame péñker túruki wéamun nekaawartatui. <sup>16</sup>Túramna nusha tura unuiniamna nusha péñker wáinmamkata. Nu túratin pimpikiip. Nu túrakmeka uwemprattame amesha tura ujainiam nusha uwentikrattame.

#### Yus-shuarjai itiuur túratniuit

**5** <sup>1</sup>Uunta nu kakantraip. Antsu nekas ame apa nútiksamek chicharkata. Nátsasha nekas ame yátsumeá nútiksamek shiir awajsarta. <sup>2</sup>Nuwa úuntchisha nekas ame núkua nútiksamek shiir awajsarta. Nuwa nátsasha nekas ame umaimia nútiksam shiir enentáimjai péñker awajsarta.

<sup>3</sup>Waje nekas atsumin ainia nusha yáinikiarta. <sup>4</sup>Tura waje uchirtiniaitkiuinkia tura tirankrinniuítkiuinkia, nu shuar wajen wáinkiarti. Emka ni shuarín péñker wáinkiatniun unuimiararti. Ni aparí anemia núnis awantuiniak shiir wáinkiarti. Núnaka Yus ti shiir enentáimtawai. <sup>5</sup>Nekas waje nínki pujana nu Yúsán enentáimtak tsawaisha káshisha iniaitsuk Yúsán áujeawai. <sup>6</sup>Antsu aya wárastiniak wakera nuka iwiaakiat jaka áintsankete. <sup>7</sup>Tura wajenka ni shuari wáinkiartí. Yus-shuaran yajauch chicharnaktin atsutí tusam wi tájamna nu ashí Yus-shuar ujakarta. <sup>8</sup>Shuar ni jeen pujuinia nuna nekaska wáinkiatniuiti. Tura nuyá chíkich shuárnasha yáintiniaiti. Túrachkuñka Yus tana nuna umiátsui, tura Yus-shuarcha nujai nankaamas yajauchiiti.

<sup>9</sup>Yusa kuírjiaí yáinniaiktiniaitkiuñka waje sesenta (60) uwí nankaamas takustiniaiti. Tura chikichik aishriniak takusu átiniaiti. <sup>10</sup>Ti paant péñker túrin átiniaiti. Ni uchirín péñker tsakatmaashit, íraran péñker táata tíniuashit, nekasmiancha enentáimtumar Yus-shuaran yáiniaashit, wáitiainia nuna waitnenniuashit, tura chikichnasha péñker túriniaitkiuñka maak.

<sup>11</sup>Tura sesenta (60) uwí takakchaka chíkich wajejai iruraip. Ni ayashi wakeramuri Krístuiya kanamtikiainiawai tura ataksha nuatnaikiatniun

wakeruiniawai. <sup>12</sup>Tura emka enentáimtiarmia nuna iniaisar sumamainiawai. <sup>13</sup>Nu arantcha nakimiainiak ántar irauwear chikicha itirchatrin áujmatsachminia nunasha áujmatin ániawai. <sup>14</sup>Nu asantai waje úchipiak ainia nuka uyurtukar uchin takusarti. Tura nuwa nuatkamu takastinia nuna túrawartí. Tura ni túrunamurijjaj in kajertamainiaj nú shuar yajauch enentáimturmarcharti. <sup>15</sup>Kame nuik chíkich chíkich waje Krístuiya kanakiar iwianchin nemarsaru ásmatai nuna tájai.

<sup>16</sup>Áishmansha nuwasha Yus-shuar ainia nu ni shuariin waje ákuinkia Yusa kuítrin seatsuk nii yaintí. Nujaj chíkich wajén nekas atsumainia nuna Yusa kuitri yáintatui.

<sup>17</sup>Yus-shuara uuntri Yus-shuaran péñker wáinkiarua nu, nekas shiir enentáimtustin ániawai. Tura akinkiamniasha ániawai. Nekaska Yus-Chichaman etserkatniuncha tura ununiartinniasha tuke takaaka imiá shiir enentáimtustinaiti. <sup>18</sup>Yus-Papiniumsha núnisan áarmaiti:

Jiñkiaia saepen pakartaj tusa turu takaak nájakui ni nujj  
jinkiatáshtinaiti. Antsu ni wakerak yuati. Tu áarmaiti.

Tura nu arantcha áarmaiti:

Takakmasua nu nekas akinkiatniuiti. Tu áarmaiti.

<sup>19</sup>Chikichik shuarak Yus-shuara uuntri tunaarin etsertukmatainkia anturkaip. Antsu jímiarsha menaintiusha tsanumtsuk métek tuiniakui anturkata. <sup>20</sup>Chíkich shuarsha ni tunaarin ikiuktinian nakitiainia nu, ashí iruntramunam chicharkarta. Chikichcha, nuna ísar, ashamkarti. <sup>21</sup>Yussha ii Uuntri Jesukrístusha tura nayaimpinmaya suntarsha ímiainiamunam “túrata” tájame. Ashí shuarjaj niisháa enentáimtsutuk métekrak túrata. <sup>22</sup>Yus-shuara uuntri atí tusam wárik anaikiaip. Wárik túramka chikicha tunaarin sumamattame. Ashí tunaanum penké pachiiinkiaip.

<sup>23</sup>Wakemjaj jau asam aya éntsak úmutsuk karía ishichik pachimpram umarta.

<sup>24</sup>Chíkich shuara tunaari wáitsatin imiá paant ániawai wáitsatin tsawant jeatsain. Tura chíkich shuara tunaarinkia paantcha ániawai antsu ukunam paant nekanawartatui. <sup>25</sup>Núnisan péñker túramusha ti paant ániawai. Tura yamá páantchaitiat tuke paantcha áchamniaiti. Páchitsuk nekanattawai.

**6** <sup>1</sup>Takarniutirmesha, atumí uuntri ti shiir umirkatarum. Túrachkumniñkia chíkich shuar Yusnasha ii unuiniamuncha yajauch áujmattsartatui. <sup>2</sup>Atumí uuntri Yus-shuar ániakka aya Yusjaj yatsum asantai nakiarchatniuitrume. Antsu nuna nankaamas péñker takarsatniuitrume. Warí, ame yayamna nu Yus-shuarchak ainia, tura ame aneamu yatsumchak ainia. Ame, Timiutéu, tu jintintiata.

### Yusna wakeruktincha tura kuit wakeruktincha

<sup>3</sup>Shuar ti shiir naka chichaman ii Uuntri Jesukrístunu ana nuna nakitiak antsu niisháa chichaman étserkunka <sup>4</sup>nu shuar nankaamantu enentáimtumayat

ántraiti. Ni enentáimmianak chichaak aya ántar chichaman antumtiknaikiatniun chichaawai. Tura nu chichamjaj nupetmaktaj tusar nankaamas áujmatainiak kajernaikiar tura katseknaikiar péñker enentáimtunaisuk <sup>5</sup>tuke kakannainiawai. Tura tu aujmatnaisatniun wakeruiniiana nú shuar nekas-chichaman nékachu ásar aya tunaan enentáimtin áiniawai. “Yusna ana nujaj kuítrintin ajasminiaiti” tuiniawai. Nu shuar pachisaip. <sup>6</sup>Shuar takakna nujain waraakka Yusna ana nujajsha waraak ju nunkanmasha tura nayaimpinmasha nekas kuítrinniuiti. <sup>7</sup>Iis, ju nunkanam misuk támaji; núnisar misuk jiinkittiaji. <sup>8</sup>Tuma asantai yurumkasha tura entsataisha takakkurkia nujain warasa pujustiniaitji. <sup>9</sup>Antsu kuítrintin ajastaj tuinia nu, tunaanum awañkemkar iniainiawai. Tura antra nuna wakerukar itiurchatan wáiniainiawai. Nujaj emesratniunmasha jeainiawai. <sup>10</sup>Kame kuit aneatniuka ashí tunáanum úsutmakminiaitji. Chíkich shuar nuna wakerukar Yus enentáimtustinian iniaisar ti itiurchatjaj yajauch awajmamsarai.

### Yusna nu túrunat tusam kakaram ajástá

<sup>11</sup>Antsu ame Yus-shuar asam nuyá pisarta. Yus nekas enentáimtakum péñker túrata. Waantu enentáimtsuk Yus péñker umirkata. Aneakum katsunrata. <sup>12</sup>Yusna nu túrunat tusam kakaram ajástá. Tuke amuicha iwiaakma emetata. Nu túratniun Yus anaitiamkaiti, tura ame Yus nekas enentáimtamun untsurí shuar iruntramunam etserkaitme. <sup>13</sup>Yuska ashí iwiaaku átinian súwiti. Jesukrístusha Punsu Piratuí nekasa nuna ti paant ujakmiayi. Tuma asantai Yussha Jesukrístusha írainiamunam nuna tájame. <sup>14</sup>Ii Uuntri Jesukrístu táatsain wi tájamna nu yapajítsuk tura yajauch chicharnakchamnia péñker umiktá, tájame. <sup>15</sup>Tsawant jeamtai Jesukrístu tatí tusa Uunt Yus, imiá péñker asa, akupkattawai. Nínkiti Yus. Akupniuncha Akupniuiti. Uuntjaj nankaamas Úuntaiti. <sup>16</sup>Iwiaaku átinia nérenniuri Nínkiti. Ti tsáapninnium pujakui nuntumtuachminiaiti. Wáinchatai asantai shuar péñké wáinkiacharu áiniawai. Nínki ashí shiir awajsatniuiti tura Nínki tuke ashí akupin atí. Núnisanj ati.

<sup>17</sup>Jú nunkanam kuítrintin ainia nusha nankaamantu enentáimtumasharti. Kuitcha yúpichuch menkakamnia asantai kuítniak enentáimtusar pujuscharti. Antsu iwiaaku Yus ashí in ti péñkeran núkap súramaj nuna nekas enentáimtusarti. <sup>18</sup>“Péñker túratarum” tiarta. Tákumin niisha shiir enentáijjai ni takakman ajamsarti. Nuyá nú péñker túramujaj Yusaj ikiáunkartí. <sup>19</sup>Nuna túruiniak kuítriniawartatui. Núnisanj tuke iwiaaku átinian wáinkiaratui.

### Amuak Timiutéun akatramu

<sup>20</sup>Timiutéu, ashí ame túratniua nu tuke enentáimturta. Jú nunkanmaya ántar chichainia nu anturkaip. Tura wáitruiniak “wi imiá nékajai” tuinia nusha anturkaip. <sup>21</sup>Chíkich shuar nuna umirkar Yusaiya kanakiarai.

Wátsek, Timiutéu, Yus shiir yainmakti.

Nuke atí.

# Papru

## TIMIUTÉUN

### ATAKSHA papin aar akuptukma

---

#### Papru Timiutéun áatramiania nu

**1** <sup>1</sup>Wi Pápruitjai. Yus wakerakui Jesukrístu akatramurí ajasuitjai. Ashí Jesukrístujai tsanínkiarun “Nekas iwiaaku átinian susattajai” tñiuítí Yus. Tuma asa nuna etserkat tusa akuptukuiti. <sup>2</sup>Aneamu uchiru, Timiutéu, ju papín áateajme. Yus Apasha tura ii Uuntri Jesukrístusha ti anenma ásar waitnentramainiak imiatkinchanum shiir pujustinian yainmakarti.

#### Krístunu takastiniaitjinia nu

<sup>3</sup>Tsawajsha káshisha Yúsan áujeakun ámin tuke enentáimtusan ti shiir Yúsan yúminíkiakai. Winia weatur túrawarmia nútíksanak Yúsan enentáimtakun ti shiir awajeajai. <sup>4</sup>Kanakmiaj nuí eantramiam nuna tuke enentáimtajme. Ataksha wararnaisatai tusan íitniun wakerajme. <sup>5</sup>Yus nekas shiir enentáimtiniaitmena nuna nékajai. Nukuchrum Ruítíasha tura ame nuku Eunisiasha emka Yúsan nekas enentáimtin ármiai. Amesha núnisketme.

<sup>6</sup>Tuma asakmin tájame: Yusna takasái tusan winia uwejrún ámin awanteakui Yus kakarman suramsamia nujai atak kakaram takasta. <sup>7</sup>Yus sápij enentáin suramsachuitji. Antsu kakaram ajastinniasha anenaitniuncha péñker wekasatniuncha suramsaitji. <sup>8</sup>Ii Uuntri Jesukrístunu etserkatin natsantraip. Níiniun étserkun sepunam pujamusha étserkum natsantruraip. Antsu Yus kakaram awajtamkui ame étseream nujai shuar yajauch túramainiakui surimiamtsuk



wáitsatin enentáimtumarta. <sup>9</sup>Ii péñker túrichu árinin Yus in anenma asa uwentikramar péñker túratniunam apujtamsaitji. Iisha Jesukrístujai tsaniñkiaru asakrin tura Yus nuna túratniun wakerak túramiayi. Yaunchu ju nunka atsaisha in tuke waitnentrampramaji. <sup>10</sup>Turá yamá in Uwemtikkiartin Jesukrístu támatai nu anenmamu paant ajasuiti. Niisha jákatniun nupetak emesramiayi. Tura uwempratin chichamjai jáchatai iwiaakman paant awajturmajai.

<sup>11</sup>Nuna etserkat tusa Yus anaitiukmiayi. Tura akattur Israer-shuarchanum akuptukmiayi. <sup>12</sup>Túruta asamtai ti wáitiajai. Túrasha Yúsan nekas enentáimta asan natsamatsjai. Imiá kakaram asa amuukatin tsawant jeatsain ashí wínian susamaj nuna ti péñker waitruktatui.

<sup>13</sup>Shiir chichaman jintintiamajmena nuke emetata. Jesukrístujai tsaniñkiu asar Yus nekas enentáimtaji tura nujai anenkratniuitji. Tuke núnismek túrata. <sup>14</sup>Yus ámin takasat tusa suramsamu shiir takasta. Tura Yusa Wakaní in pujurtamaj nuna kakarmarijjai túrata.

<sup>15</sup>Asia nunkanmayá shuar mash iniaitiusarmái. Nu nekaachmaashum. Nu shuarnumiá Pijirusha Ermujenessha armái. <sup>16</sup>Antsu Unisépuru niisháa shuar amai. Ti nukap shiir enentáimtikurmai. Tura wi sepunam pujamuncha natsantruchamai. Ii Uuntri Kristu ni shuarincha waitnentrarti. <sup>17</sup>Rúmanam taasha natsantrutsuk eatak wáittsuk iniaitiúschamiayi. <sup>18</sup>Ipisiu péprunam pujarin ti yainmakmiaj nu paant nékame. Tuma asamtai amuukatin tsawant jeamtai nincha Uunt Yus waitnentrati.

### Kakaram ajasta

**2** <sup>1</sup>Amesha, uchirú, Jesukrístujai tsaniñkiu asam nu kakarmajai kakaram ajasta. <sup>2</sup>Untsurí ántuiniamunam wi etserkamaj nu, shuar umikmin ainia nu jintintiwaram chikichnasha jintintiwarat tusam akupkarta.

<sup>3</sup>Ame ti péñker Jesukrístu suntari asam wáitsatin katsuntrata. <sup>4</sup>Suntarka ni uuntri tana nunak umiktin asa chíkich takatan pachintiukchatniuiti. <sup>5</sup>Núnisan nakurincha nakurustinia nujai métek nakurachkunka nekas péñkeran awakmakun súsatniua nuna achikchamniaiti. <sup>6</sup>Ataksha núnisan shuar ajan takaana nu, ashí shuara nankaamas nuyan yúashtinkiait. <sup>7</sup>Wats, ju menaintiu métek-taku chicham ániawai. Péñker enentáimtakmin ii Uuntri Kristu paant awajturmastatui.

<sup>8</sup>Jesukrístu jaka nantakmia nu enentáimprata. Tura Uunt akupin Tawit ni weatri asamtai Jesussha uunt akupin átiniaiti. Núiti wi uwempratin chichaman étsereaj nu. <sup>9</sup>Nuna étsereakun sepunam jirujai jinwiamu pujakun wáitiajai. Túrasha Yus-Chicham jinchiachminiaiti. <sup>10</sup>Ashí shuar ni shuari arti tusa Yus achikiarua nuna yáintajtsan ashí itiurchatan

katsunteajai. Nujaj Jesukristujaj tsanin\_kiaru ásar uwemprar tuke shiir pujusartatui Yusjaj.

<sup>11</sup> Ju imiá nekasaiti:

Jesukristujaj jákaitkiurkia Níijiaisha tuke iwiaaku pujustatji.

<sup>12</sup> Wáitiakrishia Nijijaj akupkattaji.

Natsantakrinkia Niisha natsantramprattaji.

<sup>13</sup> Umichuitkiurniisha Ninkia tuke uminiaiti. Warí, Yuska ni enentáimmiajain yapajniátsuk tuke umiktiniaiti.

### Yusaj natsaaraqaj tusam ashi túrata

<sup>14</sup> Shuar jintintiakum ju enentáimtikrata. Ii Uuntri Yus ímmianum chichamjaj yajauch tunaiyarain tusam chicharkarta. Nu tunaitin penké áantraiiti antsu ántuiniana nuna yajauch awajenawai. <sup>15</sup> Yus-Chicham tuke enentáimjaj péñker unuimiátram shiir jintintia warta. Túrakum Yus péñker írsat tusam péñker takarin atá. Túramka Yusaj natsaarchattame. <sup>16</sup> Jú nunkanmayanak ántar áujmatin ainia nujaj kanaktia. Shuar nuna áujmatainiak tunaanum nuna nankaamas wáiniawai. <sup>17</sup> Ni jintiniamusha sunkurjaj métek pampaawai. Iminúsha tura Piritiusha nu shuar ániawai. <sup>18</sup> Niisha nekas chichaman iniaisar tura ashí Yus-shuar nantaktincha nankaamasai tuániakuí chíkich chíkich shuar Yúsan naka enentáimtuiniatsui yamaikia. <sup>19</sup> Túrasha Yus ashí nankaamas enentáimtustinia nuna paant awajsaiti. Júnisaiti: “Uunt Yus ni shuarin nékainiawai,” tura nuyá “Ashí Kristu shuari ainia nu tunaanumiá kanakiarti.”

<sup>20</sup> Kufrinniu jeen kurijaj najanamusha kuitjaj najanamusha írunui. Nújainkia ti shiira nu takastin ániawai. Tura numijaj najanamusha nuwejaj najanamusha írunui. Antsu nújainkia nekasmancha ainia nu takastin ániawai. <sup>21</sup> Núniskete Yusa takatríjaj. Ashí tunaanumiá kanakir péñker wekasar shiira nu takasmin átatji. Kame ashí péñkera nu takasmin asakrin ii Uuntri Jesukristu wakerak péñker takata nuí apujtamsamniaitji.

<sup>22</sup> Natsá wakerutai iniaisam esetram péñker wekasata. Amesha ashí shuar shiir enentáijaj Yúsan áujena nujaj Yus nekas enentáimtakum aneniakum ti shiir pujustá. <sup>23</sup> Enentáimtsuk chichainiak aya ántar tunaitinian chichainia nu pachisárap. Nusha aya némasmanainiawai. <sup>24</sup> Ii uuntri Jesukristu takarniuka chíkich shuarjaj nemasmanaikiashtiniaiti, antsu ashí shuarjaj péñker nawamnaikiatniuiti. Tura waitnentáimturar péñker jintintiatniuiti. <sup>25</sup> Tura umircha shuarnasha Yus ni enentáin yapajtiakuí nekas chichaman shiir enentáimturarat tusa péñker enentáijaj jintintiatniuiti. <sup>26</sup> Nujaj íwianch ni wakeramu túrawarat tusa achikmaitiatan uwemprartatui.

### Amuukatin tsawant jeatemantai aents ti tunaan túrawartatui

**3** <sup>1</sup> Amuukatin tsawant jeakuí ti itiurchat átatui. <sup>2</sup> Shuar aya ninkí enentáimtumasartatui. Kuftian ti wakeriartatui. Nankaamantu

enentáimtumartatui. Yúsnasha yajauch chicharsartatui. Aparíncha umirkachartatui. Yumínsatniuncha nékachu ártatui. Ashí Yúsnancha enentáimtuschartatui. <sup>3</sup>Aneetsuk waitnenkartichu ártatui. Tsanumin ártatui. Ni ayashí wakeramun katsuncha ártatui. Aya kajen ártatui. Ashí péñker túrinia nuna nemasri ártatui. <sup>4</sup>Amikríncha surukartatui. Arantsuk tunaan túrawartatui. Waantu enentáimin ártatui. Yúsan nakitrar aya ni wakeramunak enentáimtusartatui. <sup>5</sup>Yusa kakarmari “ántraiti” tuíniak péñker umirkachartatui. Túrasha Yúsan umirua núnisar túrawartatui.

Nu shuar penké pachisáip. <sup>6</sup>Nu shuarsha shiir chichayatan anankawar jeá wáiniawai. Tura nuwá esetar enentáimchan nekas tunaarinnun anankainiawai. Nu nuwá ashí yajauch wakeramujai anannainiawai. <sup>7</sup>Tuma ásar ashí shuara chichamen tuke ántuiniayatan nekas-chichaman nekaatniun tujintiainiawai. <sup>8</sup>Yaunchu Ejiptu nunkanam Muisais uunt akupniujai chichaakui jimiará iwishin, Jánissha Jámprissha, Muisaisan kajerainiak “ántar tawai” tiarmiayi. Núnisan ju shuar nekas-chichaman nakitiainiawai. Naka enentáimiainiachu ásar Yúsnan naka jintfatniun penké tujintiainiawai. <sup>9</sup>Túrasha nuna nankaamas kuakchartatui. Shuar ti paant ni netse túruiniamurin nekarawartatui. Núnisan nu jimiará iwishniujai túrunamiayi.

### Amúak Papru Timiutéun akatramiania nu

<sup>10-11</sup>Tura ámeke wi tímiaj nu umireame. Wi Yusjai shiir wekaamusha métek túriniaitme. Wi enentáimmiasha nékaitme. Ántruiniakui wáitsamaj nu nékame. Tura Yúsan enentáimtakun tura anenkratkun shiir enentáijjai katsuntramjai. Antiukía péprunmasha, Ikiuniu péprunmasha, Ristra péprunmasha ashí yajauch túrutawarmatai wáitsamaj nu paant nékame. Túrasha ii Uuntri uwemtikrurmiayi. <sup>12</sup>Nekasaiti, shuar Jesukrístujai shiir túrataj tákunka ni nemasri áintiam ti wáitsatniuiti. <sup>13</sup>Tura ashí anankartin ainia nusha kame ashí yajauch shuarsha nú yajauch túrukiar wétatui. Iwianchjai anankamu ásar chikichnasha anankiar weartatui.

<sup>14</sup>Antsu ámeke unuimiam nu imiá nekasaiti tu enentáimtakum tuke emetata. Jintintramawarmia nú shuarsha wáitrichua nu nékame. <sup>15</sup>Úchichinmayan Yus-Chicham nékame. Yus-Chichamka uwempratniun jintintramamniaiti. Nusha “Jesukrístu nekas enentáimtakum uwemprattame” tawai. <sup>16-17</sup>Ni Papirín áarat tusa Yus ni shuarin áamtikramiayi. Ashí shuar ni Chichamen nekaawar péñker túrawarat tusa túramiayi. Tuma asamtai Yus-Papí shuartin unuiniakartin asa imiá penkeraiti. Tunáa túrajnia nu Yus-Papijjai nekatatniuitji. Tura awajiakrincha Yus-Papí núnaka paant jintintramji. Nuyá naka wekasatniun jintintramji.

**4** <sup>1</sup>Ii Uuntr̄i Jesukristu amuukatin tsawantaī Uunt Akupin ajas iwiaakuncha tura jákaruncha ashí p̄nker túramuncha tura yajauch túramuncha nekaattawai. Tuma asamtai Niisha tura Yus Apasha íimiainiamunam juna akateajme. <sup>2</sup>Uwempratin chicham etserkata. Yúpichuchia nuisha tura itiurchata nuisha tuke etserkata. Yus-Chicham nekas enentáimtikrarta. Tura shiir enentáimtusam chicharkam yáintaj tusam unuiniararta. <sup>3</sup>Ukunman̄ka p̄nker chichaman nakitrar ii wakeraj núchik nekaatai tusar, shuar teremak p̄nker pujuscharmnia nekapea áintsan, nan̄kaamas unuimiaru atai tusar, nán̄kamas unuikiartinian ti untsur̄i eakartatui. <sup>4</sup>Nekas shiir chichaman iniaisar ikiuiniak ántar áujmatsamun enentáimtusartatui. <sup>5</sup>Antsu ámeká tuke p̄nker túratin wakerakum ashí itiurchat katsuntrata. Uwempratin chicham étserkum takatrum p̄nker umikta.

<sup>6</sup>Ishichik ajasai winia iwiaakmar Yusaī surumaktin. Mantamnan nayimpiniam wétin jeatimiai. <sup>7</sup>Shuar kakaram maanainia núnisnak tuke kakaram takasmajai. Tséken p̄nker tsekea áintsanak yawetsuk takasmajai. Tura Yus-Chichaman nekas akasmatkun p̄nker wáinkiaitjai. <sup>8</sup>Tuma asamtai tawasap nukajaī najanamu tsékena susamua áintsan wisha p̄nker túramunam akinkiaitjai. Tura aya wíniak akirkashtatui. Antsu ashí ni tátinian shiir enentáijiaī nákania nunasha nekas p̄nkerá nuna akikiartatui.

#### Timiutéu túratin akatmamturma

<sup>9</sup>Wárik iiraitin enentáimturata. <sup>10</sup>Témas aya jú nun̄kanmayanak wakerak ajapa ikiuruk Tisarúnikia péprunam weyi. Tura Kresentisha Karasea nun̄kanam weyi. Núnisan̄ Títiusha Tarmasia nun̄kanam weyi. <sup>11</sup>Túrawarmatai aya Rúkas wijjaī pujawai. Márkus eaka wáinkiam ame itiertitia. Jūi ti pen̄ker yainkiamniaiti. <sup>12</sup>Tura Tíkikiunka Ipisiu péprunam akupkamjai. <sup>13</sup>Tura winiakum nuparam pushí Trúas péprunam Karpu jeen ikiukmiaj nu takurtuktia. Núnisan̄ nuparam papísha tura nekaska pen̄ké papí takurtuktia.

<sup>14</sup>Arejántruka jirujaī takawa nu ti yajauch awajtusuiti. Túrutaitkiuisha ni túramujaī métek Yus akiktí. <sup>15</sup>Nu amesha p̄nker wáinkiatá. Ii étseeramun pen̄ké nakitiawai.

<sup>16</sup>Emka akupniunam ayamprumaktaj tusan chichaakui chikichkisha yáintkiacharmiayi. Antsu sapijmiainiak ikiurkiarmiayi. Yus nu shuaran yajauch enentáimturcharka maak. <sup>17</sup>Tura ii Uuntr̄i Jesukristu ni kakarmarin̄ surus yaintkiarmiayi. Nujaī uwempratin chichaman ashí nun̄kanam Israer-shuarcha antukarti tusan etserkamjai. Tura núnisan̄ akupniunmayasha ii Uuntr̄i uwemtikrurmiayi. <sup>18</sup>Tura núnisan̄ ashí yajauchia nuyá uwemtikrurmatai Nii akupeana nūi nayaimpiniam jeattajai. Niñki tuke shiir awajnasti. Núnisan̄ atí.

**Amikmaamiania nu**

<sup>19</sup>Piriskancha ni áishri Akirancha amikmainiajai. Núnisnak Unisépuru shuarincha amikmainiajai. <sup>20</sup>Erastu Kurintiu péprunam juakmai. Tura Trúpimiunka Miritiu péprunam jaan ikiukmiajai. <sup>21</sup>Michá nantu jeatsain iiraitin enentáimturata. Tura Eupurusha Putentesha Ríniusha Kráutiasha tura ashí Yus-shuarsha amikmaatmainiawai.

<sup>22</sup>Ii Uuntri Jesukrístu ámijiai tsanin pujustí. Tura Yus ashí pénker waitmakarti.

Nuke atí.

# Papru

## TITIUN

### papí áatramu

---

#### Papru Titiun áatramiania nu

**1** <sup>1</sup>Wikia Pápruitjai Yusa takarniurí. Tura Jesukrístu akatramuríntjai. Yús achikma ainia nú shuar niisha antukar Yúsan umirkarat tusan akatramuitjai. Shuar nuna nekaawar péñker wekasartatui. <sup>2</sup>Tura nú arant, nú shuarsha tuke iwiaaku pujusarat tusan étsereajai. Nú shuarnasha, nunñan najantsuk, “uwemtikrattajai” Yús tímiayi. Tura Niisha wáitruatniun tujintiawai. <sup>3</sup>Tura yamaikia, tsawant jeamtai, nuna nekaawarat tusa ii Yusrí uwemtikkiartinia nu, winia chichamur ujakarta tusa, winia akatturmiayi.

<sup>4</sup>Titiu, wi Yusna étserma umikiu asakmin winia uchirua áitkiasnak papin áateajme. Iis, iijíaj métek Yús nekas enentáimtatsjik. Yús waitnentrama asa shiir awajtamsati tusan wakerajme. Tura ii Aparí Yussha, ii Uuntri Jesukrístusha, Uwemtikkiartin ana nu, enentáimin imiatkincha awajtamsati, tajai.

<sup>5</sup>Wats, wi iwiarachmajna nu ame iwiarata tusan Kreta nunñanam ikiukchamkajam. Tura “ashí péprunam Yús-shuar írunmanum, Yús-shuaran wáinkiarat tusam shuar anaikiarta” tíchamkajam.

#### Yús-shuaran wáinin

<sup>6</sup>Yús-shuaran wáinin júnis atí. Niisha makuuchmin ti péñker wekasatí. Tura chikichík nuwentin átiniaiti. Tura ni uchirísha Yusna ártiniaiti. Tura shuar yajauch chicharsachmin niisha tutupnisan wekain ártiniaiti. <sup>7</sup>Enentáimprata. Yús-shuaran wáinin Yusna ana nuna wáinkiat tusa anaikiamuiti. Tuma asamtai nekas makuuchmin wekasatniuiti. Waantu enentáimtumsuk, kajetsuk, tura nampechu átiniaiti.

Chikichan waitkiau áchatniuiti. Tura ananma kuítrintin ajastaj tusa wakerukchatniuiti. <sup>8</sup>Antsu shuar ni jeen írar winiana nuna itiaatniuiti. Tura ashí péñker ana nuna wakerin, esetas enentáimin átiniaiti. Tura ju nunkanmaya akupeamuncha, núnisan Yús akupeamuncha umirkatniuiti. Tura nínki fímiastiniaiti. <sup>9</sup>Tura nú arantcha, chíkich shuáran péñker jintintrataj tusa tura Yus-Chichaman nakitin ánia nuna nupetkataj tusa, Yúsnumia nekas chichaman, nii unuimiátramiania nuyá kanakchatniuiti. <sup>10</sup>Nekaata. Umichu ti irunui. Niisha ántar chichau ásar ananmau ániawai. Israer-shuar weenam ti irunui nú shuar. <sup>11</sup>Niisha kuítian achiktaj tusar wakeruiniak, yajauch unuiniarchatniua nuna unuiniainiawai. Nuna túruiniak untsurí shuáran, ni írutkamurijjiaj yajauch enentáimtikiainiawai. Tuma asamtai auka, ni wené epetkatniuiti, ántar chichainiakui. <sup>12</sup>Warí, imia Krétanmaya chichaman etserin juna tíchamka: “Krétanmaya aentska tuke wáitrin ániawai. Tura nákitiat ti yurumin ániawai. Yajasma núnisan ániawai.” Nuna tíchamka. <sup>13-14</sup>Maa, niisha nékasan tímiayi. Nu tuma asamtai, Titiu, Israer-shuar ántar tuinia nuna, Yus-shuar anturkachartí tusam, tura nekas chichaman nakitiana nuna akupeamurín umirkachartí tusam, antsu Yúsán nekas umirkarat tusam, umichu shuar kakaram chicharkarta.

<sup>15</sup>Enentáimprata. Yus-shuarka, ni enentáí chamir ajasu ana nuka, ashí ni wainnia nuna péñkernak enentáimtawai. Tura chíkich shuar, Yúsán umirkachu asa, ni enentáí wapik asa, péñker ana nuna enentáimtustinian tujintiawai. Achapai enentáimiuk, péñkercha ana nuna “péñkeraiti” tawai. <sup>16</sup>Tura niisha “Yus-shuaraitjai” tuíniayatan, Yúsán umirtsuk niisháa túruiniawai. Tuma ásar mujímiaj ániawai niisha. Umichu ásar péñkeran túratniun penké tujintiainiawai.

### Péñker jintintiatin

**2** <sup>1</sup>Tura amesha, Titiu, péñker chicham etserkata. Yus-Chicham tátsuna nu etserkaip. <sup>2</sup>Antsu áishman katsunt Yusna ainia nu, ju jintintrata. Nampechu, nánkamas enentáimcha, esetas enentáimin arti. Yus tana nuna umirin tura anenain arti. Ni itiurchatrín Yúsán enentáimtusar katsuntin arti. <sup>3</sup>Tura núnismek nuwá katsunt Yusna ainia nusha ju jintintrata. Niisha núnisaran Yus-shuarti túramnia nuna péñker túrawartí. Tsanumin tura nampen áchartí. Antsu péñker wekasatniun unuinin arti. <sup>4</sup>Niisha yama nuatnakua nuna ni áishrín ni uchiríncha nekas aneetniun unuiniarartí. <sup>5</sup>Junasha jintintrartí. Esetas enentáimin, péñker wekain ártiniaiti. Ni takatrín péñker takastin ániawai. Ni áishrín umirin ártiniaiti. Tura waitnentin ártiniaiti. Yus-shuarcha Yus-Chichaman yajauch chicharkarain tusar túrawartiniaiti. “Tu jintintrarta” titiá.

<sup>6</sup>Nuyá, Titiu, natsa ánia nu “nánkamsar enentáimsarum wekasairap” titiá. <sup>7-8</sup>Tura amesha, Titiu, ashí tsawant péñker wekasatá. Nu natsa wi

túramun júkiar nunak túrawarmi tusam, nu túrata. Tura anturtamna nu “nekaschapitia” tiin tusam, esetsam enentáimsam, Yus-Chicham tana nu ímiatrusmek jintintiata. Nú túrakmiñkia, Yus-Chichaman nakitiana nu shuar “Titíu nánkamas chichaawai” títiáj tukamá, natsaamak tujintramkattawai.

<sup>9</sup>Takarín ainia nu, ni takartairín umirkarat tusam jintintrarta. “Shiir enentáimsarum, yajauch áimtsuk shiir umirkatarum” titiá.

<sup>10</sup>“Kasamkairap, tura anankawairap. Iis, péñker túrakrumka, takarniuitiatrum, shiir tura asarum ii Uwemtikramin Yusrì chichamèn shíiraiti, tu enentáimtikrattarme” titiá.

<sup>11</sup>Yus in waitnentrama asa ashí áentstin uwemtikramprataj tusa wakerutmaji. <sup>12</sup>Kame Yus waitnentrama asamtai, tunáa ana nu iniaisatniuitji, nu nékaji. Tura ju nunkanmayá yajauch ana nu wakerukchatniuitji. Tura antsu ju nunkanam pujayatrik esetsar enentáimsar ananma wekatsuk tuke tsawant Yus anear wekasatniuitji. <sup>13</sup>Túrar ii Yusrì Jesukrístu, uwemtikramajnia nu, imiá shiir iwiarnar tatí tusar nákastiniaitji. <sup>14</sup>Jesukrístuka in jarutramkamiaji, ii tunaarínia uwemtikrampratajtsa. Tura, Winia ajaras tuke enentáijiaj péñker túrawarat tusa, ii tunaarín japirtampramiaji.

<sup>15</sup>Titíu, anaikiamu asam arantutsuk nu jintintrata. Yajauch ana nuna túrawarain tusam chicharkarta. Péñkeran túruinia nu ikiakárta. Tura yajauch chichartukarain tusam tuke péñker wekasata.

### Yus-shuarti túratin

**3** <sup>1</sup>Titíu, shuar enentáimtikrarta. “Ashí akupin ainia nusha tura chikich uunt akupena nusha antukrum umirkatarum” titiá. ““Péñkeran túratin ana nuna páchitsuk túrattajai” títiniaitruma” titiá. <sup>2</sup>“Tsanumprairap, kajernaikiairap, antsu shiir enentáimtunaistarum” titiá. Nanakaamantu enentáimtumatsuk ashí shuar péñker awajsatarum tusam tu jintintrarta. <sup>3</sup>Warí, iisha núnisrik Yus-shuar ajatsuk nánkamsar wekaimji, Yuska umirtsuk. Tura íwianch emetamu pempée wekaimji. Tura ii ayashí wakeramu tuke túriniuyaji. Tunaasha túriniuyaji. Chíkich atankittsar wakeriniuyaji. Chíkich shuar kajerkar tura nuamtaksha kajernainiuyaji. <sup>4</sup>Túrasha Yus in uwemtikkiartin ana nu, anenkratin asa, ni anenkrattairín ashí áentsun iniaktus in uwemtikrampramiaji. <sup>5</sup>Yus in waitnentrama asa, iikia júkesha péñker túrachma ain uwemtikrampramiaji. ¿Itiurak uwemtikrampramiaj? Ii tunaarín asakátrampramiaji, niijiaktinia áintsan. Tura Yusa Wakaní pujurtamkurin, ii iwiaakmarín yamarman amasmaji. <sup>6</sup>Jesukrístu jakamujaj Yus in emeenturmatsuk ni Wakanín suramsamiaji. <sup>7</sup>In anenma asa nuna túramiayi. Nuñkia iisha yamaram awajsamu asar tuke iwiaaku átin, ti wakerimij nu íniuiti. <sup>8</sup>Nuka ti nekasaiti. Tuma asamtai Yúsan



umirkarmia nu, péñker túratniun tuke wakerukarat tusam tuke jintinki wetá. Wi tímiajna nu, péñker asamtai, ashí aents nuna nekaatniun atsumainiawai. <sup>9</sup>Shuar netse áujmatainiakui ameja pachisaip. Tura “aya winia úuntruk péñker áiniawai” tu chichasaip. Tura Israer-shuara akupkamurí ititurkit tusa shuar ti áujmatainiakui nusha pachisaip. Ántraiti nuka. Péñker wekasatniun yayatsui.

<sup>10</sup>Shuar tsanumprur yajauch enentáimtunaimtikiana nu chicharkata. Ántachkuin<sub>ñ</sub>kia ataksha chicharkata. Tura penké tujinkiamka jii<sub>ñ</sub>ki akupkata. <sup>11</sup>Nujai juna nekaamniaitme: nuna tura asa awajiruiti. Tura ni tunaar<sub>ñ</sub>niñ jakattui.

### Papru wakerana nu

<sup>12</sup>Wisha Artemasan akatran akuptukchatjameash. Nin akupeachkunka Tíkikiun akuptuktatjame. Nii jeamtai amesha wari winitritia Nekapuris péprunam. Juí Nekapurisnum yumí nantu asamtai seturan pujuttajai.

<sup>13</sup>Senas, chichaman ti unuimiaru pujana nu, amikiur Apurusjai jeamtai, nii atsumtsuk shiir weartí tusam, ame túratin jeamna nu yaiñta. <sup>14</sup>Iiní Yus-shuar ainia nusha péñker túratniun tura atsumainia nunasha yáin<sub>ñ</sub>tinian nekaawartí. Ántar pujusar<sub>ñ</sub>in tusan nuna tajai.

<sup>15</sup>Ashí wiji<sub>ñ</sub>ai pujuinia nu amikmaatmainiawai. Tura ii amikri Yus-shuar ainia nu amikmaatruata. Atumniasha Yus shiir yainmakat tusan wakerajrume. Nuke atí.

# Papru

## JIRIMIÚÑKAN

### papí áatramu

---

#### **Papru Jirimiúñkan papin áatramiania nu**

<sup>1</sup>Wi Papru ju papin áaran akuptajme ámin, Jirimiúñká. Ii yachi Timiutéusha juna akupturmawai. Wi Jesukrístu takaru asan sepunam pujajai. Ame ijíjái tsanínkia takáa asakmin ju papin akuptajme. <sup>2</sup>Núnisan ame jeemiin Yus-shuar irunainia nunasha tura ii umaí Apiancha tura Arkípiuncha ijíjái ti kakaram takasu asamtai ju papin akuptajrume. <sup>3</sup>Yus ii Aparí tura ii Uuntrí Jesukrístu shiir enentáimturma ásar yainmakarti imiatkinchanum tuke shiir pujustinian.

#### **Jirimiúñ pénker Yus-shuar ámiayi**

<sup>4-5</sup>Ame Uunt Jesus shiir enentáimtakum ashí Yus-shuar ainia nusha aneamun antukjai. Nuna antukan ámin ti shiir enentáimtakun Yúsan áujeakun yúmínkíajai. <sup>6</sup>Áujeakun chíkich shuarsha ámijíjái métek Yúsan nekas enentáimtuiniak ashí pénker ana nuna ti paant nekaawarat tusan seajai. Ashí pénker ana nuka Jesukrístu shiir awajsamujái takakji. <sup>7</sup>Wisha ame anenkratmajái ti shiir enentáimtakun waraajai. Yatsurú, ámijíjái ashí Yus-shuarsha shiir enentáimiainiawai.

#### **Papru Unisemun waitnentratniun Jirimiúñkan seamiani nu**

<sup>8</sup>Nu asamtai kakaram tátsujme. Kame wakeraknaka Kristu akatramu asan “Ju túrata” tíminiatjijame. <sup>9</sup>Antsu aneakun aya júnisan tájame. Wi Papru úuntach asan tura Krístun takarkun sepunam pujakun <sup>10</sup>Unisemu waitnentraí tusan seajme. Niisha wi ujakmajái Yus-shuar ajasu asa winia uchirua áintsan ketete. Sepunam pujayatan ni aparíya áintsanak ajasjai.

<sup>11</sup>Nuikkia Unisemu ántrauyi antsu yamaikia aminiisha winiisha yáimniuiti. <sup>12</sup>Ataksha awantajme. Wi ti penker aneamu asamtai pénker

itiaata. <sup>13</sup>Wi Yus-Chichaman étserkun sepunam pujajai. Túmakun ame yajá pujakum yáintkiatin tujintiakmin nii antsu wijíai pujus yáintkiat tusan wakerimjai. <sup>14</sup>Túrasha ámin ujatsuk túrachmin enentáimpranjai. Kame ame wakerakum útsukchamujai “pujustí” tákumnin̄kia maak. <sup>15</sup>Júnissha enentáimpramniaiti. Unisemu ishichik tsawant men̄kakamai tura yamaikia waketki ámijiai tuke pujustatui. <sup>16</sup>Kame yamaikia emetachma antsu ame aneamu yátsumeá áinis átatui. Nuka ti péñkerchakait. Wisha nin ti aneajai. Tura yainmakmin asamtai tura Krístunam ame yatsum ajasu asamtai winia iniankattsam aneashtapash.

<sup>17</sup>Wisha ti péñker amikrumchakaitiaj. Tuma asam winia itiaarua nútiksam shiir awayáta. <sup>18</sup>Yajauch awajtamkaitkiuin̄kia tura ámijiai tumashitkiuisha wi akiktatjai. <sup>19</sup>Wi Papru nekas winia uwejruijai juna áaran ti nekas akiktatjame tájame. Túrasha winia tumashitmena nuna páchittsujme. Kame wi ujakam Yus-shuar ajaschamkum. <sup>20</sup>Wátsek, yatsurú, amesha Yus-shuar asam wi seajme jú túrutata. Kristu enentáimtakum shiir enentáimtikrurta.

<sup>21</sup>Ti péñker uminiaitme nuna nékakun júnisan áatjame. Tura wi seajmena nuna nan̄kaamas túrattamna nuna nékajai. <sup>22</sup>Ayu. Átum Yus áujturkurmin Yus winia tsan̄katruktatui atumiin̄ iiraitniun. Tuma asamtai wi nuí jean pujustin iwiarturata.

#### Amikmaamiania nu

<sup>23</sup>Épaprassha niisha Jesukrístunu étseruk sepunam wijíai pujus amikmaatmarme. <sup>24</sup>Núnisan̄ Márkussha Aristárkusha Témassha tura Rúkassha Yus-Chichaman etserkatniun yáintiainia nusha amikmaatmainiawai.

<sup>25</sup>Ii Uuntrī Jesukrístu atumniasha ti shiir yainmakarti. Nuke atí.

# ISRAER-SHUARAN

## papí akuptukma

---

Yus ni Uchiríjjaj ni chichamen ujatmakji

**1** <sup>1</sup>Yáunchuka Yúsnan etserniujaj chichas Yus ni enentáimmian ii úntrin ujakmiayi. Tura untsurí nunkanmasha tura untsurí uwitíncha niisháa niisháa chichas ujakmiayi. <sup>2</sup>Antsu ju amúamu tsawantaikia ni Uchirí Jesukrístujajin ashí Niiniu ana nuna ujatmakji. Yus Niijaj ashí frunna nuna najana asa mash Nin súsaiti. <sup>3</sup>Níyaiti Yúsán imiá métek nakumeana nu. Tura Níyaiti Yus nankaamas shiira nuna paant awajeana nu. Niisha aya ni chichamejaj kakarma nujaj ashí frunna nuna wáiniuk emeta pujurui. Tura ii tunaarin nijiatramak akupin pujutainium, Yusa untsuurini, pujusmiayi.

Nayaimpinmaya suntarjaj Kristu nankaamantuiti

<sup>4</sup>Yusa Uchirí nayaimpinmaya suntarjaj imiá nankaamantu awajnasuiti. Tura ti nankaamantu asamtai Yus nayaimpinmaya suntar nankaamas Nin ti shiir awajtai. <sup>5</sup>Wátsek, nayaimpinmaya suntaran chikichinkesha juna tútsuk Krístun tímiayi:

“Ame winia Uchiruitme. Túmaitkiui yamáikia winia kakarmarun átakeajme.”

Tura núnisan tímiayi:

“Wi ni aparí átatjai, tura Nii winia uchir átatui.”

<sup>6</sup>Tura jú nunkanam ni Iwiairin akupeak tímiayi:

“Ashí Yusa suntari tikishmatrarti.”

<sup>7</sup>Nayaimpinmaya suntarnan júnis chicharui:

“Nayaimpinmaya suntarin takartursarat tusa nasea áintsan awajsaiti. Ni suntarin chárpia áinis akupeawai.”

<sup>8</sup>Antsu ni Uchiríniun tímiayi:

“Ame, Yusá, tuke akupniuitme. Ame akuptairmesha aya péñkeraiti.

<sup>9</sup>Péñkera nu anenaitme, tura yajauchia nu muíjniuitme. Tuma

asamtai ashí shuar shiir warartamu asamtai Yus, ame Yúsrum, ashí akupniujají nankaamas uunt awajtamsaiti.”

<sup>10</sup>Nu arantcha tawai:

“Uuntá, yámankamtaik Ame ju nuṅka najanamiamé. Túram ame uwejmijají nayaimpisha najanaitme. <sup>11</sup>Nusha mai amuukarmataisha Ame tuke pujuttame. Tarachjají métek mamurartatui. <sup>12</sup>Tura ipijram ikiustatme. Pushiya áintsam yapajíáttame. Túrasha Ámeka núnismek átatme. Játsuk tuke pujuttame.”

<sup>13</sup>Ataksha tímiayi:

“Akupin pujutanium, winia untsuuruini, pujusam nákarsatá. Ame nemasrumin nupetkan Ámin umirtamkarti tusan amastatjai.” Núnisanṅ nayaimpinmayá suntaran penké tíchamiayi. <sup>14</sup>Antsu Yusa suntarí wakan ániak ashí shuar uwempratratna nuna yáínkiarat tusar Yus akupkamu ániawai.

### **Anearta. Uwempratin Chicham nakitrashtiniaiti.**

**2** <sup>1</sup>Nuikia Kristu ti uunt asamtai ashí Niiniu antukajnia nujají kanakchatin ti enentáimtustiniaitji. <sup>2</sup>Yaunchu nayaimpinmayá suntar Muisaisan súsarmia nú akupkamu nekas uminkiatniuyayi. Shuar umitsuk tunaan túramtai ti kakaram asutniáwarmiayi. <sup>3</sup>Antsu ii Uuntri Krístuka Uwempratin Chichaman emka itiamiayi. Tura imiá nekas tuíniak Nin anturkaru in ujatmakarmaji. Tuma asamtai Uwempratin Chicham nakitiakrikia nuna nankaamas uwemtsuk asutniáttaji. <sup>4</sup>Kame nu arantcha, Uwempratin Chicham ujatmainiakrin imiá nekas tuíniawai tusa aents túrachminian kakarman Yus iniakmasmiayi. Núnisanṅ ni Shiir Wakaní ni wakerana núnisanṅ niisháa niisháa kakermajají takamtikeawai. Nujají Yus-Chichama nu paant nekanamniaiti.

### **Jesukrístu aents ajasmiania nu**

<sup>5</sup>Ayu. Nuik áujmatkur “jú nuṅka amuukattawai” taji. Tura yamaram nuṅkanam nayaimpinmayá suntar akupkachartatui. <sup>6</sup>Antsu ii akupkattajnia nu, Yus-Papinium áarmaiti:

“¿Shuarti warimpiaitiaj ame imiá enentáimtitiusha? Kame, ¿shuar warí asamtai pujursataj tamea? <sup>7</sup>Ishichik tsawant nayaimpinmayá suntarjají pééjchach awajsamiame. Túram ti shiir nankaamas uunt awajsattame. Ame najanamun ashí akupkati tusam tsanṅkatkattame. <sup>8</sup>Ashí nin umirkarti tusam susattame.” Tu áarmaiti.

Yus “ashí nin umirkarti” takui nin umirkashtinkia atsawai. Túrasha yamaikia ashí umirainiaka wáintsuji. <sup>9</sup>Tura wáinjinia nu Krístuiti. Niisha aents ajas ishichik tsawant nayaimpinmayá suntarjají pééjchach

ajasmiai. Yus ni shuarin ti aneak jarukarti tusa wakerimiayi. Tura ni wáitias jakamujai yamaikia ti shiir nan̄kaamas Uunt awajsamuiti.

<sup>10</sup>Ashí írunna nu Yus najanamu ásar ni wakeramun umiktin ainiawai. Tura ashí ni uchirisha ni shírmariñ pachiinkiarat tusa wakerawai. Tuma asa Yuska Jesukristun, nu shuaran Uwemtiknia nuna, ni waitsmujai nekas Uwemtikkiartin awajsamiai. <sup>11</sup>Yusna atí tusa shiir awajsamuncha tura Kristu nin shiir awajea nunasha Yuska mai metek ni Aparinti. Nu asantai Yusa Uchiriñ nu shuaran “yatsur” títinian natsantatsui. <sup>12</sup>Yus-Papinium núnisan̄ tawai:

“Ame náarmin winia yatsurun ujakartatjai. Ashí iruntramunam kantampruattajme.”

<sup>13</sup>Ataksha ni shuarijajai métek enentáimtamun tawai:

“Yúsan ti shiir enentáimtustatjai.”

Tura ataksha:

“Yus surusmia nú uchirjai Yúsan umirkun pujajai” tawai.

<sup>14</sup>Tura nu uchi aents ásarmatai núnisan̄ Jesussha aents ajasmiai. Tura aents ajas jaka, iwianchin, jatai nérenniurin, ashí emesramiai. <sup>15</sup>Tura ti untsurí shuaran uwemtikrarmiayi. Nu shuar yaunchu jákatniun ashamainiak tuke wáitin ármiai. Antsu ni jakamujai yamá an̄kant áiniawai. <sup>16</sup>Maa, imiá nekasaiti, nayaimpinmaya suntaran yáintaj tusa táchamiai. Antsu ashí Apraám weean, ashí Yus-shuar ainia nuna yáintajtsa támiayi. <sup>17</sup>Túratin asa pen̄ké métek ni yachía áinis ajasmiai. Nujai in tuke waitnentrampramniatji. Tuma asa Yúsnan pujurniu uuntri ajas Yúsan tuke pen̄ker chichartamsamniatji. Núnisan̄ murikiun maa Yus súsatniua áintsan̄ ni jakamujai ashí shuara tunaarin tsan̄kurniuiti. <sup>18</sup>Tura imia niñki waitsa asa tura íwianch nekapsamu asa yamaikia iisha wáitiakrincha tura íwianch nekapramkurnisha yainmakminiatji.

### Jesus Muisaisjajisha nan̄kaamantuiti

**3** <sup>1</sup>Tuma asantai, pen̄ker yatsuru, atumniasha Niiniu atí tusa Yus achirmakuitrume. Tuma asarum Kristu Jesus pen̄ker enentáimtarum. Niisha Yus nekas Akatramuyayi. Tura ashí Yus-shuar ajarua nujai Yúsnan pujurniu uuntria núnisaiti. <sup>2</sup>Nu atí tusa Yus anaikiamiayi. Túramtai Kristu nuna ti pen̄ker takasuiti. Núnisan̄ Muisais ashí Yusa aentsrin, Israer-shuar armia nuna ti shiir wainkiamiayi. <sup>3</sup>Túrasa Muisaisjai nan̄kaamas Kristu ti shiir awajnasuiti. Jeajai nan̄kaamas jea jeamniuka nekas pen̄kerchakait. Núnisan̄ Kristu Muisaisjai nan̄kaamas pen̄keraiti. <sup>4</sup>Kame ashí jean shuar jeamtsuk. Tura Yus ashí írunna nuna najanaiti. <sup>5</sup>Wats. Muisais Israer-shuaran wániuk Yusa Jeen takastinia áintsan̄ pen̄ker takarniuyayi. Tura ni takaak ukunam Yus títiatna nuna etserkatniuyayi. <sup>6</sup>Túrasa Kristu Yusa Jeen takarniuchu asa antsu Yusa Uchiriñ asa nuñ ashí akupeawai. Nu jeasha

iiṭji. Tura tuke iniaitsuk kakaram ajasar Yus suramsattaj nu wararsar nákastiniaitji.

### Yusa shuari shiir pujustin

<sup>7</sup>Nu asamtai, Yusa Shiir Wakani Yus-Papinium tawai:

“Yamaikia, Yus tana nu ántakrumka <sup>8</sup>nakittsuk shiir anturkatarum. Israer-shuar yaunchu aents atsamunam wekainiak Yus taman nakitrar Yúsan nekapsar akajkarmiayi. <sup>9</sup>Túramtai Yus tímiayi “Nuṭ atumí uuntri nekapruser akajtukarmiayi. Kuarenta (40) uwitin wi kakaram túramun ísarsha nakitrurarmiayi. <sup>10</sup>Tuma ásmatai nu shuaran kajerkan tiarmajai “Nu shuar ni enentáin tuke awajiniawai. Tura Wi taman umirkatniun nakitiainiawai” tímiajai. <sup>11</sup>Tura kajerkan nekas tákun “Wijiaí shiir pujustinian penké tsankatkachartatjai” tímiajai” tímiayi Yús.”

Tu áarmaiti.

<sup>12</sup>Anearta, yatsuru. Yajauch enentáimsarum tuke iwiaaku Yus enentáimtutsuk kanakiirap. <sup>13</sup>Kame kashinkia tunaajai anannam enentáimin Yúsna nakitrashtapash. Tuma asamtai yamaik tura ashí tsawant ikiakánairatarum. <sup>14</sup>Yámankamtaik Kristu shiir enentáimtusmaj núnisrik tuke iniaitsuk émeteakrikia Krístujai shiir tsaniñkiar pujustatji. <sup>15</sup>Nu asamtai Yus-Papí tawai:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman nakitrarua núnisrum ajasairap.”

<sup>16</sup>Muisais Ejiptu nunkanmaya jiiкмia nú shuar Yusa chichamen anturkariat nakitrarmiayi. <sup>17</sup>Tura umiiniachkui kuarenta uwí kajerkarmiayi. Tunaan túrawaru ásar untsurí shuar aents atsamunam kajinñkiarmiayi. <sup>18</sup>Kame umirkacharunka Yus “Wijiaí shiir pujustinian penké tsankatkachartatjai” tímiayi. <sup>19</sup>Iis, Yúsán enentáimtachu ásar Niijiaí shiir pujustinnium wayatniun tujinkiararmiayi.

**4** <sup>1</sup>Nu asamtai, ii wayatin tsankatkamu áyatar Yusjai shiir pujustinnium páchitkiachu aij tusar aneartiniaitji. <sup>2</sup>Yaunchu nu shuaran ujakarmia núnisan incha Uwempratín Chichaman ujatmakuitji. Nu shuar Yúsán enentáimtutsuk antukaru ásmatai nu chicham yáincharmiayi. <sup>3</sup>Antsu iikia ni chichame enentáimta asar Yusjai shiir pujustinnium nekas wayaji. Tura chikichan Yus tímiayi:

“Nu asamtai kajerkan nekas takun “Wijiaí shiir pujustinian penké tsankatkachartatjai” tímiajai” tímiayi. Kame Yus jú nunkan najana umik nuyá shiir pujus ayampramiayi. <sup>4</sup>Yus-Chichamnum ayampramun júnis tawai.

“Yus sais tsawant takakmas nuyá tsawantai ayampramiayi.”

<sup>5</sup>Tura ataksha tawai:

“Wijiaí shiir pujustinnium wayá ayamprashtatui.”

<sup>6</sup>Shuar nui wayawar ayampratin tuke awai. Tura emka Uwempratin Chichaman antukarmia nuka umichu ásar wayacharmiayi. <sup>7</sup>Nu asamtai ataksha Yus wayatin tsawantan áanturmaitji. Nusha yamá*i* tsawantaiti. Wats, Israer-shuar ni nunké Yus susamunam wayáwarmiayi. Tura nuna ukunam Uunt Tawit timiaja*i* Yus ni chichamen ujatmaji:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman nakitrarua núnisrum ajasairap” tímiayi.

<sup>8</sup>Kame ni kapitiántr*i* Jusué Israer-shuaran ni nunkeen awayá ayamtikraitkiuinkia Yus ukunam ataksha tsawantan áanturmachaaj*i*. <sup>9</sup>Nuja*i* páantaiti, ashí Yus-shuar Yusja*i* shiir pujusar ayampratin tuke awai. <sup>10</sup>Yusja*i* ayampra nu, ni kakarmarija*i* takastinian ayampraiti Yus ni takatrijaia*i* ayampramía núnisan. <sup>11</sup>Nu asamtai iisha Yusja*i* shiir pujustinnium pachiinkiachaj*i* tusar Yus shiir enentáimtusar kakaram ajastiniaitji. Israer-shuar yaunchu Yus taman nakitrarua núnis ajaschatniuitji.

<sup>12</sup>Yusa chichame iwiaaku chichamaiti, imiá kakarmaiti. Puniá mai érea núniniait*i*. Tuma asa shuara enentáin inít wayá ashí ni enentáimmian tura wakeramurin ti paant awajtai. <sup>13</sup>Yus najanamuka penké Nin umprukchamniait*i*. Ashí frunna nu Yus ímmianum misúa áintsan paant áiniawai. Tura ii túramu ashí paant ujakartatji.

### Jesus nekas Yúsnan pujurniu úuntr*i*nti

<sup>14</sup>Jesus Yusa Uchiri nekas Yúsnan pujurniu uuntr*i* ajas Yusai wayá iiniun chichartamji. Nu asamtai iniaitsuk tuke nekas enentáimtustiniaitji.

<sup>15</sup>Niisha iijaj*i* métek ashí tunaanum nekapsamuiti. Túrasha tunaan túrachmiayi. Tuma asa ii tujintiaj nuna paant nékak ii itiurchatrin waitnentramniuitji. Tura Yúsnan pujurniu uuntr*i* asamtai <sup>16</sup>Yús-akuptainium shiir enentáija*i* sapijmiatsuk jeamniaitji. Tura Yus in anenma asa waitnentramak itiurchat pujajnia nui yainmaktatji.

**5** <sup>1</sup>Tura Yúsnan pujurniu úuntr*i*kia shuar anaikiamuiti tura ni takatri jímiaraiti. Yusai shuárnan chicharsatniuiti. Nuyasha Yus suíniamun súsatniuiti tura núnisan namanken maa Yúsán súsatniuiti shuara tunaarin asakátratniun. <sup>2</sup>Tura Yúsnan pujurniu uuntr*i* niisha shuar asa ni tujintiamun nékak shuar nékachuncha tura waak yujainia nunasha waitnentramniait*i*. <sup>3</sup>Tura niisha tujintia asa ni tunaarincha chíkichnajaia*i* métek tsankurnarat namanken maa Yúsán súsatniuiti.

<sup>4</sup>Shuar ni enentáija*i*inka Yúsnan pujurniu uuntr*i* ajaschamniait*i*. Antsu Yus nu shuaran anaikiatniuiti. Núnisan Arunka anaikiamiayi. <sup>5</sup>Núniskete Krístujaia*i*. Niisha ni enentáija*i* Yúsnan pujurniu uuntr*i* ajaschamiayi. Antsu Yus Nin anaik nujaj*i* shiir awajsamiayi. Tura tímiayi: “Ame winia Uchiruitme. Túmaitkui yamaikia winia kakarmarun átakeajme.”



6Tura ataksha Yus-Papinium júnis tawai:

“Mirkisetékka Yúsnan pujurin amia núnismek Amesha tuke Yúsnan pujurin átatme.”

7Kristu jú nun<sub>kanam</sub> pujak kakantar útuk Yúsan ti seamiayi. Nin jákatniunmaya uwemtikramnia asamtai seamiayi. Tura Yusa wakeramur<sub>in</sub> tuke enentáijj<sub>ai</sub> enentáimtakui Yus anturak ti yáin<sub>miayi</sub>. 8Nuj<sub>ai</sub> Kristu Yusa Uchir<sub>intiat</sub> ni wáitsatniuj<sub>ai</sub> umirkatniun unuimiarmiayi. 9Nuj<sub>ai</sub> ti nekas Uwemtikin ajasmiayi. Tura shuar umirainia nuna tuke uwem ataksha Yus-Papinium júnis tawai:

“Mirkisetékka Yúsnantikrarmiiaiti. 10Túramtai Yus Nin Yúsnan pujurniu untr<sub>i</sub> Mirkisetékj<sub>ai</sub> métek awajsamiayi.

### Anearta. Yusj<sub>ai</sub> kanakchatniuiti.

11Ju ti nukap áujmatsatin awai. Túrasha ántichu asakrumin mashi ujakchamniaitjarme. 12Átumka yaunchu mash nekaamaintrume. Túmaitiatrum ataksha yaitiás Yúsnan jintintruat tusarum atsumarme. Warí, kuirchia núniniaitrume. Kátsuram yútsuk muntsu muntsúatniuitrume. 13Kuírchikia Uwempratin Chichaman áujenak pé<sub>ñker</sub> unuimiainiatsui. Tiñkiamnumi<sub>a</sub> ásar tujintiainiawai. 14Apatuk kátsurman aya uunt yuámniaiti. Uunt ainia nuka pé<sub>ñkernasha</sub> tura yajauchincha apatkar paant nékainiawai.

**6** 1Uunt ajastai. Krístunu ana nuyá aya yúpichuchia nuke enentáimtutsuk nu arantcha unuimiartai. Kame emka unuimiartinia nu ju áiniawai: shuar ni tunaar<sub>in</sub> jákatniunam júana nuna kúntuts enentáimtur Yúsan shiir enentáimtustincha, 2imiantinnium nekaatniuswai: “Mirkisetékka Yúsnanha, Yus-shuar yainmanum uweje awantsatniusha, jakamunmaya nantaktincha, tura sumamtikiatin tsawanta nu nekaatniusha. 3Tura Yus yáinmakrin nuna nan<sub>kaamas</sub> nekaattaji.

4Shuar Yusna nuna nekaa<sub>nka</sub> tura Yus susamun takakkun<sub>ka</sub> tura Yusa Shiir Wakan<sub>i</sub> kakarmar<sub>in</sub> nekapsaitkiun<sub>ka</sub> 5tura Yusa chichamencha pé<sub>ñker</sub>r<sub>aiti</sub> nekaa<sub>nka</sub> tura Yusa kakarmar<sub>i</sub> ukunam nun<sub>ka</sub> yamarmanum takastatna nuna yamá nekapeakka, 6nu shuar nuna nakitiak kanakniaka atak ni tunaar<sub>in</sub> enentáimtak ikiuktinian wakerachuk tujinkiattawai. Warí, ní enentáijj<sub>ai</sub> Yusa Uchir<sub>in</sub> krúsnum máiniaiti túrak ashí íimiaini<sub>ai</sub> natsanmain awajeawai. 7Nu shuar yajauch nun<sub>ka</sub> áintsan<sub>in</sub> áiniawai. Yumi yútakui pé<sub>ñker</sub> nun<sub>ka</sub> arakan pé<sub>ñker</sub> tsapatmakka arakmaun yayawai. Túramtai Yus shiir enentáimiui. 8Antsu jan<sub>kí</sub> nupan tsapatmakka nu nun<sub>ka</sub> yajauchiiti. Yus áeseak emesrattawai.

### Yus tsan<sub>katramkattajnia</sub> nu enentáimtakur kakaram ajaji

9Aneamu yatsurú, tu chicharkursha, nú shuarchaitrum nu nékaji. Antsu uwempra asarum nú pé<sub>ñker</sub> túrattarme. 10Yus ti pé<sub>ñker</sub> asa átum

takasmancha tura ni aneakrum Yus-shuar yainmancha kajinmatkishtatui. Tura yamaisha tuke túrarme. <sup>11</sup>Tura nuik túrarmena núnisrumek tuke iniaitsuk kakaram takasrum ashí Yus tsan̄katramkatta nu wáinkiatarme. Núnisan̄ atí tusar wakeraji. <sup>12</sup>Nakimtsuk kakaram ajastarum. Niiniua nuna Yus ni shuarin̄ susattawai. Tura shuar Yúsán enentáimtak shiir enentáijiaī nákkaka nuna wainkiattawai. Tu takastarum tusar wakeraji.

<sup>13-14</sup>Yus yaunchu Apraámjáī chichaak “Ti nekas shiir awajstajme tura ti nukap pampamtikrattajme” tímiayi. Nuna taku imiá nekas tajai tusa tura chíkich Nijjiaī nan̄kaamas uunt atsakui imia Niñki pachiimias tumammiayi. <sup>15</sup>Tutai Apraám yáitmataik nákas Yus timia nuna wáinkiamiayi. <sup>16</sup>Shuar “nekas tajai Yus íruu” tákun̄ka chíkich nijjiaī nan̄kaamas úntan páchiawai. Tura tu chichasmatain̄kia nuyán̄ka imiá nekas tana nu nekaamniaiti. <sup>17</sup>Tuma asamtai Yuska “ti nekas yapájítsuk túrattajai” tusa imia Niñki pachiimias tumammiayi. Nujaī ni tsan̄katkamun júkiartatna nu shuar Yus ti nekas umiktatna nuna nékainiawai. <sup>18</sup>Yus pen̄ké wáitruachmin asa áyatik ni tamajaī nekasaiti. Nuna arant nuikia imia Niñki pachiimias ti ikiakátmajai in. Nujaī iisha uwempratai tusar Niiní weamkatikia tsan̄katramkattajnia nu ti shiir enentáimsar wáinkiatin nákkaji. <sup>19</sup>Nu enentáimsar kakaram ajaji. Yusaiyā in umuchtiamkamnia pen̄ké atsawai. Yusaī áchitkia asakrin ti kakaram emettamji. <sup>20</sup>Jesusha emka Yusaī wayá mash iwiarturmaji. Tura Mirkiseték amia núnisan̄ Niisha yamá̄i tuke amuukashinian Yúsnan pujurniu uuntrī ajasuiti.

### Mirkiseték amia núnisan̄ Jesusha Yúsnan pujurniu uuntrī ajasuiti

**7** <sup>1</sup>Nu Mirkisetéksha Sarem nun̄kanam akupniuyayi. Tura ashí nan̄kamas kakaram Yúsnan pujurniuyayi. Apraám chíkich akupniun mesetjaī awakak támatai Mirkiseték jiintiuki in̄kiun̄ ti shiir awájsámiayi. <sup>2</sup>Túramtai Apraám nupetmakar kuit jukimiun tias (10) akantuk susamiayi. Mirkisetéka naarī tana júka “ti pen̄ker uunt akupin̄” tawai. Tura Saremka “ti shiir imiatkincha” tawai. Tura Mirkiseték Sarema akupniurī asa “ti shiir imiatkinchanum akupín̄” tawai. <sup>3</sup>Nukurísha aparísha Yus-Chichamnum atsawai. Núnisan̄ ni uuntrīsha atsawai. Ni akiiniamurin̄cha ni jakamurin̄cha ujaatsui. Tuma asamtai Yusa Uchirí̄a áintsan̄ tuke iniannakchatniun Yúsnan pujurniu uuntrī ajasuiti.

<sup>4</sup>Mirkiseték timiá uuntauya nu enentáimprata. Ii uuntrī Apraámsha nupetmakar kuit jukimiun tias akantuk susamiayi. <sup>5</sup>Tuma asamtai Apraám nan̄kaamas úntaiti. Muisais akupkamujaī Riwī weeáka Yúsnan pujurin̄ áiniawai. Niisha ashí Israer-shuarjaī métek Apraám weeá áiniawai. Túmaitiat pen̄ké Israer-shuar ni waririn̄ tias akantuk Riwī shuaran suu ármiayi. Muisais tu akupkamiayi. <sup>6</sup>Túrasha Mirkiseték Riwī weeachunak Apraám tiásan akantuk nin susamiayi. Apraám Yus shiira nuna tsan̄katkamuitiat

Mirkisetékan niijai uunt asamtai susamiayi. Túram Mirkiseték Apraáman shiir awajsamiayi. <sup>7</sup>Imía nekas Mirkiseték Apraáma nankaamas páantin asa Apraáman shiir awajsamiayi. <sup>8</sup>Israer-shuarti tias akankamun súajnia nú shuar aya aents ásar tuke pujuschamin ániawai. Antsu Mirkiseték jakamun Yus-Chicham penké ujaatsui. <sup>9</sup>Yamá Riwi weeá shuar kuit akankamun achiktin ániawai. Túrasha Apraám Mirkisetékan súakui Riwi weeá nujai susa ániawai. <sup>10</sup>Apraám weeá ániak ni ayashía ánis enentáimtusmin ániawai.

<sup>11</sup>Muisais akupkamunam Riwi-shuarnumiá aya Arun weeá shuar Yúsnan pujurin ármiai. Niisha Muisais akupkamu timia nujai métek penké shuarjai takasarmiai. Tura Riwi-shuarnumiá Yúsnan pujurniu takatrijiai tunáa nekas asakárminiaitkiuinia Yúsnan pujurin yamarmak, Arun weeachu, anaikiashtin ainti. Túrasha Yus Jesusan, Mirkiseték amia ánis, Yúsnan pujurniun anaikiaiti. Nusha Arun weeachuiti. <sup>12</sup>Tura Yúsnan pujurin yapajniámtai Muisais akupkamusha yapajniátniuiti. <sup>13-14</sup>Nu arantcha, ii Uuntri Jesukrístu Riwi-shuarcha antsu Jutá-shuarauyayi. Tura Muisais akupkamujai Jutá-shuarnumiá Yúsnan pujurin atsutniuiti. Antsu nuna takatrin penké túrashtiniuyi. Tuma asamtai nújaisha Muisais akupkamu yapajniátniuiti.

<sup>15</sup>Nú páantcha awajsamniaiti. Wats, Yúsnan pujurin yamarma nuka Mirkisetékjai méteketi. <sup>16</sup>Ninkia Riwi shuar asa Yúsnan pujurin ajaschamiayi, antsu jákashtin asa nu kakarmajai Yúsnan pujurin ajasmiai. <sup>17</sup>Tuma asamtai juna Yus Jesusan áujmatui:

“Mirkisetékka Yúsnan pujurin amia núnismek Amesha inianatsuk Yúsnan tuke pujurin átatme.”

<sup>18</sup>Nujai yaunchu akupkamu penkercha ajasmatai japirmaiti. <sup>19</sup>Muisais akupkamuka shuáran penker awajsachminiuyayi. Antsu Yus in ti shiir awajtamsattajnia nu náka. Nujai Yusai ti shiir jeeáitji.

<sup>20</sup>Nunasha Yus “nekas tajai” tusa Ninki pachimias tumammiai. <sup>21</sup>Riwi-shuarnumiá Yúsnan pujurin Yusa naari pachitsuk anaikiamu ármiai. Antsu jú Yúsnan pujurniunka Yus imia Ninki pachimias anaikiamiai. Tura Nin júnis tímiayi:

“Uuntka imia Ninki pachimias tiniu asa penké yapajáshtatui.

Niisha “Mirkisetékka Yúsnan pujurin amia núnismek Amesha tuke Yúsnan pujurin átatme” tímiayi.”

<sup>22</sup>Tuma asamtai Jesuska nekas uwemtikrattajai tusa yaunchu amia nujai nankaamas penker Chichaman iwiarturuiti. <sup>23</sup>Yaunchu Yúsnan pujurin untsurí ármiai. Chíkich jakamtai chíkich tuke takaarmiai. <sup>24</sup>Antsu Jesus tuke jákashtin asa chikichan ikiurkishtatui. <sup>25</sup>Tuma asa tuke iwiaaku pujak ni shuarin tuke Yúsan áujtusminiaiti. Tuma asa shuar Nin enentáimtusar Yusai weankarun tuke uwemtikramniaiti.

<sup>26</sup>Tuma asa Jesus Yúsnan penker pujurin asa ii atsumajnia núkete niisha. Niisha ti shiir asa penké tunaarinchaiti. Ashí tunaarinunmaya

kanakniuiti. Tura Yusjaj̄i métek Uunt ajasuiti. <sup>27</sup>Niisha yaunchu Yúsnan pujurniu uuntrī armia núnikchaiti. Yaunchua nuka murikiun máawar ashí tsawant Yúsán suu ármiayi. Nujaj̄i emka ni tunaar̄in nuyá ashí shuara tunaar̄in asakátin ármiayi. Tura Jesuska jákatniunam chikichkí surumak ashí shuara tunaar̄in asakátramiayi. <sup>28</sup>Muisais akupkamuka pen̄ké shuarnak tuke pen̄kercha ain̄ Yúsnan pujurniu úuntrīn anaikiaiti. Tura nu ukunmaṅka Yus, nekas nin̄ki pachiiimias, ni Uchir̄in, tuke pen̄kera nuna, Yúsnan pujurniu úuntrīn anaikiaiti.

### Naṅkaamas pen̄ker Chichaman Jesus takartamji

**8** <sup>1</sup>Nekas juna tájame: Yúsnan pujurniu uuntrī Jesus in ti shiir yainma asa akupin pujutainium Yusa untsuurin̄i nayaimpiniam pujusuiti. <sup>2</sup>Nekas Yusa Jeē nayaimpinma nu aents najanachma antsu Yus najanamuiti. Nuj̄ Jesus Yúsnan pujurui. <sup>3</sup>Ashí Yúsnan pujurniu uuntrī ainia nu, shuar Yúsnan susamuncha tura naman̄ maar Yus sútaincha Yúsán ashí súsatin ániawai. Núnisan̄ Jesukrístusha Yúsán súsatniuiti. <sup>4</sup>Juyá Yúsnan pujurin Muisais timia nuna Yúsán yamaisha susamin akui Jesus j̄u nuṅkanam pujakka Yúsnan pujurin áchainti. Antsu nayaimpiniam takaawai. <sup>5</sup>Yus yaunchu Muisaisan nayaimpiniam írrunna nuna iniaktus tímiayi “Ame wáinkiamna nujaj̄i métek ashí najanata.” Túramu asamtai ashí yaunchu Yúsnan pujurin Muisais najanamujaj̄i takainia nu aya nayaimpiniam ana nuna nakumkamujaj̄in̄ takainiawai. <sup>6</sup>Antsu Jesus ti nekasa nujaj̄i nayaimpiniam takaawai. Muisais akupkamuka shuáran pen̄ker awajsachminiaiti. Antsu Yus in ti pen̄ker awajtamsattaji. Kame Yamaram Chichamnum Yus ashí túrutmattajnia nu Muisais akupkamunam ana nuna naṅkaamas ti pen̄ker ániawai. Tuma asamtai naṅkaamas pen̄ker Chichaman Jesus takartamji.

<sup>7</sup>Kame Emka Chicham, Yus Muisaisjaj̄i yaunchu najanamia nu, nekas pen̄keraitkiuṅkia Yamaram Chichaman najanachaṅayi. <sup>8</sup>Antsu pen̄kercha ainiakui Israer-shuaran tímiayi:

“Uunt Yus tawai: “Tsawant jeamtai ashí Israer-shuarjaj̄i Yamaram Chichaman najanattajai. <sup>9</sup>Yaunchu j̄u shuara uuntrīn Ejiptunmaya yaruakmij̄ nuj̄ Emka Chichaman najanamjai. Tura Yamaram Chichaman najanattaj̄ nu núnischa átatui. Emka nuna uminiachkui ajapan iniaisarmajai.” Núnis tawai Uunt Yus. <sup>10</sup>Tura nu arantcha tawai: “Tsawant jeamtai Israer-shuarjaj̄i Yamaram Chichaman najanattaj̄ nuka j̄únis átatui. Wi akupeajna nuna enentáin̄ paant enentáimtikrartatjai. Nuyá ni Yusrī ártatjai tura niisha Wíi shuar ártatui. <sup>11</sup>Nuj̄sha Yúsán nekaat tusa jintinnaiyachartatui. Kame ni aṅsha ni yachisha kame ashí shuar, uchisha uuntcha, ashí nekarawartatui. <sup>12</sup>Tura ashí ni tunaar̄incha tsan̄kuran ni yajauchir̄in atak pen̄ké enentáimtuschartatjai” tímiayi.” Tu áarmaiti.

13 Wats, Emka Chicham yajauch ajakui Yus Yamaram Chichaman najaneak pujurui. Tura yajauch ajasua nuka wárik ajapnattawai.

**Yusa Jee nayaimpinmasha tura ju nunkanmasha**

**9** 1 Ayu. Yus shiir awajsatniuka Emka Chicham timia nujaj métek túratniuyayi. Tura ju nunkanmaya Yusa Jee weniar Yús shiir awajsatniuyayi. 2 Nu Jea sha júnis tesakmauyayi. Nékatka Shiir Tesaamu tutainti. Nu asutin ekeemakar tsápin awajtaisha tura misasha Yus iniaktusma tantajaj pujuyayi. 3 Nuyá-tesaamuka Imiá Shiir Tesaamu tutainti. 4 Nu kunkuin ekeemataisha kurijiaj kuerma tura Chicham Aarma Chumpitiaisha pujuyayi. Nusha ashí kurijiaj kuérmauyayi. Tura init kurijiaj najanamu ichinkian maná yurumak enkemniuyayi. Nuyá Yúsnan pujurniu uuntri Arunka ushukrutairi yaunchu tsapaak janjukmia nusha enkemniuyayi. Nuyá Yus najanamu Chicham Muisais kayanam aarmasha enkemniuyayi. 5 Nuna úkurin Kirupín, nayaimpinmaya suntara nu, kurijiaj nakumkamu wajarmiayi. Nusha Yusa shífirmarin nakumkarmiayi. Tura ni nanapéjaj shuara tunaarín ayamprutain nukúakuyayi. Nuna arantka yamá etserkatin atsumatsji.

6 Núnis aa asamtai Shiir Tesaamunam ashí Yúsnan pujurin tuke wániak Yúsnan takasarmiayi. 7 Tura Imiá Shiir Tesaamunmanka aya ni uuntrin wáiniauyayi. Tura niisha ashí uwitin aya chikichik tsawant wayamiayi. Wayak ni tunaarisha tura ashí shuara tunaari tsankurnarat tusa Yus súsatniu namañké numpen juu ámiayi. 8 Yusa Wakaní núnis atí tusa nuna mash iwiamiamiayi. Tura asa juna paant awajturmaj. Jú nunkanmaya Yusa Jee pujakui tura aya nuin Yus shiir awajsamniaitkiuinikia nekas Imiá Shiira nuj Yus pujamunam wayatin tuke itiurchat ainti. 9 Nusha yamá pujuiniaj nuna enentámtikrampratniuitji. Shuar Yus shiir enentámtikratniun namañken maa suíniaksha nu shuar ni tunaarijiaj tuke itit enentámtumainiawai. 10 Warí, aya yurumátniusha umartincha nijiartincha tura ashí núnisan túratniujaj aya pátatek asamtai enentáiniam ana nuna iwiarachmin áiniawai. Antsu Yus nú túratniunka yapajiatniuyayi. Tuma asamtai yapajniátsain túratin áiniawai.

11 Tura yamaikia Kristu táwiti tura Yúsnan pujurniu uuntri ajas Yamaram Chichamnum Yus ti penkeran túrutmatniua nuna pujurturmaj. Niisha ti shiir Yus Jea aents najanachmanum takaawai. Nu Jea ju nunkanmayanchuiti. 12 Tura Kristu Imiá Shiir Tesaamunam namañke numpéjaj wayachuiti antsu ni numpejaink<sup>i</sup> wayaiti. Tura aya chikichí wayá ii tunaarín asakturmar tuke uwemtikrampramaj. 13 Nekas namañké numpesha tura áisamu yunkunmirisha tunáa shuarum pátatek ukatkamu aya pátatek shiir awajsamniuyi. 14 Túrasa Kristu numpé ii tunaarín penké asakáruiti. Túramtai yamaikia tunáa jákatniunam júana nujaj itit enentámtumatsuk nekas iwaaku Yus shiir umirkamniaitji.

Kristu penké tunaaríncha asa tuke jákashtin Wakaní kakarmarijiaí jákatniunam Yusaí surumakmiayi.

<sup>15</sup>Nu asamtai Jesukrístu Yamaram Chichaman shiir takarniuiti. Yaunchu Chichamjají tunáa nekas tsankurachma asamtai Kristu jaka nu tunaancha tsankurarmiayi. Nujají ashí Yus-shuarti Yus achikma asar Yus tsankatramajnia nu wáinkiar tuke wararsattaji. <sup>16-17</sup>Shuar ni kuítrín akantrattak chichaman najanatniuiti. Tura jáatsain nu kuit akantrashtiniaiti. Aya nii jakamtai nu chicham najanamu uminkiatniuiti. <sup>18</sup>Nu asamtai Emka Chicham Muisaisjají najanamusha maamu numpé ukatramujají akupkamuyayi. Nujajísha namán máatniuyayi. <sup>19</sup>Muisais nu akupkamun ashí shuáran ujakarmiayi. Nuyá ure kapaakujají tura nupajajísha namanké numpé entsajají pachimpramujají ayak akupkamun papíncha ashí shuarnasha ukatkarmiayi. <sup>20</sup>Tura tiarmiayi “Ju numpajají “Chícham Yus akupturmarmena nu nekas umiktiniaiti” tawai.” <sup>21</sup>Nuyá nu numpajají Yusa Jeencha ashí nuí takastin irunmia nunasha ukatkarmiayi. <sup>22</sup>Nu akupkamujají penké ishichik numpajajínchu shiir awajsamniaiti. Túrasha numpajajínchu tunáa penké asakárchamniaiti.

### Kristu jakamujají tunáa asakárminiaiti

<sup>23</sup>Tuma asamtai Muisais najanamu nayaimpiniam ana nuna aya nakumkamu ásar namanké numpejají shiir awajsamu ármiai. Antsu nayaimpiniam nekas írunna nu, nankaamas kakaram numpajají shiir awajsatin áiniawai. <sup>24</sup>Krístuka yaunchu Yusa Jeen aents najanamunam takastaj tusa wayachmiayi. Nuka nayaimpinmayan aya nakumkamuiti. Antsu nekas nayaimpiniam Yus pujamunam wayá asa in áujturmají. <sup>25</sup>Yaunchu Yúsnan pujurniu uuntri ni numpejajínchu ashí uwitin Imiá Shiir Tesaamunam wain ármiai. Tura Krístuka untsurí wayachuiti. <sup>26</sup>Kame untsurí wayatniuitkiuiníka ni numpejajínkí wayá asa yámankamtaiknumiá untsurí jákaayi. Antsu yamaikia ju nunka amúamunam Kristu chikichkí jákatniunam surumak tunaan ashí asakáruiti. <sup>27</sup>Ashí shuar chikichkí jakar nuyá ni túramun Yusaí nekamatniun nantaktin áiniawai. <sup>28</sup>Núnisan Kristu chikichkí jákatniunam surumak shuara tunaarín asakáruiti. Tura atakka tunaan asakártinian wantinkiashtatui. Antsu ni tátintrin nákania nuna uwemtikkratsa wantinkiattawai.

**10** <sup>1</sup>Muisais akupkamuka ukunam ti penker átatna núchaiti. Antsu nuna aya nakumeawai. Tuma asa ashí uwitin naman maar Yus sútajjajísha shuara tunaarín asakátrachminiaiti. <sup>2</sup>Kame asakátraka shuar nekas shiir awajsamniaitkiuiníka Yus naman maar súatniun atsumachuk iniaisarayí. Iis, mash tsankuramuitkiuníka ni tunaaríjjají itit enentáimtumascharainti. Túrawar naman maar Yus súatniun iniaisarainti. <sup>3</sup>Antsu namanken maar ashí uwitin tuke suíniak nujají ni

tunaarin tuke enentáimtuiniawai. <sup>4</sup>Warí, namanké numpejai ii tunaari penké asakárchamniaiti.

<sup>5</sup>Nu asamtai Kristu jú nunkanam taa Yúsán chicharuk tímiayi:

“Naman maar sútaisha penké nakitrame. Antsu ayashiwiam surusuitme. <sup>6</sup>Naman áesamusha tura tunaan asakártin naman susamusha wakeratsme. <sup>7</sup>Tuma asamtai “Yusrú, tímiajai. Winia áatrurma núnisnak ame wakeramurmin umiktajtsan táwitjai” tímiajai” tímiayi.

<sup>8</sup>Emka, Muisais akupkamu ain, naman susamuncha, tunaan asakárat tusa naman maar susamuncha, naman áesamuncha Yus ashí nakitraiti tawai Kristu. <sup>9</sup>Nuyá “Yusrú, ame wakeramurin umiktajtsan táwitjai” tawai. Nuna taku naman maar sútain “Asakáiniaiti” tawai. Tura chikichan ikiuwai. <sup>10</sup>Jesukrístu Yúsán umiruk jákatniun chikichkí surumakmatai Yus in tunaarincha shiir awajtamsaitji.

<sup>11</sup>Tura Israer-shuarnumiá Yúsán pujurin ashí tsawantai nú namannak máawar tunaan asakáchunak Yúsán ti suu áiniawai. <sup>12</sup>Antsu Jesukrístuka jákatniunam chikichkí surumak ashí shuara tunaarin asakár atacka penké jákashtiniaiti. Nuna tura Yusa untsuurini nekas akupin pujutainium pujusuiti. <sup>13</sup>Tura Yus ni nemasrin nupetak nin umirkarti tusa súsartatna nuna nákwai. <sup>14</sup>Chikichkí jakamuaji ni shuarin tuke tunaarincha awajsaruiti. <sup>15</sup>Yusa Wakanisha núnisan tawai. Emka tímiayi:

<sup>16</sup>“Yamaram Chichaman najanattaj nuka júnisan átatui: Wi akupeaj nuna ni enentáin paant enentáimtikrartatjai.” <sup>17</sup>Nuyásha tawai: “Ni yajauch tunáa túramurin penké enentáimtuschattajai.”

<sup>18</sup>Tuma asamtai, ii tunaari tsankuramu asamtai atak in jarutramkatin atsumatsji.

### Yus tuke shiir enentáimtusar Yusaj jeartai

<sup>19</sup>Tuma asamtai, yatsurú, Jesukrístu numpejai pénker awajsamu asar sapijmiatsuk shiir enentáijjai Imiá Shiira nui, nekas Yus pujamunam wayamniaitji. <sup>20</sup>Nui wayatniuka Kristu jaka Yusa Jeen tesaamun júsatniua áintsan ánturmamiaji. Yamaisha tura tuke wayamnia átatui. <sup>21</sup>Jesus Yúsán pujurniu uuntri asa ashí Yus-shuartin wáitmak pujurtamji. <sup>22</sup>Tuma asamtai, tuke enentáijjai Yus imiá nekas enentáimtusar Yusaj jeartai. Ii enentái Kristu numpejai nijjarma asamtai nekas enentáimtakur ii tunaarjaji itit enentáimtumaschatniuitji. Tura ii ayashisha pénker entsajaji imianniuitji. <sup>23</sup>Yus tsankatramkattajnia nu shiir enentáimtamu iniaitsuk kakaram ajar tuke emetatniuitji. Yus tsankatramkaitji nuna umiktatui. <sup>24</sup>Pénker anenain tura pénker túrin ajarantai tusar mai yainiaikiartiniaitji. <sup>25</sup>Yusa Jeen Yus-shuarjaji tuke iruntratin iniaiashtiniaitji. Chíkich inianiakuisha iikia tuke iruntratniuitji. Nui irunkurkia ikiakánairtiniaitji. Tura Kristu tátin tsawantri ishichik ajasu asamtai nú nukap túratniuitji.

**Anearta. Ti tsúumainti iwiaaku Yusa kakarmaríjijai asutniátin.**

<sup>26</sup>Túrasha shuar nekas chichaman nékayat wakeramuríjijain tunaanum wekaakka Kristu jakamun nakitia asamtai chíkich atsawai ni tunaarin asakátratniun. <sup>27</sup>Áyatik ashamak ti tsuumai sumamatin tsawantan nákasminiati. Nu tsawantai Yus ni nemasrin ti kajerak asutiak mash emesrattawai. <sup>28</sup>Shuar Muisais akupkamun umikchamtai tura jímíar shuar menaintiusha etserkarmatai waitnentsuk máatniuyayi. <sup>29</sup>Núnisaitkiuiníakia shuar Yusa Uchirin wishikiainiakka ni numpencha nakitiainiakka tura Yus nin anea nuna Wakanincha katsekainiakka nuna nankaamas asutniáchartatuak. Warí, nii nakitiana nu numpajai Yamaram Chicham nekas umirkatin awajsamuyayi. Tura nújajsha nii ti péñker awajnastiniuyayi. <sup>30</sup>Ii Uuntri Yus júnis tímiayi “Wi asutiátniuitjai. Wi yapajkiattajai.” Nuyásha tímiayi “Wíi shuara tunaarin ti paant nekarattajai.” <sup>31</sup>Ti tsúumainti iwiaaku Yusa kakarmaríjijai asutniátin.

<sup>32</sup>Tura atumsha yámankamtaik Yusna nekaarum Yus-shuar ajasmarum nu enentáimsatarum. Kakaram ajasrum ashí itirchat katsuntramarme. <sup>33</sup>Chíkichirmeka katseknakmarme tura ashí íimiainiamunam yajauch awajnasmarme. Chikichcha nu shuarnum pachikía asarum itit awajnasmarme. <sup>34</sup>Atumsha sepunam pujuinia nusha waitnentramarme. Tura shiir warasrum kufrumin atantramainiakusha katsuntramarme. Nayaimpiniam tuke amuukashtin kuit pachiktin asarum túramarme. <sup>35</sup>Tuma asarum yawetsuk Yus tuke enentáimtusrum kakaram ajastarum. Túrakrum nankaamas akinkiattarme. <sup>36</sup>Atumsha esetra enentáimsarum Yus wakera nu túrakrum Yus atumin amastinia nu wainkiattarme. <sup>37</sup>Kame Yus-Chichamnum áarmaiti:

“Tátinia nu ishichik ajasai. Wárik tátatui. <sup>38</sup>Shuar Yúsan nekas enentáimtak péñker wekaak uwemprattawai. Tura iniaiyakuiníakia nin wararsashtajai.”

<sup>39</sup>Tura iikia iniaisar mesena nú shuarchaitji. Antsu Yus shiir enentáimtusar uwempraitji.

**Yus nekas enentáimtustin**

**11** <sup>1</sup>Yus nekas enentáimtakur “nákajnia nuna, Yus nekas suramsattajai” taji. Tura wáinchaitiatar “nekas wainkiattajai” taji. <sup>2</sup>Yaunchu ii uuntri Yúsan nekas enentáimtuiniakui Yus “péñkeraitme” tiarmiayi.

<sup>3</sup>Aya Yus enentáimtakur ju nékaji: Yus aya ni chichamejain ashí nunkan najanamiayi. Túramtai ashí wáiniainiaj nu wáinchataijijai najanamu áiniawai.

<sup>4</sup>Apir Yúsan nekas enentáimtak Kaínjai nankaamas péñkera nuna Yúsan susamiayi. Túramtai Yus “péñkeraitme” taku shiir yuminsamiayi. Tuma asamtai Apir jákaiat tuke enentáimtikramji.



<sup>5</sup>Enuksa Yúsan nekas enentáimtak iwiaakuk nayaimpiniam junakmiayi. Yus jukimiu asamtai wáinkiacharmiayi. Tura Yus-Chichamnum aarma “Eruk júnatsuk Yúsan ti shiir enentáimtikniuyayi” tawai. <sup>6</sup>Tura Yus nekas enentáimtachkumka žitiurak Nii shiir enentáimtiksatam? Nekas enentáimjají Yúsan weantuktaj tusam wakerakmeke, emka, Yus iwiaaku pujawai, tu enentáimpratniuitme. Nuyásha, Wi Yúsan eakuinkia Yuska winia yáintkiattawai, tu enentáimsatniuitme.

<sup>7</sup>Yus, ‘amaarkatniun akupkattajai’ tiniu asamtai, Nuaisa Yúsan nekas enentáimtak, amaarun wáinchaitiat, “túrunattawai” tímiayi. Túrak Yus timiajají métek uunt kanun najana ni shuarincha uwentikramiayi. Tura Yúsan nekas enentáimta asamtai Yus “pénkeraitme” tímiayi. Tura ni umirkamujají chíkich shuar Yúsan enentáimtachun súmamtikiawarmiayi.

<sup>8</sup>Tura Apraámsha Yúsan nekas enentáimtak Yus “núnkem ikiukim wetá” tutai shiir umikmiayi. Yus tuke nin súsatniua nú nuñkanam wémiayi. Turasha ni nuñken ikiuak ni jeatniun nékatsuk jiinkimiayi. <sup>9</sup>Yúsan shiir enentáimtak nú nuñkanam Yus nin tsan̄katkamuitiat írara áinis pujusmiayi. Nuap jeanam pujuyayi. Núnisan̄ ni uchirí Isaksha tura ni tiran̄kí Jakupsha nuñ̄ tsan̄katkamuitiatan̄ írara núnisar pujuarmiayi. <sup>10</sup>Kame Apraámka nayaimpinmaya ashirchamin péprunam pujustinian nákasmiayi. Yus nu pepru péñker iwiar jeamka asamtai umuchkiachminiaiti.

<sup>11</sup>Apraáma nuwé Sarasha Yúsan shiir enentáimta asa úuntach áyat ajaprukmiayi. Yus timia nuna umiktatui tau asa uchin takusmiayi.

<sup>12</sup>Tura nujají Apraám ti úuntchitiat ti pampanmiayi. Nii chikichkitiat ni pampanmarí ti untсурí ajasar yaajají métek tura náikmijají métek nekapparmarchamnia ajasarmiayi.

<sup>13</sup>Ashí nu shuar Yus tsan̄katkamun wáintsuk jákarmiayi. Túrasha Yúsan nekas enentáimtuiniak arantiá wáinkiar warasar shiir enentáimtiarmiayi. Túrawar “ju nuñkanam nekas aya íraraitji” tiarmiayi.

<sup>14</sup>‘Íraraitji’ tu chichainiak chíkich nuñka eamun páant awajainiawai.

<sup>15</sup>Niisha matsatu winíarmia nuñ̄ atak waketkitniun wakeruiniakka páchitsuk waketkiaraayi. <sup>16</sup>Tura antsu niisha nuna nan̄kaamas péñker nuñkan nayaimpinmaya nuna enentáimtiarmiayi. Túmainiakui Yuska péprun iwiartur susa asa “wi ni Yusr̄intjai” títinian natsantatsui.

<sup>17</sup>Ataksha Apraám Yúsan nekas enentáimtak “chikichik uchi amasmaj nu, namañkea áitkiasmek maam surusta” takui Apraám Isakan ni uchirín Yus susatniun pen̄ké suritkiachmiayi. <sup>18</sup>Kame Yus “Isakjají ti pampan̄tatme” tau asamtai <sup>19</sup>Apraám “máamtaisha Yus iniantkittiwai” tu enentáimpramiayi. Tura Yus ukunam máatiun suritkiamtai Isakan máachiat nekas jákatniunmaya uwempran nantakniua áintsan̄ wáinkiamiayi.

<sup>20</sup>Isaksha Yúsan nekas enentáimtak ni uchirín Jakupnasha Esauncha ukunam ni túrunattana nuna ujakarmiayi. <sup>21</sup>Núnisan<sub>n</sub> Jakup Yúsan nekas enentáimtak jatsuk ni tiran<sub>n</sub>kin, Jusé uchirín, shiir túrunattana nuna ujakarmiayi. Tura ti uuntach asa máshtun<sub>n</sub>krin ushukruma Yúsan shiir awajsamiayi. <sup>22</sup>Tura Jusesha jákatniuri ishichik ajatesmatai Yúsan nekas enentáimtak Yus ukunam Israer-shuaran Ejiptu nun<sub>n</sub>kanmaya júkiartatna nuna ujakarmiayi. Tura jíiniainiak ni ukunchin júkiar Yus tsan<sub>n</sub>katkamu nun<sub>n</sub>kanam iwiarsarat tusa akupkamiayi.

<sup>23</sup>Muisaisa aparisha nukurisha Yúsan nekas enentáimtuiniak Muisais ti shíirmach asantai suntar máawar<sub>n</sub>in tusa akiiniamunmaya<sub>n</sub> maintiu nantu úukarmiayi. Tura uunt akupin akupkamun ashamkacharmiayi. <sup>24</sup>Muisaissha Yúsan shiir enentáimtak uunt ajas Ejiptunmaya<sub>n</sub> uunt akupniu nawantrí uchirí ajastinian nakitramiayi. <sup>25</sup>Antsu Ejiptu nun<sub>n</sub>kanam ishichkisha tunaan warartsuk Yusa shuar<sub>n</sub>jijai métek wáitsatniun nan<sub>n</sub>kaamas wakerukmiayi. <sup>26</sup>Nujai Krístun yajauch awajsarmia núnisan<sub>n</sub> niisha wáitsatniuyu. Túrasha ashí Ejiptu nun<sub>n</sub>kanam pé<sub>n</sub>ker irunmia nuna nan<sub>n</sub>kaamas Yus nin ukunam tsan<sub>n</sub>katkatta nuna shiir enentáimtusmiayi. <sup>27</sup>Niisha Yúsan shiir enentáimtak uunt akupin kajeramu ain<sub>n</sub> ashamsuk Ejiptu nun<sub>n</sub>kanmaya<sub>n</sub> jiinki wémiayi. Yúsan wáinchiat shiir enentáimtamujai wainiua áinis kakaram ajas ashí katsuntramiayi.

<sup>28</sup>Muisais Yúsan shiir enentáimtak yámankamtaik paskua namperan najaneak ashí Israer-shuaran numpajai ni wáitirín kuérat tusa akupkarmiayi. Nujai Yus timia núnisan<sub>n</sub> nayaimpinmaya<sub>n</sub> suntar nuna iis nu jeanam iwiairín máatsuk nan<sub>n</sub>kaikit tusa tímiayi.

<sup>29</sup>Israer-shuarsha Yúsan shiir enentáimtuinia ásar Kapa<sub>n</sub>antin Entsa nakaakamtai ajapén ti pé<sub>n</sub>ker kukarnum katin<sub>n</sub>kiarmiayi. Ejiptunmaya<sub>n</sub> suntarsha núnisan<sub>n</sub> katintai tukamá jakerarmiayi.

<sup>30</sup>Israer-shuarsha Yúsan shiir enentáimtuinia ásar Yus timian umirkar siati tsawant Jerikiú péprun téntakarmatai aa tanish sánákmiayi. Nujai ti yúpichuch nupetkarmiayi. <sup>31</sup>Raapsha nu péprunam pujak<sup>u</sup> Yúsan nekas enentáimtak tsanirmatai áyat Israera suntarín mamikmak wekaan ti pé<sub>n</sub>ker itiaá asa chíkich shuar Jerikiúnam matsatua nujai jákachmiayi.

<sup>32</sup>Nu arantcha Yúsan shiir enentáimtin ti írunui. Jeteúnsha, Paraksha, San<sub>n</sub>sunsha, Jiptísha, Tawitcha, Samuersha, Yúsnan etserniusha nu shuar áirmiayi. Mash ujaktinian jeatsjai. <sup>33</sup>Niisha ashí Yúsan nekas enentáimtuinia ásar Yusa kakarmarin<sub>n</sub> niisháa niisháa iniaktusarmiayi. Nuna túruiniak chíkich chíkich nun<sub>n</sub>kanmaya aentsun nupetkarmiayi, nu<sub>n</sub>isha pé<sub>n</sub>ker akupkarmiayi, tura Yussha ni timia núnisan<sub>n</sub> yain<sub>n</sub>kiarmiayi. Uunt yawan<sub>n</sub>cha kajechu awajsarmiayi, <sup>34</sup>uunt jiniasha ikiajniakarmiayi, puniajai<sub>n</sub> mantamnatniuncha uwemprarmiayi. Kakarmachusha kakaram ajar mesetnumsha ni nemasrin<sub>n</sub>cha nupetkarmiayi. <sup>35</sup>Nuwasha ni uchirí jakan iniantkimiun wáinkiararmiayi.

Chikichcha wáitias mantam Nawarmiayi. Ti shiir pujustinnium nantaktiai tusar nú tsawantaj̄ uwempratniun nakitrarmiayi. <sup>36</sup>Chikichcha katseknakarmiayi, asutniáwarmiayi, jirujaj̄ jin̄kiawar sepunam en̄kenawarmiayi. <sup>37</sup>Kayajaj̄ tukú mantam Nawarmiayi, j̄miapetek tsupinkarmiayi, Yúsan iniaisarar tusa nekapnasarmiayi, puniajaj̄ mantam Nawarmiayi. Aya wékainiarmiayi, kuítrincha ásar nuapen entsararmiayi, shuar nincha áintrar wáitnenmai awajiararmiayi. <sup>38</sup>Atsamunmasha, naincha, waanmasha, ashí nun̄kanam wekain ármiai. Nu shuarjain̄kia ju nun̄kanmaya shuar imiá yajauch ásar niijjaj̄ pujumainchu ániawai. <sup>39</sup>Nu shuar Yúsan shiir enentáimtuiniakui Yus “pén̄keraitrume” tiarmiayi. Túmaitiat ni tsan̄katkamun wáinkiacharmiai. <sup>40</sup>Yuska nuna nan̄kaamas pén̄keran iwiarturaru asa tura in yamá pujajnia juna enentáimturma asa niisha iisha mai metek tsan̄kiar ti pen̄ker ajasarti tu enentáimsamiayi.

### Jesus tuke enentáimtusar tséquentiai

**12** <sup>1</sup>Ashí ju nun̄kanam túrajnia nuka shuar nakuruiniak tsékena nujaj̄ nakumkamniaiti. Ashí shuar yaunchu Yúsan shiir enentáimtusaruka téntakar firmainiaji. Tuma asamtai ashí kijin ana nusha tura ashí tunaaka itit awajtamaj nusha ajapa iniaisar tura katsuntrar tséken̄kir jeatai. <sup>2</sup>Túmakur Jesus tuke enentáimtusar tséquentiai. Ashí shuarjaj̄ nan̄kaamas Jesus Yúsan ti nekas enentáimtak aya pén̄kernak túramiayi. Tuke nekas awakmakmiayi. Imiá tunáa shuáran krusnum máatin aijn̄ núnisan̄ natsanmainium jákatniun surimiakchamiayi. Antsu ukunam ti shiir warastin átatna nuna enentáimtak nuna ashí katsuntramiayi tura nuyá Yusa untsuurin̄i akupin pujutaniun pujusuiti.

<sup>3</sup>Tunáa shuar Jesusan wáitkiasarmia nu enentáimpratarum. Túrarum pimpitsuk katsuntratarum. <sup>4</sup>Átum tunaajaj̄ máaniakrum Jesus túramia áintsarum numpemsha puárchaitrume tura jákachuitrume. Nuisha katsuntrarum jeatniuitrume. <sup>5-6</sup>Yus nekas ni uchir̄in chicharkatniua áinis túramprum nu kajinmatkichmashuram. Júnis tawai:

“Uchirú, wi jintinramajmena nu kajinmatkip. Asutiámkuisha kúntuts pujusaip. Kame Uuntka Nii aneana nuna jintintiawai. Tura ni uchir̄i ajasat tusa achiana nuna asutiawai.”

<sup>7</sup>Tuma asamtai Yus ni uchir̄ia áinis asutiámkuisha katsuntratarum. Warí, ashí apa ni uchir̄in chicharkashtatuak. <sup>8</sup>Tura ashí uch̄in chicharkatniua núnis Yus atumin chichartamchakrumn̄kia nekas ni uchir̄inchuitrume. Antsu chikichnaitrume. <sup>9</sup>Nu arantcha ii apar̄i uchich árin̄in̄ chichartamkurin umirniuyaji. Nu arant nuikia nekas ii Apar̄i nayaimpiniam pujana nu shiir umirkar tuke shiir pujustin wakerishtatjik. <sup>10</sup>Ii apar̄i ishichik ni enentáijjaj̄ wakeramu chichartamniuyaji.

Antsu Yuska ti penker awajtamsataj tusa nekas atsumajnia nujaj métek chichartamji. <sup>11</sup>Kame nekasaiti, ashí asutiámu yamaikikia waraschamniaiti, antsu kúntuts enentáimtikramji. Túrasha ukunam nu asutiámujaj unuimij nuka penker túratniun tura shiir pujustinian yáinmaji.

**Anearta. Yus tana nu nekas antuktiniaiti.**

<sup>12</sup>Nujaj pimpirarusha tura kakarmachu ainia nusha ikiakártarum. <sup>13</sup>Túrarum penker esettsa enentáimsarum wekasatarum. Túrarum tujintiainia nusha shiir wekasatin yaintarum.

<sup>14</sup>Ashí penker túrakrum ashí shuarjaj nawamnaikiarum penker wekasatarum. Tunaan túrinkia Yusaj penké jeashtatui. <sup>15</sup>Aneartarum. Shuar nakitiakuinkia Yus nu shuáran shiir yáintinian tujinkiatawai. Nu shuar yajauch enentáimiuk chíkich shuárnasha itit awajas tunaanum útsukartatui.

<sup>16</sup>Tsanirmawairap.

Yusna nusha nakitirairap. Isaka uchirí Esau penkera nuna nakitramiayi. Yus “iwiairín núkap súsatniuiti” timia nuna enentáimtuschemiayi. Tura asa aya ishichik yurumkajaj yapajíamiayi. <sup>17</sup>Tura nuyá ni aparí ukunam túrunattana nuna takui Esau ti penkeran wakerimiayi. Tura ti útkuisha ni aparí nin nakitramiayi tura ni chichasman yapajíatniun tujinkiamiayi.

<sup>18</sup>Atumjainkia Yusna enentáimtusminia nuka yaunchu Israer-shuarjaj ashammaín amia núnischaiti. Yáunchuka Yus ni akupkamurín Israer-shuaran súakuí Senai muranam jeeármiai. Muranam uunt jisha kiritniusha teesha nasesha ajamiayi. <sup>19</sup>Tura kachu kakaram umpúamusha ámiayi. Tura Yus kakaram nin chichaream antukar ashamkar atakka chichaschati tu searmiai. <sup>20</sup>Kame Yus chichaak “Shuarsha tanakusha ishichkisha nú muranam najarmatai nuka kayajaj tukurar tura nanakijajsha máatniuiti” tímiayi. Nu akupkamu ti ashammai asamtai “chichaschati” tiarmiayi. <sup>21</sup>Wáinkiarminia nu ti tsumai asamtai imia Muisaishsa “Ashamakun kuraajaj” tímiayi.

<sup>22</sup>Antsu atumjainkia Yusna enentáimtustin nujaj nankaamas penkeraiti. Átumka nayaimpinmaya Seun náinnium, Jerusarén iwiaaku Yus pujutai péprun nakumeana nuí jeeáitrum. Nuísha ti untsurí nayaimpinmaya suntarsha <sup>23</sup>ashí Yus-shuarsha shiir iruntrarú ániawai. Yus-shuarka ashí nayaimpiniam ni naarí anujtukma ásar ni uchirí ániawai. Nuísha Yus, ashí shuaran ti nékana nu, pujawai. Niisha shuáran ti penker awajsamtai nu shuar jákar ni wakaní nuí shiir pujuiniawai. <sup>24</sup>Nuísha Yamaram Chichaman in takartamajnia nu, Jesus, pujawai. Nuna numpe ukatramujaj ashí shiir awajsaiti. Nu numpasha Apira numpejaj nankaamas penkeraiti. Kame Apir ántar máamu asamtai yapajmiatrukta titinia áintsan enentáimtaji. Antsu Jesus tunáa shuáran penker awajstartaj tusa jakamiayi.

<sup>25</sup>Nuka ti penker asamtai Yus chichartamprumna nu nekas anturkatniuitrume. Yaunchu Yus jú nunkanam murá chichaamun anturkachar asutniátniunam uwempracharmiayi. Nuikia Yus nayaimpinmaya chichartamkurin ántachkurkia ishichkisha uwemprashtatji. <sup>26</sup>Yaunchu Yus chichamejají nunkan úrmamtiakiarmiayi. Tura yamaisha tawai “Ataksha aya núnkankechu antsu nayaimpinmasha úrmamtiakiattajai.” <sup>27</sup>“Ataksha” tana nujají “ashí muchitrámnia nu amuukartatui” tawai. Tura muchitrachminia nu juakartatui. <sup>28</sup>Yus in akupkatniun tsankatramaj nuka umuchnakchattawai. Tuma asamtai Yus yuminsatniuitji. Yus wakerana núnisrik wishiksuk shiir enentáimtusar Yus shiir awajsatniuitji. <sup>29</sup>Maa, ii Yúsriñkia kajerkanka uunt já nuke áesaa mash emesramniaiti.

### Yus shiir enentáimtiksatin

**13** <sup>1</sup>Nuamtak yachja núnisrum tuke mai anenai ajatarum. <sup>2</sup>Tuke írar shiir itiaatarum. Nuna túruiniak shuar nékachminiak nayaimpinmaya suntaran itiaawaruiti.

<sup>3</sup>Sepunam pujuinia nusha atumsha niijají pujáa núnisrumek waitnentrarta. Wáitkiasarma nusha wisha núnisnak wáitsamniapitjia tusarum waitnentratarum.

<sup>4</sup>Nuatnaikiatin penkeraiti. Shuar ni nuwejají tsanin pujustin penkeraiti. Tura nuatkamu ainia nusha chikichan eakchatniuiti. Tsanirmana núnaka Yus asutiáttawai.

<sup>5</sup>Aya kuútiak enentáimtusam pujusaip. Yuska “Kanakchattajai tura penké ikiukchattajme” túramui. Tuma asamtai ame takakmena nujají shiir enentáimsam “maakete” titiá. <sup>6</sup>Tiniu asamtai arantutsuk ju tminiaitji: “Winia yainnia nuka Uunt Yúsaiti. Nu asamtai shuar túrutamnia nuna ashamkashtatjai.”

<sup>7</sup>Atumin Yus-Chichaman jintinramawarmia nu enentáimtustarum. Yúsán shiir enentáimtuiniak penker wekasarmia núnisrumek atumsha túratarum.

<sup>8</sup>Jesukrístuka tuke yapajítsuk nuikiya núnisan yamaisha tura ukunmasha tuke núnisan átatui. <sup>9</sup>Chíkich chicham niisháa írunna nu anturkairap. Yus in anenma asakrin kakaram ajasartai. Shuar niisháa yurumkajají enentáiruí kakaram ajastaj táyat penké yáinçhaiti. Yurumeaj nújainchu antsu Yusa anenkrattairijjají ii enentáin kakaram ajasminiaitji.

<sup>10</sup>Yáunchu Yúsnan pujurin naman maar Yus susamunmayan yuu ármiai. Tura iikia Yus-sutaj nusháa ana nu súaji. Nusha Kristu jakamu asamtai yaunchua nu Yúsnan pujurin nuí pachiinkiachmin áiniawai. <sup>11</sup>Israer-shuarnumiá Yúsnan pujurniu untri tunaan asakártaj tusa namanké numpen júkiar Imiá Shiir Tesaamunam wain ármiai. Tura nu naman arant áesatniuyayi. <sup>12</sup>Núnisan Jesussha péprunam arant

wáitkianas mantamnamiayi. Nujají ashí shuara tunaarin ni numpejají nijiatkaiti. <sup>13</sup>Núnisrik iisha péprunmayá arant wétinia núnisrik Jesusai weri Nijijají métek wishikmain katsuntutai. <sup>14</sup>Kame ju nunkanam amuukachmin pepru atsawai. Antsu ukunam ti shiir pepru átatna nu nákJají. <sup>15</sup>Tuma asar namañ maar Yus sútsuk antsu shiir chicham súakur tuke Yus shiir yúminĳkijají. Tuke núnisar túratái. <sup>16</sup>Pénker túrakrum takakrum nu ajamnaisatin kajinmatnaikiirap. Nusha ti shiir Yus sútainti.

<sup>17</sup>Yus-shuaran akupin ainia nu umirkarum shiir enentáimtikratarum. Ni takatrĳn Yúsán ujaktin ásar atumí wakanĳn shiir wainiainiawai. Niisha itiruchatcha antsu wakerumainian túrawarat tusarum shiir yáinĳtarum. Nu túrachkumka ĳitiurak yainmakarat?

<sup>18</sup>Incha Yus áujšatarum. Iisha ashí péñker túratin wakerají. Túrají enentáimĳi. <sup>19</sup>Tura Yus áujĳuram Yus ataksha atumĳají wainniaikiatniun wari tsañkatrukak tusarum seatritiarum.

### Amúak shiir chichaawai

<sup>20-21</sup>Imiatkinchanum apujkartinia nú Yus, Jesukrĳstun jakamunmayá iniantkímia nuka, ni numpé kakarmariĳijají ashí péñker ana nuna suramsarti. Nujají ni wakeramu túrattarme. Tura Jesukrĳstu kakarmariĳijají ashí ni wakeramun in pujurtamas takasti. Ii Uuntriĳ Jesukrĳstu ashí Yus-shuaran ti penĳker Wáinniuiti. Tura ni numpejají Yamaram Chichaman kakaram awajšamiayi. Nu Chichamsha tuke menĳkakashtatui. Aya Kristu tuke shiir awajnasti. Núnisañ atí.

<sup>22</sup>Yatsurú, kakaram chicharkajrumna ju shiir enentáimĳají anturkatarum. Kame ti wárik áatrajrume. <sup>23</sup>Yamaikia ii yachi Timiutéu sepunmayá jiinki anĳkant ajasai. Nuna ujaajrume. Wárik támatainĳkia atumin íitĳaj tusan winiakun nijijají winittĳají.

<sup>24</sup>Atumí úuntrišha tura ashí Yus-shuarsha amikmaatarum. Itiaria nunĳkanmayá shuarsha amikmatmainiawai.

<sup>25</sup>Ashí Yus ti shiir yainmakarti. Nuke atí.

# SÁNTIAK

## papin áarar akuptukma

---

### Sántiak aarmiania nu

**1** <sup>1</sup>Wi Sántiak Uunt Yúsan tura núnisan̄ ii Uuntr̄i Jesukrístun umirin asan ju papin aajai. Ashí Yus-shuarterimin ashí nun̄kanam tsakin̄makarum matsatrumna nuna amikmaajrume.

### Nekatain̄kia Yúsnumīiti

<sup>2</sup>Yatsuru, ashí itiurchat wáinkiuermesha tuke warastarum. <sup>3</sup>Iis, itiurchatnum pujakrum nekas Yus enentáim̄taik̄iuermeka katsuntratin unuimiartatrum. <sup>4</sup>Tura tuke páchiachkuram, tuke katsunteakrum, nuikia Yúsjāi ti pen̄ker katsuartatrum. Pen̄ké atumashtatrum.

<sup>5</sup>Átum nán̄kamsarmek nekaatin tujintiakrumka Yusa nekatairī seata. Shuar seakūi Yuska kajetsuk tura ementutsuk antsu patatas súawai. Tuma asamtai seakminkia suramsattawai. <sup>6</sup>Túrasha Yus nekas enentáim̄tusam, “túratpiash” tútsuk seata. “Cha, nékatsjai surustimpiash” tu seakmeka ántram seame. Nayaantsa tsukaturī jun̄i taa, atúu waketki ajatsuk. Amesha áintsamek túmame. <sup>7</sup>Enentáim̄jin̄ núnisketkuin̄kia, seamna nuna Yus pen̄ké suramsashtatui. <sup>8</sup>Shuar jimiará enentáim̄na nuka shiir wekasatniun tujintiawai.

<sup>9</sup>Yus-shuar, ju nun̄kanam kuítrinha ainia nu, Yus shiir awajsamu nujāi warasti. <sup>10-11</sup>Tura Yus-shuar kuítrinniuitkuisha péejchach enentáim̄tikramsha warasti. Iis, nupā kuán̄kam tura nantu ti sukuam kaar miniatsuk. Kuítrinniuka ántska ántram seame. Nayaantsa tsukaturī jun̄i taa, atúu waketki ajatsuk. Amesha áintsamek tán̄kete. Tuke súrutnak pujurkusha itiurchat wáiniuk wárik amuukattawai.

### Ii itiurchatr̄i ana nu

<sup>12</sup>Shíiraiti shuar ni itiurchatr̄in̄ nekas katsunteana nuka. Nekapsam j̄iinkiūnka akinkiatniun wáinkiattawai. Iwiaaku átinian, tawasap

achiktinia núnisan, wáinkiattawai Yus ni aneam tsankatka nuna. <sup>13</sup>Shuar tunáa túramnia nekapeakka “Yus nuna útsutrutui” tu enentáimprashiniaiti. Yuska yajauch túramnia enentáimtsui túrasha Niisha penké chikichinkesha tunaanum útsuchuiti. <sup>14</sup>Antsu ni wakeramurijjain aents tunaan ninki ikiatmamkaiti yajauch túratnium. Nújainki tunaanum útsukmaiti. <sup>15</sup>Nu yajauch wakeramunmaya tunáa akiiniui. Tura nu tunáa mash amuukamtai jákatin akiiniui.

<sup>16</sup>Yatsuru, aneakun tájarne, ananmamawairap. <sup>17</sup>Ashí penker ana nu, ashí shiir ana nusha nayaimpinmaya Yusak amasuuti. Yus ashí tsáapniinia nuna najanaiti. Tura Niin kiritin atsain yapajítsuk tuke tsáapniiti. <sup>18</sup>Nii wakera asa ni nekas chichamea nujaj ni uchirj najatmamji. Tura ashí ukunam átatna nujaj ii émkaitji.

### Yus nekas shiir awajsatin

<sup>19</sup>Tuma asamtai aneamu yatsuru, wárik chichastin enentáimprairap antsu antuktin emka enentáimprata. Núnisan wárik kajekaip. <sup>20</sup>Kajena nuka Yus penker wakeramun túratsui. <sup>21</sup>Nu asamtai, ashí penkercha nu tura ashí yajauch írussa nusha iniaisata. Tura tuke enentájjaj Yus-Chicham ame enentáimin araamu anturkata. Tura nu Chicham kakarmaiti uwemtikrampratnium.

<sup>22</sup>Yus-Chicham umikta. Aya ántukaip. Aya ántakmekamek ananmamattame. <sup>23-24</sup>Shuar íspikia ímiak ni yapin wapikian wáiniak tura nuyá jáupmitsuk we, ni urukuit nuna wárik kajinmatkishtimpiash. Shuar Yus-Chicham umitsuk aya ántana nuka nujaj méteketete. <sup>25</sup>Yus tana nujaj ankant ajasminiaiti. Shuar íspikia iimia áintsan nekas Yus penker táman tuke iniaitsuk enentáimtus, nu shuar kajinmattsuk aya antukchattawai antsu tuke umiktatui. Tura ti shiir waras pujustatui.

<sup>26</sup>“Nekas Yúsan shiir umirjai” tana nu tura eseer chichaachkuka imia ninki ananmamui tura “Yúsan shiir umirjai” tana nuna ántar tawai. <sup>27</sup>Nekas Yus Apa awajitsuk shiir umirkatin júiti: mitiaikiasha wajesha itirchatnum pujuiniakuisha yáintiniaiti tura ju nunkanam ashí tunáa ana nújajisha máatrashtiniaiti.

### Shuar antra akantrashtin

**2** <sup>1</sup>Yatsuru, ii Uuntrj Jesukrístu ti shiir nankaamantua nu enentaimtatirmeka shuar akantratin enentáimsairap. Shuara enentá*j* enentáimtsuk antsu aya pátatke wáinmena nujaj aents akantram niisháa enentáimturairap. <sup>2</sup>Iis, iruntrumna nu*j* shuar kuítrintin kurí aniyu aweera tura penker iwiarmampra wayashtimpiash. Tura núnisan chíkich kuítrincha aruta entsaru wayashtimpiash. <sup>3</sup>Tura kuítrinnia nu “Penkera ju*j* pujusta” tíchatameash. Tura kuítrincha “Atu wajauta, túrachkumsha ju*j* nunkansha pujusta” tíchatameash. <sup>4</sup>Nu tákumka yajauch enentáimpram jimiará enentájjaj aents enentáimtame.



<sup>5</sup>Aneamu yatsuru, antuktarum. Ju nun<sub>kanam</sub> kuítríncha ainia nuna Yus achikiuiti Ní shuar ajasar Nin nekas enentaimtin ajasartinian. Tura ashí nayaimpiniam írúnna nunasha Yus nin tsan<sub>katkattawai</sub>. Ashí shuar Yúsan aneena nuna anajmatra asa nin tsan<sub>katkattawai</sub>. <sup>6</sup>Átum antsu kuítríncha natsant awajearme. Iista, kuítrinníua nuka timiá itirchat awajtamainiatsuk. ¿Nuikia níchuk ainia achirmak kapitíánnium japiki júramprumna nu? <sup>7</sup>¿Nín<sub>kichuk</sub> ainia Kristu naari shiira nuna ántar pachikiar pen<sub>ké</sub> yajauch áujmatainia nu? Tura átumka nuna naari tuke shiir awajkurmin, ashí shuar “Kristu shuari” túramainiawai.

<sup>8</sup>Yus-Chichamnum ju akupeamu nekas pen<sub>keraiti</sub>:

“Ame ayashim aneamna núnismek ame írutramuram aneeta.”

Nu nekas umirniuitkiurmeka maak. <sup>9</sup>Nú enentaij<sub>ia</sub> kuítrinníuj<sub>ia</sub> chichasminiati. Tura nuyá kuítrínchaj<sub>ia</sub> shiir chichaachkumka, niisháa enentáimta asam, nu akupkamu umirkachuitme. Tunáa túrame. Núnismek Yusa akupeamurij<sub>ia</sub> amek sumamame. <sup>10</sup>Chíkich akupkamu írúnna nu ashí umikiam tura aya chikichik akupkamu umikchamka nuikia ashí akupkamu umircha ajasume. <sup>11</sup>Iis, Ni<sub>nki</sub> Yúsak chichaak tíchamka “tsanirmawaip.” Tura chikichnasha “man<sub>kartuawaip</sub>” tímiayi. Nu asantai, shuar tsanirmatsuk túrasha man<sub>kartakka</sub> ni wakeramun umirtsui. <sup>12</sup>Kristu an<sub>kant</sub> awajtamsantai ii yamá ni akupeamuri yúpichuch umirkamniatji. Nu asantai nu akupkamuj<sub>ia</sub> métek wekakurni<sub>nia</sub> Yus “pen<sub>ker</sub> túraitme” turamatji. Tura umikchakri<sub>nia</sub> “pen<sub>ker</sub> umikchaitme” turamatji. Tura nu enentáimsar pen<sub>ker</sub> chichasar takasar wekasatniuitji. <sup>13</sup>Chikichan waitnentachku<sub>nka</sub> waitnennatsuk asutniáttawai. Tura waitnen<sub>kratniuitkiurni</sub>nia tsawant jeamtai Yus in waitnentramprattaji.

### Yus enentáimtustin tura umirkatniusha

<sup>14</sup>Yatsuru, shuar “Yusan shiir enentáimtajai” táyat tura pen<sub>ker</sub> túrachku<sub>nia</sub> pen<sub>ker</sub>ashit. Nuj<sub>ia</sub> uwemprattawak. <sup>15</sup>Wátskea, Yus-shuar, áishman<sub>sha</sub> nuw<sub>asha</sub>, entsátáir<sub>in</sub> tura yurumken atumashtimpiash. <sup>16</sup>Tura ame nékayatmek ayash<sub>i</sub> atumana nu sútsuk tíchatapash “Pen<sub>ker</sub> wetá, entsatai entsaram túram pen<sub>ker</sub> yurumáta.” ¿Nu sútsuk tákum pen<sub>ker</sub>kait? <sup>17</sup>Núnisan<sub>u</sub> takatsuk Yus enentáimtustin ántraiti.

<sup>18</sup>Tura shuar tíchanpiash, “Chíkich takaawai tura chikichcha Yúsan shiir enentáimtawai. Mai pen<sub>ker</sub>chakait” tichanpiash. Wats, ame Yus enentáimtamun takatsuk paant inaktusminiashitiam. Tura wi antsu pen<sub>ker</sub> takatruj<sub>ia</sub> Yus enentáimtamun paant inaktustatjai. <sup>19</sup>Nekas Yus chikichkiiti tu enentáimtame. Nuka pen<sub>ker</sub> túrame. Túrasha iwianchcha nunasha nékainiawai. Tura umircha ásar ashamainiawai. <sup>20</sup>Netse enentáimpraip. Ashí Yus wakera nu takaachkumka, Yus enentáimtustin ántraiti. ¿Nu nekaatin wakeramek? Iista. <sup>21</sup>Apráaman Yus chicharuk

“Winia ti shiir awajtusat tusam ame uchiram Isak maam surusta” tutai suritkiachmiayi. Máachiat suritkiachmiayi. Tura suritkiacham Yus “Pénkeraitme” tímiayi Apráaman. <sup>22</sup>Páantchakait. Aprám Yusa shiir enentáimtak umirkamiayi. Umirtsuk Yúsan enentáimtakka nuikia ántar enentáimtiaayi. Tura umirak Yus enentáimtamun umikmiayi. <sup>23</sup>Nujai Yus-Chicham aarma nu uminkiamiayi. Juiti:

Aprám Yúsan shiir enentáimtusmiayi tura Yus chicharuk tímiayi  
“Máakete. Nújainkia tuke péñker túraitme Wijai” tímiayi.

Aprámsha nekas “Yusa Amikri” tu náamkamiayi.

<sup>24</sup>Páantchakait. Shuar aya Yúsan shiir enentáimtamujainchuk tura péñker takasmajaisha Yus nin shiir enentáimtaiwai. <sup>25</sup>Núnisan Raap tsanirmataiyayi. Túmaitiat Israeran suntarin mamikmauta tusar akupkamun ni jeen itiaawar tura úkar chíkich jintianam akupak uwentikrarmiayi. Nuna túramtai Yus “pénkeraitme” tímiayi nincha. <sup>26</sup>Ayash wakantichuka jákachukait. Núnisan Yus enentáimtustin tura ni wakeramu takaachkurkia, jaka ántsan ántraitji.

### Li iniai

**3** <sup>1</sup>Atum untsurí jintiníkiartin ajastin wakerukairap. Yus in, jintiníkiartin ájnia núnaka, nankaamas neka asar, awajiakrin nankaamas Yus asutiámattaji. <sup>2</sup>Iis, ashí mash ti awajiatsjik. Tura shuar chichaak, aya péñkernak chichaakka, nu shuar tuke eseer enentáimniuiti. Tura ayashúsha tuke péñker ana nuna túriniaiti. <sup>3</sup>Kawaisha enentáimpratai. Jiru wenuchiniam ikiursam ni ayashi ashí ayantaatsuk. <sup>4</sup>Kanusha ti úntaitiat tura kakaram wéayat ishitiapach wiantaijiai shuar wakera nuí ayantarminiaiti. <sup>5</sup>Núniskete li iniai. Timiá ishitiapchitiat awakmaktinia tímianu chichaatsuk. Ji ishichik kapaajai ashí numi tsaruaku ekeemakchamniakait. <sup>6</sup>Li iniaisha jijiai métekete. Ashí tunáa piákuiti. Tura ii ayashín tunáa túratniun útsutmaji. Túnkuruanmaya jijiai ikiapármaiti tura ashí ii wekajnia nuí émeseawai. <sup>7</sup>Shuar ashí yajasmañ nawamkamin ániawai. Ashí kajeñ írunna nunasha, nanamtincha, napincha, tura entsayancha ashí nawamkaruiti. <sup>8</sup>Tura iniaikia penké nawamkachminiaiti. Ti yajauch asa penké nupetkachminiaiti. Iniaikia ti taráa tseasaiti. <sup>9</sup>Nu iniaijiai Yus Apa shiir awajeaji tura nu iniaijiaín aentsti yajauch chichárnaiyaji. Áentsun Yus Nijiai métek-taku najanamaitiatar yajauch chichárnaiyaji. <sup>10</sup>Nu iniaijiaín péñkersha tura yajauchisha chichaaji. Yatsuru, nuka penké atsutniuiti. <sup>11</sup>¿Púkuniñmaya entsa sáawijiai kusuku jíinkimniakait? <sup>12</sup>Yatsuru, ¿Kushiníkiap shuinian nereawak. Munchisha kushiníkiapen nerektatuak? Núnisan púkuniñmaya entsa sáawijiai kusuku jíinkichminiaiti. Li iniaijiai núnisan aya péñkera nu chichastiniaitji.

### Yusa nekatairi

<sup>13</sup>Shuar ti neka enentái takakna nu, péñker túrattawai. Nekas nékaitkiunka péechachia núnis tuke péñker ana nuna túrattawai.

14Antsu atumí enentáijjaj penké yajauch enentáimtumairum tura atumek péñker pujustin enentáimtumarum, nékaitiatam péñker túrachiatam “pénkeraitjai” tiip. Nuka wáitrame. Nekaska núchaiti. 15Nú enentaikia Yúsaiyanchuuti. Antsu ju nuñkanmayaiti, shuara enentáiyaiti, núnisan iwianchnumiaiti nú enentaikia. 16Shuarsha yajauch enentáimtumairar tura niniki enentáimtumainiakui, nujaj ashí meseawai tura ashí yajauch ti awai. 17Antsu Yusaiya enentái takakua nu júnisaiti: ashí nankaamas emka eseeratin, nuyá nawamkartin, shiir ajá, péñker anturnain, waitnenkratin, ashí péñker takáa tura anantsuk naka chichamtin. 18Eseera enentáimsatniusha shiir takawai ashí shuar péñker ana nuna túrawarti tusa.

### Ju nuñkanam írunna nu aneashtin

**4** 1¿Urukamtaitsuk tuke kajernaikiarum ti máanaisrum pujarum. Mesetnumsha urukamtai wéarum? Júnisaiti: Atumin yajauch enentái katsuntrachmin útsutmakrumin tuke máaniarme. 2Wakerarmena nu takustin wakerarme tura nu wakeramu takustin jeachkuram nérentin maarme juruktiaj tusam. Chíkich takakna nujaj itit enentáimtuniarme tura atáitin tujinkiam máanaitrume. Wakerarmena nusha Yus seachu asarum wáintsurme. 3Tura seakrumsha yajauch searme. Atumí péñkerijjaj warastin enentáimiu asarum searmena nusha wáintsurme. 4Jú nuñkanmayá wakerakum Yusa nemasrijjaj tsanirma áintsanketrume. Nékatrumek atumsha. Ju nuñkanmayañ wakerakrikia Yusa nemasriñ ajawai. 5Yus-Chicham juna tawai: Yus ni Wakaní ii enentáin apujturmasuitji. Nu Wakan in anenma asa ti akasmatramaji, táwai. Tura nuna ¿ántrankeash ta? 6Tura anenma asa ti yáinmaji. Tuma asamtai Yus-Chicham tawai: Kajemtinian Yus ístatui tura péejchachin Yus nin aneak ti shiir yáintatui, tawai. 7Yusaj ikiumastarum, tura íwianch taritratarum. Túrakrumin íwianch ikiurmaktiatui. 8Yúsainí weamkata tura Nii atumin wearmaktatrume. Tunáa shuartiram Kristu numpejaj nijiamartarum. Tura átum, Yussha tura ju nuñkanmayasha mai métek wakerarmena nu, atumí enentái naka eseeratarum. 9Atumí tunaari enentáimsarum kúntuts enentáimpratarum. Nu kúntutsjaj ti úuttiarum. Nuik shiir enentáimprarum wishikmiarumna nuka iniaisarum kúntuts enentáimprarum úuttiarum. 10Yusjaj péejchach ajasta, túrakmin shiir awajtamsattawai.

### “Yajauchiitme” tunaichatin

11Yatsuru, yajauch áujmatnaisairap. Yus-shuar ni yachin yajauch áujmatas tura yachí tunaari tuke áujmatuk Yus “aneniatarum” tana nuna

umichuiti. Antsu umichu asa “nu akupkamu ántrai, umirkashtiniaiti” tawai nu shuar. Nujaj̄ nu shuar umirtsuk Yus akupkamu nan̄kaamas enentáimtumawai. <sup>12</sup>Yus Niñki akupkamu najana asa Niñki nu akupkamu umirkamun nekas nekaamniaiti tunaashit tusa. Niñkiti uwemtikratniun tura emesratniunam akupkatin jea nu. Amesha yáitiam chikicha tunaarj̄ íistincha.

### Kashin átatna nuna Yusak nékawai

<sup>13</sup>Watsek, átum áujmateakrum “Arumsha kashincha nu péprunam weri nuj̄ chikichik uwí takasar kuit achiktatj̄i” tíchattarpash. <sup>14</sup>Ishichkisha pen̄ké nékatsrume kashin átatna nu. J̄u nuñkanam ii iwiakmarj̄ wárik amúatsuk. Yurañkim utsanar tura nantu sukuam mash wárik men̄kaatsuk. Núnisketj̄i. <sup>15</sup>Antsu j̄únis tíminiaitrume: “Yus wakerakuñkia iwiaku pujakrikia nusha túrattaj̄i” titiarum. <sup>16</sup>Túrachkurmeka átumka Yusj̄aj̄ nan̄kaamantu enentáimprume. Tura ashí nu enentáikia yajauchiiti. <sup>17</sup>Shuar pen̄ker túratniun nékayat, túrachkuñkia, nuka tunaiti.

### Kuítrintin enentáimpratniua nu

**5** <sup>1</sup>Kuítrinniutiram j̄u antuktaram. Ti úttiarum. Ti wáitsatin asarum ti kakantra úttiarum. <sup>2</sup>Kuítrum mash mamukarai tura iwiarmampramurmesha mash tiñkishap yúkayi. <sup>3</sup>Kurirmesha tura kuítrumsha ashí ijiakmamkarai. Ijiakmampramurisha ame pen̄kercha túram nuna paant iniakmawai. Tura jinium áesamua áintsan̄ ame kuítrum yajauch awajtamsattawai ayashmiñ. Amuukatin tsawant jeamunam anearchamame antsu ame kuítrum ikiaun̄kamame. <sup>4</sup>Ame takat iniararam ementushim akirarmamna nu “akirkati” turamainiawai. Anearta. Yakiyá Yus, nayaimpinmayá suntara uuntri, nu takartamni chichamen̄ antukai. <sup>5</sup>Ashí j̄u nuñkanam írunna nu wararsaruitrume. Tuma asarum kapun̄ka nuke machararme tura yamaikia máatin tsawant jeayi. <sup>6</sup>“Nu shuar tunaiti” tíirum tunaachu tsanumprurum máamarme, tura niñkia surimiakcharmai.

### Yawetsuk takastin tura Yus áujsatin

<sup>7</sup>Nu asamtai, yatsuru, nu páchitsuk ii Uuntrī Kristu tatin nákastarum. Arakmausha ni arakrj̄ pen̄ker tsapaiti tusa yumi yutuktinian shiir enentaij̄aj̄i nákatsuk. Yútasua umirmatai esatrurmatai júuktatj̄ai tusa nákatsuk. Tura júurmaksha ti waraatsuk. <sup>8</sup>Núnisan̄ atumsha katsuntsatarum tura yawekiiirap. Kristu tatin yuntumtemayi. <sup>9</sup>Yatsuru, nuámtak “j̄u yajauch túrutui” tunainirap. Tákurminkia Yus íirmastatrume. Niñkichukait nuna íistin tura anearta nu Yúsak tíj̄iuch wajatramui. <sup>10</sup>Yatsuru, yaunchu Yúsnan etserin enentáimpratarum. Tuke

ii Uuntri Yus timia nuna shiir etserkarmiayi. Túmaitiat wáitsarmiayi túrasha pachisharmiayi. Núnisrumek enentáimsatarum. <sup>11</sup>Itiurchatan katsuntainia nuka nekas shíiraiti, tu enentáimji. Shuar itiurchatan ti katsuntin ámiayi, ni naari Jup. Tura ni itiurchatrí nankaamasmatai Yus ti núkap kuítrín susamiayi. Nu nékatsrumek. Ii Uuntri Yus ti waitnenkratchakait.

<sup>12</sup>Ju ashí nankaamas enentáimtustiniaiti, yatsuru. Ame “ee” tákumka nekas titiá. Tura “atsá” tákumka nusha nekas titiá. Nekas chicham chichaachkumnínkia Yus írmastatui. Nu asamtai nayaimsha nunkaasha ashí írunna nusha páchitsuk, aya támena nu tuke nekas atí.

<sup>13</sup>Wáitakmeka Yus áujсата. Waraakmeka, warasam kantamám Yus shiir awajsata. <sup>14</sup>Yus-shuartiram, shuar jáakka, Yus-shuara úuntrin untsukti. Tura niisha taarti. Tura Jesusa naari pachikiar asuitijai jaa shuaran ishichik kuerarti. Túrawar Yúsán áujtusarti nu shuaran. <sup>15</sup>Tura “Yus nuna nekas anturtamkattaji” tu enentáimsar áujsarti. Túrawarmatai jaa shuar péñker ajastatui. Yus nin tsuártatui. Tura tunaan tura asa jáakuínkia Yus nu tunaan tsankurattawai. <sup>16</sup>Nu asamtai, atumí tunaarí paant etsertunaiktarum. Túrarum Yus áujtunaistarum atumí tunaarí tsankurnarat tusarum. Péñker shuar Yúsán tuke enentáijiai áujeamurínkia ti kakarmaiti. <sup>17</sup>Yaunchu Yus-Chichaman etserin ámiayi, ni naari Erías. Niisha iijiai méteketiat yumi yutukai tusa Yusa áujsamtai menaintiu uwí nuyá nankaamas yutukchamiayi. <sup>18</sup>Ataksha yutukti tu áujsamtai ataksha yutukmiayi tura araksha ataksha tsapainiarmiayi.

<sup>19</sup>Yatsuru, shuar eseera wekatinmaya kanaakuínkia chíkich nin waketkitniun yaiñti. <sup>20</sup>Shuar tunáa shuaran yajauch wekaan awakeakka jákatniunmaya uwemtikrattawai tura ti untsurí tunaarí tsankurnartatui.

# PÍTIUR

## EMKA papin aar akupkamu

---

### Pítiur Yus-shuaran áatramiania nu

**1** <sup>1</sup>Wisha ju papin aajna nu Pítruitjai. Wisha Jesukrístu akatramurintjai. Israer-shuar Yus-shuar árum nuna atumin ankant ankant tsakinmakarum ch́kích ch́kích nunkanam matsatrumna nuna áatjarme. Puntu nunkanmasha, Karasea nunkanmasha, Kapatúsea nunkanmasha, Asia nunkanmasha, Pitinia nunkanmasha pujarmena nuna áatjarme. <sup>2</sup>Yaunchu Apa Yus, “uwemtikrataj” tímia núnisan achikmaitrume. Tura, Winia ajasat tusa ni Wakanijjai akantamkamiarme. Umirtukat tusa nuna túramiayi. Tura Jesukrístu numpejajsha atumí enentájn atsajkir chamir awajturmasmiarme. Wats, Yus tuke waitnentramar ti shiir awajtamsarat tusan wakerajrume.

### Shiir enentáimsar pujustin

<sup>3</sup>Wats, Yus, ii Uuntri Jesukrístu Apari ana nuna naari shiir awajsatai. Yussa ti waitnentrama asa, atak akiiniatniun suramsaitji. Jesukrístu jakamunmayá nantakin asamtai, iikia atak akiiniar tuke iwiaaku pujustiniaitiajnia nu arutramji. <sup>4</sup>Tura nayaimpiniam ikiurtamsamu ana nuna achikmintrum tusa Yus wakerawai. Nu ikiurtamsamu meserchamnia amuukachminiaiti. Tura nusha yajauchichuiti. <sup>5</sup>Yus nekas enentáimta asakrumin ni kakarmarijjai wearmarme. Tura tuke uwemtikrampratniun, nunka amuuamunam paant iniakmastatna nu achikmintrum tusa tuke tsawant ni kakarmarijjai wáitmarme.

<sup>6</sup>Nu enentáimsarum wararme. Kame ju nunkanam pujakrum itiurchat wáinkiashtarmeash. Tura ju nunkanam pujustin ishichkichukait. Ukunam pénger pujustaj tu enentáimsarum wararme. <sup>7</sup>Enentáimsatarum. Shuar kurin wakerana núnisan atumniasha umirtukat tusa Yus wakerutmarme. Aents kurin jinium áesainiawai, aya kurik juakat tusar. Kurin ti wakeruinia ásar, amuukamnia aijn túruiniawai. Atumsha,

itiurchat wáin<sub>ki</sub>armena nuj<sub>ai</sub>, Yusan nekas enentáimtusartimpiash tusa nekapsamuitrume. Nu enentáimtamú kurij<sub>ia</sub>i nan<sub>ka</sub>amas pé<sub>n</sub>keraiti. Ukunam, Jesukrístu támatai, Yuska atumin “pé<sub>n</sub>ker túraitrume” turamtajtsa wakerittiawai. Tura “Ashí shuar nuna nekaawar winia naarun uunt awajsarát” tusa túrutmattarme. Nu tuma asamtai ju nun<sub>ka</sub>nam nekapsamuitrume, itiurchat wáin<sub>tr</sub>umna nuj<sub>ai</sub>.

<sup>8</sup>Jesukrístu wáin<sub>ch</sub>aitiatrum anearme. Tura yamáí wáin<sub>ch</sub>iatrumek nekas enentáim<sub>t</sub>arme. Tuma asarum ti wararme. Nu warastin nayaimpiniam warastatjinia núniskete; nuka paant titin jeatsji.

<sup>9</sup>Iimiatarum. Uwemtikrurat tusarum Yus umirkachurmek. Nu uwempratin wainiu asarum waraarme.

### Krístuj<sub>ai</sub> ii uwempratniun yaunchu etserkarmiyai

<sup>10-11</sup>Yus áentsun waitnenta asa, uwemtikrat<sub>aj</sub> tusa tuke wakerimiayi. Núnaka Yús<sub>nan</sub> etserin etseriarmiayi. Kristu Wak<sub>an</sub>i ni enentáin pujuriarmia nu, túrunts<sub>aj</sub>in Kristu wáitsatniur<sub>in</sub> jint<sub>f</sub>armiayi. Tura ukunam ni ti shiir pujustin<sub>tr</sub>incha etseriarmiayi. Tú<sub>r</sub>asha “tuu áishma<sub>n</sub>kait Kristu tutai, tura urutiák túrunat” tusar nu etserin é<sub>m</sub>amkesar anintrusarmiayi. <sup>12</sup>Tura nii pujuinia<sub>in</sub>kia túrunashtinian, antsu ti ukunam, ii pujajnia ju<sub>i</sub> túrunatniun Yus nekaamtikiamiayi. Núnaka Yusa shiir chichame<sub>n</sub> u<sub>jat</sub>makarmia nú shuar nekaprutmarme. Nú shuar Yusa Wak<sub>an</sub>i, nayaimpinmaya akupkamu ana nuna nekatairij<sub>ia</sub>i u<sub>jat</sub>makurme. Maa, nu uwempratniun tájana nuna, nayaimpinmaya suntar nekaatai tusar wakeruiniawai, tú<sub>r</sub>asha tujintiainiawai.

### Pé<sub>n</sub>ker wekasatin

<sup>13</sup>Tuma asamtai, pé<sub>n</sub>ker enentáimsarum tura pé<sub>n</sub>ker íimiasrum wekasatarum. Tura Jesukrístu ukunam wantiniak waitnentramp<sub>r</sub>attana nu yawetsuk nákastarum. <sup>14</sup>Umin uchi áintsarmek yaunchu nékachu asarum wakerimiarmena nu iniaisarum Yus umirin atarum. <sup>15</sup>Ashí túramurmij<sub>ia</sub>i timiá pé<sub>n</sub>ker wekasatarum. Yus, untsurmakuana nu, pé<sub>n</sub>ker asamtai, átumka ni shuari asarum pé<sub>n</sub>ker wekasatarum. <sup>16</sup>“Wi pé<sub>n</sub>ker asamtai atumsha pé<sub>n</sub>ker wekasatarum” Yus tana nu ni Papiri<sub>in</sub> áarchamukait.

<sup>17</sup>“Yus winia Aparu<sub>iti</sub>” tárumna nu aneartarum. Ashí aentsu túrutair<sub>in</sub> métek Yus nekaattawai. Nu neka asarum, ju nun<sub>ka</sub>nam pujarmena ju<sub>i</sub> Yus ashamkatarum. <sup>18</sup>Warí, ánt<sub>r</sub>a wekasatniun atumí uun<sub>tr</sub>i jintin<sub>tr</sub>armena nuyá Yus uwemtikramprarme. Tú<sub>r</sub>asha kurisha kuitcha amuukamnia ainia nuj<sub>ai</sub> uwemtikrachmaitrume. <sup>19</sup>Antsu Kristu numpe ti shiira nuj<sub>ai</sub> uwemtikramuitrume. Nu nékarme. Yaunchu, shuar tunáa tú<sub>r</sub>akui, Yus tímiayi, “murik yajauchichu tunamarcha maarum, Yus sútainiam ikiustarum. Nuna numpen wáinkian, atumí tunaar<sub>in</sub> tsankurattajai” tíniuyayi. Núnisan

Kristu in jarutramka asa ii tunaarínia uwentikrampraitji. <sup>20</sup>Nunkan nájantsuk áentsun jaruktinian Krístun anaikiamiayi Yus. Tura wárik akupkachmiayi. Antsu yamá tsawantin, átum pujarmin, péñker pujusúk tusa wakerak, atumin jarutramkat tusa Krístun akupkamiayi. <sup>21</sup>Nijjiaí átumka Yus umiirume. Yuska Krístun jakamunmayan iniantki nankaamantu awajsamiayi. Yus nekas enentámtakrum, aya péñkernak túrawai titiarum tusa túraiti. <sup>22</sup>Yus nekas tana nuna, Yusa Wakani yainmakui, umirka asarum atumí wakaniin péñker ajasuitrume. Yus-shuarjají yajauch enentámtunaitsuk mai anenai ajatai tusarum tura asarum, nekas shiir enentámtunaisrum mai anenai ajatarum. <sup>23</sup>Nekaatarum. Yusa chichame umirka asarum atak akiiniaitrum nuka ju nunkanmayanchuiti. Antsu Yusa chichame iwiaaku tuke amuukachmin ana nú chichamjají tuke iwiaaku átiniaitrum.

<sup>24</sup>Ju ayash tuke pujuschamniaiti. Yusa Papiriin júnis áarmaiti:

Ashí aentsti nupáa áaniuitji. Ii péñkerisha kukuja áaniuiti. Nupa wárik kaawai. Kukujsa núnisan wárik iniaawai. <sup>25</sup>Tura Yusa chichamesha tuke amuukachminiaiti.

Nu Chichamjají uwempramnia asamtai atumin etsernakuiti.

**2** <sup>1</sup>Tuma asamtai, ashí yajauch ana nu iniaisatarum. Anankatin, ántar-chichamtin átin, chikichna wakeruktin, ashí tsanumpratniusha iniaisatarum. <sup>2-3</sup>Antsu, Uunt Jesukrístu waitnenkartutairi nekapsa asarum, uchi yama akiinia muntsun ti wakeruinia áintsarmek, Yusa chichame aya penkerkea nu ti wakeruktarum. Yusa chichamejají tuke tsawant tsakakrum tuke uwemprami tusarum túratarum.

### Iwiaaku kaya

<sup>4</sup>Ii Uuntri Kristu kayáa áantsankete. Tura shuar kayan yajauchin nakitiainia núnisan Jesukrístun nakitrarmiayi. Tura kayan ti penkeran wakeruinia núnisan, Yuska, “winia Uchir ti penkeraiti” tusa Jesukrístun achikmiayi. Atumsha Jesukrístu weantuktarum. Nii iwiaaku kayaiti.

<sup>5</sup>Atumsha iwiaaku kaya áantsanketrume. Tuma asarum Yus wijjiaí ni jeen jeamti tusarum tsankamaktarum. Tura nútiksarmek Jesukrístui atumí iwiaakmarí tsankamaktarum, Yus wakera nuna túrutati tusarum. Jesukrístujají tura asarum Yus shiir enentámtikrume. <sup>6</sup>Jesukrístunun Yusa Papiriin júnis áarmaiti:

“Iistarum. Kayan ti penkeran achikjai” Yus tímiayi. Jean emka apujtuamuri atí tusan Seunnum apujejai.

Nin enentámtana nu ántar enentámtatsui. Aarma ana nu penké kayan chichaatsui. Antsu Jesukrístun tawai. <sup>7</sup>Yus umirkaitrumna nu, “kaya ti penkeraiti” tarume. Tura Yúsan umirainiatsna nuka Yusa Papiriin tana nujají métek áiniawai. Ju áarmaiti:

Jean jeamin nakitrarmia nú kaya jean emka apujtuamuri atí tusa apujamuiti.



<sup>8</sup>Tura jusha aarma awai:

Tukumak iniaartin kayaiti.

Kame shuar Jesukrístunun etserkamun nakitiakka, ¿enentáinium itiuir péñker wekasat?

Wats, nú shuar, Krístun umirainiachu ásar, tuke túrunatin asamtai tukumainiawai.

### Yusna ajasaru ainia nu

<sup>9</sup>Tura átumka Yus achikmaitrume. Tura, wínian pujurtursarat tusa yajauchinmaya Uunt Yus akantamkairume. Yusna asarum péñker enentáimin ajasurme. Tura Yus sumakmaitrume. Niisha winia péñkerun etserturkarat tusa túraití. Kame kiritniummaya jíñkirum ní tsáapnintrin wekasatniun achirmakurme. <sup>10</sup>Yaunchu nusháa shuar áuyarme. Tura antsu yamaikia Yus-shuar ajasrum, Niiniu ajasurme. Yus-shuar ajatsrumniñ, ¿ya waitnentrampromia? Antsu yamaikia Yus waitnentrामuitrume.

### “Yúsnaitjai” tu enentáimsatin

<sup>11</sup>Yatsurtirmin tájarme, Yusna ajasrum, ju nunkanam írar matsatu asarum, atumí ayashí wakerana nu tsankatkairap. Ayashim wakerana nu túrakmíñkia ame enentáim nujai yajauch ajastatui. <sup>12</sup>Yus-shuarchanum péñker wekasatarum. Túrakrumniñkia niisha yamáí “Yus-shuar yajauch túruiniawai” ántar tuíniayatan, ukunmanka, Yusjai inkiunaiktin tsawant jeamtai, péñker wekarmena nuna enentáimturmasar, nú shuarsha Yúsan shiir awajsartatui.

<sup>13</sup>Kristu atumí Uuntri asamtai, ju nunkanam akupin áiniana nusha umirkatniuitrume. Uunt akupin ashí akupin asamtai umirkatarum.

<sup>14</sup>Tura ni akupeamurí ainia nusha tunaan túruinia núnaka asutiáti tura péñkeran túruinia núnaka shiir awajsati tusa uunt akupin akupkamu ásarmatai umirkatarum. <sup>15</sup>Nekas penker wekaamurmijjai enentáimcha ainia nu netse chichaamurí itiatmamtikiatarum tusa Yus wakerawai.

<sup>16</sup>Tunaanumiá ankant ajasru asarum péñker wekasatarum. Túrasha wi ankant ajaschajak tusarum nánkamsarum yajauch túrawairap. Antsu Yusna asarum, ni wakera nuna umirkatjai tusarum anearum wekasatarum. <sup>17</sup>Chíkichcha shiir enentáimtustarum. Yus-shuar ainia nusha aneetarum. Yus péñker asamtai ashamkatarum. Uunt akupin shiir awajsatarum.

### Yus-shuarti katsuntratin

<sup>18</sup>Takarniutirmesha ame úuntrum péñker shiir enentáimturmakuisha tura yajauchiitkuisha umirkatarum. <sup>19</sup>Nekaatarum. Ántar wáitkiarmainia nuí, “Yus iirui” tu enentáimsa katsunteakrumka, ti penkeraiti.

<sup>20</sup>Yajauch túrawakmin asutiámamtai katsunteakmekka nuḷsha warin̄ ati. Antsu pēnker túrawakmin asutiámamtai katsunteakmekka júka ti pēnker túrame Yusaj. <sup>21</sup>Núnisan̄ túrunatin achikmaitrume. Kristu waitrutmasmiarme nuḷ, Wi túraj núnisan̄ túrawarmi tusar wáitsamiayi. <sup>22</sup>Krístuka tunaan pēnké túrachmiayi. Tura chikichkinkesha pēnké anankachmiayi. <sup>23</sup>Kátsekeamsha Niḅkia katsekachmiayi. Wáitkiamsha “yapajmiaktaj” tíchamiayi. Antsu “winia Apar Yus iistí” tímiayi, Yus pēnker túrin asamtai. <sup>24</sup>Kristu Niḅki ni ayash̄in̄ ii tunaar̄in̄ entsaki krúsum jarutramkamiaji. Tunáa enentáimtusairum tusa, antsu Yusaj pēnker wekasamniuram tusa jarutramkamiaji. Atumí enentáin̄ tsuártaj tusa Kristu asutniámiayi. <sup>25</sup>Murik ni pujutair̄in̄ waketkitniun nékatsna ántsarmek atumsha men̄kaka wekaimiarme. Tura yamaikia atumí wáitmaur̄in̄ waketkintrume. Atumí wáitmau Krístuiti, atumí enentáin̄ wáinnia nu.

### Nuatnaikiaru itiur túratniuit

**3** <sup>1-2</sup>Tuma asamtai, nuwatiram atumí áishr̄i umirkatarum. Amesha pēnker, Yus umirka weká asakmin, áishrum Yus-Chichaman umirchaitiat, ame túramurmin nekáa, ámekka chichaatsmin̄in̄, niisha Yus-shuar ajastinian wakerittiwai. <sup>3</sup>Nu asamtai aya pátatek iwíarmampratniusha ti enentáimtusairap. Intiash ti pēnker iwíaratniusha, kurij̄aj̄i iwíarmampratniusha, pushí ti kuit̄j̄aj̄i entsartincha ti enentáimtusairap. <sup>4</sup>Antsu, “nekas sh̄írmach ajastaj” tákumka, enentáimin̄ “sh̄iir kajechu átajaj” tu enentáimsatarum. Nuka sakarchattawai. Tura nuka Yúsnumka ti pēnkeraiti. <sup>5</sup>Yaunchu núnisaran̄ nuwá Yúsan enentáimtusarmia nu, tura Yúsan sh̄iir enentáimtikratniun wakeriarmia nu, ni áishr̄in̄ umirkar nuj̄aj̄i ni enentáin̄ sh̄írmach ajarar pujuarmiayi. <sup>6</sup>Atumí weat̄ri Sara ni áishr̄in̄ Apraáman umirmiayi. Umirin̄ asa, “winia uuntru” t̄niuyayi nin. Atumsha pēnker túrakrumka tura sapijmiatsuk wekaakrumka, Saraj̄aj̄i métek átatrume.

<sup>7</sup>Tura áishman̄tirmesha Yus wakerana nu nekaarum atumí nuwē sh̄iir enentáimtusrum tsan̄in̄tarum. Nuwēmsha, nuwá asa, áishman̄j̄aj̄i métek katsuntrachminiaiti. Tura niisha, ámij̄aj̄i métek Yusa waitnenkartutair̄ij̄aj̄i tuke iwíaaku átinian takusminiaiti. Tu enentáimta asam ame núwēm sh̄iir enentáimtustá. Yus áujkuram itiurchat atsuti tusarum túratarum.

### Yúsnum pēnker wekasatin

<sup>8</sup>Nuyasha ashí Yús-shuartermin̄ tájarme, aya chikichík enentaik atí. Waitnennairatarum. Nekas yatsum aneam núnisrumek anenaitiarum. Aya áminiuk enentáimtutsuk chikichan yáin̄taj tu enentáimsatarum. <sup>9</sup>Yajauch turamainiakuisa “yapajkiataj” tiirap. Katsekramainiakuisa “iikkiataj” tiirap. Antsu “Yus winia sh̄iir awajtusuiti” tu enentáimsarum, yajauch

turamainiana nu pēnker awajsatarum. <sup>10-12</sup>Yus-Chichamnum júnis aarma asamtai nu túratarum:

Uunt Yus pēnker wekaana nuna wainiui, tura ni áujmancha ántawai. Tura yajauchin túrana nuna nakitrawai. Tuma asamtai, shiir pujustaj tákuṅka tura tuke tsawant warastinian wakerana nu, pēnker íimiastí, yajauch chichakāj tusa tura wáitruawāj tusa. Tunaanumia kanaki pēnkeran túratí. Tuke enentáijjaj shiir átinian eakti.

Tu áarmaiti.

### Itiurchat aij pēnker túratin

<sup>13</sup>¿Yaki yajauch túrutmat pēnker turamnisha? <sup>14</sup>Túrasha pēnker túrayatmek wáitiakminkia Yus shiir enentáimtikramprattarme. Tuma asamtai ashamkartutsuk, sapijmiatsuk wekasatniuitrume. <sup>15</sup>Tura “Kristu winia Úntruiti” tu enentáimtustarum. Tura “¿urukamtia Yus-shuar ajasuitiam?” turamainiakui sha, pēnker áimkiannium iwiarnarum pujustarum. Waantu enentáimtumatsuk, nin pēnker enentáimtikratatj tusam túrata. <sup>16</sup>“Yúsaj pēnker wekasatj” tu enentáimsarum wekasatarum. Yus-shuar asakrumin chíkich shuar ántrar áujmatramainia nu ni ántar áujmatramsamun nekaawar natsaárrarat tusarum Yusaj pēnker wekasatarum. <sup>17</sup>Yajauch túrakur wáitsatniujajṅkia nankaamas, Yus wakerakuṅkia pēnker túrakur wáitsatniuka ti penkeraiti.

<sup>18</sup>Kristu ii tunaarín asakártaj tusa jarutramkamiaji. Ashí asakárma asamtai atak tunaan jarukchatniuiti. Niisha tunaan penké túrichuitiat, ii tunáa asakrin wáitrutmasmiaji, Yúsnum ejetamta tusa. Ayashíṅkia jakayat ni wakanjiaj ni ayashí ataksha iwiaaku ajasmiaji. <sup>19</sup>Ni wakanjiaj jakáa wakanin emetamu armia nuna etserkataj tusa wémiyai. <sup>20</sup>Nusha yaunchu Nuai uunt kanun nájanuk siaṅtu painti (120) uwi pujurmia nuj Yuska umirtukarat tusa ti nákamaitiat Nuai étserman umikcharmiyai. Nú kanunmasha ishichik, uchu, aents kanunam pujuinian yumijiaj uwemtikrarmiaji. <sup>21</sup>Nu yumi Yus-shuarti imiantinian nakumui. Ii ayashí chamir awajsatai tusar imiantsuji. Antsu ii enentá pēnker atí tusar Yus sear imianji. Nujaj iisha uwemji. Jesukristu nantakin asamtai, nujaj uwempraitji. <sup>22</sup>Tura Niisha nayaimpiniam we akupin pujutajñium Yusa untsuuríni apujsamuiti. Túramtai nayaimpinmayá suntarsha, tura ashí kakaram akupin áiniana nusha Jesukristun umirainiawai.

### Ju nuṅkanam wáitsatin

**4** <sup>1</sup>Kristu ni ayashíin wáitsa asamtai atumsha núnisrumek wáitsatin ákuisha, katsuntratjai titiarum. Ni ayashíin wáitiana nú shuar yajauchin páchiatsui. <sup>2</sup>Antsu “iwiaakjana nuṅkia Yusa wakeramurín

tuke umirkatjai” tu enentáimiui. Ni ayashí wakerana nuna yamaikia páchiatsui. <sup>3</sup>Warí, Yúsan nékainiatsna nú shuar túruiniána nu atumsha núkap túrichmakuram. Yus-shuar ajatsuk tsanirmatin wakerimiarme. Yajauch túratniusha, nampernum nampekrum ti yurumárum, enentáincha ajasrum charaatum ajatniusha, ántar-yusa namperiin yajauch ana nu najanatniusha nusha ashí wakerimiarme. <sup>4</sup>Tura surimiatsuk yajauch túrimiarmena nu iniaisa asakrumin, yaunchu atumjai nuna túrin armia nu, “urukamtaí iniaisara?” tusar yajauch áujmatramprume. <sup>5</sup>Túrasha ukunam nu aents ni túramurin etserkartatui. Iwiaaku ainia nunasha tura jákaru ainia nunasha Neka awai. Nii nu aentsun sumamtikiawartatui. <sup>6</sup>Túrasha jaka armia nu Yusa shiir chichame ujangarmiayi. Ni ayashiin ashí shuarjai métek jakamniaitiatan Yus iwiaaku pujana núnisan ni wakaní iwiaaku pujusarat tusa ujangarmiayi.

### Shuar yáintiniaitji

<sup>7</sup>Ashí amuukatin jeatemayi. Tuma asamtaí péñker enentáimsatarum; túrarum anearum Yus auju pujatarum. <sup>8</sup>Aneniamujai untsurí tunaasha tsankuratin awai. Tuma asamtaí ashí nankaamas nuamtak anenaistarum. <sup>9</sup>Kajé-kajejainchu atumí jeen itiaaniátarum. <sup>10</sup>In ankant ankant shiir awajtamsatniun Yus ti núkap takakui. Tura in shiir awajtamsamujai chíkich shuarsha shiir awajsatarum tusa chíkich chíkich túratniun suramsaitji. Tuma asamtaí péñker takaawa áintsarmek Yus amasmania nujai ame írutramuram yaintá. <sup>11</sup>Etserkatniun Yus amasuitkiuinikia ame tamena nu, Yus tana nujai métek atí. Chíkich shuar yáintiniaitkiunka Yus amaana nú kakarmajai túrata. Ashí túramna nu Yusa naari shiir atí tusam Jesukrístu náarijjai túrata. Jesukristun ashí aents shiir enentáimtusartí. Tura ashí áentsnum ni kakarmari tuke atí. Nuna tajai.

### Yus-shuarti wáitsatin

<sup>12</sup>Aneamu yatsurtiram, ti waitsatin nekapramsartin jeartampramna nu nusháa enentáimprairap. Wáitsatin támatai, “¿urukamtaí waita pujaj?” tu enentáimsairap. Kame túrunamniaiti. <sup>13</sup>Tuma ain shiir enentáimsatarum. “Kristu wáitsamurin métek-taku wáitiakun péñkeraiti” tu enentáimsatarum. Ukunam Kristu winchari wáinkiarum timiá warasmi tusarum túratarum. <sup>14</sup>Kristunu asakrumin katsekkramkachartimpiash. Túmaitkiuisha Yusa Wakaní shiir ana nu atumiin pujurtamkui shiir awajsamuitrume. Katsekkramainia nú shuar imia Yusa Wakanin yajauch áujmatainiawai. Tura átumka Yusa Wakaní shiir awajearme. <sup>15</sup>Túra atumsha yajauch túrawairum aneararum. Mankartana nu, kasamkana nu, tunáa túrana nu, tura chikichna páchiana nusha ni wáitsatniurinkete. Atumjainkia nu wáitsatniuka

atsutí. <sup>16</sup>Tura antsu Krístunuiti tusar wishikramuk wáitkiarmainiakui natsa<sub>ar</sub>airap. Krístunu asam wáitiatmek, natsa<sub>mts</sub>suk Kristu naari shiir awajsata.

<sup>17</sup>Yuska ni shuarin nekapsatajtsa nan<sub>ka</sub>matniuiti. Tura nu tsawantcha jeayi. Yus imia in nekapramkuisha Yus-Chichaman umirainiatsna nú shuarsha urukawartin. Ti asutniáwartatui. <sup>18</sup>Imia Yus umirjinia nu uwempratniuri itiurchataitkiuisha tunaan túruiniana nusha urukawartin. <sup>19</sup>Tuma asamtai Yus wakeramujai wáitiainia nu, niisha Yus najanamu asa Yus iirsatí tusa tuke pen<sub>ker</sub> túratí. Warí, Yuska tuke pen<sub>ker</sub> túrichukait.

### Yus-shuara uuntri túratin

**5** <sup>1</sup>Yamaikia Yus-shuara úntritiram, jintintjarme. Wisha núnisnak Yus-shuara úntrintjai. Kristu wáitsamurin wáinkiaitjai wisha. Tura ukunam ti shiir átatna nu<sub>i</sub> chíkich Yus-shuara uuntria núnisnak wisha pachiinkiatjai. <sup>2</sup>Yus-shuar ame ístiniaitmena nu, pen<sub>ker</sub> iistá, murikiu wáinin ni murikrin wainnia áintsamek. Nakittsuk, shiir enentáimsam túrata, Yus wakerana nuke. “Chíkich akupta asamtai túratatai” tútsuk tura nujai kufrintin ajastin enentáimsuk nekas wakeritia, Yusa takatri asamtai. <sup>3</sup>Turasha, “Yús-shuara uuntri ajasan, Yus-shuaran akuptiaj” tu enentáimsaip. Antsu shiir túramurmijjai Yusa murikri jintintiata. <sup>4</sup>Nuinkia murikiu wainniu Uuntri taa wantiniak iwiarmamtai tawasap ti shíirmachia núninian suramsattawai. Aents súana nú shíirmach wari mamurtiniaiti. Tura Úntrum ámin suramsattana nuka pen<sub>ke</sub> mamurchattawai.

### Yus-shuarti umirnaikiatin

<sup>5</sup>Tura natsatirmesha atumí uuntri umirkatarum. Kame yaunchu Yús-Papinium aarma asamtai ashí Yus-shuartiram nan<sub>ka</sub>amantu enentáimtumsuk umirnaikiatarum.

Waantu enentáimtuma núnaka Yus nakittiwai. Antsu nan<sub>ka</sub>amantuchu enentáimtuma nuna Yus waitnentak yayawai. Tu aarmaiti.

<sup>6</sup>Wats, Yus timiá kakaram asamtai, amek nekamam, péjchach enentáijjai enentáimtumasta. Nuinkia tsawant jeamta ni wakerak Yus ámin pen<sub>keri</sub> awajtamsattawai. <sup>7</sup>Yus ámin ti enentáimturmakui ame itiurchatrum ainia nu Yus ashí iiktusta.

<sup>8</sup>Aneartarum tura ímiastarum. Íwianch atumí nemasri ana nu, uunt yawáa nuke, yanak emesraintiaj tusa e<sub>ak</sub> tentaa wekaawai. <sup>9</sup>Tura tuke Yus nekas enentáimtusurum surimiaktarum. Ashí nun<sub>kan</sub>am Yusnum atumí yachi ainia nu átum wáitiarmena núnisara<sub>n</sub> wáitiainiawai. Nusha kajinmakchatniuitrume. <sup>10</sup>Wats, ishichik tsawant wáitsarmena nu nan<sub>ka</sub>asmatai Yus ataksha pen<sub>ker</sub> awajtamsattarme. Tura numi

wewe wajana núnisaṅ ikiakátmartatrume. Tura Yus ikiakárma asarum ni jintiṅ tuke péṅker wekasattarme. Ju Yus tuke in waitnentramtsujik. Tura iisha Jesukrístunu asakrin Nijijai métek Yus ni shiir pujutainium tuke shiir pujusmintrum tusa achirmakuitji. <sup>11</sup>Nú Yúsnasha ashí aents shiir enentáimtusartí. Tura ashí áentsnum ni kakarmari tuke atí. Nuke ati.

### Amiak áujmamsamu

<sup>12</sup>Serpanujai ju papin ishichik áarmaj nuna akupeajai. Serpanu Yusjai péṅker wekaak Yusnum winia yatsur ajasuiti; núnaka nékajai. Yus waitnentrama asa ti yainmakmania nuna enentáimtikeajrume ju papijiai. Tura tuke ni waitnenkartutairiṅ wekasatarum tájarme.

<sup>13</sup>Papirúnianmaya atumjai métek Yus achikma áinia nu amikmaatmarme. Winia uchir Markus núnisaṅ amikmaatmawai.

<sup>14</sup>Yusai yachi ajasu asarum anenaisrum shiir awajnisatarum. Jesukrístunu ajasuitrumna nuna Yus imiatkinchanum pujustinian suramsarat tusan wakerajai.

Nu atí.

# PÍTIUR

## ATAKSHA papin áarar akupkamu

---

### Pitiur Yus-shuaran áatramiania nu

**1** <sup>1</sup>Wikia ju papin aajna ju Semuñ Pítruitjai. Jesukrístu akatramu asan ni takarniuríntjai. Ii Yusrí tura in Uwemtikramin Jesukrístu umirumna nuna atumniasha juna áatjarme. Niisha ashí áentsun métekrak enentáimtin asamtai atumsha iijíaj métek Niiniu ajasurme. Nuka ti penkeraiti. <sup>2</sup>Yus, tura ii Uuntri Jesússha nékarmena nú núkap nekaki wéakrumin, Yuska atumin ti nukap yáinmaktatrum tura ti nekas imiatkinchanum pujustinian suramsattarme. Nuna nekaan tuke núnisan atí tusan wakerajrume.

### Yusaj páchitkia atin

<sup>3</sup>Yus uunt asa tura ashí túramnia asa, umirtukat tusa achirmakuitji. Nii neka asar atsumajnia nu wáinkiaitji. Yus-shuarti wekasatniusha, tura Nin aneatniusha ii atsumajnia nuna Yuska kakaram asa suramsaitji. <sup>4</sup>Niisha uunt asa tura tujinkiachu asa ni chichamen suramsaitji. Nu chichamsha ti kakarmaiti tura ti penkeraiti. Nu chichamjai atumsha atumí ayashí yajauch wakerana nuyá uwemprarum, Yusaj páchitkia átinian suramsaitrume. <sup>5</sup>Yus umirkarme. Yamaikia juna túrataj tusarum kakartiniaitrum. Ti penker wekasatniuitrume. Nuyá Yusna nekaatniuitrume. <sup>6</sup>Nuyá yayauch túrashtin íimiastiniaitrum. Nuyá katsuntratniuitrume. Nuyá Yus shiir enentáimtusrum wekasatniuitrume. <sup>7</sup>Tura nuyá ashí shuar shiir enentáimtustiniaitrum. Tura nu nankaamas ashí shuar aneatniuitrume.

<sup>8</sup>Ashí nu túrakrumka, tura tuke túrukum wéakrumka, nakiarchattarme. Túrarum ni takatri émamkesrum takastatrum. Tura ii Uuntri Jesukrístu nekas nekaattarme. <sup>9</sup>Tura nuna túruiniatsna nuka,

kusurua áanin áiniawai. Jesukrístu wakeramurín enentáimtuiniatsui. Ni tunaariya uwemprarmia nuna kajinmatainiawai. <sup>10</sup>Tuma asamtai yatsurtiram, Yus atumin anaitiamak achirmakurmena nu tuke enentáimsarum wetarum. Túrakrumka penké iniarchattarme. <sup>11</sup>Tura ii Uuntri Jesukrístu uwemtikramprajnia nu, Nii tuke akupeana nu, nakittsuk shiir awaintiamattarme.

<sup>12</sup>Tuma asamtai nékarminin tura Yusna nekas ana nuyá kanaatsrumnin tuke enentáimtikratjarme. <sup>13-14</sup>Nekaatarum. Winia jákatniurun jeatema nuna ii Uuntri Jesukrístu ujakanyi. Tuma asamtai iwiaaku pujajna juik atumin tuke enentáimpratarum tusan jintinratniuitjarme, tu enentáimsajai. <sup>15</sup>Tura wi jakamtai, wi aajna juna tuke kajinmatkiirum tusan, wi jeajna nuna túrattajai.

### Kristu waantu ajasun wáinkiarmlia nu

<sup>16</sup>Ii Uuntri Jesukrístu kakarmari tura ni táratniuri etserkamajnia nu, aya áentsnumia ántar chichamchauyi. Antsu imia ii jiijai Uunt Jesukrístu waantu ajasu wáinkia asar ujakmajrume. <sup>17</sup>Tura Apa Yus Jesukrístun shiir waantu awajsamia nu, ni imiá shiir pujutairiya chichaak tímiayi, “Ju ka winia ti aneamur Uchiruiti. Nin ti wararjai.” <sup>18</sup>Iisha naint “Yusna” tájinia nu Nijjai pujá asar nu nayaimpinmaya chichaamu paant antukmaji.

<sup>19</sup>Tura nuna nankaamas ti nekasa nu, Yúsnan etserin yaunchu etserkarmia nusha nékaji. Ju étserma jusha, tsawant tsawaatsain kiritniunam ji keak tsáapin awajeana áintsan asamtai, penker enentáimta asarum penker túrarme. Tura Kristu taa, yan kuam etsantea núnisan atumí enentáin ashí paant awajsattawai. Tura nu tsawant jeatsain nu étserma tuke penker enentáimtustarum. <sup>20</sup>Tura ju emka nekaatarum. Shuar aya ni enentáimmiarijain, Yusa Wakanjainchu, Yus-Chicham urukamtai tu chicháa nuna nekaatniun jeatsui. <sup>21</sup>Warí, Yúsnan etserin yaunchu etserkarmia nu, aya ni wakeramurijain tícharmiayi. Nu áishman kan enentáin Yus pujursarmiayi. Tuma asa ni tiarmia nuna Yusa Wakaní jintintiam tiarmiayi.

### Wait chichaman unuiniainia nu

(Jut. 4-13)

**2** <sup>1</sup>Tura Israer-shuarnum wait chichaman etserniusha páchitkiarmiayi. Atumijncha wait chichaman unuiniau páchitkia ártatui. Niisha awajimtikrampratniun wakeruiniak wáitian ti yajauchin uukar unuiniarartatui. Tura “Uunt Jesus uwemtikrurmlia nusha ántrai” tiartatui. Nuna takui ni amuukatniurjsha wárik jeartatui. <sup>2</sup>Tura untsurí shuar ni yajauch túruiniamurín írsar métek túrawartatui. Iis, “Yus-Chichaman unuiniaitjai” tuíniayatan imiá yajauch túruiniakui untsurí aents “Yus-



Chicham ánrtraiti” tiartatui. <sup>3</sup>Kuítian ti wakeruinia ásar, wait chichaman unuitiamprar akíam kuítriniawartatui. Tura nú shuar yaunchu Yus jákatniunam sumamtikiawarma ásar, ni amuukatin tsawantri jeatemayi. <sup>4</sup>¿Warí? Yuska ni suntari nayaimpiniam pujuarmia nunasha penké tsankurachmiayi. Antsu nayaimpinmaya jiniun akupkarmiayi. Tura nekapsatin tsawant jeatsain kiritniunam jinkiamu emetamu pujuiniawai. <sup>5</sup>Yáunchuya shuarnasha Yus tsankurachmiayi. Antsu amuukarat tusa amaarkatniun akuptukarmiayi. Antsu aya Nuain, Yusjai wekasatniun etserin asamtai ni shuari siati armia nujai uwentikramiayi. <sup>6</sup>Enentáimpratarum. Sutuma pépruncha tura Kumura pépruncha nayaimpinmaya jin akuptuk Yus mash amukmiayi. Aya yúnkunmik awajsamiayi. Ukunam nu túrunamun nekaawar, shuar tunáa túratin tsúmainian nekaawarat tusa túramiayi. <sup>7</sup>Tura Yus Ráutan uwentikramiayi. Péñker shuar asa, Sutumanmaya shuar imiá yajauch ásar tunáa túruiniakui, Raut kúntuts enentáimsamiayi. <sup>8</sup>Péñker áishman asa, nuyá shuara yajauchirin wáitaiiniak, ni enentái péñker asamtai tuke tsawant kúntuts enentáimiuk wáitmiayi. <sup>9</sup>Tura incha tunaan iniakturmakrin, nu tunaanum nupetnakchati tusa Uunt Yus uwentikrampramniaitji, ni umirka asakrin. Túrasha yajauch shuárnaka nekapsatin tsawant jeakui ti asutniáwarat tusa Yus yámaikikia apujeawai.

<sup>10</sup>Tura Yus akupeana nuna umirkatniun nakitrar ni yajauch wakeramurin túruinia nunasha Yuska nekas asutiáttawai. Enentáimcha áiniawai. Tura ni wakeramuriniak wakeruiniawai. Nijijai nankaamas akupin ainia nuna yajauch áujmatainiawai. <sup>11</sup>Warí, imia Yusa suntari Yusai matsatainia nu, nuna túratniun tsúmainiawai. Nankaamas kakaram tura nankaamas uunt áiniayat nu akupniun katsekainiatsui.

<sup>12</sup>Nu áishmansha enentáincha yajasma núnin áiniawai. Achikiar mantamnatniuk akiinia áiniawai. Enentáimtsuk nánkamsar yajauchin chichainiawai. Tuma ásar yajasma núnisan jákartatui. <sup>13</sup>Chikichan wáitkiamia áintsan wáitsartatui. Tuke tsawant ni wakeramunak túruiniak “waraajai” tuiniawai. Tura atumjai irunar yurumáiniayatan atumin anankramawar warainiawai. Nuka natsantaiti.

<sup>14</sup>Nuwán wakerutskeka íniatsui. Tunaan yawetainiatsui. Yúpichuch ainia nú shuaran netse túratniun wakerumtikiainiawai. Kuítian wakeruktinnisha ti nékainiawai. Jákatniunam sumamawaru áiniawai. <sup>15</sup>Yúsnumaaní naka wétsuk awajirarai. Peura uchiri Paraam Yúsnan etserniuiat yaunchu awajimia núnisan awajiniawai ju shuar. Paraamka tunaan tura, kuítian achiktinian ti wakerukmiayi. <sup>16</sup>Tura niisha tunáa túratajtsa weai Yuska umpuurun chichachun aents chichaana nujai métek chichamtikiamiayi. Nuñkia umpuuru timia nujai Yúsnan etserin ni netse túratniurin enentáimiar iniaisamiayi.

<sup>17</sup>Nu áishmansha yumirmat kuyua núnis áiniawai. Tura núnisan yuranmisha kíariat nase umpuim menkaana nu, yumi ajuarcha ásar,

penké ántar áiniawai. Warí, Yus-Chichamjají áentsun yainiainiatsui. Niisha imiá kirit ámanum tuke pujustin áiniawai. <sup>18</sup>Niisha ti chichainiyat ántar chichainiawai. Yajauch túratniujají tura ayash wakera nújajísha páchim túriarmia nuyá kanakiarua nú shuaran ataksha tunaanum ajuartajtsa wakeruiniawai. <sup>19</sup>“Iiya núnis túrakrumka ankant áatrumé” tu wénawai. Túrasha imia niníki ni tunaariin emetamu áiniawai. Páantchakait. Shuar warí tunaajajím nupetnaka, nuna emetamurínti. <sup>20</sup>Kame shuar, uunt Jesukrístu uwentikiartin ana nuna chichamené nekainiak ju nunkanam yajauch ainia nuyá uwempra ainia nu, tunáa nupetkam atak yajauchiniam iniainiakka, nuik pujumia nújajínkia naníkaamas yamáí imiá yajauch pujuiniawai. <sup>21</sup>Yusa akupkamurín imiá péñkera nuna Yus nú shuarnasha súsarmai. Túrasha nekainiyat tunaanum waketkiaru ásar ti asutniáwartatui. Tuma asamtai, nekas jintia nekaachuitkiuníka maak árainti. <sup>22</sup>Tíchamukait, “yawá iyak ataksha yúawai,” tura, “kuchisha imiainiuitiat ataksha tsakusnum maajíkiui.” Nu áishmanísha núnisan yajauchiniam ataksha wáketainiawai.

### Uunta tátintri

**3** <sup>1</sup>Aneamu yatsurtiram ju papin jimiara áatjarme. Mai papinium winia jintintiamurjají atumí chamir enentáin enentáimtikratjarum tusan wakerajrume. <sup>2</sup>Yúsnan etserin, péñker wekain armia nuna etserkamurí enentáimturarum. Tura ii Uuntri akupkamurín ni akatramuríjjají ujatmakarmia nusha enentáimpratarum. Jesukrístu uwentikrampramaj nuna chichamené taji.

<sup>3</sup>Jusha emka nekaatarum. Amuamu tsawantin Yúsnan wishikin wantinkiertatui. Tura niisha ni yajauch wakeramurín túrusar wekasartatui. <sup>4</sup>Tura juna tiartatui. “¿Kístuka “wi atak tátatjai” timia nusha urukuit? Warí, ii uuntri yaunchu kajíníkiarmia nuyá yapajíáchmaiti. Yus yaunchu ju nunkan najanamia nuyá yamaisha tuke núniskete” tiartatui. <sup>5</sup>Túrasha nunkancha nayaimpincha Yus yaunchu najanamia nuna nekaatniun nakitiainiawai. Yusa chichamejají nunka entsaya jíinkimiayi tura nunkasha entsá nanatrawai, Yus timia nujají métek. <sup>6</sup>Tura ukunam nu nunkan amaarkamujají Yus emesramiayi. Ashí nuna nekaatniun nakitiainiawai. <sup>7</sup>Tura Yus tiniu asamtai nayaimpisha nunkasha yamáya nuka jíjjají emesnarat tusa ikiusma áiniawai. Yus áentsun nekapsattana nu tsawantají yajauch aents emesnantatui; tura jisha nu tsawantají nunkancha nayaimpincha áesattawai.

<sup>8</sup>Tura jusha, aneamu yatsurtiram, enentáimsatarum. Uunt Kístujajínkia chikichík tsawant mir uwiya núniskete; mir uwisha chikichík tsawanta núniskete. <sup>9</sup>Uunt Kristu, “atak tátatjai” tana nuna umitsuk menkakashtatui. Áyatik áentsti “wau taatsui” taji. ¿Urukamtai

wau taatsua? In áentstin nákarmaji. Shuar chikichkísha menkakajin tusa nakitiawai. Antsu ashí shuar enentain yapajíáwarat tusa wakerawai.

<sup>10</sup>Túrasha Uunta tsawantri aya aneachma jeattawai. Kasa aya aneachma kiritniunam taana núnisan tátatui. Nu tsawantin nayaimpisha ipiamta núnis charáa timiatai menkakattawai. Tura nuí ashí írunna núurtiuk esaawartatui. Tura nunkasha tura ashí írunna nusha esaawartatui.

<sup>11</sup>Ashí nu emesnartin neka asarum atumsha imiá nekas Yus tuke enentáimtusrum, takamtsuk umirkarum wekasatniuitrume. <sup>12</sup>Yusa tsawantri wárik tati tusar, jintiá ímprusar nákastiniaitji. Nu tsawantai nayaimpisha esáa emesnartatui, tura ashí írunna núurtiuk ti tsuer ajas entsamnattawai. <sup>13</sup>Tura iikia yamaram nayaimpisha, yamaram nunkasha ati tusar nákaji. Nu átatui, tímiayi Yus. Tura nuísha aya péñkerak átatui.

<sup>14</sup>Nu tuma asantai, aneamu yatsurtiram, ju túrunati tusarum nákarmena nuí, imiatkinchanum wekasam chamir enentáimjai makuuchmin Yus wáitkiati tusarum wekasatarum. <sup>15</sup>Ju nekaatarum. In uwentikramprataj tusa Yus ti nákarmaji. Ii aneamu yachi Páprusha núnisan Yus ni nekatairin susamia tímiatrusan áatramprarmame.

<sup>16</sup>Ashí papí aarmia nuí Pápruka wi tajana nuna chichaawai. Kame ni áarmari chíkichka ishichik nekaachminiusha áiniawai. Nékachu ainia nú shuarsha, tura Yúsnum tariarcha ainia nusha Papru áarman yapajíáwar nusháa jintintiainiawai. Tura chíkich chichamsha Yus-Chichamnumia ana nuna núnisan túruiniawai. Túmainiakka nínki emesmamainiawai.

<sup>17</sup>Wátsek, aneamu yatsurtiram, túruntsain ujakjarmena nu neka asarum, yajauch shuar anankramattsa wakerutmainiak awajimtikrurain tusarum, tura Yusai tariarurmena nuyá iniarajj tusarum anearum wekasatarum. <sup>18</sup>Tura ii Uuntri Jesukrístu in Uwentikkiartin ana nu, yamáí nékarmena nú nankaamas nekaatarum. Tura enentáimin nú nankaamas tariarum wetarum. Yamaisha tura tuke, ii Uuntri Jesukrístu náarin uunt awájsartí. Nu atí.

# JUA

## EMKA papin áarar akupkamu

---

Tuke iwaaku átinia nérentin Chicham ana nu

**1** <sup>1</sup> Ashí nan̄kamamia nú yaunchu Yusa Uchir̄i tuke pujuuyayi. Nusha iisha anturkaitji. Nekas ii j̄ij̄ij̄ai wáinkiaitji. Wáinkiarsha ii uwejēj̄aisha antiñkiuitji. Niisha Yús̄an ti paant awajeak<sup>u</sup>, Chicham tíminiaiti. Tura tuke iwiaaku átinia nérennuiti. Nuna áateajrume. <sup>2</sup>Iwiaaku átinia nérenniusha paant nekanamiayi, nusha Jesukrístuiti. Iisha Nii wáinkia asar nu étsereaji. Tura tuke iwiaaku átinia nérenniur̄i asa tuke Yus Apaj̄aj̄i pujuyayi. Tura yamaikia īj̄ni paant ajatramsakrin atumniasha ujaajrume. <sup>3</sup>Ii Yus Apaj̄aisha ni Uchir̄i Jesukrístuj̄aisha tsan̄ñkiar nekas chikichík̄ ajaji. Tura atumsha núnisrumek iij̄j̄aj̄i chikichík̄ ajasuk tusar wáinkiamajnia nuna anturkamajnia nunasha ujaajrume. <sup>4</sup>Ti shiir warastarum tusan j̄una áatjar̄me.

Yus tsáapniniaiti

<sup>5</sup>Yus imiá tsáapnin asamtai kiritin Nīinkia pen̄ké atsawai. Nu chichaman Jesukrístu in unuitiamprakrin nuna atumniasha ujaajrume. <sup>6</sup>“Niij̄j̄aj̄i tsan̄ñkia pujaji” táyatar kiritniunam pujustinia áintsar tunaanum pujakrikia wáit̄raji tura nekas pen̄ker ana nu túrats̄ji. <sup>7</sup>Yuska tuke tsáapninium pujuwiti. Iisha núnisrik tuke tsáapninium pujakrikia nuámtak nawamnaikiar pujuiniaji. Túrakrin Yus ni Uchir̄i Jesukrístu numpéj̄aj̄i ashí ii tunaar̄i japirtam̄ji.

<sup>8</sup>“Wi tunaan túrichuit̄jai” tákurkia ímia iik anan̄mamaji. Nekas ana nu nékats̄ji. <sup>9</sup>Antsu ii tunáar̄i Yus paant ujakrinkia Yuska tsan̄kurtamprattaji. Tura ii tunaar̄in asakátramprattaji. Yuska ti pen̄ker asa Nii tana nuna tímiatrusan̄ umikmin asa túrattawai. <sup>10</sup>Kame “Tunaan túrichuit̄jai” tákurkia nuj̄aj̄i “Yus wáit̄riniaiti” taji. Ni chichamesha ii enentáin̄ pujurtamtsuji.

### Jesukristu in Yúsan áujturmaidji

**2** <sup>1</sup>Yus-shuartiram, tunaanum iniaarajrum tusan ju papí áateajrume. Túrasha Yus-shuar tunáa túramtainnkia Apa Yusan ii áujturmau awai. Nuka Jesukristuuti. Niisha ti penkeraiti. Niisha Yúsan áujturmakui Yusjai ataksha iwiaarar pujustatji. <sup>2</sup>Jesukristu ii tunaarin asakártaj tusa jarutramkamiaji. Túrasha aya íniunkechu antsu ashí shuara tunaarin asakártaj tusa jarukmiayi.

<sup>3</sup>Yus tana nu umirkurkia nuikia Yus nekas nékaitji. <sup>4</sup>Tura shuar “Yúsan nékaitjai” tayat Yus tana nuna umirchakka wáitrawai. Nekasa nuka ni enentáin atsawai. <sup>5</sup>Antsu shuar Yus tana nuna umireakka Yúsan ti shiir aneawai. Túrakur Niijai tsaninkiar pujamu nékaji. <sup>6</sup>“Yusjai tsaninkia wekaajai” tana nú shuar Jesukristu wekasamia núnisan wekasatniuiti.

### Yamaram akupkamu

<sup>7</sup>Yatsuru, yamaram akupkamun áattsujrume. Áyatik yámankamtaiknumiá antukmiarum nunak tájarme. Ashí atumin jintintiamu yaunchu akupkamuiti. <sup>8</sup>Túmaitiat nekas yamarma áitkiasnak áateajrume. Nu akupkamun Kristusha nekas iniakmasmai. Atumiincha nu akupkamu nekas paant awajsamuiti. Nujaji kiritin menkaatemka asamtai tura nekas tsaapninkia paant tsaapnirtasa pujakui nu akupkamun atakháa aateajrume.

<sup>9</sup>Shuar “tsáapninium pujajai” táyat chíkich Yus-shuaran nakitiakka tuke kiritniumam wekaawai. <sup>10</sup>Yus-shuaran aneana nu nekas tsáapninium pujawai. Niisha iniaatsuk chikichnasha tunaanum ajuarchamniaiti.

<sup>11</sup>Tura shuar chíkich Yus-shuaran nakitiakka kiritniumam tuke wekaawai. Tura kiritniumam iimiu asa itiuraani wea nuna nékatsui.

<sup>12</sup>Uchitirmincha, Jesukristu jakamujaji atumí tunaari tsankurnaru asakrumin juna áateajrume. <sup>13</sup>Úuntirmincha yámankamtaiknumiá tuke pujuuya nu nekáa asakrumin juna áateajrume. Úunmarutirmincha uunt iwianch nupetka asakrumin juna áateajrume.

Uchitirmincha, Yus Apa nekáa asakrumin áateajrume. <sup>14</sup>Úuntirmincha yámankamtaiknumiá tuke pujuuya nu nekáa asakrumin juna áatjarme. Úunmarutirmincha atumí enentáijiaj Yus-Chicham umirkarum kakaram asarum íwianch nupetka asakrumin juna áatjarme.

<sup>15-17</sup>Aya áentsnumiá ana nu yakiyanchuiti. Apa Yus súsachuiti. ¿Warimpiait nu? Juiti: ame ayashim wakerana nusha, ame íisam takustaj támena nusha, tura nankaamantu ajastin. Nuka ju nnkanmaya áiniawai. Shuar aya nunak wakerak Yúsnaka aneatsui. Kame ju nnkasha amuukattawai. Ashí nu wakeruktincha ti nekas amuukattawai. Túrasha shuar Yusa wakeramurin umíana nu tuke iwiaaku pujustatui Yusjai. Nu asamtai atumsha ju nnkanam ana nu pachikiairap. Tura aya juyá ana nu aya tákustin enentáimsáip.

### Nekas chicham tura wait chicham

<sup>18</sup>Uchirú, amuukatin tsawant jeatemayi. Atumsha Kristu nemasrì tátin antukuitrume. Yamaikia untsurì Kristu nemasrì wantinkarmatai amuukatin tsawant jeatemayi. <sup>19</sup>Nusha ii weeak ármayi. Túmaitiat nekas Yus-shuar ácharmayi. Nekas Yus-shuar ániakka tuke iijjaj irunar pujuaraayí. Tura jíinkarmatai nekas Yus-shuarcha ainia nu paant nekanamniaiti.

<sup>20</sup>Antsu atumniaka Yusa Shiir Wakanin Kristu suramsantai ashí paant nékarme. <sup>21</sup>Nékachuitrume tu enentáimkiun áattsujrume. Antsu nekas chicham ana nu neka asakrumin paant áatjarme. Wáit-chichamsha nekas-chichamsha penké nushaachuk ainia.

<sup>22</sup>Wáitrin júiti: Jesusan “Yus anaikiamuka Krístuchuiti” tana núiti. Núiti nekas Kristu nemasrì. Yus Apancha ni Uchirincha nakitia asa Kristu nemasrinti. <sup>23</sup>Yusa Uchirin nakitiainia nu Yus Apajajisha tsanin pujatsui. Tura Yusa Uchirin shiir awajea nu, Yus Apajajisha tsanin pujawai.

<sup>24</sup>Yámankamtaiknumiá antukmiarum nu atumí enentáin pujurtamsati. Nu túrakrum atumsha Yusa Uchirijajisha Yus Apajajisha tuke tsaninkrum pujustatrume. <sup>25</sup>Jesukrístusha Nijjaj tuke iwiaaku pujustinian tsankatramkaitji.

<sup>26</sup>Anankartin írunkui juna áatjarme. <sup>27</sup>Atumniasha Jesukrístu Yusa Shiir Wakanin suramsakrumin, nu Wakan tuke pujurtamkurmin shuar jintintramatin atsumatsrume. Antsu Yusa Wakaní ashí jintintramprume. Ni jintintrammasha imiá nekas asa wáitchaiti. Tuma asantai Nii jintintramna áintsarum Krístujaj tuke tsaninkrum pujustarum.

<sup>28</sup>Yamaikia, uchiru, Krístujaj tuke tsaninkrum wekasatarum. Nu túrakrikia Nii támatai natsamtsuk ti shiir inkiunaiktatji. <sup>29</sup>Atumsha Jesukrístu ti penkera nu nékarme. Núnisan ashí shuar penkeran túruinia nuka Yusa uchirí ániawai. Nusha nekaatarum.

### Yusa uchirí áiniana nu

**3** <sup>1</sup>Maa, shiir enentáimpratarum. Yus Apa ti anenma asa “winia uchir” tu anaitiamkaitji. Kame nekas ni uchirintji. Tuma asakrin jú nunkanmaya Yús-shuarcha nekarmainiatsji. Kame Yusnasha nékainiatsui. <sup>2</sup>Aneamu yatsurtirmea, juna tájarme: nekas Yusa uchirí ajasuitji. Kame ukunam urukuk átají nusha nékatsji. Túrasha ju paant nékaji: Jesukrístu támatai imia Nii paant wáinkiar Nijjaj métek ajastatji. <sup>3</sup>Tura shuar shiir enentáijjaj nuna nákakka imia niniki shiir awajmamui Jesukrístujaj métek shiir atajai tusa.

<sup>4</sup>Shuar tunáa túrakka Yus akupkamu umirkachuiti. Kame núiti tunaaka Yus akupkamu umirkashtin. <sup>5</sup>Jesukrístu ii tunaari asakártaj tusa ju nunkanam támia nu nékarme. Tura Ninkia tunaan túrichuyayi.

<sup>6</sup>Tuma asamtai shuar Nijijai tsanin wekaa nuka tunaanum wekaatsui. Antsu shuar tunaanum wekaakka nu shuar Krístun wainchaiti, núnisan nékachuiti. <sup>7</sup>Uchiru, shuar anankramawairap. Pénker túrinkia Kristu ti pénger asamtai niisha péngeraiti. <sup>8</sup>Antsu shuar tunaanum wekaana nu iwianchnaiti íwianch tuke tunaan túrin asamtai. Yusa Uchiri ju nunkanam táwiti ashí íwianch túramun emesratay tusa.

<sup>9</sup>Shuar nekas Yusjai akiinia nu tunaanum wekaatsui. Yusa uchiri asa Yusa iwiaakmarijai wekaawai. Tuma asa tunaanum tuke wekaatsui. <sup>10</sup>Shuar pénger túratsna nuka tura Yus-shuaran kajera nuka Yus-shuarchaiti. Nujai Yusa uchiri ainia nusha tura iwianchi uchiri ainia nusha paant nekaamniaiti.

### Mai anenai ajatin

<sup>11</sup>Atumsha yámankamtaikniumia chicham antukmiarum nu júiti: mai anenai ajartin. <sup>12</sup>Iisha Kaínkia áanin áchatniuitji. Íwianch-shuar asa ni yachin máamiayi. Tura ¿urukamtai maamia? Enentaimprata. Nii yajauch asa tura ni yachi pénger asamtai máamiayi.

<sup>13</sup>Yatsurtiram, ju nunkanmaya shuar nakitramainiakui ti enentáimsairap. <sup>14</sup>Iikia jákatniunmaya uwempra asar<sup>1</sup> nekas iwiaaku pujaji. Túmakur Yus-shuar ainia nu aneaji. Nujai yamaram iwiaakma takakjinia nu imiá páantaiti. Shuar Yus-shuaran aneachkunka tuke jákatniunam wekaawai. <sup>15</sup>Shuar Yus-shuaran nakitiakka mankartinia núnisaiti. Tura mankartinkia tuke amuicha iwiaakmanum pujuiniatsui. Nuka nékaji. <sup>16</sup>Jesukrístu in jarutramka asakrin nujai nekas in anenmaj nu nékaji. Iisha núnisrik Yus-shuar ainia nu ti aneakur ni yaintai tusar jarukmin átiniaitji. <sup>17</sup>Túrasha shuar chíkich Yus-shuar atsumana nuna takakiat waitnentachkunka nekas ni enentáijijai Yúsan aneawash. <sup>18</sup>Uchiru, aya chíchamjain anenain áchatniuitji antsu nekas aneniakur pénger túrar yáiniaiktiniaitji.

### Yusai natsamtsuk jeamniaitji

<sup>19</sup>Jujai ii Yúсай sapijmiatsuk jeatniusha tura nekas Yus-shuaraitji nu nekaatniusha nekapmampramniaitji. <sup>20</sup>Ii enentái yajauch túramun enentáimtikramkurnisha Yus ijijai nankaamas ashí mash nékatsuk. <sup>21</sup>Tura, aneamu yatsurtiram, ii enentái yajauch túramun enentáimtikramchakrinkia Yúсай sapijmiatsuk jeamniaitji. <sup>22</sup>Tura ni wakeramu túrakrikia tura ni chichamesha umiru asakrin ashí ii seaj nuna suramsattaji. <sup>23</sup>Júiti Yus akupkamu: ni Uchiri Jesukrístu nekas enentáimtustin tura Kristu timia áintsarik shuartisha mai anenai ajartin. <sup>24</sup>Shuar ni chichamen umía nuka Yusjai tsanin wekaawai tura Yus nijijai tsanin wekaawai. Mai chikichik ajasu áiniawai. Tura Yusa Wakaní ii enentáin pujá asamtai nujai Yus ijijai tsanin wekaana nu nékaji.

### Yusa Wakanisha tura Kristu nemasri wakancha

**4** <sup>1</sup>Aneamu yatsuru, untsurí shuar wáitruiniak “wi Yúsnan etserniuitjai” tuiniawai. Tuma asamtai ashí shuar “wi Yusa Wakanin takakkun chichaajai” tuinia nu péñker nekapsuk enentáimtusairap. Antsu ísrum nekas Yusa Wakanímpiashit tura chíkich wakaniashit nu nekaatarum. <sup>2</sup>Jujai nekapsarum ya nekas Yusa Wakanin takaka nu nekaattarme: Shuar “Jesus Yusa Uchiri Krístuítat nekas aents ajas ayashimkiamiayi” tana nu Yusa Wakanin nekas takakui. <sup>3</sup>Tura Jesusan tu enentáimtatsna nuka Yusa Wakanin takaksui antsu Kristu nemasri wakanin takakui. Kame Kristu nemasri wakan tátin tama ántichukaitrum. Nu wakan yamaikia ju nunkanam táwiti.

<sup>4</sup>Uchiru, átumka Yusna asarum Yus atumí enentáin pujawai. Tura ju nunkanmaya shuara enentáin íwianch pujawai. Atumiin pujana nuka nijjiai nankaamas kakaram asamtai wáitrin ainia nu nupetkaitrume. <sup>5</sup>Niisha ju nunkanmaya ásar aya ju nunkanmayan áujmatainiawai. Túmainiakui ju nunkanmaya shuar ti penker anturainiawai. <sup>6</sup>Antsu iikia Yúsnaitji. Tuma asakrin Yúsán nékainia nu anturtamainiaji. Tura Yúsnachu ainia nu anturtamainiajsi. Nujai nekas Wakanin takakusha tura wáitrin wakanin takakusha nekaamniaiti.

### Yus tuke anenkratniuiti

<sup>7</sup>Aneamu yatsuru, anenaitin Yúsnumiá asamtai mai anenai ajartai. Shuar anenkratniua nuka Yusa uchiri asa Yúsancha nékawai. <sup>8</sup>Shuar anenkratcha nuka Yúsanka nékatsui. Kame Yuska tuke anenkratniuiti. <sup>9</sup>Tuma asa ni Uchiri chikichkiniak ju nunkanam akupturmakmiaji. Iisha ni túrunamujai nekas iwiaaku pujaji. Nujai Yus in yáinmak ni anenkrattain paant iniakturmasmiaji. <sup>10</sup>Jujai nekas anenkrattainkia paant nekanamniaiti: ii Yus aneaj núchaiti. Antsu ii ti tunáa árinin Nii aneachmaitatan Yuska ti anenma asa ni Uchirin ii tunaarin asakárat tusa akupturmakmiaj nujai nekas nekanamnaiti.

<sup>11</sup>Aneamu yatsuru, Yus núnis anenma asakrin iisha núnisrik mai anenai ajartai. <sup>12</sup>Chikichkisha Yúsán wáinkiachuiti. Túmaitiat mai anenai ajakrikia Yus ii enentáin pujurtamkui Nijjiai métek anenkratin ajaji. <sup>13</sup>Yus ni Wakanin suramsa asakrin Yus iijjiai tsanin wekaana nusha tura ii Nijjiai tsaninkia wekaajnia nusha, nujai nékaji. <sup>14</sup>Yus Apa ni Uchirin ashí shuaran uwemtikrarat tusa ju nunkanam akupkamia nu wáinkia asar<sup>i</sup> étsereaji. <sup>15</sup>“Jesus Yusa Uchirinti” tana nu shuarjai Yus tsanin wekaawai tura niisha Yusjai tsanin wekaawai. Mai chikichik ajasu áiniawai.

<sup>16</sup>Yus in anenmajnia nu ti nekas nékaji. Yus tuke anenkratniuiti. Tuma asamtai shuar anenkartakka Yusjai tsanin wekaawai tura Yussha



nijijai tsaniñ wekaawai. Mai chikichik ajasu áiniawai. <sup>17</sup>Núnisar ti penker anenkartin ajaji. Túrar<sup>i</sup> súmamtikiatin tsawantai natsamtsuk wajastatji. Kame ju nunkanam pujayatrik Jesukrístujai méteketji. <sup>18</sup>Nekas anenaiyamunam sápij atsawai. Antsu nekas anenaiyamunam sápij menkaawai. Aya asutiátin akui sapijmiaktinaiti. Tuma asamtai ántar sapijmiana nu nekas anenkratchaiti.

<sup>19</sup>Yus emka in anenma asakrin iisha Nii aneaji. <sup>20</sup>Tura shuar “wi Yúsan aneajai” táyat chíkich Yus-shuaran nakitiakka nuka wáitriniaiti. Kame Yus-shuaran tuke wainnia nuna aneachkunka çitiurak Yusan wáinchasha aneat? <sup>21</sup>Yus incha juna turammiaji: Yúsan anea nu shuar chíkich Yus-shuarnasha aneatniuiti.

### Ju nunkanmaya írunna nu núpeteaji

**5** <sup>1</sup>Ashí “Jesus Yusa Uchirí Krístuítu” tu enentáimtana nú shuar Yusa uchirínti. Tura aparí aneakrikia ni uchirísha aneattaji. <sup>2</sup>Yus Apa aneakur tura Nii wakera nu umirkur Yusa uchirísha ashí aneattaji. <sup>3-4</sup>Yus aneakur Nii tana nu umiktatji. Ashí Yusa uchiríya nu Yúsan nekas enentáimta asa, ashí ju nunkanmaya írunna nuna núpeteawai. Nu asamtai Yus tana nu umirkatin itiruchatchaiti. <sup>5</sup>Aya “Jesus Yusa Uchirínti” tu enentáimtana nú shuar ju nunkanmaya ana nuna awakkamniaiti.

### Jesukrístu “Yusa Uchirínti” tu etserainia nu

<sup>6</sup>Jesukristu jú nunkanam taa entsajai imiankui Yus nayaimpinmaya chichaak “Juka winia aneamu Uchiruiti” tímiayi. Tura nuyá Jesus jakamtai ni numpé puarmiayi. Entsajai imianin ni takatrín nankamamiayi túrasha in jarutramak ni takatrín amukmiayi ju nunkanam. Chikichkinkia túrutsuk mai metek túra asamtai Yusa Uchiríya nu paant nekanamniaiti. Yusa Wakanísha tuke nekas tiniua nu métek tawai. <sup>7-8</sup>Nu asamtai menaint “Yusa Uchirínti” Jesusan tuiniawai: Nayaimpiniam Yus Apa tura Jesukristu, Chícham aa nu, tura Yus Wakancha; nunkanmasha Yus Wakancha, entsasha tura numpasha. Mash métekrak tuiniawai. <sup>9</sup>Aents étserainiakui ántureaji. Nuna nankaamas Yus ni Uchirín tana nu nekas anturkatniuitji. <sup>10</sup>Yusa Uchirín enentáimtana nú shuar ni enentáincha nékawai. Antsu Yus ni Uchirín timian enentáimtatsna nú shuar Yúsan enentáimtachu asa Yúsan “wáitriniaiti” tawai. <sup>11</sup>Yus ni Uchirín timia júiti: Tuke iwiaaku pujutai nérenniuiti tura nu iwiaakmancha in suramsaitji. <sup>12</sup>Yusa Uchiríjjai tsaniñ wekaana nú shuar, nu iwiaakmajai iwiaaku pujuiniawai. Tura Yusa Uchiríjjai tsaniñ wekaatsna nú shuar, nu iwiaaku átinnium pujatsui.

### Amuak Yus nekas enentáimtustinian áarmiania nu

<sup>13</sup>Yusa Uchirí nekas enentáimtakrum tuke amuicha iwiaakmajai iwiaaku pujarme. Nu nekaatarum tusan juna áatjarne.

<sup>14-15</sup>Yus wakeramujají métek seakrinkia anturtamji. Tura anturtamkurin ii seamaj nu nekas takusua nu enentáimpramniatiji. Nu neka asar Yus ti shiir enentáimtaji.

<sup>16</sup>Tunáa awai jákatniunam júana nu. Shuar nu tunaan túramtainkia Yus áujtustin ántrai. Tura shuar chíkich tunaan túraquiñkia nuka nekas Yus áujtustiniati. Nekas jákatniunam júatsna nú tunaan túraitquiñkia iwiaaku átinian Yus susattawai. <sup>17</sup>Ashí yajauch<sup>i</sup> ana nuka tunaiti. Tura jákatniunam júatsna nú tunaasha awai.

<sup>18</sup>Nekas Yusjají akiinia nú shuar tunaanum tuke wekaatsui. Antsu Yusa Uchirí nin ti penker wainkiui íwianch antiñkiachminiai.

<sup>19</sup>Iikia nekas Yúsnaitji tura ashí ju nunkanmayá shuar iwianchnia ániawai. <sup>20</sup>Yusa Uchirí ju nunkanam taa nekas-Yus aa nuna paant jintinramji. Yusa Uchirí Jesukrístujají tsaniñkia wekaakur nekas-Yusa nujajísha tsaniñkiar wekaaji. Nekas-Yus asa tuke iwiaaku átinia nuna nérenniuiti. <sup>21</sup>Uchirú, ántar-yus írunna nuí pachiinkiarap. Antsu nujají aneartarum.

Nuke atí.

# JUA

## ATAKSHA papin aar akupkamu

---

### Nekasa nunasha tura anenaitniuncha ujaawai

<sup>1</sup>Wi Juan Yus-shuara uuntri asan ii umai Yus achikma nuna tura ni uchirincha ju papin áateajai. Wisha nekasan atumin aneajrume. Tura aya wíkichu antsu ashí Yus-shuar ainia nusha nekas chichaman nekaawaru ásar atumin anenmarme. <sup>2</sup>Nekas-chicham tuke amuutsuk ii enentáin pujá asamtai aneajrume. <sup>3</sup>Yus ii Aparísha tura ii Uuntri Jesukrístusha, Yus Apa Uchiri asa, atumin anenmak imiatkinchanum shiir pujustinian waitnentrak yainmakarti. Nujai nekas-chicham nekaarum anenaittiarme.

<sup>4</sup>Ame uchiram Yus Apa akupkamujai métek umiiniakui nuna nekaan ti shiir enentáimprajai. Nekas-chichaman umin áiniawai. <sup>5</sup>Yamaikia, umaru, tájame: mai anenai ajartai. Yamaram akupkamun áattsujme antsu yámankamtaik antukmiaj nunak tájame. <sup>6</sup>Nekas anenkartinia nú shuar Yus akupkamun uminiaiti. Tura Yus akupkamuka “anenkartin tuke atarum” tawai. Nusha yámankamtaiknumia antukuitrume.

### Anenkartincha írunui

<sup>7</sup>Ju nunkanam anenkartincha ti írunui. Jesukrístu nekas aents ajas akiiniamia nuna enentáimtuiniatsui. Nu shuar anenkartin ásar Kristu nemasri áiniawai. <sup>8</sup>Nu shuarjai aneartarum. Yajauch shuar ántar yayakrumin Yus átum takasman métek akirmakchamniaiti. Antsu aneara takasakrumin Yus métek akirmakarmi.

<sup>9</sup>Ashí shuar Kristu jintíamun iniais “nankaamas nékajai” tana nu, Yúsnachuiti. Antsu Kristu jintíamun umíana nu shuar Yus Apajáisha tura ni Uchirijáisha mai tsanin pujawai. <sup>10</sup>Shuar Kristu chichamen jintíachu atumí jeen írmástaj tusa jeakui awayáwairap tura “shiir taume” tiirap.

<sup>11</sup>Kame nu shuar “shiiir taume” tákumka nu shuar yajauch jintíamu jímiareame.

### Umíamu chicham

<sup>12</sup>Ti nukap atunjai áujmatsatniun wakerajai. Túrasha ju papinium mashi áatrashtatjarme. Antsu imia wiki atumin iyakun jeátjái. Nuyá naka chichasar ti shiir warastatji.

<sup>13</sup>Ame kaim Yus achikma nuna uchirí amikmaatmainiawai.  
Nuke atí.

# JUA

## NUYÁ UKUNAM papin aar akupkamu

---

### Kayu ti penker shuaraiti

<sup>1</sup>Wi Juan Yus-shuara uuntri asan winia amikrun Kayun ju papin áateajai. Wisha ti nekas aneajme. <sup>2</sup>Aneamu yatsurú, Yusjai penker wekaakum ame wakanim penker pujana núnisañ ame ayashmisha penker atí tusan Yúsan áujtajme. <sup>3</sup>Ame nekas chicham umirman shuar juí taar ujatarmayi. Tura nuna antukan ti warasmajai. <sup>4</sup>Yus-shuar nekas chichaman umiiniakui imiá shiir enentáimtuiniajai.

<sup>5</sup>Aneamu yatsurú, chíkich Yus-shuar ti penker yayame. Kame yajaya yujainia nusha nekas yayame. Nu penkeraiti. <sup>6</sup>Nu shuar ame nekas anenamun juí taar Yus-shuar iruntramunam etserkarai. Ataksha irauwenakui atsumainiana nu súsam shiir akupkarta. Penker wáinkiumka Yus shiir enentáimtikrattame. <sup>7</sup>Nu shuar Jesukristun takarsatai tusar wekainiawai. Túrawar Yus-shuarcha ainia nuna kuítrijiai yurumátniun nakitrarmatai <sup>8</sup>ii Yus-shuartikia nii atsumainia nu ajamsatniuitji. Nekas chichaman etserainia nu, yainkiartai tusar túratniuitji.

### Tiútrepes yajauch túriniaiti

<sup>9</sup>Ashí Yus-shuar árumna nuna papin akuptukmajrume. Kame nékajai, Tiútrepes nankaamantu enentáimtumak ii tájinia nuna umiktinian nakitiawai. <sup>10</sup>Nu asamtai nuí jean ni yajauch túramun etsertuktatjai. Nii ántar ti áujmatuk tsanumprutmaji. Tura nu arantcha Yúsnan takainia nu irainiakui awayáiniatsui. Tura chíkich awayátaj tákuisha suritiawai. Tura nuyá Yus-shuarjai iruntratniun surimiawai.

<sup>11</sup>Aneamu yatsurú, nu yajauch túramu jumamkiirap antsu penker túratarum. Penker túrinia nuka Yúsnaiti. Antsu tunáa túrinia nuka Yúsan nékachuiti.

**Timitriu péñker túriniaiti**

<sup>12</sup>Imiá nekas péñker shuar asamtai ashí shuar Timitriun péñker áujmatainiawai. Iisha núnisrik péñker shuáraití tákurin nekas tájiniá nusha nékarme.

**Umíamu chicham**

<sup>13</sup>Wi ti nukap títinian wakerajme. Túrasha ju papinium mashi áatrashtatjame <sup>14</sup>wárik ítin asan. Nui jean chichasmi.

<sup>15</sup>Shiir pujustá. Juyá amikrum amikmaatmainiawai. Ii amikri<sub>sha</sub> chikichik chikichik amikmaatruata.

# JÚTAS

## papin áarar akuptukma

---

### Jútas Yus-shuaran papin áateawai

<sup>1</sup>Wi Jútas Jakupu yachintjai. Jesukrístu takarin asan ashí Yus Apa ni shuari átinian achikma ainia nuna ju papin áateajai. Jesukrístujai tsaninkiaru ásaratai Yus nin wainiainiawai niijiai kanakchatniun. <sup>2</sup>Yus ti waitnentramak imiatkinchanum tuke shiir pujustinian yainmakarti. Ti anenma asa túrati.

### Ti tunáa shuar írunui (2 Pítiur 2.1-17)

<sup>3-4</sup>Aneamu yatsurú, iikia mai metek Yus-shuar asar ju uwempratin chichaman áatratniun wakerukjarme. Túrasha ti yajauch shuar anankramawar atumín pachiinkiarmai. Niisha “Yus ti anenkartin asamtai páchitsuk tunáa túramniatiji” tuiniawai. Nu arantcha Yus in Akuptamniuncha tura ii Uuntri Jesukrístuncha nakitin áiniawai. Nu asamtai nu shuaran “yaunchu sumamawaruiti” tímiayi Yus. Tuma asamtai tájarme “Tuke Yus-Chicham yapajíashtinian ashí Yus-shuar akasmatkarat tusar susamuiti. Wátsek, kakaram ajastarum” tájarme.

<sup>5</sup>Yaunchu Uunt Yus Israer-shuaran túramia nu nékarme. Nuna atak enentáimtikratjarme. Ejiptu nunkanmaya júkiar Nin umirkacharua nuna máawarmiayi. <sup>6</sup>Nayaimpinmaya suntarsha ni pujutairin ajapa ikiukiar Yus susamun umitsuk iniaisarmiayi. Túrawarmatai Yus kiritniunam jirujai tuke jiníá sepunam apujas pujurainiawai. Tura Uunt Tsawant jeamtai súmamtikiawartatui. <sup>7</sup>Núnisan Sutuma péprusha Kumura péprusha tura tíjiuch péprusha áishmanjaisha nuwajaisha ti yajauch nuamtak tsanirmanainiakui ti tunaan penké túrachmin ana nunasha túrin áirmiayi. Túmainiakui ashí shuar ashamkarat tusa Yus amuicha jinium asutiáwarmiayi.

<sup>8</sup>Ayu. Atumín yajauch shuar ainia nu, yaunchu túrunamun enentáimtsuk tuke yajauch enentáimiainiak ni ayashin yajauch

awajmamainiawai, Yusnasha nakitiainiawai, tura ashí akupin ainia nunasha yajauch áujmatainiawai. <sup>9</sup>Antsu Mikiar, nayaimpinmaya suntara kapitiántríntiat, iwianchjají máaniak Muisaisa ayashín akasmatak “áaniumsha” tu chicharkachmiayi. Antsu áyatik “Yus írmastí” tímiayi. <sup>10</sup>Túrasha ju shuarka nékainiatsna nuna nánkamsar yajauch chicharainiawai. Tura nékainiana nuka yawá áinis enentáimtsuk áyatik nékainiawai. Tura nújajísha imia niníki yajauch emesmamainiawai.

<sup>11</sup>Maa, aneartí. Kaíní yajauchin túramia núnis tura ásar jákartatui. Tura Parama áinis kuítian ti wakeruiniak imia niníki tunaanum tsan̄kamakaru áiniawai. Tura Kurea áinis ashí akupniun nakitin áiniak kajin̄kiartatui. <sup>12</sup>Átum nuamtak anenaitiai-jisat nájankurmin nu shuar chikichan enentáimtutsuk Yusnasha ashamsuk imia niníki enentáimtumainiawai. Pen̄ké ántar áiniak yumi kíar tee ajasua núnin áiniawai. Tura nase umpuim yútutsuk nan̄kamainiawai. Árak nerektin nantutin nerechua áanin áiniawai. Tuma ásar uwemu pen̄ké jaka áanin áiniawai. <sup>13</sup>Entsa nujan̄krak saurín ajekeawai. Nu shuarsha núnisar ní natsantrín natsam̄tsuk ajekenawai. Tura yaa waakua áanin áiniawai. Tuma ásar nekas kiritniunam tuke men̄kakatin áiniawai.

<sup>14</sup>Atan̄ka tiran̄kíyayi Eruk. Ti pen̄ker Yúsnan etserin asa juna tímiayi “Uunt Yus ti untsurí ní shuaríjjají winittiawai. <sup>15</sup>Nuyá ashí shuar túrawarman nekaattawai. Tura ashí yajauch shuarnasha ti tunáa túrawarua nujaí tura Yúsán yajauch áujmatsarua nújajísha súmamtikiawartatui” tímiayi Eruk. <sup>16</sup>Nu shuarka pen̄kera nujaí waratsuk “yajauchiiti” tuiniawai. Aya ní ayashí wakeramunak wakeruiniawai. Nan̄kaamantu enentáimtumainiak chichainiawai. Tura chikich shuaran shiir chicharainiaksha aya ní wakera nuna túrutati tusa pen̄ker chichainiawai.

### Yus-shuar enentáimtikratin

<sup>17</sup>Tura atumsha, aneamu yatsurú, ii Uuntri Jesukrístu akatramurí yáunchu “aneartarum” tiarmiania nusha enentáimtustarum. <sup>18</sup>“Amúamu tsawant ishichik ajatesmatai shuar Yúsnan wishikrar nakitrartatui. Tura ní yajauch wakeramuríniak umíi pujuartatui” tiarmiayi. <sup>19</sup>Nu yajauch shuar atumín akantamenawai. Ju nun̄kanmayanak páchiniak Yusa Wakanín takakainiatsui.

<sup>20</sup>Tura átumka, aneamu yatsurú, tuke Yus nekas enentáimtusurum kakaram ajastarum. Yusa Wakaní kakarmarijjají ashí Yus seatarum. <sup>21</sup>Yus ti anenmakui ní wakera nu wakerukturum atumsha. Túrarum ní anenmamu shiir nekaattarme. Tsawant winiawai, ii Uuntri Jesukrístu in waitnentrama asa tuke shiir Nijjají pujustinian amatatji. Nu tsawant naká pujutarum.

<sup>22</sup>Mai yapají ajá ainia nu naka enentáimtikratarum. <sup>23</sup>Chíkich shuarsha jiniumiá júsatniua áitkiasrum uwemtikratarum. Tura chikichcha



ti yajauch ásarmatai anearum waitnentratarum. Tura ni pushirisha ni tunaarijiai maatra asantai mujkiatniuiti.

**Yúsan shiir awajeawai**

<sup>24-25</sup>Yus chikichkiiti. Ti nekaiti. In uwentikkiartin asa ni kakarmarijiai yainmakminiaiti tunaanum iniarchatniun. Tuma asa tunaajai máatrachu awajtamas ni ti shíirmarin ejetamtatrome. Túrutma ti waramtikramsattarme. Ii Uuntri Jesukrístu túrunamujai Yuska Niñki shiir awajsatniuiti tura nankaamantu enentáimtustiniaiti. Yáunchusha, yamaisha, tura tuke ashí akupin atí.

Núkete.

# APUKARÍPSIS

## Jesukrístu Juánkan paant iniaktusma

---

### Jesukristu paant awajsamu

**1** <sup>1</sup>Jú áarman Jesukrístun Yus ujakmiayi. Wárik túrunatta nuna ni shuarin ujakarat tusa ujakmiayi. Tuma asamtai Jesukrístu ni santarin akupak ashí winia paant awajtursamai. Wisha Juánkaitjai. <sup>2</sup>Yus timia nunasha tura Jesukrístu ujakamia nunasha tura wi ísmaj nunasha ti paant aya nekasa nuna tájai. Penké wáitratsjai.

<sup>3</sup>Jú papin áujea nu shuarsha tura núnisan juna ántana nusha nekas enentáimtuiniakka shiir ártatui. Ukunam átatna nuna ujaawai tura jeatemayi.

### Juan siati péprunam Yus-shuar írunun juna áateawai

<sup>4</sup>Wi, Juan, Asia nunkanam siati (7) péprunam Yus-shuar írunun ju papin áateajai. Yus anenma asa imiatkinchanum shiir pujustinian yainmakarti. Nu Yus tuke yaunchu pujuyayi. Núnisan yamaisha pujawai. Tura nuke winittiwai. Akupin pujutainium Yusa Wakani siati naka pujurainia nusha shiir yainmakarti. <sup>5</sup>Núnisan Jesukrístu shiir yainmakarti. Nii tana nu imiá nekasaiti. Niisha emka jakamunmaya yamaram iwiaakmajai nantakniuiti. Tura ju nunkanmaya akupniu Uuntrinti. In anenma asa ni numpejai ii tunaarin nijiatramkaitji.

<sup>6</sup>Túrutma akupin awajtamsaitji. Tura ni Apari Yúsnan pujursarat tusa anaitiamkaitji. Nii ti kakaram asa tuke shiir awajnasti. Núnisan atí.

<sup>7</sup>Wats, Krístuka yuranmijjai winittiwai. Tura íjuarmia nusha tura ashí shuarsha nuna wáinkiertatui. Túrawar ashí sapijmiainiak úutiartatui. Maa, nekas nunis átatui.

<sup>8</sup>Krístuka “yámankamtaiknumia amúamunmasha ashí nérenniuitjai, tawai. Wisha A rétranmaya Y rétranam ashí retra áintsaitjai” tawai

ti kakaram Uunt Kristu. Tuke yaunchu pujuyayi. Núnisan<sub>n</sub> yamaisha pujawai. Tura nuke ataksha winittiwai.

### Kristu ti shiir wincha ajasun Juan<sub>n</sub> wainkiamiania nu

<sup>9</sup>Wi Juan<sub>n</sub> atumjai<sub>n</sub> métek waitia asan atumí yachintjai. Núnisan<sub>n</sub> nayaimpiniam, Yus akupeana nu<sub>n</sub>, métek jeattaji. Tura katsuntrar nákastinian Jesukrístu mái métek súramji. Yus-Chichamnasha tura Jesukrístu timiancha étsereakun nayaantsa ajapén atentramunam Pátmus nun<sub>n</sub>kanam sepunam apujsamua núnisan<sub>n</sub> pujumjai. <sup>10</sup>Tumai tumin<sub>n</sub> tsawantai<sub>n</sub> Yusa Wakani<sub>n</sub> pujurtakui winia úkuruin<sub>n</sub> kakantar untsunman antukmajai. Kachu umpúamua núnis ti kakarmauyayi.

<sup>11</sup>Tura turutmiai “Wiitjai. Yámankamtaiknumiá amúamunam ashí nérenniuitjai. Wisha A rétranmaya<sub>n</sub> Y rétranam ashí retra áintsaitjai, tímiai. Tuma asantai wáinmena ju<sub>n</sub>, papinium áaram Asia nun<sub>n</sub>kanam siati péprunam Yus-shuar írunna nu<sub>n</sub> akuptukarta. Ju<sub>n</sub> peprunam akupkarta: Ipiusia, Ismirnasha, Pírkamusha, Tiatirasha, Sártissha, Piratírpiasha, tura Rautiséasha.” Tu turutmiai.

<sup>12</sup>Túrutkui yaki túruta tusan apajasan fíkman siati shirikip ikiutain kurijiai<sub>n</sub> najanamun wainkiamjai. <sup>13</sup>Tura nu<sub>n</sub> ajapén Aents Ajasua núninan wajan wáinkiamjai. Tura pushirísha nawea timiai nuntuaru entsaruyi. Emenmamkesha kúriniak netsepnum emenmamauyi. <sup>14</sup>Tura ni muuke<sub>n</sub> intiashísha murikiu uré nijiamua núnisan<sub>n</sub> tura micha núnisan<sub>n</sub> ti puju chíarayu<sub>n</sub>. Tura ni jii<sub>n</sub>sha jiya núniskeyi. <sup>15</sup>Ni nawesha ti wincha asa jiru yan<sub>n</sub>kutaku jiamua áinis néwar ajarmiayi. Ni chichamesha ti kakaram asa uunt entsa téter ajá áintsauyi. <sup>16</sup>Ni untsuurin<sub>n</sub> siati yaan takakuyi. Tura ni weneniasha puniá áinis tsakatskat mai ere awajsamu jínmiiai. Ni yapísha etsa ti etsantuk íischamnia núnisauyi.

<sup>17</sup>Nuna wáinkian jaka áintsanak naween iniaarmajai. Túrasha ni untsuurí uwejen awa<sub>n</sub>trus turutmiai, “Ashamkaip. Wiitjai. Yámankamtaiknumiá amúamunmasha tuke pujuwitjai, timiai. <sup>18</sup>Wikia tuke iwiaakuitjai. Jakamiajai tura nantakin jákashtinian tuke iwiaaku pujajai. Jákatniuncha tura jaka pujuinia nuna yawirín takakkun nérenniuitjai, timiai. <sup>19</sup>Tuma asantai wáinkiamna jusha, yamá wáinmena nusha, tura ukunam átatna nusha aartá, timiai. <sup>20</sup>Wáinmena nu júnisaiti. Siati shirikip-ikiutai kúrik wainkiam nu, siati péprunam Yus-shuar írunun nakumeawai. Tura winia untsuurin<sub>n</sub> siati yaa wainkiam nu, siati péprunmaya<sub>n</sub> Yus-shuaran wáinniun nakumenawai, turutmiai.

### Ipisiunam chícham áatramu

**2** <sup>1</sup>Nuyá turutmiai ‘Ipisiunmaya<sub>n</sub> Yus-shuaran wáinin ju<sub>n</sub> áatratá: Siati yaan untsurnum takakna nu tura núnisan<sub>n</sub> siati shirikip-ikiutai kúrinman ajapén atenta wekáa nu, tawai: <sup>2</sup>“Ashí ame túram nuna

nékajai. Ti kakaram takaakum katsunteamuncha nékajai. Yajauch shuar nawamtsuk awemaitrume. Shuar “Yus akatramuitjai” ántar tuinia nu nekaamarme. Wáitrinia nusha nékaitme. <sup>3</sup>Ti wáitayatmek katsuntram yawetsuk Winia ti takartusuitme. <sup>4</sup>Túrin áminin juna títiatjame. Yus aneakum yámankamtaik ti penker wekainiuyam núnisam túratsme. <sup>5</sup>Tuma asam ikiuknium nu enentáimpram yaunchu túriniuyam núnismek ataksha túrata. Túrachakminkia ame shiripkirmin wari jurustatjame. <sup>6</sup>Tura ju péñker túriniatme. Nikiurás shuar nakitniuitrume. Nu shuar “ayash wakeramu páchitsuk túramniaiti” tuiniakui Wisha núnisak nakitijai. <sup>7</sup>Kuíshtinia nu shuar Yusa Wakani ashí Yus-shuaran timian antukti: Nupetmakunka tuke iwiaaku pujutai numi neren yúatniun tsañkatkattajai. Nu numi Yus pujana nu j wajaawai.” Tu áartá’ turutmiai.

### Ismirnanam chícham áatramu

<sup>8</sup>Nuyá turutmiai ‘Ismirnanmaya Yus-shuaran wáinin ju áatratá: Yámankamtaiknumiá amúamunam tuke pujuwa nu tura núnisan jaka nantakmia nu, tawai: <sup>9</sup>“Ashí ame túram nuna nékajai. Ti wáitiam nunasha tura kufrinchaitmena nunasha nékajai. Antsu Yusañkia ti kufrinniuitme. Tura shuar uunt iwianch Satanása shuari áiniayat “Israer-shuaraitjai” tuñiak yajauch áujmatramena nuna nékajai. <sup>10</sup>Ti wáitsattamna nu ashamkaip. Íwianch ashí nekapramsataj tusa atumiñian sepunam enkeattawai. Nu j tias tsawant wáitsattarme. Jáakmesha tuke Yus shiir enentáimtusakminkia tawaspan nakurin susatniua nútiksanak nekas iwiaakman tuke shiir pujustinian amastatjai. <sup>11</sup>Kuíshtinia nu shuar Yusa Wakani ashí Yus-shuaran timian antukti: Nupetmakuka jimiará jákatniuka waitsashtatui.” Tu aartá’ turutmiai.

### Pírkamunam chícham áatramu

<sup>12</sup>Nuyá turutmiai ‘Pírkamunmaya Yus-shuaran wáinin ju áatratá: Puniá áinis tsakatskat mai ere awajsamun takakna nu, tawai: <sup>13</sup>“Ashí ame túram nuna nékajai. Uunt iwianch Satanás akupea nu j pujayatmek tuke shiir enentáimturmena nuna nékajai. Winia shiir umirtínian Ántipasan máawarmataisha Winia enentáimtursatin ishichkisha iniaitiuschamame. Nusha íwianch pujutainium pujakrumin túrunamai. <sup>14</sup>Túrin áminin juna títiatjame. Atumiñia shuar yaunchu Yúsnan etserin Param yajauch jintíamun tuke emetainiawai. Niisha Israer-shuaran tunáa awajsat tusa kapitían Parakan unuiniarmiayi. Nuyá Parak Yus-sutai namanken maar yúatniun Israer-shuaran jintintiamiayi. Núnisan ti tsanirmatniun jintintiamiayi. <sup>15</sup>Atumiñia shuarsha Nikiurás jintíamuncha, Wi nakitijai nuna, iniaisatniun nakitainiawai. <sup>16</sup>Wats, enentáimpram iniaisata. Túrachakminkia Wi wari winin winia wenuruia puniá jiinia nujai máaniaktajai. <sup>17</sup>Kuíshtinia nu shuar Yusa Wakani ashí Yus-shuaran

timian antukti: Nupetmakunka maná yurumkan uukma nuna ayurattajai. Nuyá kaya pújun susattajai. Nu kayanam yamaram naarí aarma átatui. Nunasha chíkich shuarka penké nékatsain aya achía nuke nekaattawai.” Tu aartá’ turutmiai.

### Tiatiranam chícham áatramu

18Nuyá turutmiai ‘Tiatiranmayá Yus-shuaran wáinin ju áatratá: Yusa Uchirí jii jijiai métek keena nu tura núnisan nawe jiru yankutaku jiamua núnis néwar ajawa nu, tawai: 19“Ashí ame túram nuna nékajai. Yus shiir enentáimtakum aneam nuna nékajai. Tura katsuntram péñker takaamna nuna nékajai. Yáunchujai nankaamas péñker túrame yamaikia. 20Túrin áminin juna títiatjame. Nu nuwá Jesapír awematsme. “Yúsnan unuiniajai” tinia Wíi shuaran ti anañkenawai. Tura ti tsanirmatniuncha tura ántar-yus-sutai namañken maar yúatniun jintintiainiawai. 21Niisha ni tunaarín enentáimiar iniaisat tusan nákasuitjai. Tura nakitiawai. 22Wátsek, sunkurmatkiakan peaknum áepsattajai. Tura chíkichcha nijiai tsanirma ainia nunasha nijiai métek ti wáitkiastatjai. Ni tunaarín enentáimiar iniaisacharmataiñkia túrattajai. 23Ni uchirincha mantúattajai. Nujai ashí Yus-shuar Wi nekas shuara enentáin nékaitjia nuna nekaawartatui. Atumniasha chikichik chikichik takasmajai métek akiktatjarme. 24Tura chíkich shuar Tiatiranmayatiram, nú chicham enentáimtuscharmena nu, “nekas iwianchnia uukma” tútaiya nu nékachu asakrumin atakka túratniun patatkashtatjarme. 25Tura Wi jeatsain takakrum nu emetatarum. 26Nupetmakunka Wi wakeraj nunak tuke initsuk túrana nuna untsurí nunkanam akupkatniun tsañkatkattajai. 27Winia Apar tsañkatrukmiá núnisnak akupkatniun tsañkatkattajai. Tura nuwe najanamu jirujai awati ijiakratniua áinis ti kakarmajai akupkattawai. 28Yáñkuam káshik jiinia nuna susattajai. 29Kuíshtinia nu shuar Yusa Wakaní ashí Yus-shuaran timian antukti.” Tu aartá’ turutmiai.

### Sártisnum chícham áatramu

**3** 1Nuyá turutmiai ‘Sártisnumiá Yus-shuaran wáinin ju áatratá: Siatí Yusa Wakanin takakna nu tura núnisan siati yaan takakna nu, tawai: “Ashí ame túram nuna nékajai. Iwiaakua áintsan wekayatmek Wíjiañkia jákaitme. 2Shintiarta. Kajinia nu umpuím ekeemakta. Kame Yusjai íisam péñker túrichuitme. 3Yus-Chicham ti shiir enentáijiai emka antukmam nu ataksha enentáimpram emetata. Tura tunaarumsha enentáimpram iniaisata. Tura iniaiyachkumñiñkia kasa núnisnak nékatsmin jeartiatjame. 4Tura Sártisnum shuar ishichik pushirí wapik máacharu pujuiniawai. Nusha ti péñker áiniak pushí pújun entsarar Wíjiai wekasartatui. 5Nupetmakuka pushí pújun entsartatui. Tura iwiaaku átinia nu papiniumiá ni naarí áarman japirashtatjai. Antsu winia

Apar tura ashí nayaimpinmaya suntar íimmianum shiir áujmattsattajai. <sup>6</sup>Kuíshtinia nu shuar Yusa Wakani ashí Yus-shuaran timian antukti.” Tu aartá,” turutmiai.

### Piratírpianam chícham áatramu

<sup>7</sup>Nuyá turutmiai ‘Piratírpianmaya Yus-shuaran wáinin ju áatratá: Ti shiir túrin tuke nekasan tana nu, uunt akupin Tawitia yawiri takaku asa uraimtai chíkich penké epenchamniaiti. Tura epenmiatai chíkich penké uraichminiaiti. Ju na tawai: <sup>8</sup>“Ashí ame túram nuna nékajai. Kakarmachuitatmek winia chichamur shiir enentáimtakum Winia initieschaitme. Tuma asakmin wáitin uratjame. Nuna chíkich penké epenchamniaiti. <sup>9</sup>Wátsek. Shuar wáitruiniak “Israer-shuaraitjai” tuíniayat uunt iwianch Satanás-shuar áiniawai. Nu shuarán, nekas ámin aneajna nuna nekaawarat tusan amíini tikishmatkiarartajai. <sup>10</sup>Katsunrata tímiaj nu, shiir umirka asakmin Wisha ti wáitsatin ashí nunkanam átatna nuyá uwemtikrattajme. Nu wáitsatniujai ashí nunkanmaya shuar nekapnasartatui. <sup>11</sup>Wárik winittiajai. Takakmena nu emetata. Akinkiatniuitmena nuna chíkich shuar atantramkiarajin. <sup>12</sup>Nupetmakunka winia Yusru jee tankirin awajsattajai. Tura nuyá penké jíinkichartatui. Tura nin winia Yusru náarin áatrattajai. Tura winia Yusru pépruri náarincha áatrattajai. Nu pépruka nayaimpinmaya yamaram Jerusarénga Yúsnumia tara núiti. Núnisan winia yamaram náarun nin áatrattajai. <sup>13</sup>Kuíshtinia nu shuar Yusa Wakani ashí Yus-shuaran timian antukti.” Tu aartá,” turutmiai.

### Rautiséanam chícham áatramu

<sup>14</sup>Nuyá turutmiai ‘Rautiséanamaya Yus-shuaran wáinin ju áatratá: Wáitruitsuk nekasa nunak tiniua nu tura núnisan ashí Yus najanamun Úuntriya nu, tawai: <sup>15</sup>“Ashí ame túram nuna nékajai. Tura michaash míchachuitme. Núnisan tsuersha tsuerchaitme. Míchaitkiumsha tura tsueraitkiumsha maak. <sup>16</sup>Kame míchachu tsuercha antsu aya tsuetsuetak asakmin imiutkattajme. <sup>17</sup>Iis, “Kuítrinniuitjai, ti irumpraitjai, warinkisha atsumatsjai” tame. Túrashashí yajauch, wáitnenmai, kuítrincha, kusuru, tura misú iyajme. <sup>18</sup>Tuma asam Winí ti shiir kuri sumakam nekas kuítrintin ajasta. Turam puju pushí Winí sumakam misú ajasma shiir entsarta. Pénker ímprataj tusam jíinium enketai enkeeta. <sup>19</sup>Aneajna nuna chichareajai. Nu asamtai kakaram ajasam tunaarum enentáimpram iniaisata. <sup>20</sup>Enentáimprata. Shuar wáitiniam wajas untsamna áintsanak Wi ámin untsúajme. Winia anturtukam ame enentáimin awaintiakminkia Wi wáintiuattajme. Tura wayan amijiai yurumáttajai. Tura amesha Wijiai yurumáttame. <sup>21</sup>Nupetmakuka akupin pujutainium Wijiai pujustatui. Wisha núnisnak nupetmaku asan winia Aparjai akupin pujutainium

pujusuitjai. <sup>22</sup>Kuíshtinia nu shuar Yusa Wakaní ashí Yus-shuaran timian antukti.” Tu áartá,” turutmiai.

### Nayaimpiniam Yúsan shiir awajenawai

**4** <sup>1</sup>Nu nankaasmatai nayaimpiniam waiti uranniun wainkiamjai. Tura nuyá kakaram unsumman antukmajai. Nuik kachujai métek kakaram chichartukma nu turutmiai “Juí yakí wakatá. Ukunam átatna nuna iniaktustajame” turutmiai.

<sup>2</sup>Nu chichamaik Yusa Wakaní akantukmiai. Túrutamtai nayaimpiniam akupin pujutainium pujan wainkiamjai. <sup>3</sup>Niisha jaspi kayasha tura kurnarínia kayasha nujai métek ti wínchayui. Akupin pujutain tuntiak téntakuyi. Nusha ismirarta kayajai métekeyi. <sup>4</sup>Chíkich paintikuatru (24) akupin pujutain nu pujutain téntakarun wainkiamjai. Tura paintikuatru uunt púju entsarainian tura kurin etsenkrakainian, nuí pujuinian wainkiamjai. <sup>5</sup>Akuptainiumiã peemsha ipiamtasha unsummasha jíniarmai. Tura nu pujutainium naka siati shirikip kearmai. Nusha siati Yusa Wakanínti. <sup>6</sup>Núnisañ nu pujutainium naka nayaantsa áanin ti saar amai.

Nu pujutainium wakenmaanísha niisháa tañku kuaru téntakar ármiai. Ukurínísha tura eemsha jíi irunmiai. <sup>7</sup>Emka tañku úunt yawaa áanniyui. Chíkichka turu uchichia áanniyui. Tura chikichcha shuara yapia áanniyui. Tura chíkichka churuwia nanamua áanniyui. <sup>8</sup>Nusha sais nanamtin ármiai. Tura jíisha ti irunainiak ashí wainmarmai. Káshisha tsawaisha tuke iniaitsuk juna tiniu armai:

“Ti nekas péñkeraiti Uunt Yus. Ashí nankaamas kakarmaiti. Tuke yaunchu pujuyayi. Núnisañ yamaisha pujawai. Tura ataksha juke winittiwai” tiniu armai.

<sup>9</sup>Tura uunt pujutainium pujana nu tuke iwiaaku pujú asamtai nu tanku ti shiir awajsar yúmiñkiak pujuriarmai. <sup>10</sup>Túruiniakui paintikuatru uunt tuke iwiaaku pujun tikishmatainiak ni etsenkrutairin naka áepruiniak tuiniawai:

<sup>11</sup>“Úuntá, ii Yúsriñme. Tuke shiir awajmainme. Ashí nankaamas kakarmaitme. Amek ashí írunna nu najanaitme. Tura aya wakerakum najanamame. Ame wakerakmin irunainiwai” tuiniawai.

### Murikkia papin urakminiaiti

**5** <sup>1</sup>Nuyá akupin pujutainium pujuya nuna untsuurín papí penuarma áanniun wainkiamjai. Nu papisha initiaanísha tura pátatkesha áarmauyi. Tura urakchamnia atí tusa siati anujtukmajai kaki peekmauyi. <sup>2</sup>Tura nayaimpinmayã suntar ti kakarma nu, ti kakantar inintran wainkiamjai. Niisha tímiai “¿Ya akupniuk ju papin kaki anujkamun

jaak urakminiait?” <sup>3</sup>Tura nayaimpinmayasha nunkanmayasha tura jakamunmayasha chikichkisha nu papin urakmin atsumiayi. Áujtsuk íistiniasha tujinkiarmai. Tímianu akupin atsumai. <sup>4</sup>Nu papin uraktincha tura áujtsatniusha, kame íistincha atsakui ti úutmiajai. <sup>5</sup>Nuyá chikichik uunt turutmiai “Ti úútíp. Israer-shuarnumiá Úunt-yawa, Jutá weeá awai. Niisha uunt akupin Tawit weeaiti. Nupetmaku asa nu papí siati anujtukman jaak urakminiaiti.”

<sup>6</sup>Nuyá uunt pujutaiya nuí tura kuaru tan kunam ajapén tura úuntnum ajapén Murik wajan wainkiamjai. Maamua áintsan ketiat iwiaakuyi. Kachurisha siátiyi. Ni jiiisha siátiyi. Nusha Yusa Wakani siati ashí nunkanam akupramua nuuyi. <sup>7</sup>Nu Murik we nekas uunt Akupniun untsuurínian nu papin achikmiayi. <sup>8</sup>Tura papin achikmatai kuaru tan kusha tura paintikuatru uunt arma nusha Murikiun tikishmatrarmiayi. Ashí uunt arpa tuntuitiain takaku armai. Tura ashí kun kuin en ketain kuri najanamun takaku armai. Nu kun kuin Yus-shuar áujsamuiti. <sup>9</sup>Ju yamaram kantancha kantampriarmai:

“Amek imiá nan kaamas akupniuitme. Amek papí achikiam anujtukmari jáakminiaitme. Yus-sutai naman kea áinis mantamna asam túramniaitme. Ashí nunkanmaya shuarnumiasha Yusna árat tusam ame numpemjai in sumakmiame.

<sup>10</sup>Turam akupin awajkartusuitme tura núnisan ii Yúsriniun pujurin awajkartusuitme. Tuma asakmin akupin ajarar ju nunkanam akupkattaji.” Tu kantamainiawai.

<sup>11</sup>Tura untsurí nayaimpinmaya suntar uunt pujutaincha tan kuncha tura úuntnasha en kekawarun wainkiamjai. Nusha nekapmarchamnia ti untsurí armia nu <sup>12</sup>kakantar tiarmai:

“Murik mantamnamia nu akupin ajar ashí kakarmancha, kuítniasha, nekaatniuncha Niñki achikminiaiti. Tura nupetmaku asamtai yuminsar Nin ti shiir awajsatin áiniawai.” Tu tiarmai.

<sup>13</sup>Núnisan ashí Yus najanamu, nayaimpiniam írunna nusha, nunkanam írunna nusha, nunká inít írunna nusha, nayaantsanam írunna nusha, tuñian antukmajai:

“Muriksha tura akuptainium pujana nusha ti shiir tura ti kakaram ásar tuke iniaitsuk shiir awajnasarti.” Tu tuiniawai.

<sup>14</sup>Tura kuaru tan kusha “Tuke núnisan atí” tiarmai. Tura paintikuatru uuntka nekas tuke iwiaaku pujá nuna tikishmatar shiir awajsarmai.

### Murikkia siati anujtukman jaakmai

**6** <sup>1</sup>Wi iyakui Murikkia chikichík anujtukman jaakmai. Túramtai chikichík tan ku ipiamtajari métek kakantar untsumon antukmajai. “Winim iitiá” turutmiai. <sup>2</sup>Túrutkui kaway pújun wainkiamjai. Nuí ekeemia nu tishimkiun takakuyi. Akuptai tawaspasha susamuyi. Tura tuke nupetmaktinian jfinkimiai.



<sup>3</sup>Nuyá Murik anujtukma jímiaran jáakmatai taṅku jímiara nu “Winim iitiá” turutmiai. <sup>4</sup>Túrutkui chíkich kawai kapaakun wainkiamjai. Nui ekeemia nuna puniá úntan susamuyi. Nusha shiir pujuscharat tusa ashí jú nuṅkanmaya shuaran máanaimtikiatniun akupkamuyi.

<sup>5</sup>Nuyá Murik anujtukma menaintiun jáakmatai taṅku menaintiua nu “Winim íitiá” turutmiai. Túrutkui kaway mukusan wainkiamjai. Nui ekeemia nusha kijin nekapmatain takakuyi. <sup>6</sup>Tura kuaru taṅku ajapénia chichaamun antukmajai. “Tsawant takamtsuk takaakmesha apatkuka penké ishichik sumakmin átatme. Tura núnisan machasha nijiamchisha amuukacharat tusam penker wáinkiaata.” Tu timiai.

<sup>7</sup>Nuyá Murik anujtukma kuátrun jáakmatai taṅku kuarua nu “Winim iitiá” turutmiai. <sup>8</sup>Túrutkui kaway yaṅkun wainkiamjai. Nui ekeemia nusha Jákatín náartiniuyi. Tura nuna úkurin Jatai nemark winimiai. Nusha ashí nuṅkanmaya shuar kuaru akankamunmaya chikichkin máatniun akupkarmauyi. Nusha mesetjaisha tsukajajisha suṅkurjajisha tura yajasmajai máawarmai.

<sup>9</sup>Nuyá Murik anujtukma séṅkun jáakmatai Yus-sutai kuṅkuin ekemtai wakenmaani íismajai. Túran Yus-Chichaman etserainiakui máawarma wakanin wainkiamjai.

<sup>10</sup>Nusha kakantar untsumainiak tiarmai “Uuntá, ti penker asam táména nu umiátsmek. ¿Urutiak nuṅká pujuinia nú shuar ii mantamnamunam yapajmiátruktam?” tiarmai.

<sup>11</sup>Tuúniakui pushí pújun susar tiarmai “Chikichcha Krístunun etserainiakui mantamnatin áiniawai. Nu náakrum ishichik ayampratarum” tiarmai.

<sup>12</sup>Nuyásha Murik anujtukma sáisan jáakmatai ti úurun wainkiamjai. Tsawai-nantusha itiurchat ajasua áintsan mukusa ajasmai. Kashí-nantusha numpá áintsan ajasmai. <sup>13</sup>Tura yaasha wampú nere nase umpuim ti majuwa áintsan kákekarmai. <sup>14</sup>Nayaimpisha papí penuara júamua áintsan menkakamai. Tura naintcha yajá apujnasarmai. Tura nuṅkasha nayaantsanam ajapén atentrainia nusha yajá apujnasarmai. <sup>15</sup>Tura jú nuṅkanam akupin ainia nusha náinnium wear kayá wáanam uumkarmai. Nijijajisha ashí shuar, uuntcha, kuítriniusha, suntara kapitíantrisha, ashí kakaram ainia nusha, tura takarniusha ankant ainia nujai náinnium wearmai. <sup>16-17</sup>Túrawar náinniasha kayancha tiarmai “Asutniátin tsawant jeayi. ¿Yaki aun katsuntrat? Nu asamtai saanakim in yutukratata. Túrarum Murik ti asutiámataj nuyásha tura akupin pujana nuyásha uukratkatá” tiarmai.

### Israer-shuarnumiá anujturma armia nu

**7** <sup>1</sup>Nu nankaasmatai kuaru nayaimpinmaya suntar, nunkaa kuaru yantamén wajan wainkiamjai. Nusha kuaru nase

kukarsha, nayaantsanmasha tura kampunniunmasha nasenkacharat tusar wajatiarmai. <sup>2</sup>Kame kukarsha tura nayaantsanmasha yajauch awajsatniun akupkamu armai. Tura chíkich suntarnasha nantu tátainmaania winian wainkiamjai. Tuke iwiaaku Yusa anujtutairin takakauyi. Nusha kuaru suntran kakantar untsuak tímiai, <sup>3</sup>“Ti Yusrí takarín ainia nu nijiaínium árar anujtatsrinín kukarsha, nayaantsasha, tura kampunniusha nasejai yajauch awajsairap” timiai.

<sup>4</sup>Tura tímiajní untsurí aara anujtukman antukmajai. Ashí Israer-shuar tuse (12) shuar weeá ainia nuyá chikichik siantu kuarenta kuaru mir (144.000) armai. <sup>5</sup>Jutá weanmayá tuse mir (12.000) anujtukma armai. Rupín weanmayasha tuse mir anujtukma armai. Kat weanmayasha tuse mir anujtukma armai. <sup>6</sup>Aser weanmayasha tuse mir anujtukma armai. Niptarí weanmayasha tuse mir anujtukma armai. Manasés weanmayasha tuse mir anujtukma armai. <sup>7</sup>Semeun weanmayasha tuse mir anujtukma armai. Riwí weanmayasha tuse mir anujtukma armai. Ísakar weanmayasha tuse mir anujtukma armai. <sup>8</sup>Sapurún weanmayasha tuse mir anujtukma armai. Jusé weanmayasha tuse mir anujtukma armai. Pinjamín weanmayasha tuse mir anujtukma armai.

### Ti untsurí shuar pújun entsararu

<sup>9</sup>Nuyá ti untsurí shuaran wainkiamjai. Ashí nunkanmayá nusháa shuaraim iruntrarú ásar nekapmarchamnia armai. Tura nusha uunt akupin pujutainium tura Muriknium naka wajaarmai. Tintiuki nukéa áaniun takaku armai. Tura ashí pújun entsaru armai. <sup>10</sup>Ashí kakantar unsumainiak tiarmai:

“Ti Yusrí uunt akupin pujutainium eketna au tura Muriksha imia Niñki Uwemtikin ániawai” tiarmai.

<sup>11</sup>Tura nayaimpinmayá suntarsha uunt akupin pujutaincha, kuaru tanuncha, tura úuntnasha téntatkar armia nu piniakum nunká tepersar Yúsán shiir awajsar <sup>12</sup>tiarmai

“Nekasaiti. Tuke iniaitsuk ii Yusrí ti shiir awajsatniuiti. Niñki ti neka, ti kakaram, ti akupin, tura ti penker asamtai tuke yuminsatniuiti. Núnisan atí.”

<sup>13</sup>Nuyá chikichik uunt inintsamai “Pújun entsaru ainia jusha ¿ya ainia tura tuyá ainia?”

<sup>14</sup>Túrutkui “Uuntá, amek nékame” tímiajai.

Tutai nii túrutmiai “Jú shuar ti waitsaru ániawai. Túrawar Murikiu numpéjai ni pushirí nijiamawar puju awajsaru ániawai. <sup>15</sup>Nuna túrawaru ásar yamaikia Yusai naka pujusar tsawajsha káshisha Yúsán ni Jeen takainiawai. Tura akupin pujutainium eketna au tuke wainkiartatui. <sup>16</sup>Yamaikia tsukajajsha kitiakjajsha wáitsachartatui. Tura etsasha sukuiniak yajauch awajsachartatui. <sup>17</sup>Murik, akupin pujutainium naka

wajana au, ni murikrin wáiniuk áyureak ti penker púkuni entsa waana nuí apuj Sartatui. Tura Yus ni neajkincha ukuitiurartatui.” Tu túrutmiai.

**Anujtukma siatia nu jaakma tura kunquin ekeemataijjai túrunamu**

**8** <sup>1</sup>Nuyá Murik anujtukma siatin jaakmatai nayaimpiniam chikichik ura jeostatuk ajapén mitia ajasmai. <sup>2</sup>Nuyá siati suntar Yusai naka wajainia nuna wainkiamjai. Nusha siati kachun susamu armái. <sup>3</sup>Nuyá chíkich suntar kunquin enketain kurijjai najanamun itiamai. Tura Yus-sútainium ayamas wajasmatai núkap kunquin sunasmai. Nu kunquin ashí Yus-shuar áuj samujai métek kunquin ekeematainiam ekeemaktiniuyi. Nu ekeematai kurijjai najanamuyi tura uunt akupin pujutainium naka pujumai. <sup>4</sup>Tura suntar ekeemakmatai kunquinia mukuintiuri Yus-shuar áuj samujai métek Yúsan amainkiamai. <sup>5</sup>Nuyá nu kunquin enketain suntar achik ekeematainmaya ji kapaan káirin áimiak ju nunkanam ukaamai. Túramtai ipiamtasha unsummasha, peemsha, tura uusha armái.

**Kachu umpuarma**

<sup>6</sup>Nuyá siati suntar kachun takakainia nu umpuartaí tusar iwiarnararmái.

<sup>7</sup>Emka suntar kachun umpuarmatai micha kákekamai. Nunasha ji numpajai pachimpramuncha nunkanam ajapawarmái. Túmakui menaintiu nakakma jeeán numincha tura ashí írunka nuí ekeemakmai. Tura ashí nunkanam chírichrin takamtsuk ekeemakmai.

<sup>8</sup>Nuyá suntar jímiara nu kachun umpuarmatai uunt naintia áanin kean nayaantsanam ajunmai. Túramtai menaintiu nakakma jeeá nayaants numpa ajasmai. <sup>9</sup>Núnisan menaint jeeá nayaantsanam matsatainia jákarmái. Tura menaint jeeá uunt kanua nu emesnararmái.

<sup>10</sup>Nuyá suntar menaintiua nu kachun umpuarmatai ti uunt yaa nayaimpinmaya kapaa kákekamai. Tura entsasha tura púkuninmasha menaint nakakam jeeánnum kákekamai. <sup>11</sup>Nu yaasha Yapá-numi náartiniuyi. Tura menaintiu nakakam jeeá entsa yapá ajasarmái. Túrunamtaí ti untsurí shuar nu entsa yapá ajasmájai jákarmái.

<sup>12</sup>Nuyá suntar kuatrua nu kachun umpuarmatai menaintiu nakakam jeeá tsawaf-nantusha kashí-nantusha tura yaasha emesnarar ajapén tee ajasarmái. Túrunawar tsawai sha káshisha menaintiu nakakam jeeánnum tsáapnircharmai.

<sup>13</sup>Nuyá chíkich suntar nayaimpiniam nanamun wainkiamjai. Nusha kakantar unsumuk timiai “Maa, chíkich menaintiu suntar umpuiniakui nunkanam pujuinia nu ti wáitsartatui.” Tu timiai.

**9** <sup>1</sup>Nuyá suntar senkua nu, kachun umpuarmatai yaan nayaimpinmaya nunká kákeran wainkiamjai. Tura nu yaan

tunáa shuar jákaru matsantai yawirín susamuyi. <sup>2</sup>Tura uraimtai nu nánkatkachu wáanmaya ti mukuint jiiñmiai uunt jiniumiá áintsan. Tura etsancha tee awajsamai, yuranmincha tee awajsamai. <sup>3</sup>Nuyá nu mukuintiumaya manchi jíntrar nunká ti yujaarmai. Tura ju nunkanmaya titínkia áinis najamin ajastinian susamu armai. <sup>4</sup>Chíríchrincha ashí arakmancha ashí numincha yajauch awajsatin suritkiamuyi. Antsu áyatik shuar nijiañium Yusa naarí áarar anujtukchamunak yajauch awajsatin armai. <sup>5</sup>Túrasha ajaktsuk senku (5) nántutin wáitkiastin susamu armai. Kame titin, shuaran ijiú, najaweá núnis najaweatin susamu armai. <sup>6</sup>Nuj shuar wari jakataj tuñniayatan jákachartatui. Ti wakeruiniayatan jákatniun tujinkiartatui.

<sup>7</sup>Manchisha ísam mesetnum weena nu kawaiya áinis armai. Kurí tawaspa áinis etsenkraku armai. Yapísha shuarna áinis armai. <sup>8</sup>Intiashísha nuwánua núnis armai. Naísha úunt yawá naiya núnis armai. <sup>9</sup>Netsepén namaka saepea áinis jiru péeramu armai. Tura nanamenaksha kaway karu japiiniak mesetnum tsékeena núnisan téter ajarmai. <sup>10</sup>Ujukésha titínki ujukea áinis asa janke ajakin armai. Nujai tuke senku nantu yujarsar shuaran fjuar wáitkiastin armai. <sup>11</sup>Ni uuntrísha nánkatkachu wáa uraimia nuyaiti. Nusha Israer-chichamjai Apatún tutainti. Tura Kriaku-chichamjainkia Apuriún tutainti. Nuka Yajauch Awajkartin tawai.

<sup>12</sup>Jujai emka wáitsatin nankaamasai. Túrasha tuke jímiar taasai.

<sup>13</sup>Nuyá suntar saisa nu kachun umpuarmatai chichaman antukmajai. Yusai naka kunkuin ekeemaka Yus-sutai kurimpramu amai. Tura ni kuartru yantame kachu jiiñmiai. Tura nuyá chichaak <sup>14</sup>suntar kachu takakun saisa nuna timiai “Kuartru suntar Eupratis kanusá pujuinia nu atiram akupkarta.” <sup>15</sup>Túramtai nu kuartru suntar wear menaintiu nakakam untsurí shuaran maatai tusar weriarmiayi. Kame nuna túrawarat tusar ikiusma armai. Tura nu uwitin, nu nantutin, nu tsawantin, tura nu úratin atíatin ikiusma armai. <sup>16</sup>Tura suntarnasha kawainium eketainian wainkiamjai. Tura timiá untsurí nekapmarchamnia asamtai aya númirurín antukmajai. Nusha jimiará siañtu miyun (200.000.000) armai.

<sup>17</sup>Tura ímiamunam suntarnasha kawaincha júnisan wainkiamjai: Eketainiaka netsepnum jirun entsaru armai. Nusha kapaaku winkia tura yanjú armai. Tura kawaiya úunt yawáa muuke áinin armai. Tura ni wenyasha jisha, mukuintiusha, asuprisha ti tsuer keá nu jíiniarmai. <sup>18</sup>Nu menaintiu ti yajauch wáitsamujai menaintiu nakakam shuar untsurí jákarmai. Jijiaísha, mukuintiujaísha, asuprijiaísha jákarmai. <sup>19</sup>Nujai nu kaway ni wenejai shuaran wáitkiasarmai. Tura ni ujuké napí múukeya áinin áрмаi. Nújaísha shuaran wáitkiasarmai.

<sup>20</sup>Tura nujaiísha jákacharmia nú shuar tuke tunáa túratniun iniaisacharmai. Tura yajauch wakanniasha tura ántar-yusnasha

tikishmatratniun iniaisacharmai. Nu ántar-yus kurijiaisha, kuítjaisha, jiru yan\_kutakujaiisha, kayajaiisha, numijiaisha najanamu ásar wainmaktinniasha, antuktinniasha, tura wekasatniuncha tujintiainiawai. <sup>21</sup>Núnisan man\_kartuatniuncha, wawekratatniuncha, tsanirmatniuncha, tura kasamkatniuncha iniaisacharmai.

### Papichin suntar takusmia nu

**10** <sup>1</sup>Nuyá chíkich kakaram suntar nayaimpinmaya táarun wainkiamjai. Nusha yura\_kim amúámu tura múuknum tuntíak téntakmauyi. Yapisha etsajai métek wínchauyi. Tura kujapésha ji keá áintsan\_keyi. <sup>2</sup>Nusha papin urak takakauyi. Tura imiá uunt asamtai ni nawé untsuurnumaní nayaantsanam tura menaaríní kukar tarimias wajasmai. <sup>3</sup>Tura úunt yawa kakar shiniak chicháa áinis ti kakaram untsumkamai. Nujai siati (7) ipiamtasha chichasarmai. <sup>4</sup>Nii chichasarmatai ni chichamen áartiniujai tura nayaimpinmaya chichartak “Áaráip, túrutmiai. Juka nekanashti” túrutmiai.

<sup>5</sup>Tura nuyá, suntar nayaantsanmasha tura kukarsha tarimias wajama nu ni uweje untsuurín nayaimpinmaaní takuimiai. <sup>6-7</sup>Tura timiai “Peñké ishichik ajasai. Suntar siatia nu umpúakuinkia Yus ashí yaunchu enentáimpramia nu uminkiatawai. Emka ujatsuk ukunam ni shuarín Yúsnan etserniua nuna ujakmiayi.” Tu timiai. Nuyá chichaak:

“Yus tuke iwiaaku pujawai. Tura imiá kakaram asa nayaimpincha, nun\_kancha, nayaantsancha, tura ashí nuí írunna nunasha najanaiti” timiai.

<sup>8</sup>Nayaimpinmaya “áaráip” túrutmia nu ataksha chichartak turutmiai “Suntar nayaantsanam tura kukar tarimias wajana nu weritiá. Turam ni untsuuríní papin urak takakna nu achiktá” turutmiai. <sup>9</sup>Nuyá túrutkui werin papichin seamjai.

Tura surak turutmiai “Papái. Yuátá. Tura yúamka ti yumin átatui. Tura antsu wakeminkia yapamprattame” túrutmiai. <sup>10</sup>Nuyá papichin suntarnumiá jukin yuamjai. Tura nii turutmia núnisan wenuruinkia ti yumin nekapramjai. Tura antsu yuan wakeruinkia yapampramjai.

<sup>11</sup>Tura nuyá turutiarmai “Waketkim ataksha ashí nun\_kanmaya shuaran tura ni kapitíántríncha Yus tana nu ujakartiniaitme.” Tu túrutmiai.

### Jimiará shuar Yusaiya akupkamu

**11** <sup>1</sup>Nuyá karisun nekapmatia áaniun surus turutiarmai “Weme Yusa Uunt Jee nekapmartá. Túram namañ-maa-Yus-sutaisha nekapmartá. Tura nuí Yúsán shiir awajeena nusha nekapmartá. <sup>2</sup>Antsu jea áarínkia yajaya shuar susamu asamtai nekapmatsuk ikiuktiá. Nu shuar ti shiir péprun Jerusaré\_nkan kuarentitús (42) nantu nuí akupeenak mash yajauch awajsartatui. <sup>3</sup>Túruiniakui Wikia Wii-shuaran jímíaran

akatran akupkattajai. Nusha chikichik mir jimiará siantu sesenta (1.260) tsawant pujusar Winian etserkartatui. Nuka menaintiu uwí nankaamasaiti. Úutkur-entsatai pushin entsaru ártatui.” Tu turutiarmai.

<sup>4</sup>Nu jímiar shuarsha nayaimpiniam nakumkamu ániawai. Uriuiu numisha jímiar tura shirikip ekeemataisha jímiar nayaimpiniam awai. Nusha ju núnká Uuntri Yusaí wajainiak, jímiar akatramua nú shuaran nakumainiawai. <sup>5</sup>Shuar nin yajauch awajsataj tutai ni weneniá jinia jíiki nemasri ashí áesatniuiti. Núnisanñ nin yajauch awajsatniun wakera nuka jákartatui. <sup>6</sup>Nu aentska Yúsnan áujmatainiak yumi yutukaip títinian kakarman takakainiawai. Núnisanñ entsancha numpa awajsatniun kakarman takakainiawai. Tura ashí yajauchia nujai aentsun wáitkiastinian takakainiawai. Nuna ashí ni wakeruinia nui páchitsuk túramin ániawai. <sup>7</sup>Tura ni takatrin umikiarmatai Ti Kajen Yajasma nánkatkachu waanmaya jíinia nu mesetan najata nupetak máawartatui. <sup>8</sup>Tura iwiarnatsuk ni ayashi uunt pepru jintiin ajapén tepeartatui. Nu péprunmasha ii Uuntri Jesukrístuncha máawarmiayi. Nu péprunmaya shuar tuke tunaan túrin ásarmatai Ejiptu tuíniak tura núnisanñ Sutuma tuíniak nu péprun páchiiniawai. <sup>9</sup>Tura menaintiu tsawant nuyá nankaamas ashí núnkanmaya shuar jaka tepan ísar iwiarnascharti tiártatui. <sup>10</sup>Nu jákarmatai ashí núnkanam pujuinia nú shuar ni jakamun ti wararainiak mai sunai ajartatui. Kame nu jimiará aents Yúsnan áujmatenak ashí shuaran wáitkiasaru ásarmatai ti warasarmai. <sup>11</sup>Nuyá menaintiú tsawant nuyá nankaamas jaka tepesarmatai Yus ataksha iwiaaku awajsarmai. Tura nantakiarmatai nuyá shuar nin wainkiar ti ashamkarmai.

<sup>12</sup>Nuyá nu nantakiaru nayaimpinmaya kakaram unsumman antukarmai: “Jui yakí wakatarum.” Tu unsummiai. Tutai ashí ni nemasri íimiainiain yurankim amuam nayaimpiniam wákarmai. <sup>13</sup>Túmainiai ti úurkamtai tias nakakam jeeá pepru saanakmiai. Tura siati mir (7.000) shuar jákarmai nu uujai. Chíkichkia sapijmiainiak Yus nayaimpiniam pujana nuna shiir awajsarmai.

<sup>14</sup>Jímiar wáitsatin nankaamasai. Chikichik ajasua nu túrunatin ishichik ajasai.

### Suntar siatia nu kachun umpuarmai

<sup>15</sup>Nuyá suntar siatia nu, kachun umpuarmatai chícham kakaram chichainian nayaimpinmayan antunkamai. Juna tímiayi:

“Yamaikia ii Uuntri Yus tura ni Anaikiamu Kristu ashí shuaran akupin ajararai. Niisha tuke amutsuk akupkartatui.”

<sup>16</sup>Nuyá paintikuatru uuntka akupin pujutainium Yusaí naka pujuarmia nu piniakum tepersar Yúsan shiir awajenak tiarmai:

<sup>17</sup>“Uunt Yusaí, ti kakaram asam Ámijiai tujinkiatin atsawai.

Yáunchusha, yamaisha, tura tuke amuutsuk iwiaaku pujuwitme.

Ame ti kakarmarmijiai nekas akupkatin juarme yamaikia. Tuma asakmin yuminsajme, tiarmai. <sup>18</sup>Ashí shuar kajertamkaru aijn yamaikia amesha kajerkatin tsawant jeayi. Jákarusha iniantkim ni túramurí ísartatme. Turam amée shuarka shiir etserturmakua nusha, tura Aminiak enentáimturmasarua nusha, tura Ámin shiir awajtamsarua nusha ashí mash ti shiira nuna súakum akiktatme. Antsu ju nunkan emesniuka ashí emesratniunam akupkattame.” Tu tiarmai.

<sup>19</sup>Tuñiakui Yusa Uunt Jee nayaimpiniam ana nu uranmiatai wakenmaani Chícham Aarma Chumpitai paant amai. Túrunamtai peemsha, ipiamtasha, cháarpisha, uusha amai tura michasha ti kakekamai.

### Nuwasha tura Ti Kajen Yajasmasha

**12** <sup>1</sup>Nuyá nakumkamu ti enentáimpramnia nayaimpiniam wantinkiamai. Nuwá etsajai penuarma wantinkiamai. Nawesha nantunam ekeemai. Tura múuknum tuse yaan etsenkrakuyi. <sup>2</sup>Nu nuwá jamtin asa jurertaj tusa wátiak ti kakantar uutmiai.

<sup>3</sup>Tumai ataksha ti enentáimpramnia nayaimpiniam wantinkiamai. Ti Kajen Yajasma kapaaku wantinkiamai. Muukesha siati asa siati akuptai tawaspan etsenkraku ármai. Tura kachurísha tíasauyi. <sup>4</sup>Menaintiu nakakam jeeán yaan ni ujukéjai japiki akakermai. Tura nunká utsamai. Nu Ti Kajen Yajasma nu nuwá jatema nuí wajasmai. Júermataik yuruataj tusa wajattsamai. <sup>5</sup>Tura nuwasha áishmankan jurermai. Nu uchi uunt ajas ashí nunkanam ti kakaram akupkatin asa, nu uchi akupin pujutanium Yus pujana nuí junakmiai. <sup>6</sup>Tura núwaka atsamunam pisarmai. Nuí pujustinian Yus iwiarturmai. Tura chikichik mir jimiará sianu sesenta (1.260) tsawant ayurnat tusa akupkamai. Nuka menaintiu uwí nankaamasaiti.

<sup>7</sup>Nuyá nayaimpiniam meset amai. Nayaimpinmaya suntara kapitiantri Mikiar ni suntarijiai Ti Kajen Yajasmajai máanaikiarmai. Ti Kajen Yajasmasha ni suntarijiai ti máanaikiarsha <sup>8</sup>nupetmakcharmai. Túramtai nayaimpinmaya jiki akupkamuyi. <sup>9</sup>Núnisan Ti Kajen Yajasma ashí ni suntarijiai nunká akupnakmai. Nu Yajasmasha iwianchi kapitiantri Satanás tutainti. Yáunchuya-napiiti niisha. Ashí nunkanmaya shuáran ananniuiti.

<sup>10</sup>Nuyá nayaimpinmaya kakaram unsumman antukmajai. Tura timiai:

“Uunt iwianch ii yachin yajauch áujmatin jiki akupkamu asamtai yamaikia ii Yusri uwemtikratniusha tura ni kakarmarin iniakmasticha tura akupkatniusha jeayi. Anaikiamu Krístusha ashí akupin ajastinch a jeayi. Tura uunt iwianch ii yachin tsawaisha káshisha iniaitsuk Yusai yajauch áujmatniua nuna <sup>11</sup>íksan ii yachi nupetmakarai. Yus-susamu murikiu numpea

áinis Jesukrístu numpejaj nupetmakarai. Niisha jákatnuiutkiusha surimiatsuk nekas-chichaman páchitsuk etserkarmai. Nujajsha uunt iwianchin nupetkarmai. <sup>12</sup>Tuma asamtai nayaimpiniam pujarmena nusha warastarum. Antsu nunká tura entsá pujarmena nusha uunt iwianch atumin tarutmarmatai, maa, waitentajrume. Ni tsawantri ishichik ajatesman nekáa ti kajekuiti.” Tu timiai.

<sup>13</sup>Nuyá Ti Kajen Yajasma nunká ajapna nuwá áishmankan jurerma nuna áintraimai. <sup>14</sup>Turakuí nuwan uunt nanapen churuwia nanapea áinis sunasmai. Nujaj nanamuk yáunchuya-napiya pizar atsamunam wemai. Tura ni ayuratniunam menaintiu uwí nuyá sais nantu pujusmai. <sup>15</sup>Nuyá nu napi ni weneya entsá jiki nujan\_krumamai nuwan ajekrataj tusa. <sup>16</sup>Túrasha nunka nuwan yayak nakaak nu entsan mash ukuyámai. <sup>17</sup>Túramtai nuwan ti kajerak ni weeá chíkich írunka nujaj máaniaktaj tusa wemai. Nu shuarsha Yus akupkamun umirainiak Jesusan ti shiir áujmaténakuí, nijijai máaniaktaj tawai.

### Nuyá Yajasma jímiara nu

**13** <sup>1</sup>Nuyá nayaantsa káanmatkariin wajasan nayaantsanmaya Yajasma jiniun wainkiamjai. Muukésha siátitiat kachuri tias tura akuptai tawaspasha tias armai. Ashí muuken Yúsan yajauch chicharin tu áarmauyi. <sup>2</sup>Nui wáinkiamaj nu Yajasma nekas uunt yawáa áinniuitiat nawenka chaj nawea áinniuyi. Wenésha nekas kajen yawáa áinniuyi. Tura Ti Kajen Yajasma Entsaya Yajasma ni kakarmarincha tura ni akupkatniuríncha susamai nujaj ti kakaram akupkati tusa. <sup>3</sup>Entsaya Yajasma muuké chikichkin jakamnia awatmian wainkiamjai. Túrasha pénger awajnasmai. Túramtai ashí nunkanmaya shuar nuna físar ti enentáimturar nemarsarmai. <sup>4</sup>Túrawar nin tikishmatrar shiir awajsar “¿Yaki jujajsha jeá. Imiá kakaram asamtai yaki nijijai máanaikminiait?” tiarmai. Tura Ti Kajen Yajasma ni kakarmarin Entsaya Yajasma susa asamtai ashí shuar nincha tikishmatrarmai.

<sup>5</sup>Núnisan nu Entsaya Yajasma waantu enentáimtumak Yúsan yajauch chicharkatniusha tsankatnakmai. Tura kuarentitús (42) nantutin kakaram akupkatniun sunasmai. <sup>6</sup>Núnisan túrak Yúsan yajauch áujmatuk ni náarincha ni Jeecha tura ashí ni shuari nayaimpiniam pujuinia nunasha katsekkarmai. <sup>7</sup>Tura Yusna ainia nujaj mesetan najana nupetkatniun tsankatnakmai. Tura ashí nunkanmaya shuaran akupkatniun tsankatnakmai. <sup>8</sup>Túramtai ashí shuar tuke iwiaaku átinia nu papinium ni naari yámankamtaiknumia anujkamú atsúarma nuka nu Yajasma tikishmatrarmai. Nu papincha Murik jaka nantakmia nu takakuí.

<sup>9</sup>Shuar juna ántakka enentáimprati:

<sup>10</sup>“Shuaran emetá juinia nusha emetnattawai.

Núnisan shuaran nan\_kijiai mainia nusha nan\_kijiai mantamnattawai.”



Tuma asamtai Yajasma mesetan najanamtai Yus-shuar Yus iistí tusar tuke enentáimtusar katsuntsar pujustin ániawai.

<sup>11</sup>Nuyá chíkich Yajasma kukariá wáakun wainkiamjai. Nusha murikiu ánin jimiara kachurtiniuyi. Tura Ti Kajen Yajasma ánis kakaram chichaakuyi. <sup>12</sup>Niisha Entsaya Yajasma kakarmarin súam akupniuyi. Tura ashí nunkanmaya shuaran “Entsaya Yajasma penké jaa tsuarma nu, shiir awajnasti” tímai. <sup>13</sup>Núnisan shuarti túrachminian ti turin asa ashí shuar ímiainain nayaimpinmaya jinia nunká ajuarmai. <sup>14</sup>Tura Entsaya Yajasma súam aents túrachminian ti turak ashí nunkanmaya shuaran anankawarmai. Túrak Entsaya Yajasma nakumkamurin najanawarat tusa akupkamai. Túramtai puniajai penké jakamnia awatmia penker ajasma nuna nakumkamurin najanawarmai. <sup>15</sup>Kukariá Yajasma kakaram sunasmai. Nujai Entsaya Yajasma najanamun iwiaaku awajsatniua ántsan ichachkiamai. Túram ashí níniak shiir awajeacham máatniun susamai. <sup>16</sup>Nu arantcha ashí shuar anujmampararat tusa akupkamai. Uuntcha uchisha kufrinniusha kufrinchasha ankantcha ankantchasha ashí ni nijaiincha tura wakerakka untsuurincha anujtuktiniuyi. <sup>17</sup>Entsaya Yajasma náarin tura wakerakka ni náari númerurin anujtuktiniuyi. Túrachuka sumatnasha sumakchamniuyi, surutnasha surukchamniuyi. <sup>18</sup>Wats, wi tájana ju nekaatniuka ti nekas enentáimtustiniaiti: Entsaya Yajasma númeruri áishmanka númeruri asa sais sianu seséntisáisaiti (666). Ashí ti neka ania nú shuar Entsaya Yajasma númerurin nekapmar nin nekaati.

#### 144.000 shuar Yúsán kantampruawarma

**14** <sup>1</sup>Nuyá Murikiun Seun náinnium wajan wainkiamjai. Níjiaisha sianu kuaréntikuátru mir (144.000) shuar wajaarmai. Nusha nijai Murikiu náarincha tura ni Aparí náarincha anujtukma aarmai. <sup>2</sup>Ti untsurí árgan nayaimpiniam túntuiniak teer awajenak kanusa uuntri nujanrak téter ajá núnisan antukmajai. Ti kakaram ipiamta núnis amai. <sup>3</sup>Nu tuntuiyamujai sianu kuaréntikuátru mir shuar akupin pujutainium naka wajasar yamaram kántan kantamáwarmai. Niisha kuaru tankunmasha tura paintikuatru uuntnumsha naka wajasar kantamáwarmai. Nu kántanka chíkichka nekaachmin armai. Aya nu sianu kuaréntikuátru mir shuarka jú nunkanmaya shuarnumiá uwempraru ásar nu kántan kantamiarmai. <sup>4</sup>Nu shuarsha nuwajai yajauch ajascharu ásar ti shiir ániawai. Túrawar Murik weana nu nemarainiawai. Ju nunkanmaya shuarnumiá uwempraru ásar matai Yussa tura Muriksha ti shiir enentáimtiarmai. Niisha emka juukma ti shiira núnisan armai. <sup>5</sup>Nu shuar penké wáitruachu ásar Yúsajsha ti shiir tunáa máatrachu armai.

#### Menaintiu suntar chichaman etserainiawai

<sup>6</sup>Nuyá nayaimpiniam suntar nanamun wainkiamjai. Nusha uwempratin chicham tuke amuukashtinia nuna ashí nunkanam pujuinia nú shuaran

ujakartiniuyi. <sup>7</sup>Nusha ti kakantar untsumuk timiai: “Yus ashamkatarum. Niñki shiir awajsatarum. Yamaikia ashí shuaran súmamtikiawartin tsawant jeayi. Nayaimpincha nunkancha nayaantsancha ashí entsancha najana asamtai shiir awajsatarum.”

<sup>8</sup>Nuyá chíkich suntar, jímiara nu, taa timiai: “Pai, Uunt Papirúnia pépruka penké meserai. Niisha tuke tsanirmaua núnisan ashí shuaran anampratniua núnisan utsuurmai. Tuma asa niisha nú shuarjaj nupetnak tuke emesnarai.”

<sup>9</sup>Nuyá chíkich suntar, menaintiua nu, taa timiai: “Shuar Entsayá Yajasmancha tura ni nakumkamuríncha shiir awajeakuínkia tura nijjainiumsha uwejniumsha ni naari anujtukmaitkuínkia <sup>10</sup>Yus nin kajerak ti asutiáttawai. Yapá pachimprachman áartinia áintsan ti kajer kattawai. Túramtai asupri ti tsúer keá nujaj jinium wáitsartatui. Yusa suntari tura Murik íimmianum apenáwar jinium wáitsartatui. <sup>11</sup>Ni wáitsatniuri ji esaak kajintsuk tuke mukuintia nuniskete. Entsayá yajasman tura ni nakumkamurin shiir awajeenak ni naari anujmamainia nuka tsawajsha káshisha ayamtsuk wáitsartatui. <sup>12</sup>Nu asamtai ni chichamen umirainiak Yusna ainia nuka Krístun ti shiir nemarainia ásar nu tsawantai itiurchatnum pujuiniak katsuntratin áiniawai.”

<sup>13</sup>Nuyá nayaimpinmayá chichaman antukmajai. Nusha turutmiai “Ju áatratá: “Uunt Jesusan umirainia nu yamá jakarusha tura ukunam jakarusha ti shiir pujusartatui.” Tu aartá” timiai.

“Núnisan Yusa Wakaní tawai. “Eta, ti takasaru ásar jakar yawerman ayamprartatui. Tura ti penker túrawar akinkiartatui” tawai” turutmiai.

### Jú nunkanam arakma juukma

<sup>14</sup>Nuyá yuran kim pújun wainkiamjai. Tura yuranminiam Aents Ajasua nuna eketun wainkiamjai. Akuptai tawaspan kurijjaj najanamu etsenkrakuyi. Tura machitian éren takakuyi.

<sup>15</sup>Tura chíkich suntar Yusa Uunt Jeenia jiinki yuranminiam eketun kakantar chicharuk tímiai “Árak júuktin tsawant jeayi. Machitrumjaj tsupiram juuktá.” <sup>16</sup>Tutai yuranminiam eketu ni machitrijjaj nunká arakman tsupir juukmai.

<sup>17</sup>Nuyá chíkich suntar Yusa Uunt Jee nayaimpiniam ana nuyá jíinkimiai. Niisha ni machitri éren takakuyi. <sup>18</sup>Tura chíkich suntar naman maar Yus-sútainmayá jíinkimiai. Niisha jinia wáinniuyi. Tura máchit ti éren takakun kakantar chicharuk timiai “Machitrum ti érea nujaj uwa nunká arakma nu tsupiram juuktá. Mash tsamakarai.” <sup>19</sup>Tutai suntar ni machitrijjaj ashí nunkanmayá uwa neren tsupir juukmai. Tura neketainiam chumpiamai. Nu neketai Yus ti kajerak shuaran ti asutiátt nuna nakumeawai. <sup>20</sup>Tura uunt péprunmayá arantach ijiurarmai. Tura neketainmayá numpa jíinkimiai. Nu numpa tres siantu (300) kirumitrua nu pajamar kawayu nujjaj métek ajasmai.

**Nayaimpinmaya suntar amúamunam wáitkiastinia  
nuna pininnumiān ukainiawai**

**15** <sup>1</sup>Nuyá ashammain ti enentáimpramnian nayaimpiniam wainkiamjai. Siati suntar amúamunam wáitkiastinia nuna takusarmai. Nujai ju nunkanam yajauch shuáran ti wáitkiasar Yus kajeamun umirtatui.

<sup>2</sup>Nuyá antumianka áiv 20 Tura uunt péprunmaya aranntsān ti saar jijiai pachimpramun wainkiamjai. Ni káanmatkarincha Entsayā Yajasman tura ni nakumkamurincha nupetkarma nu nui wajaarmai. Tura nin arpa tuntuitiain Yus súsarmai. <sup>3</sup>Túramtai kantamáwarmai. Yusa yaintri Muisaisa kantarincha tura Murikiu kantarincha kantamainiak tiarmai:

“Uuntá, ashí tujinchaitme. Ti penker tura ti enentáimturmin ashí najanaitme. Ashí Uunt Akupin asam ashí nekasa nu túrasha péñkera nu túriniaitme. <sup>4</sup>Uuntá, ¿yaki ashampramkachat<sup>i</sup>. Tura yaki ti shiir awajtamsachat<sup>i</sup>? Aya Amek ti shiir tunaarinchaitme. Ashí nunkanmaya shuar ame ti shiir túramun wáinkiár Aminiak jeartamar ti shiir awajtamsartatui.”

Tu kantamáwarmai.

<sup>5</sup>Nuyá atak Yusa Uunt Jeēn ísan, Ti Shiir Tesaamun uranniun wainkiamjai. <sup>6</sup>Tura Ti Shiir Tesaamunmaya siati suntar siati wáitkiastinjai jínkiarmai. Niisha ti shiir pújun entsaru armai. Netsepnumsha kurin emenmama armai. <sup>7</sup>Nuyá kuaru tanġunmaya chikichik kurí pininġian súsarmai. Nu pininġ tuke iwiaaku Yusa kajetairijiai piaku armai. <sup>8</sup>Tura Yusa kakarmari ti ashammai Ti Shiir Tesaamunam mukuintiua núnis piakmai. Túramtai nu siati suntar wáitkiastinian ukarar amuiniatsain Yusa Jeēn wayachminiuyi.

**Wáitkiastin pininġ ukararma**

**16** <sup>1</sup>Nuyá Imiá Shiir Tesaamunmaya ti kakaram chichaamun antukmajai. Nusha siati suntaran tiarmai “Nunká werum Yusa kajetairi siati pininnum ana nu ashí ukartarum.”

<sup>2</sup>Tutai emka suntar we, pininnumiā kukar ukarmai. Túramtai ashí shuar Entsayā Yajasma náarin anujmamprar ni nakumkamurin shiir awajiarma nuna ti najamin kuchap jiintiurarmai.

<sup>3</sup>Nuyá chíkich suntar jímiaara nu, we Yusa kajetairin nayaantsanam ukarmai. Túramtai nayaants jakáa numpéa áinis ajasmai. Tura ashí nui pujuinia nu kajinġkiarmai.

<sup>4</sup>Nuyá suntar menaintiua nu, entsanam tura púkuninmasha ukarmai. Túramtai ashí numpa ajasarmai. <sup>5</sup>Nuyá suntar entsá wáinniua nuna chichamen antukmajai. “Uuntá, amek ti penker Yus asam jútikiame. Yáunchusha tuke pujú asam ti shíraitme. <sup>6</sup>Iis, nu shuar amée shuárumincha

tura ame chichammin etserniuncha máawar ni numpen ukatraru ásarmatai Amesha núnismek numpa áarume. Maa, páchitsuk áitkianatin áiniawai.”

<sup>7</sup>Tutai naman-maa-Yus-sútainmaya chichaman antukmajai. “Eta, Uuntá. Nekas kakaram asam ashí ti tujinchaitme, Nekas túratniau nu ti penker túrin asam nu shuar túramujai métek akiritme, timiai.”

<sup>8</sup>Nuyá suntar kuatrua nu, tsawai nantunam ukarmai. Túramtai jijiai shuáran esaamujai wáitkiastin kakaram sunasmai. <sup>9</sup>Tura shuar ti sukuám wáitiarmia nu, nu wáitkiastinian nérenniun Yusan yajauch chicharkarmai. Tura ni tunaarín enentáimtsuk Nin shiir awajsatniuncha penké nakitrarmai.

<sup>10</sup>Nuyá suntar senkua nu, Entsaya Yajasma akupin pujutairín ukarmai. Túramtai ni nunkeen ashí kashi ajasmai. Tura shuar ti najaimiainiak iniaíncha esamiarmai. <sup>11</sup>Tura nújajisha yajauch túratniuncha iniaisacharmai. Antsu kuchapríjajisha tura ti najaimiainiak wáitiainiak nayaimpinmaya Yúsan ti yajauch chicharkarmai.

<sup>12</sup>Nuyá suntar saisa nu, Eupratis entsanam ukarmai. Túramtai kuyuámai. Nujai nantu tátainmaaniá akupin taarti tusa jintiamnamai.

<sup>13</sup>Tura nuyá juna wainkiamjai. Ti Kajen Yajasma weneyasha, Entsaya Yajasma weneyasha tura núnisan penké Kukariá Yajasma ántar yúsnan etserniua nuna weneyasha puachia núnin yajauch wakan menaint jiniarmai. <sup>14</sup>Íwianch áiniak aents tujintiamun túruiniak ashí nunkanmaya akupniun irurarmai. Ti Tujincha-Yusaj ni uunt tsawantri jeamtai mesetan najanatai tusar weriarmai. <sup>15</sup>(Yamáí Kristu “Aneara pujustarum, tawai. Nékachmanum kasa núnisnak jeattajai. Kánutsuk tuke iwiarnar pujak ni entsatairín penker wáinia nú shuar ti shiir átatui. Misuchu asa natsaarchattawai.” Tu tawai.)

<sup>16</sup>Tura yajauch wakan uunt akupin áinian Armajetún nunkanam irurarmai. Israer-chichamnum nu nunka tu anaikiamuiti.

<sup>17</sup>Nuyá suntar siatia nu, nasenam ukarmai. Túramtai nayaimpinmaya Yusa Uunt Jeeniá ti kakaram chicham Yus akupin pujutainmaya chichaak “Mash uminkiai” timiai.

<sup>18</sup>Tura nuyanka peemsha, chárpisha, ipiamtasha ajamai. Tura nunkasha ti kakaram úrkamai. Maa, aents jú nunkanam yámankamtaik pujuarmia nuyá júnis úrkamuka atsuwiti. <sup>19</sup>Ti Uunt Péprusha menaint nakantramai. Ashí nunkanmaya péprusha saanakiarmai. Nujsha Yus ti kajerak Papirúnia pépruncha kajinmattsuk ni kajetairín yapá umutaia áintsan aarmai. <sup>20</sup>Entsá ajapén atentrasha tura murasha menkaramai. <sup>21</sup>Núnisan nayaimpinmaya uunt kaya núnisan micha kákeramai. Ti uunt áiniak kintiarjai métek kijin armai. Shuarsha nujai ti wáitiainiyatan áyatik Yúsan yajauch chicharkarmai.

### Tsanirmatai nuwá asutiámu

**17** <sup>1</sup>Nuyá siati suntarnumiá chikichik taruti turutmiai “Winitiaí. Tsanirmatai nuwá ti asutiátniun iniaktustatjame. Nu nuwá

nayaantsanam uku eketui. <sup>2</sup>Ashí ju nunkanmaya akupin niijiai tsanirmawaru ániawai. Núnisan ashí ju nunkanmaya shuar, nu nuwa tsanirmatniun tsankateam, nijiamanch umartinia áintsar niijiai ti yajauch túrawar nampekarmai.” Nuna taku Yusnumia kanaktinian nakumkamai. <sup>3</sup>Nuya mesekranam kampuntin atsamunam jurukmiai. Tura nuí Yajasma kapaakunam nuwa eketun wainkiamjai. Nu Yajasma masha ashí Yúsan yajauch chichareamu átramuyi. Muuke siátitiat kachuri tiásauyi. <sup>4</sup>Nu nuwasha tarachin yamakai kapaakujai sha ti shiir iwiarmamar entsaruyi. Kurijai sha, shírmach kayajai sha, ti shiir sháukjai sha iwiarmampruyi. Kurí pininkian mujmiainniasha tura ashí ni tsanirmatairi imiá yajauch armia nunasha piakun ajaamak takakauyi. <sup>5</sup>Nijia iniumsha ni naaria áintsan yúpichuch nekaachminia nu júnis áarmauyi: UUNT PAPIRÚNIA, Ashí Tsanirmauncha tura Ashí Ju Nunkanam Mujmiainian Túrinia Nunasha Nukurinti. <sup>6</sup>Nu nuwasha Yus-shuar Krístunun etserkar máawarma ainia nuna numpen nampekuyi.

Nuna wáinkian ti enentáimturmajai. <sup>7</sup>Túrunamtai nayaimpinmaya suntar túrutmiai “¿Urukamtai imiá enentáimtam? Wats, ashí nuwanun paant ujaktatjame. Núnisan yajasma ekenak júana nunasha paant ujaktatjame. Muukésha siátichukait tura kachurisha tiáschak áinia. <sup>8</sup>Nu yajasma wáinkiam nuka yaunchu pujuwiti tura yamaikia juí pujachiat amúamunam tuke játsuk nánkatkachu wánmaya júinkíttiawai. Shuar nuna wáinkiar ni naari tuke iwiaaku pujutai papinium yámankamtaiknumia anujtukchamua nuka nu yajasma ashamkartatui. Nu yajasma yaunchu pujú yamaikia atsayat atak wantinkiattawai’ turutmiai.

<sup>9</sup>‘Nekas neka ainia nu júna enentáimturarti: Siati muukenka siati náintian nakumui. Nu nuwa nuí eketui. <sup>10</sup>Núnisan ni siati muuke siati akupniun nakumui. Kame senku akupniuka nankaamasaru ainiawai. Chikichik tuke akupniuiti tura chíkichka tuke taatsui. Nii taasha núkap tsawant akupkashtatui. <sup>11</sup>Nuyá ashí ukunmanka yaunchu amia nú yajasma wantiniak nujai uchu akupin ajastatui. Túmaitiat chíkich siati akupniujai iruram métek enentáimpramniai. Tura nu yajasma yamaikia atsayat wantiniak akupak umik tuke emesnartinnium wétatui’ turutmiai.

<sup>12</sup>‘Tias kachuri wáinkiam nuka tias akupin tuke akupeenatsna núiti. Niisha nu yajasmajai métek penké ishichik tsawant akupin ajasartatui. <sup>13</sup>Ju tias akupniusha métekrak enentáimiainiak ni kakarmarin yajasma sústartatui nújai sha akupkat tusar. <sup>14</sup>Murikjai sha mesetan najanawartatui. Túrasha Murik nupetkartatui. Niisha uuntjai nankaamas Uunt asa tura núnisan akupniujai nankaamas Akupin asa nupetmaktatui. Tura Niijiai írutraa nu, Yus Winia atí tusa achikma ásar tura Nin tuke umirin ásar Niijiai nupetmakartatui.’

<sup>15</sup>Suntar tuke chichartak turutmiai ‘Tsanirmatai nuwa nayaantsanam uku eketu wáinkiachumek. Nu nayaantsaka ashí nunkanmaya shuáran

nakumeawai. <sup>16</sup>Tura tias káchuka yajamanum wáinkiam nu, tsanirmatai nuwan nakitrar ajapawar misú ikiukiartatui. Ni ayashíncha yuawartatui tura áesawartatui. <sup>17</sup>Nu akupniu enentáin Yuska ni wakeramurín apujsaiti. Nii timia nu umintsáin akupniusha métekrak enentáimprar ni kakarmarín takamtsuk yajaman súatniun enentáimtikramai. <sup>18</sup>Nuwa wáinkiam nuka ashí nunkanmaya akupniun akupeana nu pépruiti.”

### Papirúnia emesramuiti

**18** <sup>1</sup>Nuyá nayaimpinmaya suntar táarun wainkiamjai. Ti kakaram akupin asa nunkancha tsáapin awajsamai. <sup>2</sup>Tura ti kakantar chichaak timiai “Pai, Uunt Papirúnia penké meserai. Tura yamaikia íwianch matsamtaisha ashí yajauch wakaní pujutairísha ajasai. Mujmiai nanamtincha tura ashí yajauch nanamtin ainia nusha nuí pasunmainiawai. <sup>3</sup>Nu péprunmaya shuar tuke tsanirmaua núnisan ashí nunkanmaya shuaran anampratniua núnisan ni ti yajauch turamujai utsuurmai. Núnisan ashí jú nunkanmaya akupin Yúsan iniaisar nijijai tsanirmawarua áinis ániawai. Tura shuarsha ni yajauch wararmajai ti kuítrintin ajasaruiti.” Tu timiai.

<sup>4</sup>Nuyá nayaimpinmaya ti kakantar chichaman antukmajai. “Wfi shuaraitrumna nuka nú peprunmaya jíinkitarum. Túrachkurmeka ni tunaari jumamkirum ni wáitsatniuríncha pachiinkiatarme. <sup>5</sup>Ni tunaarísha ti piak nayaimpiniam jeastatuk ajasai. Tuma asamtai Yus ni tunaarín kajinmatkichuiti. <sup>6</sup>Ni tunáa túramujai métek akikiam ataksha nuna nankaamas métek patattsata. Ni yajauch túramu nijiamchin ashí áararma núnisan nuna nankaamas ti wáitsatin nijiamanch pachimpruram susata. <sup>7</sup>Waantu enentáimtumak yajauchin wararsama nujai métek ti wáitkiastá yamaikia. Tunáan ti túriniaitiat ni enentáinkia enentáimias “Uunt Akupniuitjai. Wajechu asan penké wáitsashtiniaitjai” tu enentáimtumawai. <sup>8</sup>Tuma asamtai ti wárik chikichik tsawantai ni wáitsatniuri tarittiawai. Jákatniusha ti wáitsatniusha tura tsukasha tarí ashí jijiai ekeemankattawai. Uunt Yus ashí Tujincha nu kajerkamú asa nujai asutniáttawai.” Tu timiai.

<sup>9</sup>Ashí nunkanmaya akupin nijijai tsanirmawaru ainia nu ashí yajauchin nijijai wararsaru ásar nu pepru esaak múkuint ajakui eararmai. <sup>10</sup>Ti esaak wáitiakui nuí pachiinkiar wáitsatniun ashamainiak arant wajasar tiartatui “Maa, Papirúnia ti uunt pépruitiat nekas wáitnenmai ajawai. Imiá wárik ni wáitsatniuri tarini.”

<sup>11</sup>Núnisan ashí nunkanam súrin ainia nusha nu péprun ti kuntuts enentáimturar earartatui. Ni surutain itiamun ¿yaki sumarkat? <sup>12</sup>Kame juna itiaru ániawai: kurincha, kuítniasha, kaya shíirmachincha, ti shiir sháuknasha, ti pénker tarachniasha, akupin entsatai shiirmachin yamakaincha kapaaniuncha, sétancha, itiaru ániawai. Núnisan ashí

kuṅkuin numincha, ti shiir awara najanamuncha, ti shíiram numincha, yanḱú jiruncha, penḱé jiruncha, mármur kayancha itiaru áiniawai.

<sup>13</sup>Núnisan ishpiṅnasha, nusháa kuṅkuinniasha, mira kuṅkuinniasha, umutaincha, asuitincha, trikiu nerenchá, tura trikiu ti péṅker nekenmancha itiaru áiniawai. Núnisan áintstai taṅkuncha, murikniasha, kawaincha ni kárurijiai, tura nú arantka shuárnasha suruktinian itiaru áiniawai.

<sup>14</sup>Tura nu péprun tiarmai “Numí neren ti wakeruk súmauya nu yamaikia nuṅ atsawai. Ashí ni kuítrisha tura ashí ni péṅkerisha tuke penḱé amuukayi.” Tu tiarmai.

<sup>15</sup>Ashí nuna súrin armia nu, nuna surukar kuítrintin ajasaru ásar, ti wáitsamun ashamkar arant wajasar earartatui. <sup>16</sup>Túrawar tiartatui “Maa, uunt pépruitiat ti wáitnenmai ajakai. Nuwa ti penḱer iwiarmampra áinis nuyá shuar akuptai tarachin yamakaijiai kapaaku entsarmai. Kurijiaisha kaya ti shíirmachijiaisha tura ti penḱer sháukjaisha ti shiir iwiarmampraruyi. <sup>17</sup>Ti wárik ashí ju kuit amukaiti.” Tu tiarmai.

Ashí uunt kanú kapitántrisha, ashí nayaantsanam katiinia nusha, ashí kanú wiánniusha, tura ashí kanú nérennurisha árantak wajasarmai. <sup>18</sup>Tura pepru esaak múkuint ajan wáinkiar ti kakantar úutainiak tiarmai “Timiá shiir pepru atsuwiti.” <sup>19</sup>Tiar ti kuntuts pujuiniak awatmamar kakantar úutainiak tiarmai “Maa, ti uunt pépruitiat ti wáitnenmai ajakai. Ashí uunt kanu nérentin nayaantsanam niijiai takasar kuítrintin ajasarmai. Tura ti wárik mash emesnarai.” Tu tiarmai.

<sup>20</sup>Antsu nayaimpiniam pujarumna nu, ashí Yus akatramutirmesha, ashí Yusna etserniutirmesha, tura ashí Yus-shuar árumna nu ni wáitsamujai warastarum. Nu wáitsamujai atumin yajauch awajtamsarmena nuna yapajtiurmakurme.

<sup>21</sup>Nuyá ti kakaram nayaimpinmaya suntar ti uunt neketai kayan jukí nayaantsanam ajun timiai “Júnisan uunt pepru Papirúnia emesnar atakka wainniakchatin tuke menḱakattawai. <sup>22</sup>Tura atakka jantsemma piṅkiuisha tampursha shakapsha antunkashtatui. Nu arantcha nuṅkia shuar penḱé takakmaschartatui. Túramtai nekeamusha antunkashtatui. Ashí mitia átatui. <sup>23</sup>Shiripkincha ekeemakchartatui. Nuatma nampersha antunkashtatui. Nuikkia ni shuari súrin arma nu ashí nuṅkanam nanḱaamantu armai. Tura ashí nuṅkanmaya shuaran waweatniua áintsan níiya núnis ajasarat tusa anaṅkawarmai. Túrasha núnisan ti kakarmaitiat ju mash túrunayi.” Tu timiai.

<sup>24</sup>Kame ni akupkamujai péṅker shuar ti mantamnawaru asamtai nu péprunam ashí yaunchu Yusna etserniu numpesha, ashí Yus-shuara numpesha tura péṅker shuar ashí nuṅkanam maamu ainia nuna numpesha nuṅ paant wáinkiamniaiti.

**19** <sup>1</sup>Nuyá nayaimpinmaya ti untsurí aents kakantar untsumainian antukmajai.

“Ju ti shiir enentáimtumainti. Yuska uwempratniuncha, nekas shiir átinniasha, nan̄kaamaku átinniasha, tura ashí kakarmancha nekas nérenniuiti. <sup>2</sup>Niisha aya nekas péñker túratniua nuna túrin asa ti nukap tsanirmaun ashí shuaran tsanirijjiai utsuun ti asutiáyi. Nin ti wáitkias ashí ni shuari máawarman yapájmiátkaiti” tiarmai.

<sup>3</sup>Ataksha kakantar unsumainiak tiarmai:

“Ti shiiraiti. Nii wáitsatin ji esaak tuke kajintsuk múkuint ajawai.”  
Tu tiarmai.

<sup>4</sup>Tuñiakui paintikuatru uunta nu tura kuatru tan̄kusha nun̄ká piniakumawar akupin pujutainium Yus pujana nuna shiir awajsarmai. Túrawar “Imiá nekasaiti. Ti shiir túriniaitme” tiarmai. <sup>5</sup>Akupin pujutainmaya chícham jíinkimiai.

“Yusna takarniutirmesha tura ni umirniutirmesha, úuntaitkiurmesha úchitkiurmesha kapitíánitkiurmesha pééjchachitkiurmesha, ii Yusr̄i tuke shiir awajsatarum.” Tu timiai.

### Murik nuatnaikiatin namperi

<sup>6</sup>Nuyá ti untsurí aents chichainiak kanusa uuntrī nujan̄krak téter ajá núnisan̄ antukmajai. Ti kakaram ipiamta núnis amai.

“Tí shíiraiti, tiarmai. Ii Uuntrī Yus ashí tujincha asa ashí akupkatniun nan̄kaamayi. <sup>7</sup>Tuma asamtai shiir enentáimsartai. Murikiu anajmarmarī shiir iwiarnarmatai ni nuatnaikiatin tsawantrī jeayi. Tuma asamtai ti shiir warasar nincha shiir awajsatai. <sup>8</sup>Murikiu anajmarmar̄inkia iwiarnarti tusa ti shiir pushí sunasmai. Nusha yamaram máatrachu asa ti pújuiti.” Tu tiarmai.

Nu pushí Yus-shuar péñker túramun nakumeawai.

<sup>9</sup>Nuyá nayaimpinmayā suntar turutmiai “Ju áatrarta: “Murik nuatma námpernam ipiaamu ainia nuka ti shiir warasarti.” Tu aartá, turutmiai. Jūka Yus timia asa imiá nekasaiti.”

<sup>10</sup>Takui nu suntaran shiir awajsataj tusan tikishmatramjai. Túramtai turutmiai “Peñke áinkiaip. Wisha Yusa yáintrīntjai ámijjiai métek tura yatsumjaī métek Kristu nekas chichamen̄ tuke umirin ainia nu. Yúsak shiir awajsatniuiti.” Tu turutmiai.

Kame Kristu imiá nekas timia nuna ashí Yúsnan etserainia nú shuar paant awajkartin áiniawai.

### Kaway pújunam eketna nu

<sup>11</sup>Nuyá nayaimp uranniun wainkiamjai. Nūi kaway puju wantinkiamai. Nu kawaynium ekeema nuna naarī Ti Peñker Umin tutaiyi. Núnisan̄ Ti Nekas Turin tutaiyi. Ti peñker Akupin asa aya nekas péñker túrak mesetan najanaiti. <sup>12-13</sup>Ni jiīsha jijjiaī métek keeárm̄ai. Múuknumsha akuptai tawaspan untsurí etsen̄krakuyi. Nūi ni naarī Yus Chicham



áarmauyi. Túrasha tana nuna Niñki takamtsuk nekaamai. Numpajají enkerman entsaruyi. <sup>14</sup>Ti untsurí nayaimpinmaya sntar mesetnum weena áintsar kawainium ekemkar ti shiir pújun entsaru Nin nemariarmai. <sup>15</sup>Nu suntara Uuntri weneeya, ashí nunkanmaya yajauch shuuran máatin, puniá mai ere tsakatskatin jínmiyai. Tura jirujají asutiátniua áintsan ti kakaram akupkattawai. Túrak Ashí Tujincha Yusa kajetairi ti kakarma nujají shuáran asutiáttawai. Uwa nekenkar ijiuratniua áitkiasan wáitkiasartatui. <sup>16</sup>Ni pushirincha makuincha ni naari áarmauyi: Ashí Akupniun Akupin tura Ashí Uunta Uuntri.

<sup>17</sup>Nuyá tsawái-nantunam sntaran eketun wainkiamjai. Nusha nayaimpiniam nanamtin nanamainian kakantar untsuak timiai “Yusa uunt namperin yurumáitiarum. <sup>18</sup>Akupniu namañkéssha yuítiarum. Suntara kapitántri namañkéssha, kakaram sntara namañkéssha, kaway namañkéssha tura eketainia nuna namañkéssha, kame ashí shuara namañkéssha nankaamantu ainia núnasha tura penké shuar ainia núnasha yuítiarum.” Tu untsukmai.

<sup>19</sup>Tura nuyá Entsaya Yajasmacha tura jú nunkanam akupin ainia nunasha ashí ni sntarijijají wainkiamjai. Niisha kawainium eketka nujají tura nuna sntarijijají mesetan najanatai tusar iruntrarmai. <sup>20</sup>Tura nu mesetnum Yajasmasha tura Kukariá Yajasmasha, penké ántar yúsnan etserniua nu, mai achinkiarmai. Nuikkia Entsaya Yajasma ni kakarmarin súam nu Kukariá Yajasmaka aents tujintiamun ti turak shuáran anañkawarmai. Túramtai nu shuar Entsaya Yajasma náarin apujmamsar ni nakumkamurin shiir awajsarmai. Tuma asamtai Entsaya Yajasmacha tura Kukariá Yajasmacha íwiakuk asuprijijají ti kea nu ji-antumianum apeáwarmai. <sup>21</sup>Chíkichka kawainium eketkanumiá puniá tsakatskatin weneya jijnmia nujají mantamnawarmai. Túramtai nanamtin ni ayashin yuawar ejemakarmai.

### Kristu mir uwí jú nunkanam akupkattawai

**20** <sup>1</sup>Nuyá nayaimpinmaya sntar táarun wainkiamjai. Nusha nánkatkachu waa yawirin tura jinikiatai jirun kampurman takakuyi. <sup>2</sup>Nu sntarsha Ti Kajen Yajasma jiru kampurmajají jinkiamai. Nu Yajasma iwianchi kapitántri Satanas tutainti. Yáunchuya-napiti niisha. Tura nu iwianchin jinikiá mir uwí pujusat tusa <sup>3</sup>nánkatkachu waaanam epenmiyai. Tura waiti uraichminian anujtukmai. Mir uwí nankaamatsain ashí nunkanmaya shuuran anañkawarain tusa túramai. Antsu mir uwí nankaamasmatai ishichik tsawant ankant akupnaktiniaiti.

<sup>4-5</sup>Nuyá akupin pujutainium pujuinian wainkiamjai. Tura shuara túramurin írsarat tusa kakaram sunasarmai. Tura núnisan muuke tsupirka maamu wakanincha wainkiamjai. Nusha Yusa chichamen etserainiak tura Kristu chichamencha etserin ásar maamu armai. Niisha

Entsayá Yajasmancha ni nakumkamuríncha tikishmatracharu armai. Núnisan̄ náaríncha nijaiñiumsha tura uwejnnumsha anujmampracharu armai. Nu shuar ataksha nantakiar emka nantaktin tsawantnum pachiinkiarmai. Túmainiak Krístujai métek mir uwí akupeamun wainkiamjai. Antsu chíkich jákaruka mir uwí nan̄kaamatsain̄ nantakcharmai. <sup>6</sup>Antsu emka nantaktin tsawantnum pachiinkiarua nú shuar, ti penker áimak, ti shiir warasmin ániawai. Nu shuarka jimiara jákatniunam pachiintsuk Yusna tuke takarin tura núnisan̄ Krístunu tuke takarin ártatui. Tura Krístujai métek mir uwí akupkartatui.

<sup>7</sup>Tura mir uwí nan̄kaamasmatai uunt iwianch urani akupnaktatui. <sup>8</sup>Túram ashí nun̄kanmayā shuáran anan̄kawartaj tusa jíinkittiwai. Kuk nun̄kanmasha tura Makuk nun̄kanmasha ashí pujuinia nuna anan̄kawartatui. Tura mesetan najanataj tusa ni suntarín nekapmarchamnia ti untsurí irurtatui. <sup>9</sup>Tura ashí nun̄kan enetak Yushuar matsamtaincha tura Yus ti aneamu pépruncha mash éñkekarmai. Túramtai Yus nayaimpinmayā jinia akuptuk mash áesawarmai. <sup>10</sup>Tura iwianchi kapitíántri, nin anan̄kawarmia nu, asuprijiaī keá ji-antumiannum apenámai. Nu yaunchusha Entsayá Yajasmasha tura Kukariá Yajasmasha, penké ántar yusnan etserniua nu, nuí apenáwarmai. Nuísha tsawaiša káshisha iniannatsuk ti wáitsartatui.

### Ashí amúamunam súmamtikiatin tsawant

<sup>11</sup>Nuyá akupin pujutain úntan tura ti pújun wainkiamjai. Tura nuí pujancha wainkiamjai. Niisha ti kakaram asamtai nun̄kasha nayaimpisha aya menkarar tuke atsúarmai. <sup>12-13</sup>Tura túrunatsain̄ nayaantsanam jákarua nusha jíinkiarmai. Núnisan̄ iwiarsamunam jaka pujuinia nusha jíinkiarmai. Tura jákaruncha, nan̄kaamantu arma nunasha tura penké shuar arma nunasha, ashí wainkiamjai. Tura Yusaī naka wajaarmai. Nuyá ashí shuar túramu aakma papí urantrarmai. Tura nu papinium aarma nujaī métek ashí ni turamurí paant nékaneakui súmamtiknawarmai. Tura chíkich papisha tuke iwiaaku pujustin papí urankamai. <sup>14</sup>Nuyá jákatin amuukati tusa ji-antumiannum apenámai. Nu ji-antumiannum wétin jimiara jákatin tútainti. <sup>15</sup>Tura ashí shuar ni naarī tuke iwiaaku pujustin papinium atsúarma nusha nuí apenáwarmai.

### Nayaim yamaram tura yamá nun̄ka

**21** <sup>1</sup>Nuyá nayaimpisha tura nun̄kasha menkaramtai nayaim yamarman tura yamá nun̄kancha wainkiamjai. Tura nayaantsasha atsumai. <sup>2</sup>Wi, Juan, ti shiir péprun, Yusnumiá yamaram Jerusarénkan nayaimpinmayā táarun, wainkiamjai. Anajmarma ni áishrin̄ inkiuntaj tusa ti shiir iwiarmampra áintsan̄ ti penker iwiamuyi. <sup>3</sup>Nayaimpinmayā ti kakantar chichaamun antukmajai. “Iisiá, Yus

yamaikia aentsjai pujawai. Tuke niijiai pujakui ashí ni shuari ártatui. Tura niijiai tuke pujak nekas tuke ni Yusri átatui. <sup>4</sup>Yus ni neajkin ujurturartatui. Tura nuik amia nuka ashí amuukarmatai jákatniusha, úttincha, wáitsatniusha, tura najaimiatniusha atsuttawai.”

<sup>5</sup>Tura akupin pujutainium ekema nu “Iístá, Wi ashí penké yamarman nájanjai” timiai. Nuyá nu arantcha turutmiai “Juka imiá nekas asamtai aartá. Nekas enentáimtustiniaiti.” <sup>6</sup>Ataksha turutmiai “Yamaikia mash uminkiyai. Wiitjai. Yámankamtaiknumiá amúanmasha tuke pjuwitjai. Wisha A rétranmaya Y rétranam ashí retra áintsaitjai. Ashí kitiama núnaka tuke iwiaaku pujutai entsan penké kuítchajai áartatjai. <sup>7</sup>Nupetmakunka ashí yamarma juna mash susattajai. Wisha ni Yusri átatjai. Núnisan niisha winia uchir átatui. <sup>8</sup>Antsu sápijkia, Yúsán enentáimtichusha, yajauchin máatrasha, mankartincha, tsanirmatan pujurniusha, wawekratniusha, ántar-yusan tikishmatniusha, tura ashí wáitrincha asuprijiai keá ji-antumiannum apenáwartatui. Nuka jimiará jákatin tútainti.”

### Yamaram Jerusaré

<sup>9</sup>Nuyá siati suntar pinin amúamunam wáitkiastinjai piakun takakua nuyá chikichik taruti túrutmiai “Winitiá. Murikiu anajmarmarin iniaktustatjame.” <sup>10</sup>Taku mesekranam naint yakí juruki Yusnumiá ti shiir Jerusarén pepru nayaimpinmaya táarun iniaktursamai. <sup>11</sup>Nu péprusha Yusa wincharijiai tsáapniniuyi. Nu tsáapnincha kaya ti shífirmachia núnis jaspi kaya nuní saar asa ti tsáapniniuyi. <sup>12</sup>Pepru yantamesha ti yakí pénkramuyi tura wáitiri tuse amai. Tura nu wáitinium suntar wajatiarmai. Nu wáitinmasha Israer-shuara uuntri tuse armia nuna naari áarmauyi. <sup>13</sup>Nantu tátainmaanī menaintiu waiti amai. Nantu akatainmaanīsha menaintiu waiti amai. Nunkaanīsha menaintiu waiti amai. Arakaanīsha menaintiu waiti amai. <sup>14</sup>Ti uunt kaya tuse apujsamu armai. Tura nuī ekenir pénkramuyi. Nu tuse kayanam Murikiu akatramuri tuse armia nuna naari áarmauyi.

<sup>15</sup>Suntar wijiai chichaua nu, nekapmatain kurin takakuyi. Nujai pépruncha, wáitirincha, tura pénkramurincha nekapmartiniuyi. <sup>16</sup>Pepru esantīsha wan kantīsha yakirīsha mash métekrak armai. Suntarsha péprun nekapmataijiai nekapmaram esantīsha wan kantīsha tura núnisan jeamkamu yakirīsha jimiará mir jimiará siantu (2.200) kirúmitru amai. <sup>17</sup>Nuyá pénkriincha nekapmarmai. Suntar aents nekapmataijiai nekapmaram sesentikuatru (64) mitru amai. <sup>18</sup>Nu pénkramusha jaspi kayajai najanamuyi. Péprusha aya kúrikiyi. Nu kuri ti penker sáarauyi. <sup>19</sup>Pen apujtukma kayasha ti shiir kaya ainia nujai najanamu asa ti shiir iwiamuyi. Emka nu jaspi káyauyi. Jímiara nusha sapiru káyauyi. Menaintiua nusha ákata káyauyi. Kuarua nusha ismirártauyi.

<sup>20</sup>Senkua nusha únise káyauyi. Saisa nusha kurnarinia káyauyi. Siatia nusha krisuritiu káyauyi. Uchua nusha periru káyauyi. Nuiwia nusha tupasiu káyauyi. Tiasa nusha krisuprasa káyauyi. Áuntsea nusha jasentu káyauyi. Tusea nusha amatísta káyauyi. Ti kayaim apujsamu asamtai ti shírmachiíyi. <sup>21</sup>Pepru wáitirí tuse ainia nu, ti shiir nayaantsanmaya shaukjaí chikichik najanamu armai. Pepru jintísha aya kúrikíyi. Nu kuri ti penker sáarauyi.

<sup>22</sup>Yusa Uunt Jeencha wainkiachmajai. Antsu nu peprunam Uunt Yus ashí tujincha nu tura núnisan Muriksha nu péprun pímiutkui takamtsuk Níiniuyi. <sup>23</sup>Nu péprunmasha tsawai-nantusha kashí-nantusha atsumchamai. Antsu Yusa wincharí tsáapin awajmiai. Núnisan Muriksha tsáapin awajmiai. <sup>24</sup>Nu tsáapnijjaísha ashí nunkanmaya shuar wekasartatui. Tura ashí nunkanam akupin ainia nusha nuí yujainiak ni pénkerijjaí nuna shiir awajtuiniawai. <sup>25</sup>Tura kashi atsá asamtai tuke tsawaiti. Tuma asamtai wáitirí tuke epenchamu ártatui. <sup>26</sup>Tura ashí nunkanam pénker ana nuna nuí itiaartatui. <sup>27</sup>Tura yajauchikia penké wayashatatuí. Muíjmiainian túrincha tura anankartincha penké wayachartatuí. Antsu áyatik shuar tuke iwiaaku pujutai papinium naari aarma ainia nuke wayawartatuí. Nu papincha Murik takakui.

**22** <sup>1</sup>Nuyá suntar tuke iwiaaku pujutai entsan ti sáaran iniaktursamai. Nusha uunt akupin pujutainmaya ti saawi jiiinmiai. Nu pujutaisha Yusna tura Muriknauyi. <sup>2</sup>Pepru jintincha tura entsá mai paen tuke iwiaaku pujutai numi wajamai. Nusha ashí tuse nantutin neremai. Ni nukésa ashí nunkanmaya shuar tsuámatainti. <sup>3-4</sup>Ashí yajauchia nuka atsuttawai. Uunt akupin pujutai, Yúsnasha Murikniasha, nuín aa asamtai ni shuari ti paant wainiainiak tikishmatrartatuí. Tura nijjaíncha ni naari anujmamkartatuí. <sup>5</sup>Tura káshisha atsuttawai. Nuí pujuinia nuka shiripkincha etsancha atsumchartatuí. Uunt Yúsak tuke tsáapin awajtiatuí. Tura ni shuari tuke iniannatsuk akupkartatuí.

### Jesukrístu tátinrí penké nuntumsai

<sup>6</sup>Nuyá suntar turutmiai “Ju chicham ti nekas asa nekas enentáimtusminiái. Uunt Yus yaunchu níiniun etserniun ni chichamen enentáimtikramia núnisan yamaikia ni suntarin akuptuk wárik túrunatta nuna ashí ni shuarin ujakuíti.”

<sup>7</sup>“Ti wárik winittiajai” tawai Murikkia.

Shuar ju papinium Yusa Chichame áarman umirna nuka shiir warasminiái.

<sup>8</sup>Wi, Juan, juna mash ísan mash antukmajai. Tura mash ísan antukan nayaimpinmaya suntar iniaktursama nuna shiir awajsataj tusan tikishmatramjai. <sup>9</sup>Túram turutmiai “Penke áinkiaip. Wisha Yusa

yáin|ntjai ámijiai métek tura yatsumjiai métek. Yúsnan etserin ásar tura ju papínium áarma nuna umirainiak Yusa yáin|ni ániawai niisha. Yúsak shiir awajsatniuiti.”

|  |

<sup>10</sup>Nuyá ataksha turutmiai “Ju papínium aarma Yusna asamtai úukam ikiusaip. Ashí túrunatin tsawant ishichik ajatesai. <sup>11</sup>Nu jeatsainkia yajauch shuarka tuke yajauch túruki wetí. Núnisanni mujimianian túraka tuke túruki wetí. Antsu penkeran túraka penkeran túruki wetí. Núnisan esetar enentáimniusha tuke esetar Yusjiai wekasati.”

<sup>12</sup>Muriksha tawai “Eta, ti wárik winittiajai. Túran ti shíirmachin ashí penker túramujai métek súsatniua nuna takukin winittiajai. <sup>13</sup>Wiitjai. Yámankamtaiknumiá amúanmasha tuke pujuwitjai. Wisha A rétranmaya Y rétranam ashí retra áintsaitjai.” Tu tawai.

<sup>14</sup>Ni pushiri penker nijiamatniua núnisanni penker túrinia nú shuar shiir warasniiaiti. Nu shuar nu pepru wáitirincha wayamniiaiti. Túrar tuke iwiaaku pujutai numinmaya yuamniiaiti. <sup>15</sup>Tura antsu Yúsán enentáimtachuka, wawekratniuka, tsanirmatan pujurainia nuka, mañkartinkia, ántar-yus tikishmatniuka, tura ashí shuar wáitian wararainiak tuke túrin ainia nuka añ matsatainiak penké wayachmin ániawai.

<sup>16</sup>“Wi, Jesus, ashí Yus-shuaran ujakarat tusan winia suntarun akupkajai. Wikia Tawit Weeitjai. Túrasha Tawitia Úun|ntjai. Wikia ti tsáapin yaa, yáñkuamia áintsanñketjai.” Tu tawai.

<sup>17</sup>Yusa Shiir Wakanñisha tura Murik anajmarmasha “Winitiarum” tuiniawai.


Tura juna ántana nusha “Winitiarum” tití. Tura ashí kitiama nuka winití. Wakerakka tuke iwiaaku pujutai entsan penké kuítchajai umartí.

<sup>18</sup>Ashí shuar ju papínium Yus-Chicham aarma nuna antukarun juna ujaajai: Shuar jui áarman chikichan pataakka Yus nin ti wáitsatin jui aarma nuna patattsattawai. <sup>19</sup>Núnisanni shuar jui aarman emeneakuñkia Yus ni naarin iwiaaku pujutai papiniumiá japirattawai. Tura ti shiir péprunam wayatniun suritkiattawai. Nu péprusha tura nu papisha jui paant ujakma ániawai.

<sup>20</sup>Jú papí áantratniun ujakua nu tawai “Eta, ti wari winittiajai.”

Pai, núnisanni atí. Wari winitia, Uunt Jesúsá.


<sup>21</sup>Ii Uun|ni Jesukrístu atumniasha shiir yainmakarti. Nuke atí.



**PRIMER VIAJE MISIONERO DE PABLO**



**SEGUNDO VIAJE MISIONERO DE PABLO**




**TERCER VIAJE MISIONERO DE PABLO**




**VIAJE DE PABLO A ROMA**

# El Templo en el tiempo de Jesucristo



Plano del Interior del Templo



1. La Mesa y los Panes de la Proposición
2. El Candelabro
3. El Altar del Incienso
4. El Velo
5. El Arca del Pacto
6. Los Querubines



